

清
實
錄

世宗憲皇帝實錄(二)

卷七七至卷一五九
雍正七年至十三年

清實錄

第八冊

中華書局影印

清 實 錄

(第 八 冊)

世 宗 實 錄 (二)

*

中 華 書 局 出 版

(北京王府井大街36號)

北京市中國書店發行

中國建築工業出版社印刷廠印刷

*

787×1092毫米 1/16·60 3/8 印張

1985年11月第1版 1985年11月北京第1次印刷

印數 0,001——1,500 冊

統一書號: 11018·1355—8 定價: 45.00 元

清實錄第八冊目錄

世宗憲皇帝實錄(二)

卷七七	雍正七年正月	一	卷九二	雍正八年三月	二二九
卷七八	雍正七年二月	二三	卷九三	雍正八年四月	二四〇
卷七九	雍正七年三月	三〇	卷九四	雍正八年五月	二五五
卷八〇	雍正七年四月	四五	卷九五	雍正八年六月	二七〇
卷八一	雍正七年五月	六一	卷九六	雍正八年七月	二八二
卷八二	雍正七年六月	八〇	卷九七	雍正八年八月	二九五
卷八三	雍正七年七月	九七	卷九八	雍正八年九月	三〇三
卷八四	雍正七年閏七月	一二七	卷九九	雍正八年十月	三一二
卷八五	雍正七年八月	一三〇	卷一〇〇	雍正八年十一月	三二五
卷八六	雍正七年九月	一四三	卷一〇一	雍正八年十二月	三三六
卷八七	雍正七年十月	一五八	卷一〇二	雍正九年正月	三四八
卷八八	雍正七年十一月	一七六	卷一〇三	雍正九年二月	三五八
卷八九	雍正七年十二月	一九〇	卷一〇四	雍正九年三月	三七五
卷九〇	雍正八年正月	二〇九	卷一〇五	雍正九年四月	三八五
卷九一	雍正八年二月	二二八	卷一〇六	雍正九年五月	三九六
			卷一〇七	雍正九年六月	四〇八
			卷一〇八	雍正九年七月	四二四
			卷一〇九	雍正九年八月	四四五
			卷一一〇	雍正九年九月	四五八

世宗實錄

卷一一一	雍正九年十月	四七一
卷一二二	雍正九年十一月	四八六
卷一二三	雍正九年十二月	五〇三
卷一一四	雍正十年正月	五一五
卷一一五	雍正十年二月	五二四
卷一一六	雍正十年三月	五四〇
卷一一七	雍正十年四月	五五一
卷一一八	雍正十年五月	五六〇
卷一一九	雍正十年閏五月	五七五
卷一二〇	雍正十年六月	五八三
卷一二一	雍正十年七月	五九二
卷一二二	雍正十年八月	六〇四
卷一二三	雍正十年九月	六一三
卷一二四	雍正十年十月	六二五
卷一二五	雍正十年十一月	六四〇
卷一二六	雍正十年十二月	六五〇
卷一二七	雍正十一年正月	六六二
卷一二八	雍正十一年二月	六七〇
卷一二九	雍正十一年三月	六七七
卷一三〇	雍正十一年四月	六八六
卷一三一	雍正十一年五月	六九八
卷一三二	雍正十一年六月	七〇五
卷一三三	雍正十一年七月	七一四
卷一三四	雍正十一年八月	七二四
卷一三五	雍正十一年九月	七三二
卷一三六	雍正十一年十月	七三九
卷一三七	雍正十一年十一月	七四七
卷一三八	雍正十一年十二月	七五四
卷一三九	雍正十二年正月	七六三
卷一四〇	雍正十二年二月	七六八
卷一四一	雍正十二年三月	七七六
卷一四二	雍正十二年四月	七八五
卷一四三	雍正十二年五月	七九二
卷一四四	雍正十二年六月	八〇〇
卷一四五	雍正十二年七月	八〇七
卷一四六	雍正十二年八月	八一六
卷一四七	雍正十二年九月	八二四
卷一四八	雍正十二年十月	八三三

大清世宗敬天昌運建中表正文武英明寬仁
信毅大孝至誠憲皇帝實錄卷之七十七

監修總裁官光祿大夫經筵講官大學士戶部尚書總理事務三寶通加十五級臣鄂爾泰

總纂官光祿大夫經筵講官大學士戶部尚書總理事務三寶通加十五級臣鄂爾泰

纂修官光祿大夫經筵講官大學士戶部尚書總理事務三寶通加十五級臣鄂爾泰

纂修官光祿大夫經筵講官大學士戶部尚書總理事務三寶通加十五級臣鄂爾泰

纂修官光祿大夫經筵講官大學士戶部尚書總理事務三寶通加十五級臣鄂爾泰

敕修

雍正七年己酉春正月丙午朔

上於宮中拜

神畢御殿王以下文武各官外藩王及使臣等

上表朝賀停止筵宴○朝鮮國王李昫遣陪

臣尹淳等表賀冬至元旦

萬壽節及進歲貢禮物宴賚如例○諭蒙古王

等朕思從前所定外藩扎薩克蒙古王等之

俸祿比於內地王等較少者必非以內外之

故遂有多寡之分也或因爾蒙古王等人員

衆多且在外藩居住費用尚爲儉約而國家

錢糧亦或有不敷之處故將爾等俸祿從少
定議耳今朕恭承

上天垂佑

聖祖仁皇帝貽庥天下太平無事數年以來屢

登豐稔國家錢糧頗爲饒裕朕爲統馭天下

萬物之主凡事當周詳籌畫而行爾蒙古王

等以下扎薩克一等台吉以上之俸令著概

行加增一倍賞給再平常一等台吉從前俱

無俸祿今亦著照扎薩克一等台吉等所食

百金之俸賞給此乃朕特行加恩爾等之處

朕亦未敢遽爲定例總以國家錢糧之出入

數與不敷爲定耳嗣後著戶部理藩院於每

年歲底將仍給與原俸或加賞之處會同具

奏請旨朕於臨時的降諭旨○戊申諭兵部

各省守備內有操守廉潔漢仗去得諳練營

務熟習水師堪用遊擊之員爾部行文該提

督出具考語分別水師陸路填寫年歲籍貫

履歷照保舉副將參將分定等第之例開列

一等者咨部俟降諭旨再行調來引見所保人員務期秉公據實毋得瞻顧徇私僅保舉之後有改易前轍不思奮勵精進者亦照副將參將更換等第之例咨部改定以副朕簡選任使之至意○己酉以理藩院侍郎納延泰兼理太僕寺卿事○庚戌諭吏部臺灣地方遠隔重洋全在道府廳縣各得其人而該員又須熟悉風土情形殫心辦理於地方始有裨益向例文員俱以三年為滿後經原任

總督滿保條奏將三年任滿之員加銜再留三年所以慎重海疆俾諳練之人久於其任也今據總督高其倬摺奏臺員以六年為滿而調任之時渡海而往即須數月任滿之後候缺挨陞以及交盤渡海又或一二年不等是前後合計須八九年且臺灣之例不帶家口其父母妻子隔越海洋未免有所牽掛應否請以四年為滿等語朕思臺灣道府廳縣等官自宜選用熟習諳練者然定期六年為

滿又加以候缺交盤渡海之期實為太久今再四思維臺灣文員自到任之日為始將滿一年之期著該督撫於閩省內地官員內揀選賢能之員乘冬月北風之時令其到臺新舊協同辦理半年之內大約可以熟悉地方情形則令舊員乘夏月南風之時回至內地補用將來接任之員俱照此更換該員到臺協辦之時俱一體算俸并給與俸銀及養廉之項如此則該員在臺前後不過二年為期甚近而更換之員先往協辦又可習練地方事宜似有裨益其道府大員作何請旨揀選同知以下等官作何銓選調補及量加議敘之處該部詳悉妥議具奏○辛亥祈穀於上帝

上親詣行禮○順天府進春○雲貴廣西總督鄂爾泰摺奏十月二十九日恭遇

萬壽令節滇南省城五色卿雲光燦捧日經辰已午三時至十一月朔絢爛倍常凡呈見兩

日隨據布政使張允隨詳稱楚雄府之楚雄廣通兩縣姚安府之姚州及大姚定邊兩縣又順寧府知府傳達等先後呈報皆同誠屬從來未有之嘉瑞奉

上諭朕每遇此祥瑞蒙

上天慈恩自應感喜然實絲毫不敢慶幸惟倍加敬畏之心況此嘉祥實係卿忠誠所感而獻於朕壽日者正表卿愛戴之心也○壬子世祖章皇帝忌辰遣官祭

孝陵調雲南按察使元展成爲廣西按察使司按察使廣西按察使常安爲雲南按察使司按察使喀爾喀車臣汗冊卜登拜音珠爾遣使進九白年貢宴賚如例○癸丑諭戶部朕聞糧船過淮所費陋規甚多有一幫費至三四百金者旗丁既多苦累勢必多索於民甚爲漕政之弊嗣後著派御史二員前往淮安專司稽察之任不許官吏人等向旗丁額外需索以致擾累其糧艘攜帶物件除照

例許帶外該旗丁如有夾帶私鹽及違禁等物者亦著該御史稽察但不得過於吹求以致糧運遲滯至糧船抵通之時其該管衙門官吏及經紀車戶人等恐有額外需索陋規者亦著派御史二員前往稽查差往淮安之員著於二月初派往差往通州之員著於三四月內派往不必拘定滿漢各一員著都察院按期開列請旨○甲寅諸王大臣等以滇省卿雲呈現上表奏賀竝請宣付史館得旨

朕治天下以實心實政爲務不言祥瑞屢頒諭旨甚明今據雲貴廣西總督鄂爾泰摺奏恭逢萬壽令節雲南四府三縣卿雲呈現又引孝經援神契之語曰天子孝則卿雲見朕之事

親不敢言孝但自藩邸以至於今四十餘年誠敬之心有如一日祇此一念可以自信朕每承

天眷昭示嘉祥感激慶幸之中益加儆惕茲逢

卿雲之瑞實愈增朕心之敬畏鄂爾泰公忠體國實爲不世出之名臣數年來節制滇黔等省化導所屬官吏人人奉公盡職懷忠君親上之心是以仰邀

天貺卿雲見於滇省正所以表著該省官吏敬恭協和之忱悃也此則朕心深爲嘉悅者今諸王大臣等奏請宣付史館朕之允行者非欲誇示於衆也蓋以天人感召之理捷於影響該督正已率屬有忠愛之丹誠則該省受福迎祥有光昭之瑞應朕願內外大小臣工均以鄂爾泰爲法且願遠近各省官民等聞風慕義興孝勸忠人人共受上天之福佑乃朕心之所謂上祥大瑞也 諭禮部

壇
廟之中最宜嚴肅聞祭祀之先即在

壇

廟中演禮雖意在嫻熟禮儀而實非潔齋虔享

之義嗣後

壇

廟祭祀之先應於何處演禮著該部議奏尋議謹查

天壇外圍牆內凝禧殿原係預備演禮之所嗣後各

壇

廟祭祀應令執事等官仍照舊例於前期二日赴凝禧殿演禮前期一日停其復至

壇

廟演習如有特加祭祀大典先期於神樂觀潔淨寬敞處演禮永遠遵行從之 乙卯孟春 享

太廟

上親詣行禮遣官祭太歲之神 丙辰

上幸圓明園 丁巳諭內閣滿漢內閣大學士

俱各全備辦理事務亦甚屬妥協無容再爲增添朕因

聖祖仁皇帝時。所有年久老臣。目今在朝者甚少。時深注念。禮部尚書陳元龍。左都御史尹泰。歷事

聖祖仁皇帝多年。屢經任使。今雖年近八旬。而精力尚健。特加恩授爲額外大學士。以示朕優眷老臣。成全耆舊之至意。擢國子監司業牧可。登在刑部額外侍郎內行走。戊午。諭內閣。大學士陳元龍之子陳邦直。向以年少輕浮。罷斥回籍。今經數年。諒已悛改。朕念陳元龍年近八旬。只此一子。又在原籍。無人侍奉。著將陳邦直復還編修之職。令其來京。交與伊父教誨管束。并令掌院學士。時加訓導。以玉成之。己未。以上元節。賜外藩科爾沁翁牛特。四子部落鄂爾多斯扎魯特。喀爾喀阿霸垓。阿霸哈納。敖漢。毛明安。克西克騰。高齊。武吳。喇忒。阿祿。科爾沁。喀喇沁。土默特。厄魯特。巴林。圖爾古特。青海。厄魯特。蘇尼特。輝特。烏朱穆秦。杜爾伯特。哈密。王。貝勒。貝子。

公額駙。台吉。塔布囊等。及內大臣。大學士。侍衛等宴。諭兵部。福建。臺灣。戍守之兵丁。父母妻子。留在內地。前已加恩。每月給與米糧。以資養贍。聞臺兵之例。每月將所領錢糧。扣留五錢。於內地爲養贍家口之用。朕思兵丁遠涉海洋。所得餉銀。又復扣除。以養家口。恐本身用度。或有不敷。今沛特恩。於駐臺兵丁。每年賞銀四萬兩。爲養贍家口之用。著總督等。均勻分派。按期給發。俾兵丁本身食用。既得寬舒。而父母妻子。之在內地者。又得養贍。以示朕恤兵賞勞之至意。晉封科爾沁輔國公烏爾呼滿爾爲固山貝子。庚申。

上詣

恩佑寺行禮。諭禮部。山川之神。錫福於地方。百姓。是以自古帝王。皆誠心展祀。以答神貺。即如向來盛京之地。旱潦不時者。凡六載。康熙五十九年。朕奉

皇考命。躬詣

祖陵道經山麓謁北鎮廟潔蠲致祭。因捐貲庀工載修廟宇。囑令地方官員虔恭致祭。自康熙六十年以至於今。盛京年穀悉登豐稔。又如黃河之神虔誠禱祀。果見安瀾有慶。萬姓寧居。皆神祇垂佑。顯然昭著。纖毫不爽者。此蓋以目前一二事而言。其他難以枚舉也。古稱江海爲百川之長。而湖廣境內西南數省之水。匯入大江。又爲川澤之總會。凡屬地土民人。及舟楫行旅。皆仗江神默佑。保護安寧。允宜修建廟宇。按時致祭。以崇報享。著湖廣總督會同湖北湖南巡撫確查妥議。南北兩省應於何處各建廟宇。或舊有祠廟。敬謹興修。皆動支公帑辦理。此朕虔禱神祇。護國佑民之意。竝非諂媚以求一己之福也。并令該督撫曉諭居民。不得私結社會。妄事祈求。以滋褻慢。調陝西西安左翼漢軍副都統明白。爲正黃旗蒙古副都統。正黃旗蒙古副都統保德。爲陝西西安左翼漢軍副都統。乙

丑以正藍旗護軍叅領僧保署正白旗滿洲副都統。己巳諭內閣雲貴廣西總督鄂爾泰節制滇黔。公忠體國。化導所屬官吏奉公盡職。是以

天錫卿雲之瑞。應表著該省官員敬恭協和之忱。惻鄂爾泰及提督郝玉麟表率訓導通省文武屬員。而滇黔兩省官員均能遵奉上司之教誨。殫心奉職。應加特恩。以示優獎。鄂爾泰著由一等阿達哈哈番超授爲三等阿思哈尼哈番。郝玉麟著由拖沙喇哈番授爲拜他喇布勒哈番。滇黔兩省巡撫提督總兵官俱著加二級。文官自知縣以上。武官自千總以上。俱著加一級。凡受恩賜者。益當敬謹。勉以仰承。

上天之貺。從茲遠近臣工感慕興起。則人人受福凝祥矣。以鑲白旗漢軍都統鄂善爲左翼前鋒統領。廣州將軍石禮哈爲鑲白旗漢軍都統。正黃旗漢軍副都統常明緣事降調。

以原任四川布政使管承澤爲正黃旗漢軍副都統 賞朝正外藩蒙古王貝勒貝子公額駙台吉塔布囊等銀兩有差 直隸總督何世璽疏報宣化等府開墾雍正六年分田地一百九十六頃有奇下部知之 辛未諭禮部昔年

聖祖仁皇帝御纂各種書籍及朕年來陸續刻成之書雖未通行頒賜而內外臣工亦多有受賜者因衍聖公不在廷臣及封疆大臣之列是以未嘗頒賜著大學士等將應行頒發之書奏聞頒賜衍聖公藏之闕里昭示來茲戶部遵旨議覆清查江南積欠錢糧其分查各府於欽派五員外應再派四員協查各州縣應派四十九員其總理大臣每員應給養廉銀三千兩分查每員一千兩協查每員四百兩得旨著御史戴永椿給事中錢兆沆禮部郎中許均刑部郎中胡增耀前往分查協查之員著派魏化麟等二十三員其不敷

用人員著總理大臣分查大員各行保舉以足戶部所議之數 達賴喇嘛班禪額爾得尼遣使來朝賞賚如例 壬申諭內閣朕覽太宗文皇帝實錄噶爾薩之曾祖額駙恩格德爾乃係

太宗文皇帝時有偉績殊勲身膺厚恩之人原係三等公因削去恩詔所加官職授爲侯爵朕念恩格德爾舊日功績仍賞給所削官職授爲三等公著噶爾薩承襲俾其子孫世襲罔替 又諭朕令各州縣歲舉老農給以頂帶榮身乃勸民務本力田還醇返樸之至意爲有司者自當仰體朕心恪遵朕旨擇其謹慎勤勞身無過舉者據實保送以爲萬民勸乃朕聞直省之舉老農也州縣憑紳士之保舉紳士納姦民之貨財上下相蒙苟且塞責而強有力者倖邀頂帶之榮遂成暴橫之勢深負朕勸農務本之意著直省督撫確實查明將冒濫生事之老農悉行革退另選題補從

前有舉報不公或因賄囑情面營求而得者。准老農本身及保送之官員自行出首。朕從寬免其治罪。但革去老農頂帶。若此時不行自首。各州縣官員又不行查出。日後發覺。定從重治罪。該督撫等一併議處。諭刑部。凡屬獲罪之人。稍有一線可寬者。朕皆原情矜宥。而於大臣等。尤多格外開恩之處。四格黨附蘇努。不知愧耻。以蘇努之大姦大惡。爲國家巨蠹。而四格依附結交。甘心出其胯下。伊繼蘇努都統之任。將蘇努惡蹟。概爲隱瞞。已屬可惡。蘇努竟敢將

聖祖仁皇帝硃批摺子塗抹褻慢。臣工見之。無不驚駭。髮指似此。大不敬之罪。而四格代爲容隱。四格之罪。誠不可逭。是以照法司所擬。將伊監候。秋後處決。昨朕恭閱

太宗文皇帝實錄。見四格之祖莽古爾岱當日誠心効力。懋著功勲。四格不念其祖爲開國功臣。黽勉自立。而甘爲下流。干犯國憲。此乃

自作之孽。但朕心實念伊祖昔日之勤勞。不忍將伊置之重典。四格著從寬免罪。釋放爾等。將朕旨傳諭四格知之。以直隸古北口提督楊嗣協辦直隸總督印務。鑲紅旗漢軍都統魏經國。署直隸古北口提督。陞鑲紅旗漢軍副都統李永陞爲本旗漢軍都統。宗人府奏。宗學教習期滿之舉人貢生。請予議敘。得旨。宗學教習於期滿之時。自應加恩議敘。除舉人係應選知縣之員。照原議銓選外。其貢生等。善於訓課。未必嫻於吏治。若一概用爲知縣。不但於吏治無益。而本人不能辦事。致干叅處。亦非所以成全之也。凡各處教習之貢生等。著於期滿之時。該管衙門帶領引見。或用爲知縣。或用爲教官。候朕頒發諭旨。因材器使。將此通著爲例。○癸酉。諭禮部。士子者。百姓所觀瞻。士習不端。民風何由得厚。是以考課士子。設立舉優黜劣之典。以爲移風易俗之道。所關亦綦重矣。無如教官愚

懦無能學臣因循苟且往往視為具文奉行不力。每當學臣按試之時。教官輒以無優無劣具文申詳。草草塞責。如此則善者何由而勸。不善者何由而懲。夫善者之湮沒不彰。一時尚難覺察。而不善之人。僥倖苟免於目前。不旋踵而劣蹟敗露。每見蕩檢踰閑犯法亂紀之士。子皆從前學臣教官之未嘗開報劣行者。其間情罪雖難一一追究。然即此可知。其中之容隱不少矣。嗣後若教官沽名邀譽。縱容劣生不行舉報者。經學臣察出。立即指參。將教官照溺職例革職。若學臣瞻徇情面不行糾參者。一經發覺。將學臣照徇庇例降級調用。著將此永著為例。○諭工部。平治道路。王政所先。是以周禮有野廬合方之職。自四畿達之天下。掌其修治。俾車馬所至。咸蕩平坦易。行李輻輳。津梁通達。無雨水阻滯之累。邇年以來。廣寧門外已修石道。其至通州運糧之路。亦修整高潔。往來行人頗為便利。

今直隸至江南大道。車輪馬跡。踐壓歲久。致通衢竟成溝塹。兩旁之土高出如岸。一遇雨水之時。衆流匯歸。積潦難退。行旅每苦泥濘。或至守候時日。朕心深為軫念。但此通行大道已久。成窪下。勢難培築增高。而大道之旁。高阜甚多。平治亦殊不易。若於大道相近之處。另開一道。工力似屬易施。其間或有地形斷續之處。應修建橋梁。或有溝塍淤積之處。應疏濬水道。或所開之逕。有借用民間田地者。應補給價值。並除錢糧。或繞行之路有遠隔村莊旅舍者。應引歸故道。使有頓宿。是非熟於相度地勢。歷練道逕之人。不能詳察妥當。特派工部侍郎法保。副都統韓光基。原任護軍統領喀爾吉善。二等侍衛特庫四員。於今年夏秋之交。自京師起程。由良鄉至宿遷。大道一路踏勘。將如何另開新道之處。詳悉議定。估計工費。繪圖呈覽。○命額外大學士陳元龍為文淵閣大學士兼禮部尚書。額外

大學士尹泰爲東閣大學士兼兵部尚書○
以鑲黃旗蒙古副都統常祿署本旗護軍統
領戶部議覆潮州總兵官尚濤疏言沿海
各鎮協營於雍正四年准廣東總督孔毓珣
奏將羨餘銀兩買穀貯倉豫備窮苦兵丁借
給之用今潮州九營內有沿海六營已買穀
存倉尚有城守等三營緣係內地未經貯穀
臣於六年初冬捐資買穀三千石分給三營
照例舉行請與正項一體文盤應如所請從
之甲戌

上回宮

上將以二月中旬恭謁

陵寢諭怡親王等天氣尚寒途中修道夫役甚
爲勞苦著戶部派出賢能司官二員將庫錢
二千串按名賞給毋致遺漏○巡察山東御
史蔣洽秀題參利津縣知縣李周定陶縣知
縣張釗奉行保甲不力請文部議處得旨數
省之中差遣御史巡察盜案驛站者蓋因地

方遼濶督撫等未能遍歷其境而御史便於
巡行訪察或可補督撫耳目之所不及竝非
令御史操劾之柄侵督撫之權也今蔣洽
秀以不力行保甲參奏知縣二人是顯欲自
作威福侵督撫之權矣夫保甲社倉二事本
屬善政然行之必以其漸令州縣量力爲之
始於地方有益而閭閻不擾是以數年來朕
未降旨督催蓋恐急遽之中奉行不善轉滋
民間之累也蔣洽秀以兩縣知縣不力行保
甲特疏糾參伊所巡察之各州縣果盡能奉
行保甲之法無遺憾乎山東地方已在總督
田文鏡節制之內屬員優劣地方事務自能
訪察亦可不必要更設巡察御史著將蔣洽
秀撤回○陞左通政林源爲太僕寺卿○戶部
議覆廣西左江鎮總兵官齊元輔疏言向來
京局所鑄新錢從未到粵民間日用悉係私
錢自非制錢充足其弊難除雍正四年戶部
議發雲南所鑄之錢二萬串到粵搭放兵餉

軍民稱便但數止二萬串散之通省寥寥無幾且粵西所收銅器有限又不足以資鼓鑄按廣西水道上通雲南廣南府屬之剝隘較他省輓運稍易現今雲南有餘之銅差員由廣西運往漢口鎮江若以此存於臨安府添爐鼓鑄運交粵西給發官俸役食及驛站錢糧計可歲銷四萬餘串再於兵餉搭放十分之一可銷三萬餘串如搭放十分之二可銷六萬餘串且前此運粵之二萬串係全數解交藩庫方領銀回滇未免運費太多若止令桂林一府運交藩庫其餘悉於經過之處截留即不必經過之太思柳慶各府州亦俱於水道相通之南潯梧三府截留運費更可少省一切私錢廢錢俱令交官給價銷化淨銅以資鄰省採買或資鄰省鼓鑄於國計民生均有裨益應如所請行令雲貴廣西總督鄂爾泰將滇省每年所有銅觔餘出若干臨安一局約可添爐幾座或鑄錢四萬串或可多

鑄之處酌量定議委員解赴廣西照例每錢一串易銀一兩領回從之○乙亥以故喀爾喀固山貝子達濟叔班第達襲爵

大清世宗敬天昌運建中表正文武英明寬仁信毅大孝至誠憲皇帝實錄卷之七十七

大清世宗敬天昌運建中表正文武英明寬仁
信毅大孝至誠憲皇帝實錄卷之七十八

監修總纂官大學士領侍衛內大臣保和殿大學士兼六部尚書總理戶部三司伯加五級五品卿蘭泰

總裁官光祿大夫經筵日講官起居注太僕寺卿大學士兼戶部尚書仍兼學吏部尚書翰林院

事官仍加十三級員外郎王元祿大學經筵日講官起居注太僕寺卿大學士兼戶部尚書仍兼學吏部尚書翰林院

翰林院侍讀學士加級直學士福祿大學士領侍衛內大臣起居注太僕寺卿大學士兼戶部尚書仍兼學吏部尚書翰林院

經筵講官大學士領侍衛內大臣大學士領侍衛內大臣大學士領侍衛內大臣大學士領侍衛內大臣大學士領侍衛內大臣

敕修

雍正七年己酉二月丙子朔諭科道等官爾

等職司言路邇來並不陳奏一事以此觀之

爾等科道官除徇私報復黨同伐異之外遂

無可言之事矣朕從前令爾等輪奏密摺大

有深意因崔致遠等不堪小人妄行瀆奏是

以將密摺停止令爾等露章明言凡有關於

國計民生用人行政之事爾等何一不當據

實奏聞乎明季吏治之壞多由科道巡按結

黨營私紊亂是非所致朕勵精圖治耳目甚

廣雖不專恃爾等但爾等身居言路自當盡

其職守外而督撫以及州縣內而部院八旗
五城等衙門如有不法及不稱職之人聞見
確實皆可參奏使朕躬或有過失更當直陳
極諫爾等何竟默無一言為臣之道惟在公
忠如自揣不能供職即當引退何得苟且因
循有曠職守嗣後其共勉之○丁丑遣大學
士張廷玉祭

先師孔子○諭兵部陝省兵丁年來効力甚
多朕深為軫念伊等出征之時若因已給行
糧遂扣其坐糧則伊等妻子在家難以養贍
嗣後出征兵丁於照例支給行糧外仍給與
坐糧銀米俾免內顧之慮再陝西營伍甚屬
緊要若兵丁有派出之處著總督岳鍾琪酌
量召募充補另行按名給與錢糧○實授尹
繼善為江南江蘇巡撫署江南河道總督以
戶部左侍郎王璣署江蘇巡撫仍兼管清查
錢糧事○福建南澳總兵官許良彬疏言南
澳為閩粵要區地懸海島產米有限全賴於

內地買運入澳接濟兵食臣所轄親標右營屬於廣東已經督臣孔毓珣發銀一千二百兩買穀二千石備借給兵丁之用左營屬於福建尚未舉行臣思兩營兵丁自應一體籌畫請將臣之俸金及隨丁項下銀兩捐買穀二千石并建設倉廩發交左營將備收貯青黃不接借給兵丁散餉領銀仍令照數買補概免利息於兵丁大有裨益得旨南澳遠隔海島自應預籌積貯今許良彬奏請捐俸買穀伊所有俸金原以供其食用何能辦理公事著動支閩省藩庫銀一千二百兩買貯穀石以備左營兵丁借給之用一切經管盤查之處悉照右營之例行○怡親王第六子弘昉故命照貝勒例殯葬○戊寅祭

大社

大稷

上親詣行禮○以盛京刑部侍郎署理將軍事務武格為陝西西安巡撫調盛京戶部侍郎

王朝恩為盛京刑部侍郎以盛京兵部侍郎永福兼管盛京戶部侍郎事陞內閣侍讀學士永國為盛京禮部侍郎兼管盛京工部侍郎事陞奉天錦州副都統多索禮為奉天將軍奉天義州城守尉白爾赫圖為奉天錦州副都統○命吏部尚書查郎阿協辦陝西軍需事務○己卯以左副都御史陳良弼管理順天府府尹事正黃旗滿洲副都統花色緣事革職以吏部左侍郎宗室普泰為正黃旗滿洲副都統仍兼管吏部侍郎事調鑲藍旗漢軍副都統承保為本旗蒙古副都統鑲紅旗漢軍副都統張溥為鑲藍旗漢軍副都統以原任廣州將軍李林為鑲紅旗漢軍副都統陞雲南元江副將邱名揚為雲南臨元總兵官○吏部議覆直隸總督何世瑑奏奏遷安縣知縣王孔彰失察礦徒應降一級留任勒限一年緝獲典史劉然無級可降應革職留任協同緝拏得旨凡文武微員其

過愆本不至革職。因無級可降而遽行革職。似屬太過。況遠省微員。罷斥回籍。路費艱難。更覺可憫。其微員罪止降調。無級可降者。作何酌量。仍留原任。定以年限開復之處。著吏兵二部詳悉定議具奏。尋議文職從九品未入流武職七品等官。實係無級可降之員。舊例應降級留任者。則議革職留任。今改為降級留任。應降級調用者。則議革職。今改為革職留任。以示矜惜微員之意。俟三年無過。准其開復。其各部院衙門筆帖式。立旗員六品七品八品官。俱照此定議從之。○又議覆臺灣各缺。向例三年任滿。稱職者加陞銜。再留三年。方准陞用。該員家屬。格於成例。不得帶往。難免繫念。今奉旨調往各官。到任一年。令督撫於內地揀選賢員到臺協辦。半年後。即令舊員回至內地補用。海疆既得諳練之員。而各官又免瞻顧之慮。應永著為例。至協辦人員既從內地調往。則內地員缺。需員署理。

應於每年七八月間。由臣部請旨。照臺地道府同知通判知縣等員。揀選人員命往。以備調補。委署之用。凡調往各員。期滿之日。政績優著者。准加二級。稱職者。加一級。以示鼓勵。至經歷縣丞以下。及教職等官。事務簡少。無庸委員協辦。應照定例。三年稱職。咨部以應陞之缺。即用。但在任候陞。亦未免稽遲時日。應令該督撫查明各官將滿三年之時。於內地預行揀選調往。令俸滿者回至內地候陞。再在臺人員。其現滿三年者。於調回內地時。照舊例陞用。其先經加銜再留任三年者。亦於調回內地時。按伊等再留年分。分別議敘。從之。○庚辰。諭內閣。齊蘇勒練達老成深悉河工事務。是以授嵇曾筠為副總河。專管北河。而今齊蘇勒兼理南北兩河之事。今尹繼善新管河務。朕意欲令其與嵇曾筠分任南北兩河。又思治河之道。必合全河形勢。通行籌畫。方可疏導安瀾。若分令兩員管理。恐有

推護掣肘之處。著怡親王大學士等會同署蘇州巡撫王璣及九卿內本籍江南河南山東之人。通曉河務者。詳悉建議具奏。○調正白旗蒙古副都統覺羅海蘭為正藍旗滿洲副都統。陞鑲白旗前鋒叅領圖克善為正白旗蒙古副都統。○予故直隸總督何世璽祭葬。謚端簡。贈禮部尚書。賞銀一千兩。○辛巳諭內閣。考官專司衡文之任。必須學問明通者。始能鑒別不爽。雍正三年。曾將在京科目出身應充正副考官之員。通行考試。分別等次記名。於雍正四年。掣籤命往各省使典試事。今已越三年。從前考取人員。其中陞遷外任。及告假回籍者甚多。即有在京者。其所學或以日久荒疎。而前此之未曾入選者。今用數年之功。文藝未必無所進益。且陸續新到之員。亦復不少。著照雍正三年之例。通行考試。俟朕分別記名。以備持衡之任。有不願就試者。亦聽其意。○以內閣大學士尹秦為繙

譯鄉試正考官。禮部左侍郎鄂爾奇通政使司左叅議吳山為副考官。○鑲白旗滿洲副都統圖納緣事革職。調鑲黃旗蒙古副都統常祿為鑲白旗滿洲副都統。陞鑲黃旗護軍叅領佟海為本旗蒙古副都統。○加故河道總督拜他喇布勒哈番齊蘇勒為三等阿達哈哈番。照例承襲。并賞銀三千兩。予祭葬。謚勤恪。○壬午祭

歷代帝王

上親詣行禮。○諭內閣。歷來河道總督。如靳輔。齊蘇勒二人。實能為國宣勞。又安百姓。合於有功民社祀典之例。著尹繼善等就近相度地方。合建祠宇。有司春秋祭祀。以副朕優獎功勲之至意。○諭刑部。旗人犯軍流等罪者。亦照漢人之例發遣。此例題定於雍正四年八月。朕特令寬其期限。於雍正六年四月為始。今分發遵行。蓋欲使衆人無不熟知之後。而有仍然犯罪者。方照所定之例懲治。近見

旗下議奏事件。竟有援引現今新定之例。以議從前所犯之案者。甚屬錯誤。著該部詳查。凡發遣旗人。其犯罪在此例未曾通行之前。而承問官錯擬發遣者。俱著奏聞。將伊等放回。仍照舊例歸結。○浙江總督李衛奏請陞見。得旨。李衛著於三月內來京陞見。其各任印務。著李衛酌量分派委署。○設立福建觀風整俗使一員。從禮部右侍郎蔡世遠請也。○癸未。諭內閣。江南蘇松等處錢糧。歷年積欠。至一千六百餘萬兩之多。朕已加恩。將康熙五十年以前未完。概行豁免。其自五十一年以後應徵之項。又復寬限。分爲十年至十五年帶徵。原冀民力寬紓。易於輸納也。乃數年以來。仍不能依限全完。因思此等逋賦。其實欠在民者固多。而爲官員侵漁及吏胥土棍中飽者。亦復不少。若不確查詳核。明白分晰。則此事難以辦理。今特差大臣會同巡撫藩司及清查虧空之御史。總理其事。又遴選

大員專昇。以分查各府之任。再揀擇州縣。分派各處。務令徹底清釐。但念錢糧爲數繁多。而積弊歷年已久。侵蝕之官吏人等甚衆。其中情節亦有不同。在官者或因奏銷之時。原有民欠。而顧惜考成。那移報完。及徵收民欠之後。隨手花費。未曾還項。遂捏稱尚欠在民。或交代之際。有已徵未解之項。乘機隱匿。而接任之員。不及查明。遂仍作民欠收受。其在吏胥土棍者。或舞弊作奸。暗行偷盜。或廣爲包攬。私入己囊。又或鄉居寫遠之民。難於入城。託其代爲納課。而一時用去。遂成逋欠。此皆情事之所有者。今既徹底清查。則水落石出。從前玩法隱匿之案。勢必盡行敗露。均有難逃之重罪。然朕心實不忍伊等之盡罹國典。是以特降諭旨。凡侵蝕錢糧之官吏人等。准其自行出首。有能據實自首。毫無隱匿者。從寬免其治罪。其所欠錢糧。仍照從前帶徵之限。分年交納。若官吏本身已故。其妻子嫡

屬等自必悉知情由亦令自首免罪一體寬
限帶徵此朕法外之仁所以保全伊等之身
家性命儻仍怙惡營私執迷罔悟不行自首
或首而不實則天譴國法均難脫漏尚可俾
免手定將伊等照律科斷所有侵蝕之項於
一年限內監禁嚴追如逾限不完即依擬治
罪著欽差大臣巡撫等刊布朕諭務令所屬
官吏軍民人等及遠鄉僻壤共知之○陞直
隸三屯營副將李元亮為正白旗漢軍副都
統○甲申

上躬謁

陵寢是日啓行駐蹕箭桿河○以原任吏部右
侍郎協理直隸總督劉師恕補授內閣學士
為福建觀風整俗使○以故喀爾喀扎薩克
多羅達爾漢貝勒詹達古米子拉旺多爾濟
襲爵○朝鮮國王世子李緯故遣官致祭○
乙酉

上駐蹕五百戶○丙戌

孝康章皇后忌辰遣官祭
孝陵

上駐蹕淋河○諭內大臣等薊州城垣新經修
理微有頽壞之處若及時補葺甚屬易事儻
視為膜外任意遲延日久益隳必致煩費其
城垣倒塌之處著該州即行修補嗣後該州
遇有陞轉離任等事將城垣有無頽壞與接
任官交代若交代不明即著落前任官修補
將此旨傳諭伊等再傳諭內閣凡直省有新
修城垣皆照此例行○調正紅旗滿洲副都
統馬喇為鑲藍旗滿洲副都統陞三等侍衛
宗室鄂齊為正紅旗滿洲副都統○丁亥

上謁

昭西陵

孝陵

孝東陵未至碑亭降輦步入至

隆恩殿行禮舉哀畢遂謁

景陵未至碑亭降輦步入至

寶城前行禮致奠哀慟良久王以下文武大臣官員皆感涕不已○是日

上回鑾駐蹕淋河○戊子

上駐蹕大石桿莊○己丑

上駐蹕長營○調正藍旗漢軍副都統高崐爲

福建福州左翼漢軍副都統○移江西廣信

府永豐縣柘陽寨巡檢駐洋口從署江西巡

撫張坦麟請也○庚寅

上回宮○辛卯遣官祭

關聖帝君○調正黃旗漢軍副都統管承澤

爲鑲紅旗漢軍副都統陞鑲紅旗叅領紀壽

爲正黃旗漢軍副都統○壬辰諭內閣朕惟

雲雨風雷之神代天司令俾百昌萬寶普含

膏澤以錫福於烝民厥功竝懋朕恭承

天眷恪修祀典爲四海蒼黎仰祈嘉佑已經特

建廟宇崇祀龍神風伯而雲師雷師尚闕專

祠嘗考虞書禋於六宗之文漢人以乾坤六

子釋六宗震雷巽風均列禋祀而易曰雷以

動之風以散之則風雷之發生萬物功實相等禮記曰天降時雨山川出雲周禮亦以五雲辨年歲是雲與雨皆運行造化同昭

天貺者也前代及本朝

南郊大祀雲雨風雷俱列從壇之次式隆配享典禮亦既備矣邇年以來雲物兆祥雷行應候茂育庶彙宣布陽和庇國佑民之德靈應顯然今欲特建廟宇虔奉雲師雷師之神因時禱祀敬迓洪庥以展朕爲民祈福之意其

考據禮儀相度營建之處著禮工二部詳議具奏○直隸布政使楊紹緣事革職以詹事府少詹事王蔭爲直隸布政使司布政使

補行湖南四川二省雍正二年分大計不謹

官三員罷軟官一員年老官十一員有疾官

七員才力不及官五員浮躁官四員俱分別

處分如例○豁免江南沛縣水沉田地額賦

銀三千二百七十兩有奇從江蘇巡撫尹繼

善請也○癸巳諭諸王內閣九卿八旗大臣

等準噶爾一部落。原係元朝之臣僕。其始祖曰額森。額森之子托渾。漸至大員。因擾亂元之宗族。離間蒙古。恐獲重罪。遂背負元朝之恩。逃匿於西北邊遠之處。元末。又煽誘匪類。結成黨與。遂自稱準噶爾。肆行劫擄。迨至我朝。有噶爾丹。策妄阿喇布坦二人。世濟其惡。擾害生靈。滅棄釋教。造孽多端。不可枚舉。當我朝定鼎之初。各處蒙古。傾心歸順。共輸誠悃。請安納貢。求爲屬國。安享太平樂利之福。

八十餘年。惟準噶爾一部落。遁居西北五千里之外。擾亂離間。衆蒙古。肆行劫奪。噶爾丹身爲喇嘛。不守清規。不遵佛教。破戒還俗。娶青海鄂齊兒圖車臣汗之女爲妻。後又潛往青海賊害伊之妻。父鄂齊兒圖車臣汗。擄其屬下人衆。續因喀爾喀七旗內。彼此稍有嫌隙。奏懇

聖祖仁皇帝爲之和解。因遣大臣同達賴喇嘛使者前往。噶爾丹遣人暗探消息。遂以喀爾

喀等卑視達賴喇嘛。使人爲辭。遣伊族內微末台吉多爾濟查布將喀爾喀汗台吉等。肆行陵辱。喀爾喀汗等怒彼狂悖無禮。會衆將彼殺害。噶爾丹遂稱殺害伊弟多爾濟查布。與喀爾喀構隙。掩其不備。發兵猝擊。喀爾喀衆潰紛紛來投。

聖祖仁皇帝深爲軫念。施恩育養。遣使往噶爾丹處諭以兵爲凶器。令其與喀爾喀和好。多方開導。詎噶爾丹冥頑不靈。借追襲喀爾喀之名。入犯邊汛。彼時即行勦滅。復有何難。我聖祖仁皇帝好生爲德。遣使責問。噶爾丹惶愧恐懼。設誓撤兵。乃並不歸。伊住牧之所。仍潛居克爾倫圖拉地方。暗行窺伺。

聖祖仁皇帝復遣使降旨。諭以應回原住牧地方。噶爾丹佯稱遵奉諭旨。仍乘隙潛掠沿邊蒙古之畜牧。衆蒙古不獲安居。我

皇考遂上告

天地親統大兵。聲罪致討。噶爾丹輒敢逆天與

我西路大兵接戰。伊軍大敗。妻子被擒。噶爾丹窘迫自殺。彼時大兵即應直搗巢穴。收其部落。我

聖祖仁皇帝恐天下後世有窮兵黷武之議。因而不止。策妄阿喇布坦者。噶爾丹之姪也。與伊叔噶爾丹不相和睦。帶領七人。潛逃至吐魯番地方居住。

聖祖仁皇帝以策妄阿喇布坦向與伊叔不睦。懼其誅害。遁跡逃生。加以恩澤。伊當感戴。歸

誠。且

聖心仁慈。不忍遣兵將噶爾丹餘剩部落悉行剿滅。恩加格外。遣使賞給策妄阿喇布坦。彼時策妄阿喇布坦力弱勢微。甚為恭順。其後離間伊之妻父圖爾古特之阿玉氣汗。與其子三濟扎布。誘三濟扎布攜帶萬餘戶。至伊住牧之處。因而強占入己。從此遂不安分。肆意妄行。窺伺青海。擾害生靈。率領賊兵前進。被哈密駐防輕兵擊敗。遁回。策妄阿喇布坦

又假黃教為名。潛兵入藏。無故害伊妻弟拉藏汗。毀壞寺廟。殺害喇嘛。搶掠供器。是以持遣大臣前往詢問。乃伊恐不畏死。阻兵抗命。使臣率師甚少。兵力單弱。伊得以愈肆猖狂。聖祖仁皇帝仍賜包容。諭令邊外兩路大兵緩進。屢次遣使示以

聖意。謂策妄阿喇布坦果能悔過。懇恩具奏。其時另降諭旨。若仍怙惡不悛。然後將此部落人衆悉行剿滅。此我

聖祖仁皇帝之本意也。朕紹登大寶。策妄阿喇布坦雖遣使求和。朕知非伊本懷。諭伊來使云爾。歸告知爾台吉。朕續承我

皇考大統爾台吉若欲受我

皇考天恩。須盡改前非。遵朕諭旨。定界安居。若欲犯我

皇考天威。任爾備兵前來。定當加以天討。如此降旨分晰利害。遣使前去。又恐策妄阿喇布坦心懷疑貳。將兩路大兵盡行撤回。乃伊因

此愈生驕傲。於定界一事。妄欲侵占界地。朕又向伊來使降旨云。爾告知策妄阿喇布坦。定界一事。實於伊身有益。如遵奉諭旨。即遣使具奏。若不遵諭旨。亦必遣使前來。乃伊並不回奏。此際策妄阿喇布坦身故。伊之長子噶爾丹策零遣使前來。奏聞伊父身故之事。稱伊父已經成佛。又稱欲使衆生樂業。黃教振興等語。噶爾丹策零不過邊遠部落。一微末台吉耳。使衆生樂業。黃教振興。豈伊應出之語耶。況伊果欲求和。應代伊父謝罪懇恩。送回青海。叛逆潛逃之羅卜藏丹津。以贖前愆。乃並不輸誠。向化。敢以如許妄誕之詞。見之陳奏。此特欲倣倣伊父之故轍耳。聞噶爾丹策零甚屬凶暴。且西藏阿爾布巴隆布赤。扎爾鼐等。濟惡同謀。將實心爲國効力之貝子康濟鼐殺害。此等叛逆罪狀。皆因準噶爾與伊處相近。而逃去之羅卜藏丹津。原係伊等姻戚。彼此相依。是以敢於悖逆。迨其窘迫。

倉猝之時。則必投奔準噶爾。亦屬顯然。因頗羅鼐奮勇直前。截其去路。阿爾布巴等未得前進。即被擒獲。準噶爾性好搶掠。若留在衆蒙古遊牧地方。將來必受其害。今朕已將來使遣回。若伊諸事俱遵旨陳奏。臨時朕另行裁奪降旨。儻仍前推諉。矜張肆恣。負朕屢次遣使開導指示之仁恩。抗玩不恭。將來噶爾丹策零斷非安分守法之人。必至生事。妄爲況西北兩三路大兵。盡已撤回。此際伊等如或生事。則我朝如許安享太平之喀爾喀等。及辦理安插妥貼之青海西藏。必至被其擾害。甚屬可慮。且此事乃

聖祖皇考注意未完之事。仰賴

上天眷佑。

聖祖皇考福澤國帑。充裕官員弁兵。同心奮勇。願爲國家効力。實係可以舉行之會。若遲疑不決定。貽後悔。夫用兵者。國家不得已之事也。窮兵黷武。爲聖帝明王之所深戒。而以大

加小以強陵弱。又仁人君子之所恥而不爲者。況準噶爾彈丸之地。又在極北之區。得其土不足以耕耘。得其民不足以驅使。即使滅此朝食。亦不足以誇耀武功。此皆朕所熟思而詳審者也。但留此餘孽。不行剪除。實爲衆蒙古之巨害。且恐爲國家之隱憂。今天時人事機緣輻輳。時不可遲。機不可緩。天與不取。古訓昭然。且我

聖祖皇考爲此籌畫多年。未竟其事。茲當可爲之時。朕不敢推諉。亦不忍推諉。此朕一人之見也。用兵大事。所關甚重。不可輕率。著諸王、議政大臣、九卿、八旗大臣各抒己見。公同詳確密議具奏。尋議準噶爾部落自噶爾丹逞兇悖逆。策妄阿喇布坦復肆驕悍。俱已伏冥誅。今噶爾丹策零兇頑踵惡。若留此餘孽。則喀爾喀、青海、西藏等處必被其擾亂。伏乞皇上命將興師大彰天討。以除蒙古人民之害。得旨。諸王、滿漢文武大臣等衆議僉同。一切

應行事宜著即辦理。○戶部議覆福建總督高其倬疏言。臺屬各縣倉粟向經題明每年撥粟十萬石。碾米五萬石運往泉漳二府平糶。但臺屬正供粟石止可存備全臺并廈門金門等處兵糧。請將官莊現存粟四萬九千石零。粟價銀七萬三千四百餘兩內抽撥採買運往泉漳二府永爲定例。應如所請。從之。○旌表正藍旗滿洲烈婦趙璉妻柏氏矢志殉夫投繯殞命。給銀建坊入祠致祭。如例。○甲午諭戶部農事爲國家首務。督率貴有專司。前有人條奏請於各省設立農官以司勸課。或設巡農御史令其巡行郡邑勸勗農人及時力作。亦足敦本業而防游惰等語。朕思各省耕作之情形不同。未可一例通行。現今畿輔之地營種水田以來收穫甚多。行之已有成效。設立巡農御史之事當先行於直隸。每年特差御史一員於二月田功初起之時巡歷州縣察農民之勤惰地畝之修廢以定

州縣考成。其有因循推諉。以致荒廢農田者。即行叅處。該御史亦勤加勸課。督令耕耘。九十月間。稼穡納場之後。回京覆旨。至明年二月。照例另派一員前往。其該御史出巡。一應供給車馬。俱照現今巡察御史之例。按日給發。務使農業興修。田功畢舉。游手之人。咸歸南畝。以副朕重農務本之至意。○又諭鹽茶。皆民生日用所必需。查川省鹽課考成。惟責之產鹽州縣。其餘竝無巡查之責。且有僻遠地方。不行官引。以致私販充塞。甚為鹽政之弊。應將官引通行合省。約計州縣戶口之多寡。均勻頒發。令其各自招商轉運。僅有壅滯。責成各州縣。定為考成。如此。則有司等自必加意查察。使私販息而官引銷。弊端可以釐剔矣。又聞川茶。皆論園論樹。以定稅額。夫茶樹有大小不同。園地有廣狹不一。若概以園樹之數為額。未為允當。應將茶稅照勛兩收。納方得其平。以上二項。著該督撫詳議定為

成例。使川省鹽茶。經理妥協。於民生均有裨益。○諭兵部。火器關係軍政。甚為緊要。烏鎗硝黃。不許民間藏匿。例禁甚嚴。乃外省奉行不力。視為具文。前有人在打箭爐。見西藏番民來爐貿易。所帶烏鎗。俱係內地製造款式。又有人在天全土司。查出烏鎗九十餘桿。似此則不法之民。私造烏鎗。違禁販賣者不少矣。川省如此。他省可知。著該督撫。留心訪察。嚴加申禁。毋得因循塞責。致干重譴。○陞正藍旗叅領甘國標為鑲黃旗漢軍副都統。○以江南邳睢山安等處河營目兵厲錦榮。欽相謝玉等。修築險工。飄沒身故。照陣亡例。賞給祭葬銀兩。○乙未

上御經筵。講畢。賜大學士九卿詹事。及講官等宴。○諭內閣。從來天人感應之理。捷於影響。凡地方水旱災稔。皆由人事乖忤之所致。或朝廷政事有所闕失。督撫有司不得其人。或一郡一邑之中。人心詐偽。風俗澆漓。又或有

一二人姦巨惡之徒滅棄倫常陰懷悖逆皆足以干天和而召災異數年以來朕以此理曉諭內外臣工及萬方黎庶者不啻三令五申矣乃湖南地方連歲屢遭荒歉朕以彼地之人事推之如姦民謝錄正等逞兇肆惡潛蓄邪謀又有大逆之曾靜張熙等滅絕天良性同梟獍地方有此等逆天悖理之人以致旱澇不時民人困阨雖朝廷之政教頻施有司之職業無忝安能代凶惡頑民祈禱天恩而寬其譴責乎楚風愚悍自昔爲然朕念率土之人皆吾赤子同歸於善甚切殷懷著照浙江福建之例設觀風整俗使一員勸諭化導之御史李徽著補授都察院僉都御史爲湖南觀風整俗使○諭戶部錢爲國寶固貴流通以利民然必權衡輕重使得其平方能使民用而無囤積私銷之弊近聞馬蘭峪地方奉天直隸數府錢價過賤民間貿易物價必致虧損且恐姦弊從此而生著該督及奉

天府府尹嚴飭地方官通行曉諭嗣後錢價每銀一兩止許換大制錢一千文并著該部行文各省督撫轉飭各地方每銀一兩所換制錢不得過一千文俾民用便利而國寶流通以爲經久平準之定則○吏部議覆廣西巡撫金鉷疏言南寧府屬隆安縣新寧州向係調缺比來人民稠密烟瘴全消請將該州縣正雜等官歸部銓選其沿邊之南寧慶遠等處所有知府同知通判知州知縣二十三缺又新設之慶遠府同知一缺俱請歸入調缺題補五年俸滿即陞應如所請又稱沿邊二十三缺內有太平府通判泗城府知府同知西隆州知州西林縣知縣等五缺皆地處極邊水土最爲惡劣請改爲三年俸滿即陞陞之後果於風土熟悉人地相宜再留三年照陞銜陞用查太平等缺既地處極邊宜加體恤未便令其久留應將所請再留三年之處無庸議得旨金鉷請將太平府通判等

缺俸滿推陞之員再留三年。照陞銜陞用。該撫身在地方。必有所見。部議水土惡劣。不便久留。雖據情理而言。但推陞之員。既已熟悉風土。非初到者可比。或其人情願再留。以圖上進。亦未可定。惟是再留三年之後。果能稱職。或格外加恩。或令該督撫於本省要缺。保題優陞。以示獎勵。著該部另議具奏。尋議。太平府通判等五缺。應令該督撫於內地各官內。揀選調補。三年俸滿。准以應陞之缺陞用。若該員情願再留効力。或本省一時難得熟練之員。俱准據實具題。以陞銜再留三年。果能稱職。准照陞銜陞用。從之。○川陝總督岳鍾琪疏言。沙州招徠戶民。所給牛驪。倒斃二百餘隻。據鄉約戶民等呈稱。沐恩賞給衣糧田舍。安居樂業。此項倒斃牛驪。情願公幫買補。得旨。沙州招徠戶民。安集伊始。即知和睦。鄉里有無共濟之義。甚屬可嘉。但此情願幫補之人。俱係無業窮民。甫經耕種。未必即有

餘力。可以濟助鄉鄰。著動支甘省藩庫正項錢糧。每牛驪一頭。給銀八兩。令本戶照數買補。此因伊等敦睦尚義。朕心嘉悅。是以特加格外之恩。著該督即飭該管官。按戶查明。散給俾得均霑實惠。并宣諭旨。獎勵之。○丙申春分朝

日於東郊遣康親王崇安行禮。○諭內閣。朕於興修闕里

文廟一事。盡誠盡敬。頒發國帑。務令規模宏壯。堅固輝煌。計日告竣。雍正三年六月。即敕令原任巡撫陳世倌。領帑興工。遴員修造。拳委託至再至三。嗣於塞楞額接任之時。又復諄諄訓諭。豈料陳世倌。委用不得其人。既已耽誤於前。而塞楞額。又復因循怠玩。於後以致工程遲滯。久未告成。昨已特遣通政使留保前往。協同署撫岳濬督催。令在事人員。殫心竭力。迅速竣事。陳世倌著速赴東省。盡心辦理。以贖前愆。此次修理

文廟工程。務期巍煥。崇閎堅緻。壯麗纖悉。完備燦然。一新儻舊制之外。有應行添設者。有應加修整者。俱著估計。奏聞添發帑銀葺理。丹艘工成之日。朕當親往瞻謁。以展尊禮。先師至誠至敬之意。免江西安仁縣雍正六年分旱災額賦有差。丁酉陞都察院左僉都御史徐湛思爲額外內閣學士。仍協理河南山東河工事務。○戊戌諭內閣。各省關口開放船隻。向例有部頒號簿。以便稽查。茲聞各關另設私簿徵收報部時。始將號簿挨日填造。其意以船隻往來多寡不齊。不能逐日有徵收之數目。是以勻派填造。如此則簿內數目。與商船過稅串票。毫不相符。殊非政體。且凡事據實則可以無弊。作偽則弊竇叢生。嗣後各關於部頒號簿。務須據實填寫。如無船隻過稅之日。亦即註明。儻仍蹈前轍。定行嚴加議處。該部亦不得混行指駁。致滋弊端。○調刑部右侍郎彭維新爲吏部右侍郎。

工部右侍郎王承烈爲刑部右侍郎。以漕運總督張大有爲工部右侍郎。都察院左副都御史性桂爲漕運總督。○兵部議覆署兩江總督范時繹疏言。江南爲九省通衢。差使既多。兼之地方卑溼。馬匹易於倒斃。請嗣後江以南各驛。每馬十匹。許其倒斃三匹。限一月買補。江以北各驛。每馬十匹。許倒斃二匹。限半月買補。永著爲例。應如所請。從之。○以故一等精奇尼哈番劉保住子常在襲職。○以故二等精奇尼哈番祖俊親弟祖奎之子祖雲龍襲職。○封圖爾古特固山貝子丹中爲爲多羅貝勒。○己亥。上親耕耤田。詣先農壇。致祭畢。更服。至耕所。仍行四推禮。畢。上御觀耕臺。命莊親王允祿。怡親王允祥。裕親王廣祿。行五推禮。吏部尚書公傅爾丹。戶部左侍郎常德壽。禮部尚書石文焯。兵部尚書查弼納。刑部尚書勵廷儀。工部尚書公夸岱。

都察院左都御史三泰通政使司右通政史在甲大理寺卿傅德行九推禮各以次耕如儀

上御齋宮順天府官員耆老農夫行禮畢至耕耨所農夫終畝王以下各官行慶賀禮賜茶停止筵宴

上詣

恩佑寺行禮畢幸圓明園諭內閣馬蘭泰之恩祖明安原係兀魯特部落貝勒

太祖高皇帝時納款歸順在軍中亦甚効力建立功勳授爲二等伯現今馬蘭泰承襲朕念明安當年勞績格外施恩著封爲一等侯令馬蘭泰承襲世襲罔替○又諭本朝施恩功臣錫以世職俾其承襲罔替者特以念其戰功不忍絕其種祀使世世子孫永沾恩澤也但其中有因絕嗣未經承襲者朕甚憫焉著怡親王尹泰常壽三泰將從前建立功績之大臣官員內有絕嗣者查其近宗如無近宗

則查其遠族并其親戚僅宗族親戚全無卽於本旗內查其可令爲後者襲職再

太祖

太宗時因功所給之拜他喇布勒哈番以上等官內有襲替幾世者不必概查其世襲罔替者悉行查明具奏○又諭據朝鮮國王奏稱伊國賊黨謀逆旋即敗露遣兵捕緝醜類全獲已正典刑等語朝鮮世効恭順受朝廷怙冒之德伊國兇醜卽係干犯天討之人該國王先事覺察不使漏網從此境內無警官民又安朕心深爲嘉慰茲因使臣回國著於常賜外加賜該國王粧緞等四十疋內府書籍四種該國官員兵丁等發姦捕賊効力有功亦屬可嘉著頒帑銀一萬兩交與該國王分別賞給務令均霑以示朕旌賞之至意○庚子福建總督高其倬疏請揀發人員以備委用得旨高其倬向來不能教訓屬員以致閩省吏治廢弛朕前令各省督撫揀選州縣官

一員咨送閩省朕又揀選能員陸續發往乃高其倬於屬員內悠忽瞻顧積習未除今又以知府同知缺出補用之人題請揀發現今史貽直奉差閩省著會同高其倬劉世明將福建知府以下知縣以上各員優劣詳加甄別造冊具奏嗣後閩省有道府同知缺出即可將優等之員題請補授其間朕或見有可用之人亦當命往補用○免甘肅武威縣蘭州廳雍正六年分雹灾額賦有差○厄魯特郡王額駙車零旺布故遣官致祭○辛丑孝昭仁皇后忌辰遣官祭

景陵○諭內閣浙省為財賦重地民力輸將朕所軫念其舊欠錢糧非不欲開恩豁免祇以屢年未完之項乃頑戶之所拖欠若以抗正供而需膏澤則頑民獲利而良善轉未邀恩非所以化導人心風俗也今據性桂摺奏浙省紳士庶民咸能知朕教養之殷懷感朕訓誨之至意踴躍完納正賦即此一事可以見

其感恩遷善之誠朕實為浙省之士民風俗稱慶非重此數十萬之國帑也浙省嚮善之速其屬可嘉用沛鴻恩將雍正七年額徵地丁屯餉錢糧蠲免十分之二共計六十萬兩著李衛轉飭各屬恪遵奉行務使閭閻均霑實惠竝將朕加恩獎善之意通行宣諭俾遠鄉僻壤咸共知悉○正紅旗漢軍都統高其佩緣事革職陞鑲紅旗漢軍副都統李扶為正紅旗漢軍都統正藍旗蒙古副都統葉楚緣事革職調鑲黃旗漢軍副都統青保為正藍旗蒙古副都統陞鑲白旗叅領尚承恩為鑲黃旗漢軍副都統○壬寅諭兵部副都統馬喇著留駐裏塘同龢格照看達賴喇嘛○命盛京刑部侍郎王朝恩兼管奉天府尹事○癸卯四川巡撫憲德摺奏上年九月間瀘州里民呈稱軍需米石情願捐助不敢領受倉穀臣見永寧建昌各路軍糧於不能馬馱舟載之處俱派撥就近州縣里民背運負

載奔馳實屬勞苦而瀘州里民亦在派撥之內是以不便再令捐輸未允其請後據崇慶州里民具呈樂輸臣因崇慶未經派運故據情陳奏今奉旨蠲免該州一年額徵錢糧鴻恩丕布萬姓歡騰奉

上諭朕前見崇慶州紳衿士民好義急公風俗淳厚深為嘉悅是以格外加恩蠲正賦以示獎勵今據撫臣憲德陳奏知瀘州里民曾經具呈在先且瀘民既有背運軍餉之勤勞又有樂助倉儲之忱悃雖撫臣未允所請而民情之忠厚善良實為罕見著照崇慶州之例將雍正七年額徵錢糧全行豁免巡撫憲德務體朕心轉飭該州恪遵奉行使閭閻均霑實惠僅諭旨頒到之日有已徵在官者准其抵算庚戌年額賦○旌表江南烈女長洲縣宋啟業聘妻吳氏武進縣瞿元春聘妻董氏歙縣江承增聘妻徐氏宿州張作棟聘妻周氏俱未婚夫殞矢志捐軀各給銀建坊入祠

致祭如例

大清世宗敬天昌運建中表正文武英明寬仁信毅大孝至誠憲皇帝實錄卷之七十八

大清世宗敬天昌運建中表正文武英明寬仁
信毅大孝至誠憲皇帝實錄卷之七十九

監修總裁官光祿大夫理藩院議政大臣保和殿大學士兼兵部尚書總理事務等伯加十五級臣鄂爾泰

總裁官光祿大夫經筵日講官起居注太保兼太子太師保和殿大學士兼戶部尚書仍兼管吏部尚書翰林院掌院

事三等伯加十三級臣張廷玉光祿大夫經筵日講官起居注太僕議政大臣武英殿大學士兼工部尚書仍兼管

翰林院掌院事加二級
戶部光祿大夫經筵講官太子太保東閣大學士兼禮部尚書加六級
臣徐本光祿大夫

經筵講官議政大臣儒林內閣大學士事務權部尚書仍兼管太常寺鴻臚寺事臣三泰等奏

敕修

雍正七年己酉三月乙巳朔諭內閣向來外

官告病回籍不復起用。朕從愛惜人材起見。降旨令於該員告病之時。該督撫若察其居官尚好。即於本內聲明。俟病痊後赴部引見。仍以原缺補用文職。已有此例。文武本屬一體。以後武職告病者。著照文職之例行。翰林院侍讀國璉。左春坊左贊善許王猷。修撰陳德華。編修崔紀。俱充日講起居注官。調廣東總督孔毓珣。爲江南河道總督。以雲南提督郝玉麟。爲廣東總督。陞雲南鶴麗鎮

總兵官張耀祖爲雲南提督貴州定廣副將
蘇大有爲雲南鶴麗總兵官○吏部議覆江
南道監察御史姚之駟奏言向來直省督撫
提鎮封上本章例有揭帖分遞部院科道但
各省具揭或先期另封投遞而通政司按期
收本不查揭帖之後先輒發提塘分送拜疏
未上具揭先行恐滋弊竇請飭令各省凡有
揭帖必隨本章同發封套註明月日申送通
政司於送本次日始令提塘分送各衙門應
如所請從之○丙午諭內閣總督田文鏡公
忠歷練自蒞任豫省以來撫綏化導以實政
實心爲察吏安民之本是以風清弊絕吏畏
民懷地方舒暢之氣感召天和數年之中年
穀悉登豐稔該督之功實爲可嘉兼該省紳
士庶民風俗向來醇樸又能遵封疆大臣之
教人人向義輸忠以受

上天之恩實可謂良民矣。夫因荒歉而蠲免正賦者乃賑窮恤困之意。若羣黎共敦善行以

近天庥屢歲有秋災祲不作則賞善旌良朕之加惠沛澤更爲愉快著將豫省雍正七年額徵錢糧蠲免四十萬兩總督田文鏡可確查分數通行所屬州縣一體遵奉使閭閻均沾實惠朕廣收人材以資吏治每當保舉引見之時覺豫省之人較少大約豫省士風器量謹厚有餘而才具明通不足今欲加以策勵以備國家政事之用著田文鏡通行所屬府州縣選其才猷可供任使者不拘人數資格秉公舉出該督再加遴選具題奏聞送部引見又念中州之民務本力田勤於耕作著該督於常例歲舉老農外再令所屬每處各舉一人給以八品頂帶以示優獎並將朕旨曉諭遠鄉僻壤之民俾共知之○刑部議覆廣西巡撫金鉷疏奏蘇英毆死蘇仍將一案照律擬絞監候因中途脫逃應加等擬絞立決得旨凡擬罪潛逃之犯應絞者改爲立絞應斬者改爲立斬必該犯本案情罪可惡至

秋審時無可寬緩而又有脫逃之罪方改爲即行正法若本來所犯情罪尚有可原或因愚昧無知或因不知新定之例一時起意懼罪潛逃此等之人當仍照本罪擬爲監候著三法司通行各直省督撫一體遵行○正黃旗漢軍都統金以坦摺奏向來原管世管之佐領一遇缺出或有不能定擬之處須候查明家譜補授若公中佐領有訓練辦事之責未便久懸且選補又不拘世系請嗣後不必照原管世管之例致延時日限二十日內繕摺交送當月處彙奏引見從之○川陝總督岳鍾琪疏報四川雷波拉密結覺一帶蠻方廣袤千有餘里雷波土司楊明義與米貼陸氏同惡相濟結連吞都土司德昌及阿路結覺阿照等處逆蠻截糧傷兵負隅聚衆經四川提督黃廷桂遵旨率兵前進先勦雷波繼破拉密旋攻結覺又平定平底噶哈阿路阿照等寨峒一百餘處請以結覺地方歸沙罵

土司管轄所獲番戶分建昌鎮永寧協管轄留永寧夔州兵五百名令敘馬營遊擊帶領千把總五員暫駐雷波留重慶兵三百名令忠州營守備帶領千把總三員暫駐黃邛以資防範得旨雷波等處苗蠻狂悖不法勾連惡黨騷擾附近民夷及官兵到日輒敢抗拒岳鍾琪等調度有方勦撫兼施俾免犯全獲從此附近民夷咸得寧輯深屬可嘉辦理此事之大小文武官弁等著該部查明分別議敘○旌表甘肅中衛縣烈婦教允文妻孫氏矢志殉夫投繯殞命給銀建坊入祠致祭如例○戊申諭內閣直省各處富戶其爲士民而殷實者或由於祖父之積累或由於己身之經營操持儉約然後能致此饒裕此乃國家之良民也其爲鄉紳而有餘者非由於先世之留遺即由於己身之俸祿制節謹度始能成其家計此乃國家之良吏也是以紳衿士庶中之家道殷實者實爲國家之所愛養

保護則本身安可不思孳孳爲善以永保其身家乎夫保家之道奢侈糜費固非所以善守而慳吝刻薄亦非所以自全周禮以鄉三物教萬民有曰孝友睦姻任恤可知公財行惠任恤之義與孝友而並重也蓋凡窮乏之人既游閒破耗自困其生又不知己過轉懷忌於溫飽之家若富戶復以慳吝刻薄爲心朘削侵牟與小民爭利在年穀順成之時固可相安一遇歉荒貧民肆行搶奪先衆人而受其害者皆爲富不仁之家也逮富家被害之後官法究擬必將搶奪之貧民置之重典是富戶以歛財而傾其家貧民以貪利而喪其命豈非兩失之道大可憫惻者乎朕爲此勸導各富戶等平時當以體恤貧民爲念凡鄰里佃戶中之窮乏者或遇年穀歉收或值青黃不接皆宜平情通融切勿坐視其困苦而不爲之援手如此則居常能緩急相周有事可守望相助收求之念既忘親睦之心必

篤豈非富戶保家之善道乎從來家國一理。若富戶能自保其身家貧民知共衛夫富戶一鄉如此則一鄉永靖一邑如此則一邑長寧是富戶之自保其家猶富戶之宣力於國也況積善之家必有餘慶種福果於天地之間子孫必常享豐厚豈不美歟著各省督撫將朕此旨通行該屬之紳士民人等共知之戶部議覆漕運總督張大有疏言向年山東河南二省有輸運薊州遵化豐潤三州縣官兵需用米石其沿途管押以及回空催趲例責成於押運通判以一員而管領數幫前後不能兼顧請添設薊糧千總二員輪流領運抵薊之日交糧守候則責成於千總空船回次則責成於通判應如所請從之雲貴廣西總督鄂爾泰奏報丹江雞溝生苗自恃地險人衆不服招撫經新任撫臣張廣泗調遣官兵分路進剿苗衆投誠其上下九股及清水江古州等處現俱以次寧貼得旨古州

等處生苗自古未歸王化其人愚悍性成罔知法度自恃地形險峻出沒靡常擾害居民剽奪行旅雖無背叛之迹然為地方良善之患亦不淺矣向來石禮哈等曾以招撫之事奏請朕怙冒萬方豈忍令此地苗蠻獨在教化之外祇以石禮哈非能辦理此事之人故未允其請續經鄂爾泰陳奏前來朕見新任巡撫張廣泗才具優長周詳縝密必能副朕委任是以諭令辦理今張廣泗親歷苗境勸撫兼施苗民懷德畏威莫不抒誠歸嚮使自古未服王化之地均得沾被朝廷之聲教鄂爾泰張廣泗及在事文武官弁俱著從優議敘其兵丁等著鄂爾泰將帑銀賞賚具奏川陝總督岳鍾琪疏言西溪一帶地方為番蠻出入之所原駐防兵七十名不足分佈請再撥建昌左營兵一百三十名令建昌左營守備駐防西溪以資彈壓。施科賊首既除其番部應就近歸沙罵土司管轄逆賊加樂等見

亦就擒所遺番衆應暫令阿都土司管轄從之。已酉吏部議覆廣東總督孔毓珣疏言瓊州一郡孤懸海外海口所城尤爲扼要商賈輻輳姦良易混請將瓊山縣縣丞移駐就近稽察應如所請得旨各省佐貳微員有地方職掌緊要者亦有新設新移正需料理者必須於衆員中揀選才具稍優熟練事務之人方可勝任著各省督撫將佐貳緊要之缺查明具奏交與該部註冊遇有缺出該督撫揀選題請調補如本省乏員或將別省見任之員題補或請旨揀選永著爲例工部議覆原任河道總督齊蘇勒疏言黃運兩河隄工保守宜加詳慎向來隄頂之上民間私蓋房屋既恐傷隄而搶護亦多礙手今淮安府及寶應縣佔住之隄已經諭民移徙惟遙月等隄與運河緯道道里綿長鄉民居住日久驟令拆毀恐致失所請嗣後隄頂民房如遇傾圮禁止重修令移蓋於隄旁隙地再隄頂

之屋有輪納房租者計自徐邳以至江口每歲徵銀不過百餘兩而有益於國課者甚小并請一併豁免以杜藉名私佔之弊均應如所請從之免福建侯官等九縣雍正六年分旱災額賦有差與成諭王大臣等護軍統領塔拉圖朕聞在軍前每日醉飲大員委任著革職來京其員缺令副都統銜察哈爾總管馬爾薩前去戶部議覆湖廣總督邁柱疏言丁銀田賦同屬正供但窮民有寸土全無而受丁銀之累者富戶有田連阡陌而丁銀與窮戶相同者苦樂不均請將武郎等九府州武昌等十衛所自雍正七年爲始照通省攤勻丁銀數目派入田糧徵收其續報勘墾以及自首隱匿每歲所報陞科應暫緩均攤俟再遇編審時一併派入均應如所請從之○署廣東巡撫傅泰疏奏監犯病故請按季彙咨以省煩瀆得旨審結定擬監犯病故隨報隨題著爲定例

聖祖仁皇帝臨御六十餘年未嘗更改所以慎重民命恐有獄卒陵虐滅口致斃等情也況廣東係山海交錯僻遠之區傳奉初任封疆於分內應辦之事尚未能周到何暇為此越分陳奏之事且朕日理萬幾不敢稍自暇逸正冀爲大臣者贊勦鼓舞勵精圖治而傳奉奏稱章疏滋煩有瀆聖聽等語甚屬不合著將本擲還○辛亥以吏部尚書仍管河東副總河嵇曾筠爲河南山東河道總督山東境內運河一併管轄○旌表直隸新安縣烈婦張攀麟妻荆氏矢志殉夫投繯殞命給銀建坊入祠致祭如例○壬子清明節遣官祭

永陵

福陵

昭陵

昭西陵

孝陵

孝東陵

景陵 戶部議覆四川巡撫憲德疏言各省入川民戶向經一面造冊呈報一面咨查原籍在案但愚民風聞給資招墾往往輕於轉徙況川省田地多經業主承丈自首將來餘荒多寡尚未可知不可不定以長策請嗣後各省續到流民自雍正七年爲始停其造冊咨查行令各省將實在無業窮民願往川省開墾者給與印照與先經查驗覆到之各戶一體安插如無照之人除在川各有生業准其編入保甲外所有游手之民著即查明令回原籍應如所請從之○命江西南昌府開局鼓鑄從江西巡撫張坦麟請也○命川陝總督岳鍾琪補給駐防哈密甘肅提鎮標兵歷年應領鹽菜行糧銀五萬二千八百兩○癸丑以直隸石匣副將楊謙署直隸天津總兵官○甲寅諭內閣自古帝王皆有功德於民雖世代久遠而敬禮崇奉之心不當弛懈其陵寢所在尤當加意防衛勿使褻慢至於往

聖先賢名臣忠烈其祠宇塋墓亦當恭敬守護以伸仰止之忱著各省督撫轉飭各屬將境內所有古昔陵寢祠墓勤加巡視防護稽查務令嚴肅潔淨以展誠恪若有應行修葺之處著動用本省存公銀兩委員料理朕見歷代帝王皆有保護古昔陵寢之敕諭而究無奉行之實朕於雍正元年恩詔內即以修葺歷代帝王陵寢通行申飭亦恐有司相沿積習視為泛常嗣後著每年於歲底令該地方官將防護無誤之處結報督撫該督撫造冊轉報工部彙齊奏聞儻所報不實一經發覺定將該督撫及地方官分別議處明太祖陵在江寧昔我

聖祖仁皇帝屢次南巡皆

親臨祭奠禮數加隆著江南總督轉飭有司加意防護其明代十二陵之在昌平州者自本朝定鼎以來即設立太監陵戶給以地畝令其虔修裡祀禁止樵採

聖祖仁皇帝屢頒

諭旨嚴行申飭著該督轉飭昌平州知州昌平營叅將差委人員時加巡視務令地境之內清淨整齊儻陵戶或有不敷即著該督酌量增添其南北二處陵寢防護無誤之處亦著該督撫等於每年歲底冊報工部彙奏諭內務府自朝陽門外至通州乃京師向東大路向因雨水之時難於行走動支錢糧修補鋪墊聞近年又復損壞若修墊石路酌量其寬廣可容車二輛兩旁土路亦修築平穩於往來行旅大有裨益著總管常明會同侍郎普泰詳加驗看加戶部主事蔣蔚翰林院檢討銜提督山東學政工部主事傅王雲翰林院編修銜提督江西學政蘇尼特扎薩克郡王達禮扎布故遣官致祭乙卯改陝西靖邊所訓導為學正安塞吳堡神木等縣學訓導為教諭陞陝西寧夏協領海福為陝西寧夏右翼副都統丙辰命領侍衛內

大臣三等公傅爾丹爲靖邊大將軍北路出師川陝總督三等公岳鍾琪爲寧遠大將軍西路出師征討準噶爾噶爾丹策零以陝西涼州總兵官袁繼蔭署陝西安西總兵官免甘肅平番縣雍正六年分旱災額賦有差旌表直隸武強縣烈婦楊資妻張氏拒姦不污投繯殞命給銀建坊入祠致祭如例丁巳諭內閣鹽場大使及河工効力官員必須身家殷實之人始免累商剝民及侵帑誤工等弊是以在部揀選之時皆令取具同鄉京官印結保其家道殷實然後命往辦事所以防冒濫而收實效也查定例鹽場大使及河工効力等官到任之日該管上司將果否家道殷實之處行文移查本籍地方例雖如此但恐視爲具文含糊塞責嗣後著實力奉行毋得絲毫假借儻行查不實將本人及出結之同鄉官一併革職若有賄囑等情仍審明按律治罪至出結之官必用主事以上

之員其微末京職槩不准出結戊午諭內閣嘗思歲時雨暘之各地不同者其故或由於朝廷政事有所闕失或地方官吏乖其職守或民間習俗澆漓人心僞薄皆足干天和致成災祲此理數之必然纖毫不爽者數年以來朕已諭之詳矣上年直隸通省地方收成豐稔惟宣化懷來保安三州縣獨愆雨澤朕心卽疑地方官民恐有招致之由秋間口北道王崇來京朕令進見曾經諭及今據王崇摺奏宣化懷來保安等處去年夏秋亢旱今春他處皆得瑞雪而此地獨少二月間臣因公出境勘得雞鳴驛新保安之間有古惠民渠一道灌田數百餘頃旗民互訟歷三十餘年未曾結案臣詳勘渠道先剖曲直繼將上年所奉上諭再四宣布勸使回心一時旗民人等頂頌皇仁卽時感悟分渠共溉永息爭端果於三月初一二等日連降瑞雪平地尺餘春耕有賴萬民稱慶等語王崇此奏

不過敷陳其事而實乃天人感應之至理蓋人之所以爲心即天之所以爲心儻一方之中彼北猜嫌搆爭起訟人懷不平之氣斯天地之氣亦湮塞於一方不能和暢寬舒有不雨暘失序者乎古聖有言萬方有罪罪在朕躬朕躬有罪無以萬方今朕此言非爲人君寬解而推却其責於臣民也君民上下原爲一體嘗見直省督撫官員等每過年歲豐登輒曰此皇上之洪福此語朕從不受朕無自私之福以天下人之福爲福若吏治澄清民風醇厚以致時和年豐天下人各受其福即朕之福也若官吏壞法營私黎庶罷陵成習以致召爲災異此皆用人不得其當化導未盡其方天下不能共受其福即朕之歉於福也人君原無可諉之責而臣民自有各盡之道朕以實心實政乾惕於上天下臣民果能黽勉修省同歸於善以感召於下則太和之氣流行於宇宙間災沴何自而生雨雪應時

而降人歌樂利百室盈寧以同受上天之慈惠豈不美歟著各省督撫通行所屬咸使聞知○又諭朕爲在京八旗兵丁悉心籌畫其家若有吉凶之事需用之費無所取辦一時拮据實爲可憫特給內庫銀兩令王大臣等營運生息以備兵丁一時之用今思外省駐防之滿洲漢軍兵丁等亦當一體加恩江寧杭州西安京口荊州廣東福建寧夏右衛共九處每處賞銀二萬兩天津河南潼關乍浦成都共五處每處賞銀一萬兩俱著於布政司庫內支給交與該將軍副都統等公同存貯營運生息如該處駐防兵丁家有吉凶之事將息銀酌量賞給以濟其用其本銀永遠爲存公生息之項不令繳還該將軍副都統等務須盡心辦理使兵丁均霑實惠儻該管大臣官員有私自侵蝕那移或委任非人以致本利虧缺者定行從重治罪仍於該管及委用等官名下嚴追還項其營運利

息之處亦必公平辦理。儻指稱官銀名色。或佔奪百姓行業。或重利刻剝閭閻。與商賈小民爭利。擾累地方。著各督撫不時稽查。即行參奏。儻督撫徇隱不奏。經朕訪聞。必將該督撫一併議處。此項本利銀兩。每年出入之數。交與在京八旗都統副都統查核。一旗或管一省。或管二省。著怡親王大學士等酌量派定。每年於歲底。各省該管大臣官員等造冊齎送。各該旗查核奏聞。再各省督標撫標提標兵丁等。亦倣此例。每標或給銀一二萬兩。或給銀數千兩。按照兵丁之額數。分別銀兩之多寡。亦著怡親王大學士等酌量派定。其銀即交與各該督撫提督委員料理。以惠濟兵丁。一切照駐防之例行。其前後接任之時。將此造入交代冊內。查核。至於各省鎮標兵丁等。一時難以遍及。候朕酌量國用之出入次第加恩。陸續降旨。○又諭。從前屢降諭旨。禁止賭博。京城內外。稽察甚嚴。聞游手不法

之徒。潛往通州天津。公然犯禁聚賭。其賭具之所從來。有司亦不究問。又如京城禁止宰牛鬪雞。及畜養鷓鴣等事。而無賴之輩。則於通州天津地方。仍敢擅宰耕牛。私開鬪局。文武官吏。漫無覺察。又聞京城禁賭。而好賭之人。隨潛匿於四鄉。無人禁約。似此陽奉陰違。有干法紀。通州天津二處之人。五方雜處。易於容留匪類。通州有倉場侍郎衙門。又有副將駐劄。均當與知州等一體管理。稽查違禁等事。儻不實心稽查。致有疎縱。朕差侍衛御史等拏獲。定將該侍郎副將知州等分別嚴加議處。天津有總兵巡鹽御史及道員等官。亦照通州之例行。至近京鄉村中。若有賭博等情。該管汛地文武各員。不得辭其責。一經發覺。決不寬貸。○禮部議覆貴州學政徐本條奏學政事宜。一各省府學皆取所屬州縣童生撥入。惟黔省自為府籍。府學額多。即不如州縣童生之卷。亦得充額。州縣額少。即有優

於府籍童生之卷亦爲額限。未免去取不均。嗣後府籍童生。儻不足數。請於所屬州縣童生內酌量撥入。一給項生員。每於學臣任滿之日。紛紛呈告。希冀去任匆忙。不及查驗。其中不無年例未符。僞託病廢等弊。請嗣後於科冊報部後。槩行停止批給。一貢監見歸學臣約束。而學臣衙門竝無監生檔案。請嗣後飭令該府州縣備造履歷清冊。申送學臣以憑查核。至俊秀捐納中。有不應試者。當鄉試之期。或借與親友。或租與他人頂冒入場。請於捐納後行文取結之時。即令填註不應試字樣。以便科試之日。詳加查驗。庶頂冒之弊可除。均應如所請。從之。○辛酉。議政王大臣等遵旨議奏北路出征事宜。一統領將弁應行派定。京城八旗兵六千名。自總統將軍外。應派副將軍。叅贊大臣。前鋒統領等員。其營總。叅領。侍衛。章京。前鋒校。護軍校。驍騎校等。均請派出。以資差遣。車騎營兵九千名。應派

總兵副將。叅將。遊擊。守備。千總。把總等員。其押運糧餉大員。隨印學士及中書司官筆帖式等。均應派出。奉天船廠。察哈爾。索倫。土默特。右衛。寧夏七處。共兵八千名。應派統領及管轄之員。至喀喇沁。土默特兵八百名。應派塔布囊等員率領。一官兵起程。分路定期。北路官兵駐劄阿爾泰。路途遙遠。京城八旗兵於五六月間。分五路前進。出口後。令察哈爾。土默特兵同行。車騎營兵分六路前進。奉天船廠。索倫。右衛。寧夏兵。俱於六月起程。至大兵駐劄處會合。一北路官兵共計總統將軍一員。副將軍一員。叅贊大臣六員。前鋒統領一員。副都統十員。總兵二員。營總二十四員。叅領。副叅領四十一員。雲麾使一員。副將四員。章京一百三十六員。中書二員。司官十三員。侍衛十二員。叅遊八員。前鋒校十七員。護軍校一百八十一員。驍騎校一百三十九員。筆帖式四十三員。守備十六員。千把總九十

六員共七百五十三員。除奉旨賞賚外。分別各給馬駝器械。跟役口糧鹽菜銀兩與兵丁糧餉等。俱遵旨寬裕支給。得旨。振武將軍公已賽著爲副將軍。振武將軍印務著順承郡王錫保管理。鑲黃旗滿洲都統侯陳泰。右翼前鋒統領袞泰。鑲白旗漢軍都統石禮哈。正白旗滿洲副都統戴豪。散秩大臣公達福。正藍旗滿洲副都統覺羅海蘭。俱爲叅贊大臣。原任右翼前鋒統領丁壽。以都統銜爲軍營前鋒統領。直隸正定總兵官魏麟。河南河北總兵官閔文繡。統領車騎營兵。奉天副都統納泰。統領奉天兵。白都納副都統塔爾岱。副都統銜西彌賴。統領索倫兵。白都納副都統費雅思哈。統領寧古塔兵。右衛副都統阿三。統領右衛兵。寧夏副都統蘇圖。統領寧夏兵。鑲藍旗蒙古副都統承保。鑲白旗滿洲副都統常祿。統領察哈爾兵。歸化城副都統馬爾齊。袞布。統領土默特兵。塔布囊丹巴沙津達。

賴等統領喀喇沁土默特兵。糧餉事務。派法敏。伊都立。巴泰。西琳。傅德等管理。盛京禮部侍郎永國。兼內閣學士銜。隨靖邊大將軍印。前往北路軍營。其辦理各款。俱詳細妥協。悉依議行。壬戌。

上詣

恩佑寺行禮。○陞正藍旗滿洲副都統邁祿爲本旗護軍統領。○甲子。鑲黃旗蒙古都統希爾根。緣事革職。陞左翼前鋒統領鄂善爲鑲黃旗蒙古都統。仍兼管左翼前鋒統領事。正藍旗蒙古都統穆賽。緣事革職。陞正藍旗滿洲副都統莽鵠立爲本旗蒙古都統。仍兼管本旗滿洲副都統事。○議政王大臣等議覆。都統拉錫條奏。天津州水師營滿洲兵丁二千名。雖係水師。亦不可不熟習弓馬。且駐防海口。沿海一帶。遇有追捕賊盜之事。若無馬匹。尤爲不便。請恩准兵丁拴養馬二百匹。給與喂養錢糧。應如所請。從之。○乙丑。諭內閣。

士子讀書明理爲庶民坊表。若昧於急公奉法之義。抗糧逋賦。是尊民爲非。不止虧缺國課而已。今見內外大小臣工。爲此條奏者甚多。經禮部定議。按限追比。逾限不完。詳請褫革。嚴追等語。朕思士子一經笞杖。則難洗終身之辱。一經褫革。則永無上進之階。諸生縱不自惜其身名。朕則深爲諸生憫惜也。聞各處催徵之例不同。有責比催糧之差役者。有扑責欠糧之本身者。現年錢糧每至十月不完。方將糧戶懲責。是五月未曾完半。雖在百姓。未必便行鞭扑。而乃以此遽施於士子乎。況生監之中。貧富不等。富戶故意抗違。實法無可貸。而貧生未能依限。則情尚可原。今應如何分別貧富。使富者不得藉口以愆期。貧者得稍紓其力。需沐朝廷體恤之恩。而國賦又不至於拖欠。著該督撫各就本省情形。秉公詳察。悉心定議。務期寬嚴得當。永遠可行。儻該督撫內別有所見。可以仰副朕矜憐貧

寒之士子。而又懲戒頑富之劣衿者。亦著詳悉陳奏。以理藩院尚書特古忒兼理太僕寺卿事。以散秩大臣伯瞻布署正藍旗護軍統領。川陝總督岳鍾琪疏言。河州營兵出口巡緝時。值隆冬。借給備辦衣裝銀共五千二百兩。今巡查事竣。應於各兵應領餉內扣還。得旨。兵丁借支出口銀兩。著即作爲恩賞。免其扣還。○丙寅。以左都御史三泰署鑲黃旗滿洲都統。○以署正黃旗滿洲都統覺羅伊禮布署右翼前鋒統領。○兵部議覆江西南昌總兵官陳王章疏言。鎮標兵丁因移駐銅鼓營。缺額請另募三百名。以足原數。添設千總一員。把總二員。將把總分撥一員。防守寧州。應如所請。從之。浙江總督李衛疏言。臣欽奉恩綸。俯俞入覲。所有各任印務。謹遵旨酌量分派。委署請以欽差清查浙江錢糧副都御史性桂署理浙江總督。觀風整俗使蔡仕鼎署理浙江巡撫。下部知之。○改山

西大同府歸化城理事同知屬朔平府管轄。從山西巡撫覺羅石麟請也。○丁卯以正白旗漢軍副都統德爾芬署鑲白旗護軍統領。○戊辰移湖北沔陽州新堤鎮巡檢駐州南鍋底灣從湖北巡撫馬會伯請也。○己巳陞鑾儀衛冠軍使佟時茂為正黃旗漢軍副都統。鑲藍旗叅領尚崇坦為鑲紅旗漢軍副都統。正藍旗滿洲阿思哈尼哈番圖那以本旗擬署佐領引見得旨著圖那署理圖那之祖阿山於國家甚有効力之處。伊所襲之職。如本係精奇尼哈番因銷去恩詔所加之職。襲為阿思哈尼哈番者。仍當給還原官。如原係今職。將來再承襲時。不必銷去恩詔所加之職。爾等將阿山一支子孫。十五歲以上者。俱查明帶來引見。宗譜一併進呈。○以故三等精奇尼哈番何爾敦親伯祖岱音達三代孫何伸襲職。三等阿思哈尼哈番吳昌祖緣事革職。以其親弟吳文煌襲替。○旌表安徽虹

縣烈婦李文進妻栢氏拒姦不污。投繯殞命。給銀建坊。入祠致祭。如例。○庚午戶部遵旨議覆川陝總督岳鍾琪疏言。秦省自南山往蜀路徑有長安縣之子午谷。藍屋縣之黑水谷。郿縣之斜谷。三谷之中。斜谷黑水谷俱極險僻。無庸開鑿。惟子午谷。漢唐之時。為糧運大道。後漸荒廢。若將此路修鑿。坦夷由西安徑抵漢江。計程纔五百餘里。最為便捷。但宜設兵防範。以便行人。請於子午谷內。秦嶺南之五郎關。設守備一員。千總二員。駐兵二百五十名。秦嶺北之關神里。亦屬隘口。請就五郎關所設營內。撥千總一員。兵五十名。分駐其地。其黑水谷內之柳葉河。應添設把總一員。兵五十名。再將鳳翔城守營兵移駐郿縣。專防斜谷。兼防桃川。號川等處。其號川。應添設巡檢一員。千總一員。兵一百名。均應如所請。從之。○辛未

上回宮。○予故陝西延綏總兵官孫繼宗祭葬。

贈署都督同知 壬申以莊親王允祿管理
正紅旗漢軍都統 癸酉調山東按察使吳
昌祚來京河南按察使公元爲山東按察使
司按察使陞河南開歸道陳世倬爲河南按
察使司按察使 敕封浙江鎮海縣蛟門山
龍神爲涵元昭泰鎮海龍王之神 甲戌諭
內閣在京官員歷俸六年准其告假省親此
乃通行之常例爲伊等父母居家無事願歸
定省者而言若其父母身患疾病或年過七
十精力衰邁爲子者迫欲回家侍奉以伸其
孝養之忱則非可以年例拘也嗣後在京官
員有聞其父母患病急欲省覲或父母年逾
七十而衰邁者俱不必俟六年俸滿著取具
同鄉官印結於本衙門堂官處具呈該堂官
查明啟奏請旨給假速回本籍不必由吏部
彙題其歷俸六年告假省親者仍由吏部題
奏將此永著爲例 改貴州中曹土司所轄
高坡等處四寨歸貴陽府管轄從署貴州巡

撫沈廷正請也 以故三等阿思哈尼哈番
五爾勤子壽昌襲職 予故雲南臨元潞江
總兵官孫宏本祭葬贈都督同知

大清世宗敬天昌運建中表正文武英明寬仁
信毅大孝至誠憲皇帝實錄卷之七十九

大清世宗敬天昌運建中表正文武英明寬仁
信毅大孝至誠憲皇帝實錄卷之八十

世宗憲皇帝實錄卷之八十

世宗憲皇帝實錄卷之八十

世宗憲皇帝實錄卷之八十

世宗憲皇帝實錄卷之八十

世宗憲皇帝實錄卷之八十

教修

雍正七年己酉夏四月乙亥朔享

太廟

上親詣行禮

上幸圓明園 丙子諭內閣川陝總督岳鍾琪

統領大兵出口進剿之後甘涼一帶營汛綠

旗兵力稍單著於西安滿洲駐防兵丁內挑

選一千名暫行移駐涼州著都統蘇丹西安

副都統尼馬善統領此挑選兵丁可先期預

備候朕再降諭旨涼州原有兵房二千餘間

著甘肅巡撫量加修理以備移駐兵丁居住

山西太原府雖舊有城守滿兵今再從京城
派兵五百名至彼一同居住彈壓此所派兵
丁著都統鄂善統領前往駐劄兵部議覆
巡察湖廣御史王瓚條奏驛站苗疆事宜一
巴陵縣之岳陽驛近在縣城請歸併該縣管
理其湖南橋頭舖應另設一驛即以岳陽驛
驛丞移駐一湖北武昌府進京大路由黃陂
縣至河南信陽州中間楊店驛小河司廣水
李家寨等處民居稠密道里平坦請將黃陂
孝感雲夢安陸應山及平靖關原設夫馬酌
量抽撥改置驛遞五站以便往來一楚俗熟
習符呪有作姦犯科惑世誣民者請照光棍
例治罪均應如所請得旨此本內議稱熟習
符呪之人照光棍例治罪而未議及通行曉
諭之後方照此例定擬甚屬疎漏從前屢降
諭旨凡有改定科條須寬其期限悉令家喻
戶曉而猶有不率教者加以嚴懲始不為枉
今法司更定律例而不示以遵行之期是謂

不教而殺。且地方官亦有難於奉行之處。著另議具奏。尋議應自雍正庚戌年爲始。犯者爲首立斬。爲從擬絞。監候。行令該地方官。徧行曉諭。從之。○署甘肅巡撫張廷棟題。西寧府碾伯縣土同知趙文暉故。請以其子趙爾良襲職。下部知之。○丁丑。命大學士馬齊。內務府總管尚志舜。工部左侍郎汪澄。監造景陵聖德神功碑。○諭內閣。官兵馬匹。其有倒斃。免賠椿銀者。各省不同。從前補以中茶馬匹。及後則給以朋銀採買。此諸省通行之例。惟有陝甘各營。因停止招中茶馬之時。未將動支朋銀聲明。是以相沿至今。凡有倒斃馬匹。俱係兵丁出資買補。深可軫念。著總督岳鍾琪詳悉查明。將嗣後作何准報補給之處。分晰定議具奏。○盛京工部侍郎吳達禮緣事革職。擢工部郎中陳福壽爲盛京工部侍郎。○福建總督高其倬遵旨題覆原任臺灣府鳳山縣知縣蕭震向因命案遲延。經前撫

臣題參革職。查蕭震居官勤力。人亦樸直。但因伊父母年俱八十。時時思憶。精神漸減。以致辦理不及。從前請革職留任。得旨。凡官員等有父母年高。而補授路遠。地方者。經朕聞知。皆曲體其情。改用近地。使之便於迎養。或得音問。時通。蕭震既有八旬之父母。該督撫從前應據實陳奏。俾得遂其私情。專心辦理公事。方爲大臣愛養人材之道。乃隱不奏聞。致罹削職。甚爲屈抑。蕭震著回籍省親。後來京赴部引見。朕再降諭旨。○戊寅。工部議覆署天津滿洲水師營都統拉錫等疏言。水師營官兵俸糧。每歲從北倉新廩。逐月運送。往返紛煩。請於水師營堡城內西北隅。蓋造廩房二座。截留運往薊遵漕米三萬石。備貯二年之需。俟支放一年外。每年截留一萬五千石。撥陳支放。並設倉大使一員。專司出入。應如所請。從之。○改直隸涿州營參將原轄之舊州營隸天津鎮標管轄。從署直隸總督楊

鯢請也。己卯戶部議覆四川巡撫憲德疏言雷波結覺等處番夷助逆不法尋經勦滅所有查出漢民五十餘戶男婦三百三十餘口其願回原籍者請給與盤費其不能回籍者給與房屋牛具等項一體安插應如所請從之。免江南徐州雍正五年分水災額賦有差。庚辰陞圓明園營總卓鼎爲陝西西安左翼漢軍副都統。吏部議覆署貴州巡撫沈廷正疏言永豐州所屬冊亨羅斛地方甚屬遼濶一切命盜案件俱係知州辦理未免稽遲請鑄給冊亨州同羅斛州判關防各一顆令其專司仍令該州兼轄應如所請從之。禮部題遵旨議建雲師雷師廟宇查唐天寶間增雷師於雨師之次每歲立夏後申日致祭宋元因之大明集禮增雲師於風師之次郡縣立雷雨壇於稷壇西風雲壇於社壇東又明會典所載秋分後三日合祭雲雨風雷等壇今雷師廟應建於西方立夏後申

日致祭雲師廟應建於東方秋分後三日致祭從之。刑部遵旨議奏盜賊被獲應定同居處分之例以絕盜源請嗣後有犯強竊之案者其同居之父兄伯叔明知爲匪或分受財物許即據實出首均准免罪本犯亦得照律減免如不先行出首其不分贓而知情者照知人謀害他人不行首告律杖一百若知情而又分贓照本犯罪減一等發落自雍正庚戌年爲始通行督撫轉飭地方官曉諭遵行從之。湖北巡撫馬會伯題雲南威遠殉難同知劉洪度蒙恩贈廕伊父劉自理呈請奏謝得旨劉洪度守土苗疆捐軀盡職皆由伊父劉自理義方之訓有素著行文詢問本籍地方官若劉自理尚可服官辦事著來京引見朕加恩補用儻年老不能出仕著照伊子品級給與知府封誥。辛巳諭內閣直省各處皆有回民居住由來已久其人既爲國家之編氓即俱爲國家之赤子原不容以異

視也數年以來屢有人具摺密奏回民自爲一教異言異服且強悍刁頑肆爲不法請嚴加懲治約束等語朕思回民之有教乃其先代留遺家風土俗亦猶中國之人籍貫不同嗜好方言亦遂各異是以回民有禮拜寺之名有衣服文字之別要亦從俗從宜各安其習初非作姦犯科惑世誣民者比則回民之有教無庸置議也惟是凡人生產雖不同地而同具此天良習尚雖不同教而同歸於爲善回民處天地覆載之內受國家養育之恩可不孜孜好善共勉爲醇良乎且朝廷一視同仁回民中拜官受爵游登顯秩者常不乏人則其勉修善行守法奉公以共爲良民者亦回民之本心也要在地方官吏不以回民異視而以治衆民者治回民爲回民者亦不以回民自異即以習回教者習善教則賞善罰惡上之令自無不行悔過遷善下之俗自無不厚也如陝省之回民較他省尤多其販

私聚賭私藏兵器種種不法之案屢出較他省回民爲甚又如奉旨禁宰牛隻乃勸民務農勤稼所以重惜力耕之物命聞回民頗有怨言且有私自屠宰者此即居心殘忍不務本奉法之一端也朕念萬物一體之義豈忍視回民與衆民有殊特此詳加訓誨爲回民者當知率由禮義講讓興仁毋恃強而陵弱毋倚智而欺愚儻自謂別爲一教怙惡行私則是冥頑無知甘爲異類憲典具在朕豈能寬假乎自茲以後父戒兄勉姻婭族黨互相箴規盡洗前愆束身向善以承天地覆載之恩以受國家教養之澤豈不美歟直省各督撫等務宣布朕意咸使聞知吏部議覆四川巡撫憲德遵旨覆奏夫全土司改設流官事宜一天全地方請改置一州設知州一員吏目一員駐劄碉門州同一員分駐始陽一天全地方既改爲州應隸府轄請陞雅州爲府設知府一員經歷一員增置附郭一縣設

知縣一員典史一員以新設之一州一縣及名山榮經蘆山等三縣併歸府轄一雅州既改爲府請以州學爲府學改設教授一員州訓導改爲府訓導其府州縣三學取進生童并廩增出貢額數統俟人文日盛再議增置均應如所請從之尋定天全新政州曰天全州雅州新陞府曰雅州府雅州府附郭縣曰雅安縣 癸未調正藍旗蒙古副都統博什希爲本旗滿洲副都統陞鑲黃旗護軍叅領赫達色爲正藍旗蒙古副都統正紅旗蒙古副都統班第緣事革職陞三等侍衛格默爾爲正紅旗蒙古副都統以鑲紅旗叅領阿魯署正藍旗滿洲副都統正白旗前鋒叅領阿克山署鑲白旗滿洲副都統正紅旗護軍叅領拖善保署鑲藍旗蒙古副都統 湖廣總督邁柱覆奏湖北叅革糧道張廷樞那移南米縱役勒索一案遵旨審訊據供失察是實應准監守自盜論罪止杖流准徒因無婪贓

情弊折贖俱免得旨大凡革職發審之員若審明是虛即應准其開復不得混稱已經革職無庸再議此朕屢降諭旨訓飭者今邁柱既稱審明張廷樞竝無貪贓款蹟惟一失察案款即應奏請開復何得仍以相沿陋習含糊歸結甚屬不合張廷樞著來京引見朕另有用處 甲申福建巡撫劉世明疏奏琉球國中山王尚敬差耳目官毛鴻基等進貢方物據稱荷蒙天恩准停六年正貢小國因未接到禮部咨文所以辦齊方物至期虔申貢典雖外邦誠敬殊難固却但未合例不敢冒昧施行得旨朕以琉球歷來恪守臣節不失貢期而地處重洋之外使臣遠涉風濤深可軫念是以令其以四年進貢方物准作六年正貢其六年應進表文俟八年正貢一併恭進所以寬其朝貢之期與海邦休息之意也今該國王以未接部文仍按期遣使並非有違成例且其船隻已經進港行李已經安頓

館驛豈可以其不合例而却之。使遠島旅臣空往返於洪濤巨浪中乎。著照例准其入貢。該督撫委員伴送來京。一應廩餼舟楫從厚辦給。以示朕綏懷遠人之至意。○實授張溥爲廣西提督。○侍郎銜在學士裏行走登德以老疾乞休。允之。○降厄魯特扎薩克多羅郡王阿寶爲多羅貝勒。以其擅自移住遊牧地方故也。○乙酉吏部題一等伯四格緣事革職銷去五次恩詔所得拖沙喇哈番餘二等精奇尼哈番。以其親伯之曾孫班達爾沙襲替從之。○予故廣西右江總兵官段宗岳祭葬如例。○丙戌諭大學士九卿等。朕觀近日兵部奏事。其中有一二件。似仍欲迎合朕意者。夫朕日理萬幾。初無絲毫成見於胸中。惟期有當於大公至正之理。已曾屢降諭旨。爾等諸臣自應持正秉公悉心斟酌。事事以當理爲準。庶政治有所裨益。今乃於正理之外妄爲揣摩。則爾等焉能知朕意之所在而

漫思迎合乎。且部院所辦之事。各有關係。如吏部有意迎合。則銓選不公。戶部有意迎合。則財賦難理。此皆有妨於政治者。其爲害猶小。至若刑部職在明刑。關係最重。儻稍以迎合爲心。則生死出入之間。刑罰必不得其平。上干

天和。下戕民命。其害尚可言乎。至於辦事之道。凡人精神智力。用之專一。則詳明而得理。用之紛雜。則叢脞而多乖。數年以來。朕於辦理政務之時。皆聚精會神。專於所用。如閱一本。則專閱此本。而不思其他。治一事。則專治此事。而不及其餘。是以志氣清明。條理昭著。一事既畢。自可再辦一事。至於政務稍暇。中懷澄澈之時。又不可放逸此心。朕於此時。必將在京部院衙門及在外各省之事。一一思維詳察。由一部以及各部。由一省以及各省。靜中默識。更覺端緒易尋。所以辦事甚多。而不至於遺忘者此也。朕以一人之精神。辦理天

下之事而常覺有餘爾等諸臣以數人之精神辦理一部之事又何慮不足乎諸臣其共勉之○以內閣侍讀學士和善署盛京戶部侍郎大理寺少卿申珠渾署盛京禮部侍郎○議政王大臣等議覆川陝總督岳鍾琪奏四川巴塘裏塘等處請授宣撫司三員安撫司九員長官司十二員給與印結號紙副土官四員千戶三員百戶二十四員給以職銜以分職守內巴塘裏塘正副土官原無世代頭目承襲請照流官例如有事故開缺題補至各番錢糧正項之外又有供給喇嘛衣單土官蠻兵頭目口糧雜糧等項未便仍令將弁等私自徵納請統作正賦收催均應如所請從之○鑲黃旗漢軍副都統甘國標以年老乞休允之○旌表甘肅蘭州烈婦周彩妻馬氏守志孀居拒婚自縊給銀建坊入祠致祭如例○丁亥移湖北荊州徐關於田家洲更名田關從湖北巡撫馬會伯請也○戊子

諭戶部國家承平日久戶口日繁凡屬閒曠未耕之地皆宜及時開墾以裕養育萬民之計是以屢頒諭旨勸民墾種而川省安插之民又令給與牛種口糧使之有所資藉以盡其力今思各省皆有未墾之土即各省皆有願墾之人或以日用無資力量不及遂不能趨事赴功徘徊中止亦事勢之所有者著各省督撫各就本地情形轉飭有司細加籌畫其情願開墾而貧寒無力者酌動存公銀穀確查借給以爲牛種口糧俾得努力於南畝俟成熟之後分限三年照數還項五六年後按則起科總在該督撫等董率州縣因地制宜實心經理務使田疇日闢耕墾維勤以副朕愛養元元之至意○己丑諭八旗都統等向來各倉米石蓋藏不謹每每攙和灰土純雜不一是以放米時與領米之人勾通賄囑使費繁多弊端種種數年以來嚴飭該管等官慎守倉儲屏除陋弊所頒諭旨至再至三

今米色既皆勻淨則在倉執役之人及赴倉領米之人均當凜遵法紀不應仍存作弊之心復蹈故轍昨據倉場侍郎塞爾赫劉於義等奏稱南倉倉役林起鳳等勾通監督家人與舖戶私議使費被人告發審供鑿鑿似此則倉場吏放作弊之處仍未悔改也米色既好而猶勾通賄囑則必有偷盜多領之事著八旗都統等通行傳諭該旗並令倉場侍郎出示曉諭若本人赴倉領米之時其所得之米果有攪和灰土等弊令其當時在倉將不淨之米交與該監督封貯或到倉場侍郎處或到巡倉御史處據實呈明即行查究儻領米之人與倉場吏役暗中勾通作弊者一經發覺將與受之人一並從重治罪

庚寅命倉場侍郎劉於義山西按察使葛森清查西寧軍需錢糧以原任太僕寺卿涂天相署理倉場侍郎事仍復刑部左侍郎原銜免甘肅河州平涼等三州縣雍正六年分雹災

額賦有差辛卯

孝端文皇后忌辰遣官祭

昭陵諭戶部從前清查江蘇等屬舊欠錢糧已經降旨將康熙五十一年至雍正四年未完地丁銀八百一十餘萬兩暫行停徵今思漕項等銀民間一例編徵不分款項若不概行停比則錢糧難以清釐著將康熙五十一年至雍正四年漕項屯折等款未完銀二百八十一萬餘兩一體停徵王璣彭維新等可令各員於清查之時即分別條款各歸各項俾數十年積欠其間官侵吏蝕俱得徹底清釐吏部議覆雲貴廣西總督鄂爾泰疏言雲南東川府治地方遼濶前經題准於巧家營地方增設會澤一縣但該縣距府五站小民輸納維艱請改爲東川府附郭其東川經歷請分駐巧地並設立一汛撥官一員兵三十名以資防守應如所請從之戶部議覆湖南巡撫王國棟疏言勦撫貴州古州八萬

等處現將湖南營兵酌撥一千名前往。但黔楚相距迢遠。衣糧均屬艱難。請借給副將每員銀一百二十兩。守備每員五十兩。千把每員三十兩。馬兵每名六兩。步兵每名三兩。凱旋時按季扣還。再兵丁除本身坐馬外。其馱載軍裝等項。每兵五名。需馬四匹。但湖南地不產馬。請於各協營內。照數抽給。一面動支給價買補。均應如所請。從之。○壬辰。諭內閣。外任督撫藩臬。爲全省之表率。關係甚重。每當簡用之時。常以一時不得其人。深勞念慮。凡內外大臣。受國家厚恩。均當留意於平時。秉公奏薦。盡以人事君之道。京官自學士侍郎以上。外官自藩臬以上。著各人密保一人。將其人可勝督撫之任。或可勝藩臬之任。據實奏明。不必拘定滿漢。亦不限定資格。即府縣等員。官階尚遠者。果有真知灼見。信其可任。封疆大僚。亦准列於薦牘之內。若一時無深知可舉之人。准其從容採訪。不得草率塞

責。有負諮詢。移廣西思恩府同知駐土田州百色地方。改潯州府通判爲思恩府通判。駐劄古零。裁太平府全茗土州吏目一員。南寧府果化土州吏目一員。宣化縣那龍寨巡檢一員。添設桂林府永寧州喇崗巡檢一員。南寧府宣化縣三官堡巡檢一員。橫州大灘巡檢一員。從廣西巡撫金鉷請也。○癸巳。諭內閣。山東巡撫岳濬著前往西安。送伊父岳鍾琪領兵起程。再回原任巡撫印務。著山東布政使費金吾暫行署理。○奉國將軍巴達泰因病解退。授其子增成爲奉恩將軍。○甲午。諭內閣。八旗兵丁。並各省駐防。以及各標兵丁。朕已賞給銀兩。令該管官員經營生息。以濟其吉凶緩急之用。今因征勦準噶爾。派出兩路大兵。遠臨邊塞。此所派兵丁等。既爲國家効力行間。朕心更爲軫念。已於行糧恩賞外。給與坐糧。以養贍其家口。但兵丁等出門之後。家中若有吉凶之事。料理無資。不可

不爲籌畫周濟除京城八旗出征兵丁該旗照例支給外其奉天等處八旗出征兵丁著照京城護軍之例吉禮賞銀十兩喪禮賞銀二十兩其直隸山東山西河南陝西等處出征綠旗兵丁著照京城驍騎之例吉禮賞銀六兩喪禮賞銀十二兩凡此賞給銀兩其有已經孳生利息之處即於利息內支給其未嘗賞銀及雖經賞銀而尚無利息可支之處即動正項錢糧支給著該管官員通行曉諭使出征兵丁咸共知悉伊等家中遇有應領賞銀之時即報明本管官出具領結照數支領毋得稽遲俾効力行間之士均霑實惠無內顧之憂以副朕加恩沛澤之至意又諭兩路大將軍統領大兵進剿準噶爾凡所經過名山大川理應致祭著撰擬祭文書寫數十道敬謹用寶付兩路大將軍帶往遇有應祭山川臨時填寫神號虔恭致祭其所用香帛等項著該部察例辦理○以吏部尚書查

郎阿署川陝總督復設江南南匯縣下砂二場浙江黃巖縣杜瀆場永嘉縣永嘉場場官各一員裁江南金山衛浦東場場官一員從浙江總督李衛請也○乙未陞署盛京禮部侍郎大理寺少卿申珠渾爲都察院左副都御史仍署盛京禮部侍郎○吏部議覆署兩江總督范時繹疏言松江府督糧通判有監兌漕運之責未便兼管鹽務請將松屬巡鹽事宜改歸海防同知管理應如所請從之○戶部議覆欽差刑部左侍郎繆沅等條奏山東鹽政事宜一永阜永利濤維三場灘廣鹽豐率皆露積請設立官鹽坵將所產鹽觔收貯編設保甲互相稽察一商人領引行鹽每多重複透運請設水程驗單隨領隨運一州縣行鹽殘引應按期繳銷如地方官督催不力請嚴查揭叅一東省十場地方遼濶運同一人鞭長莫及請復設膠萊分司運判一員分任管轄均應如所請從之○旌表河南

太康縣烈婦李福妻馬氏拒姦不污投繯殞命給銀建坊入祠致祭如例。丙申諭內閣朕前降旨令兵部將因公誣誤降級革職之武弁查出具奏。今日兵部查得三十四員具摺請旨。摺內有施仁宥過等語。此等浮泛頌揚有乖理道之詞。昔年

聖祖仁皇帝屢經指示訓誨而數年以來朕又以之誥誡內外臣工者不啻至再至三矣。蓋賞罰者天命之正人君奉天出治有善則賞有過則罰其柄非人主所得私也。至其中亦有過過而寬宥者則以其事本有可原之情。或其人尚有可用之才故姑從寬典以許其自新耳。夫人君惟令天下無一夫不獲其所方可謂之仁。非縱釋姦宄遂可以謂之仁也。不能化導百姓而使之不爲姦宄已不可謂之仁矣。若再務施仁之名而爲姑息養姦之事則匪類肆行無忌良善固不能安枕而不良之人無所懲戒悛改將見犯法者愈衆是

陷之入於邪惡之路也不仁孰甚焉。施仁宥過四字若不能通曉其義用違其當則流弊無所止極。即如今日兵部具奏請旨之三十餘人將來引見時豈皆可以起用。若有不用者則是有不施之仁有不宥之過矣。朕豈受此名乎。朕治天下惟有教養兼施勸善懲惡。此外非朕之所知也。兵部侍郎楊汝穀胡煦並非不曉文義者且日侍班聯熟聞朕諭尚昧昧至此則外省疎遠之臣工必更不能體會朕意也。著將兵部堂官嚴加申飭。竝曉諭內外大臣官員知之。○吏部議覆四川巡撫憲德疏言會川一衛向係小學額取文武童生各八名。今該衛既經裁改併入會理州而該州舊無專學請照州制中學之例取進童生十二名應如所請其補廩出貢因係設學之始不便遽照州制從之。○兵部議覆原任廣東總督孔毓珣疏言惠州府海豐縣屬叅將府地方距縣治遼遠向無官兵防守請將

碣石鎮標左營原駐東海窖之守備移駐兼轄附近北坑一汛其東海窖以防守西甘澳礮臺之千總移駐西甘澳礮臺以防守甲子港之把總移駐甲子港令駐劄甲子所之遊擊就近兼管再碣石鎮三標所屬營汛地有寬窄向例抽撥兵丁互相貼防但與其越汛貼防不若仍歸本營管轄請將貼防古營白沙湖等五汛兵丁及左營大德東臺等四汛兵丁悉令撤回中營均應如所請從之○丁

酉寧遠大將軍川陝總督岳鍾琪疏奏西路軍營文武員弁馬步兵丁等必須派有定額則一應軍需可以核計今臣議派總統官兵大員一員分領官兵提督一員總兵四員副將十員叅將遊擊共二十員守備四十員千總八十員把總一百二十員其管理駐防臺站派副將二員遊擊二員守備四員千把總八員至經理糧餉事務議派道員一員知府一員同知通判知州知縣十員佐雜二十員

計文武大小員弁共三百二十四員馬步守兵共二萬六千五百名一應馬駝器械跟役口糧鹽菜銀兩等項與兵丁糧餉分別支給臣陸續核明造冊報銷奏入報聞○戊戌工部尚書黃國材緣事革任以鑲紅旗漢軍都統李永陞爲工部尚書仍兼理都統事○陞正白旗護軍參領常壽爲

景陵總管○纂輯律例告成總裁纂修官等議敘有差○予故原任江南江寧將軍鄂克孫

祭葬謚武襄○青海厄魯特扎薩克輔國公達錫班珠爾故遣官致祭○己亥福建總督高其倬來京陛見以吏部左侍郎史貽直署福建總督陞鑲紅旗滿洲副都統德成爲正黃旗護軍統領仍兼理副都統事○裁奉天府泰寧縣知縣典史教諭各缺從寧古塔將軍哈達等請也○庚子陞四川遵義副將張玉爲四川北總兵官○辛丑

上詣

恩佑寺行禮畢回宮 兵部議覆湖廣總督邁
柱疏言武昌荊州常德岳州安設水師兵船
徒泊江干竝未遊巡緝捕請於原有分防之
處一汛留兵十名駐船一隻其餘悉行撤回
存營撥用再長沙衡州二協向未設有戰船
查沅州協戰船二十隻現屬空閒請撥給長
沙八隻衡州六隻餘令仍留本州均應如所
請從之 陞陝西肅州爲直隸州兼轄高臺
一縣裁肅州通判缺從川陝總督岳鍾琪請
也 以故三等阿思哈尼哈番蘇永祖子阿
林襲職 壬寅

上以征討準噶爾噶爾丹策零躬詣

太廟告祭其文曰恭惟我

列祖聖德神功涵蓋宇宙莫不尊親獨厄魯特

策妄阿喇布坦世濟允禩自其叔噶爾丹悖

肆猖狂我

皇考聖祖仁皇帝親率大軍翦除元惡以策妄

阿喇布坦素未同逆遺餘部落聽其收撫

恩澤至渥乃不思銜感漸恣鴟張殘破拉藏荼
毒生靈

皇考應時戡定猶未忍即加勦戮
宣諭再三冀其知悔臣紹位以來復申諭旨伊
雖遣使乞和乃敢容留逋叛挾詐怙惡旋服
冥誅其子噶爾丹策零雖亦遣使詣闕而心
志詭譎言詞誕妄揆其姦狀若不迅行撲滅
將來必爲蒙古之巨害貽中國之隱憂臣夙
夜思維茲乃我

皇考計慮多年經營未竟之緒繼

先志以行師事非得已順

天心而致討機不容遲廷議僉諧戎行齊奮是
用簡帥臣而授鉞占良日而禡牙仰憑

列祖功德崇隆聲靈赫濯旌旗所向立靖氛塵

鏡鼓還歸早聞凱奏永綏藩圉萬邦戴丕冒

之天惠保邊黎九服遵蕩平之路謹告 癸

卯

上御太和殿命大學士以寧遠大將軍印拉敕

書一道令正使兵部尚書查弼納副使內大臣公倫布齎赴西安授川陝總督公岳鍾琪理藩院侍郎顧魯兼內閣學士銜隨印前往敕諭寧遠大將軍岳鍾琪奉

天伐罪治世之常經鋤暴除尤安邊之遠畧況醜逆陰謀詭譎斯王章顯用征誅機不容遲法無可貸厄魯特策妄阿喇布坦乃噶爾丹之逆族也昔我

聖祖仁皇帝時噶爾丹干犯

天討立時殄滅本應直搗巢穴俾無孑遺蒙

聖祖仁皇帝如天之仁念策妄阿喇布坦向與伊叔齟齬情罪可原特沛鴻恩賞其部落撫綏周至再予生全。是時伊力弱勢微小心恭順其後乃誘奪伊妻父之部曲萬餘戶輒敢驕肆妄行竟欲直驅青海擾其人衆。又詭計發兵進藏荼毒生靈我

聖祖仁皇帝雖發兵致討仍賜包容遣使宣諭再三冀其改悔而伊怙惡不悛冥頑如故及

朕紹承大寶伊雖遣使求和而中懷詐僞以背恩大逆之羅卜藏丹津負罪潛逃伊輒敢容留抗違國法中外之人莫不忿恨朕本欲於數年間命將興師向伊詢問不意策妄阿喇布坦遂服冥誅其子噶爾丹策零繼立狡獪狂誕同於其父昨遣人陳奏之際言詞傲慢心志姦邪似此逆賊渠魁父子濟惡若不及時翦滅實爲衆蒙古之巨害且恐將來貽國家之隱憂用是特發兩路大兵聲罪致討爰命爾爲寧遠大將軍統領陝西等處大兵一切事宜爾與提督紀成斌酌定方畧共同討議而行勿謂己能而不納衆論勿當事會而致失機宜勿恃兵強而輕視賊寇密偵遠探備極周詳各路大兵及蒙古兵丁聽爾調遣凡遇有警即遣發官兵應援撲剿有能擒斬噶爾丹策零來歸者即行馳奏加恩優賞有情急來歸者加意撫恤其抗拒官兵者勿加殺戮兵將所過地方須申嚴紀律毋得

騷擾百姓。毋得淫人婦女。毋得離散人之父子夫婦。毋得損壞人之墳墓。廬毋得強取貨物。毋得驅役平民。以副朕戡亂靖逆安民綏衆之意。其或有臨戰退縮。貽誤擾亂軍機者。爾會同商議。文官四品以下。武官三品以下。即以軍法示衆。官兵有犯小過者。會同商議。徑行處治。毋泯沒戎行之勞績。毋寬縱違法之弁兵。法紀務極嚴明。賞罰悉期公當。一切機宜。爾商酌調遣。有應知會北路靖邊大將軍者。即行知會。一同辦理。將噶爾丹策零速行殲勦。永靖邊陲。斯稱委任。爾等務宜殫心用力。早奏膚功。欽哉。故敕。

上幸圓明園。加浙江總督李衛兵部尚書銜。○寧遠大將軍川陝總督岳鍾琪。遵旨議奏。肅州地方甚屬緊要。鎮臣樊廷鎮兵出口之後。請將肅州鎮印務。令興漢鎮臣曹勦署理。曹勦亦係奉旨派出領兵。今仍留署肅鎮。其領兵鎮臣。仍須派補。查川北鎮臣張成隆。老

成練達曉暢軍戎。現今赴京。陛見乞令星速回陝領兵出口。以足原派鎮臣四員之數。得旨朕思軍務關係重大。曹勦明白精壯。乃實心効力之員。應仍令領兵出口。岳鍾琪既稱張成隆老成練達曉暢軍戎。朕觀其人尚壯健。或可勝領兵之任。著於原派總兵四員之外。增添一員。即將張成隆派出。令其星速乘驛赴陝。著大將軍岳鍾琪酌量委用。至於肅州辦理軍需。更關緊要。署督查郎阿相隔路遠。巡撫許容又屬新任。著湖北巡撫馬會伯前往肅州辦理軍需。一切與督撫等公同計議而行。即帶管肅州總兵印務。甚爲妥便。其湖北巡撫印務。著四川布政使趙弘恩前往署理。四川布政使印務。著四川按察使呂耀曾署理。四川按察使印務。著四川鹽驛道尤清署理。甲辰諭內閣。朕荷天地鴻恩。俯垂眷佑。寤寐之中。對越神明之心。至誠至恪。每見臣工奏章。有山川

効靈等字輕慢

神祇朕心深切不安屢經降旨申飭今衍聖公孔傳鐸奏賀慶雲本內仍用乾坤効靈字樣想未見朕歷來誠諭之旨耶衍聖公爲先師後裔服習家訓拜疏陳詞尤宜合理此本著更改另行繕寫具奏諭兵部振威將軍揚武將軍印二顆送往西安交與大將軍岳鍾琪軍前有應用之處酌量委用兵部議覆福建總督高其倬奏休致海澄公黃應纘因承襲公爵賄屬該縣出結應革去職銜令該撫究擬具奏得旨黃應纘係告休之員承襲世職乃伊家事未免瞻顧私情若地方有司平日不開賄賂之門慣行勒索則黃應纘亦何至以財請託罹於罪戾是其罪全在知縣張渭烈張珂等也今欲得受賄情由應將知縣二人嚴加審訊便可定案黃應纘之祖父忠勲懋著若以承襲之事致干黜革朕心不忍黃應纘從寬免革職銜兵部遵

旨題覆廣東龍門副將景慧奉調考驗把總謝廷彥奉差遊巡俱渡海飄溺照陣亡例俱予祭一次蔭一子以衛千總用景慧因係署都司僉書管事再加贈一級並給全葬其被飄身故及生存兵丁請分別卹賞從之

大清世宗敬天昌運建中表正文武英明寬仁信毅大孝至誠憲皇帝實錄卷之八十

大清世宗敬天昌運建中表正文武英明寬仁
信毅大孝至誠憲皇帝實錄卷之八十一

監修總裁官內閣大學士兼禮部尚書總纂修臣等謹將世宗憲皇帝實錄卷之八十一

纂修官內閣學士兼禮部尚書總纂修臣等謹將世宗憲皇帝實錄卷之八十一

纂修官內閣學士兼禮部尚書總纂修臣等謹將世宗憲皇帝實錄卷之八十一

纂修官內閣學士兼禮部尚書總纂修臣等謹將世宗憲皇帝實錄卷之八十一

纂修官內閣學士兼禮部尚書總纂修臣等謹將世宗憲皇帝實錄卷之八十一

敕修

雍正七年己酉五月乙巳朔諭出征大將軍

副將軍叅贊大臣官弁兵丁等準噶爾狡獪

兇頑父子濟惡爲邊境蒙古之隱患朕仰承

皇考聖祖仁皇帝先志特發兩路大兵聲罪致

討當四海昇平之時國用充裕朕細加籌畫

計議再三凡命將遣官派兵運餉以及車馬

甲冑兵器耕具之屬無不經理周詳備辦豐

足弘綱細目具有規條而派出之官弁兵丁

等踴躍歡忻爭先恐後其急公勇往之意甚

爲可嘉此蓋弁兵等素懷忠君報國之心而

又受

皇考六十餘年教養之澤感恩慕義出於惓惓
故奮發之氣若斯之壯也然軍氣當壯而軍
心則不可驕孔子論行軍之道曰必也臨事
而懼好謀而成而以暴虎馮河爲戒書經曰
今予其恭行天之罰可知古昔聖人於軍旅
之事倍加敬謹從未有以士飽馬騰兵甲堅
利而遂生驕矜之意志嚴惕之懷也從來舉
大事者固在人事之經營而成大功者必賴
天心之眷佑若果仰邀

上天慈恩默垂保護則天地間非常之業不世
之勲皆計日可以成就而感格

上天之道惟有一誠一和聖人曰至誠感神又
曰和氣致祥古訓昭垂千載不易今此兩路
大兵前往若自大將軍以下兵丁以上皆存
一片誠敬之心一團和合之氣視國家之事
如已事聯千萬人之心爲一心以此感格
上蒼蒙

天心許一是字如此而大功不唾手告成者無是理也大將軍總統全師爲三軍司命當開誠布公虛懷受益能謀於衆能斷於心勿以私意而泯人之勞勿以偏見而掩人之善信賞必罰惠愛嚴明副將軍叅贊大臣等和衷協贊合志同心共展謀猷以成韜畧其一應文武官弁等各有所司均關重計祇奉將軍之令善導所轄之人務殫公心以襄偉績至於兵丁等應思祖孫父子世受國恩今當執戈荷戟之時正効力酬恩之會況朕以至公訓諭大小臣工將軍等秉公心以馭士卒有功必錄有過必懲正宜乘時黽勉以圖上進古人以共爲一事比於同舟言其休戚相通憂樂與共也朕謂今日之事自將軍以下兵丁以上不但有同舟之誼實乃一體之親朕爲元首以股肱耳目視爾等爾等衆人彼此聯屬之情當如手足臂指之痛癢相關肫誠固結不可藏嫉妬之念不可懷推諉之心且

不但當存退縮規避之私衷亦並不應存輕進貪功之淺見蓋一人立功其功小衆人立功其功大果能以誠心和氣感格上天錫福垂恩膚功克奏則凡行軍預事之人皆有光榮膺爵賞於朝廷垂令名於奕世豈不美歟朕自運籌軍務以來及師旅起程以後朕之一心時刻在於戎陣之間爾等宜共體此心也○刑部議覆署江蘇巡撫尹繼善疏奏盜犯陸佛自行投首但係行劫三案以上之犯不便准其減等應如所請得旨劫盜之許令自首減等者既可開愚民自新之路且使案件易於清結若以行劫三次雖自首不准減等則爲盜多次之人豈復肯自行首報乎似此等罪案外省定以重律固當然既交部議該部自應兩請候朕揆其情罪輕重頒發諭旨不應遽定斬決陸佛有別案未結著俟別案審結再聲明具奏○丙午諭內閣屢年以來朕以天人相感之理諄諄曉諭內

外臣工蓋朕實切敬

天勤民之念於寤寐之中而確見其感應之不
爽尤願各省督撫有封疆之重任者體朕此
心至誠至敬各盡其道以爲感格

上天之本惠我烝民共登衽席朕並非以年穀
之順成有意歸美於大吏亦非以雨暘之差
忒強欲卸責於臣工也假使爲督撫者因朕
有地方豐歉由於吏治得失之諭旨而欲自
彰其善自護其短於奏報秋成或有溢美之
詞於奏報歉收或有諱災之意則事

天爲不誠事君爲不忠臨民待下爲不仁不信
有此數端而欲荷

上天嘉祐錫福凝禧有是理乎況粉飾一己之
聲名而不顧民生之休戚其何以對所屬之
官民而無愧怍乎朕留心體察覺近來督撫
等之奏報年穀間有此弊不得不通行曉諭
以防其漸在爾督撫等返躬自思有則改之
無則加勉況朕之見聞甚廣訪察維勤儻掩

飾於此而敗露於彼豈不自取朕之輕視乎
人臣事君之道惟以誠實無欺爲本爾督撫
等其共勗之○以故厄魯特扎薩克多羅郡
王車零旺布弟色卜騰旺布襲爵○丁未
孝誠仁皇后忌辰遣官祭

景陵○加禮部額外主事周人驥翰林院編修
銜提督四川學政○戊申諭內閣朕見臣工
等奏章間有用山川効靈洪福齊

天及一切頌揚背理之詞諄諄訓誡至於再三
宜乎中外共知朕心矣乃昨衍聖公孔傳鐸
奏賀慶雲本內竟用乾坤効靈之語朕覽之
實爲悚惕不寧之甚朕於事

天事

神至誠至敬惟望

天地神祇俯垂默佑錫福兆庶共享昇平若云
感召

天和或云受

天之祐或云昭示靈應似此等語作頌揚之文

尚於義不悖而於心亦安今乃謂

天地神祇効靈於人君豈不聞王者父

天而母

地而敢爲此褻慢之語乎且朕之事

天亦猶臣下之事君也臣之視君也以爲九重

之尊而以人君視

天其相越之分又不啻九重而已也設以屬員

頌其上官而稱爲上所崇奉或稱爲福與君

齊彼爲上官者能安受而不戰慄乎今以効

靈齊

天等語見諸奏章何以異是不惟不知立言之

體亦大失敬謹事君之道矣昔我

聖祖仁皇帝深惡此等陳奏之詞常加訓誨今

著再行申諭內外臣工知之嗣後如有仍用

此等字樣者著通政司即行叅奏如送內閣

即著大學士叅奏○諭吏部上年十月內降

旨令內外官員各保舉一人送部引見儻所

保人員內有現在試用者若一體准其送部

引見恐伊等因現在試用之缺不稱其意而

起規避之念嗣後若有保舉現在試用人員

者著先將咨文送部該部彙齊請旨准其進

京引見再令來京又如保人之員現係試用

尚未實授者是本人之優劣尚在未定難與

現任之州縣比論亦著先行咨部彙齊請旨

准令引見者再著來京○陞鑲黃旗叅領高

應彪爲鑲藍旗漢軍副都統○旌表河南陳

留縣烈婦王三妻崔氏孀居拒姦自縊完節

給銀建坊入祠致祭如例○已酉諭大學士

九卿自古爲政者皆言寬嚴相濟所謂相濟

者非方欲寬而雜之以嚴方欲嚴而雜之以

寬也惟觀乎其時審乎其事當寬則寬當嚴

則嚴而已如十人當賞則俱賞之斷無以賞

者太多而舍一二人不賞之理十人當罰則

俱罰之斷無以罰者太多而寬一二人不罰

之理即如戶部也綜核錢穀惟在公平直省

徵解錢糧其不足者固當查核若餘於額數

之外者豈遂不當查核乎即如刑部也按律定罪務期明允直省審讞重案其間失出者固當駁詰若失入而致冤抑者豈遂不當駁詰乎總之寬嚴適協其宜乃爲相濟非參雜於寬嚴之間而爲子莫之執中也譬之飲食原相需也然亦當飲而飲渴者不可以食解當食而食饑者不可以飲充若強饑者以飲強渴者以食是相背也豈相需之道乎（庚戌調正白旗漢軍副都統德爾芬爲鑲黃旗漢軍副都統以鑾儀使公慶復爲正白旗漢軍副都統○辛亥諭內閣朕慎重民命留心刑獄每於讞決之際往復審察至再至三是以外省每年秋審亦照朝審之例悉令三覆奏聞今思每日所進本章內有擬以極典及斬絞立決之犯雖其情罪俱屬重大律無可寬然朕心猶欲慎審而後置之於法嗣後如遇此等本章已閱過票簽交與本房耆著批本官員照三覆奏之例進呈三次候朕再加

詳慎然後批發以副朕欽恤矜慎之至意○京察滿漢各官不謹官一員罷軟官七員年老官二員有疾官十四員才力不及官十三員浮躁官一員分別處分如例○吏部議覆廣西布政使張元懷奏言直省舉報老農給以頂帶本屬重農大典無容冒濫嗣後如有營私請託等弊一經發覺請將失察之上司濫舉之州縣及本人分別照例懲治再老農一歲一舉品秩似屬易邀請自雍正七年爲始三年一舉行均應如所請從之○戶部議覆署直隸總督楊觀奏言雍正七年春夏二季薊州遵化州供應昭西陵孝陵孝東陵員役人等需用米石所有不敷之項請照例於司庫給價得旨依議聞近來遵化等州縣採買供應陵上官兵米石竟有吏胥串通兵丁當差人等

折銀代米私相授受每石或六七錢八九錢不等使吏胥利於侵剋而不肖兵丁但取現銀入手便於花費及至五六月間米貴之時艱於糴買往往困乏該管官亦並未留心稽察甚非加恩於供奉

陵寢官兵之至意也嗣後著該督嚴飭州縣官將本色米石按名支給

三陵總管亦不時稽察有復蹈前轍折銀代米者即行題叅將授受之人從重議處○四川

巡撫憲德疏報雷波阿照等處苗民七百餘戶男婦三千七百餘口先後投誠就撫下部知之○壬子以正黃旗蒙古都統兼正紅旗護軍統領雅親署右翼前鋒統領鑲藍旗蒙古都統泰布署正紅旗護軍統領○癸丑

上自圓明園幸南苑南紅門駐蹕○禮部右侍郎兼管太常寺事孫卓自陳年老乞休得旨孫卓在太常寺年久諸事尚爲熟練著降補太常寺卿大理寺卿傅德補授禮部右侍郎

吏部題二等精奇尼哈番七復緣事革退應將原立官佟養性之三世孫佟銘承襲佟銘原係拖沙喇哈番應併襲爲一等精奇尼哈番以後再襲時佟銘之拖沙喇哈番不准承襲其七復之二等精奇尼哈番世襲罔替從之○移湖南湘潭縣縣丞駐朱亭市從湖南巡撫王國棟請也○裁福建福州將軍衙門筆帖式二員從福州將軍阿爾賽請也

甲寅

上閱車騎營兵於南苑賜諸王文武大臣及官兵食物畢辰時靖邊大將軍傅爾丹等令車騎營車騎火礮鳥鎗並馬步軍士各按方位旗色於瞭鷹臺前排爲陣式已時

上御瞭鷹臺黃幄陞座賜諸王大臣等坐鳴海螺排列處亦相繼鳴海螺直達營所營內乃擊鼓南面紅旗舉展諸軍分隊向前火礮鳥鎗一時齊發金鳴衆止由是而東而西而北各依旗色次第操演又兩旗交展兩邊分發

首尾相應陣如長城演畢軍士吶喊凱旋仍歸本陣隊伍次第井然不失尺寸軍容綿亘整肅

上顧謂大學士張廷玉等曰伊等操演可稱熟練且喜今日天氣晴朗朕甚慰悅然此車騎營兵不過數分中之一耳他如盛京察哈爾等處精兵尚多也大學士張廷玉等奏曰三軍和氣上達於

天天人交感用昭晴朗我

皇上天兵所向其誰能敵

上又謂浙江總督李衛曰此不過操演軍士之一法耳至於遇敵決勝相機度勢神而明之運用之妙存乎其人豈必拘拘排列隊伍然後可以制敵李衛奏曰

皇上天兵馴熟精銳所向無敵臣得仰瞻可謂見所未見

上又謂諸大臣曰此次軍務怡親王同大學士張廷玉蔣廷錫辦理甚屬妥協如蒙

上天默祐即奏凱歌伊等之功不小怡親王大學士張廷玉蔣廷錫同奏曰臣等何知何能仰蒙

皇上指畫周詳臣等不過遵奉辦理耳奏畢賜茶因宣

諭旨於營內賜大將軍銀五千兩副將軍銀三千兩叅贊大臣銀各千兩隨印內閣學士五百兩營總各二百兩章京等各一百五十兩司官各一百二十兩中書各一百兩筆帖式各八十兩前鋒校護軍校驍騎校各五十兩護軍各二十兩披甲各十五兩車騎營兵各二十兩閱畢

上駐蹕南苑西紅門○乙卯

上自南苑西紅門詣

恩佑寺行禮畢幸圓明園○丁巳

皇后千秋節停止行禮筵宴○遣官祭

關聖帝君○諭內閣向來有司官補授之時迴避本省蓋因地方密邇恐其中有嫌疑牽

制等弊也朕思江南之上江下江湖廣之湖北湖南陝西之西安甘肅雖同在一省中而幅員遼濶相距甚遠定制各設巡撫司道以統轄之其情形原與隔省無異則官員選補不過有同省之名而並無嫌疑牽制之處況既係同省則於彼處人情土俗較他省之人更爲熟悉未必不於地方有所裨益嗣後凡江蘇安徽湖北湖南陝西甘肅諸處府州縣以下官員得本省之缺不在本籍巡撫統轄之內者不必令其迴避其相隔在五百里之內者仍照隔省迴避之例一體遵行○戊午諭內閣前因備辦軍需令直隸山東河南山西等省採買贏匹運送糧餉今直隸山東解京之贏俱屬臃壯則地方官之採買辦理實心効力可知著查明各地方官採辦之多寡及肥腴之高下分別等次交部議敘以示嘉獎其解送之員一併酌量議敘從前議定每贏一頭給與官價十二兩今所解贏匹甚好

諒官價及每日喂養准銷之銀必不敷用著據實報明於本省存公銀兩內給發但不得借此恩旨滋浮冒之弊著該督撫公平辦理後不爲例其河南山西二省所辦贏匹解交陝西者著岳鍾琪驗看據實具奏若能如解京之辦理妥協亦著一體加恩○吏部議覆湖廣總督邁柱疏言湖南保靖桑植永順三土司新經改土爲流請於永順東南之舊司治西北之江西寨各設知縣一員典史一員田家崗施溶州隆頭地方各設巡檢一員其永順原設大喇司巡檢應裁保靖之舊司治設知縣典史各一員張家壩設巡檢一員其保靖原設同知應裁桑植以南原屬九谿衛之安福所應歸併桑植合爲一縣添設知縣典史各一員以上分設四縣應設知府一員管轄并設經歷一員俱駐劄永順其永順原設同知移駐喜鵲營專督永保新設二縣捕務桑植原設同知改爲通判移駐江西寨專

督安福所江西寨新設二縣捕務再永順請設副將一員即將桑植副將移駐立爲永順協并設守備一員千總二員把總四員兵八百名保靖請設遊擊一員即將永定營遊擊裁改立爲保靖營并設守備一員千總一員把總二員兵四百名俱聽永順副將統轄桑植應於九谿協撥守備一員千總一員把總二員兵三百名駐防聽九谿協節制均應如所請從之尋定永順新設府曰永順府永順東南新設縣曰永順西北新設縣曰龍山保靖新設縣曰保靖桑植新設縣曰桑植○署江西巡撫張坦麟疏報寧州新建等三十四州縣開墾雍正六年分田地一千一百九頃有奇下部知之○庚申諭內閣凡遠省煙瘴之地及沿邊沿海之區因其險阻荒涼或民情難治是以有司缺出或揀選補授或將內地之員保題調補該員到任之後有歷俸三年即陞者亦有五年即陞者所以恤其苦而

賞其勞如恩於常格之外也乃向來督撫等徇情受託往往庇護私人以保題煙瘴邊缺爲名俾得速於陞遷仍將其人委署近地展轉留滯而本任竟屬虛懸是以緊要之缺轉成閒曠之所矣近年以來雖州縣正印官不敢仍蹈故轍而同知通判等員則聞尚有借委署他處之名不到本任延至數年俸滿居然得以陞遷者此等弊端甚有關係嗣後著嚴行禁止儻有應行署理之處著該督撫就近差委不得使屬員巧爲規避之計儻有仍前營私作弊者經朕查出定將該督撫及本員一併從重議處○又諭據署湖廣提督岳超龍摺奏永順土民控告同知潘果酷刑重耗濫差妨農各款苗衆約有二千人聚集永順城外臣現咨鎮臣周一德前往撫諭儻仍逞蠢頑不即解散則應調遣官兵相機勦撫等語從前永順土司懇請改土爲流朕屢次降旨不允後以該土司情詞懇切始勉從其

請加以特恩並令該地方官撫綏苗衆和輯
又安使之得所今土民聚衆妄行干犯國法
雖係伊等秉性愚頑然亦必由該同知不能
撫循之所致今若交與湖廣督撫審理恐伊
等瞻顧回護但云土司兇悍漸不可長而不
能得其實情昨降諭旨令趙弘恩署理湖北
巡撫印務著於到楚之時先赴湖南審理此
案再令御史苗壽唐繼祖前往會同審訊其
土民倡首之人自應查出治罪若潘果實有
苛刻凌虐等情應置重典以彰國憲提臣岳
超龍奏摺及土民控告呈詞款蹟俱發與趙
弘恩等逐一秉公訊問湖北巡撫印務著布
政使徐鼎暫行署理俟趙弘恩此案審定之
後再赴署理湖北之任○四川提督黃廷桂
奏報黃螂土司國保呈請歸流情詞懇切應
行具奏請旨得旨各處土司呈請改土爲流
者朕俱不允屢降諭旨甚明今據黃廷桂摺
奏黃螂土司國保屢次具呈懇請題達且稱

祖遺土地多被隣封侵佔兼以轄屬愚頑難
以管教惟恐貽累子孫等語朕念該土司國
保素知遵奉法紀自會勦米貼軍興以來隨
營効力更爲恭順其所轄土民亦無助逆惡
蹟今屢次懇請改土爲流既於伊身及其子
孫有益朕不忍違其所請著給與守備職銜
并賞銀五千兩爲立產安居之用其願居何
處著該提督向伊詢問悉心酌議善爲安插
俾其永遠得所以副朕懷○辛酉以翰林院
檢討沈文豪爲雲南鄉試正考官兵部郎中
林天木爲副考官編修嚴源燾爲貴州鄉試
正考官禮部主事鄧世杰爲副考官○兵部
議覆浙江總督李衛疏言內地商民船隻向
例禁止出洋嗣因閩省產米不敷食用准督
臣高其倬奏令該省與南洋貿易他省仍行
禁止但查浙江洋面接連閩省恐姦商趨利
冒險前往而沿途洋汛以非閩船反致稽查
不及請照閩省准其一體貿易其洋船向無

買米裝回之事仍循舊例毋庸與閩省相同。應如所請從之。壬戌諭內閣自本朝開國及平定三藩廓清朔漠以來褒忠錄功之典最爲優渥凡文武官弁兵丁之効力行間著有勞績及臨戎致命遇敵受傷者皆赤心報國之人朝廷沛澤加恩惟恐不逮乃近年以來部臣辦事遲緩因循往往因一二事之駁查遂將衆人卹賞之典俱致淹滯即如陝甘川省從前攻勦南川北川青海臬子山等處之文武官弁兵丁已經查核明晰應行卹賞議敘祇因青海等處功加冊結內有原任巡撫王景灝同知張梅革職離任所造冊結無印可鈐部議駁查以致南川等案卹賞之處一并稽延經朕訪察而後知之夫官弁例應議敘者不得早沾國恩固爲不可而陣亡受傷人等遲至數載之後尚未邀帑金之賜尤可憫惻著該部速行卹賞議敘嗣後凡有出兵加恩之案其中若有應行駁查者止將應

查之人扣除俟查明補給不得因一二人之行查而稽遲衆人應得之恩典將此永著爲例又如從前進藏出征之官弁兵丁若有預借銀兩而本身陣亡或在軍中受傷病故者除照例卹賞外其所預借銀兩概免追還○陞監察御史苗壽爲大理寺卿○科爾沁端敏固倫公主卒遣官致祭○癸亥鑲黃旗滿洲副都統巴爾呼達緣事革職陞監察御史延福爲鑲黃旗滿洲副都統○甲子諭戶部朕聞各省糧船過淮抵通之時該管衙門官吏胥役人等額外需索陋規以致繫費甚多運丁重受其累特命御史前往稽查禁革苛索等弊又查向來之例每船北上許帶土宜六十石朕思旗丁運駕辛苦若就糧艘之便順帶貨物至京貿易以獲利益亦情理可行之事著於舊例六十石之外加增四十石准每船攜帶土宜一百石永著爲例惟是運丁人等繁多素有惡習如偷盜米石掛欠官糧

夾帶私貨。藐視法紀。此向來之通弊也。又如昔年浙江湖廣二省糧船。因私忿小怨。遂致操刃持戈。殺傷多命。又從前偶值回空守凍。遂致縱容水手。公然搶奪。擾害居民。此皆衆所共知者。是以數年以來。內外臣工。條奏旗丁不法者。不下數百紙。前又有奏稱販賣私鹽之弊。在糧船爲尤。甚有一種積梟巨棍。名爲風客。慣與糧船串通。搭載貨物。運至淮揚。託與本地姦徒。令其賣貨買鹽。預屯水次。待至回空之時。一路裝載。其所售之價。彼此朋分。糧船貪風客之餘利。風客恃糧船爲護符。於是累萬盈千。直達江廣。私販日多。而官引日滯等語。觀此。則旗丁之作姦犯科。誠難以悉數也。朕年來屢飭該管官嚴行禁約。又復念其勞苦。疊沛恩膏。近見伊等之惡習刁風。亦漸悛改。是以特頒諭旨。嚴禁過淮抵通。苛索之陋。規復令增添攜帶土宜。俾得多沾餘潤。以贍家口。伊等益當感戴朕恩。遵守法度。

共爲良善。以免罪愆。著總督倉場侍郎漕運總督將朕此旨通行刊布。每船各給一張。使運丁人等觸目警心。以副朕體恤訓誨之至意。安徽巡撫魏廷珍。疏報壽州懷寧等二十四州縣開墾本年分田地一千八百頃有奇。署浙江巡撫蔡仕舫。疏報嘉興等十六縣開墾本年分田地五百頃有奇。俱下部知之。○乙丑先是湖南靖州人曾靜。因考試劣等。家居憤鬱。忽圖叛逆。遣其徒張熙。說名投書於川陝總督岳鍾琪。勸以同謀舉事。岳鍾琪拘留刑訊。究問指使之人。張熙甘死不吐。岳鍾琪置之密室。許以迎聘。伊師佯與設誓。張熙始將曾靜供出。岳鍾琪具摺併其逆書奏聞。奉旨差刑部侍郎杭奕祿。正白旗副都統覺羅海蘭。至湖南會同巡撫王國棟。拘提曾靜。審訊據曾靜供稱。生長山僻。素無師友。因應試州城。得見呂留良評選時文。內有妄論夷夏之防。及井田封建等語。遂被蠱惑。隨遣

張熙至浙江呂留良家訪求書籍呂留良之
子呂毅中授以伊父所著詩文內皆憤懣激
烈之詞益加傾信又往訪呂留良之徒嚴鴻
遠與鴻遠之徒沈在寬等往來投契因致沉
溺其說妄生異心等語隨將曾靜張熙提解
來京旋命浙江總督李衛搜查呂留良嚴鴻
遠沈在寬家藏書籍所獲日記等逆書并案
內人犯一併拏解赴部命內閣九卿等先將
曾靜反覆研訊并發看呂留良日記等書據
曾靜供稱前因輕信呂留良邪說被其蠱惑
兼聞道路浮言愈生疑罔致犯彌天重罪今
蒙一一訊問并發看呂留良日記等書極其
狂悖又知
聖朝深恩厚澤
皇上大孝至仁心悅誠服自悔從前執迷不悟
萬死莫贖今乃如夢初覺等語因俯首認罪
甘服上刑內閣九卿等備錄供詞進呈
御覽

上諭內閣九卿等我朝肇造區夏
天錫人歸

列祖相承中外從乂逮我

聖祖仁皇帝繼天立極福庇兆民文治武功恩
施德教超越百王普天率土心悅誠服雖深
山窮谷庸夫孺子以及凡有血氣之倫莫不
尊親詎意逆賊呂留良者悍戾兇頑好亂樂
禍自附明代王府儀賓之孫追思舊國憤懣
詆譏夫儀賓之後裔於親屬至為疎賤何足
比數且生於明之末季當流寇陷北京時呂
留良年方孩童本朝定鼎之後伊親被教澤
始獲讀書成立於順治年間應試得為諸生
嗣經歲科屢試以其浮薄之才每居高等盜
竊虛名誇榮鄉里是呂留良於明毫無痛癢
之關其本心何曾有高尚之節也乃於康熙
六年因考試劣等憤棄青衿忽追思明代深
怨本朝後以博學鴻詞薦則詭云必死以山
林隱逸薦則薙髮為僧按其歲月呂留良才

爲本朝諸生十餘年之久乃始幡然易慮忽號爲明之遺民千古悖逆反覆之人有如是之怪誕無恥可嗤可鄙者乎自是著邪書立逆說喪心病狂肆無忌憚其實不過賣文鬻書營求聲利而遂敢於

聖祖仁皇帝任意指斥憑虛撰造公然罵詛所著書文以及日記等類或鐫板流傳或珍藏祕密皆人世耳目所未經意想所未到者朕繙閱之餘不勝惶駭蓋其悖逆狂噬之詞凡爲臣子者所不忍寓之於目不忍出之於口不忍述之於紙筆者也夫普天之下莫非王土率土之濱莫非王臣呂留良於我朝食德服疇以有其身家育其子孫者數十年乃不知大一統之義其日記所載稱我朝或曰清或曰北或曰燕或曰彼中至於逆藩吳三桂連書亦曰清曰往講若本朝與逆藩爲隣敵者然何其悖亂之甚乎且吳三桂耿精忠乃叛逆之賊奴人人得而誅之呂留良於其稱

兵犯順則欣然有喜惟恐其不成於本朝疆宇之恢復則悵然若失轉形於嗟嘆於忠臣之殉難則汚以過失且聞其死而快意不顧網常之倒置惟以助虐迎寇爲心不顧生民之塗炭惟以兵連禍結爲幸何呂留良處心積慮殘忍兇暴至此極也又如僞永曆朱由榔竊立於流寇之中在雲貴廣西等處其衆自相攻劫貽禍民生後兵敗逃竄緬甸順治十八年定西將軍愛星阿等領兵追至緬城先遣人傳諭緬酋令執送朱由榔大軍隨至城下緬人震懼遂執朱由榔獻軍前此僞永曆之實跡豈有被執時滿漢官兵轉於伊馬前皆跪之事瞽說荒唐誕謬極矣總之逆賊呂留良於本朝實有徵應之事蹟則概爲隱匿而不書而專以造作妖誣快其私憤又文集內云今日之窮爲義皇以來所僅見等語夫明末之時朝廷失政貪虐公行橫征暴斂民不聊生至於流寇肆毒疆場日蹙每歲糜

餉百萬悉皆出於民力乃斯民極窮之時也
我朝埽清寇氛與民休養於是明代之窮民
咸有更生之慶逮我

聖祖仁皇帝愛育黎元海內殷庶黃童白叟不
見兵革蠲租減賦之政史不勝書久道化成
休養生息六十餘年民安物阜即考羲皇以
來史冊所紀屈指而數蒙

上天之眷佑可以比竝我朝之盛者不可多得
而乃云羲皇以來未有之窮乎又日記所載
怪風震雷細星如彗日光磨盪皆毫無影響
妄捏怪誕之處甚多總由其逆意中幸災樂
禍但以捏造妄幻惑人觀聽爲事其失實不
經皆不顧也夫災異亦古所時有

上天垂象原以儆戒人君令其修省進德若以
捏影捕風之語指爲災異傳諸後世或謂從
前太平盛世尚有如此非常奇怪災異儻遇
日月星辰水旱之變必生輕忽漫不經心凡
所以啟後世人君之怠玩者其罪可勝言乎

其他猖狂悖亂之詞令人痛心疾首者不可
枚舉呂留良生於浙省人文之鄉讀書學問
初非曾靜山野窮僻冥頑無知者比且曾靜
止譏及於朕躬而呂留良則上誣

聖祖皇考之盛德曾靜之謗訕由於誤聽流言
而呂留良則自出胸臆造作妖妄是呂留良
之罪大惡極誠有較曾靜爲倍甚者也朕向
來謂浙省風俗澆漓人懷不逞如汪景祺查
嗣庭之流皆以謗訕悖逆自伏其辜皆呂留
良之遺害也甚至民間氓庶亦喜造言生事
如雍正四年內有海寧平湖闔城屠戮之謠
比時驚疑相煽逃避流離者有之此皆呂留
良一人爲之倡導於前是以舉鄉從風而靡
甚至地方官吏怵其聲勢之囂陵黨徒之衆
盛皆須加意周旋優禮矜式以沽重儒之譽
如近日總督李衛爲大臣中剛正之人亦於
到任之時循沿往例贈送祠堂匾額況他人
乎此其陷溺人心濁亂世俗害有不可勝言

者數年以來。朕因浙省人心風俗之害可憂者甚大。早夜籌畫。仁育義正。備極化導。整頓之苦心。近始漸爲轉移。日歸於正。若使少爲悠忽。不亟加整頓。則呂留良之邪說誣民者。必致充塞膠固於人心而不可解。而天經地義之大閑。泯沒淪棄。幾使人人爲無父無君之人矣。今日天道昭然。惡貫時至。令其姦詐陰險盡情敗露。則不容不明正其罪。以維持世教彰明國法。且呂留良動以理學自居。謂己身上續周程張朱之道統。夫周程張朱世之大儒。豈有以無父無君爲其道。以亂臣賊子爲其學者乎。此其狎侮聖儒之教。敗壞士人之心。真名教中之罪魁也。朕即位以來。實不知呂留良有何著述之事。而其惡貫滿盈。人神共憤。天地不容。致有曾靜上書總督岳鍾琪之舉。曲折發露。以著呂留良之兇頑。而呂留良之子如呂葆中者。曾應舉成名。蒙恩拔置鼎甲。仕列清華。其餘子孫多遊庠序。乃

不即燬板焚書以滅其跡。且前此一念和尚謀叛之案。黨羽連及呂葆中。其時逆跡早已彰著。蒙

聖祖仁皇帝如天之仁。免其究問。而呂葆中遂憂懼以死。就常情而論。呂葆中之兄弟子孫。遇如此之驚危險禍。且荷蒙

聖祖仁皇帝如此高厚洪恩。尤當感激悔悟。共思掩覆前非。以爲倖逃誅殛之計。豈料冥頑悍驚。習與性成。仍復抱守遺編深藏笥篋。此固呂留良以逆亂爲其家傳。故世惡相承。罔知儆惕而實乃

天道昭然。不容少昧。使逆賊之陰謀徹底呈現於今日。逆賊之遺毒不致漏網於天誅也。曾靜逆書。朕已洞悉。知外間逆黨頗衆。竟有散布訛言。希圖構亂者。然其所詆惟朕之一身。朕可以已意自爲判定歸結。若如呂留良之罪大惡極。獲罪於

聖祖在天之靈者。至深至重。即凡天下庸夫孺

子少有一綫之良亦無不切齒而豎髮不欲與之戴履天地此亦朕爲臣子者情理之所必然應將已故逆賊呂留良及現在子孫嫡親弟兄子姪照何定律治罪之處著九卿翰詹科道會議直省督撫提督兩司秉公各抒已見詳核定議具奏○以正白旗叅領蔡永文署直隸正定總兵官○丙寅諭八旗大臣等八旗官房俱係身犯重罪貪婪人員入官之物不過以備賞賜耳此次出征之大臣官員兵丁俱係前往軍前効力之人如大臣內有因房屋狹隘願換官房居住者著怡親王傳爾丹查明指給爾等由該旗取具圖樣呈覽朕另降諭旨其營總及章京內有願換官房者亦准其換住再護軍校驍騎校護軍馬甲內有租典房屋居住者著該旗大臣等確查各該旗所有官房於大兵起程之前酌量賞給俾兵丁等每月得省房租以爲家口生計之資○擢戶部郎中對琳爲內閣學士兼

禮部侍郎 戶部議覆署廣東巡撫傅泰疏言粵東文武會試舉人公宴銀兩向例照各州縣編徵定額分給本州縣之舉人未免多寡不均請合省通計按名給發應如所請從之 禮部議覆四川巡撫憲德疏言威州地方既經裁併保縣所有取進童生額數請兩處通融合取十二名其屏山縣向隸馬湖府未經立學今府已裁汰該縣改屬敘州府請設教諭一員訓導一員原取府學生員改作縣學童生取進十五名應如所請從之○裁陝西涼州府平番縣西大通驛驛丞一員添設縣丞一員兼管驛務其沙井一驛改隸蘭州管轄從川陝總督岳鍾琪請也○丁卯孝恭仁皇后忌辰遣官祭景陵○上詣恩佑寺行禮○戊辰陞廣東香山副將湯寬爲福建金門總兵官 兵部議覆廣東總督孔

毓琬疏奏南澳鎮標右營把總翁德巡海遭風被溺身故請予廕贈應如所請翁德照例致祭一次廕一子以衛千總用其被淹兵丁等行令該督查明分別卹賞從之○己巳夏至祭

地於

方澤遣裕親王廣祿行禮○辛未諭內閣自古明目達聰之道欲以周知庶務博採羣情其責端在於臣工之襄贊然必公正居心斯能以忠言讜論裨益政治苟或植黨營私辯言亂政此倡彼和顛倒是非實國家之罪人爲王章所不宥嘗觀前明季世一二新進後生竊居言路遂朋比固結挾制大臣把持朝政以致國是日非而不可挽此其炯鑒也我

世祖章皇帝

聖祖仁皇帝聖神御極大觀在上言路弘開羣邪屏息一切猖狂澆薄之風早已翕然丕變雖有不肖之徒亦無能施其伎倆矣朕即位

以來以公聽並觀爲務以納忠廣益爲先既命滿漢文武大臣指陳政務又命科道等於露章之外准具密摺奏事蓋以國家事務殷繁人情弊端種種諸臣有陳奏之心或有不便顯言之處故令密封進呈所以免其瞻顧去其嫌疑俾得各抒所見盡言無隱庶國計民生均有攸賴又如國家任事出力勤慎素著之大臣所辦公務既多豈能保其無所錯誤若因此而指摘殊非情理其他偶罹過愆或其子弟家人生事失於覺察一經彈劾若朕不加處分則近於護庇若加以處分則彼之宣力甚多而不能恕其一責朕心實爲不忍不若言事者密陳朕前待朕爲之斟酌輕重訓誨區處亦兩全之道凡此皆須出於至公至當方有裨益於風俗人心非使不肖言官藉密奏以自便其私也乃營私植黨之徒竟欲以此逞其姦黠甚或密行告訐詆毀大臣撓亂國政此風斷不可長朕是以降旨

停止科道官之密奏止令各用露章蓋以其在大廷廣衆之間自不敢挾私心而昧公道也乃復有公然紊亂黑白顛倒是非輒欲輕變舊章擅作威福者其餘則撫拾陳言苟且塞責又或相率而爲依違緘默之計竟未見一人一事實有所建白裨益於國計民生者夫以朝廷耳目之官視國家之政治如陌路而又欲以進諫之美譽歸之於己以不能納諫之名歸之於君上忍心害理莫此爲甚言官以進言爲職豈容以國家之事沽一己之名朕之廣開言路者實欲以衆人之耳目爲朕之耳目使民隱得聞萬事就理並非邀虛懷受諫之名博建輶置鐸之頌也乃向來科道官密奏之弊如此近來露章之習又如此此中外所共知共見者朕不得不再行訓飭言官有補闕拾遺之職庶其痛改頽風洗滌故習盡謹言獻替之道成蕩平正直之風科道不愧諫議之官國家得收納言之效儻復

蹈昔年故轍則有害而無益矣著傳諭科道等嗣後條奏事件著如文武大臣等輪班具奏○壬申諭廣東督撫聞粵東地方四民之外另有一種名爲蜆戶即蜆蟹之類以船爲家以捕魚爲業通省河路俱有蜆船生齒繁多不可數計粵民視蜆戶爲卑賤之流不容登岸居住蜆戶亦不敢與平民抗衡畏威隱忍跼蹐舟中終身不獲安居之樂深可憫惻蜆戶本屬良民無可輕賤擯棄之處且彼輸納魚課與齊民一體安得因地方積習強爲區別而使之飄蕩靡寧乎著該督撫等轉飭有司通行曉諭凡無力之蜆戶聽其在船自便不必強令登岸如有力能建造房屋及搭棚棲身者准其在於近水村莊居住與齊民一同編列甲戶以便稽查勢豪土棍不得借端欺凌驅逐並令有司勸諭蜆戶開墾荒地播種力田共爲務本之人以副朕一視同仁之至意○甘肅巡撫許容疏報鞏昌等府各

屬州縣勸墾本年分田地一千二十四頃有奇下部知之○豁免湖南武陵縣水淹田地額賦銀三百二十兩有奇從總督邁柱請也

大清世宗敬天昌運建中表正文武英明寬仁信毅大孝至誠憲皇帝實錄卷之八十一

大清世宗敬天昌運建中表正文武英明寬仁信毅大孝至誠憲皇帝實錄卷之八十二

敕修

監修總裁官光祿大夫經筵講官太僕寺卿兵部尚書理問兵部尚書等伯加五級臣等前奉
總裁官光祿大夫經筵講官太僕寺卿兵部尚書理問兵部尚書等伯加五級臣等前奉
事三等伯加五級臣等前奉
翰林院掌院事加二級臣等前奉
經筵講官議政大臣協辦內閣大學士事務禮部尚書仍兼管太常寺鴻臚寺事臣等前奉
雍正七年己酉六月甲戌朔四川巡撫憲德
疏奏瀘州士民先因樂輸軍需米石奉旨將
雍正七年額賦全行豁免萬姓歡呼呈請照
崇慶州例將雍正五年自首已徵在官寬至
雍正七年起科之糧仍於本年抵銷並現年
自首尚未查丈定數之糧情願一體輸納得
旨崇慶州已徵之糧留抵庚戌年正課其丈
量未畢者亦俟庚戌年輸納前已降諭旨此
所請瀘屬願輸錢糧著照崇慶州之例行
乙亥鑲白旗護軍統領輝那緣事革職以正

藍旗蒙古副都統青保署鑲白旗護軍統領。封土默特塔布囊沙津達賴爲輔國公。添設浙江台州府屬之海門。前所家子三。江口。新亭章安道頭。江口汎等處礮臺巡船。從浙江總督李衛請也。丙子。以鑲紅旗漢軍副都統管承澤署直隸天津總兵官。丁丑。諭內閣。游惰之民。自昔治天下者所深惡。若賭博之人。又不止於游惰而已。荒棄本業。蕩廢家貲。品行日即於卑汚。心術日趨於貪詐。父習之。則無以訓其子。主習之。則無以制其奴。鬪毆由此而生。爭訟由此而起。盜賊由此而多。匪類由此而聚。其爲人心風俗之害。誠不可以悉數也。凡爲不善之事者。雖干犯功令。猶可得微利於一時。獨至賭博。則今日之所得。明日即未必能保。若合一年數月而計之。勝者與負者同歸於盡。此人所共知者。無如邪僻之人。一入其中。迷而不悟。數年以來。屢次降旨嚴禁。而此風尚未止息者。以尚

有製造賭具之人。而有司之禁約未盡力也。百工技藝之事。可以獲利營生者。何事不可爲。而乃違禁犯法。製此壞風俗惑人心之具。其罪尚可言乎。嘗思賭博之風。所以盛行者。父兄爲之子弟在旁見而效之。家主爲之奴僕在旁見而效之。甚至婦人女子亦沉溺其中。而不以爲怪。總因習此者多。故從風而靡者衆也。假若嚴行禁止。使人不敢再犯。則日積月累。此風自然止息。無俟條教號令之煩也。凡地方大吏有司。均有化民成俗之責。而乃悠悠忽忽。視爲泛常。安辭溺職之咎。今特定本地官員勸懲之法。以清其源。嗣後拏獲賭博之人。必窮究賭具之所由來。其製造賭具之家。果審明確有證據出於某縣。將該縣知縣照溺職例革職。知府革職留任。督撫司道等官各降一級留任。如本地有私造賭具之家。而該縣能緝拏懲治者。知縣著加二級。知府著加一級。督撫司道等官著紀錄二次。

將此勸懲之法永著爲例於雍正庚戌年爲始著該督撫通行曉諭使城邑鄉村及遠陬僻壤咸各聞知理藩院奏達賴喇嘛之父索諾木達爾扎奉表進貢方物得旨索諾木達爾扎乃達賴喇嘛之父指教達賴喇嘛學習經典保護達賴喇嘛勤勞多年西藏之事毫不干預甚屬可嘉著封爲輔國公戊寅實授樓儼爲廣東按察使司按察使己卯解署直隸總督楊嗣任以都察院左都御史唐執王署直隸總督庚辰湖北巡撫馬會伯疏報沔陽漢陽武定衛大定所等二十二州縣衛所開墾本年分田地三千三百八十五頃有奇下部知之辛巳諭兵部湖廣九谿協副將包進忠著補授西寧總兵官周瑛現今領兵駐藏著將周瑛撤回命包進忠前往西藏代周瑛管理馬喇仍著往藏其藏內事務著馬喇僧格總理邁祿包進忠協理免甘肅安定縣雍正六年分電災額賦有差

旌表直隸涿州烈婦王啟功妻李氏孀居拒姦被勒殞命給銀建坊入祠致祭如例癸未以花馬池副將惠延祖署陝西延綏總兵官寧遠大將軍三等公岳鍾琪疏言噶爾丹策零三世弗庭百夷被虐衆叛親離天怒人怨蒙

聖祖至德洪慈再三寬宥更蒙

皇上深仁厚澤屢欲矜全而終無悔悟猶復憑其驚罵肆其猖狂不道之語見於表箋若不

大彰天討則冠履之定分不明番夷之禍難不息臣疊蒙指授

廟謨至周極備約舉王師之十勝決逆夷之必

敗一曰主德二曰天時三曰地利四曰人和

五曰糧糧之廣備六曰將士之精良七曰車

騎營陣之盡善八曰火器兵械之銳利九曰

連環迭戰攻守之咸宜十曰士馬遠征節制

整暇又加以期日之寬舒機宜之詳密凡此

全勝之宏畧咸出

聖心臣得効奔走之微勞便成殊績臣知指日蕩平獻俘奏凱以報

國恩得旨準噶爾世濟克頑心懷叵測將來必爲蒙古之巨患貽國家之隱憂是用發兵聲罪致討上承

先志下靖邊陲師出有名事非得已兩路軍機朕籌算者久矣其軍需一應事宜交與怡親王大學士張廷玉蔣廷錫密爲辦理其西路辦理事宜則專於總督岳鍾琪是任王大臣等小心慎密是以經理二年有餘而各省不知有出師運餉之事今覽岳鍾琪摺奏備陳十勝之情形軍務所關重大朕不敢預言其必然惟有倍加敬謹仰懇

上天

皇考鑒照不得已之情垂慈默佑早奏膚功而已靖邊大將軍公傅爾丹奏克州右營車兵李中倫拾有銀兩二封驗係皇賞情願歸還失主隨經查訪係北樓營車兵韓吉玉遺

失驗看相符願歸拾取之人李中倫復堅辭不受應加獎賞得旨講讓興廉最爲美俗而師旅出征尤以人和爲貴今李中倫拾取遺金知爲恩賞軍士之物即時稟知該管將弁情願給還本人似此見利思義同心同力之忱悃甚屬可嘉著賞銀六十兩以示嘉獎並傳諭內外直省兵丁等果聞風慕義共登善行必仰蒙

上天之賜同受國家之恩矣 命賞總理西藏

事務副都統馬喇銀二千兩協理西藏事務西寧總兵官包進忠銀一千兩以辦行裝盤費 甲申科道巴德保等遵旨將輪班條奏之處公同酌議仍以無庸輪班合詞具奏得旨據爾等科道奏稱不敢輪班密奏者誠恐拘於班次限於奏期無可條陳摺拾細事冒瀆聖聰等語朕現諭部院旗下文武大臣輪班條奏其所言果皆摺拾細事冒瀆朕聰乎如爾等以輪班密奏爲摺拾細事冒瀆朕聰

則輪班爲不可行矣既不可行則文武大臣之輪班條奏爾等即當奏請停止乃又緘默不言何也據爾等奏稱皇上於天下之事無不周知辦理妥協等語朕於天下之事無所周知者以進言之路廣也若如爾等之無所陳奏朕雖欲周知天下之事其可得乎爾等職司言路此所奏不合著另行定議具奏裁廣東惠州府碣石衛守備一員添設惠州府海防軍民同知一員駐劄碣石衛裁海豐縣南豐平安二驛驛丞各一員添設巡檢二員分駐河田汕尾地方改東海害驛丞一員爲東海害巡檢併歸新設海防同知管轄從調任廣東總督孔毓珣請也○乙酉諭內閣朕愛養黎元遐邇一體而邊遠之地小民家計不及近省尤朕心之所繫念數年以來甘肅四川雲南貴州廣西五省有用兵西藏及勦撫苗蠻等事其一應軍需皆動用公帑備辦秋毫不派及於民間而糧餉轉輸亦有資

於民力今藏地苗疆俱已寧謐朕心嘉慰特沛恩膏著將庚戌年甘肅四川雲南貴州廣西額徵地丁銀兩悉行蠲免其西安各屬地方近日亦有預備軍需之事朕心軫念著將庚戌年額徵錢糧蠲免十分之三此六省督撫大吏宜仰體朕心轉飭所屬有司敬謹奉行務使閭閻均霑實惠如有奉行不力被不肖有司暗飽私囊或姦胥土棍強紳劣衿包攬侵蝕者經朕訪聞必將通省大小官員分別從重治罪至於國家設官本以理民官有恤下之責民有奉上之義若設官而不爲計及養廉之資則有司之賢者將窘迫而莫能支不肖者又橫取而無所檢是以酌定將錢糧耗羨均給各官此揆情度理上下相安之道但思加恩百姓豁免正賦若將耗羨一併蠲除是民雖邀額外之恩而官員轉有拮据之苦上司或因此稍有寬假則必致巧取苛索於民流弊種種轉多於耗羨之數於吏治

民生均無裨益著於庚戌年爲始凡遇特恩蠲免錢糧者其耗羨仍舊輸納諒必民所樂從若因水旱蠲免者不得徵收耗羨將此永著爲例○命鑄給馬會伯辦理西路軍需關防○丙戌諭內閣浙江逆賊呂留良兇頑梗化肆爲誣謗極盡悖逆迺其逆徒嚴鴻逵者實爲呂留良之羽翼推尊誦法備述遺言又從而恢張揚厲以附益之其詞有較呂留良爲尤甚者夫呂留良以本朝諸生追附前明儀賓之末裔無端反噬憤懣猖狂已屬從古亂臣賊子中所罕見至若嚴鴻逵自其祖父已爲本朝之編氓踐土食毛戴高履厚嚴鴻逵之於明代豈有故君舊國之思而於我朝實被遂生樂育之澤何所庸其感忿何所庸其追憶而亦敢效顰乎茲擇其悖逆之語一並宣示日記有云索倫地方正月初三日地裂橫五里縱三里初飛起石塊後出火近三十里內居人悉遷避又云熱河水大發淹死

滿洲人二萬餘又云十六夜月食其時見衆星搖動如欲墮狀又或飛或走羣向東行又云舊年七月初四日星變欽天監云此星出天沛垣入天市垣分野屬吳越應在數年內吳越有兵起於市井之中凡此荒唐叛逆之語自康熙五十五年至雍正六年內所記載者不勝枚舉其中惟索倫地方擁石出火實有之事蓋彼地氣脉使然前此已經屢見其傍遠近山頂亦有烈焰者而嚴鴻逵以此爲譏訕乎至熱河水發一事因此地山迴巒抱中惟一道河流每雨水稍大衆水所匯或致衝決隄岸康熙四十八年六月大雨連晝夜其時附近行宮一帶地處高阜惟隔岸山根之下爲水所漫溢本地久居之民及扈從之官兵皆知雨止水即減退安重不遷惟寄居之匠人等驚惶迷惑或有愚人編木爲筏謂可乘流而渡遂有木筏觸石而解沉溺者數人是時朕以輪班恭請

聖安隨從官員工三百人駐劄即在水發之地因約束嚴整無一妄動之人及至水退皆安狀無恙無一人被水者乃嚴鴻達謂淹死滿人二萬餘何其妄誕至於斯極且熱河之地五方之人畢集而嚴鴻達謂獨淹死滿洲有此理乎嚴鴻達生今之世爲今之民明代淪亡已久而我朝定鼎業經百年有餘乃臆造訛言好亂樂禍於昇平寧謐之時作干戈擾攘之望以

聖祖之德盛化神而公然誣讟以今日之民安物阜而朝夕咒詛種種喪心病狂皆拾呂留良之唾餘而尤加幻妄豈非兇逆性成萬死有餘之逆賊乎且伊又貌作迂腐曲謹之態浮薄之士簧鼓其虛譽致有廷臣以纂修明史薦舉及伊者伊乃自鳴得意抗慢詭激其自記有云予意自定當以死拒之耳其大言藐抗若此又云衡州人張熙字敬卿來見言其師曾靜永興縣人在彼中講學學者稱蒲

潭先生從前因讀講義始棄諸生夫以朕特旨詔修明史旁求山林隱逸之士而廷臣薦舉及伊至欲以死力拒竟視朝廷如兒戲等徵召於弁髦而於逆賊曾靜等叛亂悖惡之徒尺書馳問一介相通則數千里之外呼吸相應招納黨類天地間顯圖不軌擾亂綱常未有兇狡至於此極者也似此悖逆叛亂之人煽惑民心且獲罪於

聖祖皇帝與呂留良黨惡共濟其罪不容於死嚴鴻達應作何治罪之處著九卿翰詹科道會同速議具奏吏部題三等侯伊爾拜緣事革職銷去四次恩詔所得拖沙喇哈番餘三等伯以其叔李林襲替從之一等阿思哈尼哈番又一拖沙喇哈番蘇白何緣事革職以其子金文彥襲替戊子諭內閣我朝建極綏猷遐邇率育海隅日出莫不尊親乃逆賊呂留良嚴鴻達兇悖惡亂無父無君著書顯爲謗訕於本朝之大統肆爲詆斥之詞

於我

聖祖仁皇帝之深仁厚澤偉烈豐功任意爲誣
蠮慢詛之語其猖狂妄幻肆無顧忌人人痛心疾首不共戴天朕已降諭旨將伊等極惡大罪之處宣示中外諸臣公議治罪至於嚴鴻遠之徒沈在寬生於本朝定鼎數十年之後自其祖父已在覆幬化育之中非祇身被德教者可比綱常倫理之大義尤當知凜乃墮惑逆黨之邪說習染兇徒之餘風亦懷不逞附會詆譏募效梗化之民稱本朝爲清時竟不知其身爲何代之人狂悖已極此沈在寬與呂留良嚴鴻遠黨同叛逆之彰明較著者也至其所著詩集有云更無地著避秦人又云陸沉不必由洪水誰爲神州理舊疆此以本朝之宅中立極化理郅隆目爲神州陸沉有同洪水之患其謬戾尤爲狂肆且即以洪水言之明代二百餘年黃運兩河時時潰決生民日有淪爲波臣之懼我

聖祖仁皇帝時屢憂勤詳示方畧

躬親相度至於再三凡所以修築捍禦之策疏濬導刷之宜悉經

睿慮精詳盡美盡善以致川流循軌黃水安瀾數十年來隄工鞏固億姓永無昏墊之虞共享平成之慶迨朕紹膺丕緒恪遵

謨烈加意修防仰荷

上天眷佑七年以來河流咸歸故道海口深通清淮迅暢三省運道通行無阻至於北直畿輔之地南省浙江等處凡有海塘河渠以及應行經理水利之處皆漸次興修蓄洩以時早潦有脩府事修和桑麻徧野此時之神州何處可指爲陸沉又何地可指爲洪水乎且沈在寬云誰爲神州理舊疆其意欲將神州付之何人經理也沈在寬年未滿四十而亦效其師之狂悖肆詆本朝乃於逆賊曾靜之徒張熙千里論文一見如故賦詩贈答意同水乳此其處心積慮以叛逆爲事其罪實無

可道著交與刑部將沈在寬訊取口供具奏
○調廣東廣州左翼漢軍副都統吳如譯爲
江南京口左翼漢軍副都統陞正藍旗叅領
馬士傑爲廣東廣州左翼漢軍副都統○復
設廣東廣州府東匯關批驗所大使一員添
設饒平縣東界場陽江縣雙恩場大使各一
員裁新寧縣姓崗場大使一員併歸海晏場
大使兼管從調任廣東總督孔毓珣請也○
己丑以刑科給事中署四川松茂道高維新
署四川按察使司按察使○改湖南鎮筵鎮
原轄之綏寧營歸靖州協管轄從湖廣總督
邁柱請也○庚寅以都察院左副都御史兼
內閣學士裏行宗室塞爾赫充經筵講官○
辛卯以翰林院檢討吳大受爲四川鄉試正
考官左春坊左贊善色誠爲副考官編修張
夢徵爲廣東鄉試正考官編修嚴民法爲副
考官吏部員外郎嚴宗詰爲廣西鄉試正考
官編修于枋爲副考官編修吳延熙爲福建

鄉試正考官編修陳浩爲副考官編修錢陳
羣爲湖南鄉試正考官刑部主事永世爲副
考官○癸巳諭內閣浙江總督李衛之母汪
氏訓子成名壽逾大耋前已降旨照伊子尚
書品級給與封誥以昭特恩今伊子來京陛
見未及回任而聞溘逝深爲憫惻著賜祭一
壇令署督性桂致祭李衛著給假兩月料理
伊母喪事其各任印務暫著性桂蔡士舫等
照前署理 諭刑部前因直隸盜案往往多
於他省是以降旨令將直隸盜案仍照舊例
不分首從皆斬後因定例伊始鄉僻愚民未
必人人盡知若一槩置之重辟於心實爲不
忍是以將直隸盜案亦暫照各省盜案分別
斬決發遣二項歸結原冀愚頑之輩感恩畏
法遷善改惡共爲良善之民也乃年來直隸
盜案雖似畧減而仍復不少且有所得贓物
甚微非積盜行劫數次之人而甘心罹於重
法者朕推原其故必係地方有司未將從前

首從皆斬之諭旨愷切詳明通行曉諭是以伊等罔知儆懼復蹈前轍用是再頒此旨著直隸總督徧行宣諭自庚戌年爲始直隸境內再有爲盜劫之事者定照首從皆斬之舊例行如地方官仍疎忽從事不明白徧行曉諭將來事發一併嚴加治罪 甲午。

上回宮 諭戶部據署江西巡撫張垣麟摺奏本年五月內大庾南康二縣因驟雨發水民居低窪者間被衝淹朕心深爲憫惻除張垣麟已動公用銀六百兩委員賑濟外著再動公帑銀四千兩令布政使李蘭親往二縣悉心查勘分別被水輕重逐戶賞給務令均霑實惠各得安居以副朕矜恤窮民之至意予故鎮國公德普祭二次造墳立碑 乙未上御太和殿命大學士公馬爾賽蔣廷錫捧敕印授靖遠大將軍公傅爾丹大將軍副將軍叅贊大臣及出征官員等行禮畢上回宮申時

上率大將軍副將軍叅贊大臣及在京諸王貝勒貝子公內大臣大學士都統尚書等詣堂子行禮次鳴螺隨於兵部排設大纛前行禮畢遂御東長安門外所陳黃幄大將軍副將軍叅贊大臣等皆佩弓矢跪辭

上親解御用數珠賜大將軍公傅爾丹大將軍行跪抱禮副將軍叅贊大臣等亦各以次行跪抱禮

上諭大將軍等曰爾等此去當和衷共濟速奏膚功凱旋時朕將出城親接爾等宜各加奮勉大將軍公傅爾丹奏曰臣等蒙

皇上訓諭周詳務必同心協力迅掃氛塵仰答恩榮奏畢

上親視大將軍等上馬啟行

上回宮是日德勝門外列兵處賜宴命王大臣與大將軍副將軍遞茶進觴禮部兵部堂官與叅贊大臣遞茶進觴侍衛與出征官員遞茶進觴畢大將軍等望闕謝恩 敕諭靖遠

大將軍傅爾丹奉

天伐罪治世之常經鋤暴除兇安邊之遠畧況醜逆陰謀詭譎斯王章顯用征誅機不容遲法無可貸厄魯特策妄阿喇布坦乃噶爾丹之逆族也昔我

聖祖仁皇帝時噶爾丹干犯

天討立時殄滅本應直搗巢穴俾無孑遺蒙

聖祖仁皇帝如天之仁念策妄阿喇布坦向與

伊叔齟齬情罪可原特沛鴻恩賞其部落撫

綏周至再予生全是時伊力弱勢微小心恭

順其後乃誘奪伊妻父之部曲萬餘戶輒敢

驕肆妄行竟欲直驅青海擾其人衆又詭計

發兵進藏荼毒生靈我

聖祖仁皇帝雖發兵致討仍賜包容遣使宣諭

再三冀其改悔而伊怙惡不悛冥頑如故及

朕紹登大寶伊雖遣使求和而中懷詐僞以

背恩大逆之羅卜藏丹津負罪潛逃伊輒敢

容留抗違國法中外之人莫不忿恨朕本欲

於數年間命將興師向伊詢問不意策妄阿喇布坦遂伏冥誅其子噶爾丹策零繼立狡獪狂誕同於其父昨遣人陳奏之際言辭傲慢心志姦邪似此逆賊渠魁父子濟惡若不及時翦滅實爲衆蒙古之巨害且恐將來貽國家之隱憂用是特發兩路大兵聲罪致討爰命爾爲靖邊大將軍統領滿洲蒙古綠旗大兵一切事宜爾與副將軍公巴賽都統侯陳泰都統石禮哈散秩大臣公達福前鋒統領袁泰副都統戴豪覺羅海蘭等酌定方畧公同計議而行勿謂已能而不納衆論勿當事會而致失機宜勿恃兵強而輕視賊寇密偵遠探備極周詳各路大兵及蒙古兵丁聽爾調遣凡遇有警即遣發官兵應援撲勦有能擒斬噶爾丹策零來歸者即行馳奏加恩優賞有情急來歸者加意撫恤其抗拒官兵者毋加殺戮兵將所過地方須申嚴紀律毋得騷擾百姓毋得淫人婦女毋得離散人

之父子夫婦母得損壞人之墳墓室廬母得強取貨物母得驅役平民以副朕戡亂靖逆安民綏衆之意其或有臨戰退縮貽誤擾亂軍機者爾會同商議文官四品以下武官三品以下即以軍法示衆官兵有犯小過者會同商議徑行處治毋民戎行之勞績毋寬縱違法之弁兵法紀務極嚴明賞罰悉期公當一切機宜爾商酌調遣有應知會西路寧遠大將軍者即行知會一同辦理將噶爾丹策零速行殲勦永靖邊陲斯稱委任爾等務宜殫心用力早奏膚功欽哉故敕○丙申

上詣

恩佑寺行禮畢幸圓明園諭戶部據怡親王奏河西務河隄漫開附近之田禾廬舍或有被淹傷損之處朕心深爲軫念爾部速派賢能司官帶帑銀二千兩前往悉心查勘賑濟務令各需實惠諭刑部等衙門聞得外間訛傳六月二十四五將開屠宰耕牛之禁回

子等俱欲齊來謝恩等語又聞民間竟有私宰耕牛之事此必姦人造爲訛言誘人犯法以撓禁令也凡朕所降旨禁約者事事皆欲濟民之用厚民之生無一事爲朕之私心便用而設也如禁用黃銅所以裨益鼓鑄流通國寶朕豈別有需用黃銅之處乎如禁賭博所以端人心而厚風俗賭博之爲害於人心風俗朕已屢降諭旨甚詳且悉非愚頑不移之輩無一人不以禁約爲當也至於禁宰耕牛以耕牛爲農田所必需墾田播穀實藉其力世間可食之物甚多何苦宰牛以妨穡事乎今朝廷所需除祭祀照例供用其餘亦一槩不用牛肉矣年來自禁用黃銅之後而錢價漸平民用頗利矣自禁賭博之後而開場聚衆者亦畧知畏懼斂跡矣自禁宰耕牛之後而農家向日數金難得一牛者今已購買易而畜牧蕃矣可見利益民生之事亦既行之有效爲良民者必皆知朕大公愛民之心

爲良有司者必能實心遵朕愛民之政惟百姓中有回子一類以宰牛爲業試思貿遷有無百工技藝何業不可營生而必欲爲此犯禁傷農之事國家亦豈肯因一二游手回民無理之營生而令妨天下萬民之生計夫朕所禁之事必審度再四均見其必應禁止然後見諸施行豈有旋禁旋開朝三暮四之理乎今訛傳宰牛開禁之語必係爲匪姦徒造作言語煽誘愚民使之犯法而於中取利甚屬可惡著該部步軍統領順天府府尹五城御史等通行曉諭京城直省並嚴行查訪如有違禁私宰耕牛及造爲種種訛言希圖煽誘者立即鎖拏按律盡法究治如該管官不實力嚴查致有干犯者定行從重議處○陞署盛京戶部侍郎內閣侍讀學士和善爲光祿寺卿仍署盛京戶部侍郎事（盛京考察滿漢各部官員不謹官一員罷軟官一員有疾官三員才力不及官一員分別處分如例

戊戌戶部議覆署直隸總督楊鰲疏言直屬雍正七年錢糧蒙恩蠲免起運銀四十一萬七千餘兩今山西所屬之蔚州已經改屬直隸請一體核蠲查直省核蠲銀額在該州未經改屬之前今若將該州併入通融核算是全省所蠲不及原數請將蔚州糧額比照直隸蠲免分數另蠲銀六千七十五兩有奇從之○己亥陝西總督岳鍾琪疏奏陝屬設立社倉一事懇請特頒諭旨恭錄鐫石又擬列社倉條約並請刊刻木榜以昭程式得旨朕惟國家建立社倉原令民間自行積貯以百姓之資糧濟百姓之緩急其春貸秋償及滋生羨息各社自爲經管登記地方有司但有稽查之責不得侵其出納之權此社倉之古法也是以各省有請立社倉者朕皆令其聽從民便毋得強勒捐輸繩以官法以致便民之舉轉爲民累所以曉諭各省督撫者不啻至再至三矣從前岳鍾琪在京時請於通

省加二火耗內應行裁減每兩五分之數且暫行徵收發與民間採買穀石分貯社倉俟採買數足即行裁減是於暫收耗羨之中隱寓勸輸之法實則應行酌減之耗羨即小民切己之貲財而代民買貯之倉糧即小民自捐之積貯此藏富於民之良法最爲切實而易行是以俞允所請令其辦理乃陝省官員不知此項穀石本係民貲又未識從前岳鍾琪奏請之由以爲收貯在官即是公物不肯付民經營而胥吏司其出納者遂有勒買勒借之弊殊非數年以來朕之周咨詳畫多方生養斯民本意矣今特降諭旨將朕允從岳鍾琪之請并岳鍾琪陳奏原委明白曉示著署督查郎阿巡撫武格刊石頒布俾各州縣鄉社小民咸知朝廷經營設法之蓋藏實百姓自爲歛散之資用儻地方官有於社倉穀石創議交官不交百姓或指稱原係公項預爲公事侵那之地者俱以擾撓國政遺悞民

生論從重治罪其岳鍾琪所擬社倉條約著戶部抄錄交與該督撫分發各州縣刊刻木榜於各鄉社倉堅立以爲永久程式○庚子吏部議覆直隸布政使王墓奏言各省藩庫俱設庫大使一員官秩雖微職掌甚重向例以吏員銓選人品不一請照鹽大使例將候選知縣州同州判縣丞等揀補給與八品職銜與按察使知事等官較俸陞轉應如所請從之○禮部議覆廣東總督孔毓珣疏言暹羅載米船隻因風飄泊廣東已飭各屬加意撫恤其撈回壓艙貨物仍請准其輸稅發賣得旨暹羅載米船隻既遭風飄泊廣東其壓艙貨物著免其輸稅○旌表山西永濟縣烈女尚正基女尚氏守正不污拒姦被殺給銀建坊入祠致祭如例○辛丑諭內閣據順承郡王錫保以在軍前効力之謝濟世註釋大學毀謗程朱參奏前來朕觀謝濟世所註之書意不止毀謗程朱乃用大學內見賢而不

能舉兩節言人君用人之道借以抒寫其怨望誹謗之私也其註有拒諫飾非必至拂人之性驕泰甚矣等語觀此則謝濟世之存心昭然可見朕即位以來於用人之際至公無私不惟可以自信亦天下臣民所共知者即以田文鏡謝濟世二人之事言之田文鏡在聖祖仁皇帝時爲內閣侍讀學士朕從未識其面亦并未知其姓名因雍正元年伊奉差祭告華山回京陛見將山西通省荒歉情形急切陳奏備極周詳朕以山西被災其時之巡撫德音身在地方區不奏聞而田文鏡以奉差經過之員念切民瘼直言無隱其忠君愛國之忱惻深屬可嘉遂令田文鏡前往山西撫綏賑濟伊到彼果能盡心辦理於是將伊授爲山西布政使令與諾岷協衷共濟嗣因河南諸事廢弛調任河南布政使未幾擢爲河南巡撫現今授以河東總督之任一二年間深加信任尚可謂之見賢而不能舉舉而

不能先乎又如李紱蔡珽與黃振國邵言綸汪誠等結黨行私營求報復而謝濟世姦惡狠戾聽其指使奏田文鏡貪贓納賄任意誣讎借直言敢諫之名行其排擠傾陷之計朕當謝濟世陳奏之時立即洞燭其姦拏交刑部審問朕尚未忍置之重典著令革職發往軍前効力贖罪一時在廷諸臣無不以爲至公至當似此尚可謂之見不善而不能退退而不能遠乎至於朕心并無私好私惡惟以其人之善惡爲好惡以衆論之是非爲好惡何嘗預存成見於胷中即如引見各官有見其才具似優者亦令該上司試看有見其人似屬平常者亦令該上司試看並諭令該上司秉公考課不必存迎合瞻顧之念是以各員蒞任之後或朕旨曾獎其優而督撫劾者多有之或朕旨以爲平常而督撫保題稱職者亦有之朕未嘗以一己之好惡令天下督撫以阿徇而各督撫亦能仰體朕意從

未嘗以朕之好惡漫爲迎合也朕之用人惟期有益於國計民生者可謂之好人之所惡惡人之所好乎謝濟世於公正任事之田文鏡則肆行誣劾於婪贓不法之黃振國以及黨護鑽營之李紱蔡璉邵言綸汪誠等則甘聽其指使而爲之報復乃直顛倒是非紊亂黑白好惡拂人之性者矣天理國法所不能容蓄已逮身而猶不知省懼何其謬妄至於此極夫拒諫飾非之說乃朕素所深戒然必責難陳善忠言讜論而後可以謂之諫若乃排擠傾陷之私言姦險狡惡之邪論豈可以直諫自居而冀朕之聽受耶試問謝濟世數年以來伊爲國家數陳者何事爲朕躬進諫者何言朕所拒者何諫所飾者何非除處分謝濟世黨同伐異誣陷良臣之外尚能指出一二事否乎謝濟世以應得重罪之人從寬令其効力乃仍懷怨望恣意謗訕甚爲可惡應作何治罪之處著九卿翰詹科道秉公定

議具奏○陞通政使王廷揚爲戶部右侍郎○議政王大臣等議覆川陝總督岳鍾琪奏稱噶達建造廟宇移駐達賴喇嘛守護之兵殊關緊要查化林協額兵現有一千名請以三百名留駐化林坪另設都司一員帶領千總一員把總二員以資彈壓以二百名移駐打箭爐令化林守備帶領把總一員分防以五百名移駐噶達令化林副將帶領把總二員再添設中軍都司一員千總一員前往防護至噶達之外雅龍江上中下三渡俱屬要隘請設千總二員各帶兵一百名分守上下二渡設守備一員帶兵二百名防守中渡又噶達之西吹音堡亦係雅龍江渡口設千總一員帶兵一百名分防化林所屬原有黎雅戕邊二營今既移駐噶達將黎雅營就近改歸建昌鎮管轄戕邊營就近改歸永寧協統轄嗣後凡有藏內人來噶達者令西藏噶隆給發圖書路引以便稽查均應如所請從之

壬寅諭廣西省在京官員據廣西學政衛昌績奏稱粵省風俗澆漓而紳士實爲倡首即該省鄉紳之在京居官候補者亦稱本地紳士庶民前洗積習未能驟除應設觀風整俗使以司化導等語朕觀廣西乃邊遠小省通籍於朝者本不多人而其中即有謝濟世陸生楠者狂悖戾陵目無法紀則該省風俗之薄劣即此可見矣今御史陳弘謀等請照衛昌績所奏設立觀風整俗使獨不思爾等紳士乃兆庶之觀瞻閭閻之坊表若爾等果能於忠孝禮讓之道身體力行以爲衆人之模楷而又各教訓其子弟各規勸其鄉黨則小民慕義嚮風觀感興起風俗自日歸於淳厚若不能端本澄源躬先表率而望秉鐸司教之官家喻戶曉使之改過遷善易俗移風所謂逐末而忘其本也爾等各思嘉惠桑梓貽福子孫當於己身自求之○免甘肅平涼縣雍正六年分電災額賦有差○添設陝西

河川協遊擊一員千總一員把總二員兵八百名駐劄薩拉地方把總一員兵八十名與原設之守備同駐保安堡地方俱屬西寧鎮統轄從川陝總督岳鍾琪請也○癸卯裁陝西廊州三川驛延長縣千谷驛延川縣文安驛清澗縣石嘴驛綏德州義合驛吳堡縣河西驛驛丞各一員潼關縣遞運所長武縣倭口遞運所大使各一員○禮部題山西汾陽縣烈婦故民董科妻高氏於順治六年間守志發居拒寇被害請照例給銀建坊入祠致祭從之

大清世宗敬天昌運建中表正文武英明寬仁
信毅大孝至誠憲皇帝實錄卷之八十二

大清世宗敬天昌運建中表正文武英明寬仁
信毅大孝至誠憲皇帝實錄卷之八十三

監修總裁官光祿大夫經筵講官太僕寺卿太僕寺卿和碩大將軍等伯加十五級

總裁官光祿大夫經筵講官起居注太僕寺卿和碩大將軍等伯加十五級

事三等伯加十五級

翰林院掌院事加二級

經筵講官議政大臣協辦內閣處事事務禮部尚書仍兼掌書鴻臚寺事

敕修

雍正七年己酉秋七月甲辰朔享

太廟遣平郡王福彭行禮○以山西大同總兵
官張善署陝西固原提督○乙巳命山東省
開局鼓鑄從署撫岳濬請也○丙午諭內閣
據順承郡王錫保奏稱在軍前効力之陸生
楠細書通鑑論十七篇抗憤不平之語甚多
其論封建之利言詞更屬狂悖顯係誹議時
政參奏前來陸生楠由廣西舉人部選江南
吳縣知縣朕覽其履歷奏摺前惟頌聖浮詞
中間不過腐爛時文無一語近於直言規正

亦無一事切於國計民生而倨傲誕妄之氣溢於言詞。知其人必非醇謹。及至引見之時。舉動乖張。朕將伊摺內之語詰問數條。陸生楠總默然不能對。但聞朕教訓。轉多憤懣之色。彼時將伊扣缺。令以主事試用。蓋以其人或小有才。今其在京辦事。學習以冀後改也。後伊改授工部主事。引見時。不惟毫無敬畏。且傲慢不恭。顯然逆抗。形於詞色。夫主事職列部曹。外任知縣。歷俸多年。或卓異行。取始得陞補。而陸生楠以邊方舉人。筮仕之初。即膺茲職。尚何負於伊。而伊竟敢懟及君父乎。伊係廣西人。平日必有與李紱。謝濟世。結爲黨援之處。故敢如此。是以將伊革職。發往軍前。與謝濟世同時効力。一則令其觀滿洲尊君親上之心。如此其謹凜。一則令其觀我朝兵營之制。如此其整嚴。一則令其觀各蒙古部落熙皞淳樸之風。如此其誠實。庶冀伊等化去私邪。勉於自新之路。詎意陸生楠素懷

逆心。毫無悔悟。怙惡之念愈深。姦惡之情益固。借託古人之事。幾誣引古人之言論。以洩一己不平之怨。怒肆無忌。憚議論橫生。至於此極也。前錫保啟行之時。朕諭以軍前効力之漢官等。果能安靜守法。自知罪過。則皆可貸其前愆。開予自新。或有私自著作怨懟。罔上者。亦未可定。今果得陸生楠所著之書。悖逆之情。盡行敗露。其論封建云。封建之制。古聖人萬世無弊之良規。廢之爲害。不循其制。亦爲害。至於今。害深禍烈。不可勝言。皆郡縣之故。等語。古人之有封建。原非以其制爲盡善。而特創此以駕馭天下也。洪荒之世。聲教未通。各君其國。各子其民。有聖人首出。則天下之衆莫不尊親。而聖人即各因其世守而封之。亦衆建親賢以參錯其間。蓋時勢如此。雖欲統一之而不能也。夏禹塗山之會。執玉帛者萬國。周武王孟津之役。來會者八百侯。國豈皆夏后周王之所封建乎。孔子曰。天下

有道則禮樂征伐自天子出。孟子曰：天下惡乎定？定於一。孔子、孟子深見春秋戰國諸侯戰爭之流弊，其言已啟一統之先幾矣。至秦始皇統合六國，制天下以郡縣，自漢以來遂爲定制。蓋三代以前諸侯分有土地，天子不得而私，故以封建爲公。秦漢之後，土地屬之天子，一封建便多私心，故以郡縣爲公。唐柳宗元謂公天下自秦始，宋蘇軾謂封建者爭之端，皆確有所見而云然也。且中國之郡縣亦猶各蒙古之有部落耳。歷代以來，各蒙古自爲雄長，亦互相戰爭。至元太祖之世始成一統，歷前明二百餘年我

太祖高皇帝開基東土，遐邇率服，而各蒙古又復望風歸順，咸稟正朔，以迄於今，是中國之一統始於秦塞外之一統，始於元而極盛於我朝。自古中外一家，幅員極廣，未有如我朝者也。至若賈誼晁錯欲削弱諸侯，乃慮分封之失而欲一之，非以郡縣爲失而欲分之也。

李泌因藩鎮之兵連禍結，思以封建爲自固之謀，豈嘗謂三代之制必可復乎？今六合成大一統之天下，東西南朔聲教所被，莫不尊親，而陸生楠云以郡縣之故，至於今害深禍烈，不可勝言。試問今日之禍害何在？陸生楠能明指之乎？大凡叛逆之人如呂留良、曾靜、陸生楠之流，皆以宜復封建爲言。蓋此種悖亂之人自知姦惡傾邪，不容於鄉國，思欲效策士遊說之風，意謂封建行則此國不用，可去之他國，殊不知狂肆逆惡如陸生楠之流，實天下所不容也。又云：聖人之世以同寅協恭爲治，後世天下至大事繁人多姦邪，不能盡滌詐僞，不能盡燭大抵封建廢而天下統於一，相既勞而不能深謀，君亦煩而不能無缺失。始皇一片私心，流毒萬世，等語同寅協恭固爲治之要，至於知人任相，惟在人君之明哲。漢唐以來有賢君圖治於上，則必有良相助治於下，豈萬世無一知人之主乎？且同

寅協恭之道於封建何與陸生楠肆意妄言支離繆戾至於如此其言建儲也借引漢武帝戾太子事發論云儲貳不宜干預外事且必更使通曉此等危機等語書有教胄子之文禮有文王世子之篇儀文明備教戒周詳凡以養成德性欲其學於古訓深知民情物理之微周知人間疾苦稼穡艱難之故豈可禁之不聞外事乎至於父子天性家國一理惟有至誠至敬可以爲事親之道危機之說

豈人子所忍形於言存諸心者乎設使江充掘蠱之時太子能居易俟命不詐出武庫兵發長樂衛則決不至有湖城之難是戾太子之禍正由於曉危機也又陸生楠云有天下者不可以無本之治治之等語其意借鈎弋宮堯母門之事以譏本朝之不早建儲貳夫建儲之事乃宗廟社稷萬世之業所關天下蒼生萬民之命所係也儻不加慎重而所立不得其人其後不易之而不可欲易之而不

可以致激爲多故者前代史冊歷歷可稽孟子曰爲天下得人者謂之仁又曰爲天下得人難言主器之重必得其人足以承先啟後者然後可以付之也我朝

太祖高皇帝開創以來未嘗預建儲位而我

太宗文皇帝繼位丕承恢弘大烈

世祖章皇帝紹業膺圖撫有中夏

聖祖仁皇帝深仁厚澤御宇綿長凡我朝

聖

聖相承皆未由先正青宮而後踐天位迺開萬世無疆之基業錫億兆臣民之洪庥逮朕繼登大寶承重熙累洽之盛統七年以來中外乂安是我朝之國本有至深至厚者愚人固不能知也昔宋孝宗時虞允文請早建儲貳孝宗曰恐儲位既正人性易驕即自縱逸不勤於學寔有失德所以未建者庶幾無後悔耳孝宗尚知立儲之不易況我朝

聖哲高遠之見十倍於孝宗乎如陸生楠借漢

武之事以譏刺者實爲彌天不可赦之罪人也其論兵制也則稱唐之府兵云李泌爲德宗歷敘府兵興廢之由府兵既廢禍亂遂生至今爲梗上陵下替又云府兵之制國無養兵之費臣無專兵之患等語唐初府兵之制本於北周蘇綽之議其後變爲彊騎乃府兵廢弛不得不出於召募也德宗之世召募者多市人不可用故欲復府兵之法然其時亦竟不能復孔子曰以不教民戰是謂棄之無事耕種之農豈能嫻於武備有事徵發之擾豈能兼顧農桑以此爲制不但棄其兵並棄其民矣古者六鄉六遂之法遠不可稽後世民以養兵兵以衛民彼此相資唐宋以來法制漸詳軍農實稱兩便安有惜養兵之費而棄不教之民者乎本朝設立八旗京師重地禁旅雲屯又有巡捕三營以詰姦禁暴外省分設駐防將軍以及提鎮內外相維訓練甚備無事則分處什伍兵不擾民有事則整旅

出疆兵以衛民此萬古之良法今八十年來太平無事老者以壽終幼孤得遂長孰非兵防衛守之力哉民間雖有正供以佐軍糈然所出僅百分中之一耳其得養兵之利也多矣而陸生楠之爲此說者蓋其懷蓄逞亂之心鬱不得逞故以國無養兵之費以搖動人聽冀或更制以紊亂軍政所謂執左道以亂政言僞學非以疑衆者王法之所不宥也其論隋煬帝云後之君臣儻非天幸其不爲隋之君臣者幾希等語隋文帝以勤勞節儉爲治史稱其倉庫實而法令行至煬帝以驕奢淫佚自取敗亡非可諉之於天也後之人主不爲煬帝之行豈至有煬帝之禍又何爲而望天幸乎陸生楠之意又何所指也其論人主云人愈尊權愈重則身愈危禍愈烈蓋可畏之者必愈甚人雖怒之而不敢洩欲報之而不敢輕故其蓄必深其發必毒等語人主

身爲天子富有四海自堯舜禹湯以來一人有慶兆民賴之豈有位尊而即危禍者乎至於生殺賞罰人主皆奉天命天討以行之其生殺賞罰者皆其人之自取耳朕臨御以來日理萬幾皆奉若天道因物以付未嘗以己意生殺人賞罰人而陸生楠爲畏之怒之報之之說試問在廷諸臣朕自雍正元年以來曾以藩邸舊人而擢用者何人曾因當時宿怨而治罪者何人且朕從前與外廷之人毫無恩怨又何所庸其畏何所庸其怒何所庸其報哉且云蓄必深發必毒此陸生楠指阿其那等而言抑陸生楠自蓄此心也阿其那等各案內外臣工之所共知無俟朕再爲告諭陸生楠亦身列仕籍豈無見聞而爲此論其狂悖惡亂不亦甚乎又云雖怒之而不敢洩欲報之而不敢輕乃陸生楠自述其心也明矣雖蓄怒而不敢顯言是以託於論列通鑑以微洩其憤又怨而欲報欲報而不能但

以身危禍烈等語肆爲咒詛其逆謀發露公然形於紙筆矣其論相臣云當用首相一人首相姦諂誤國許凡欲效忠者皆得密奏即或不當亦不得使相臣知之等語夫從來不廢密奏者原欲周知天下之利弊無專令叅揭相臣之理况尊賢之道最要在於去讒敬大臣之道在於官盛任使君臣一德一心乃爲元首股肱之義是以擇相之道惟在得人若既得其人而又使人密奏且奏或不當而猶多方掩飾是窺伺挾詐教人以讒慝而招人以排陷也且相臣果屬儉邪便當露章宣奏而羣小故爲排沮或欲動搖大臣或從門戶起見人主自宜分別是非以定邪正豈可調停和處於其間乎又云因言固可知人輕聽亦有失人聽言不厭其廣廣則庶幾無壅擇言不厭其審審則庶幾無誤等語舜命禹曰無稽之言勿聽弗詢之謀勿庸召公奭告武王曰言以道接朕於人言必決之以理揆

之以情未嘗拒人之言亦未嘗輕聽人言此
內外臣工所共知者陸生楠何爲而有此譏
議乎又云爲君爲臣莫要於知人而立大本
不徒在政迹然亦不可無術相防等語君臣
之間豈容絲毫權術乎三載考績必以政事
爲據若不以政迹人亦何由而知耶其論王
安石云賢才盡屏諮謀盡廢而已不以爲非
人君亦不知人之非則竝聖賢之作用氣象
而不知等語聖人廓然大公物來順應有何
作用乎宋神宗銳意求治而安石任意更張
其失在於作用明矣又云篤恭而天下平之
言彼固未之見知天知人之言彼似未之聞
也人無聖學能文章不安平庸鮮不爲安石
者等語安石之誤國在於不引其君於當道
非謂知天知人惟有端居深拱靜默無爲篤
恭於無聲無臭之表而遂可使天下平也故
夫篤恭而天下平者正由敬信勸威之道而
極言其效如此非百務盡廢上下睽絕而後

可爲治也其文詞議論險怪背謬無理之甚
又其論無爲之治云雖有憂勤不離身心雖
有國事亦第存乎綱領不人人而察但察銓
選之任不事事而理祇理付託之人察言動
謹幾微防讒間慮踈虞憂盛危明防微杜漸
而已至若籩豆之事則有司存等語從古聖
帝明王之道未有不以勤勞自勵而以逸樂
無爲爲治者也是以治天下莫大於用人理
財二端理財一事自應付之臣下至用人之
權不可旁落今試以銓選之權付之大臣大
臣敢膺此任乎無論稍存容私徇情之見者
固不可一日當此重任即秉公持正之人於
用舍黜陟之際不爲怨府即爲禍源矣至若
懋昭令德克勤小物不泄邇不忘遠古訓昭
然漢宣帝綜覈名實治理一新光武務勤吏
治唐太宗書守令姓名於御屏朝夕省覽古
來賢主未有不本於勤勞者豈可以用人大
節爲籩豆之事置之不問也又云絳度數諫

昇轉順從是以陷於朋比而不知蓋有聖功
即有王道使徒明而不學則人欲盛而天理
微固不能有三代之事功至力衰而志墮未
有能如其初等語夫嘉謀嘉猷入告於爾后
乃朕所日望於大小臣工者即位以來時時
諭令諸臣以忠言讜論面折廷諍凡內外諸
臣條陳政務有當理而可行者必令廷臣詳
議施行並未嘗拒諫諍而喜順從也至於人
臣朋比歷代有之有以阿諛諂附爲朋比亦
有以傾險倖直爲朋比如漢之梁竇唐之牛
李宋之紹述明之門戶是也若唐虞之世盈
廷師濟一德一心謂之朋比可乎已上皆陸
生楠論斷通鑑中語朕指出數條如此陸生
楠生當盛世服習詩書身叨乙榜赴朝選官
非若曾靜之僻處深山曠野不知天高地厚
冥頑不靈之人也且觀其人未嘗不小有才
謂宜感恩戴德勉思報効而乃懷不逞之邪
心於進身筮仕之時肆無稽之橫議於政教

修明之日對越大廷則暴戾恣睢之氣形於
詞色遠遜邊塞則猖狂怪誕之說任意發舒
其意專以搖惑衆心擾亂政紀爲務朕實不
知其怨望何自而生憤懣何自而積此真逆
性由於夙成狡惡因之紛起誠不知天命而
不畏小人之尤無忌憚者也陸生楠罪大
惡極情無可逭朕意欲將陸生楠於軍前正
法以爲人臣懷怨誣訕者之戒著九卿詹
科道秉公定擬具奏○命工部額外侍郎馬
爾泰往江南辦理清查錢糧事務○署江南
江蘇巡撫戶部左侍郎王璣江南江蘇布政
使趙向奎俱緣事革職以吏部右侍郎彭維
新署江南江蘇巡撫調浙江布政使高斌爲
江南江蘇布政使司布政使以福建學政少
詹事程元章署浙江布政使司布政使○陞
浙江金華副將楊琮爲福建福寧總兵官以
陝西西鳳副將董紹祖署陝西興漢總兵官
○雲貴廣西總督鄂爾泰疏報貴州安順府

地方高耀等寨生苗獍狎等願附版圖輸誠供賦下部知之○丁未諭內閣今日御史楊保條奏內稱內外秋審緩決人犯若至三年請令該部查明請旨減等發落則各犯俱沐隆恩不至於監禁患病死亡等語從來殺人者死律有明條其有一時鬪毆殺人而非謀殺故殺或事涉謀故而其人非此案之首犯尚有一線可生之路則於秋審之時細加商酌有可矜者減等發落餘皆從寬入於緩決之內此法外之仁也今楊保欲將緩決三年之犯悉行減等發落是欲將國家讞獄大公之典行一己沽譽之私心朕於衆人之前面詰云設爾之父兄子弟被毆致死不即抵償爾心能釋然乎且待至三年之後竟將兇犯減等釋放爾能無憾於心乎伊俯首自問亦云不能釋然無憾試思天下之人誰無父兄誰無子弟其戚屬爲人毆殺而殺人者竟得脫然無事不令抵償爲父兄子弟者孰肯甘

心縱令死者或無父兄子弟而魂魄有知能自解散乎年來秋審後朕亦令大學士九卿於直省緩決人犯中擇其情罪稍有可原者查出具奏朕詳加審慎降旨減等發落此皆揆情度理信其可以服死者之心然後見諸施行非可任意縱情概行末減以博寬大好生之名也我

聖祖仁皇帝臨御六十餘年慎重刑獄矜惜民命諄諄訓誨讞獄諸臣懇惻周摯朕即位以來又復時時戒飭體訪大抵各處命案俱屬應抵之人無屈枉之事夫彼既傷人之命秋決時不即抵償乃其幸也而監禁囹圄尚以疾病死亡爲苦乎夫獄多縲囚原非德政然必天下化行俗美比戶可封普天率土皆安分守法無盜竊姦宄之徒型仁講讓無關狼輕生之輩而後時雍風動實致刑措之風方爲至治若未能如是但將應行治罪之犯概從寬釋以博囹圄空虛之譽吾誰欺欺天乎

朕實恥而不爲也。況縱法實足長姦恐寬宥之後而犯者愈衆。此更朕所不忍者也。至於楊保奏中。以州縣牢獄褊狹。而引八旗人犯。築建高牆分禁。以爲念其暑熱之苦。恐染疾患。此奏亦與朕之本意不符。朕思犯罪之旗人。非有異於犯罪之民人也。特以民人牢獄之中。俱係盜賊匪類。慣行不法之重犯。若令旗人同在一處監禁。轉相煽誘。漸染惡習。將來愈難化誨。悛改。故令隔別分禁。以防其煽誘勾通之漸。非欲令其寬閒自在也。且天下焉有身在縲絏之人。而尚慮其不能舒展安閒者乎。又焉有因牢獄褊狹。而縱囚廢法。以使其自如者乎。度楊保條陳之意。將以寬釋犯人爲陰德事耶。豈知爲人臣而不肯秉公執法。實心辦事。乃欲枉法以沽長厚之名。使百姓含冤負屈。其造孽無窮。必遭天譴。尚何陰德之有。楊保身爲御史。有言官之責。朕屢次諭令條陳輟轉推諉。及首行條奏。又將此

必不可行之事。希圖寬厚之稱。而欲以刻覈之名歸諸君上。其居心甚屬可惡。著交部嚴加議處。尋議楊保身爲言官。混行條奏。請照奏事。詐不以實之律。革職杖徒。得旨。楊保著革職。發往阿爾泰驛站効力。○以左春坊左庶子戴瀚提督福建學政。○工部議覆署兩江總督范時繹疏。言鹽城縣小關子地方。形勢偏窄。請將守備衙署移駐草堰口。以新設把總駐劄小關子。應如所請。從之。○倉場侍郎岳爾岱疏。報通州流水溝等處漕船漂沒。得旨。大雨時行之際。河流驟長。沿河空重糧艘。依次停泊。其適當決口之衝。不及防範。被水漂沒。此非弁丁等有意疎忽之咎也。所有損壞船隻。漂失米石。俱免其賠補。漕米亦著交收。免其更換。被水淹沒及受傷之丁舵人等。著倉場侍郎等查明。加恩賑恤。再將被水船隻。每船賞銀五十兩。濟其困乏。凡此免賠頒賞之處。均係特恩。後不爲例。○戊申九卿

等議奏謝濟世批註大學肆行譏訛怨望毀謗怙惡不悛陸生楠編寫通鑑妄抒憤懣猖狂恣肆悖逆已極俱應擬斬立決即於軍前正法得旨陸生楠謝濟世二人議罪之本仍交與順承郡王錫保發與陸生楠謝濟世看本內所載諭旨各條伊等有何辨對著詢明確供具奏○戶部議覆雲貴廣西總督鄂爾泰疏言原任工部侍郎申大成條奏黔省軍田許照民田一體買賣每畝上稅銀五錢給契爲業經九卿議覆准行但黔省軍田一畝之價可買民田二畝應納糧賦一畝亦可抵民田二畝若再徵稅銀五錢於民生無益仰請豁免嗣後凡有軍田授受悉照常例報稅應如所請得旨從前申大成條奏朕發與九卿議覆而後施行今覽鄂爾泰陳奏與廷議迥異大凡發與九卿會議之案因朕不能深知原委及本地情形難以定其是非是以諮詢博採以期有益於民生吏治其本地熟習

風土之人及曾經作宦於其地者自當仰體朕心據實陳奏而九卿等亦當向深知灼見之人細加諮訪而後定議方爲實心任事之道乃年來廷臣定議而外間不能奉行又復奏請更改之案甚多此皆定議時草率塞責而深知灼見之人隨聲附和不肯直指其利弊也申大成所奏軍田一案既不可行則從前會議時有軍田省分之九卿官員何以不肯直言今朕既知其不可行若避朝更夕改之名苟且遷就以致貽累民生朕不忍爲也嗣後若有地方之事經本籍之人及曾爲彼地大員之人會同定議具奏儻事不可行該督撫等奏請更改者朕必加究問○署浙江巡撫蔡仕舫疏報鎮海等六縣開墾雍正六年分田地八十六頃有奇下部知之○己酉諭滿漢文武大臣等書曰兢兢業業一日二日萬幾蓋言爲君之難也又曰予違汝弼汝無面從退有後言蓋言人臣之當匡贊其君

也朕之行事若有可議諸臣豈得漠然視之而全無相關之意乎縱不能如古直臣之面折廷諍而時常進見可以從容密奏朕樂於聞善不吝改過惟冀諸臣盡言規正以補其闕若面從心非豈朕所望於諸臣者哉朕即位之初或尚有不知朕心而不敢盡言無隱者今廷臣侍朕六七年矣豈於朕之居心行事尚不能深知而存猜疑之見乎至於朕每日訓飭諸臣者並非但以責人而不求之於己也朕事事以身先之且深覺爲善之可樂循理之甚安書曰作德心逸日休孔子曰君子坦蕩蕩聖人之言確乎不易諸臣但試行之必有暢然自得之樂也○庚戌以左副都御史宗室塞爾赫署工部右侍郎○兵部議覆調任廣東總督孔毓珣疏言廣東虎門協屬之南山臺鰲灣佛子凹嘴頭角四水汛與該協相隔遼遠請就近改隸新安營管轄即以新安營撤回原防佛堂急水等處之兵派

撥防守再於虎門協左右二營抽撥額設船二隻戰守兵八十名配駕分防其虎門協屬左右二營汛參差穿插巡防間隔請將右營現防之蔴涌濫尾二汛改歸左營管轄左營現防之龍灣雞公石黃角左右等四汛改歸右營管轄均應如所請從之○辛亥諭內閣黃河隄岸乃運道民生所關最爲緊要年來殫心經理增卑培薄幸隄工堅固共慶安瀾獨是工程報竣例應歸汛修防而額設河兵堡夫只能修補水浪衝激之區防備臨險搶護之用至於隄身一年之內風雨淋漓車馬踐踏漸至侵蝕者亦勢所必有而隄遠工多不能責諸寥寥兵役也朕留心訪察已久又復詢問通曉河工之人知故明總河潘季馴每歲派夫加高五寸載在河防一覽即從前河臣靳輔亦有每兵一名招募幫丁四名給以隄內空地耕種免糧歲令加土五寸之議與朕計慮之處實相符合朕思隄工雖千有

餘里若按丈每年加修五寸計費不過三四萬兩儻置之不議一年剝削四五寸合十年而計之其所費之多恐有不止於加修之數者况河流漲漫不時難以預料何若逐年增修保固爲未雨綢繆之計也著南北兩河總督尹繼善嵇曾筠悉心商酌具奏至於州縣派夫銅弊久經嚴革而募丁給田之說亦不可行其每年歲修之費或動用藩庫帑金或於臨河州縣應解公用銀兩內就近支給若有不敷仍於藩庫撥補亦著河臣一併定議具奏○又諭目今漕運抵通新漕即須料理漕運總督性桂現署浙江總督事務其總漕印務仍著張大有管理○癸丑

孝懿仁皇后忌辰遣官祭

景陵○陞右通政張懋誠爲通政使司通政使○吏部議覆廣東總督郝玉麟疏言查雍正五年定例各州縣管獄官監斃盜犯至五名者即行革職其中有才堪驅使之員概行廢

棄殊屬可惜嗣後監斃盜犯除未經取供審明及致死滅口者應照雍正五年定例議處外如已經取供審明在監病故別無致斃情事不論首盜夥盜俱請仍照雍正三年定例監斃四人以下者管獄官免議其五人以上者罰俸一年再承問官將盜犯取有口供未經題結遽致監斃者亦令該督撫疏內聲明無論首盜夥盜一案內監斃四人以下者免議五人以上者分別議處其餘監斃各項人犯仍照定例處分應如所請從之○敕封陝西寧夏大渠龍神爲寧渠普利龍王之神○甲寅以果親王允禮管理工部事務○陞太常寺卿劉聲芳爲戶部左侍郎○命莊親王允祿管理鑲白旗滿洲都統以正黃旗護軍統領德成兼管鑲藍旗滿洲副都統鑲紅旗滿洲副都統侯馬蘭泰兼管鑲藍旗蒙古副都統○議政王大臣等議覆河東總督田文鏡遵旨議奏山東青州府爲適中要地內與

陸路各營聲勢聯絡外與沿海營汛呼吸相通設立滿洲兵駐防可以資彈壓而重保障查青州府北城外有古廢東陽舊城基址請建造城垣衙署營房可以駐兵數千應如所請青州城外建造新城後自京派撥八旗滿洲兵二千永遠駐防設將軍一員副都統一員管轄并設協領四員佐領十六員防禦十六員驍騎校十六員再添設理事同知一員隨印筆帖式三員鑄給印信關防其俸祿糧餉等項俱照各省駐防之例支給從之○乙卯以漕運總督性桂署浙江杭州將軍○丁巳諭內閣各省鄉試舊例以巡撫爲監臨布政使爲提調道員爲副提調按察使爲監試道員爲副監試朕思藩臬二員乃通省錢糧刑名之總匯入場一月有餘將地方公事沉擱遲延於官民均爲未便况場務既有道員二人則科場之事已有大員料理不必又用藩臬從今科始各省以道員一人爲提調官

一人爲監試官永著爲例○以內閣學士任蘭枝爲浙江鄉試正考官翰林院編修王峻爲副考官侍讀楊炳爲江西鄉試正考官編修徐煥然爲副考官編修劉統勲爲湖北鄉試正考官檢討張若涵爲副考官○戊午中元節遣官祭
永陵
福陵
昭陵
昭西陵
孝陵
孝東陵
景陵○雲貴廣西總督鄂爾泰疏報都勻各寨苗民輸誠納賦編入保甲下部知之○己未以左副都御史陳良弼署鑲白旗漢軍都統○庚申雲貴廣西總督鄂爾泰疏報滇省廣南府城三月初七日日麗中天慶雲擁護自午至酉萬衆歡呼下部知之○改廣東廣州

府理徭同知爲廣東理徭軍民同知陞府屬之連州爲直隸州兼轄陽山連山二縣從原任廣東總督孔毓珣請也○辛酉廣東左翼總兵官謝希賢緣事革職陞廣東虎頭門副將李順爲廣東左翼總兵官○壬戌諭內閣直省各營缺額馬匹例用朋扣銀兩買補自康熙十年山西河南陝西甘肅湖廣四川六省營馬缺額以招中茶馬撥給所有朋銀悉行解部其後四川湖廣停撥茶馬動朋銀買補陝甘晉豫四省仍領招中茶馬至康熙四十五年停止招中而四省督撫竝未奏請給發朋銀遂致營馬凡有倒斃皆各兵買補前降諭旨令岳鍾琪將陝甘二省營馬缺額作何補給之處定議題覆現交部議其山西河南二省尚未降旨又聞河營馬匹亦係兵丁自行買補著該部一併查議具奏尋議嗣後征勦西藏竝安臺回營兵丁凡實在倒斃馬匹著該管提鎮核明咨部照康熙四十五年

西安甘肅西寧定價動支朋銀給兵買補足額其陝甘各營倒斃馬匹竝准照直省營馬例開報不得過十分之三再山西河南二省以及河營每年亦應准報十分之三山西照陝西馬價河南照該省驛馬價河標照山東營馬價各動支朋銀給兵買補至定例領馬五年方准免賠各省應一體遵行從之○癸亥賜大學士張廷玉蔣廷錫第宅各一區白金千兩賜張廷玉調梅良弼匾額蔣廷錫鈞衡碩輔匾額○以鑲黃旗護軍統領色爾璧署左翼前鋒統領○甲子諭內閣粵東三面距海各省商民及外洋番賈攜資置貨往來貿易者甚多而海風飄發不常貨船或有覆溺全賴營汛弁兵極力搶救使被溺之人得全軀命落水之物不致飄零此國家設立汛防之本意不專在於緝捕盜賊已也乃沿海不肖之弁兵等利慾薰心貪圖財物每於商船失風之時利其所有乘機搶奪而救人之

事姑置不問似此居心行事更甚於盜賊其無恥殘惡已極豈國家兵弁忍爲之事乎廣東福建二省居多而他省沿江濱海之營汛亦所不免此皆該地方督撫提鎮等不能化導於平時又不能稽查懲究於事後以致不肖弁兵等但有圖財貪利之心而無濟困扶危之念也嗣後若有此等應作何嚴定從重治罪之條使弁兵人等有所畏懼儆戒著沿海督撫各抒己見議奏到時九卿再行會同定議此旨頒到之時著一面定議一面即行出示宣諭弁兵等知之○諭戶部向來奉天文職官員僅有俸銀而無俸米嗣後著照京官之例各按俸銀數目賞給俸米○添設河南河標營守備二員○雲南巡撫沈廷正疏報尋甸祿豐等三十一州縣開墾雍正六年分田地一千五百七十頃有奇下部知之○乙丑以故喀爾喀扎薩克輔國公冊凌巴爾子巴木丕爾多爾濟襲爵○丙寅命各省委

署試用人員在京命往者照委署職銜給與俸銀○丁卯正白旗蒙古副都統鄂密緣事革職陞原任鑲白旗護軍叅領馬哈達爲正白旗蒙古副都統○戶部議覆湖廣總督邁柱條奏苗疆事宜○湖南地方民人往苗土貿易者令將所置何物行戶何人運往何處預報明地方官該地方官給與印照註明姓名人數知會塘汛驗照放行不得夾帶違禁之物如有官吏兵役借端需索者一併查究○苗人至民地貿易請於苗疆分界之地設立市場一月以三日爲期互相交易不得越界出入仍令該州縣派佐貳官監視○苗疆州縣請選擇諸苗說服之人立爲苗長以稽捕緝之事三年無過量爲獎賞其有生苗歸化者給以寨長千百戶執照三年無過亦予獎賞造冊彙報兵部一請照川省之例於苗疆州縣選安分勇敢之土苗每處用一二十名充當民壯以備差遣訪緝仍行文武互相

覺察之法以防勾通推諉等弊均應如所請從之○添設山東兗州府督捕同知一員駐曹縣桃源集地方移原駐桃源集之曹州州同駐州治從署山東巡撫岳濬請也○改湖廣黃州府屬黃陂縣德安府屬孝感縣俱隸漢陽府統轄從湖廣總督邁柱請也○戊辰陞河南布政使謝冕爲太常寺卿仍署河南布政使司布政使○己巳禮部題遣羅國王森烈拍遣使齋奉表文進貢方物請照例交送各該處查收得旨遣羅國王遣使遠來貢獻方物具見悃誠朕念該國遠隔海洋所進方物齋送不易欲酌量裁減以示恩恤遠藩之意但此次貢物既已齋送前來難以帶回本國著照往例收納其常貢土物內有束香安息香袈裟布疋等在內府無須應用嗣後將此等免其入貢永著爲例該部詳悉行文該國王知之○庚午以戶部員外郎馮祖悅爲陝西鄉試正考官翰林院編修開泰爲副

考官大理寺卿黎致遠爲江南鄉試正考官編修李清植爲副考官○署浙江總督性桂疏報湖州府歸安縣民王文隆家育蠶二十七筐內有九筐萬蠶同織瑞蘭一幅長五尺八寸寬二尺三寸實爲上瑞得旨朕聞養蠶之家或聚衆蠶於磁甕之中面上糊鋪一紙衆蠶於紙上盤旋往來如織紛綸凝結久而成片器圓者成圓器方者成方既成之後去其原紙宛似人力織成以此推之器小者可成小幅則器之大者亦可以成大幅矣今浙江所進大抵多由人工造作如果係萬蠶同織而成必有確實憑據可驗著明白查奏儻由人工造作亦將實情具奏朕每事必期核實況素性不言祥瑞豈可稍涉虛罔至於進繭之人不過微末鄉民希冀恩賞非作姦犯科者比亦不必嚴訊以致苦累○辛未諭兵部向例武舉在本省學習之後遇有千把總缺出即在本省與兵丁一體拔補伊等希冀

得缺未免開鑽營倖進之端。且該管官之秉公拔補與否亦無從考驗。嗣後將隨標差操學習之武舉等令該督撫等看其材技優嫻曉習營務者照年滿千總例送部考驗分發別省遇有千把缺出即行補授則人材既可造就而拔補亦得公平將此永著爲例。○諭都察院凡人臣辦事務須秉公持正不可存一恐懼好樂之心。若先有恐懼好樂之心則心既不得其正事必不能合中。或太過或不及皆非中庸之道。所謂中庸者本日用常行之事。即至當不易之理而人每多習而不察也。且人臣事君尤當至誠不欺。若稍存欺心便是獲罪於天。試觀大姦大惡之人天不遽加之顯報必俟其罪惡貫盈全體敗露然後降之災殃。以昭著於天下。後世爾等必先問心若果能不愧幽獨方可質諸大廷。廣衆遇事又必須審定是非不可偏執已見。自以爲是如辨一事初信爲是者寧可再加詳審將

他事比較並將他人議論詳酌或有未協之處必求至是而後行。蓋天下自有公是非必心無私曲方能辨別是非。凡被他人所惑溺愛不明其爲害尚小。蓋以人爲憑可冀有時覺悟。儻自身溺愛不明其爲害也更甚而覺悟體察也尤難。夫心懷偏私則一己之是非已不能定。又何能定他人之是非乎。大凡立心行事必從根本上用力方能濟。若專務枝葉雖費盡心思於事無裨。朕辦理天下事務廓然大公因事制宜實不預立成見。爾等凡有條奏如果有益於國計民生朕自採納。若預揣朕意曲爲迎合或袒庇瞻徇畏首畏尾不惟於國家政事無補實難逃朕之洞察。在國法何得寬貸也。總之人情任勞易任怨難任怨之事不獨在臣工卽爲君者亦然。但存心合乎天理雖有一二無知之輩肆爲怨謗久之天下後世自有公論。爾等果能公忠爲國目下即被小人怨尤日久自然消釋。

上天必加垂佑。人主必能體察爾等敬聆諭旨。各思奮勉勿負朕教誨之至意。○諭八旗都統等朕思八旗各佐領下既有副驍騎校亦著添放副護軍校一員每月俱加錢糧一兩共給與五兩米石照舊給與頂帶補服仍著戴翎。○調雲南鶴麗總兵官蘇大有爲貴州古州總兵官雲南開化總兵官南天祥爲雲南鶴麗總兵官以原任福建督標中軍副將仇元正爲雲南開化總兵官陞雲南督標中軍副將陳清爲雲南曲尋總兵官。○壬申諭兵部西路一應軍需從前俱係岳鍾琪承辦今岳鍾琪出口姦胥猾吏將謂接辦之督撫不能深悉底裏因而於造冊奏銷之時影射混淆不可不預爲防範督撫等受國家封疆重寄軍興錢糧是其職掌岳鍾琪出口之後著將軍需奏銷事件交與陝甘各該督撫查明正項公項應題應奏之件逐一察核陸續報銷但署督查郎阿巡撫武格許容俱係本

年到任恐司道以至州縣官員胥吏等因督撫到任未久不無乘機混淆或至希圖侵冒或以刻削累民二者均未可定著於軍務錢糧奏銷冊籍之外兼造簡明清冊令各司道將某州縣某項工料物料歷經詳議批定某等價值或因時估實在不敷改照某等價值某項下共用軍需若干共用公費若干照折中價節省若干或不敷若干逐件於奏銷時將奏銷冊送督撫覆核分晰題奏將簡明清冊郵遞巴爾庫爾交岳鍾琪察實繕寫黃冊具摺奏聞朕將奏銷冊與簡明冊一併交與該部查對若有舛錯不符之處該部分別駁查題叅照例議處著將此旨即行文與寧遠大將軍岳鍾琪署總督查郎阿巡撫武格許容等遵照辦理聞陝甘陋習凡地方公事亦有於事後科派百姓者此次軍需等項悉用公項辦理絲毫不使累及官民著督撫再行曉諭使深山僻壤之人一體周知以杜猾吏

姦胥借名苛索之弊。僅稍有派累浮冒之處。該督撫即行訪察糾叅。若督撫不行查叅。經他處發覺者。一併嚴加議處。○諸王大學士九卿等疏言。滇省日麗中天。慶雲告瑞。仰見太平有象。

天眷庥隆。臣等不勝歡忭。得旨。朕思雲霞之氣。時結時散。今慶雲屢見於滇南地方。自因該省大臣官弁兵民有感格。

上天之處。始蒙錫此嘉徵。以示恩獎。但

天象之災祥。由於人心之敬肆。捷於影響。呼吸可通。朕每承

天貺。益深虔惕。夙夜靡寧。惟冀滇省官民愈加誦勉。始終一致。以仰答

上天垂象之鴻恩。○護軍統領七十疏言。蒼震門乃紫禁內地。請添派章京二員看守。午門外請添蓋板房。以資兵丁宿衛。從之。○改浙江嚴州協左營都司為中軍都司。裁右營都司一員。添設嘉興協中軍都司一員。從之。浙江

提督陳天培請也

大清世宗敬天昌運建中表正文武英明寬仁信毅大孝至誠憲皇帝實錄卷之八十三

大清世宗敬天昌運建中表正文武英明寬仁
信毅大孝至誠憲皇帝實錄卷之八十四

監修總裁官光祿大夫建寧府知府臣保和殿大學士兼兵部尚書總理事務第三等伯加十五級臣鄂爾泰

總裁官光祿大夫建寧府知府臣保和殿大學士兼兵部尚書總理事務第三等伯加十五級臣鄂爾泰

第三等伯加十三級臣張廷玉光祿大夫建寧府知府臣保和殿大學士兼兵部尚書總理事務第三等伯加十五級臣鄂爾泰

翰林院掌院事加二級臣福敏光祿大夫建寧府知府臣保和殿大學士兼兵部尚書總理事務第三等伯加十五級臣鄂爾泰

經筵講官議政大臣傅爾丹大學士事務理部尚書臣保和殿大學士兼兵部尚書總理事務第三等伯加十五級臣鄂爾泰

教修

雍正七年己酉閏七月癸酉朔諭內閣九卿

等易經云立天之道曰陰與陽立地之道曰
柔與剛立人之道曰仁與義仁義雖分而其
理則一天下之人但知仁主於慈義主於斷
仁主於寬義主於嚴以爲仁義各有其用而
不知其相資相濟而不可須臾離也蓋有仁
而無義則姑息之愛不合於事理當然之則
矣孔子曰惟仁者能好人能惡人蓋其所好
所惡必合於事理之宜而後天下享仁人之
福所謂殺一人以安千萬人義之至正所以

爲仁之至也即如剪除盜賊義也盜賊既除
則良善得寧豈非仁乎懲創兇頑義也兇頑
既懲善者益勉於善而不善者且相率而遷
於善豈非仁乎其餘互相爲用之處皆可以
此類推其分仁與義爲二而不能融會貫通
者則見理不透故也禮部議覆雲貴廣西
總督鄂爾泰疏言貴州一省原轄十一府四
十州縣每科鄉試額取文舉人三十六名五
經二名武舉二十名近於四川湖南兩省內
將十三州縣改隸貴州赴試人數較多請增
貴州鄉試解額加中文舉人六名共四十二
名武舉三名共二十三名庶不致人多額少
黔省既經議加則四川湖南應行議減請將
四川解額文舉人減四名武舉減二名湖南
解額文舉人減二名武舉減一名應如所請
從之甲戌諭內閣凡外任文武官員因公
註誤革職者朕恐其罷黜之由限於定例而
人材尚屬可用不忍使之廢棄終身是以格

外施恩於部議革職之時。往往酌量降旨。令其交代。後該上司出具考語。送部引見。此朕愛惜人材體恤下情之意。惟是外官在任。叅罰之案常多。每有先經革職。奉旨來京。引見之員。陸續又有別案革職者。此等官員著交部查明。若續叅之案情罪重於前案。非係因公註誤。則不應帶領引見。若後案仍係因公註誤。與初叅革職之案情罪相同。仍著帶領引見。於摺內將該員共有處分幾案之處。聲明候旨。調江西巡撫張垣麟來京。以太常寺卿署河南布政使。謝旻署江西巡撫。調福建布政使趙國麟為河南布政使。司布政使。調湖南布政使趙城來京。陞貴州貴東道楊永斌為湖南布政使。司布政使。福建按察使潘體豐為福建布政使。司布政使。福建驛鹽道孫國璽為福建按察使。司按察使。吏部議覆禮部尚書常壽條奏六部漢軍堂主事員缺。向係小京官。及有品筆帖式。論俸推陞。

不能盡得熟習繙譯之員。嗣後漢軍堂主事缺出。請令各該堂官於應陞主事之漢軍中書小京官。及有品筆帖式內。將熟習繙譯者。出具考語。保送吏部。每缺揀選二人。擬定正陪。引見補授。再起居注主事。職司繙譯諭旨。載入史冊。關係緊要。亦請於應陞人員內。揀選熟習繙譯者。引見補授。永為定例。應如所請。從之。添設山西右玉縣之殺虎口。威遠堡。巡檢各一員。左雲縣之高山城。助馬口。巡檢各一員。平魯縣井坪城。巡檢一員。移沁水縣東塢嶺。巡檢駐端氏鎮。從山西巡撫覺羅石麟請也。○乙亥。諭兵部訓練營伍之道。必技藝精熟。方有濟於實用。聞直隸地方營汛中鎗手演習。止放空鎗。從未裝入鉛子打靶。似此則信手高低。漫無準則。何由純熟而成。必中之技。直隸幾處如此。則通省可知。直隸一省如此。則外省可知。嗣後著通行直省督撫提鎮等。轉飭所屬於練習火器之時。用鉛

子打把演熟準頭則火器皆成利用於營伍實有裨益○以翰林院修撰彭啓豐編修吳應枚俱署日講起居注官○己卯諭內閣恭查

陵寢祭祀需用黍稷菓菜是以設立園頭莊頭給與地畝俾其種植灌溉按時供辦康熙三年

聖祖仁皇帝於

孝陵設立莊頭園頭共給地四百一十晌至康

熙三十九年又增給地一百五十三晌據禮

臣查奏此二項地畝已足供辦祭品朕伏念

陵寢祀禮關係重大所需時獻品物必承辦之

人充實豐裕然後嘉穀珍蔬繁茂鮮潔庶可

展孝思而達誠敬今欲加增地畝若干賞給

莊頭園頭使之供應饒裕著

三陵總管大臣詳悉查議到日交與該部議奏

尋議請撥附近膏腴之地二百七十五晌增

給莊頭園頭令其辦理

陵寢祭品饒裕鮮潔以達誠敬從之○貴州巡

撫張廣泗疏報貴筑等十三縣開墾雍正七

年分田地九千九百畝有奇下部知之○賑

江西大庾縣水災饑民○庚辰諭兵部駐藏

兵丁其家口在家者照出征兵丁之例給與

坐糧以爲養贍之資若家有喜喪事件亦照

出征兵丁例賞給銀兩○吏部議覆禮部侍

郎傅德條奏

天壇內犧牲所牧養犧牲關係祀典其所牧所

副等官向例揀選年老之護軍校驍騎校補

用以致管理不周漸生侵蝕等弊嗣後所牧

所副員缺請令八旗滿洲都統於拜他喇布

勒哈番拖沙喇哈番等官內揀選家道殷實

年富才優者咨送兵部引見補授專司牧養

如辦理五年稱職令太常寺堂官保題交與

該部以應陞之缺用應如所請從之○賑雲

南南寧縣水災饑民○辛巳喀爾喀輔國公

三濟扎卜故遣官致祭○壬午吏部帶領各

督撫保舉之知府欽觀謨等引見

上諭曰。知府一官。承上接下。以察吏安民爲要務。督撫統轄全省。地方遼濶。屬官多至百數十員。察核賢否。自難人人確當。所賴者汝等府道耳。一府所屬。其多者不過十餘州縣。耳目易於周知。如能與督撫同心協力。則舉劾悉當。吏治自然肅清。但不得背公違理。迎合督撫之意。如屬員果賢。督撫或有苛求。爾等須竭力保全。不可搜求詳揭。若係不肖之員。雖督撫密露庇護之意。亦不可委曲順從。蓋劣員貽誤地方。即此時順從督撫。曲爲徇庇。將來儻被新任督撫題參。徒然貽累己身。若秉公察吏。獲罪上司。即被參劾。至於降革。朕調來引見。面加詢問。果係情真理當。必將誤叅之上司。嚴加處分。在汝等何害乎。至秉公持正之督撫。爾等又不得與所屬人員。通同欺詐蒙蔽。譬如督撫與朕。必能一德一心。方可整官方而清吏治。若各懷欺隱之心。朕亦

難於辦理矣。從來人才難得。朕欲爾等察吏。竝非苛刻。搜求細事。以叅劾詳揭爲能。如屬員之過。出於無心。情有可恕。務必盡心教訓。冀其悛改。至再蹈前轍。然後叅揭。方不屈抑人才。爾等皆有志上進之人。若能協同督撫。報効國家。撫綏百姓。將來陞授大員時。自有賢能屬員。來相贊助也。古語云。使天下無一夫不獲其所。實非人力不能之事。一府之太或一人之力。不能周到。若一州縣得一好官。則一方百姓。自受其福。庇推之天下。州縣各得其人。豈非匹夫匹婦。各得其所之明驗乎。所以治天下之道。惟在察吏一事。再近來外官多有視督撫之行事。以爲進退者。如遇才守兼優。不徇情面。不避嫌怨之督撫。即踴躍向前。若遇中等督撫。則凡事因循觀望。不肯盡心。殊非臣子竭誠供職之道。爾等總宜改除陋習。勉盡職守。以圖上進。若不公忠勤慎。報効盡職。不惟深負朕恩。且有何顏面以對

保舉之人而忍遺累於知己之上司耶爾等赴任務期夙夜凜遵毋負朕諄切訓誨之至意○癸未諭王大臣等向來覺羅佐領或有或無俱未畫一今既將下五旗覺羅佐領由各該王屬下撤出作為公中佐領朕意均派八旗方為妥協前者宗人府設立宗學祇令教習宗室未及覺羅覺羅人眾今若一概歸併宗學教者勢難遍及應每旗各立一衙門管轄覺羅或王或公派委一員統理令其於各該旗覺羅內揀選老成練達品行端方者一二人分管即於該旗衙門之旁各設一學除情願在家學習者外擇其可教之人令其讀書學射滿漢兼習所派出之管轄人員不時訓誨稽察如內有行止不端不知守法安分者即回明宗人府王等今在該旗衙門居住學習禁止出門俟其改行遷善之後再許出門年底彙疏具題如此則於覺羅少年子弟大有裨益而人人皆可成就著宗人府王

公等會同滿洲大學士六部尚書詳悉議奏尋議向設覺羅佐領共三十二分分屬鑲黃正黃正紅鑲白鑲紅正藍鑲藍七旗今請均勻移置八旗每旗定為覺羅佐領四分再八旗各擇官房一所立為衙署旁設清漢各一學八旗覺羅內自八歲以上十八歲以下子弟俱令入學分讀滿漢書有願在家讀書者聽之其十八歲以上未曾讀書者於每月朔望傳集公署宣講

聖諭廣訓每旗派出王公等為總管覺羅二人為教長於筆帖式內揀選能繙譯者一人教授清書禮部教習一人教授漢書兵部揀選善射一人令其教射仍著宗人府不時稽查每年春秋二季該王公親身考試登記檔案覺羅內有取進文生員繙譯生員者將滿漢教習交部議敘至一切支給公費等項俱照宗學之例行從之○諭內閣歷年各省貢監等赴部考職不過得一空銜在本人無選用

之期在國家無引見之例是以伊等相沿陋習託人代考習以爲常朕深知其弊曾經降旨申飭而此風仍未止息前年於考試後特令通行引見一則欲察其真贋如何一則欲廣收人材於稠人之中以備州縣佐貳之用不使至於遺棄也比時應試者一千二百餘人而報名引見者僅二百人朕就其中舉止從容應對明白者拔取數十人交與吏部陸續選用及後再加訪察此等引見得官之人仍有代人考試竝冒行引見者可謂慙不畏法之徒矣因思若逐一嚴查或致生事擾累於是特頒諭旨令本人自行出首酌量免其重罪竝令從前代考得官者亦准自首此格外矜全之恩也年來各省督撫題奏自首代考得官實由於捐納者朕俱開恩免其議處近聞外省地方官不問其人之得官與否概將歷年考職之人加以盤詰逼令自首甚至胥吏鄉約逐戶嚴查讐家挾私訐告種種紛

擾多生事端此則有司奉行不善之所致也朕旨原言代考得官者而今則竝及遠年空銜之人朕旨原令本人自首而今則添官吏嚴查苛索之弊著該部行文各省通行曉諭凡考職人員止得空銜未曾得官者其自行出首與否聽本人之意若得官之人應行自首而隱匿不首者別經發覺自有國法再者前因纂修一統志書內載本朝名宦鄉賢孝子節婦一應事實行令詳悉查報以備纂修該地方有司自應確查紀載採訪鄉評據實秉公咨送書館以彰直道今聞外省郡縣中竟有胥吏作姦借端生事向本家查取事實高下其手希圖財賄者似此則有力者濫竊褒揚而無力者不能表見何以副國家彰善旌賢之典著各省督撫等通行嚴禁儻有仍蹈故轍者將該地方官即行查叅○諭吏部朕見近來官員等彼此互揭之案甚多如上官揭報屬員而屬員隨即列款揭告上官知

縣揭報教官而教官隨即列款揭報知縣似此若果出於公道則何不控告於未揭之前而乃報復於既揭之後其爲挾讐反噬情弊顯然但其中或有探知上官欲行揭報而先行詳揭者亦有逆料下屬必行揭報而先發制人者其情僞虛實種種不一總在督撫等悉心詳察秉公審理從庚戌年爲始凡挾私互揭之案如所揭款蹟件件審實則照定例歸結儻數款之中有一款審虛仍照誣告律治罪若件件皆虛將挾私互揭之人嚴加治罪文武官員一體遵行著預行曉諭咸使聞知○辦理陝西寧夏渠工兵部侍郎通智疏報寧夏等屬修濬之大渠並六羊改渠一切工程告竣所有新渠寶豐寧夏平羅四縣田畝均沾灌溉請定兩渠嘉名以垂永久得旨大渠著名惠農渠六羊渠改名昌潤渠○予故戶部右侍郎單疇書祭葬如例○甲申諭戶部各省解送錢糧差委雜職領解此等微

末之員功名甚輕或有中途盜隱捏報劫失之弊再失鞘銀兩令地方文武官均賠亦未允協著查議具奏尋議各省領解錢糧例係巡檢典史等員遇有失事如但加以革職處分恐其假劫竊之名行偷盜之弊嗣後失鞘銀兩請令失事地方文員分賠一半其一半令解官分賠二分該省差委之大員分賠三分儻解官實係微末窮員其二分亦著差委之大員賠補地方武員免其分賠至於解官不由通途不赴州縣掛號者其失鞘銀兩責令解官全賠其州縣官照道路村莊失事例限年承緝將此永著爲例直省一體遵行從之○又諭各省解部錢糧及各項物件俱有批廻向例解官於各部掣批之後即將所掣批廻赴科掛號原無六道掛號之例蓋既經各部查核其數目又經各科查驗其遲速則事已完備矣乃近年泥於科道一體稽查之說因於六科掛號之後又赴御史衙門掛號

致令解官多候時日。且開不肖書吏需索之端於事件甚屬無益。嗣後著將六道掛號之處概行停止。○免江南靖江縣雍正六年分電災額賦有差。○乙酉以翰林院編修吳應茶爲河南鄉試正考官。修撰彭啓豐爲副考官。戶部郎中潘允敏爲山東鄉試正考官。宗人府主事張鉞爲副考官。左春坊左贊善許王猷爲山西鄉試正考官。浙江道御史陳弘謀爲副考官。○江南江寧將軍來文緣事革職。調浙江杭州將軍鄂彌達爲江南江寧將軍。陞河南副都統阿里袞爲浙江杭州將軍。調湖廣荊州左翼副都統白清格爲河南副都統。陞署鑲白旗滿洲副都統阿克山爲湖廣荊州左翼副都統。調齊齊哈爾副都統額爾勤爲奉天副都統。陞齊齊哈爾協領卓爾海爲齊齊哈爾副都統。○丙戌旌表廣東保昌縣烈婦甘作棟妻張氏拒姦不污被刃殞命。給銀建坊入祠致祭如例。○丁亥兵部議

覆川陝總督岳鍾琪疏言陝西官兵馬匹向例不報倒斃。嗣後請照各省之例准其開報不得過十分之三。甘屬等處除番民貢馬抵補外其有不敷亦照例給與馬價買補。應如所請從之。○戊子解浙江提督陳天培任陞廣東潮州總兵官尚濤爲浙江提督。調廣東右翼總兵官馬紀勲爲廣東潮州總兵官。陞廣西潯州副將李萬倉爲廣東右翼總兵官。○己丑改直隸石匣營遊擊爲順義營遊擊。石匣營中軍守備爲順義營中軍守備。並添撥兵丁三百名駐順義移漕河把總駐牛欄山順義把總駐楊各莊從署直隸古北口提督魏經國請也。○庚寅諭內閣科道乃朝廷耳目之官專以進言爲職朕令於露章之外復行密奏者蓋欲其時進謹言。臣朕之不逮有益於吏治民生也。既係密奏則當加意謹慎不謀於人不洩於外方無忝於事君之義而不愧言官之任。乃近見科道等之密奏竝

無直言規諫及有益於吏治民生之處而沽名邀譽之習仍然未除如科臣卬尚志密奏崇文門飯銀一事公然露洩於外而御史李元直於未行密奏之先遍訪他人密奏之事而後入奏是皆不知其出於何心夫言官進言之意不過欲見諸施行也今卬尚志所奏朕已降密旨准行矣而彼仍然露洩於衆是彼進言之意專爲一己之名則何不見之於露章而乃隱之於密摺乎卬尚志於陳奏之事不肯慎密李元直察訪他人密奏之事而又捏造附會之言此即朋比黨援作威作福之漸也本應嚴加根究以儆洩風姑念二人尚係初犯著分別罰俸以示薄懲嗣後儻有密奏之事朕未將本人姓名發出而本人自行露洩或私自存稿者一經發覺朕必嚴行究訊重治其罪○諭兵部滿洲准入武場考試原爲造就人材起見伊等中式武舉正宜策勵再試進士如有材藝出衆朕即挑選侍

衛加恩擢用今滿洲中式武舉後例以門千總補用未免小就即將來陞補守備若係巡捕營尚可就近學習儻陞用外省恐伊等未諳外省營務不甚相宜嗣後滿洲由武舉補用之門千總併武進士或以京營守備用或以本旗護軍校驍騎校等缺用并將作何陞轉及以何項補用之處該部詳議具奏尋議嗣後滿洲武舉補授內九門千總者遇會試之年仍准入場考試平時令步軍統領時加考驗限以三年材技優長者補授巡捕營守備中平者補授本佐領下護軍校并本旗驍騎校等缺平常者留門當差學習有成再行保送至滿洲武進士除欽點侍衛外其餘武進士仍以京營守備與驍騎校護軍校等缺補授從之○辛卯陞直隸河間府屬之滄州爲直隸州管轄南皮鹽山慶雲東光四縣從原署直隸總督楊鯤請也○壬辰旌表直隸大名縣烈婦王三妻景氏拒姦不污被刃殞

命給銀建坊入祠致祭如例○癸巳諭內閣凡州縣官新舊交代如錢糧倉穀驛馬等項自應據實查盤秉公授受在上司不得徇庇前官抑勒交代在後官不得留難前任挾詐行私斯於理爲至當於法爲得平即以倉穀驛馬二事言之若果米穀紅朽糠粃不堪自當據實揭報但聞有刻薄之人恣意苛索於掬颺之時高下其手好米亦有虧折以致前任之官畏其掬颺勉強議幫銀兩而後得以交代離任驛馬若果疲瘦不能應差自應退還前官著落賠補又聞有故意勒捐者將好馬退還強令交銀又託言需馬應差以賤價買其原馬餘銀入己此等惡習各省州縣官每嘗有之朕曾經訪聞即督撫大臣亦有以此入告請定例通行嚴禁者朕思前後交盤乃國家政治之所關亦本人考成之所係如果前任之人事事清楚豈後任者皆屬無良之人而好爲刻覈之事今接任之干係既重

而又不令其舒展盤查情理實未允協況不肖之員往往於將近離任之時百計侵蝕扣剋以貽後人之累則其過又不在接任之員矣是以前後之間寬嚴之際難以概論亦難以法律相繩惟在督撫大吏等於未交代之先推誠訓誡正交代之際留心察訪既交代之後體其情理即此可知屬員之立志爲人矣若過在前任則叅處前任過在後任則叅處後任不存成見不涉偏徇耳目能周賞罰悉當則吏治事事可望肅清矣至於訓誡屬員又當動以天良曉以利害儻前官欲貽累於後人後官欲苛求於前任是皆損人利己假公濟私目前之獲利有限暗中之造罪無窮天道好還國法具在恐究不能免於貪刻之報著通行曉諭各省大小官員知之○以正紅旗蒙古都統特古忒署鑲黃旗蒙古都統○改雲南楚雄府屬之定邊縣歸蒙化府同知管轄裁知縣典史教諭訓導缺添設定

邊巡檢一員。從雲貴廣西總督鄂爾泰請也。
○乙未。免甘肅靖遠廳雍正六年分電災額賦有差。
○丙申。諭內閣。朕耕藉之初。雍正二年三年。藉田所產嘉禾一莖四五穗者。實係瑞穀。後來府尹等所進十餘穗。及今所進二十四穗者。乃本來多穗之穀。名曰龍爪穀。當日播種時。不應將此穀種攪入其中。著該府尹等知之。嗣後不可被小人愚詐。
○諭吏部。凡遠省烟瘴地方。文武官員之缺。例將本省熟悉風土之人調補。朕思烟瘴地方。大半係邊遠簡僻之缺。若概行調補。不令陞補。未免強幹之員。轉駐簡僻之所。止圖挨俸。無所表見。而才具可用。有志上進之人。或生苟且因循之念。亦未可定。嗣後凡遇烟瘴地方。文武官員缺出。向例調補者。著該撫提鎮等於屬員內。秉公酌量。若有可以題陞之員。即具題請旨陞授。若係應調之員。仍照舊調補。陞調兼行。不拘一格。總期人地相宜。材職相當。以

副朕鼓舞裁成之至意。僅有應行調補之人。不願前往。而該管上司聽其規避者。或有不應題陞之令。而該管上司徇情題陞者。經朕察出。定行從重議處。
○丁酉。諭內閣。八旗之貢監生員。已經考取。小京官筆帖式者。若願就鄉試。俱准其與舉子等一同入場。使片善寸長。不致遺棄。以副國家教養人材之典。
○吏部議覆雲貴廣西總督鄂爾泰條奏滇省建置事宜。一元江府所轄之普洱地方。請增置普洱一府。設知府一員。經歷一員。其原設之普洱通判。移駐思茅。普洱所屬之攸樂地方。請設同知一員。遊擊一員。猛烏整董二處。各設鹽課大使一員。俱隸普洱府管轄。○新設之普洱府。應建立學校。請於元江府學調撥訓導一員。董率啟迪。入學額數。照滇省小學例取進八名。其從前附入元江府各生。俱撥歸普洱府學。○請裁元江協副將。普威營叅將二缺。另置普洱鎮設總兵一員。分中

左右三營設遊擊三員守備三員千總六員。把總十二員。改元江協爲元江營。設遊擊一員。中軍守備一員。千總二員。把總四員。共兵三千二百名。分汛防守。俱聽普洱總兵官統轄。均應如所請從之。○戊戌。諭戶部。各州縣之設立常平倉。積貯米穀。原以備地方一時緩急之需。所關甚重。朕爲此備。極焦勞。多方籌畫。務期倉儲有備。早潦無虞。年來所頒諭旨。亦深切著明矣。夫收貯米穀。必須倉廩堅固。始可爲經久之計。是以從前降旨。將倉廩完整與否。一併入於交盤之內。以爲州縣官考成。今聞各省中。偏僻之邑。竟有向來本無倉廩。而有司苟且因循。不行詳請。督撫藩司等。亦漫不查察。致將養民備荒之具。或寄頓於寺廟。或借放於紳士富戶之家。而霉爛虧折。生事滋擾之弊。多由此起。大非朕慎重民儲之意。凡各省。未有倉廩之州縣。著督撫詳悉查明。即行商酌建造。○己亥。添設太醫院。

七品御醫五員。其原設吏目三十員。定爲八品吏目十員。九品吏目二十員。○以故蘇尼特扎薩克多羅杜楞郡王達禮扎布子旺青齊斯隆襲爵。○庚子。諭前鋒統領等。前鋒營之前鋒長鳥鎗長。既賞穿補服。戴頂戴。翎著每月加賜銀一兩。○吏部議覆御史張仕遇條奏。一各省候選雜職等員。吏部銓選之後。將文憑移送該省。往往因病故年老。繳憑開缺。再行銓選。嗣後請將考授八品以下吏員。令各該督撫。府尹。傳集衆公。驗看年老者。令其休致。果係精壯可用之員。俱造冊報部。挨用。至各館年滿供事。仍照舊例銓選。一各省官員完解罰俸銀兩。向因各省督撫有單咨彙冊之不同。以致銷案陞轉先後不齊。嗣後請按定四季報明。戶部戶部亦按季查核。轉咨吏部。逐案查銷。庶各員之陞轉得以均平。一各省候選雜職人員。請令赴本地方官呈明祖籍。開載赴選冊內。吏部查明祖籍之缺。

照例迴避其順天等處吏員及各館供事禮部儒士等冊結已經送部者取具同鄉官印結將應行迴避之處註明報部存案一品級考久未較訂其間添改裁汰處歷年重加酌定者請查明交與現修則例官員纂修成書以昭畫一俱應如所請從之○辛丑諭戶部聞直隸地方有寄莊寄糧之弊往往地寄此處糧寄他處相隔百餘里或數百餘里之遠即如宣化府懷安一縣有人地俱在懷安而寄糧於宣化萬全者有人地俱在宣化萬全而寄糧於懷安者更有現在懷安納糧而寄地於順天府之寶坻豐潤三河相隔五百餘里者在徵糧者則鞭長莫及而寄地者則彼此無關脫漏欺隱之弊勢所不免地方有司實難稽察催徵著直隸總督詳查妥議更正改隸再各省有似此寄莊寄糧者亦著該督撫斟酌辦理○諭禮部各省拔貢聞已陸續來京伊等既不能應本省之鄉試則當准其

應試北闈俾得觀光盛典凡拔貢之有貢單者俱著該部咨送順天府令其應試再修書各館內從前有外省生員在館効力者若情願入場考試著取同鄉官印結保送順天府亦准入場○戶部議覆本部左侍郎常德壽條奏舊例錢糧歲內全完者定有議敘紀錄之條其中催徵等官希圖紀錄未免過於急迫且多捏報之弊嗣後請將歲內全完議敘之例停止其奏銷以前通完者仍予議敘以示鼓勵應如所請從之○壬寅加署山東巡撫山西布政使岳濬僉都御史銜調廣東布政使蔣洞為山西布政使司布政使實授王士俊為廣東布政使司布政使○調廣東左翼總兵官李順為廣東瓊州總兵官廣東瓊州總兵官施廷專為廣東左翼總兵官雲南臨元總兵官邱名揚為雲南普洱總兵官雲南楚姚總兵官張應宗為雲南臨元總兵官陞貴州定廣副將官祿為雲南楚姚總兵官

裁貴州平遠協遊擊一缺千總一缺把總二缺增設擺頂遊擊一員千總一員兵二百名龍場守備一員兵一百二十名擺羅千總一員兵五十名克坐克孟牛場夫若四處把總各一員兵各四十五名鼠場河打汪由亭三處外委把總各一員兵各二十五名俱聽擺頂遊擊管轄名爲歸化營從雲貴廣西總督鄂爾泰請也

大清世宗敬天昌運建中表正文武英明寬仁信毅大孝至誠憲皇帝實錄卷之八十四

大清世宗敬天昌運建中表正文武英明寬仁信毅大孝至誠憲皇帝實錄卷之八十五

敕修

雍正七年己酉八月癸卯朔秋分夕

月於西郊遣平郡王福彭行禮○正白旗漢軍都統李國權緣事革職以江南京口將軍祖秉衡爲正白旗漢軍都統陞正黃旗漢軍副都統王鈺爲江南京口將軍○甲辰上回宮○諭兵部凡兵丁等承應官差養贍家口專於糧餉是賴乃有射利之舖戶土豪人等交結隊目廣放營債以取重利兵丁墮其術中借銀到手隨意花費及至領餉之時不足以飽債主之谿壑此實兵丁等暗中耗費

監修總裁官光祿大夫經筵講官太僕寺卿大學士兼兵部尚書總理事務處正等伯加十五級鄂爾泰
總裁官光祿大夫經筵講官起居注太僕寺卿大學士兼兵部尚書文淵閣大學士兼禮部尚書翰林院
事正等伯加十三級臣張廷玉光祿大夫經筵講官起居注太僕寺卿大學士兼工部尚書內閣
翰林院掌院事加二級臣福敏光祿大夫經筵講官太子太傅兼禮部尚書加六級臣徐本光祿大夫
經筵講官以大臣編纂內閣大學士事務禮部尚書仍兼管太常寺鴻臚寺事正等伯

以致窘乏之由也。向來旗人有放印子錢各色等弊。今嚴禁之後。兵丁漸覺從容。著通行文武官員。出示曉諭。嗣後不許舖戶土豪人等再放營債。違者從重治罪。其從前已經借給者。著清還本銀。不許收取利息。將此懲債主之貪心。以杜暗蝕兵糧之患。其營伍兵丁彼此借貸者。除朋情緩急通融外。若有放債圖利剝削同輩者。著該管官稽查嚴禁。倘違禁不遵。一經發覺。將該管官一併議處。○乙

己。添設八旗都統衙門司務。每旗二員。從正紅旗漢軍副都統朱國極請也。○改福建同安泉州長福邵武四營遊擊。俱爲叅將。添設同安營所轄之灌口汛泉州城守營所轄之安海汛守備各一員。移泉州府糧捕通判駐安海汛。連江縣城汛守備駐東岱汛。東岱汛千總駐可門汛。從福建總督高其倬請也。○敕封直隸通州倉神爲均調顯佑司倉之神。左翼倉神爲豐儲裕餉司倉之神。右翼倉神

爲佑農廣惠司倉之神。新建倉神爲凝禧阜衆司倉之神。○丙午諭兵部。佐領係四品副佐領品級。著定爲五品。再佐領係大員兼管者。居多。向來佐領遇有罰俸之案。即照該員本身職銜定議。似屬太過。嗣後若兼管佐領之員。在佐領任內有罰俸之案。著照佐領品級罰俸。永著爲例。○丁未遣怡親王允禩祭先師孔子。○諭內閣。朕自御極以來。時時以牖民覺世爲懷。是以告誡臣工。訓誨士庶。化導兵弁者。周詳往復。不憚煩勞。無非欲其慕義嚮風。遷善改過。共遊於蕩平正直之途也。凡此詔諭所頒。皆以

皇考之心爲心。以

皇考之政爲政。繼志述事。率由舊章。當時

聖諭之所啓迪。包涵者。朕則闡揚而詳發之。其中間有因革損益。先後不同者。則因時制宜。化裁變通之道也。惟是歷年諭旨。或因一省而發。或因一事而發。有司等照例宣示於該

管之處其別省遠地豈能一一周知且傳寫悉經書吏之手字句之間往往錯訛遺漏夫欲使薄海之廣臣民之衆遵道遵路易俗移風必使天下之人備聞朕訓深知朕心庶幾感發奮興以爲進德修業之助今王大臣等合詞奏請上諭刊刻有裨益於人心吏治著照所請行朕亦不敢謂朕之諭旨可以有勞來匡直之功惟冀億萬臣民共知朕提撕儆戒之苦心耳○陞光祿寺卿冀棟爲宗人府府丞○吏部議覆內閣侍讀學士梁世徵條奏各省理事同知通判缺專爲駐防官兵而設必須文義明通方能辦理事務嗣後請於應行揀選之中書小京官筆帖式內令該堂官將通曉漢文兼通繙譯者保送吏部照月官之例考試漢字履歷能繙譯者兼考繙譯將試卷進呈引見記名遇有理事同知通判缺出將記名人員請旨補授永爲定例應如所請從之○福建巡撫劉世明奏報呂宋夷

船被風飄入閩廣地方得旨呂宋被風夷船既已開往廣東佛山著廣東督撫查照給與口糧加意撫恤聽其候風回國嗣後凡有外國船隻遭風飄入內地者俱著該地方官查明緣由悉心照料動支公項給與口糧修補船隻俾得安全回其本國以副朕恩恤遠人之至意○命湖南省開局鼓鑄從湖南巡撫王國棟請也○戊申祭大社大稷上親詣行禮○以禮部左侍郎鄂爾奇爲順天鄉試正考官兵部左侍郎楊汝穀爲副考官○己酉上御經筵講畢賜大學士九卿詹事及講官等宴○上詣恩佑寺行禮畢幸圓明園○諭兵部各省每科考試武舉例用該省巡撫爲主考官其閱看

文字則用屬下舉人進士出身之同知州縣等爲同考官。朕思各省巡撫多有未曾學習騎射技勇者。何以評定舉子外場之優劣。從今科爲始。各省巡撫考試武舉時。著就近省城之提督總兵一員同考。外場秉公拔取。若提鎮駐劄路遠。或因公他出。則令總督或提鎮派委副將一員代之。○添設順天府大興縣屬之采育禮賢地方巡檢各一員。從都察院左副都御史陳良弼請也。○庚戌遣官祭關聖帝君。○以鑲藍旗護軍統領侯馬蘭泰署鑲藍旗蒙古都統。鑲紅旗蒙古副都統宗室哈爾吉署正紅旗護軍統領。正白旗叅領二格署鑲白旗滿洲副都統。○辛亥。

太宗文皇帝忌辰遣官祭

昭陵○諭戶部向來

三陵俸工米石皆係截留漕米支給。自康熙五十年漕米不敷。經直撫題請將不敷之米每石給銀一兩。令遵化薊州豐潤三州縣採買。

支放。州縣委之吏胥。遂致吏胥串通兵役折銀代米。私相授受。雖經降旨嚴禁。恐此弊未能盡除。而州縣之運送本色者。車脚之費。不無賠墊。且領銀採買。或值米貴之時。一時難以購辦。官員兵役未免守候時日。是折銀採買於官兵均屬未便。著總理

三陵事務尚崇廩將

三陵官員太監兵役。每年需給俸工米石。分晰白米稔米粟米數目。預行造冊咨報戶部。戶部行知倉場。預行照數截留。分貯遵化薊州豐潤三州縣。於庚戌年爲始。所有俸工米石均以本色給發。如此則更無不敷之米。

陵寢員役不至守候待支。胥吏兵丁可免串通折價之弊。而州縣亦無賠墊脚價之累矣。○裁湖南黃竿蘭江府河桃源沅水五驛驛丞。缺歸各該州縣管理。從湖南巡撫王國棟請也。○壬子。諭刑部歸旗人員嗣後有逾限逗遛在外。應行枷號者。著按其逗遛年月之多

寡以爲枷號之期。若逗遛一年。即枷號一年。照此計算。倘另有生事犯法之處。則從重歸結。永著爲例。○癸丑。

太祖高皇帝忌辰遣官祭

福陵。○諭內閣。自古帝王之治天下。設官分職。不得其人。則庶政莫由振舉。而理財不得其道。則國用不足。雖欲減賦蠲租。沛膏澤於萬姓。其勢有所不能。此自然之理也。數年以來。怡親王。大臣等。辦理戶部事務。敬慎公忠。風清弊絕。阜民裕國。府庫充盈。國家經費既敷。則蠲除惟正之供。施恩常格之外。使羣黎百姓。俯仰有餘。乃朕寤寐之至願也。昨署山東巡撫費金吾奏稱。今歲東省秋成大稔。父老皆言二十餘年以來。所僅見。朕思此乃督撫之賢。有以感召。

天和也。則凡爲督撫者。宜何如之。敬謹居心。公忠奉職。以不愧屋漏之誠。爲感格。

上天之本耶。聞今年秦省西安一帶。夏月甚旱。

而地方文武大臣官員。罔知修省。此則封疆大臣之所當切戒者。朕非卸責於臣工。而屢頒此等諭旨也。蓋實有見於天人感應之理。纖毫不爽。而夙夜敬謹。乾惕覺鑒。觀之有赫。而呼吸之可通。倘朕心有一刻之懈弛。而徒以訓誡之詞責諸臣下。其又何以對越。

天地神明乎。又據廣東督撫布按等奏稱。今年粵東雨澤均調。百穀順成。合計通省米價。自八錢至五六錢。實粵省從來希有之事。朕聞之深爲慰悅。此皆該省民人等革薄從忠。醇厚良善之心。

上天垂佑。而錫以豐穰之所致也。著將山東廣東二省。庚戌年地丁錢糧。各免四十萬兩。以獎地方官民之善。直隸陝西。今年各蠲銀四十萬兩。庚戌年著再各免地丁錢糧四十萬兩。山西通省。連歲皆獲豐收。著免庚戌年地丁銀四十萬兩。安徽等屬。亦著免庚戌年地丁銀四十萬兩。此六省共蠲免額徵銀二百

四十萬兩乃朕加惠閭閻之特恩該督撫等應轉飭有司仰體朕心敬謹奉行務使小民均沾實惠倘不肖官吏及紳士土豪等有侵蝕包攬等弊一經發覺定行重治其罪並將失察之督撫上司等嚴加議處○諭戶部近畿各府有八旗莊屯雜處其間有司難於清查且八旗罷黜之廢員及不能上進之子弟與多事不法之家人往往潛住其中結交遊手好閒之輩妄行生事或好勇鬪狠或酗酒賭博或與百姓爭訟告訴輾轉不休以致風俗日漸澆凌難以整理雖有理事同知一員亦相隔甚遠不過詞訟到案一爲判斷平時則無稽察約束之功也朕意欲於旗員及司官內遴選賢能者八員派往各府有莊屯之地方專辦旗人之事時加教誨申明禁約導其善念革其邪心小則分別懲戒大則據實糾參其有旗民互相爭訟之事仍聽該管衙門審理此差往之員以一年爲期更換一次

果能實心辦理化導有方一年內所管之處無旗人犯法之案將該員與以議敘倘或怠忽廢弛因循瞻顧或擅作威福多生事端著直隸總督與巡察御史即行叅奏從重議處其如何分晰管理及如何定例之處著該部詳議具奏尋議臣等酌量旗莊之多寡復計地方之遠近約以三百里內外爲一路分作京東京西京北京南京北京北西京南東京南西共八路揀選各部院司官及八旗官八員到彼專管莊屯旗人之事建立衙署鑄給關防蒞任後彰善癉惡以化其澆凌之習竝仿保甲之例設立屯目鄉長分任防閑糾舉從之○甲寅諭兵部盛京旅順地方雖設有水師官兵而俱不能諳練水師事務若無教習之員恐其有名無實著福建水師提督藍廷珍於千總內揀選數員於兵丁內揀選數名熟諳水師者令赴盛京交與該將軍令其教習旅順水師官兵其由福建起身之時

著該督撫照資助送往浙江湖廣弁兵之例給與盤費○陞山東登州總兵官萬際瑞爲浙江提督江南京口水師副將徐世龍爲山東登州總兵官○移廣西宜山縣縣丞駐樁村從廣西巡撫金鉞請也○丙辰諭九卿等嘗見繼母於前母之子其相待之刻有在尋常情理之外者夫子之於繼母其奉養承順服制禮節一切與本生之母無異此倫常之道也則爲繼母者亦當視如親生顧復撫養方爲交盡其道乃有一等婦人悍惡性成不明大義常存分別之心偏愛其所生之子而薄待前母之子若己未有子者又或懷嫉妬之念而憎惡前母之子或顯加之以凌虐或陰中之以計謀以致其子不得其死甚至絕其夫之宗祀而不恤是不但母子之恩已絕竝視其夫如仇讎矣向以名分所在故律無擬抵之條事既出於情理之外所當酌量立法以防人倫之變朕意若繼母於前母之子

有凌逼謀害等情至於身死者將情由審訊確實以其所生之子議令抵償若繼母未生子者則令歸其母家不得承受夫家產業如此庶使秉性兇悍不顧大義之婦人有所儆戒消其殘忍之心而保全其母子之恩誼似屬有益著九卿悉心詳議具奏尋議嗣後除繼母將前母之子毆殺故殺致令其夫絕嗣者仍照律擬絞外如有父故之後繼母將前母之子任意凌虐毆殺故殺者地方官務將情由審確不必坐其繼母以收贖之虛罪即將繼母所生偏愛之子議令抵償擬絞監候如肆行凌逼致前妻之子情急自盡者將繼母之子杖一百流三千里若未生有子者勒令歸其母家不得承受其夫之產業所遺財產俱歸死者之兄弟及死者之子均分庶悍惡之繼母有所忌憚不敢肆爲殘忍之行矣從之○丁巳諭大學士九卿等朕於用人行政是非賞罰總視乎理之至公而未嘗稍存

成見大學云。心有所忿懣。則不得其正。有所恐懼。則不得其正。有所好樂。則不得其正。有所憂患。則不得其正。夫心不正。則是非可否。皆不得其當。其弊有不可勝言者矣。周子通書云。無欲則靜。虛動直靜。虛則明。明則通。動直則公。公則溥。可見人之心。必靜虛動直。而後應事接物。可得其平。若一有所偏向。則靜不能虛。動不能直。又安望其明通公溥哉。夫有所者。不過流於一偏而已。足爲心之累。至於有我。則全是自私自利之心。縈繞固結於中。但知有己。而不知有人。其心之不正更甚矣。古稱溺愛者不明。凡人溺愛他人。則於是非可否。已不能辨。而不免於惑。況溺愛己身。則但見其是。而不見其非。但見其可。而不見其否。沉惑迷謬。以至過咎日叢。愆尤日積。而全不知醒悟。改悔其爲害。尚可言哉。又如人臣以忠言規諫其君。則望君之虛懷採納。而人君以正言訓勉其臣。亦望臣之實心聽從。

君不用臣言。則加以拒諫之名。若臣奉君之訓。聽之藐藐。清夜自思。能安於心乎。惟是君不聽臣言。人人皆得而見之。而臣之不能洗心易慮。以從君之訓。則在隱微之間。人所難知。是在爲臣者之捫心省察而已。○戊午。復設廣東省各府經歷一員。從廣東布政使王士俊請也。○己未。諭內閣。朕自御極以來。凡文武大小官員。進見時。必諄諄訓誨。諭以國計民生之要務。至於近日。廷臣科道等官。輪班條奏。其實在可行者。即降旨施行。其似有可採者。即發令查議。其有言之未當者。或局於一偏之見。或失之迂濶。難行甚至懷挾私心。不顧大體。數陳鄙瑣。識見庸愚。朕多召令入見。面加訓誨。剖晰其說。諭以不可施行之故。蓋朕意欲使其人曉然明白。自知識見之淺鄙。是以降旨之時。周詳往復。不憚煩勞。倘其人退而錄記。果能深會朕心。詳繹朕旨。一紀載畧。無舛錯遺漏。豈不甚善。但其事有

甚難者。彼於倉猝之際。敬畏矜持。或則錯會朕旨。或則記憶不全。又或書寫之間。詞不達意。或有意捏成。顛倒朕諭。所謂差之毫釐。謬以千里者。正復不少。即如啓奏折本時。大學士及學士滿漢多人。皆每日進見。素常熟習者。而面奉諭旨。退而繕寫進呈。尚且未能悉協。何況出於一人一時之奏對者乎。前者科道翰林八九十人。同奉面諭。朕令其各書呈覽。乃諸人所寫參差八九十員。人皆互異。且與朕旨多不相符。可見理會記載之難矣。設或漫自記錄。謬相流傳。有失降旨之本意。則所關匪細。從前屢經曉諭。曾命在廷大臣。與外省文武員弁等。面奉之旨。皆書寫進呈。朕覽以防訛錯。今再行申飭。凡內外大小臣工。著將所記面奉之旨。呈奏方許存錄。倘未經奏覽。私自存錄。一經查出。照詐爲制書之律治罪。著各部院衙門。將此諭旨錄貼堂壁。俾現任及接任官員共知之。其各省文武官弁

等。著該督撫提鎮將朕此旨。每年通行曉諭一次。倘屬員等有不知此旨者。朕惟該上司是問。○吏部議覆。通政使司左叅議吳山條奏。各省州縣官員。於錢穀刑名事件。未經閱歷。不無遺悞。服官未幾。輒被叅革。情屬可憫。嗣後請將候選人員。分派各部學習行走。其能勝州縣之任者。該堂官出具考語。保送吏部。照依科分班次銓用。其不宜外任者。分別以小京官及直省佐貳教職等缺。改補應如所請。從之。○庚申。諭內閣。前據浙江署督性桂。署撫蔡仕舫等。奏進湖州居民王文隆家。萬蠶同織。瑞繭一幅。長五尺八寸。寬二尺三寸。父老皆稱爲從來未有之事。朕恐小民圖利望恩。或用人力造作而成。因令性桂等詳細體訪。務令確實。勿爲所欺。昨性桂蔡仕舫等於本地詳加驗看。訪察實係自然成就。竝不由於人工。具摺覆奏。廷臣等以蠶桑織紵乃衣被之大原。養民之切務。今浙省有此瑞

應則小民溫暖可期。咸爲國家稱慶。朕素不言祥瑞。數年以來。每遇休徵。必倍加乾惕。儆戒。所頒諭旨。至再至三。朕愛育元元。務期普天率土之人。同霑實惠。一時希有之物。不足以禦饑寒。倘蒙

上天俯鑒。惻誠錫福。黎庶蠶桑。普盛衣食。充盈乃朕心之所謂祥瑞也。○陝西寧夏總兵官郭成功。年老休致。調署陝西固原提督。山西大同總兵官張善。爲陝西寧夏總兵官。以陝西安西總兵官潘之善。署陝西固原提督。○命浙江省開局鑄錢。從署浙江巡撫蔡仕舫請也。○辛酉諭兵部。寧夏副都統蘇圖。現領寧夏兵丁。前往軍營。著伊暫行來京候旨。其寧夏兵丁。著副都統舒楞額。馳驛速往。暫行管轄。俟蘇圖到時。著舒楞額回京。○陞正黃旗護軍統領德成。爲正紅旗滿洲都統。○封故鎮國公德普子恒祿。爲輔國公。○壬戌諭戶部。直隸宣化府屬。完運一事。前經部議改

徵折色。令各州縣照撥運之數。每米一石。折銀一兩。解交受運州縣。支給兵丁。既免完運之煩。又省輓輸之累。是以降旨允行。但查宣屬屯糧。例於九月開徵。而兵米例於季首支給。今改徵折色。恐百姓輸納不前。兵丁支給有待。著該管官。先於藩庫。將應發銀兩。預行給領。俟各州縣徵完之日。解司還項。至萬全縣。及獨石。張家二口。地勢稍寒。春夏之間。米價不無增長。過往員役口糧。及兵丁季米。折銀一兩。恐不敷採買之價。亦著該管官。於每年秋成米賤之時。約計需米若干。於藩庫領銀。預先採買存貯。各處倉廩。以備支給。俟州縣折徵完日。解司還項。庶百姓既免從前完運之累。而兵米口糧。亦無需待不敷之慮矣。○以署工部右侍郎左副都御史宗室塞爾赫。暫理吏部右侍郎事。○癸亥遣官祭歷代帝王。○遣官祭城隍之神。○諭內閣。據雲貴廣西總督鄂爾泰奏。稱黔屬思州。及古

州之梅得等處自七月初八日至閏七月十一日有五彩雲光華燦爛疊秀爭華歷時經久一月之內七見嘉徵等語朕嘗言天人相感之理捷於影響督撫大臣等果能公忠體國實心愛民必能感召

天和錫嘉祥於其所轄之地即如鄂爾泰頻年駐節本省祥雲三見於滇南今年以公事前往貴州慶雲即見於黔省仰見

上天昭示顯然欲使君臣共知儆惕也朕從不因嘉徵而受慶賀而敬慎之念日益加虔想中外臣民亦共知之矣夫

上天示人君以災祥一如人君加臣下以賞罰也人臣受君上之賞固不可侈然自足放逸驕矜若竝無欣慰之心而不以爲慶則受君上之罰亦不知畏懼悔改此非矯情違衆之人即胸無忌憚之輩矣人君之於

天其理亦復如是至於鄂爾泰之屢次奏報慶雲者蓋以滇黔地方有此瑞應萬目共覩在

人臣之心無不願國家之蒙福兆庶之凝禧州縣申詳而督臣陳奏此皆出於情理之不能自己倘有心懷不肖之人或且議其爲迎合或且譏其爲諂諛此皆藏幸災樂禍之邪心不止於春秋責備賢者而已惟是滇黔遠省荷

上天之垂象加恩如此則自大臣以及官弁兵民宜何如之敬謹虔恭以永承

天貺是則所當夙夜加勉者也○禮部議覆大

學士陳元龍條奏一督撫題奏事件本後貼黃務令融會全疏之始末節其繁冗撮其緊要其慶賀陳謝及接到

上諭等奏章該督撫等學問夙嫻者或用四六體式若平素未諳文義及提鎮武臣不妨質朴宣達無容拘定四六至於繕寫本章必遴選善書之人照部本式樣繕寫以昭敬謹之意違者分別議處一起居注館記注訓旨而各省題奏本章講官不得預行詳閱無從查

載嗣後請飭各省遇有題奏本章俱增寫揭帖一通送起居注館俟記注後將揭帖轉送內閣收貯永著爲例均應如所請從之○封故輔國公塞欽子齊努渾爲輔國公○甲子改陝西西安府管糧通判爲水利通判移駐涇陽縣之王橋鎮專管涇陽醴泉三原高陵臨潼五縣堤渠修濬事務從署川陝總督查郎阿請也○乙丑諭戶部京師大興宛平二縣知縣常以虧空被叅朕體察其故二縣在輦轂之下每有一時速辦之公事不能遲緩者那移庫銀以濟用而支領還項未免遲延時日其上司察知庫帑有虧不得不行叅劾此等虧空實有可原之情朕體恤臣工不忍聽其因辦公而遭罷黜爲之思一備用之道著宛大二縣各領戶部銀一萬兩永遠存貯該縣遇有速辦之公事即詳明府尹將此銀動支應用俟支領銷算之時仍復歸還原項於每年歲底報部查核如此則辦公有賴備

用有資再有虧空國帑或借名擅動備用之銀者定行重治其罪○陞山東沂州副將徐起鳳爲山西大同總兵官○吏部議覆正黃旗護軍統領德成條奏八旗文生員考取筆帖式者舊例俱以無品筆帖式補用嗣後請照監生考補筆帖式例授爲八品其由繙譯生員考補者亦照此例應如所請從之○裁湖北襄陽府大盈倉大使樊城縣稅課大使二缺從署湖北巡撫徐鼎請也○丙寅諭工部朕惟古聖人之制祭祀也凡山川嶽瀆之神有功德於生民能爲之禦災捍患者皆載在祀典蓋所以薦歆昭格崇德報功而并以動人敬畏祇肅之心也雍正二年浙江海塘潮水衝決朕特發帑金命大臣察勘修築并念居民平日不知畏敬明神多有褻慢切諭以虔誠修省之道令地方官家喻戶曉警覺衆庶比年以來塘工完整災沴不作居民安業蓋已默叨神佑矣今年潮汐盛長幾至泛

溢官民震恐。幸而水勢漸退。隄防無恙。此皆神明默垂護佑。惠我烝民者也。茲特發內帑銀十萬兩於海寧縣地方。敕建海神之廟。以崇報享。著該督遴委賢員。度地鳩工。敬謹修建。務期制度恢宏。規模壯麗。崇奉祀事。用答明神庇民禦患之休烈。且令遠近人民奔走瞻仰。興起感動。相與服教畏神。遷善改過。永荷庥祥。則於國家事神治人之道。均有賴焉。○陞右通政史在甲。爲光祿寺卿。○丁卯。兵部議覆雲貴廣西總督鄂爾泰疏言。廣西柳州慶遠二府地逼黔楚。延袤二千餘里。請因時變通。酌定營制。改柳慶協爲慶遠協。專管慶遠一府。並所屬州縣城汛。移河池營官兵駐劄賓州。改爲賓州營。將就近之三里營歸賓州營管轄。移慶遠協右營守備。駐劄河池。營添設柳州府城守營都司僉書一員。千總一員。把總一員。兵一百五十名。駐劄府城。聽提督管轄。柳州所屬州縣令提標五營派兵

防守。其提標原防賓州各汛弁兵俱請抽調回柳。應如所請。從之。○授故鎮國公楊福子富爾嵩阿爲鎮國將軍。奉國將軍索達塞子寶德奉恩將軍顧祿固子履德俱爲奉恩將軍。○戊辰。陞福建提標叅將張起雲爲福建金門總兵官。○復設山西汾陽縣黃蘆嶺巡檢一員。移原駐運城之安邑縣典史駐縣城。添設運城守備一員。巡檢一員。從山西巡撫覺羅石麟等請也。○安徽巡撫魏廷珍疏報潛山泗州等四縣衛開墾雍正六年分田地七十頃有奇。下部知之。○旌表河南葉縣烈婦王錫祥妻王氏。拒姦不從。被刃殞命。給銀建坊。入祠致祭如例。○庚午。諭內閣。嗣後凡總督來京陛見。其行走班次著在尚書之後。○以正黃旗護軍叅領花色署本旗護軍統領。○辛未。上回宮。○添設太常寺滿洲司庫一員。庫使二員。從太常寺少卿薩克素請也。○予故工部

尚書兼大臣一等公夸岱祭葬如例

大清世宗敬天昌運建中表正文武英明寬仁
信毅大孝至誠憲皇帝實錄卷之八十五

大清世宗敬天昌運建中表正文武英明寬仁
信毅大孝至誠憲皇帝實錄卷之八十六

監修總裁官光祿大夫經筵講官太僕議政大臣保和殿大學士兼兵部尚書總理兵部事務三等伯加十五級臣鄂爾泰
總裁官光祿大夫經筵講官起居注大臣保和殿大學士兼戶部尚書仍兼官吏部尚書翰林院掌院

第三等伯加十五級臣張廷玉光祿大夫經筵講官起居注大臣保和殿大學士兼兵部尚書仍兼官

翰林院掌院事加二級臣福敏光祿大夫經筵講官太子太保東閣大學士兼禮部尚書加六級臣徐本光祿大夫

經筵講官議政大臣協辦內閣大學士事務禮部尚書仍兼官太常寺鴻臚寺事臣三泰等奉

敕修

雍正七年己酉九月壬申朔

上詣

恩佑寺行禮畢。幸圓明園。○癸酉。諭內閣。向日
由員外郎以下授爲御史者。有試俸一年稱
職。然後題請實授之例。若該御史奉差在外。
乃由揀選命往辦理公事者。自應與在京之
御史一體題請實授。乃從前該衙門疎忽。未
曾題請。遂致出差之御史。試俸數年而不得
實授。深爲未協。著將出差之御史。試俸一年
期滿者。與在京之員。一同具題請旨。永著爲

例○調湖南巡撫王國棟來京。陞署湖北巡撫四川布政使趙弘恩爲湖南巡撫。署四川按察使高維新爲四川布政使。司布政使○添設福建鹽驛道衙門庫大使一員。從福建總督高其倬請也。○甲戌諭內閣山東泰安州神廟奉祀東嶽泰山之神。歷代相傳靈顯昭著。佑庇萬民。俾國家享昇平之福者。明神之功德。其來久矣。遠近人民感荷默佑之恩。焚香頂禮。罔不虔肅。其廟宇重修於康熙十二年。距今五十餘年。茲據署巡撫費金吾奏稱。廟宇盤道有傾圯頽壞之處。應加繕葺。山路亦當修整。著發內帑銀兩。命內務府郎中丁皂保赫達色前往督工。敬謹修理。務使廟貌輝煌。工程堅固。速行告竣。以副朕爲民報享之至意。○諭戶部據寧遠大將軍岳鍾琪奏稱。自西安起程。歷西鳳平臨以至甘涼等處。小民承辦軍需。莫不踴躍歡呼。趨事赴公。爭先恐後。而靖逆衛屯民於應辦草束之外。

情願另備餘草運赴大東渠站所堆積。以佐軍需等語。靖逆遠處邊外。人民無幾。而自備割運草束。輸力効誠。可見師以義行。統領大臣又能令承辦軍需各員無絲毫扣剋。是以輿情鼓舞。相率辦公。朕心深爲嘉悅。著將靖逆衛庚戌年應徵正糧馬糧四百六十石零大草五千三百八十八束全行蠲免。以示加惠邊民。急公之至意。○工部左侍郎張保緣事革職。實授馬爾泰爲工部左侍郎。○鑲黃旗漢軍副都統尚承恩緣事降調。陞一等侍衛宗室色布肯爲鑲黃旗漢軍副都統。○乙亥。陞福建興泉道李王鑑爲貴州按察使。司按察使。○議敘陝西平定青海功在事官員兵丁等。陞賞贈卹有差。○賑浙江江山縣水災饑民。○丙子。刑部議覆浙江按察使方觀條奏。一盜賊爲害。全在窩家。舊例窩家兩鄰俱有杖責之條。而同居親屬未經定擬治罪。殊爲遺漏。嗣後強竊窩家同居之父兄伯叔

與第除自首免究外其知情不首者請分別擬杖以示懲儆。各省積匪猾賊爲害最甚嗣後凡遇緝獲審實不論曾否刺字俱照應發遣之例發邊衛充軍。舊例盜賊同居父兄等不知情分贓者俱照斬絞之犯減等擬流似屬可矜嗣後除強盜爲首傷人問擬斬決者其同居親屬照例杖流外其係夥盜未曾傷人行劫未至三次問擬發遣者親屬請減等杖徒竊盜滿貫擬絞并罪止流徒杖責者親屬各減二等發落永著爲例均應如所請從之。○戊寅諭內閣數年以來各省民人屢有拾金不取之事朕以人心風俗漸有歸於醇厚之機深爲慰悅皆加賞賜以示獎勸今據直隸巡察御史鄂昌等奏報文安縣居民盧尚義之妻梁氏拾金不昧告知伊姑給還本人及謝以布疋姑婦堅辭不受等語以貧家婦女織蓆營生乃能講讓興廉一門向善爲人情所難之義舉甚屬可嘉著賞給米

十石布十疋並令該地方官給與匾額以旌良淑。○命將甘肅西寧大同歷年軍需各案應賠倒斃駝隻銀兩全行豁免。○戶部議覆監察御史晏斯盛條奏各省州縣設立社倉原爲通有無濟豐歉之用嗣後如有貧民不遇荒歉借領倉穀者請准其給發每石止收息穀十升遇小歉免取其息仍如本數還倉以廣惠濟窮黎之意應如所請從之。○順天府尹陳良弼疏言查八旗滿洲蒙古漢軍武鄉試凡考中之武生及中書部院衙門之七八品筆帖式已上朝未上朝之廕生以至監生馬甲護軍領催執事人等俱准其入場考試今八旗咨到副驍騎校前鋒馬甲等與例不符仰請加恩照直省綠旗兵丁鄉試之例准其一體入場考試從之。○庚辰以刑部左侍郎杭奕祿爲鑲紅旗滿洲副都統仍兼刑部左侍郎。○辛巳諭內閣步軍統領衙門事務繁多所有刑名事件應派部院堂官一

員協同辦理。參酌律例，以期允當。將此永著爲例。侍郎鄂爾奇著協辦步軍統領衙門事務。○諭戶部：外任大小官員罰俸之例，如罰俸一年者，則將本年應領俸銀扣抵。若再有罰俸之案，則勒限一年追出俸銀解部。如一年不完，又罰俸一年，展轉增加，常有因一二年罰俸而積至數年，或數十年者，此例不甚妥協。在罰俸多案之州縣，與力薄難完之微員，深爲可憫。著該部通行各省，凡有此等罰俸之員，僅力不能完，即將伊任內應得之俸逐年扣抵，不必勒限追繳。又定例：凡有休致革職病故之官員，其應追罰俸銀兩俱行豁免。惟江南等省有休革等事，只將虛俸豁免。其在罰俸以前食過之俸，仍行追出。直省例不畫一。今著將休致病故官員食過之俸概行免追。其革職之員，則追其食過之俸，以示懲儆。直省一體遵行。○賑湖南澧州、臨湘等七州縣、岳州等三衛旱災饑民。○壬午，禮部

議覆陞任護軍統領德成條奏：「八旗文生員舉人進士考試騎射關係大典，嗣後請令禮部於四個月以前行文該旗，移取名冊該旗於文到日限兩個月內移送禮部。禮部會同兵部查對。一包衣佐領下莊頭子弟住居屯鄉，臨考之時，包衣參領不能識認，易滋頂冒等弊。嗣後考試請每旗派參領一員，每參領下派章京一員，令本佐領本內管領下派頭目領催各一員，帶領應試之人送參領等識認，並將派出之參領等職名與應試之人名冊一并移送禮部。禮部會同兵部傳集查對。舊例十五歲以下應考童子俱令騎射，其中力不勝馬者甚多。嗣後十五歲以下年未及壯之童子請停止馬射，祇令考試步箭。其有情願兼試者聽均應如所請從之。」刑部遵旨議覆匪類劫奪囚犯情罪可惡，嗣後行劫獄囚應不論曾否得囚，有無傷人，俱將爲首之人從重定擬，夥犯分別治罪。其中途

劫囚因而殺人者將動手夥犯竝爲首之犯分別從重定擬從之○癸未諭諸王文武大臣等自古帝王之有天下莫不由懷保萬民恩加四海膺

上天之眷命協億兆之懽心用能統一寰區垂庥奕世蓋生民之道惟有德者可爲天下君此天下一家萬物一體自古迄今萬世不易之常經非尋常之類聚羣分鄉曲疆域之私衷淺見所可妄爲同異者也書曰皇天無親惟德是輔蓋德足以君天下則天錫佑之以爲天下君未聞不以德爲感孚而第擇其爲何地之人而輔之之理又曰撫我則后虐我則仇此民心向背之至情未聞億兆之歸心有不諭德而但擇地之理又曰順天者昌逆天者亡惟有德者乃能順天之所與又豈因何地之人而有所區別乎我國家肇基東土列聖相承保乂萬邦天心篤祐德教宏敷恩施遐暢登生民於衽席

徧中外而尊親者百年於茲矣夫我朝既仰承

天命爲中外臣民之主則所以蒙撫綏愛育者何得以華夷而有殊視而中外臣民既共奉我朝以爲君則所以歸誠効順盡臣民之道者尤不得以華夷而有異心此揆之

天道驗之人理海隅日出之鄉普天率土之衆莫不知大一統之在我朝悉子悉臣罔敢越志者也乃逆賊呂留良兇頑悖惡好亂樂禍假擾彝倫私爲著述妄謂德佑以後天地大變亘古未經於今復見而逆徒嚴鴻逵等轉相附和備極猖狂餘波及於曾靜幻怪相煽恣爲毀謗至謂八十餘年以來天昏地暗日月無光在逆賊等之意徒謂本朝以滿洲之君入爲中國之主妄生此疆彼界之私遂故爲誣謗詆譏之說耳不知本朝之爲滿洲猶中國之有籍貫舜爲東夷之人文王爲西夷之人曾何損於聖德乎詩言戎狄是膺荆舒

是懲者以其僭王猾夏不知君臣之大義故聲其罪而懲之非以其爲戎狄而外之也若以戎狄而言則孔子周遊不當至楚應昭王之聘而秦穆之霸西戎孔子刪定之時不應以其誓列於周書之後矣蓋從來華夷之說乃在晉宋六朝偏安之時彼此地醜德齊莫能相尚是以北人詆南爲島夷南人指北爲索虜在當日之人不務修德行仁而徒事口舌相讎已爲至卑至陋之見今逆賊等於天下一統華夷一家之時而妄判中外謬生忿戾豈非逆天悖理無父無君蜂蟻不若之異類乎且以天地之氣數言之明代自嘉靖以來君臣失德盜賊四起生民塗炭疆圉靡寧其時之天地可不謂之閉塞乎本朝定鼎以來掃除羣寇寰宇人安政教興修文明日盛萬民樂業中外恬熙黃童白叟一生不見兵革今日之天地清寧萬姓沾恩超越明代者三尺之童亦皆洞曉而尚可謂之昏暗乎

夫天地以仁愛爲心以覆載無私爲量是以德在內近者則大統集於內近德在外遠者則大統集於外遠孔子曰故大德者必受命自有帝王以來其揆一也今逆賊等以冥頑狂肆之胸不論

天心之取舍政治之得失不論民物之安危疆域之大小徒以瑣瑣鄉曲爲阿私區區地界爲忿嫉公然指斥以遂其昧棄彝倫滅廢人紀之逆意至於極盡狂吠之音竟敢指天地爲昏暗豈

皇皇上天鑒觀有赫轉不如逆賊等之智識乎且自古中國一統之世幅幘不能廣遠其中有不向化者則斥之爲夷狄如三代以上之有苗荆楚獫狁即今湖南湖北山西之地也在今日而目爲夷狄可乎至於漢唐宋全盛之時北狄西戎世爲邊患從未能臣服而有其地是以有此疆彼界之分自我朝入主中土君臨天下并蒙古極邊諸部落俱歸版圖

是中國之疆土。開拓廣遠。乃中國臣民之大幸。何得尚有華夷中外之分論哉。從來爲君上之道。當視民如赤子。爲臣下之道。當奉君如父母。我朝之爲君。實盡父母斯民之道。殫誠求保赤之心。而逆賊尚忍肆爲訛謗。生疾怨而行其忤逆乎。從前康熙年間。各處姦徒竊發。動輒以朱三太子爲名。如一念和尚。朱一貴者。指不勝屈。近日尚有山東人張玉。假稱朱姓。託於明之後裔。遇星士推算。有帝王之命。以此希冀鼓惑愚民。見被步軍統領衙門拏獲。究問從來異姓先後繼統。前朝之宗姓。臣服於後代者甚多。否則隱匿姓名。伏處草野。從未有如本朝姦民。假稱朱姓。搖惑人心。若此之衆者。似此蔓延不息。則中國人君之子孫。遇繼統之君。必至於無噍類而後已。豈非姦民迫之使然乎。況明繼元而有天下。明太祖即元之子民也。以綱常倫紀言之。豈能逃篡竊之罪。至於我朝之於明。則鄰國耳。

且明之天下。喪於流賊之手。是時邊患肆起。倭寇騷動。流賊之有名目者。不可勝數。而村邑無賴之徒。乘機劫殺。其不法之將弁兵丁等。又借征勦之名。肆行擾害。殺戮良民。請功以充獲賊之數。中國人民死亡過半。即如四川之人。竟致靡有孑遺之歎。其偶有存者。則肢體不全。耳鼻殘缺。此天下人所共知。康熙四五十年間。猶有目覩當時情形之父老。垂涕泣而道之者。且莫不慶幸我朝統一萬方。削平羣寇。出薄海內外之人於湯火之中。而登之衽席之上。是我朝之有造於中國者大矣。至至於厚待明代之典禮。史不勝書。其藩王之後。實係明之子孫。則格外加恩。封以侯爵。此亦前代未有之曠典。而胸懷叛逆之姦民。動則假稱朱姓。以爲構逆之媒。而呂留良輩。又借明代爲言。肆其分別華夷之邪說。冀遂其叛逆之志。此不但爲本朝之賊寇。實明代之仇讎也。且如中國之人。輕待外國之

入承大統者其害不過妄意詆譏盡惑一二匪類而已原無損於是非之公倫常之大儻若外國之君入承大統不以中國之人爲赤子則中國之人其何所托命乎况撫之則后虐之則仇人情也若撫之而仍不以爲后殆非順天合理之人情也假使爲君者以非人情之事加之於下爲下者其能堪乎爲君者尚不可以非人情之事加之於下豈爲下者轉可以此施之於上乎孔子曰君子居是邦也不非其大夫况其君乎又曰夷狄之有君不如諸夏之亡也夫以春秋時百里之國其大夫猶不可非况我朝奉

天承運大一統太平盛世而君上尚可謗議乎且聖人之在諸夏猶謂夷狄爲有君况爲我朝之人親被教澤食德服疇而可爲無父無君之論乎韓愈有言中國而夷狄也則夷狄之夷狄而中國也則中國之歷代以來如有元之混一區宇有國百年幅幘極廣其政治

規模頗多美德而後世稱述者寥寥其時之名臣學士著作頌揚紀當時之休美者載在史冊亦復燦然具備而後人則故爲貶詞概謂無人物之可紀無事功之足錄此特懷挾私心識見卑鄙之人不欲歸美於外來之君欲貶抑淹沒之耳不知文章著述之事所以信今傳後著勸戒於簡編當平心執正而論於外國入承大統之君其善惡尤當秉公書錄細大不遺庶俾中國之君見之以爲外國之主且明哲仁愛如此自必生奮勵之心而外國之君見是非之不爽信直道之常存亦必愈勇於爲善而深戒爲惡此文藝之功有補於治道者當何如也儻故爲貶抑淹沒畧其善而不傳誣其惡而妄載將使中國之君以爲既生中國自享令名不必修德行仁以臻邅隆之治而外國入承大統之君以爲縱能夙夜勵精勤求治理究無望於載籍之褒揚而爲善之心因而自怠則內地蒼生其苦

無有底止矣。其爲人心世道之害可勝言哉。況若逆賊呂留良等。不惟於我朝之善政善教大經大法概爲置而不言。而更鑿空妄撰憑虛橫議。以無影無響之談爲惑世誣民之具。顛倒是非。紊亂黑白。以有爲無。以無爲有。此其誕幻譎張。誑人聽聞。誠乃千古之罪人。所謂慙不畏死。凡民罔不慙。不待教而誅者也。非祇獲罪於我國家而已。此等儉邪之人。胸懷思亂之心。妄冀僥倖於萬一。曾未通觀古今大勢。凡首先倡亂之人。無不身膏斧鑕。遺臭萬年。夫以天下國家之鞏固。豈烏合鼠竊之輩所能輕言動搖。即當世運式微之時。其首亂之人。歷觀史冊。從無有一人能成大事者。如秦末之陳涉。項梁。張耳。陳餘等。以至元末之劉福通。韓林兒。陳友諒。張士誠等。雖一時跳梁。究竟旋爲灰燼。而唐宋中葉之時。其草竊之輩。接踵疊跡。亦同歸於盡。總之此等姦民。不知君臣之大義。不識天命之眷懷。

徒自取誅戮。爲萬古之罪人而已。夫人之所以爲人。而異於禽獸者。以有此倫常之理也。故五倫謂之人倫。是關一則不可謂之人矣。君臣居五倫之首。天下有無君之人。而尚可謂之人乎。人而懷無君之心。而尚不謂之禽獸乎。盡人倫則謂人滅天理。則謂禽獸。且天命之以爲君。而乃懷逆天之意。焉有不遭天之誅殛者乎。朕思秉彝好德。人心所同。天下億萬臣民。共具天良。自切尊君親上之念。無庸再爲剖示宣諭。但儉邪昏亂之小人。如呂留良等。胸懷悖逆者。普天之下。不可言止。此數賊也。用頒此旨。特加訓諭。若平日稍有存此心者。當問天捫心。各發天良。詳細自思之。朕之詳悉剖示者。非好辯也。古昔人心淳樸。是以堯舜之時。都兪吁咈。其詞甚簡。逮至殷周之世。人心漸不如前。故殷盤周誥。所以誥誡臣民者。往復周詳。肫誠剴切。始能去其蔽。錮覺其愚蒙。此古今時勢之不得不然者。若

呂留良嚴鴻逵曾靜等逆天背理惑世誣民之賊而曉以天經地義綱常倫紀之大道使愚昧無知平日爲邪說陷溺之人豁然醒悟不致遭天譴而罹國法此乃爲世道人心計也著將朕諭旨通行頒布天下各府州縣遠鄉僻壤俾讀書士子及鄉曲小民共知之○甲申諭兵部嚮導章京行走差遣之處甚多著賞給雙俸嗣後凡補授之嚮導章京俱給與雙俸○管理旗務王大臣等議覆鑲紅旗蒙古副都統富昌條奏八旗蒙古遊牧地方所有捕盜六品官嗣後請交與各該總管等視其効力勤慎五年無過者填註考語保送該旗記檔遇伊等應陞缺出該旗指名行取與在京之驍騎校護軍校等一體引見補用其効力不勤與有過者分別題參議處應如所請從之○改廣西東蘭土知州缺爲東蘭土州同駐劄鳳山管理鳳山芝山連喇長里泗孟四苟六哨裁原設州同缺添設東蘭流

知州一員吏目一員駐劄東院哨土州舊治撥柳慶協左營千總一員添兵五十名駐劄東蘭州從雲貴廣西總督鄂爾泰請也○乙酉

聖祖仁皇帝治河方畧編纂告成內閣進呈御覽得旨朕惟

聖祖仁皇帝軫念民生而於黃運兩河尤厯聖懷自甲子以迄丁亥六次

親歷河干指授方畧一切修築堵塞事宜無不出自

宸衷規畫數十年來

聖謨睿訓備載此書凡有河防水利之任者皆應悉心詳閱奉爲法則著繕寫三部發給河臣孔毓珣嵇曾筠尹繼善令其敬謹閱看必於河務大有裨益但河性遷移或今日情形與昔年有不同之處著孔毓珣等三人會同商酌具奏又當年或有奉

旨案件此書未經載入而該衙門有檔可稽者

亦著查明具奏○丙戌諭內閣上年直隸通省收成豐稔惟宣化府屬之宣化懷來保安三處交界之地廣約四十里長約百里獨愆雨澤頗覺亢旱今據直隸巡農御史舒喜奏稱京畿一百四十州縣築場納稼百穀咸登各府州縣之收成冊報八分九分十分不等老幼得所共慶有秋惟宣化府屬宣化西寧蔚縣三處今年六七月間有水雹之傷禾稼稍損朕思天人感應之理纖毫不爽連年以來直隸通省雨澤應時西成豐稔而宣化府屬之數州縣地方兩年之內有亢旱水雹之災此必地方官民政治有缺風俗不淳是以上天顯示儆戒欲其警醒悔悟翻然悛改於將來也官斯土者宜敬謹修省以免過愆著通行曉諭勸導令所屬百姓消亢戾澆漓之風敦和睦忠厚之行共爲良善以迓天庥而此數州縣之紳衿士庶尤當深感上天垂象示儆之恩各捫心自問若有幾微匪

僻乖戾之念即猛加省改竝交相勸勉俾比閭族黨興仁講義共成親遜良善之俗則以和召和雨暘時若之應

天必錫之以福矣○丁亥陞鑲紅旗參領趙弘濟爲正黃旗漢軍副都統○戊子陞福建按察使孫國璽爲山東布政使司布政使調貴州按察使李玉鑑爲福建按察使司按察使以貴州學政翰林院侍讀徐本爲貴州按察使司按察使湖南按察使郭朝祚緣事革職調直隸按察使張璣爲湖南按察使司按察使陞直隸通永道姜穎新爲直隸按察使司按察使○改廣西思恩府屬之鎮安土府爲流府設知府一員裁原設通判缺留知事一員管轄歸順上映都康向武小鎮安五土屬奉議州一州裁歸順土吏目缺改設州同一員添設千總一員兵五十名駐劄歸順添設賓州直隸州州同一員駐劄三里營地方從雲貴廣西總督鄂爾泰請也○旌表四川保

縣烈婦郭呈玉妻郭氏孀居拒姦被毆殞命給銀建坊入祠致祭如例○己丑諭內閣年來用兵西藏勦撫苗蠻一切辦理軍需皆動支公帑而糧餉轉輸不無資於民力朕心深爲軫念是以降旨將甘肅四川雲貴廣西五省庚戌年地丁錢糧全行豁免查甘屬之河西四府如寧夏西寧及甘涼肅以至嘉峪關外之靖逆赤金柳溝等衛所歷來額徵俱係糧料草束與各省額徵折色無異今當用兵之際雖絲毫不派及民間而黎民踴躍急公之意大將軍岳鍾琪屢次奏聞甚屬可嘉著將額徵本色加恩豁免以示惠愛邊民之至意○陞正藍旗護軍叅領巴雅爾圖爲鑲白旗蒙古副都統○以山西道御史晏斯盛提督貴州學政○大學士等遵旨議覆內閣侍讀學士王以巽條奏嗣後八旗襲職官員引見奉旨之後請令該都統將該員應給敕書緣由移送吏部轉咨內閣定限辦理轉送該

旗面傳本人齎領如有遲延日期及胥役需索之弊照例叅處再外省督撫提鎮等官所有應領傳敕坐轎其給發之處亦應立定期以防怠忽應如所請從之○庚寅諭兵部賞給兵丁營運生息銀兩原係特恩期於永遠周給有資若定以數月之限即行支賞則生息無多不能接續將來恐有不能普遍之勢著行知各省將軍督撫副都統提督等見在不必定以賞給限期俟營運豐裕之日再行給與○禮部議覆正藍旗漢軍副都統劉汝霖條奏漢軍子弟宜學習清書請每旗各設義學一所令該旗滿洲都統會同漢軍都統於滿洲閒散官並筆帖式或因公降革人員內擇其精通清文者充補教習於漢軍本旗內揀選善射者一二人教習弓箭其教習人員每月給與公費銀米仍令該旗派章京一員稽查課業其肄業子弟如有文理精通願考繙譯者不拘閒散俱准赴吏部考取筆

帖式其文理粗通弓箭可造者聽其在本旗挑補領催兵丁三年之內教習勤謹者將教習人員分別議敘應如所請從之○雲貴廣西總督鄂爾泰摺奏臣曾祖圖們蒙恩入昭忠寺得與祀典竊念臣高祖屯太由汪欽地方率領七村親族人等效順歸誠蒙

太祖高皇帝賞給全佐領又一拜他拉布勒哈番臣曾祖圖們於擒勒諸役屢著勤勞及大凌河被圍圖們領兵首先殺入敵陣又力擊張理兵奮勇陣亡今既叨列昭忠寺牌位僅書佐領伏乞將臣苗疆議敘之案准予銷免照臣職銜賞給誥封俾臣曾祖圖們得以贈官位列大臣之末奉

上諭此奏朕實欣悅俟朕恩命○署廣東巡撫傅泰疏言廣州府理雅同知朱振基於前任連州知州任內私置逆賊呂留良牌位設祠奉祀連州學正王奇勳勒令闔學生員奔走趨奉茲據連州生員陳錫等合詞呈首相應

題參究治得旨朱振基王奇勳俱革職拏問其私置呂留良牌位奉祀情由該督嚴審究擬具奏連州生員陳錫等深明大義不為邪說所惑據實出首以彰名教著將今年該州應試完場之舉子交與該學政秉公遴選學問優通者四人賞作舉人送部一體會試以示恩獎如今科所取副榜內有連州生監亦准作舉人○辛卯正紅旗蒙古副都統馬起達以老病乞休允之○壬辰諭工部直隸山

東江南查勘道路事宜著行文三省督撫等令動正項錢糧乘此農隙之時派委賢員作速興工務於明春雨前告竣朕仍遣員往查其修過橋梁道路等項著交與各該地方官隨時修整并令新舊交代永著為例○癸巳旌表河南武陟縣烈婦王星妻李氏拒姦不污投繯殞命給銀建坊入祠致祭如例○甲午雲貴廣西總督鄂爾泰疏言附近雲南之南掌國王烏孫向化

天朝輸誠納貢備象二隻蒲編金字表文一道轉乞奏聞情詞懇切相應具題請旨得旨南掌國遠在西南徼外從來未通職貢今輸誠向化甚屬可嘉滇省起送來京之時著沿途地方官護送照看應用夫馬食物著從厚支給以示朕加惠遠人之至意 乙未上詣

恩佑寺行禮畢回宮 以故一等公夸岱子納穆圖襲爵 丙申以原任國子監祭酒孫嘉淦爲順天府府尹 裁河南陝州甘棠驛驛丞缺添設硤石驛驛丞一員從河東總督田文鏡請也 丁酉添設四川雅州府同知一員瀘定橋巡檢一員裁烹壩驛驛丞一員從陞任四川布政使趙弘恩請也 戊戌孝慈高皇后忌辰遣官祭

福陵 己亥調江蘇學政詹事府少詹事鄧鍾岳提督廣東學政陝西學政加翰林院侍講銜朱曙孫提督山西學政河南學政大理寺

少卿于廣提督雲南學政浙江學政翰林院侍讀學士王蘭生提督安徽學政廣東學政翰林院侍講學士顧仔提督浙江學政以詹事府詹事張廷璐提督江蘇學政原任詹事府詹事王圖炳提督陝西學政翰林院編修吳應棻提督河南學政提督順天學政左春坊左庶子楊超曾提督湖南學政翰林院編修習篤提督廣西學政江南道御史衛昌績俱仍留任 庚子喀爾喀澤卜尊丹巴胡土克圖遣使進九白年貢宴賚如例 辛丑諭戶部據奉天將軍多索禮奏稱今歲盛京秋成大稔禾稼瓜果等項俱獲豐收米糧價賤朕思米穀者乃

上天恩賜以養育萬民者也若人人存心敬受天賜隨時撙節常留餘崇儉去奢謹身節用則

天心必垂默佑雨暘時若俾常享盈寧之福若暴殄天物輕棄五穀不思稼穡之可寶罔念

農事之艱難則必上千天怒而水旱災祲之事皆所不免此從來天道人事之斷然不爽者奉天地方百穀順成已八年於茲矣今歲收成又慶豐稔穀價之賤自昔罕聞朕心深爲慰悅感戴

上天賜佑之恩則本地官民人等宜敬謹愛惜以仰承

天貺向來奉天居民有以米穀飼養豚豕之陋習此即暴殄天物之一端已令地方官勸諭禁止今不可因米穀饒餘復蹈前轍積貯乃王政之要圖民生之切務奉天地氣乾燥不比南方潮濕之區正當乘此豐收之時以爲儲蓄之計著該地方官員通行曉諭勸導所屬民人若有穀之家果能留心積貯至於穀多價賤難於出糶者著大臣官員等即行奏聞朕當發官價糶買或從海道運至京師俾積穀之家實獲利益必不使有穀賤傷農之歎也○喀爾喀車臣汗冊卜登拜音珠爾遣

使進九白年貢宴齊如例

大清世宗敬天昌運建中表正文武英明寬仁信毅大孝至誠憲皇帝實錄卷之八十六

大清世宗敬天昌運建中表正文武英明寬仁
信毅大孝至誠憲皇帝實錄卷之八十七

監修總裁官光祿大夫經筵講官太僕議政大臣保和殿大學士兼兵部尚書總理兵部事務三等伯加十五級臣鄂爾泰

總裁官光祿大夫經筵日講官起居注太保保和殿大學士兼戶部尚書仍兼管吏部尚書翰林院掌院

事三等伯加十三級臣張廷玉光祿大夫經筵日講官起居注太保議政大臣武英殿大學士兼工部尚書仍兼管

翰林院掌院事加二級臣福敏光祿大夫經筵講官太子太保東閣大學士兼禮部尚書加六級臣徐本光祿大夫

經筵講官議政大臣協辦內閣大學士事務禮部尚書仍兼管太常寺鴻臚寺事務臣三泰等奉

敕修

雍正七年己酉冬十月壬寅朔享

太廟

上親詣行禮○遣官祭

永陵

福陵

昭陵

昭西陵

孝陵

孝東陵

景陵○頒雍正八年時憲曆○喀爾喀瓦齊賴

巴圖土謝圖汗旺扎爾多爾濟遣使進九白
年貢宴賚如例○癸卯以湖廣總督邁柱兼
理湖北巡撫印務○免雲南南寧縣本年分
水災額賦有差○乙巳吏部奏本月初一日
夜文選司失火延燒房屋十數間所有檔案
被燬應將值宿書辦交刑部嚴審當月司官
議處臣等疎忽之咎請敕部察議其所燬檔
案於號件簿內查明行文內外各衙門將原
案造冊送部得旨吏部近來諸事肅清官吏
人等亦無可作之弊所失檔案仍可於他處
查取校對胥役妄纂舞文弄法事亦難行該
部堂官總理大綱豈能時刻稽查不必交部
察議當月司官及值宿書辦著交部照例歸
結嗣後各部院衙門存貯檔案之處應委筆
帖式等官輪班值宿巡查至內閣本章及各
衙門檔案皆應於正本外立一副本另行收
貯如本章正本係紅字批發副本則批墨筆
存案其他檔案副本或另用鈐記以分別之

如此不但於公事有益且可杜姦胥猾吏隱藏改換之弊其如何詳悉定例之處著大學士步軍統領會同九卿議奏尋議在京各衙門卷牘收貯之所應派筆帖式輪班值宿巡查各省督撫題奏事件例有副本送通政司嗣後應令一併送閣俟奉旨後內閣將副本遵照紅本用墨筆批錄另貯皇史宬其在京各部院覆奏本章亦照此辦理至部覆正本向來兼寫清漢全錄案呈不免稽遲時日嗣

後所辦副本應無庸全錄案呈只以漢字繕寫又各部院一切檔案應另立一冊將全案備錄印信鈐蓋挨次編號其存貯之所亦酌派筆帖式值宿巡查從之○陞貴州大定州爲大定府改威寧府爲威寧州與平遠黔西二州畢節一縣俱隸大定府管轄移威寧之知府通判經歷司獄教授駐大定大定之知州吏目學正駐威寧從雲貴廣西總督鄂爾泰請也○封敕漢台吉固山額駙羅卜藏爲

輔國公○丙午

上御太和殿視朝諸王及文武陞轉各官謝恩
總理

陵寢事務領侍衛內大臣尚崇廩奏言

景陵

聖德神功碑亭儀柱之右座瑞芝一本於石上長六七寸光華煥發實屬奇祥得旨朕從來不言祥瑞屢頒諭旨曉示臣民惟是建立

景陵

聖德神功碑甫經勒石告成而瑞芝即產於碑亭之右仰見

上天特賜嘉祥以表揚我

皇考功德之隆盛朕心不勝慶慰○丁未怡親王大學士九卿翰詹科道等遵旨訊問曾靜合詞公奏將曾靜張熙照大逆不道律即行正法

上御乾清宮召入諸臣等並令李紱隨入諭曰今日諸原合詞請誅曾靜張熙伊等大逆不

道實從古史冊所未有以情罪論之萬無可赦但朕之不行誅戮者實有隱衷上年曾靜之徒張熙詭名投書與岳鍾琪岳鍾琪倉猝之間忍怒驚惶不及籌算即邀巡撫西琳臬司碩色坐於密室將張熙嚴加根究問其指使之人張熙不肯供出真實姓名旋即加以刑訊而張熙甘死不吐岳鍾琪無可如何越二三日百計曲誘許以同謀迎聘伊師與之盟神設誓張熙始將姓名一一供出彼時岳鍾琪具奏前來朕披覽之下爲之動容岳鍾琪誠心爲國家發姦摘伏假若朕身曾與人盟神設誓則今日亦不得不委曲以期無負前言朕洞鑒岳鍾琪之心若不視爲一體實所不忍況曾靜等僻處鄉村爲流言所惑其捏造謗言之人實係阿其那塞思黑門下之兇徒太監等因犯罪發遣廣西心懷怨忿造作惡語一路流傳今已得其確據若非因曾靜之事則謠言流布朕何由聞知爲之明白

剖晰俾家喻而戶曉耶且從來國家之法原以懲一儆百如曾靜等之悖逆諒宇宙內斷無第二人即後世亦可斷其必無有與之比者何必存懲一儆百之見可以寬宥其罪竝非博寬大之名而廢法也一切朕另有諭旨又諭前謝濟世在阿爾泰軍前供出昔年參奏田文鏡實出於李紱蔡珽之授意朕令刑部訊問李紱蔡珽今刑部將口供呈覽其語仍復含糊希圖掩飾是以令爾等帶李紱進見將蔡珽李紱始末宣示爾等知之朕在藩邸懶於交接人所共知竝不知蔡珽李紱之姓名因馬爾齊哈通曉醫理常在府中行走後補授清江理事同知朕問明於醫理之人馬爾齊哈舉蔡珽以對朕因令其來見而蔡珽辭以職居學士不便往來王府且醫理粗淺不能自信朕聞其言深爲嘉許後年羹堯來京力稱蔡珽塞爾圖二人才守識見實超羣類朕告以招之未來之故年羹堯因見

蔡珽面言而蔡珽仍堅辭如前朕是以更器重之次年蔡珽補授四川巡撫時朕扈從避暑熱河蔡珽以身屬外官遠行在即向年熙轉求欲到朕園中一見朕相見時蔡珽則極稱李紱才品操守爲滿漢中所少是時朕方知李紱之姓名也朕御極之初延訪人才以資治理因起復李紱原官旋授侍郎又命辦理漕務旋授爲廣西巡撫伊具摺密奏黃國材收捐積弊且稱黃國材廣通聲氣其子弟親戚布滿朝列今臣盡發其私必謀傾害朕諭以爾但公忠爲國朕必加恩保護豈料伊在朕前如此陳奏而暗中則爲黃國材事事周全其巧於欺妄如此至署理直隸總督徇私廢公沽名邀譽倉穀虧空則代爲隱免屬吏貪庸則曲爲庇護以致吏治廢弛人心玩愒又如塞思黑從西大通調回朕令暫住保定俟各省督撫提鎮回奏到日再降諭旨未幾李紱奏稱塞思黑患病不數日奏報病故

而姦邪黨與及庸愚無知之人遂有朕授意於李紱而戕害塞思黑之誣語今李紱在此試問朕曾有示意之處否乎在塞思黑之罪原無可赦之理其從前之所以將伊暫留保定者蓋因阿其那允禔俱在京師其事未冒定案而邪黨衆多人心叵測不得不留意防範豈料伊遂伏冥誅而李紱並不將塞思黑自伏冥誅之處明白於衆以致啟匪黨之疑議則李紱能辭其過乎至田文鏡之在河南

公忠爲國而李紱蔡珽以其叅劾黃振國汪誠等遂極力陷害朋比爲姦指使謝濟世捏款誣叅欲令言臣挾制朕躬必遂其私怨而後已此風何可長也李紱蔡珽著交刑部訊取確供僮再支吾掩飾即加刑訊吏部議覆雲貴廣西總督鄂爾泰疏言貴州長壩地方瘴癘難居兵丁多致病亡請將文武衙署營房移建珉球仍於長壩設百總一名兵丁三十名按季更番防守今珉球遊擊不時巡

察應如所請從之○添設八旗都統衙門左右二司每旗於叅領副叅領內揀選二員引見補授掌管關防從正紅旗滿洲副都統宗室鄂齊請也○己酉諭莊親王允祿等騎射乃兵丁最緊要技藝八旗大臣與章京等皆係率領兵丁出師行圍之人理應親率各官操演騎射嗣後遇平常較射之日俱著學習騎射若年逾五十五歲者聽之將朕此旨徧行曉諭○吏部議覆四川巡撫憲德疏言川省州縣先因地廣人稀政事簡少將雙流等縣裁併今生聚日繁應復設縣治照舊分理成都府復設雙流縣崇寧縣彭縣綿州復設彭明縣羅江縣重慶府復設大足縣璧山縣定遠縣夔州府復設大寧縣新寧縣潼川州復設安岳縣眉州復設彭山縣青神縣嘉定州復設威寧縣各設知縣一員典史一員其羅江驛驛丞應請裁汰驛務歸併知縣管理至各縣教職俱設訓導一員以司學校均應

如所請從之○庚戌諭內閣大學士尚書侍郎都御史副都御史各大員有子孫在京闈及本省鄉試未經中式年二十以上者著各舉文理通順可以取中者一人開送內閣請旨尋開列大學士蔣廷錫子蔣溥吏部尚書嵇曾筠子嵇璜都御史唐執玉子唐少游吏部左侍郎史貽直子史奕簪戶部右侍郎王廷揚子王鏐禮部左侍郎錢以埏子錢鏊禮部左侍郎鄂爾奇子鄂倫兵部左侍郎楊汝穀子楊綏刑部左侍郎繆沅子繆標工部右侍郎張大有子張鴻運侍郎署理倉場事務涂天相子涂士炳副都御史謝王寵子謝升等具奏得旨俱賜舉人戶部侍郎劉聲芳子劉俊邦因病未應鄉試亦賜舉人准一體會試○諭翰詹科道等自古朋黨之患必至害於而家凶於而國而已身亦竝受其毒爾等多由科目出身讀書明理當以此爲切戒務爲端人爲正士爲國家倚賴之大臣不可誤

入於小人之途。蓋小人有小人之器局。識見小才氣亦小。恃其小忠。執其小信。行其小惠。縱有微長。適成其爲小人而已。大人有大人之器局。識見大才氣大。大忠大義。大仁大智。凡所作爲。皆有關於國計民生。此等大人。實能公忠體國。竝無沽名邀譽之心。而名譽自至。是以爲臣子者。凡事爲國起見。所成自大。若爲一身起見。則所成必小。甚至卑污苟且。夤緣請託。瞻徇情面。黨同伐異。流弊不可勝言。朕在藩邸四十餘年。於人情世態。無不洞悉。此等陋習。實所痛惡。朕於

聖祖仁皇帝前。從無揣度意旨。探聽信息。及邀名沽譽之事。朕兄弟輩。則多蹈此轍。朕惟以禮處事。和而不流。一生心迹。仰邀

皇考聖明洞鑒。可見天下之結黨營私者。徒自壞其心術品行耳。欲求纖毫之利益。不可得也。即如康五瑞。本欲袒護李紱。而究不能掩其惡。李紱蔡璵。本欲傾害田文鏡。而適以自

害其身。豈不可爲衆人之炯戒哉。夫人才力各有不同。在朕之用人。實係因材器使。爾等安分循理。各盡職業。自然識見日開。閱歷日進。今日之小臣。即他日大臣之器。何必存躁妄之心。以自限也。至於閉門謝客。以示孤介。亦矯情之舉。如在京之大臣。外省之督撫。平日果不見一人。不聞一語。又何以周知人之賢否。事之利弊。爾等新進小臣。亦不必以師生同年往來相接爲諱。但當和衷共濟。勸勉箴規。以道義相砥礪。此則君子之朋。朕所望於爾等者也。蓋

天地神明之所佑者。誠。所惡者。僞。果能去僞存誠。於處心積慮之間。爲朝廷爲國家爲社稷爲蒼生。此即爾等所以自爲其身家。不但己身榮顯。子孫亦必受其福矣。爾等將朕諭旨。時時體認。清夜自思。躬行實踐。朕言自必有驗。勉之勉之。○解廣東按察使樓儼任。以廣東鹽運使黃文燁署廣東按察使。司按察使

直隸馬蘭口總兵官特恒緣事革職擢福建提標遊擊傅爲宿爲直隸馬蘭口總兵官○移雲南永善縣典史駐烏蒙井底汛從雲南巡撫沈廷正請也○辛亥琉球國中山王尚敬遣陪臣毛鴻基等表謝賜敕書蟒緞玉器恩并貢方物得旨琉球地處重洋之外奉表修貢遠涉風濤朕心深爲軫念是以從前降旨令將雍正四年該國王謝恩所貢儀物准作雍正六年正貢以示恩眷今該國王以六年正貢之期仍遵定制遣使航海遠來奉表進貢情詞懇切具見悃忱著將六年進貢之物准作八年正貢若八年貢物已經遣使起程即准作十年正貢著行文該國王知之議敘四川官兵勦撫歸德番族軍功原任京城北營叅將宋可進等各陞銜加級紀錄有差兵丁等賞賚賜卹如例○壬子兩江總督范時繹奏原任戶部郎中王圖煒縱容家人張象九夾帶私鹽王圖煒及草率審詳

之道府知縣等均應交部察議得旨凡督撫大臣之考察屬官惟公正無偏賞當其功罰當其過則屬吏知感知畏相率而奉其訓導遵其約束苟賞罰不當不但過於寬縱屬員生玩愒之心即過於嚴厲屬員亦起藐忽之念蓋以其賞罰不足憑而寬嚴無定準也朕思王圖煒係世宦之家奴僕衆多豈能保其無一生事爲非者儻王圖煒平日或係知情或事發之後將家人縱放藏匿不令質訊則當竝治其罪今張象九於未事之先王圖煒早已責逐有案可據而范時繹乃稱刑訊之後改供是明係小人畏刑三木之下勉強承認未可爲信讞况即照張象九所改之供在王圖煒亦無通同作弊之處何至將王圖煒及審詳各官一併叅奏范時繹之察吏如此何以使屬員畏威而懷德奉令而承教乎王圖煒及審詳之道府知縣等官俱不必交議○癸丑以直隸固關叅將傅爲斗署理河南

河北總兵官印務○甲寅以兵部右侍郎胡煦爲順天武鄉試正考官太僕寺少卿魯國華爲副考官○陝西西安左翼滿洲副都統尼馬善緣事降調陞直隸保定城守尉陸實爲陝西西安左翼滿洲副都統○命西安將軍常色禮移駐涼州以署川陝總督查郎阿兼理西安將軍印務○八旗王大臣等議覆署副都統叅領阿魯條奏八旗漢軍餘丁已立義學教訓其滿洲蒙古旗分亦請設立學舍於每旗前鋒護軍領催馬甲內擇二人爲師長除大臣官員子弟情願入官學義學讀漢書及在家學習外佐領下十二歲以上餘丁俱令教訓清文清語其蒙古旗分並教以蒙古語每甲喇派出或章京或驍騎校一員令其教導騎射該旗大臣叅領等不時稽察每年考試一次分別勤惰以示勸懲應如所請從之○寧遠大將軍岳鍾琪摺奏噶爾丹策零使臣特磊於十月初五日。前至陶賴大

坂斥候臣隨派理藩院員外黑色前往於初六日將來使特磊等十一人帶至巴爾庫爾軍營據特磊云原解送羅卜藏丹津前來行至伊爾布爾和邵地方遇逃回蒙古三人稱總督今帶兵二萬從哈密一路前來是以請示噶爾丹策零將羅卜藏丹津仍回伊里輕騎減從齋摺前來等語臣以特磊之言實難憑信撥叅將劉廷琰等將特磊伴送至肅州加謹防範得旨著劉廷琰伴送特磊赴京○

乙卯雲貴廣西總督鄂爾泰題廣西慶遠府忻城土知縣莫振國故請以其子莫景隆承襲下部知之○丙辰革喀爾喀扎薩克多羅郡王達瑪林多爾濟爵以其違誤採買軍需駝隻也○丁巳正黃旗蒙古副都統明白緣事革職陞

福陵總管王常爲正黃旗蒙古副都統署正黃旗護軍統領花色爲正紅旗蒙古副都統仍署護軍統領○設立五城鋪司巡檢各一員

○戊午。加戶部郎中潘允敏翰林院編修銜。提督陝西學政。○添設熱河迤東八溝地方通判一員。巡檢一員。從署直隸古北口提督魏經國請也。○己未。諭禮部。朝鮮國王世篤恭順。虔修職貢。昔蒙

世祖章皇帝軫念藩封。特頒

敕諭。所有應進

聖壽冬至元旦表儀。俱准於元旦併貢。以彰柔遠之至意。近見該國王於領受賞賚等事。皆

特遣使臣齎表奏謝。朕念該國距京三千餘里。貢使往來未免勞費。嗣後凡屬謝恩本章。俱著與三大節表一同齎奏。不必特遣使臣。永著爲例。該部即行文該國王知之。○又諭雲貴廣西總督鄂爾泰。忠誠體國。經理苗疆。勲績懋著。伊曾祖圖們。於開國時奮勇陷陣。効命疆場。忠節炳然。垂光行慶。積於其孫。鄂爾泰爲不世出之良臣。祖孫忠良。後先輝映。朕甚嘉焉。今鄂爾泰奏稱曾祖圖們與祀昭

忠寺。牌位列銜佐領。請將苗疆議敘之案。移賞曾祖。祖父誥封等語。著將鄂爾泰之曾祖祖父俱照總督加內大臣兵部尚書職銜。給與一品誥封。其昭忠寺牌位改書新贈之銜。入於大臣之列。鄂爾泰苗疆之案。仍著議敘。○庚申。諭理藩院。紫禁城內蒙古王等著照在京王例騎馬。貝勒貝子公等年六十五歲以上者亦著騎馬。○添設刑部左右現審司滿漢郎中員外主事十二員。筆帖式十員。專理現審事件。從刑部額外侍郎牧可登請也。○辛酉。諭內閣。外省地方常有緊要事件。及查拏要犯之處。間令王大臣等密寄信與該督撫。此乃慎重機宜。俾地方大臣易於辦理之意。該督撫接到密札。自應加意慎密。其有應行文於所屬及轉行鄰省者。或仍用密札。加以印信。或密行文書。謹密知會。若有應遣人者。則遣的當人前往。於事務方有裨益。屢降諭旨。甚明。近聞外間接到密札。竟用文書。

照抄轉行所屬。其移會鄰省者亦然。全無慎重防範之意。伊等既爲督撫大臣。豈有見不及此之理。嗣後儻有將密旨寄信之事。顯然通行文書者。經朕聞知。定行從重議處。○又諭雲貴廣西總督鄂爾泰。以雲南趙州白崖地方。平地忽湧甘泉。二股相湊。內外臣工。皆以滇省醴泉歸美於朕。朕實不居也。夫君臣上下。本爲一體。設人君有乂安百姓之心。而其臣不能宣布德意。以成善治。或上官有撫字羣黎之念。而其民不能感化。以成善俗。皆不足召

天和而徵瑞應也。鄂爾泰以公忠之心。行撫綏之政。至誠所感。能使吏服其教。民懷其惠。所屬之境。康阜恬熙。而滇省官民。又實能率從鄂爾泰之訓導。風移俗易。和氣致祥。是以數年之中。疊見慶雲醴泉之瑞。此蓋

上天恩賜。以表著賢臣之善績也。昔張堪之麥秀兩岐。魯恭之蝗不入境。彼郡邑守令。有循

良之化。尚足感召嘉祥。况節制三省。化民成俗者乎。又如范仲淹之治青州。廣施惠政。溪澤忽湧醴泉。此皆載在典籍。信而有徵者。非朕褒揚鄂爾泰爲創見之論也。凡督撫大臣。加惠一方。以致感格

天心。賜以上瑞。此皆督撫之力。朕不敢以爲功。而任用之得人與否。則朕之責也。諸臣將慶雲醴泉之瑞。歸功於朕。實於朕無涉。若謂朕能推心置腹。以信用鄂爾泰。使得盡展才猷。悉心教養。以成風俗之美。受

上天之恩。此則朕所不辭者。○授貝子弘春妹爲縣主。塔德壽爲多羅額駙。○工部議覆倉場侍郎岳爾岱疏言。北新海運南新舊太富新興平。祿米等七倉。應建堆房三十三處。給原設倉倉官兵居住。其太平萬安二倉。應建堆房八處。至原設倉倉章京兵丁。應酌留章京八員。兵丁八十八名。餘俱撤回。其城上原設倉倉官兵。已有着城官兵。可令巡邏。亦應

撤回俱應如所請從之。設立八旗前鋒統領護軍統領等公署從署護軍統領花色請也。○壬戌諭內閣科場乃國家取士大典關係甚重數科以來鄉會試主考同考皆凜遵功令屏除弊端輿論毫無異議朕亦屢加獎許然又恐其久而生玩故習復萌未嘗不隨時訓誨儆戒提撕也今年順天鄉試榜發後有人密奏闈中有頂替夾帶等弊朕令諸生自行出首今果有自首頂名者一人夾帶者四人此則外簾疎忽之咎已降旨將稽察官員嚴加處分又密奏今年場前有房考一二入與士子往來者夫以科場久已肅清之時不應尚萌暗通聲氣之想凡科甲出身之官員自知有衡文之分便當遠避嫌疑杜絕干謁何至以交遊形跡啟人議論之端況士子應試之先預懷鑽營倖進之念此即行止不端之人一旦忝竊科名豈能成有用之材為國家分猷宣力乎為房考者又何為收羅此

等儉邪之輩豈但不能得其相助之益且必至敗己身之聲名干朝廷之憲典亦愚甚矣今歲外間雖有浮言却無實據姑免深問來春會場在即各省舉子雲集京師凡在京官員有考官之責者各宜預先儆惕戒慎小心防微杜漸勿以小不檢點被人指摘致貽科甲之羞況國法具在朕不能曲為寬假也思之慎之。○甲子諭內閣朕夙夜孜孜以吏治民風為念惟蘇松所屬糧賦浩繁民欠累積官吏借此侵漁姦徒肆其包攬若不徹底清查則吏治難以整肅民風無由淳厚是以特命大臣總理清查之事又遴選大員分查州縣協理令將官侵吏蝕民欠三項明晰清釐不得絲毫朦混又屢次降旨將蘇松等七府太倉等五州歷年帶徵地丁漕項錢糧一概暫停徵比俟釐剔清楚之後再降諭旨并令該督撫遍行出示曉諭是朕於清查一案已申示再四可謂明白詳備矣乃承命之員奉

行不善其始以爲官侵無幾遂將紳衿所欠帶徵之項指爲官侵以致姦胥蠹吏借端挾詐如松江候選州同朱榮椿者積欠錢糧九百餘兩而爲蠹書記詐亦至九百餘兩此其明驗也又聞不肖州縣有以里圖櫃書侵蝕之項將來難於歸著議令官戶富戶分派攤賠者又有將帶徵錢糧加增火耗以補官虧者其說雖未足盡信然人言籍籍總理其事者寧未聞之耶此皆由於承命之員不能深體朕心而以徵比爲清查之誤也設朕欲藉此爲催徵錢糧之計從前又何以降旨停徵乎其有自願完納仍令地方官收受者緣浙江總督李衛來京陛見時奏稱江南舊欠錢糧自奉諭停徵之後凡有願完者州縣官恐涉先侵後吐之嫌概不收受於民情頗有未便等語朕以民間凡有隱匿錢糧尚准其自首豈有願完舊欠而不准其輸納之理是以諭令戶部行文該總理清查大員知之乃不

意奉行者遂借此爲由將停徵之項概行催徵名曰勸輸差役追呼甚於嚴比近見各員所奏有稱已完一百餘萬者有稱旬餘之內州縣完三萬餘兩者而溫而遜奏云此番清查首在勸其完納不徒在於造冊又聞朱鴻緒告人云鎮江一府舊欠二年內必令其全完是各員俱以完納錢糧爲重而以清查官侵吏蝕民欠置之度外矣與朕旨不大相逕庭乎著將未完積欠概行停徵其中或有官吏侵蝕今自首完納贖罪者聽其交庫外其餘民欠即有情願交納者亦不准收受該總理之員務令分查協理各員恪遵前旨將官侵吏蝕民欠分別清釐無得絲毫朦混儻仍有私行徵納及將民欠內之官戶富戶掩蓋官吏侵蝕者該督撫及總理大臣即行指叅從重治罪儻隱徇不舉或失於覺察經朕訪聞定將該督撫等一併交部嚴加議處又聞分查之員令各欠戶自行首報夫前旨之准

令自首者乃侵蝕錢糧之官吏此等侵蝕之人本有應得之罪朕不忍其盡罹國典是以令其據實自首則從寬免其治罪至於歷年積欠前已分年帶徵今又一概停徵伊等又有何罪而令其自首乎總之各員不知朕澄清吏治惠養小民之心而惟以錢糧爲重朝廷之德意不能宣究於下司其事者寧無愧乎諭到著督撫布政使即刊刻頒發所屬凡遠鄉僻壤悉行張掛使官吏紳衿軍民人等咸知朕意○吏部議覆給事中奚德慎條奏八旗文移稿案向由管檔領催繕寫伊等多係兵丁出身於滿漢文理不能通曉不無草率舛錯之處請嗣後八旗監生員官學生內有通曉滿漢文理情願在叅領處効力行走者令該都統等按旗揀選滿洲每叅領下酌派二員蒙古漢軍每叅領下酌派一員授爲貼寫筆帖式辦理一切檔案事件五年期滿該旗咨送吏部考試繙譯取中後以部院

衙門筆帖式補用應如所請從之○乙丑諭內閣記載之失實人多忽而不知覺察朕侍皇考聖祖仁皇帝數十年時時祇聆聖訓今觀臣工記載者舛錯疎漏之處甚多朕嗣統以來元年二年內閣面奉之旨書寫時動輒訛舛自張廷玉爲大學士聽朕諭旨悉能記憶繕錄呈覽與朕言相符蓋記載一事良非易易毫釐千里之差不可不慎是以諸臣欲記朕諭者朕皆令繕寫進呈之後方許存稿恐其失實以傳訛也朕因科甲積習有關世道人心屢進翰詹科道諸臣而面諭之旋令翰詹等百餘員記錄所聞繕摺以進朕一一披覽則人人各殊有與諭旨全不相符者有數語偶合而記憶不全者又有詞句鄙俚意義蒙晦者以一日同奉之諭旨而至於百其人者百其說不亦舛謬之甚乎其中若有能文之士私自存錄傳流於後遂以爲朕當日之訓旨固然也其貽誤不淺矣朕觀前

史所載未可全信。每滋後人之口實。如漢文帝見賈誼。問以鬼神。至夜半前席一事。李商隱則爲詩譏之曰。可憐夜半虛前席。不問蒼生問鬼神。夫賈誼入見時。文帝方受釐坐宣室。因感鬼神之事而問之。此固非問蒼生時也。如欲問蒼生之事。隨時可以召對。又何必夜半哉。至於坐久前席。亦尋常事耳。且文帝漢之賢主也。恭儉仁厚。移風易俗。閱歷世務深矣。視賈誼之疎狂少年。才識相去。何啻什伯。蓋知其不足與問蒼生。故姑問鬼神耳。賈誼經濟。具見治安策中。不獨論當世之務。迂濶難行。其於堯舜之治道。亦未窺見本原也。賈誼之策。僅託諸空言。文帝之功。已見諸實事。文帝豈棄才之主哉。而王勃又謂屈賈誼於長沙。非無聖主。竄梁鴻於海曲。豈乏明時。朕以爲屈賈誼於長沙。必須聖主。竄梁鴻於海曲。正待明時。鴻之詭激。自棄於肅宗之朝。誼之狂疎。未足以佐文帝之治安。得以是爲

二君譏議哉。孔子嘗言爲君難。即此可見。設有一夫私議。妄自記載。非惟庸主無由剖析。雖明哲之君。亦何從聞見。而正其是非。其流傳失實。受誣於後世者。不知凡幾矣。孟子曰。盡信書。則不如無書。誠以記載未可盡憑。而欲杜好議論者之口也。人情厭常喜新。裨官野乘好事者。流無端撰成一說。娓娓動聽。按之皆子虛烏有。此其荒唐誕幻。無足論者。若夫記言記事。國之大典。將以徵信後世。烏可或忽。今乃新承提命。而記錄多舛。尚足當載筆續言之任。而無忝乎用是薈萃翰詹諸臣。奏摺細加揀汰。其與朕之諭旨間有符合者。採摭聯綴。融會成篇。付諸剞劂。人賜一帙。俾各朝夕觀省。是訓是行。以祛科甲之積習。并知記載失實之非。庶乎憬然惕然。歷久而勿忘也。夫○諭科甲出身官員等。國家設科取士。原欲得讀書明理之人。列於庶位。俾皆公忠體國。實心任事。於國計民生。均有裨益。此

科甲之所以可重也。乃科甲出身之人不思秉公持正以報國恩。相率而趨於植黨營私之習。夤緣請託。朋比袒護。以至顛倒是非。排陷報復。無所不爲。風俗人心之害。莫過於此。朕御極以來。多有人論科甲中人不可信。朕於爾等科甲諸臣。推心置腹。期待甚厚。以爲用人者。若捨爾等讀書之人。則將以何等人爲可用。然使爾等積習相沿。惟以黨護師生同年爲事。夤緣朋比。貽害於人心風俗。將使爲君上者。雖欲用科甲之人。而有所不可。則科甲諸臣。抑何自暴自棄。貽笑於天下。以至此也。朕早夜孜孜。欲使萬民各得其所。措天下於久安長治。何事不加整頓釐飭。務令秩然就理。豈容爾等科甲中黨援積習。爲世道生民之害。而不望其翕然丕變乎。夫以科甲流品相誇尚。其風自唐宋以來。即有之。至前明而流弊已極。不知讀聖賢之書。惟以致君澤民爲貴。不在科甲之名也。古之臯夔稷契。

誰爲科目乎。科目中人。遇不從科目出身者。即鄙薄而非笑之。不知彼之非笑科目者。更甚。此如江浙人譏山陝爲粗魯。山陝人亦謂江浙爲懦弱。何關人品之輕重乎。國家用人行政。惟貴至公。有人因科目而營私黨護。即有非科目之人。偏受其害。如黜陟之際。不肖者或以科目之黨援而陞擢。必有賢才因而屈抑矣。賞罰之間。有罪者或以科目之黨援而幸免。必有無辜因而冤濫矣。科甲之習。一日不革。則天下之公理。一日不著。爾等當豁然醒悟。庶可使歷代相沿之弊習。廓然頓除也。且爾等亦思朕之不惜煩勞。諄諄誥誡。必欲爾等覺悟改易者。豈惟上爲國而下爲民乎。蓋以爾等品行之邪正。於此分。爾等名節之成敗。於此判。而爾等切身之利害。更即於此而辨。若使請託公行。毫無顧忌。則地方官員皆得任意作姦戕虐百姓。惟其害者非爾之至親族屬。即爾之鄉黨鄰里。爾亦何所利。

馬況爾等以黨援袒護爲利者不過圖一時門庭之烜赫而已獨不思身後子孫能必其世世常爲科甲乎一朝失勢則爾等子孫不即轉受科目之欺凌傾陷乎目前之利甚小日後之患害甚大朕爲爾等計之熟矣爾等乃不自猛省乎朕非禁絕爾等師生之分誼欲其不相往來也誠使師生同年平時互相規勸勗以道義勵以公忠各爲國家分猷宣力雖日相親近奚害焉且爾等素以師生之誼情同父子則爲父兄者自當教子弟以正豈可使之夤緣請託而不知恥乎爲子弟者自當事父兄以禮豈可與之夤緣請託而不知非乎從來請託營求甚屬無益如州縣選得地方有求部院大臣作書囑託上司者在公正大臣自必不應設或應其所請而致書彼督撫大吏遂肯徇情曲庇乎徒使其人恃有與援之請託遂至放佚怠惰不自檢束以極於貪污狼藉難免督撫之叅劾彼請託者

能挽救之乎不如無所請託其有才有守者不患無以自見即中材之人亦以習無倚仗皆警勉砥礪不敢爲非而得以自全然則科目中人爲其子弟親屬鑽營請託者亦愚之至矣朕之訓誨開導至再至三亦似爲從古君臣之際所最罕得之遭逢爾等皆讀書明理之人果能深體朕懷服膺朕訓幡然洗心滌慮盡改其積習有何不能辦理之事百僚師師和衷共濟何患政治不臻上理乎且人無不可改之過亦無不可化之氣質孔子云雖愚必明雖柔必強惟在其人自勵耳爾等聽朕訓旨不但貴於心悅誠服要在身體力行不可一時面從過後輒忘須時時警惕常若在朕前親受提撕方不虛朕諄切訓誨之至意也爾等翰林自以文章爲職業但須爲經世之文華國之文一切風雲月露之詞何所用之若既改官則各有當盡之政務人之心思才力難以兼營不可自負文人荒其職

守蓋文章政治理本相通事無旁貸急所當務方爲盡職至於賦詩飲酒自附於晉人風流此種惡習所當深戒而痛絕者也翰林科道乃國家所賴以轉移風化之人朕所以屬望爾等者甚爲切至朕觀初次訓誨時爾等領會者數十人中數人而已二三次覺領會者過半今則不能領會者大約不過四五人誠知朕所以再三訓諭不惜煩勞者實爲國計民生之休戚實爲人心風俗之安危實爲爾等身家子孫之利害爾等各有天良自應人人覺悟感奮翕然丕變盡去其黨援朋比之積習爲朝廷殫竭忠誠秉公持正辦理庶務將見君臣上下一德一心治道自此而日隆世風自此而日厚我國家億萬年長享昇平爾等子孫亦世蒙其福如此而謂科目之取士固足重也豈不美歟爾等共勉之○朝鮮國王李昫遣陪臣李增等齎表恭謝加賞及賜祭恩並貢方物下部知之○丁卯吏部

議覆監察御史劉吳龍條奏吏部稽俸廳所管事件向令各司帶管實無專責查吏部四司惟稽勲驗封二司事務稍簡請將稽俸廳歸併稽勲司管理至八旗承襲事件向例由吏部滿司官按旗辦理儻該員或奉差委勢必久需時日請歸驗封司辦理應如所請從之○戊辰諭內閣數年以來怡親王及內外大臣中數人協贊朕躬忠誠宣猷爲國家辦理政務勤慎奉職甚屬可嘉怡親王之儀仗著增一倍大學士張廷玉著加少保大學士蔣廷錫加太子太傅刑部尚書勵廷儀加太子少傅靖邊大將軍公傅爾丹寧遠大將軍公岳鍾琪雲貴廣西總督鄂爾泰俱加少保河東總督田文鏡加太子太保浙江總督李衛吏部尚書查郎阿寧夏將軍席伯俱加太子少保○禮部議覆監察御史高山條奏直省鄉試各房分經校卷之時其佳卷多者應盡數呈薦不得以本房額滿屈抑英才其實

無佳卷者不得濫取充額主考官統閱通場之卷拔其尤者分經取中後將呈薦佳卷多者分給少者之房會試亦照此例應如所請從之己巳諭理藩院嗣後每歲換班來京之王貝勒貝子公台吉等俱令按班行走萬壽令節不必來京其喀喇沁土默特離此甚近往來行走之處令其自便○庚午。

萬壽節停止朝賀筵宴○遣官祭

福陵

昭陵

昭西陵

孝陵

孝東陵

景陵○遣官祭真武東嶽城隍之神

大清世宗敬天昌運建中表正文武英明寬仁信毅大孝至誠憲皇帝實錄卷之八十七

大清世宗敬天昌運建中表正文武英明寬仁
信毅大孝至誠憲皇帝實錄卷之八十八

監修總裁官光祿大夫經筵講官太僕議政大臣保和殿大學士兼兵部尚書總理兵部事務三等伯加十五級臣鄂爾泰

總裁官光祿大夫經筵日講官起居注太僕兼太子太僕保和殿大學士兼戶部尚書仍兼管文部事務翰林院掌院

事三等伯加十三級臣張廷玉光祿大夫經筵日講官起居注太僕議政大臣武英殿大學士兼工部尚書仍兼管

翰林院掌院事務加二級臣福敏光祿大夫經筵講官太子太保東閣大學士兼禮部尚書加六級臣徐本光祿大夫

經筵講官議政大臣協辦內閣大學士事務禮部尚書仍兼管太常寺鴻臚寺事務臣三泰等奉

敕修

雍正七年己酉十一月辛未朔○癸酉冬至

實錄卷八十八

一

祀

天於

圜丘

上親詣行禮○遣官祭

永陵

福陵

昭陵

昭西陵

孝陵

孝東陵

景陵○諭滿漢文武大臣今日冬至祀

天於

圜丘天氣清明和藹迥異平時朕御極以來時
時默禱凡遇

壇

廟祭祀典禮所關皆求

上天賜以晴和天氣而齋戒之日朕必虔誠敬
謹以爲昭格之本不敢絲毫怠忽乃數年之

實錄卷八十八

一

中蒙

上天鑒察朕心每逢祭祀典禮或先期風雨或
過後陰寒而本日行禮之時必晴霽暄和此
萬耳萬目所觀瞻歷歷不爽者天道至公惟
佑善人一念善天錫之福一念不善天降之
災且天道至近時刻照臨於前後左右帝王
有帝王之天臣工有臣工之天即匹夫匹婦
亦有匹夫匹婦之天舉首即是動念即是不
以貴賤殊亦無須臾離也善惡之報全視乎

其人之自取。即如播種者。種稷生稷。種黍生黍。又如擊器者。擊金則爲金聲。擊石則爲石聲。此一定之理。無可疑者。然其善惡之分。又必視乎其心之公私。所謂私者。不但徇情枉法。婪贓受賄。然後謂之私。有沽名邀譽之念。亦是私。有計較利害之念。亦是私。有迎合君上之念。亦是私。必將毀譽得失。全不計及。只一念順理而行。以俟天命。此乃所謂誠也。然必敬而後能誠。古之聖賢。以主敬爲本。惟其主敬。是以念茲在茲。不愧屋漏。無慚衾影。處處可以對天。則不善之念。何自而萌乎。既無不善之念。則是一身之中。方寸之內。有獲福之基。無招禍之理。焉有不荷神明之默佑。而順適暢遂者乎。爾諸臣試遵朕言而行。自然覺悟。自有效驗也。總之爲君爲臣之道。只有敬天勤民二端。而用人行政。即在敬天勤民之內。爾等每當頒祿受賞之際。咸感激朕恩。不知朕之所以自奉與逮及大小臣工者。皆

百姓之脂膏也。君若臣共受百姓之奉養。而於教民養民之道。漠不關心。聽其失所。清夜捫心。何以自安。尚云可以對

天地而無慚乎。吾君臣當共勉之。○停止次日。朝賀。○陞浙江按察使方覲爲陝西西安布政使。司布政使調江南安徽按察使劉枬爲浙江按察使。司按察使陞江南江蘇糧道馮景夏爲安徽按察使。司按察使仍留糧道任。管理清查錢糧事務。以太僕寺少卿魯國華暫署江南安徽按察使。司按察使。○甲戌。諭內閣。朕思治河之道。惟有使黃水暢流。無所壅滯。則永慶安瀾。然欲黃水無所壅滯。必須保固高家堰堤工。使清水力能敵黃。且以助其暢流之勢。則河工永遠無慮。從前齊蘇勤雖將石工稍加幫修。而朕以爲不若多費帑金。於堤工險要之所。及單薄之處。俱加修石工。務令堅固高厚。以爲久遠之計。前孔毓珣陞見時。朕以此諭之。伊亦深以爲然。可見高

堰堤工乃必應加增修理者也著發戶部帑銀一百萬兩交與孔毓珣尹繼善籌畫相度有應豫備物料之處即於歲內採買早爲豫備再著汪滢對琳張坦麟吳昌祚前往淮上協同河臣等悉心辦理○貴州巡撫張廣泗進呈黔省瑞穀得旨朕從來不言祥瑞是以從前降旨自雍正五年以後各省所產嘉禾俱停進獻今據貴州巡撫張廣泗奏稱新聞苗疆風雨應時歲登大有所產稻穀粟米之屬自一莖兩穗至十五六穗不等稻穀每穗四五百粒至七百粒之多粟米每穗長至二尺有奇特將瑞穀呈覽竝繪圖附進朕覽各種瑞穀碩大堅好迥異尋常又據廣西巡撫金鉷摺奏粵西通省豐收十分者十之九九分者十之一穀價每石自二錢以至三錢二分乃粵西未有之事朕思古州等處苗蠻界在黔粵之間自古未通聲教其種類互相讎殺草菅人命又常越境擾害鄰近之居民

劫奪往來之商客以致數省通衢行旅阻滯迂道然後得達而內地犯法之匪類又往往逃竄藏匿其中此實地方之患不得不爲經理者今總督鄂爾泰籌畫周至調度有方巡撫張廣泗敬謹奉行殫心奮力地方寧謐和氣致祥感召天和黔粵二省歲登大稔而黔省磽瘠之區苗夷新闢之地又蒙天賜瑞穀顯示嘉徵以表封疆大臣之善績朕心實爲慶幸若歸美於朕朕不居也著將張廣泗所進瑞穀圖交與武英殿繪畫刊刻頒賜各省督撫俾觀覽之共知勉勵○議政王大臣等遵旨議覆噶斯地方爲準噶爾通青海西藏之要口理應撥兵駐守其辦理軍需已奉旨派張廷棟葛森鼐滿岱傅寧等今酌定軍營事宜恭候欽定○派撥官兵京城八旗挑選兵二百名派前鋒叅領護軍叅領前鋒侍衛副護軍叅領護軍校等共二十四員

管領歸化城挑選兵三百名。派叅領佐領護軍校驍騎校等共十員管領。科爾沁等四十三旗挑選兵一千名。派台吉都統副都統叅領佐領驍騎校等管領。青海等三十旗挑選兵一千五百名。派台吉官員等管領。其分別支給跟役口糧馬匹器械賞賚糧餉等項悉照北路大兵之例。一官兵起程日期京城八旗兵明年正月起程歸化城兵三月起程。科爾沁青海等旗兵酌量明年青草發生時沿途游牧前往。一柴旦木至嘉峪關中間應設臺站以便遞送文書。一噶斯地方狹小可駐兵百名餘俱在柴旦木駐牧。柴旦木之西爲得布特里應駐兵六百名。又西爲察罕烏蘇應駐兵四百名。二處皆有水草牧放更覺聲援聯絡矣。從之。○兵部議覆雲貴廣西總督鄂爾泰疏言廣西右江鎮向設左右二營左營遊擊守備同總兵駐劄皈樂右營遊擊駐劄百色右營守備駐劄泗城府治查皈樂形

勢低窪微有煙瘴兼非適中扼要之區百色地方人煙稠密實黔滇之門戶請將右江鎮總兵官及左營遊擊弁兵等移駐百色留左營守備一員把總一員兵一百五十名駐皈樂右營守備亦撤回百色移右營遊擊帶千把總各一員撥原防百色汛兵一百名合泗城舊設兵二百七十八名駐泗城府治均應如所請從之。○乙亥陞山西按察使葛森爲陝西甘肅布政使司布政使辦理噶斯軍需甘肅布政使孔毓璞仍留原任陞巡察山西兵科給事中宋筠爲山西按察使司按察使。○丙子諭內閣前因北路軍需須用駱駝鞍屨諭令山西地方製辦聞該省民人凡有羊毛繩料之家各出所有赴官領價工匠亦一時爭先應募共計二十餘萬件之物料工作不勞而集於月餘之內此皆該省大吏平日善於訓導民人其製辦器物僱募人工又照數給與價值而該省民人又懷尊君親上急

公趨事之心是以備辦軍需羣情歡躍克期告竣甚屬可嘉巡撫石麟布政使蔣洄著文部議敘凡委派辦理之員亦著議敘再將該省辛亥年額徵地丁銀蠲免二十萬兩於辦理鞍屨之各州縣按畝均派使小民共霑實惠以示朕恩獎官民之至意○怡親王允祥奏辭增加儀仗得旨數年以來朕於怡親王有加恩議敘者王多再三奏辭情詞懇切朕勉從所請者有之王忠誠敬慎輔弼朕躬爲國家宣猷効力之處甚多昨朕降旨加恩於內外公勤任事之大臣數人因念王之勲勤較之諸臣爲最若不錫以獎功之典朕心實有未安是以增加儀仗一倍以表觀瞻稍示朕嘉予賢王之意在王領受竝非越等逾分之事已頒諭旨不必固辭○以兵部尚書路振揚爲鑾儀衛鑾儀使陞湖北巡撫署陝西肅州總兵官馬會伯爲兵部尚書仍辦理軍需兼管肅州總兵印務○陞山東布政使費

金吾爲湖北巡撫○丁丑議政王大臣等遵旨議奏京口福州廣州三處漢軍將軍標下設有綠旗官弁原以彈壓地方應援全省今綠旗兵丁僅供使令從不差操又據浙江總督李衛條奏鎮江重地宜添兵防守應請行令京口將軍於左右兩營內撥兵三百二十名歸入鎮江城守營分派巡防其京口福州廣州將軍標下綠旗兵丁俱令照額募補不得私自役使得旨當日各省設立漢軍駐防因人數不敷是以添設綠旗兵丁令該將軍管轄今漢軍生齒日繁駐防之餘丁日漸蕃衍足供差操之用嗣後將軍標下綠旗兵缺出即將漢軍餘丁頂補仍食綠旗糧餉但綠旗兵丁內有祖父食糧年久者其缺既令漢軍頂補則伊等子弟不得食糧未免衣食無資著於本省督撫提鎮標下并同城附近營汛內有開除名糧即將此等之人充補○戶部議覆翰林院編修吳應棻條奏州縣民壯

多寡不一。多者五十名。少者三十名。因各省司道府廳等官。每於州縣壯丁內。派撥爲隨身健丁。以致衝繁之地。不敷差遣。嗣後請將衝要州縣之民壯。停其派撥。其簡僻之處。照舊派撥。應如所請。從之。○改江南漕標徐州營副將一員。守備二員。千總二員。把總四員。兼轄蕭營守備一員。把總一員。兵一千名。宿遷營遊擊一員。守備一員。千總二員。把總四員。兵六百九十三名。歸江南河標管轄。從署江南河道總督尹繼善請也。○盛京刑部侍郎兼署奉天府府尹王朝恩疏報遼陽海城等八州縣。開墾雍正六年分田地二百五十頃有奇。下部知之。○戊寅諭內閣。從來開國之初。必有從龍之佐。或闢疆拓土。茂建崇勲。或陷陣衝鋒。捐軀殉節。至於承平之後。伐叛討逆。其抒誠宣力之臣。壯猷忠節。竝足以垂光竹帛。流譽無窮。爲人上者。無不存篤念忠勲之心。於本身厚加贈卹。尤切望其子孫克

紹前徽。永受優待。功臣之澤。爲之子孫者。自當謹守家風。努力奮志。砥礪廉隅。世世爲國家用之材。以繼述先烈。即或貧窶。不能自振。國家自必加以恩澤。周恤其身家。而不至於困苦無依也。乃功臣之後。往往有不肖子孫。自甘敗類。或謀私結黨。欺君誤國。或貪贓壞法。虧空國帑。陷身刑辟。以致發遣遠邊。妻子入辛者庫。在國家之法。雖宗室懿親。亦不能曲爲寬宥。豈能於忠節之子孫。別開寬假之路乎。此等之人。不念先人之心跡。以致深負國恩。非惟不忠。更兼不孝。其祖父有知。亦應深惡而痛絕之。且國家遇此等人。寬之以恩。則法有所不伸。置之於法。則情有所不忍。爲君者實處兩難之地。其人之罪。尚可言乎。然伊等忍於負國。而并忘其先人。朕豈忍不念舊勲。而不推恩及其後裔。上年降旨。令各旗將功臣之子孫內。有犯法問罪。及虧空拖欠者。一一查出具奏。今年各該旗陸續查奏。

前來。朕詳加披覽。斟酌情罪。或其中勲節之後嫡派止此一二人者。如施世驊等。共六十二員。名下應追未完銀共五十四萬六百九十五兩金五百兩。米一千七百二十一石。此各項錢糧。俱係國家公帑。非朕所得私自用。恩豁免者。著將內庫銀兩照數撥補。代為伊等完項。其或擬以充發監候及妻子家屬入辛者庫等罪者。槩行寬釋。凡此邀恩宥貸之人。皆當捫心自愧。刻骨銘肌。并勉其子弟。遷善達辜。毋或仍蹈故轍。儻有過犯。豈能再邀倖免。凡屬忠節之子孫。皆當以此為戒。共加奮勉。儻因此次格外之恩。或生玩法之念。是朕之加恩。不能勸人為善。轉至導人為非矣。豈不重負朕念舊褒忠之至意乎。凡此寬宥人等。儻有貧乏。不能自給者。准其於該都統處具呈。俟該都統奏聞。朕當另加恩恤。以存養之。○裁四川打箭爐沈村二驛。驛丞各一員。其驛務就近歸併雅州府同知。及瀘定橋

巡檢管理。從四川巡撫憲德請也。○己卯諭內閣。管理阿爾泰臺站內大臣克什圖。寧夏將軍席伯俱。係軍前効力。勞績茂著之人。著各賞給拜他喇布勒哈番世職。○戶部等衙門議覆。原任湖南巡撫王國棟疏言。岳州府屬之澧州。距府遼遠。請陞為直隸州。將安鄉石門慈利三縣。并將九谿永定二衛。改為一縣。俱歸澧州管轄。其新設縣治。請於永定衛原駐之裴家河地方。建立衙署。應設知縣典史教諭訓導各一員。縣學取進童生十五名。九谿衛舊治。應設巡檢一員。稽查姦匪。至二衛守備。俱請裁缺。均應如所請。從之。尋定新設縣曰安福。○壬午。衍聖公孔傳鐸奏。請捐貲建立聖廟碑亭。得旨。衍聖公孔傳鐸來京。朕本欲召見。面降諭旨。因伊步履艱難。不能進見。特命大學士傳旨慰問。頒賜食饌。以示眷懷。其應建碑亭二座。著欽差留保等動支正項錢

糧鳩工興造。孔傳鐸所請捐貲之處不必行
○癸未

聖祖仁皇帝忌辰遣官祭

景陵○甲申調福建福州左翼副都統高岫回
京。陞廣東惠州副將鄂鼎爲福建福州左翼
副都統○乙酉諭內閣原任都統馬齊昔年
征勦吳逆時著有勞績伊子常賚在外任居
官尚無貪贓款蹟祇因與石禮哈阿克敦官
達等朋謀排擠楊文乾又在朕前奏事不實

以致罹於重譴今朕念伊父之功將伊免罪
釋放另有降旨錄用之處○定滿漢科道品
級六科給事中俱爲正五品各道御史滿洲
例由員外郎陞授漢軍例由郎中陞授俱爲
正五品漢御史由內閣侍讀翰林院編修檢
討各部郎中員外郎補授者爲正五品由主
事中行評博行取知縣補授者爲正六品○
賜朝鮮國陪臣李增等宴賞賚如例○丙戌
諭內閣私販硝磺禁約甚嚴聞湖廣永順之

耶里等處與川省連界地方素產焰硝土人
以煎熬爲業外省小販多以布鹽雜物零星
換易運至梅樹地方分發而私販者即於此
處僱船裝載分往各處發賣以致附近之苗
人得以偷買私製火藥此皆州縣有司疎忽
怠玩之故著四川湖廣該督撫等轉飭該地
方官嚴行查禁儻有犯者按律治罪若地方
官仍玩忽疎縱著即題參議處○命甘肅布
政使孔毓璞前往甘涼一帶地方就近辦理

軍需○調山東按察使公元來京陞山東鹽
法道唐綏祖爲山東按察使司按察使○丁
亥諭內閣前據靖邊大將軍傅爾丹摺奏統
領北路大兵出口已到阿爾泰駐劄所過沙
磧地方從來無水草之處今歲青草暢茂清
泉湧溢士馬飽騰且冬月天氣和暖晴明衆
心無不歡忭又口外料理臺站之內大臣克
什圖來京所奏相同又據寧遠大將軍岳鍾
琪摺奏統領西路大兵出口已到巴爾庫駐

剗所過沙磧地方。水草並無缺乏。道途坦適。天氣晴和。軍旅歡忭。以爲神助等語。自兩路大兵啓行以來。邊塞長途。深繫朕念。仰蒙神明默佑。士馬安寧。且於沙磧從無水草之區。顯賜靈應。朕心實爲感慶。應於北路西路各建廟宇。虔誠展祀。以答神貺。○移湖北武昌守道。駐黃州府城。安陸府同知。駐沔陽州之黃蓬山。從湖廣總督邁柱請也。○戊子。諭內閣。西路軍需。前經寧遠大將軍岳鍾琪悉心經理。籌畫周詳。一一妥協。今岳鍾琪領兵出口。乃地方巡撫大吏有司之專責。自應竭力遵照辦理。而許容在任。凡事推諉。馬會伯但以潔己爲務。不肯擔荷。查郎阿武格。又係新任。諸凡未諳。上司屬員。彼此猜疑。推卸。明年乃進兵之期。關係最爲緊要。伊等之身家性命。猶其小者耳。應命在京大臣前往稽察督理。方於軍務有益。著兵部尚書查弼納。往陝總理稽查軍需諸務。常德壽常。俱著各給

印信。并令乘驛往來。遇有分辦之處。即分任其事。仍聽查弼納調度。凡關係軍需事件。俱著查弼納等相機派委。該督撫料理。其有應行續辦者。即令地方官動支錢糧。辦理奏聞。若地方官有侵欺擾民者。一面革職拏問。一面奏請審擬。其怠忽遲延者。自督撫以及文武員弁。俱著即行題參。如有指稱軍需名色。擾累民間之棍徒胥役。著即題請正法。○調戶部右侍郎王廷揚爲工部左侍郎。工部左侍郎汪潒爲戶部右侍郎。以太僕寺少卿阿山署戶部左侍郎事。○停止勾決直省秋審情實人犯。其有可矜者。酌議俱減等發落。○旌表直隸鉅鹿縣烈婦史有邦妻譚氏。拒姦不辱。被刃殞命。給銀建坊。入祠致祭。如例。○己丑。以翰林院修撰彭啓豐編修吳應枚俱充日講起居注官。○戶部議覆。原任戶部侍郎王璣條奏山西蒲州府屬分縣治河增兵事宜三款。一。臨晉縣之虞鄉鎮。請分設縣治。

增置知縣典史巡檢各一員其臨晉縣現設教諭訓導各一員額取童生二十名請將訓導一員撥管新縣儒學事務童生各分取十名一涑水一河經臨晉縣之東界猗氏縣之西界地處窪下時有侵溢請於東西兩岸各建水門木閘二座以時啓閉一蒲州府城內請添設千總一員兵一百六十七名該府之永樂鎮添外委把總一員兵十名臨晉縣城內添兵十名該縣之角杯村添把總一員兵二十名其虞鄉鎮新設縣治添外委把總一員兵十名均應如所請從之尋定新設縣曰虞鄉○以故杜爾伯特扎薩克固山貝子巴圖子班珠爾襲爵○庚寅陞正藍旗護軍叅領莫爾渾爲

福陵總管○刑部議覆尚書德明條奏律內向無竊盜誣良治罪之條故兇惡之徒肆行被害嗣後竊盜有將良民詐陷或指稱窩贓妄行扳害者應加等比依三犯竊盜分別贓數

多寡治罪如地方官故行徇縱照失察誣良例誣扳致死者革職未經致死者降四級調用再強盜扳害良民較之竊賊誣扳被害尤甚請嗣後除首盜殺人及傷人夥盜并行劫三次者俱例應正法無庸加等外其未傷人之夥盜有誣扳良民者加等照夥盜傷人例擬斬立決均應如所請從之○裁直隸古北口監督其稅課歸密雲縣徵收從戶科給事中巴圖請也○辛卯免浙江江山縣本年分

水災額賦有差○癸巳諭兵部閩省武職等官多長於水師而未諳陸路著各省督撫於千把總內挑選人材壯健弓馬嫺熟者咨送閩省交與該督撫以備題補之用其應作何酌量咨送名數之處著該部議奏尋議江南湖廣應各揀選千總五員把總四員浙江應揀選千總三員把總二員江西應揀選千總一員把總一員行令各該督撫等給咨赴部引見恭候欽定命往閩省該督撫等遇有陸

路守備員缺。將揀選之千總題補。千總員缺。將把總拔補。從之。○江南崇明總兵官林秀緣事革職。調廣東左翼總兵官施廷專。爲江南崇明總兵官。陞福建延平副將李維揚爲廣東左翼總兵官。○兵部議覆雲貴廣西總督鄂爾泰疏言。粵西營制惟撫提及左右二鎮標設有馬兵。其餘桂林等六協全州等十三營。因馬匹久經裁汰。以致兵丁騎射生疎。請復設戰馬共四百匹。各按營制地宜酌量分撥。其馬兵即於各協營步戰兵內挑補。按期操演。應如所請。從之。○旌表滿洲正藍旗烈婦故五品典儀官張寶妻唐氏。守節不污。拒姦被殺。給銀建坊。入祠致祭。如例。○乙未諭內閣。凡交議條陳事件。其原條陳之大臣。亦著入班會議。○署川陝總督查郎阿疏言。招往安西沙州等處屯墾民戶。統計共有二千四百零五戶。所種小麥青稞粟穀糜子等項。計下種一斗。收至一石三四斗不等。其餘

各色種植。亦皆豐厚。家給人足。莫不歡忻。樂業。臣恐口內姦販囤戶。聞糧多價賤。與販射利。已令總兵道員嚴行查禁。竝傳諭民戶。按一年所需。扣存外。其餘即在本處糶賣。以濟兵丁商民口食。得旨。安西屯墾地畝。今年人力既勤。天時復稔。各種糧穀俱獲豐收。朕心深爲慰慶。今查郎阿禁止姦徒興販射利。辦理甚是。惟是飭令民戶多餘之穀。只許在本處糶賣。尚未妥協。朕思民戶盈餘之穀。原期糶價以爲日用之資。若本地糶穀者少。則出糶未免艱難。不可不爲計及。著該地方官酌量本地情形。不必相強。若有將盈餘之穀。情願出糶者。著動支官銀。照時價糶買。存貯公所。明年僅有需用之處。聽辦軍餉之大臣。及該督撫行文支撥。安西現有備用銀兩。即可動用採買。再於西安藩庫撥補還項。此朕體恤民戶。俾糶穀得價。用度豐裕之至意。著地方官善於奉行。不可勒令糶賣。生事滋擾。

○以故青海厄魯特扎薩克輔國公冊凌子色卜騰達什襲爵○旌表直隸開州烈婦王坤妻劉氏拒姦不污投繯殞命給銀建坊入祠致祭如例○丙申諭內閣密親王允祜安葬著賜祭一壇遣禮部堂官一員前往致祭○諭理藩院八旗遊牧地方甚屬緊要近來總管等仍有貪婪勒索屬下之事蒙古等雖欲陳訴情由因無巡察之人即有含冤受抑者亦無處控告著於每年或部屬司官或監察御史派出一員令其巡察如有此等之事即著據實叅奏儻徇庇隱匿被接任之員查出將巡察官一併從重治罪其歸化城亦照此派往○陞署戶部左侍郎太僕寺少卿阿山爲內閣學士兼禮部侍郎仍署戶部侍郎事○工部奏叅革道員吳應龍修造威寧城工逾限應照例治罪得旨凡官員居官聲名不好有負任使者間令於該地方工程効力以示懲儆非其人犯罪甚重應籍沒家貲者

可比也爲督撫者於此等人員之身家有餘不足豈無聞見自應審度伊等之力量分別工程之大小派令辦理若不量其力而槩與以重大之工程則伊等自度力不能完即使竭蹶從事仍不得免於罪譴勢必觀望遲延并其所有之力亦退縮不前矣於工程有何裨益嗣後凡有此等効力人員著該督撫等詢問本人情願如何効力再察其力量果與所認相符然後派撥工程具奏請旨儻有欺誑推諉不肯據實承認者著該督撫題叅再行治罪吳應龍既稱有產可變著該撫詢問令伊將實在力量據實供出即照伊力量派委工程令其速行修理○丁酉諭內閣大學士孫柱雖素餐多年生平尚無大過且年已八旬

先帝舊臣在朝者甚少著將伊名下應追銀兩俱行豁免其停俸案件亦著開復以昭朕優恤老臣之至意○工部右侍郎法保緣事革

任陞都察院左副都御史宗室塞爾赫爲工部右侍郎以署鑲白旗滿洲副都統二格爲都察院左副都御史仍署副都統事○敕封京都雲師爲順時普蔭雲師之神雷師爲資生發育雷師之神○署福建總督史貽直奏言原任臺灣叅將林子龍前被陳倫炯揭報經高其倬據揭題叅今審得縱兵聚賭廢弛營伍二款毫無憑據即招會婪贓一款亦歷審並未入已查林子龍從前効力戎行頗著勞績訪其在任頗得兵民之心若遽令放棄甚爲可惜可否令其來京引見量加委用得旨林子龍從前引見時原經朕記名係武弁中壯健材能之員後被陳倫炯揭報貪劣款蹟因將伊革職究審今據史貽直一一審訊各款皆虛是陳倫炯之揭報實爲屈抑凡爲文武大臣者秉公舉劾屬員乃職任中第一要務今陳倫炯將材能歷練之林子龍枉加彈劾而所特薦之遊擊洪繼龍則甚屬庸常

高其倬亦言其不勝臺灣之任是陳倫炯之舉劾顛倒實與公是公非相左又何以使所屬員弁共知勸懲乎陳倫炯受

聖祖仁皇帝多年教養之恩朕又加任用乃伊不思至誠報効仍復苟且營私返之於心何以自問著該署督傳旨詢問確取口供具奏林子龍著仍留閩省交與該署督以叅將副將酌量題補○己亥諭內閣各省兵丁於糧糈之外給以季餉所以撫養士卒令得仰事俯育以爲地方捍衛所關甚重而朋銀一項於俸餉內扣留貯庫爲各營買補馬匹之用亦國家恤兵至意也近聞直隸布政司衙門姦吏於請領朋銀時每匹扣陋規二兩至二兩五錢不等直隸如是他省大約皆然夫倒馬立有限年報銷復有成額豈容姦胥舞弊侵扣嗣後著各督撫及布政司查照定例按期給發如有姦吏增減剋扣遲延等弊各該督撫即行拏究按律重處儻督撫失於覺察

布政司不能釐剔弊端朕有訪聞定一併嚴加議處至兵丁歲底預借春餉及支放季餉亦聞有不肖餉書於放餉則需索李規於借餉則科斂借費此種弊端深可痛恨著各該督撫一併嚴查禁革務須按季給發不得遲延該部通行直省督撫布政使將朕諭旨刊刻曉諭俾官吏兵弁等咸知之○諭兵部常色禮患病著加謹調養將軍印務著秦布管理副都統蘇圖回至軍前著在叅贊上行走舒楞額不必來京○庚子諭內閣奉天地畝向來多有隱匿每有三四畝止報一畝者是以槩以上則徵科民力輸將甚爲寬裕後因有隱匿積弊民間互相爭競紛紛訐訟官民不便前歲朕遣大臣官員清丈漸次釐正田畝皆得實數今若按畝俱照舊則徵糧恐小民輸將無力著盛京戶部侍郎會同奉天府府尹確查田畝之肥瘠分別上中下三則起科酌定成額永著爲令○以都察院左都御

史三泰署兵部尚書事○以正白旗漢軍副都統公慶復署鑲白旗漢軍都統○議政王大臣等議覆署廣東巡撫傅泰疏奏暹羅國進貢方物并請採買京弓銅線應否採買賞給之處請旨遵行得旨暹羅國遠隔重洋輸誠向化恭順修職歷有年所其所請採買物件著行令該撫採買賞給以示朕嘉惠遠人之意

大清世宗敬天昌運建中表正文武英明寬仁信毅大孝至誠憲皇帝實錄卷之八十八

大清世宗敬天昌運建中表正文武英明寬仁
信毅大孝至誠憲皇帝實錄卷之八十九

監修總裁官光祿大夫經筵講官太僕寺卿兼翰林院侍讀學士臣等奉
勅修纂

總纂官光祿大夫經筵講官太僕寺卿兼翰林院侍讀學士臣等奉
勅修纂

纂修官光祿大夫經筵講官太僕寺卿兼翰林院侍讀學士臣等奉
勅修纂

纂修官光祿大夫經筵講官太僕寺卿兼翰林院侍讀學士臣等奉
勅修纂

纂修官光祿大夫經筵講官太僕寺卿兼翰林院侍讀學士臣等奉
勅修纂

敦修

雍正七年己酉十二月辛丑朔山西巡撫覺

省郵奏

羅石麟疏言軍需所用駝屨等項晉省士民
情願自備車驟運送歸化城踴躍爭先似難
禁阻待旨前因軍前需用駝鞍屨令晉省
製辦三萬副該省人民急公趨事朕已降旨
蠲免該地方辛亥年額徵銀二十萬兩以示
嘉獎今因運送鞍屨該省士民等又復歡欣
効力甚屬可嘉著該撫等傳旨獎諭仍令各
領應得之腳價不必固辭○晉封哈密鎮國
公額敏為固山貝子○裁山東濟南府屬之

譚城安德昌平太平魚邱在山六驛驛丞各
一員從署山東巡撫費金吾請也○壬寅諭
大學士等朕之本意原欲於

孝陵

景陵之旁卜擇將來吉地而堪輿之人俱以為
無可營建之處後經選擇九鳳朝陽山吉壤
具奏朕意此地近依

孝陵

景陵與朕初意相合及精通堪輿之臣工再加

省郵奏

相度以為規模雖大而形局未全穴中之土
又帶砂石實不可用今擬怡親王總督高其
倬等奏稱相度得易州境內泰寧山太平峪
萬年吉地實乾坤聚秀之區為陰陽和會之
所龍穴砂水無美不收形勢理氣諸吉咸備
等語朕覽所奏其言山脉水法條理分明洵
為上吉之壤但於

孝陵

景陵相去數百里朕心不忍且與古帝王規制

典禮有無未合之處著大學士九卿詳悉會議具奏。尋議謹按帝王世紀及通志通考諸書。歷代帝王營建之地。遠或千餘里。近亦二三百里。地脉之呈瑞。關乎天運之發祥。歷數千百里蟠結之福區。自非一方獨擅其靈秀。今泰寧山太平峪。

萬年吉地。雖於

孝陵

景陵相去數百里。然易州及遵化州皆與京師

密邇實未為遙遠。又泰寧山雄高羣嶽。抽脉自管涔恒嶽而來。襟帶百川。分水以拒馬滹沱爲界。相其形局。既屬大地之凝庥。稽之典章。又合三代而同揆。伏乞欽派大臣。遵照定制。敬謹辦理。自集純嘏於萬年。流嘉祉於奕葉矣。得旨。大學士九卿等。引據史冊。典禮陳奏。朕心始安。一應所需工料等項。俱著動用內庫銀兩。辦理規模制度。務從儉樸。其石像等件。需用石工浩繁。頗勞人力。不必建設著

該部遵行。○諭內閣。百官章服皆有一定之

制。所以辨等威。昭品秩也。近來服色頂帶及坐褥頂馬胸纓之屬。每有不按定例。任意僭越者。御史有稽查部院之責。而各御史中即有參差不齊之處。是已身先有逾分違禮之咎。又何以彈劾他人。嗣後紫禁城內著派三旗侍衛稽查。大城內著步軍統領稽查。外城著五城御史稽查。倘有違例僭越之人。該侍衛提督御史不行參奏。別經發覺者。將稽查之員一併處分。○江南河道總督孔毓珣摺奏。清口引河工程。俟明年水汛時。相度舉行奉

上諭。相度妥確。然後試行。猶非探本尋源之策。若能使淮強黃弱勢。可相敵。即不行挑濬。亦必暢流無滯。不然徒恃此數道引河。恐湖水未必能應手濟用也。惟速將湖南一帶石工加高增厚。一例修砌堅固。俾湖水無涓滴漫溢之虞。其勢自強。自當從清口暢流而出。可

免於淺之患矣。宜急爲斟酌籌畫。毋因慎重錢糧區區小見。貽誤河防要務。○改山西絳州屬之襄陵、太平二縣隸平陽府。解州屬之垣曲縣及平陽府屬之絳縣、聞喜縣俱隸絳州。從山西巡撫覺羅石麟請也。○癸卯。諭內閣。從前據兩淮鹽政噶爾泰與運使何世璜奏稱。兩淮鹽商因沐皇恩。減省匣費。各項每年省費百萬餘金。而臣等又不受其規禮。是以各商公送鹽院銀八萬兩。送鹽道銀四萬兩。但臣等蒙恩已各給養廉。實無需用之處。請解部以充公用。朕以各商年來省費已多。而鹽院鹽道又各有養廉。因允所請。將此項解京。交與內務府爲修理道路及各項工程之用。至次年噶爾泰與運使張坦麟援照前例。復將銀十二萬兩奏請解部。此時適因預備軍需。因令交與江南織造爲製辦綿甲等項之用。今噶爾泰與運使高淳又將銀十二萬兩奏請解京。現今高淳奏案有需索商人

各款。伊若果係用度不足。何不即於此四萬兩中支用。乃捨應得之項。分外貪取於商。朕因此於從前之事。亦不能無疑矣。若將此十二萬兩交與噶爾泰。或給還各商。或伊有需用之處。即將此支用。倘伊實無需用之處。各商又不願領回。噶爾泰現署安徽布政使印務。著與魏廷珍確查上江地方。有實在無著之虧空。將此銀彌補。以完本地公項。○又諭有人條奏。內稱廣東諸務廢弛。弊端種種。如火耗提解收米折色及漁鹽各種稅務。俱較昔加增。至於盜賊公行。誣告不息。一切禁令不遵。賭具仍賣。地方有司並不過問。等語。朕覽此奏。深爲駭異。朕宵旰焦勞。無刻不以民生爲念。其准令督撫提解耗羨。並稽查稅課贏餘者。無非除弊止貪。均平畫一。使官民並受其福也。所頒諭旨。至數十次。天下大小臣工無不共知。朕心恪遵朕訓矣。何以粵東地方尚有如此情形。因提解耗羨而火耗轉致

加增。因清查稅課。而有司轉行苛索。因禁止私販。而漁戶竝受苦累。是以朕愛養百姓之善政。而奉行顛倒。以濟其貪。營巧取之私。而置除暴安良。移風易俗之政於度外。該省從前督撫受朕倚任之重。身在地方。焉有朕已聞知。而伊等漫無覺察之理。郝玉麟傳奏到任未久。嗣後宜整頓經理。勿蹈前轍。此旨到日。著悉心確查。嚴行禁約。倘不肖有司。仍有不知悔改者。著叅革拏問。請旨正法。如督撫等。再有徇隱失察等情。經朕察出。定行從重治罪。○又諭。朕即位以來。屢有臣工條奏各處地方官。徵收落地稅銀。交公者甚少。所有贏餘。皆入私橐。雍正三年。又有人條奏廣西梧州。一年收稅銀四五萬兩不等。止解正項銀一萬一千八百兩。潯州。一年收稅銀二萬兩。止解正項銀四千六百兩。應令該撫查核據實奏聞。并令各省抽收稅銀之處。俱據實奏報等語。隨經九卿議令各省督撫。遴委幹

員監收。一年之後。視其贏餘若干。奏聞候旨。朕思孟子言治國之道。首稱取於民有制。所謂有制者。即一定額徵之數也。若稅課之屬。無顯然額徵之數。則官吏得以高下其手。而閭閻無所遵循。即如從前各處稅課。經地方官徵收。有於解額之外。多數倍者。且有多至數十倍者。既無一定之章程。則多寡可以任意。其弊不可勝言。屬員既已貪取上司。必致苛求官員。既已營私胥役。必至橫索日積月累。漸有增加之勢。而難於稽查。豈非民生之隱患乎。朕是以允從條奏所請。及九卿所議。令各省督撫。委員監收。以定科則。其徵收不及舊額者。亦令奏聞。降旨裁減。年來報出贏餘之處。朕皆令留於本地。或作各官養廉之用。或為百姓公事之用。使官員用度有賴。自不妄取民財。使地方公用有資。即可寬恤民力。無非以小民之財物。仍用之於民間。不令飽貪官污吏之慾壑而已。若該督撫等果能

督率有司奉行盡善將一年所收者悉行奏聞不及額數者請旨減免則賦有常經萬民共受其福矣乃聞外省中多有奉行不善者以朕愛民除弊之善政而庸劣有司借歸公之名或肥身養家或爭多鬬勝以致肩挑背負之微物皆徵收稅課而該督撫等又不悉心稽查民間苦於擾累或起朝廷加稅之疑獨不思朕愛養斯民如江南浙江江西三省額徵錢糧則永遠豁免六十餘萬各省每年蠲免之正賦又一二百萬不等而發帑為地方興修工程者又不下數百萬豈有於數千百萬之帑金並不吝惜而轉與小民爭此蠅頭之利乎至於提解火耗乃均平通便之道官員有養廉之資民間無苛派之擾上司無得受饋遺徇情瞻顧之私下屬無請託鑽營暗通賄賂之弊屢頒諭旨甚明從前督撫中有請將耗羨歸公者朕切加訓飭蓋此項乃民間之物惟有用之於本地若將絲毫歸公

是朕利其所有矣朕必不為也著各直省督撫將朕此旨刊刻頒布自諭到通行之後倘仍有加添重耗者一經發覺將經徵之員於本地方即行正法其該管各上司失於覺察者亦必從重治罪決不寬貸○陞山東文登營副將曾謨為山東登州總兵官○署川陝總督查郎阿疏言肅州附近嘉峪關一應軍需兵馬俱由嘉峪關出口必先頓歇肅州遂致本地米豆草束昂貴肅鎮標兵額食糧餉本色少而折價多不敷糴買之用請酌量暫為加增後不為例得旨朕前因寧遠大將軍岳鍾琪之請特念哈密為軍需往來之地將駐防兵丁增給口糧鹽菜今肅州為大軍出口要道辦理軍務之員咸集其地食指繁多未免物價昂貴著將肅鎮兵丁折支米豆每石於折中一兩之外增給銀五錢每草一束增給銀一分自雍正七年秋季起至大兵凱旋之日俱照增加價值每季按名給發毋得

扣剋侵漁。統入該年奏銷冊內報部查核。以示朕軫念邊兵至意。○甲辰諭內閣。十五日御門辦事。奏事大臣及引見官員等俱著用補服。嗣後朕臨御前殿。與應用朝服之日。照常服用朝服外。至御門理事。只用補服。遇應服蟒袍之日。亦著補掛蟒袍。永著為例。○又諭。凡為人子者。於親喪之禮。不得備盡其心。實爲隱痛。朕親身閱歷而知之。故於內外大小臣工。有不得已令其在任守制者。乃因辦理政務。從權之道。未嘗不體其哀戚之情也。如大學士朱軾。蔣廷錫。丁母憂。皆給與假期。回籍料理。及來京之後。仍令素服辦事。不穿朝服。不與朝會筵宴。俾得盡其守禮之心。其外任官員。或特旨留任。或經督撫題留者。皆著給與假期。令其回籍料理伊親之事畢。而後回任。不强其心之所不安也。嗣後內外大臣官員。若有奉旨在任守制者。皆准其素服二十七個月。以盡人子之心。若遇朝賀筵宴祭

祀典禮齊集之處。外省督撫提鎮司道府大員。則委屬員代行。州縣等官。則委佐貳代行。再如直省文武官員。遇朝賀典禮齊集之處。倘偶遇風寒之疾。或肢體等患。亦不宜勉強從事。有乖調攝之道。亦著屬員代替行禮。其代替之處。督撫提鎮。則報明禮部司道副參以下等官。則報明督撫提鎮。著將此旨通行各直省知之。○旌表江南江都縣烈婦張三選妻吳氏。拒姦不污。服毒殉節。給銀建坊。入祠致祭如例。○乙巳。諭內閣。國家設兵衛民。所以安良除暴。雖尚武勇之力。然必謹守法度。顧惜廉耻。不爲犯法干紀之行。始不負朝廷養養之恩。可以有上進之望。八旗兵丁。國家所以養之者。甚厚。偶有差遣征勦之事。復加意體恤。賞給各項銀兩。行糧之外。復給坐糧。所以籌畫其用度。養贍其身家者。至周至渥矣。爲兵丁者。自宜感戴國恩。兢兢奉法。共知自愛。以邀爵賞。而沐寵榮。況朕之訓飭教

導者。至再至三。豈伊等尚不知猛醒痛改惡習乎。乃自藏回陝之八旗兵丁四百名。仍有沿途騷擾居民之事。經撫臣憲德兩次參奏。共一百三十餘件。似此負恩犯法。無知無恥。朕實為伊等深愧之。且其所得有限。乃一時率其獷悍之性。不知檢束。以致身投法網。罪無可逃。能不愧悔。況損人利己者。天理之所不容。強奪橫取者。國法之所不宥。爾兵丁等奈何。惟利是貪。而不顧天理。不畏國法。為此可羞可媿之行乎。今將該撫所參各款。一一開出。並降此旨。著交與八旗及各省駐防管兵官員等。各抄錄一道。每月傳集兵丁。敬謹宣讀。令其觸目警心。時時檢束。恪謹遵奉。○禮部議覆。河南學政于廣條奏學政事宜。一。學臣考試之期。提調官例用知府。責任綦重。嗣後或知府有外委公事。請令申詳督撫。另委州縣正印官代理。不得以佐貳微員塞責。一。候補廩增。豫省舊例。雖考列三等。亦得新

舊間補。殊非鼓舞人才之意。嗣後必考居一二等。方准與新考上等者間補食餼。均應如所請從之。○移江西南康府同知。駐吳城。吳城地方。歸星子縣管轄。撥九江營弁兵駐防。移長嶺巡檢。駐青山。左蠡巡檢。駐渚溪。吳城巡檢。駐三江口。柴棚巡檢。駐周溪鎮。從原署江西巡撫張坦麟請也。○丙午。

孝惠章皇后忌辰遣官祭

孝東陵。○廣東學政顧仔疏。奏原任連州知州

朱振基。私供逆賊呂留良牌位。經生員陳錫等呈首。按察使元展成參奏。欽奉諭旨。朱振基等著革職嚴審。其連州生員陳錫等。深明大義。不為邪說所惑。據實出首。以彰名教。具見士習淳良。甚為可嘉。著將今年該州應試完場之舉子。交與該學政秉公遴選。學問優通者。四人賞作舉人。送部一體會試。以示恩獎。臣遵旨。將連州完場硃卷。細加覆閱。選定盧伯蕃、陳錫、吳奇、戴雲等四名。送部會試。

以副

皇上獎勵特典。下部知之。○丁未諭兵部鄂善著前往涼州協同秦布。辦理事務。其駐劄太原兵丁著石麟暫行管理。○調陝西西安副都統卓鼎為陝西寧夏右翼副都統。○吏部議奏。内外文武官員。有恩允所請。封其曾祖。祖父者。應准並封其曾祖母。祖母與母。封其曾祖母。祖母與母者。應准並封其曾祖。祖父。從之。○授宗室錫綿女為縣君壻羅卜藏西拉布為固山額駙。○戊申。諭內閣。廣東盜案繁多。民俗犷悍。應設觀風整俗使一員。化導訓飭。令風俗人心漸歸醇厚。又該省督撫奏稱粵東士習。未能端謹。請設學政二員。一司文衡。一飭士行。以為造就人才之地。朕思文行本屬相關。不可離而為二。況廣東地方遼闊。若司文司行。分屬兩員。仍各遍歷通省。耳目聞見。恐有未周。著設學政兩員。按該省地方。分管考試督察。廣東觀風整俗使。著右通

政焦祈年補授通省教職士子。令其兼行稽察。又諭康熙五十九年陝省解送駝馬進藏文武官五十員。每員借支肅州公庫銀五百兩。為行裝路費之資本。係應給之項。因當時該督撫未經題報。不敢作正項開銷。是以各員回陝之時。仍於各名下著追補項。至今尚有未完銀一萬六千八百兩。朕念伊等効力戎行。遠涉藏地。雖非衝鋒破敵者。比而間關行役。亦屬可憫。著將未完銀兩。槩行豁免。其已完者。悉給還本員。或交伊之屬。如該員有別項虧欠。應追者。即准其抵補。以示優恤。勞役之至意。○以順天府府尹孫嘉淦署工部左侍郎。○兵部議覆四川提督黃廷桂疏言。夔州協屬達州太平二營。距夔遙遠。難於控制。請就近歸隸川北鎮統轄。應如所請。得旨。依議。近來提鎮等。每於到任之後。將營伍事宜。條奏更張。以為盡職。伊等身在地方。敷陳時事。其允協與否。部臣不能遙度。其情

形每多議准。即朕亦以伊等身為本地大員。必籌畫周詳。然後陳奏。是以照議准行者有之。乃細加察訪。竟有扞格難行。或於該地方毫無裨益者。是伊等陳奏之時。或誤聽人言。或苟且塞責。並非確有所見。計出萬全之舉也。嗣後該提鎮等。若於營伍地方事宜。果有深知灼見。斷不可不更改者。方許具奏。倘有泛行陳請。經部議准。而究不可行者。定將條奏之人。嚴加議處。○又議覆雲貴廣西總督鄂爾泰疏。奏黔省新聞苗疆立營設官事宜。一。八寨去都勻郡城僅九十餘里。實為都黎總隘。請將都勻營叅將裁去。改為都勻協。除舊有守備一員。千把總六員外。應設立副將一員。駐劄八寨。增遊擊二員。守備一員。安兵一千六百名。分為左右二營。以遊擊一員分駐府城。一員隨副將駐劄。○丹江逼近凱里營汛。山勢陡峻。素為生苗盤踞。請增立一營。將凱里營都司裁去。歸併丹江營管轄。除凱

里舊有千把三員外。丹江應設叅將一員。守備二員。千總一員。把總二員。安兵一千六百名。分為左右二營。名丹江營。於大丹江駐一千名。鷄講駐三百名。小丹江駐二百名。餘為凱里汛防。一。九股在鷄講清水江之中。素稱强悍。請將黃施營遊擊移駐施秉舊縣。安兵三百名。又有地名稿貢者。乃九股出沒咽喉。應駐兵二百名。以資控制。一。清水江有南北兩岸。寨分稠繁。應於清水江居中設立一協。名清江協。增副將一員。遊擊二員。守備二員。千把總六員。分為左右二營。安兵二千名。於適中之公鵝駐一千名。對江北岸駐四百名。柳傍駐四百名。革冬駐二百名。至鎮遠一協。原因防禦清水江九股等處生苗而設。今清水江已安營汛。應將鎮遠協改為一營。將副將裁去。其兩營遊守除鎮遠應留駐遊擊一員。守備一員。千把總六員外。所餘遊擊一員。守備一員。千把總六員。即歸入清江協副將

標下一天柱營向以附近生苗故設立叅將今既分設營汛應將天柱營叅將改爲都司存千把總三員所餘守備一員千把總三員歸入丹江一古州地方戶口極多乃都黎適中要隘應設一鎮名爲古州鎮增總兵一員遊擊三員守備三員千總六員把總十二員分爲中左右三營安兵三千名將黎平協改爲一營副將改爲遊擊此所設協營并下游舊制一帶協營俱聽古州新鎮統轄一營汛

既定應設文官分治請於都勻府添設同知通判各一員以同知分駐八寨以通判分駐丹江鎮遠府添設同知一員分駐清水江黎平府添設同知一員分駐古州俱加以理苗同知字樣一所設同知通判專駐苗疆有綏理地方緝捕姦頑之責不可護衛無人應照湖南乾鳳二廳之例於同駐之官兵內各撥給把總一員兵一百名以爲親標一施秉舊縣既將遊擊移駐同城不便無文員請添設

施秉縣縣丞一員分駐均應如所請從之○

添設廣東潮州府惠來縣蔡潭鄉巡檢一員從署廣東巡撫傅泰請也○裁駐防昌平順義良鄉寶坻固安采育東安霸州雄縣九處筆帖式各一員○己酉振武將軍順承郡王錫保奏報鄂爾昆集爾麻泰圖拉三處屯田收穫大麥小麥糜子共七千五百五十石有奇下部知之○庚戌左副都御史陳良弼緣事革職以原任詹事府詹事王圖炳爲都察院左副都御史○辛亥諭內閣據署山東巡撫費金吾等摺奏疏濬山東濟寧嘉祥等縣及江南沛縣徐州等處水道使歸宿於海則山東江南二省歷來被水州縣皆成樂土朕思此項工程既於民生大有裨益則舉行事宜稽遲應先期派出官員前往專司督修之事以便備辦物料早動工程原任侍郎阿克敦前在廣東署事任內尚無貪贓犯法等情今著寬免釋放命往水道工程効力以贖前

愆再著原任巡撫陳世倌甘汝來前往與阿克敦同司督修之事。一切辦理機宜悉聽田文鏡嵇曾筠孔毓珣尹繼善籌畫調度其工料等費悉動帑金支給。至在工差委人員聽阿克敦等酌量派用有應從京師帶往之員准其奏請帶往其湖廣革職糧道王恕著交與阿克敦等帶往辦事効力。吏部議覆雲貴廣西總督鄂爾泰疏言雲南開化一府接壤交趾地方遼濶雖設有同知通判經歷三員俱非印官不能分理正務請將通判一缺裁去增置一縣設知縣一員於地方有益應如所請從之。尋定新設縣曰文山（改貴州洪番土司地方歸定番州流官管轄從貴州巡撫張廣泗請也）壬子署山東巡撫岳濬摺奏修理東省南北大路工程奉
上諭諸凡工作惟勤查確勘屬員吏胥方不敢舞弊若少涉疎慢必致有名無實潦草塞責須遴委誠實人員不時催督看驗務俾修築

堅固以利便行旅。至於帑項第不令姦貪侵蝕耳。何可吝惜。果能錙銖皆用於工內即較原估稍多亦朕所樂聞也。○癸丑大學士九卿等奏據督修

孔廟工程通政使留保山東巡撫岳濬等奏報十一月二十六日午刻正當

孔廟上樑之前二日慶雲見於曲阜縣環捧日輪。歷午未申三時之久仰惟

皇上尊禮

先師孔子典文周備又特頒發帑金興建闕里

文廟凡殿門廊廡悉倣帝王宮殿之制易蓋琉璃黃瓦是以

天心昭格顯示嘉祥於

孔廟告成之日慶雲呈見實從古未有之上瑞伏請宣付史館垂示萬世得旨朕平素尊奉

先師至誠至敬雍正二年闕里

文廟不戒於火。彼時廷臣援明代弘治前事爲言。而朕心悚懼不寧。引過自責。親詣太學。文廟虔申祭告。特發帑金。命大臣等督工修建。凡殿廡制度規模。以至祭器儀物。皆令繪圖呈覽。朕親爲指授。遴選良工。庀材興造。虔恪之心。數年以來。無時稍間。今大成殿上樑前二日。慶雲見於曲阜。卿等歸美朕躬之詞。朕不克當。或者

上帝

先師鑒朕悚惕誠敬之心。見茲雲物。昭示瑞應。朕不敢矜言祥瑞。但能功過相抵。朕之幸也。應擇日躬詣太學。

文廟祭告。以申感慶之衷。朕躬被

先師之福佑。普天士子。誦法服膺。同受

聖人之澤。著將明年會試。取中額數。廣至四百名。壬子科各省鄉試。每正額十名。加中一名。其十名之外。有零數者。亦加中一名。此朕體奉

先師樂育之盛心。特行造就人材之曠典。諸士子具各興文敦行。益加勉旃。宣付史館。著照所請行。○甲寅。實授岳濬爲山東巡撫。程元章爲浙江布政使。司布政使。○以翰林院修撰陳惠華提督廣東肇高學政。○下嫁鑲白旗和碩額駙保金泰之郡主。故遣官致祭。○乙卯。陞四川建昌道劉應鼎爲四川按察使。司按察使。○吏部議覆四川巡撫憲德疏言。黎大所地方爲西南孔道。漢夷雜處。千總

一員。不足以資彈壓。請將千總裁去。改置一縣。添設知縣一員。再設典史一員。分駐泥頭。俱隸雅州府管轄。又建昌之寧番衛。已改爲冕寧縣。該衛之冕山所千總一員。應行裁汰。均應如所請。從之。尋定新設縣曰清溪。○吏部等衙門議覆河東總督田文鏡疏言。東昌等府幅輦太廣。宜設立直隸州。以分職守。請將東昌府屬之高唐州。爲直隸州。分轄濟南府屬之禹城。平原。陵縣。臨邑。四縣。兗州府屬

之東平州。為直隸州。轄東阿。平陰。壽張。陽穀。四縣。東昌府屬之濮州。為直隸州。轄觀城。范縣。朝城。三縣。青州府屬之莒州。為直隸州。轄日照。沂水。蒙陰。三縣。至從前所改直隸濟寧州。仍歸兗州府管轄。其濟寧州原轄之鉅野。嘉祥。二縣。改隸曹州。鄆城。一縣。仍隸兗州。均應如所請。從之。○丁巳。順天府進春。○諭內閣。天津水師營兵丁錢糧。前經部議。每月定為一兩五錢。朕近聞兵丁用度。稍有不敷。已降旨。加為每月二兩。浙江乍浦水師營兵丁。亦應一體加恩。其新拔之兵丁等。每月支銀一兩五錢者。亦著照天津之例。加為二兩。○禮部議覆甘肅巡撫許容疏。奏寧夏。西寧。涼州。肅州。四鎮。慶靖。二協。平涼。武威。二縣。冊報陝甘各標陣亡官員康海等共三十九員。兵丁任政等共二千一百一十八名。應請照例設位。入昭忠寺致祭。從之。○工部議覆浙江總督李衛疏。言海寧沿塘。東自尖山。西至翁

家埠。綿亘百里。皆臨大海。今南岸潮頭直射北面護沙洗刷無存。一線草塘。不能抵敵。全海潮勢。若非向裏添砌石工。難以保固。請於西塘內。荆煦廟起。至草菴止。就舊有草塘收進二三丈。砌築石工。東塘於陳文港。小文前。薛家壩。及念里亭等處。分築挑水盤頭。大草壩五座。堵禦頂衝。使水勢稍緩。可引漲沙漸聚。其遠年塊石。各塘酌量加高培厚。俱應如所請。從之。○內閣學士兼禮部侍郎桑格。以疾乞休。允之。○旌表河南祥符縣烈女郭竹。襄女郭氏。拒姦不污。投繯殞命。給銀建坊。入祠致祭。如例。○戊午。四川巡撫憲德題夔州府石碛宣慰司馬宗大緣事革職。請以其子馬光裕襲替。下部知之。○己未。調工部右侍郎張大有。為刑部右侍郎。陞內閣學士何國宗。為工部右侍郎。○宗人府及滿洲大學士尚書等。議覆監察御史覺羅莫禮博條奏。宗室覺羅等。每年所生之子。係宗室之子。則宗

室族長。查送宗人府。覺羅之子。則覺羅稽查
子女頭目。查送宗人府。宗人府即據造入冊。
恐無可以爲憑之處。請將宗室族長。覺羅稽
查子女頭目。每人給與印記一方。以爲憑據。
應如所請。交禮部鑄造。送宗人府分給。嗣後
若宗室覺羅等。日漸蕃昌。至有增添族長人
等之處。即照此例鑄給。從之。○議敘陝西進
勦卓子山。棋子山。青海等處。在事有功文職
官員。原任涼莊道。今陞山西布政使蔣洞等
各加級紀錄有差。病故之西寧道趙世錫等
各准與一子入監讀書。○辛酉。

上以闕里

文廟告成。親詣國子監致祭。

先師孔子。○諭內閣。朕御極以來。七年之中。
未遇日食之異。今據欽天監奏稱。庚戌年六
月初一日。日食九分二十二秒。朕心深爲畏
懼。想由朕之政事有關。用人敷治之間。未爲
允當。或內外臣工。不能敬謹奉職。民情尚未

舒暢。以致上干

天和。垂象示儆。朕寤寐之中。時刻修省。內外臣
工等。各宜悚惕。恪盡厥職。共相勉勗。以凜
天戒。但期各矢誠心。不必以空言回奏。○雲南
巡撫沈廷正奏報新平營祥雲捧日。得旨。連
年以來。雲南地方。屢有慶雲醴泉之瑞。蓋因
總督鄂爾泰。公忠體國。以善政化導官民人
從其教。和氣致祥。是以仰蒙

上天疊昭瑞應。朕之所以宣諭臣民者。蓋欲使
天下之人。共知天人之道。有感必通。詎勉爲
善。以共受

上帝之福佑也。今覽沈廷正所奏。朕言益可徵
信。朕從來不言祥瑞。如尚崇禋。奏報遵化州
天台山。有鳳凰翔集。鄂爾泰奏報都勻府苗
疆有石芝叢生。朕皆未宣示廷臣。天下之人。
勿誤以朕爲誇張祥瑞。而忘自修之道也。○
鑲白旗漢軍副都統梁永禧緣事革職。陞刑
部郎中補熙爲鑲白旗漢軍副都統。鑲藍旗

漢軍副都統高應麒緣事降調陞一等待衛
常昇爲鑲藍旗漢軍副都統以福建南澳
總兵官許良彬署福建水師提督福建金門總
兵官張起雲署福建南澳總兵官福建臺灣副
將康陵署福建金門總兵官吏部議覆廣西
巡撫金鉷疏言粵西全州所屬之西延司猺獞
雜處巡檢一員不足彈壓請移本州州同駐劄
將巡檢裁汰其全州仍添設州判一員以資協
理賓州所屬之武宣縣順流直達潯州不過四
百里而距賓州地遙路險應將武宣縣歸潯
州府管轄庶公務不致稽遲均應如所請又
稱馬平雒容二縣正印雜職等官俱應仍照
腹俸陞轉查州縣雖處煙瘴尚有火耗足以
養廉雜職官員俸銀無幾實堪憐憫嗣後州
縣以腹俸陞轉雜職仍三年即陞從之禮
部議覆福建巡撫劉世明疏言臺灣府屬應
試生儒原有另編字號取中之例後因臺地
士子半係泉漳二府之人希冀多中故有撤

去另編字號之請今冒籍者俱已改歸本籍
海外誦讀之士競切觀光請仍照舊例另編
字號於閩省中額內取中一名以示鼓勵應
如所請從之○改廣西西隆州西寧縣歸泗
城府管轄移西隆州治駐偏牙州同駐八陽
從雲貴廣西總督鄂爾泰請也○補行奉天
雍正五年分軍政罷軟官二員有疾官五員
年老官十七員分別處分如例○壬戌諭內
閣元旦朝賀凡三品以上之大臣年逾七十者
不必隨班行禮俟百官朝賀後朕回乾清宮
伊等至乾清門請旨刑部等衙門議奏陸
生楠借論通鑑妄抒譏訕謝濟世批點大學
肆行毀謗悖逆已極經臣等審明定罪奉旨
交與振武將軍順承郡王錫保將陸生楠謝
濟世逐一嚴訊茲據順承郡王錫保奏陸
生楠謝濟世自知罪不容誅一字無能置喙
應將陸生楠謝濟世俱擬斬立決於軍前即
行正法妻子給付功臣之家爲奴財產查明

入官其陸生楠父母祖孫兄弟流二千里安置至妄行註釋之書俱著嚴查燒毀得旨陸生楠著交與該將軍於軍前即行正法其父母祖孫兄弟俱從寬免其流徙謝濟世從寬免死交與順承郡王錫保令當苦差効力贖罪其妻子家產免其入官餘依議○甲子予故福建福寧總兵官顏光旰祭葬如例○乙丑

孝莊文皇后忌辰遣官祭

昭西陵○丁卯諭內閣定例正月上辛日祈穀於

上帝若上辛在正月初五日以前則於次辛行祈穀之禮雍正三年五年俱以次辛祈穀率由舊章但元旦朝賀者朕躬之禮儀上辛祈穀者祀

天之大典也明年正月初二日上辛禮部題請於十二日次辛行祈穀禮朕思若以正月而論則十二日爲次辛若以立春後而論則十

二日爲下辛矣因元旦朝賀筵宴而展祈穀之期朕心深有未安著定於初二日上辛行禮先期照例敬謹齋戒停止朝賀筵宴嗣後若元旦逢上辛之期則於次辛祈穀如在初五日以前或值初七日

世祖章皇帝忌辰著該部兩奏請旨○署川陝總督查郎阿摺奏據四川提督黃廷桂咨稱護理重慶鎮標遊擊保璠於委署黔彭營遊擊任內與酉陽冉土司書使往來節次勒索人口騾馬等物又冉土司之子冉廣烜姦佔董昌規之妻爲妾一案餽送保璠銀兩禮物土司冉元齡又有川省姦徒楊承勲等結黨一案據賊黨供稱楊承勲家有金鑲玉印劉伯溫碑記伊弟楊七必要爲王送在酉陽司等語俱應嚴究奉

上諭各省土司朕皆一視同仁莫不欲其遂生樂業共享昇平之福是以屢降諭旨令該督撫訓飭官弁加意撫綏無得借端滋擾若有

苛虐生事者。必重治其罪。但管轄苗疆之官弁等。往往不能仰體朕心。屏除私念。若土司等。有不敢書使往來者。則加以傲抗之名。撫拾小事。申報上司。若私相往還。有所餽贈。則上司訪知。又加土司以行賄鑽營之名。究治其罪。如此。則土司豈不處於兩難乎。即如該督叅奏丹元齡之納賄於保璠。朕知丹元齡必有屈抑難申之情也。前據查郎阿奏稱。四川姦徒楊承勲等。謀為不軌。假稱家有金鑲玉印。其弟楊七。必要為王。送在酉陽司去等語。朕批諭查郎阿云。酉陽土司素稱恭順。必無藏匿重犯之理。若果楊七逃往酉陽地方。則丹元齡亦無不嚴緝解送者。如楊七未至酉陽。而強向丹元齡索獲。則丹元齡不更寬抑乎。總之各處土司承祖父之遺業。受朝廷之厚恩。苟有人心。孰肯作姦犯科。自罹罪戾。惟是姦民匪類。等播弄搆謬。希圖獲利於官弁之前。則假捏土司不法事端。而在土司地

方。又肆行恐嚇。恣憑之詭計。為督撫大吏者。安可不詳加審察。而輕信屬吏之浮言。為姦徒所愚弄乎。此案內需索受賄之保璠。著該督撫嚴加審訊。照所定苗疆之例。定議具奏。丹元齡悉從寬免。不必查究。至於賊黨所供金鑲玉印之語。尤屬荒誕。夫民間所謂金鑲玉印。即歷代傳國璽也。當日元順帝將此璽攜歸沙漠。是以明代求之未獲。我

太宗文皇帝天聰九年。察哈爾林丹汗之母將此寶進獻。至今藏於大內。今楊承勲家安得又有金鑲玉印。即使有之。亦係偽造。無用之物耳。賊黨謀逆之罪。不在此印之有無也。何必深究。著查郎阿、黃廷、桂憲德等將朕諭旨一併曉諭酉陽土司丹元齡知之。以和碩和惠公主下嫁多爾濟塞卜騰。授為和碩額駙。戊辰歲暮。祫祭

太廟

上親詣行禮。遣官祭

永陵。

福陵。

昭陵。

昭西陵。

孝陵。

孝東陵。

景陵○遣官祭太歲之神○己巳諭內閣昨據山西巡撫石麟奏報本年十一月初二日保德州慶雲呈瑞。今又奏報十二月初一日臨晉縣慶雲麗日。歷午未申酉四時。又據布政使蔣洞摺奏從前汾河形勢。惟文水縣地勢低窪。河身淤淺。是以議開引渠二道。正河一道。今年六月內。汾河水發。河道改流。文水縣自青高村至伊家社。各開引渠二道。舊時漫流。已爲沃壤。而東城村欲開之河。現今寬濶十餘丈。或數十丈。衆水會同。河身長二十五里。經年累月。人力不能成之功。天然疏濬等語。朕思晉省民風。由來醇樸。是以感召

天和屢歲皆登豐稔。即如近日預備軍需。民情踴躍。爭先恐後。悉出至誠。觀此尊君親上之念。則其孝親敬長克敦行誼。可知而地方官員平日訓導有方。亦即此可見。是以仰蒙上天昭示瑞應。以獎官民之善。朕心深爲慰悅。著照河南省之例。通行所屬府州縣。將人材品行可備任使者。不拘人數資格。秉公舉出。該撫再行詳加遴選。具題奏聞。送部引見。并令各州縣於常例歲舉老農外。再各舉一人。給以八品頂帶。以示朕褒嘉善俗。廣沛恩膏之至意。○旌表八旗節婦滿洲順哥妻李佳氏等一百四十五人。蒙古存住妻吳氏等二十三人。漢軍朱聘妻何氏等二十五人。貞女查哈克氏一人。孝子王積善一人。直隸各省節婦。王承貴妻劉氏等四百五十人。貞女林氏等十人。孝子曹大聲等二十六人。孝婦李一原妻董氏一人。孝女蔣氏一人。各給銀建坊如例。○是歲。人丁戶口二千五百七十九

萬九千六百三十九。又永不加賦滋生人丁
八十五萬九千六百二十。田地。山蕩畦地。八
百七十三萬二千二百一十五頃八十畝有
奇。徵銀二千九百九十三萬五千六百五十
七兩有奇。米。豆。麥。五百一十七萬六千八百
三十六石有奇。草。四百九十九萬六千六百
三十一束。茶。三十二萬一千八百三十引。行
鹽。五百一十四萬五千三百四十四引。徵課
銀三百九十萬一千八百三十八兩有奇。鑄
錢七萬四千八百四十八萬有奇。

大清世宗敬天昌運建中表正文武英明寬仁
信毅大孝至誠憲皇帝實錄卷之八十九

大清世宗敬天昌運建中表正文武英明寬仁
信毅大孝至誠憲皇帝實錄卷之九十

欽定四庫全書

通鑑纂要

事三

餘錄

通鑑纂要

教修

雍正八年庚戌春正月庚午朔

上於宮中拜

神以祈穀致齋命於初六日御殿○辛未祈穀於

上帝

上親詣行禮○貴州巡撫張廣泗疏報普安州農田收穫之後遺留稻根重長青苗漸致茂盛為從來未有之瑞得旨黔省土薄性寒而普安州乃有稻孫之瑞皆因地方大吏勸稼重農而該省民人力田務本是以感格

上天昭示瑞應嗣後當益加黽勉以承

天眷○廣東布政使王士俊摺奏各州縣姦盜詐偽等罪犯請令地方官榜列姓名揭於通衢以示懲警奉

上諭姦盜詐偽匪類欲以木榜書名感發其愧悔之心恐未必能然朕意果過橫逆不法之輩鄉里必不敢書其名以籍其罪無非將良懦鄉民之小過填罵一二以塞責而已有名無實恐徒為百姓之笑具耳○乙亥

上御太和殿王以下文武各官外藩王及使臣等上表朝賀停止筵宴○朝鮮國王李昫遣陪臣金東弼等表賀冬至元旦

萬壽節及進歲貢禮物宴賚如例○丙子

世祖章皇帝忌辰遣官祭

孝陵○丁丑授總理

陵寢事務領侍衛內大臣尚崇廉為盛京五部尚書以原任鑲白旗漢軍都統范時據為散秩大臣總理

陵寢事務○湖廣荊州將軍吳納哈年老休致。調寧古塔將軍哈達爲湖廣荊州將軍。陞寧古塔副都統常德爲寧古塔將軍。降奉天將軍多索禮爲寧古塔副都統。調黑龍江將軍那蘇圖爲奉天將軍。陞齊齊哈爾副都統卓爾海爲黑龍江將軍。調正黃旗蒙古副都統王常爲齊齊哈爾副都統。白都納副都統塔爾馬善爲歸化城左翼副都統。熊岳副都統圖爾賽爲白都納副都統。奉天副都統額爾勤爲熊岳副都統。鑲藍旗漢軍副都統常昇爲奉天副都統。四川成都副都統黑色爲鑲藍旗漢軍副都統。陞陝西潼關城守尉吳和圖爲四川成都副都統。○戊寅。諭內閣。雍正六年內。湖南布政使趙城摺奏。湖南現貯倉穀共計六十餘萬石之多。又有收捐穀石。本省可云有備。但楚南地勢卑濕。積貯既久。不無霉爛之虞。請分撥別省。令其來楚運往。以免霉變等語。朕將此摺發與戶部議奏。經戶

部議稱。應行文江浙督撫。令其詳酌。如有應需穀石之處。即委員往楚轉運。朕降旨俞允。隨據兩淮巡鹽御史噶爾泰摺奏。據兩淮商人黃光德等具呈。情願出資。將湖南積穀三十餘萬石。照依原買之價。交納湖南藩庫領運。隨地隨時售賣。仍將所售價銀。交納運庫等語。隨經王國棟題明。將雍正三年動帑所買穀一十六萬二千餘石。照原價每石三錢四分九厘。給商交價運售。此湖南巡撫布政使。及兩淮巡鹽御史前後具摺辦理之案也。今據湖廣總督邁柱奏稱。今年湖南岳常二府之臨湘。武陵等十州縣。微欠雨澤。臣等豫爲綢繆。動用公項銀一萬兩。買米備糶。而貯倉之現穀。與其照原價以給商。不若留俟來年春夏。照原價平糶。以濟本地之民食。似應飭商暫停領賣。俟明年無需用之處。仍聽該商領運等語。朕思向因湖南撫藩皆言地方積穀甚多。難以久貯。奏請分撥別省運售。以

免霉變是以兩淮商人。有赴楚領運。効力急公之請。今商人既已交價。而邁柱又稱楚南需米備糶。應請飭商暫停領賣。是湖廣督撫藩司。前後自相矛盾也。湖南現貯穀六十餘萬石之多。欲分撥別省。以免霉變。則本省府縣有需米之處。正可將此奏聞平糶。以濟民食。而邁柱乃云。正在動用公項銀一萬兩買米備糶。是邁柱之奏。又自相矛盾也。且邁柱又稱。此時飭商停運。俟楚省不需米穀之時。仍聽該商領運等語。是米貴之時。則令商人停運。而米賤之時。則令商人領賣。亦甚非情理之平。朕意此米穀中。必有虧空情弊。至於噶爾泰既代商人具奏。而又不爲伊等行催楚省。歸結其事。亦屬不合。查從前噶爾泰代衆商具奏領運之時。原有隨時隨地售賣之語。今江浙俱獲豐收。米價甚賤。湖南既有需米之州縣。著該商仍照前議領米。即於湖南需米之處。照時價糶賣。不許地方官抑勒商

人。亦不許商人高擡價值。儻商人獲有餘利。聽其自取。不許交官。如此則淮商領米。得以貿易。而楚省積穀。仍得流通。於商民均有裨益。湖廣督撫等即遵諭行。○諭兵部。天津乍浦兵丁其錢糧原照潼關例支放。今二處既經添給。潼關兵丁亦著每月每人各添給錢糧銀五錢。○以鑲藍旗蒙古副都統敦巴署正紅旗護軍統領。○己卯孟春享

太廟

上親詣行禮。○遣官祭太歲之神。○江南河道總督孔毓珣。蘇州巡撫尹繼善。摺奏修理高堰大工事宜。奉

上諭。朕不惜百萬帑金。以衛民濟運。工程當務久遠堅固。一勞永逸。此外即再增數十萬兩。亦不爲多。若因省小費。致誤大計。則所費百萬。仍屬虛用也。隄工卑矮之區。固應增高。而單弱之所。尤宜加厚。可再詳加相度。勘視。切勿冒存小見。凡有卑薄以及傾圮處。悉將隄

身折砌務令自頂至底一律堅實期於永久
獲益所需錢糧不必限定此數○辛巳諭內
閣昌平州明代十三陵每年朱之璉前往致
祭今朱之璉病故其襲封侯爵之人尚未請
旨目前將屈仲春祀典不可間缺著該旗大
臣定議請旨令其弟姪內一人代行致祭○
諭八旗都統等京城佐領越旗移置者甚多
因命大臣等均勻派定外省駐防八旗滿洲
蒙古漢軍亦有隨京城佐領越旗移置者其
移置之旗人丁既多則移出之旗人丁必少
是以人丁數目不均如何令其不致移動之
處著八旗大臣等會議具奏尋議請令各省
將軍副都統等將各該處官弁人丁數目查
明不論在京之本佐領惟視彼處之丁數均
勻分派四旗駐防之處即在四旗內均派八
旗駐防之處即在八旗內均派另造清冊以
備查核凡遇補授官員挑取兵丁即在所均
置之旗揀選其京城之本旗本佐領仍記檔

案每編丁之年照常咨送各該旗報部至五
年十年後或有生齒多寡不同之處令各該
將軍副都統等奏聞再行均置從之○封和
托輝特扎薩克多羅貝勒博貝子班第爲輔
國公○壬午

上詣

恩佑寺行禮畢幸圓明園○諭內閣從來左道
妖言如讖緯圖記機祥禍福之屬皆足以惑
世誣民爲人心風俗之大患自古帝王皆深
惡而嚴禁之苟有犯者必置重典雖赦宥
所以爲世道民風計者至深遠也朕觀陝西
之人秉性直魯凡好爲誕妄之說者多至此
省搖惑人心年來屢有其事已降旨切加訓
誡矣觀滿洲漢軍人等亦每易爲此等邪說
所惑如延信之聽信道姑王氏年羹堯之聽
信鄒魯與淨一道人允禩之聽信星士張愷
皆借怪異荒唐之說以助其妄亂悖逆之心
又如伊禮布爲江寧將軍時信一風鑑令伊

子易衣潛往相面從此江寧之弁兵等皆驚爲靈驗其門如市今此人已牽連入於大逆案中矣。可知僧道醫卜星相之類往往爲姦宄之所潛藏不可不慎也。昨總督范時繹又於江南人家查出違禁圖識之書是草野之間妖言惑衆之風未嘗止息。地方官員儻不能化導禁約轉從而崇信之是竟以身爲庶民之倡。又何怪閭閻無知之人沉溺其中而不知覺悟耶。凡造爲災異禍福之說者其言不驗則爲害尚小。儻天時氣數偶與其言相合一二則信者愈衆而爲害愈大。甚至心懷不軌之徒借此妖言妄興兵革荼毒生靈不可不防其漸也。滿洲八旗大臣弁兵等皆國家干城腹心之寄。況我滿洲忠義之氣技勇之才實爲人所莫及。果能安分循理盡忠孝之道無邪僻之行自然上邀天地之恩永受國家之澤。書曰惠迪吉從逆凶。又曰作善降之百祥作不善降之百殃。爾等

但當於己身求之爲善必獲善報爲惡必獲惡報。所謂如影隨形也。奈何舍可以獲福之正理而信從姦民無稽之言被其牽累輕則罹於刑罰重則喪及身家不亦可憫之甚乎。大凡爲欺人惑衆之說者皆市井兇頑無賴之輩或冒懷不軌冀以搖動人心或貧困無依欲以騙取財物爾等試思之天下焉有修道前知之人不遯跡於清淨寥廓之鄉而奔走紅塵與世俗相徵逐者乎。凡我滿洲漢軍官弁兵丁等世受國恩共矢尊君親上之素志豈肯聽姦人妖妄之言而遂爲其所搖動。但恐漸染日久有邪說在其意中而遇有委用使令之時或稍存疑貳之念則所關匪細故不得不訓誨開導之於平時使之恍然醒悟也。著將此旨通行曉諭八旗及各處駐防弁兵等共知之。○以原任湖南巡撫王國棟辦理刑部侍郎事。○陞正白旗漢軍副都統公慶復爲正藍旗漢軍都統。○癸未諭議政

大臣等乍浦地方駐劄滿洲兵一千六百名爾等原議挑選杭州餘丁八百名江寧餘丁四百名京城餘丁四百名令其披甲前往駐劄朕近詢問將軍鄂彌達據稱江寧餘丁披甲者可得八百名今京城不必揀發即著鄂彌達於江寧餘丁內酌量挑選八百名令其披甲前往乍浦駐劄至於管轄官員甚屬緊要務將年富力強黽勉任事者揀選補放著將軍鄂彌達於江寧應補人員內揀補現任官員內應行調補者揀選調補如江寧應補之員不能足數即於杭州應補人員內揀選補授現任官員揀選調補之處著將軍鄂彌達與將軍阿里衮互商派委此兩處補授員缺著各該將軍題補儘兩處不能足數著將數目開明報部該部請旨由京城揀選人員補授發往甲申上元節賜外藩科爾沁教漢高齊忒扎魯特土默特喀爾喀翁牛特鄂爾多斯阿霸垓吳喇忒烏朱穆秦蘇尼特克

西克騰喀喇沁巴林四子部落厄魯特青海厄魯特圖爾古特奈曼扎賴特毛明安阿祿科爾沁阿霸哈納杜爾伯特郭爾羅斯王貝勒貝子公額駙台吉塔布囊等及內大臣大學士侍衛等宴丁亥諭內閣山東青州府設立滿洲駐防官兵所有建造城垣營房工程著御史偏武侯補道員陳豫朋前往會同地方官監督修造其一應如何修造之處著天津都統拉錫前往青州相度經畫定議交與偏武等辦理拉錫仍回天津地方拉錫有素知可以辦工之人准其帶往工所交與偏武等派委辦事偏武所管倉工交與御史兆華監修再著內務府總管常明兼管稽查諭盛京五部尚書尚崇廩三陵事務關係重大爾同將軍管理包衣三佐領亦著爾管理其調補官員等事爾須詳慎揀選以鑲黃旗漢軍都統石文燭兼管鑲白旗漢軍都統己丑調陝西寧夏總兵官

張善爲陝西安西總兵官陞湖廣黃州副將
李繩武爲陝西寧夏總兵官（乙未）大學士等
疏言雍正七年十月奉旨內閣本章各於正
本之外立一副本另行收貯以備查對臣等
伏查各部院議覆事件副本內不載案呈日
後案牘繁多難以查校應將各部院議覆副
本與通政使司送進原題副本聯合一處專
派滿中書二員漢中書四員敬謹收掌但漢
中書舊額三十六員於康熙三十八年裁去
八員今存二十八員分派票籤房本房以及
稽查各部院註銷案件繕錄抄寫各項事務
人員不敷請復設漢中書四員以敷分派辦
事之用從之○禮部議覆四川巡撫憲德疏
言新設建昌府蠻夷雜處請於漢境內擇大
村堡照義學例建設學舍選取本省文行兼
優之士延爲塾師令熟番子弟來學俟學業
有成俾往教生番子弟應如所請從之○丙
申衍聖公孔傳鐸疏言兗州府屬屯莊集稅

銀兩舊充尼山書院及林墓歲修之用今各
省清查稅課請將此項報明歸公充餉得旨
目今他省有清查稅務之事蓋因稅課一項
向無定額地方官吏每多侵蝕欺隱高下其
手刻剝小民是以令將實數查出凡舊額之
外所有贏餘即留爲本地官民之用並未將
絲毫歸入公項也兗州屯莊集稅銀兩向充
書院林墓歲修之費正是闕里之公用而孔
傳鐸忽請解部充餉是將此項稅銀視爲私
橐也朕於

文廟工程敬謹辦理一切動用帑金所費不
下數十萬孔傳鐸寧不知之而爲此卑鄙之
陳奏甚屬不合嗣後著將此項集稅銀兩核
實支給爲書院林墓之用丁酉諭內閣北
運河青龍灣修築減水壩並挑濬引河工程
據怡親王等奏請交與侍郎何國宗督理監
修朕思原任侍郎牛鈕在北運河管工年久
於地方情形甚爲熟練著與何國宗協同辦

理。其一應錢糧工程等項。令都統莽鵠立。耿化祚。副都統佛保。副都御史二格。會同何國宗。辦理稽查。其減水壩金門及所開引河。或應寬二十丈。或應寬四十丈。及運河西岸可否另開減水壩。並何國宗查議各條。是否妥協。有裨河工之處。爾等可詳悉詢問牛鈕會同定議辦理。○諭八旗都統等。凡署理副都統事務之叅領。若仍令辦理叅領任內事務。一應行走之處。悉屬不便。嗣後凡署理副都統事務之叅領員缺。著揀選副叅領奏請署理。其副叅領員缺。亦著揀選應行署理之員。奏請署理。○陞翰林院侍讀學士俞兆晟爲內閣學士兼禮部侍郎。○戊戌。

上回宮。○署直隸總督唐執玉疏報正月二十日。鳳凰見於房山縣石梯溝山峯。得旨。朕素不言祥瑞。屢降諭旨甚明。上年據散秩大臣尚崇虞奏稱。天台山民李萬良等呈報。十一月十三日黎明。見山中有一神鳥。高五六尺。

毛羽如錦。五色俱備。所立處羣鳥環遶。北向飛鳴等語。朕以邊地居民所見事屬渺茫。將所奏發還。未曾宣示廷臣。昨據總理石道事務散秩大臣常明侍郎宗室普泰奏稱。石工監督司官田周呈報。正月二十日。在房山縣石梯溝山中。見瑞鳳集於峯頂。五色俱備。文采燦然。工匠樵牧居民人等。約千有餘人。莫不共見。又據總兵官管承澤及順天府府尹孫嘉淦等。所奏亦皆相同。朕亦俱未宣示廷臣。可以知朕心矣。今據署總督唐執玉繕本具奏。朕思古稱鳳鳥。乃王者之嘉祥。朕撫躬自問。功德涼薄。不足以致鳳儀之上瑞。此事猶疑而未信也。○己亥。諭內閣。向因鋪墊倉廩。需用松板。令各省糧船隨帶。到倉交納。續經該部定議。產木之省。如江西。湖廣。及江安糧道所屬地方。則全解十分本色。其不產木之浙江。蘇松等屬。則解三分本色。七分折色。此便民利用之意也。今聞該地方所交三分。

本色亦於抵通之時始行採辦。以致通州木商與胥役勾通。包攬每板一片。較折色之數用銀多至四五倍。運丁不免苦累。查京通各倉。一年支放俸米。甲米空出。厥座應鋪墊一百五十座。其湖廣江西安徽三處所解松板。已足備用。即有應需採辦者。諒亦無多。所有不產木之浙江蘇松等屬。應解三分本色松板。著俱改徵折色。令各該糧道彙解通濟庫。以備採辦之用。其湖廣江西安徽等處全解十分本色者。著倉場侍郎嚴行稽查。不許收板官吏勒索使費。俟各倉厥鋪墊完日。將應徵本色若干之處具奏。請旨。諭八旗都統等數年來荷蒙

天眷。米價甚賤。爾等八旗米局。係將兵丁所關之米發賣。若米價甚賤。不能賣完。則積貯日久。米色易變。朕以爲此等米石宜俟下季發米之時。視各佐領下兵丁分內應領之米。將局內米照數給發。即行文倉場衙門照數坐

扣。則兵丁既可就近得米。而局內積貯之米亦不致變色糜爛矣。○恩給國子監肄業貢生。每年銀六千兩。爲衣食膏火之資。其六堂助教等官。命九卿於進士舉人內各舉所知。候旨揀補。

大清世宗敬天昌運建中表正文武英明寬仁信毅大孝至誠憲皇帝實錄卷之九十

大清世宗敬天昌運建中表正文武英明寬仁
信毅大孝至誠憲皇帝實錄卷之九十一

監修總裁官光祿大夫經筵講官太僕寺卿內閣大學士兼兵部尚書禮部尚書吏部尚書翰林院掌院

總裁官光祿大夫經筵講官起居注太僕寺卿內閣大學士兼兵部尚書禮部尚書吏部尚書翰林院掌院

第三等伯如十三級臣張廷玉光祿大夫經筵講官起居注太僕寺卿內閣大學士兼兵部尚書禮部尚書吏部尚書翰林院掌院

翰林院掌院事如左級臣楊永光祿大夫經筵講官太子詹事府內閣大學士兼禮部尚書如左級臣徐永光祿大夫

經筵講官議政大臣內閣大學士事務禮部尚書門下省掌印御史三奏等奉

敕修

雍正八年庚戌二月庚子朔諭內閣我國家

實錄卷九十一

膺圖受命則有佐命元臣際會風雲開拓疆
宇至於承平之世亦有勞臣宣力綏靖不庭
凡厥鴻猷駿烈焜耀旂常於是酌庸獎功錫
以公爵分爲一等至二等三等以第其勲勞
表其閥閱比於古者河山帶礪之盟爰及苗
裔永久勿替其盛典也朕考古封爵之制漢
唐以來公侯皆繫以郡縣之名而漢世功名
顯著者則加以美號如信武冠軍建忠定遠
之屬竝以榮名垂光史冊本朝封王者選用

嘉美字樣其嗣王襲封皆因之而公爵則但
分等次未有封號字樣朕意欲考其當日勲
庸錫以嘉名追加爲某公使勲勞之臣顯功
丕績常赫赫在人耳目間而其子孫承襲封
號亦皆顧名思義共知奮勉世爲國家効忠
抒力期踵美前人之光以副朕褒念勲舊之
至意至於宗室外戚則倣古恩澤侯之例命
爲奉恩公或承恩公以昭寵錫其如何命名
定制竝將歷來功臣勲戚加錫美號之處該
部詳查定議以聞○移廣東定海縣青寧司
巡檢駐太平汛儋州安海司巡檢駐薄沙汛
崖州把歲司巡檢駐樂安汛添設瓊山縣水
尾司巡檢一員萬州寶停司巡檢一員裁儋
州大豐倉大使一員瓊州府司獄一員從廣
東總督郝玉麟請也○壬寅春分朝

日於東郊

上親詣行禮○癸卯以內閣學士俞兆晟協理
戶部侍郎事○以鑲黃旗漢軍副都統宗室

色布肯署鑲白旗滿洲副都統○陞陝西西安協領陳良棟爲陝西西安左翼漢軍副都統○兵部議覆福建觀風整俗使劉師恕疏言福建世襲海澄公向以管轄兵馬支銷錢糧給與印信後營伍裁汰印信未繳今海澄公黃應纘多有親戚族人請託干求濫給印信文書混行文武衙門殊屬非宜查海澄公既無兵馬錢糧之責又無地方民社之司請令海澄公黃應纘將印信交與該督繳部查銷向後承襲之時俱給與敕書以昭憑信再外省世襲武職之員年及二十以上者請令各該督撫咨部引見或留京學習或分發各省督撫提鎮標下効力三年後果能弓馬嫻熟諳練營伍照伊應得之品級補用其有行走懶惰者奏明回籍行止卑污者題參革退將應襲之人另請承襲俱應如所請從之○以故喀爾喀輔國公三濟扎卜子密瓦扎卜襲爵○甲辰

上御經筵講畢賜大學士九卿詹事及講官等宴○乙巳諸王大臣等疏奏本年正月二十五日景陵寶城山上產有靈芝三本仰見聖祖仁皇帝深仁厚澤錫祚垂光皇上大孝純篤以聖祖之心爲心聖祖之政爲政是以誠敬感孚儲英陵寢請宣示史館永紀鴻庥得旨景陵寶城山上首春產瑞芝三本諸王大臣等奏爲朕純孝之所感孚朕撫躬自問生平事我皇考不敢當純孝之名但誠敬之心數十年如一日自御極以來不但一言一事仰體聖心而後見諸施行即夢寐之中一念舉發從無有知其不合聖意而敢存於胸臆者諸王大臣等稱朕以皇考之心爲心此實朕之惓忱至云朕以

皇考之政爲政朕之才力遠不逮我

皇考舉凡宣猷敷治之間雖黽勉效法究不能企及於萬一何能致芝草之嘉祥諸臣以此歸美於朕朕不居也實因我

皇考之聖德神功際天蟠地深仁渥澤積厚流光

上天特欲顯示天下臣民是以數年之中三見芝英於

陵寢以今之歷霜雪而挺生當首春而呈瑞稽

諸史冊更屬罕聞朕感

上天昭示之洪恩叨

皇考貽謀之景福慶幸歡欣不敢不宣布於衆庶使天下後世臣民知

上天之眷祐

皇考與

皇考之垂裕萬年者即瑞芝一事明顯昭著信而有徵固如是也著照所請宣付史館○諭吏部爲政之道務在得人朕加意旁求惟期

賢才奮庸布列庶位百職修舉嘉惠民生凡

所以遴選而登進之者亦多方矣雍正六年十月間以各處需員甚多而赴部銓選之人不敷揀用特降諭旨令京官大學士以下主事以上外官督撫以下知縣以上每人各舉一人送部引見今行之既已年餘而內外官員未經舉報者尚多則其平日必無深知灼見之人倘復輟轉遲延必致人萌奔競之心而滋夤緣請託之弊所當酌量變通者也現今會試中額廣至四百名其中必有可供任使之人而直省選拔貢生陸續來京亦可教導而成就之以備庶官之用著將各保一人之例停止若有已經到部者仍准其引見該部即行文在京各衙門併直省地方知之○諭直省督撫提鎮等兵民各有職業是以分隸文武管轄不使混雜難於約束致生事端聞得廣東瓊州遠隔海外其弁員等竟於額設兵丁之外另有掛名兵丁乃係無賴之徒

千把等員。利其餽送。即准附名投充。而此輩居然以營兵自居。不服地方官拘管。在營弁則以原非兵丁。又無糧餉。不行約束。在州縣則以名列戎行。非同編戶。不便置問。以致介在兩歧。恣行不法。欺壓良善。聚集匪人。甚為居民之累。瓊州一處如此。恐他處與此相類者不少。著各省督撫提鎮等。悉心確查。嚴行禁革。○以大學士蔣廷錫為會試正考官。禮部左侍郎鄂爾奇署工部左侍郎。順天府府尹孫嘉淦。內閣學士任蘭枝為副考官。○調廣西布政使張元懷為江南安徽布政使。司布政使。陞廣西按察使元展成為廣西布政使。司布政使。貴州貴西道張錢為廣西按察使。司按察使。○調福建福州右翼副都統董朝衡回京。陞福建福州協領顧弘譽為福建福州右翼副都統。○丙午。戶部議覆雲南巡撫沈廷正奏。南寧縣水災地畝。豁免錢糧。迨水退之後。補種有秋。請仍舊徵收。應不准行。

得旨。部駁。甚是。凡被災免賦之處。若地方官民詳報之時。以熟作荒。冒濫蠲免。則當從重治罪。若從前實係水淹。已照例蠲免。後因涸出地土。小民補種禾稼。仍欲徵收錢糧。殊屬不合。沈廷正所見卑小。著飭行。○署護軍統領青保疏言。大清門。天安門。端門。係下五旗護軍輪派看守。其應備之長鎗。撒袋。弓箭等器械。向係本身帶入。嗣後請照內門看守之例。俱令官造給發。從之。○丁未。遣大學士陳元龍祭先師孔子。○以鑲白旗滿洲副都統博第署正藍旗蒙古都統。陞鑲黃旗前鋒叅領滿丕為正黃旗蒙古副都統。調正黃旗漢軍副都統佟時茂為正白旗漢軍副都統。○戊申。祭大社。大稷。上親詣行禮。○己酉。復原任輔國公額士爵。○授輔國公星尼子都隆額為奉恩將軍。○以

正白旗蒙古副都統圖克善署鑲白旗滿洲

副都統○庚戌

孝康章皇后忌辰遣官祭

孝陵○以故喀爾喀輔國公沙克都爾扎布弟

巴爾桑襲爵○辛亥

上親耕耤田詣

先農壇致祭畢更服至耕所仍行四推禮畢

上御觀耕臺命莊親王允祿裕親王廣祿信郡

王德昭行五推禮吏部左侍郎宗室普泰戶

部倉場侍郎岳爾岱禮部右侍郎蔡世遠兵

部右侍郎永壽刑部尚書德明工部右侍郎

宗室塞爾赫都察院左副都御史王圖炳通

政使司通政使張懋誠大理寺少卿巴德保

行九推禮各以次耕如儀

上御齋宮順天府官員率耆老農夫行禮畢至

耕耤所農夫終畝王以下各官行慶賀禮賜

茶停止筵宴○

上幸圓明園○壬子恭刊

聖祖仁皇帝御纂書經傳說告成

御製序文頒行天下○以鑲藍旗滿洲副都統

在內閣學士裏行德祿通政使張懋誠俱署

工部侍郎事○癸丑以翰林院編修李清植

檢討張若涵俱署日講起居注官○喀爾喀

輔國公敦多布額林陳故遣官致祭○甲寅

諭內閣向以微員無級可降偶遇降級處分

即議以革職似屬未當是以降旨令吏部兵

部酌議隨經該部議奏凡處分止於降三級

者准其革職留任三年無過與以開復朕已

降旨依議今朕細思若照此例則有級可降

者已至調用轉不如無級可降者得以仍留

原任立法未爲允協著吏部會同兵部再加

詳議以聞尋議嗣後從九品未入流等官無

級可降遇應行降調之案在三級以內者如

到任已歷數月著該督撫將居官如何之處

聲明到部居官好者議以革職留任三年無

過開復平常者議以革職或甫經到任尚未

定其賢否亦著該督撫聲明到部議以暫行留任俟試看一年能黽勉効力准其三年開復平常者照例叅革至各部院筆帖式例應降調者亦令各該管官聲明送部照例定議從之○轉刑部右侍郎張大有爲左侍郎實授王國棟爲刑部右侍郎○旌表河南獲嘉縣烈女董明緒女董氏拒姦不污被刃殞命給銀建坊入祠致祭如例○乙卯吏部議覆甘肅巡撫許容條奏移設州縣事宜一靜寧

州屬之安定監地方請改歸通渭縣管轄其通渭縣治移駐安定監城一寧夏府屬之花馬池請添設州同一員屬靈州管轄一蘭廳同知請改爲河捕同知專司河橋稅茶法暨捕盜案件其平涼府屬之固原廳歸併固原州管理一鞏昌府屬之岷州廳改爲岷州設知州一員吏目一員靖遠廳改爲靖遠縣設知縣一員典史一員其岷州廳原管之茶務改歸洮岷道管理一岷州屬之勇家等五里

及鐵谷溝等二處地方請就近歸併漳縣管理均應如所請從之○河東總督田文鏡疏言武弁養贍家口僕從名糧之外別無所資若但給以步糧恐不敷用請自提督至守備馬步各半千總馬一步四把總馬一步三者爲定額各省一體遵行從之○改撥雲南互扯營歸需益州撥諾紅當虐戈舌猓羅營東屯耿屯田地歸宣威州管轄從雲南巡撫沈廷正請也○丙辰遣官祭

歷代帝王○遣官祭

闕聖帝君○諭內閣從來察吏之道莫先於獎廉懲貪蓋貪黷之風不息則上虧國課下剝民膏其爲吏治人心之害者甚大不止關係錢糧而已我

皇考聖祖仁皇帝澄敘官方深惡貪墨之蠹國病民所以警戒訓飭之者至矣祇以聖心寬大慈祥未曾將侵蝕國帑貪取民財之人置之重典姑且包涵望其徐徐感化此實

如天之仁也。乃不肖官員等。不但不知感激。悛改。勉爲廉吏。且恃有寬大之恩。心無畏懼。將侵盜貪墨。視爲固然。數十年來。日積月累。虧空婪贓之案。不可勝數。朕若不加懲治。仍

容此等貪官污吏。擁厚資以長子孫。則將來天下有司。皆以侵課納賄爲得計。其流弊何所底止。是以數年來。加意整頓。若果人心知儆。舊習漸除。令朕得施寬大之政。乃朕之至願也。此意於元年二年間。即屢向左右大臣等密言之者。近觀各省吏治。雖未必能澈底澄清。而公然貪贓犯法及侵盜錢糧者。亦覺甚少。是衆人悛改之象。與朕期望之意相符。亦可遂朕寬宥之初心矣。今欲大沛恩膏。酌免遠年承追之項。將各直省官員名下應追贓銀及侵欺。那移。流抵。分賠代賠銀兩。凡事在雍正三年以前。已經發覺者。該部查明情由。具奏候朕酌其情罪。降旨免追。其自雍正四年正月以後犯罪之案。乃屢經訓諭而不

悛改者。不准寬免。至於軍務錢糧關係重大。其昔年西寧肅州。阿爾泰軍需等案內應追銀兩。雖在雍正三年以前。亦不准豁免。此次特恩。乃朕仰體

聖祖仁皇帝寬大至意。爰施法外之仁。豈但本人及其子孫免追比之苦。獲再生之慶。即承追之地方。在官員則得免於處分。在吏胥亦得免於杖責。案牘減省。事簡刑清。莫不受國家寬大之賜。咸當感激警省。互相勸勉。以循良爲楷模。以貪墨爲鑒戒。則大小官吏。永遠共沐國恩。倘因逾格寬宥。轉啟玩法之心。復蹈從前之轍。則曠典豈可再邀。國憲豈能再免。且背天逆理。莫此爲甚。亦斷不能逃

上天之譴責也。○予故北路軍營河南河北總兵官閃文綱祭墓如例。賞銀一千兩。○丁巳清明節。遣官祭

永陵

福陵

昭陵

昭西陵

孝陵

孝東陵

景陵○

上詣

恩佑寺行禮○晉封誠郡王允祉為和碩誠親

王。貝勒允禩為多羅愉郡王。貝子允禔為多

羅貝勒。封二十一阿哥允禧。二十二阿哥允

祐俱為固山貝子。二十三阿哥允祹為鎮國

公○戶部議覆浙江總督李衛疏言嘉興秀

水二縣有義田餘租。項係從前民間捐置

之田。自康熙二十八年。學臣周清源題歸官

徵備賑。租有定額。窮佃不勝其累。間有逃亡

並累及原捐之後裔。請將此項田租除五六

七年未完分年帶徵外。所有年久未完銀米

槩予豁免。並請將此田分別給還歸社永免

官徵。應如所請。從之○賑湖南澧州。臨湘等

七州縣岳州等三衛旱災饑民並免雍正七

年分額賦有差○予故鑲紅旗滿洲副都統

亨特祭奠如例○旌表直隸元城縣烈婦孫

月樸妻謝氏拒姦不污投繯殞命給銀建坊

入祠致祭如例○戊午陞陝西西安按察使

碩色為陝西西安布政使司布政使湖南糧

道楊勲為陝西西安按察使司按察使○陞

直隸山永副將胡傑為河南河北總兵官前

往北路軍營統領綠旗兵丁○己未諭內閣

滿漢內外兵丁朕皆一視同仁冀其俯仰有

資吉凶用度不致匱乏為此拳拳於心久矣

但經理區畫之方不得不由近而遠次第舉

行以期無弊是以首及在京之八旗上年則

通行各省駐防及督撫提督標下按其兵丁

之數分別賞銀之多寡令各該管大臣商酌

營運取息以備兵丁支領之用至於各省鎮

標則擬漸次及之今見各處督撫提督具奏

前來亦有經理得宜可收實用者亦有布置

未當難於舉行者。可見料理此事之難矣。至於鎮臣之才。又不及提臣等。則料理愈覺繁難。倘因朕此時加惠兵丁。而啟將來爭競以致弁兵上下之間互相齟齬。則是恤兵之美意轉生營伍之事端。非所以愛之也。著各該總兵官。遍行詢問。標下兵丁等。若朕賞銀後。伊等聽該管官措置出納。不生貪得冒領之心。即或措置失宜。甚至有侵蝕虧缺者。伊等亦不忍爭怨望。致生事端。如此一一出具甘

結。令該總兵官具疏保題。至於營運經理之法。著該省總督巡撫提督會同總兵官悉心商酌。如何料理。可以常久遵行。無弊竝令督撫提督酌量該總兵能否辦理。此事具疏保題到日。朕當降旨加恩。若該省無總督提督。即令巡撫確議保題。其每年出入查核及接任交代等事。俱照督撫提標之例行。○諭戶部。從前歷年戶部虧空庫銀至二百五十餘萬之多。怡親王曾奏請將本部餘平飯銀陸

續代爲完補。朕思歷年該管之堂官庫官所司何事。若不責令賠補。無以示儆。因令孫渣齊秉公開報。著追乃孫渣齊開報時高下其手。甚屬不公。以致追完之數甚少。拖欠之項甚多。累年不能清結。今朕念孫渣齊之祖舊日忠勲。已將伊免罪釋放。竝免伊名下應追銀兩。其餘應追未完人員。亦一體施恩。悉行免追。仍照怡親王所請。將所存餘平飯銀代爲完結。○庚申。鑲白旗漢軍副都統匡名世

緣事革職。陞正藍旗叅領倭星額爲鑲白旗漢軍副都統。○辛酉。免直隸薊州武清玉田三州縣雍正七年分水災額賦有差。○壬戌。江南江蘇按察使馬世珩緣事革職。調貴州按察使。徐本爲江南江蘇按察使。司按察使。廣西按察使張鉞爲貴州按察使。司按察使。陞廣西蒼梧道張體義爲廣西按察使。司按察使。○理藩院遵旨議奏外國進貢來使俱有館舍安置。惟回紇未經置館。請撥官房一

所立爲回紇館並擇在京回民頭目二名居住看守從之○旌表江南陽湖縣烈婦馮繼冉妻薛氏拒姦不污投繯殞命給銀建坊入祠致祭如例○甲子移浙江寧波府同知駐鄞縣之大嵩定海縣岑港司巡檢駐岱山鄞縣四明驛丞駐江干添設定海縣沈家嶼巡檢一員從浙江總督李衛請也○賑江南壽州合肥二州縣廬州衛旱災饑民○乙丑孝昭仁皇后忌辰遣官祭

景陵○諭內閣向來外省各標營沙唬趕繒等船原令道員會同副將監督修造道員遴委同知通判承修副將遴委營都司守備監修聞承修之員備辦物料必經監修驗看自千把以及遊副逐層需索及如式修造赴各標營交收又有驗看勒指之弊迨交收之後一任船隻棄置河干而淋日晒船中器械繩索爲頭舵等人盜竊變賣而該管將弁罔不追究夫始則借端勒索後則聽其毀棄豈非以

承修之責專在文員而監修之武弁置身局外遂至視同陌路乎此等銅弊聞各處皆然而京口將軍標下爲尤甚嗣後修造標營船隻著道員副將會同領價道員遴委丞倅副將遴委都守協同辦理修造如係將軍標下船隻即遴委參領以下等官同領同辦其船隻交收之後在汛停泊責令頭舵管蓋澆洗每歲令該管將弁出具印結送督撫查核如有陞遷事故令其具結交代至於修造船隻有小修大修拆造之不同是以工料多寡懸殊今聞船未發廠頭舵人等已將在船什物私行盜賣即屆小修亦必令其拆換添備甚屬不法嗣後著將什物一併具冊移交如有短缺將該管將弁及頭舵人等分別叅追總之各省船隻每當修造之時及交收之後其中種種弊端難以枚舉今就朕所聞頒發諭旨在各省將軍督撫提督等悉心商酌時加訪察以除諸弊倘諭旨中有難於奉行之處

亦著據實陳奏○丙寅添設山東莒州石埭集巡檢一員從河東總督田文鏡請也○丁卯兵部議覆浙江總督李衛條奏一步兵內有食水師營之糧者查令改歸水師倘不能駕駛船隻另募補足嗣後如有混食查出照冒支糧餉例治罪一內外洋面大小船隻令於蓬上書爲某處某號并船戶姓名刊刻船尾以別姦良并通行沿海各省督撫提鎮一體遵行俱應如所請從之○予故正紅旗滿

洲都統蘇丹祭奠謚勤僖○予故廣東潮州總兵官尚濛祭葬如例○戊辰諭陝西督撫等安西沙州等處招民屯墾原爲惠養邊民之計是以累年以來備極籌畫經營期其得所今從雍正六年民戶到齊之日計算至辛亥年例當輸賦之期但念小民甫經安插公私兼顧爲難著寬期二年於癸丑年陞科俾民力寬裕俯仰有資以副朕格外加恩之意○加福建總督高其倬爲太子太保○陞

鑲紅旗蒙古副都統秦布爲陝西西安將軍○南掌國王烏孫遣使以猛花等奉表朝賀並請永定貢期得旨南掌國遠在西南徼外從來未通職貢今遣使前來奉表修貢具見惻忱朕心深爲嘉悅所請著禮部議奏尋議嗣後南掌國酌令五年進貢一次今年初次納貢應照蘇祿國初次進貢之例頒賜敕諭一道令該使臣恭捧還國以示嘉獎從之○敕諭南掌國王朕惟輸誠効順遠人昭嚮慕之忱錫命褒庸天室懋撫柔之典矧茲殊域逖聽風聲既納蓋誠宜加賚予爾南掌國屬在遐陬克抒丹悃恪恭遣使梯航直達於神州懇切陳詞琛贄並將其方物允堪嘉尚用錫褒榮茲特降敕獎諭並賜王文綺器皿等物王其祇受益矢虔恭以副朕眷至王所請貢期朕念爾國遠在西南往來迢遞已敕禮臣定議酌俟五年之外一修歲獻之儀若王有所敷陳則可隨時上達故茲敕諭○旌表江

南合肥縣烈婦蔡機妻金氏夫亡殉節從容自盡寶應縣烈女刁啟沃聘妻朱氏未婚夫亡投繯殉義各給銀建坊入祠致祭如例

大清世宗敬天昌運建中表正文武英明寬仁信毅大孝至誠憲皇帝實錄卷之九十一

大清世宗敬天昌運建中表正文武英明寬仁信毅大孝至誠憲皇帝實錄卷之九十二

敕修

雍正八年庚戌三月己巳朔諭內閣朕愛惜

人材不忍聽其限於考成遂至放廢而外任各官案件繁多往往罹於叅罰是以數年來因公呈誤之員例應降革者多於覆本之內降旨令該上司出具考語送部引見若其才具稍有可用必再試以職任而成全之雖片善寸長亦不肯輕棄也今思在京部院司官及旗員等雖叅罰之案不多然亦有因公呈誤者所當一體加恩與以贖過自新之路嗣後在京文武各官有因公呈誤至於降革而

監修總裁官光祿大夫經筵講官太僕寺卿內閣學士兼禮部尚書總理事務三寶通奉臣等奉
總裁官光祿大夫經筵講官太僕寺卿內閣學士兼禮部尚書總理事務三寶通奉臣等奉
事三年伯加十三級臣張廷玉光祿大夫經筵講官太僕寺卿內閣學士兼禮部尚書總理事務三寶通奉臣等奉
翰林院掌院學士加二級臣福敏光祿大夫經筵講官太僕寺卿內閣學士兼禮部尚書總理事務三寶通奉臣等奉
經筵講官太僕寺卿內閣學士兼禮部尚書總理事務三寶通奉臣等奉

任內無錢糧不清及治罪之案者准照外員之例令該堂官該旗大臣出具考語奏聞帶領引見或將該員仍留原任或另行試用或照例降革候朕降旨裁奪又諭朕聞有數省督撫藩臬不能約束書吏者其胥役人等狐假虎威無惡不作而督撫衙門爲尤甚其名有内外班之分内班總管案件外班傳遞信息朋比作姦種種嚇詐飽其貪壑則改重爲輕拂其所欲則批駁不已即如廣東各案盜犯未獲無論年月遠近不拘盜犯多寡總督書辦槩於冬季寫票差提承緝之吏日典史巡檢齊至肇慶示期比責其陋規則有院房年節禮每員到彼各送書辦銀三四十兩遂准回任若微員無力餽送則差押不放甚至稟請杖責此粵省之弊端也至於各省督撫書役則有承舍旗牌等名皆自號爲差官該督撫給票差遣亦用差官字樣而通省吏民遂莫不以差官目之平日踞坐班房包攬

詞狀每於府州縣官謁見督撫之便私行囑託濫准枉斷及差往他處則肩輿逾分馬掛胃纓儼然官長沿途拜會有司需索夫馬餽送此輩狡猾性成或以小忠小信趨奉本官得其歡心間或委其訪察屬員事跡則假公濟私作威作福其害更不可言矣從來胥吏之爲患有關吏治在精明廉察之督撫自能覺照而防範之而庸懦之督撫爲所欺而不知受其累而不悟者正不少也又如藩司掌通省之錢穀臬司掌通省之刑名案牘如山不得不仗熟練之書役爲之辦理而其中百弊叢生舞文弄法之處不可悉數朕素知此輩之情狀已經定例嚴申禁約今再行訓飭是在督撫藩臬等約束於平時訪察於臨事不因熟悉條例而輕聽其言不因善承使令而誤墮其術秉公駕馭用意防閑一有見聞即加懲治不存姑息之見不留回護之心如此則若輩雖欲舞弊而不能雖欲玩法而不

敢矣。儻任封疆岳牧之寄。於一二管轄之書吏。不能使之安分守法。革面洗心。又安能察吏安民。詰姦禁暴。成移風易俗之治乎。朕深爲庸懦之督撫藩臬耻之。○改江南奇兵瓜洲二營歸督標。江寧副將管轄。從署兩江總督。范時繹請也。○雲貴廣西總督鄂爾泰題。廣西太平府信倫土知州馮朝憲故。其子馮時昌承襲。年幼。請以其妻黃氏協理。下部知之。○庚午免直隸天津靜海二州縣。雍正七年分水災額賦有差。○辛未諭內閣。向來朕聞

福陵前面水法稍更故道。祇以未得精通地理之人。未敢輕議。上年福建總督高其倬。陞見來京。伊素精堪輿之學。特命率同主事管志寧等。前往奉天敬謹相度。據奏

陵前水法因夏日溢口而流太近左畔山脚。弓抱之勢微覺外張。應即行修理石工。俾循故道。則水抱沙圓。益增吉慶等語。朕覽高其倬

等奏摺及所繪圖樣。甚爲明晰。惟是

祖陵工程關係重大。著將奏摺圖樣發與滿漢文武大臣等。公同閱看。將應否修理之處。敬謹定議。奏聞。○命江西省開局鼓鑄。從江西巡撫謝旻請也。○改浙江象山協昌國石浦二汛守備一員。千總一員。把總一員。爲水師。以定海標石浦淡水二洋汛歸昌國汛分管。從浙江總督李衛請也。○壬申諭內閣。牧令爲親民之官。一人之賢否。關係萬姓之休戚。自古以來。慎重其選。而朕之廣攬旁求。訓勉告誡。冀其秦循良之績。以惠我烝黎者。亦備極苦心矣。惟是地方事務。皆發端於州縣頭緒。紛繁情僞。百出而膺斯任者。類皆初登仕籍之人。未練習於平時。而欲措施於一旦。無怪乎徬徨瞻顧。心志茫然。即採訪諮詢。而告之者。未必其盡言無隱。此古人所以有學製美錦之歎也。向以大學士朱軾左都御史沈近思。外任多年。周知地方利弊。雍正二年曾

令二臣商酌規則以爲州縣之指南乃書未就緒而沈近思物故邇年以來朱軾復時多疾病此事遂至遲延去年始降旨令總督田文鏡李衛各抒所見繕錄諸條以進朕親加披覽在二臣各就其所閱歷者而言繁簡同異之間不必一致而慎守官方勤恤民隱其大指則一而已矣爰付剞劂頒賜州縣官各一帙俾置几案間朝夕觀覽省察提撕治效未臻必思所以勉之弊端未革必思所以去之本之以實心行之以實力毋始勤而終怠毋靜言而庸違如此則不但國家得司牧之賢草野有父母之頌而爲牧令者從此身膺顯擢名標史冊豈不美歟○癸酉以原任光祿寺卿趙之垣爲通政使司通政使○甲戌命西藏辦事內閣學士僧格統兵一千五百名至騰格里腦兒駐防○河東總督田文鏡疏報祥符縣開墾雍正七年分田地一百七十頃有奇下部知之○乙亥諭內閣六科史

書錄書每年著派出滿漢翰林各二員悉心稽查專司其事○以湖廣荊州將軍哈達爲內大臣兼正黃旗護軍統領原任湖廣荊州將軍吳納哈暫管荊州將軍事務○丙子署廣東巡撫傅泰疏言瓊州府屬生黎誠心向化願附版圖請照例編入保甲准其輸納丁糧得旨朕念生黎無田可耕本不忍收其賦稅但伊等傾心依嚮若將丁銀全行豁免恐無以達其抒誠納貢之悃忱著將每名情願輸納丁銀二分二釐之數減去一分二釐止收一分以作徭賦該地方文武大臣應時時訓飭所屬有司弁員等加意撫綏悉心教養務令安居樂業各得其所以副朕胞與萬方之至意○鑲紅旗護軍統領七十以老病乞休允之○旌表烈婦江西建昌縣胡治臣妻范氏因夫逼賣守節投繯陝西涼州鎮兵張兆斌妻李氏夫歿邊疆赴井殉死烈女江西永豐縣周天賜聘妻吳氏安福縣彭隆祖聘

妻謝氏俱未婚夫亡捐軀殉節各給銀建坊入祠致祭如例○丁丑陞右翼前鋒統領衮泰爲鑲藍旗蒙古都統仍留軍營以鑲藍旗護軍統領侯馬蘭泰署鑲藍旗蒙古都統輔國公伊爾登管理鑲紅旗護軍統領事務○戶部議覆署福建總督史貽直疏言請自雍正八年爲始每於春冬動撥臺粟十六萬六千餘石運赴廈門令福興等府屬廳縣按積穀之數派運入倉易換舊存倉穀平糶給兵永著爲例應如所請從之○旌表烈婦直隸元城縣鄭國器妻宋氏逼嫁不從赴井完節貴州安順府猓民羅廷勝妻馬氏逼嫁不從投繯完節各給銀建坊入祠致祭如例○戊寅諭內閣各省駐防官員嗣後有効力年久因老辭職者著該將軍等將伊食俸披甲之年及在行間効力之處聲明咨送兵部奏聞候朕閱看其應加恩者照在京旗員例加以恩施○庚辰諭內閣寧夏地方萬民衣食之

源在大清漢唐三渠水利是以定例每年疏濬修理使水流暢足民田均沾灌溉自歷年官員疎忽怠玩以致閘道堤岸損壞衝決日見淺窄而三渠之中惟唐渠爲尤甚近來其口過低其梢過高水勢不能逆流而上多誤小民耕種之期雖每春定有歲修之例然不能以一月之工程整十數年之荒廢也現今兵部侍郎通智開濬惠農昌潤二渠於寧夏水利自然明悉著會同光祿寺卿史在甲即行查議今歲預備物料明春動工修補務令三渠堅固俾邊境黎元灌溉有資永享盈寧之慶○賜江南下第舉人顧成天進士一體殿試○移福建福清縣縣丞駐平潭從署福建總督史貽直請也○辛巳給直省下第舉人路費銀兩有差○旌表河南烈婦洛陽縣張景齡妻韓氏夫亡殉節絕粒捐軀汝州姚紀妻喬氏逼嫁不從自刎殞命各給銀建坊入祠致祭如例○癸未四川巡撫憲德題雅

州把抵安撫使慎白利故請以其子囊索承襲下部知之○甲申予故刑部右侍郎王承烈祭葬如例○旌表山東濟寧州烈婦白何義妻陳氏拒姦不污投井完節給銀建坊入祠致祭如例○乙酉諭內閣從前陝甘各標及松潘鎮出征兵丁添補衣裝據大將軍岳鍾琪奏明動支各兵家口夏秋二季一半餉銀製備今總督查郎阿等奏報俱已製辦運送軍前訖兵丁等効力行間遠征邊塞朕心深為軫念此所添補衣裝銀兩著加恩賞給不必扣除伊等家口月餉即行文陝甘川三省並大將軍處曉諭兵丁知之○以鑲藍旗叅領雅瑚署正紅旗蒙古副都統陞正黃旗叅領趙德沛為本旗漢軍副都統○以故三等精奇尼哈番陳福孫陳益襲職○宴南掌國進貢使臣於禮部○旌表河南獲嘉縣烈女司三女司氏強姦不污投繯殞命給銀建坊入祠致祭如例○丙戌

上詣

恩佑寺行禮○諭內閣凡官員始初被叅革職發審及審係全虛例應准其開復該部往往但免其罪而以已經革職無庸議含糊歸結非情理之正又有原叅重罪審虛而該員尚有輕罪應以降級罰俸歸結者則應開復其官按其所犯與以降級罰俸之處分方於情法允協其應如何明晰定例俾內外通行遵奉著九卿會議具奏尋議嗣後官員被叅革職發審者審係全虛照例准其開復如該員先經別案革職者本案審虛止將審虛之案開復其從前降革之案不得概與開復其先經別案降革留任者本案審虛亦將審虛之案開復俟補官日仍將從前降革留任之案帶於新任至原叅重罪審虛而該員尚有輕罪例應降級罰俸者將原叅革職之案准其開復按其所犯輕罪分別議處永著為例從之○又諭直隸水利營田工程怡親王辦理

多年實心任事。各官遵其訓示。罔敢怠玩。今王偶抱微恙。朕令靜養調攝。不宜復以繁瑣之務使之縈懷。著將水利衙門一切大小事件。應啟知怡親王者。俱稟知大學士朱軾定奪辦理。有應行奏聞者。朱軾即請朕旨。俟怡親王全愈之日。再行通知。其在工官員等。勿以怡親王不事督率稽查。遂生玩忽之念。嗣後工程重大事務。有調度失宜者。則朱軾之責。至於修築不堅。防護不慎。管束不嚴。與怠惰疎虞。推諉遲誤等弊。朕皆於分理之官員是問。儻少有不遵。或經朕訪聞。及怡親王全愈之後。查出題參。定行從重治罪。○諭戶部。湖南新設永順一府。所轄永順。龍山。保靖。桑植四縣。應徵秋糧。向係土司交納。實不從田畝徵收。每年雜派任意輕重。至於肥饒之田。土官自行收種。餘復爲豪強分佔。民間祇有零星硤确之地。自改土歸流以後。有司因田畝未經清丈。或仍照舊冊攤派。在無田之民。

陋規尚未盡除。而隱佔膏腴者。不納田賦。殊非任土作貢之義。著將永順一府秋糧豁免一年。令有產之家。自行開報。准其永遠爲業。按田肥瘠。分別起科。一切雜派私徵。嚴行禁革。是在督撫等。督率有司。善爲經理。儻奉行不善。致土民不免疑懼。則咎有攸歸矣。○丁亥。命大學士張廷玉。蔣廷錫。俱暫理三庫事務。○戊子。添設四川保寧。順慶。夔州三府同知各一員。寧遠。雅州二府通判各一員。敘州府照磨一員。越雋衛經歷一員。順慶。重慶二府司獄各一員。嘉定。潼川。達合。四州州同各一員。嘉定。潼川。眉。邛。資。綿。瀘。忠。已。劍。十州。州判各一員。成都。華陽。巴。墊。江。渠。大。竹。宜。賓。富。順。隆。昌。永。寧。奉。節。梁。山。萬。平。武。西。昌。榮。遂。寧。德。陽。保。十。九。縣。縣丞各一員。富順。南。溪。綿。竹。三縣主簿各一員。建始。保。汶。川。三縣典史各一員。邛州之火井。瀘州之嘉明。鎮遠州之麻柳場。簡州之龍泉驛。會理州之苦竹壩。灌。

縣之白沙河。新都之彌牟鎮。已縣之木洞鎮。銅梁之安居縣。治南充之東觀場。岳池之黎梓。衛南部之西河。日廣元之百丈關。朝天鎮。昭化之白水。通江之樓壩。關宜賓之橫江。宣化驛。屏山之石角營。萬縣之市郭。里雲陽之雲安。厥平武之中壩場。犍爲之牛花溪。射洪之大庾渡。蓬溪之蓬萊鎮。敘永廳之古蘭州。等巡檢各一員。裁太平縣明通巡檢一員。移建武通判。駐屏山縣之新鎮。從四川巡撫憲德請也。○庚寅。諭吏部。查例載。官員失察衙役犯贓十兩以上者。革職。朕思。胥役衆多。一官之耳目。難於周遍。儻知而故縱。自當從重處分。若但失於覺察。即將本官罷黜。則賢員因此累誤者不少矣。情有可原。而處分太重。轉易滋隱匿之弊。此應加通變者。該部其悉心詳酌。另行定例具奏。尋議。嗣後直省衙役犯贓。本管官除知情故縱。照例革職外。其止於失察者。請照在京部院司官之例。十兩以

上將該管官降一級留任。不及十兩者。罰俸一年。令該督撫於疏內詳悉聲明。交部分別議處。從之。○諭兵部。各省鎮標兵丁。原欲給與生息銀兩。資其吉凶家事之用。現今各省督撫提鎮。公同酌議。俟回奏到日。再降諭旨。朕念安西一鎮。遠在口外。與他處不同。應先沛恩澤。查鎮標鎮屬沙協共兵丁六千四百名。著賞銀二萬兩。爲生息之本。○署江西巡撫謝旻疏報。進賢南昌吉安等三十八州縣衛所。開墾雍正七年分田地四百九十八頃有奇。下部知之。○裁廣東武寧大陵二驛。驛丞各一員。其驛務歸各該縣管理。改欣樂平山平政蘇州四驛驛丞缺。俱爲巡檢。從署廣東巡撫傅泰請也。○旌表順天府密雲縣烈婦張顯妻姚氏。拒姦不污。被刃殞命。給銀建坊。入祠致祭。如例。○辛卯。諭內閣。午門外朝房之南。科房之北。有碑亭一所。供奉皇考聖祖仁皇帝御製臺省歲碑文。理宜恭敬

嚴肅洒掃潔清以昭嚴恪之誠聞朝會之期各官齊集往往列坐碑亭之內談笑喧譁箕踞傲慢又或書吏奴僕等抱牘出入無人禁止甚為不敬查此地與六科相近即著六科輪班撥人護守每日掃除潔淨虔謹啟閉儻官吏人等仍敢擅入視為憩息之所著輪班之科衙門即行叅奏如科員不行查叅經朕訪聞定行交部察議其碑亭建立已久如有應行修理之處著工部敬謹修理○裁湖北

荆山荆南孫黃漢江鄢城五驛驛丞各一員其驛務歸各該州縣管理從湖廣總督邁柱請也○旌表廣東電白縣烈女劉氏強姦不污被刃殞命給銀建坊入祠致祭如例○壬辰諭內閣凡兵丁等支給糧餉原為仰事俯育之資不容絲毫扣剋朕聞陝西興漢鎮有加米部費一項每年兵丁公湊銀三百兩同奏銷銀兩一併交送部科名曰部費又如慶賀表箋每年給陋規銀四十兩齎送冊籍每

年給陋規銀二十四兩興漢一處如此則各省與此相類者不少矣此皆內外胥吏等彼此串通巧立名色借端科派以飽私橐弁兵等力量幾何安能供此旁出之使費著通行各省營伍若有似此陋規即嚴行禁革如部科書吏人等仍前需索或於文移冊籍中故意搜求著該管大臣等具摺叅奏○予故刑部左侍郎繆沅祭葬如例○甲午解兩江總督范時繹任調署福建總督吏部左侍郎史

貽直署兩江總督陞監察御史伊拉齊為江西布政使司布政使江西按察使胡瀛緣事降調以原任廣東按察使棲儼為江西按察使司按察使○署古北口提督魏經國疏言各省提鎮等官蒙恩給親丁名糧馬步各半但各處額設不齊其馬兵甚少之處請以二步一馬抵算得旨提督等官親丁名糧前降旨准其馬步各半各省通行者乃朕體卹武弁俾得養贍從容之意今覽魏經國所奏有

不得不因地制宜之勢。著將此奏通行直省。令該督撫提鎮各就本地營伍情形。悉心妥議具奏。○乙未。諭內閣。昔年

聖祖仁皇帝駐蹕熱河時。凡商民貨物往來。俱不輸稅。嗣後著嚴行稽查。無論滿洲綠旗兵弁。僅有需索商民者。即指名題參治罪。○丙申。

上回宮。○諭內閣。昨據署理南澳總兵官張起雲摺奏。雍正六年六月內。南澳鎮巡海哨船。遭風飄爛。淹溺弁兵一案。其實在淹沒者。係把總一員。兵丁十四名。被淹而幸獲生全者。兵丁九名。其餘兵丁三十七名。並未上船。隨行乃冒開姓名。希圖領賞。皆由千總蔡文郁守備林甲俊等。冒濫報詳等語。隨據署提督許良彬摺奏。與張起雲所奏相同。朕念江海之中。風濤不測。凡官弁兵丁。因公事差委。遭風受困者。著照軍功加恩。僅有不幸至於身故者。著照陣亡之例。優加賞卹。此朕軫卹弁

兵之特恩。亦料其不忍欺誑冒濫也。豈意舉行伊始。即有南澳鎮巡海哨船。遭風冒開兵丁三十七名之事。經張起雲查出。奏請許良彬亦即據實奏聞。著將張起雲許良彬交部議敘。近有條奏內稱。粵東三面環海。例應遊奕巡查。而公事差遣往來。亦必經由海道。遂有無賴營兵。視卹賞之特恩。爲射利之捷徑。或值行船擱淺。偶爾擦傷。或船已停泊。近岸撞碎。是皆駕船不謹之故。而船內兵丁。惟恐責令賠修。轉捏報人船飄溺。各營代詳請賞。甚至有將戰船暗地毀損。希圖朦混邀賞者。即如上年龍門協把總張賓帶兵巡海。遭風壞船。而弁兵多人。均扶篷登岸。又如百總徐禧帶兵護送鹽船。偶爾被風損船。人俱登岸。無損。此皆濫竊恩賞者。況粵東各汛水師。無不熟識水性。乘波出沒。事屬尋常。若一經被風飄溺。並未淹斃。遂准領銀三十兩。彼善於泅水之兵丁。得一次之賞。較二年之餉而有餘。

難免乘機作弊。應請嗣後若有遭風身故之兵弁。仍照例優卹。外其被溺而仍獲生全者。可否停其賞給等語。朕覽條陳所奏。合之張起雲許良彬所參。是閩廣濱海之區。事同一轍。竟以從優卹賞之恩。起小人貪利冒賞之念。將來或至暗傷船隻。滋弊作姦。公事轉至貽誤。俱未可定。況閩粵二省於沛恩之初。即有此等之事。則其他濱江沿海之地。倣效而行。亦勢所不免矣。著各省督撫提鎮。通行曉諭水師兵弁等。嗣後若有遭風受困者。務據實開報。該管營弁確查轉詳。勿以一時圖利之念。忘朝廷格外之恩。而蹈欺罔之罪。曉諭之後。該管大臣等。益當仰體朕心。稽查核實。儻有不應賞而賞。與應賞而不賞者。經朕訪聞。皆於該管之大臣是問。○免直隸寶坻縣雍正七年分水災額賦有差。○丁酉諭內閣。教職一官。陶成士類。關係甚重。凡科甲出身之知縣。有准督撫題請改教之例。蓋以該員

才具不足以治民。而學品尚堪以訓士。故畀以師儒之席。俾得展其所長。以爲國家興賢育材之助。竝非以縣令改教。使不才者可借以藏身。而爲督撫者。可以濫行題請也。朕恐改補之員。心志隳頽。怠忽職守。從前所降諭旨甚明。嗣後如有不堪課士之員。祇合勒令休致。儻仍瞻顧苟且。題請必將該督撫議處。著通行各直省知之。○戊戌改雲南宣威州雷益驛務歸該州管理。可渡驛務歸州屬之倘塘驛丞管理。從雲南巡撫沈廷正請也。

大清世宗敬天昌運建中表正文武英明寬仁
信毅大孝至誠憲皇帝實錄卷之九十二

大清世宗敬天昌運建中表正文武英明寬仁
信毅大孝至誠憲皇帝實錄卷之九十三

監修總裁官光祿大夫經筵講官太僕寺卿保和殿大學士兼兵部尚書辦理兵部事務三等伯加五級臣鄂爾泰
總纂官光祿大夫經筵講官起居注太僕寺卿太子太保保和殿大學士兼戶部尚書仍兼管吏部尚書辦理吏部事務
三等伯加十三級臣張廷玉光祿大夫經筵講官起居注太僕寺卿太子太保保和殿大學士兼禮部尚書加六級臣徐本光祿大夫
翰林院掌院學士加二級臣福敏光祿大夫經筵講官太子太保東閣大學士兼禮部尚書加六級臣徐本光祿大夫
經筵講官兼職大臣協辦內閣大學士事務禮部尚書仍兼管太常寺馬廠寺事務臣三泰等奉

敕修

雍正八年庚戌夏四月己亥朔享

太廟

上親詣行禮○賜廣東舉人盧伯蕃爲進士一

體殿試○策試天下貢士沈昌宇等於

太和殿前制曰朕紹續洪基撫臨區宇勤求
治理盱食宵衣罔敢暇逸深惟邳隆之世朝
宇有喜起之風臣鄰矢公忠之誼司民社者
樹懋績列庠序者砥純修朕與中外諸臣諄
復詰誡庶幾黽勉恪恭各殫厥心臻茲盛軌
易曰天地交泰言明良之慶也書曰推賢讓

能庶官乃和言師濟之美也。蓋堂陞孚於一德而後謨明弼諧克贊其猷僚采合爲一心而後撫辰凝績共收其效朕推心置腹一本至誠冀百爾臣工抒誠啟沃以襄治化而在廷諸臣果能精白乃心夙夜獻替無愧篤棐之義歟抑羣策羣力固將翕受敷施何以俾同朝共事之臣和衷交勉以躋膺歌颺拜之盛歟人臣職內職外皆朕股肱耳目之寄必也忠以居心公以涖事然後能與君爲一體苟黨援互結而懷溺情阿比之私文貌相承而挾矯詐沽名之術何以稱靖共匪懈無忝厥職也今欲使內外諸臣相勉於古大臣公忠體國之誼欽乃攸司無載爾僞勵匪躬之節而凜勿欺之忱果何道之從歟至於牧令爲親民之官一人之賢否萬姓之休戚係焉而初登仕籍之人未嘗試之以事何由知其勝任與否而用舍之歟天下州縣繁多有一官即需一人銓補既不容以稍緩而又欲酌

繁簡之宜使人稱其官才符於職其道安在夫課吏者督撫之責也務爲姑息必長廢弛玩愒之風稍涉苛求又非爲國家愛惜人才之道何以勵其操宗作其志氣策其不逮宥其過愆使羣吏承風率教鼓舞奮勉以奏循良之績歟國家造士之典至渥所期於士者至厚非專以文詞相尚也必崇實學敦實行處則爲經明行修之彦出則爲通方致遠之材始克副長育造就之至意乃海內之士或馳驚於聲華或緣飾於巧僞而喬野樸魯之質又拘迂固陋而無適於用將欲使之洗滌積習相與進德而修業其何以漸摩陶淑因材造就以儲譽髦之選歟夫君臣上下一德一心斯庶官有所表率而各殫厥職矣內外官僚克勤克慎斯羣材莫不奮勵而各端其習矣爾多士留心經濟有素其各抒所蘊以對朕將親覽焉○庚子和碩淳親王允祐薨輟朝三日賜祭二次造墳立碑謚曰度○陞

翰林院侍講學士德齡爲內閣學士兼禮部侍郎○調鑲藍旗漢軍副都統黑色爲正紅旗蒙古副都統○癸卯傳臚賜殿試貢士周霽等三百九十九人進士及第出身有差○以正黃旗護軍統領兼內大臣哈達爲右翼前鋒統領○復設直隸邢臺縣西黃村巡檢一員移行唐縣兩嶺口巡檢駐上碑村從署直隸總督唐執玉請也○甲辰諭內閣據署理川陝總督印務查郎阿摺奏川省墊江忠州等屬姦徒楊成勳王可久等捏造妖謠吹角嘯聚匪謀敗露楊成勳自縊身死今拏獲黨犯陳文魁楊成祿等搜出訴狀怨白等稿言詞雖鄙俚不經而其中指稱忠州地方丈量田地科派需索騷擾累民等事則曰禍冤起於戊申年奉旨清丈民田又曰上憲愛民如子察寃如神等語查四川清丈之舉始於馬會伯之奏朕惟恐不便於民諭令憲德悉心酌議以定行止隨據憲德奏稱蜀省昔年

兵火以來人民稀少田地存在荒蕪及至底定歸復祖業者從來未經勘丈是以多所隱匿迨歷年既久人丁繁衍姦猾之徒欺其界畔無據遂相爭構訟今應明白曉諭令將所管田畝分立地界各報本名立戶載入版籍每年納糧俱以串票爲據如此則欺隱侵奪之患可以悉除矣又川省詞訟爲田土者十居七八大率爲界址不清亦非勘丈無以判其曲直清其田畝等語憲德之奏如此朕又詢問岳鍾琪據岳鍾琪所奏與憲德之言相同隨將諸人前後所奏發與九卿會議九卿亦以應當舉行合詞覆奏朕於是慎選科臣高維新等前往辦理而於伊等陛辭之時諄切訓誨務期剔除積弊安插善良俾閭閻共享寧靜之福竝非爲加增賦稅起見又復頒發諭旨若丈量案內百姓果有冤抑下情准其十數人同到督撫或欽差官員衙門控告但不許聚衆喧囂其呈狀著督撫欽差接受

秉公審理此從前遣官清丈之始末也其勘丈造冊等費俱令動支帑金各官供應等項俱令從公支給無非體恤閭閻不使幾微煩擾之意上年冬月大量之事將竣朕又念川省各屬徵糧科則輕重懸殊其田土肥瘠不等的賦稅自難畫一又復降旨凡隱瞞科則等處止據實按則更定至於額糧稍重之州縣即比照就近適中地方之科則令其核減以紓民力今年正月憲德以清丈事竣具本代達川民謝恩之詞通省士民咸稱川省數十年輕徭薄賦近日荒蕪漸闢而土著流民各居其半邊界不清總由田土未丈以致豪強占爭捏告無已今蒙清理疆界使強無兼併弱無屈抑又荷鴻慈將田不敷糧之戶悉予開除疆界既已分明額賦尤爲公溥下符民志上契天心等語朕亦以爲經理得宜於民生風俗大有裨益矣豈意姦民嘯聚爲匪竟引清丈苛

虐以爲言雖冥頑兇暴之人本不足信然彼怨白中公然寫爲奉旨清丈者豈非該撫憲德等但以清丈之事稱爲奉旨至於已身奏請之處並未曉諭於衆耶陳文魁訴狀內稱上憲愛民如子察寃如神等語伊既稱頌川省上司是必憲德等有沽譽於民之道何不將朕之德意廣爲宣播而乃朦混含糊使姦民得以藉口耶又怨白中所言需索騷擾等弊朕之差委人員俱令給與夫馬食用之資而一應勘丈造冊等項又悉令從公支給絲毫不以擾民朕之諭旨既詳且備如果奉行不善經理失宜則封疆大臣之責安得以此歸怨於上耶憲德既稱通省士民懽呼感戴異口同聲何以尚有陳文魁楊成祿此等匪類暗結邪黨肆行誹謗可見平日地方大吏化導之未周董戒之不力則深山窮谷之中安保無似此愼邪之小人惑於妖言而妄爲私議者乎凡督撫所施行於地方之事自然

皆係奉旨之事。然其發端之始各有不同。有由於內外諸臣條奏者。有由於本省督撫題請者。有朕特旨施行者。朕屢屢訓諭督撫等。即朕特旨令行之事。該督撫等身在地方。若果有不便於民之處。即據實密奏。朕即降旨改易。如鄂爾泰、田文鏡、李衛於朕降旨施行之事。復行陳奏。而朕即爲中止者。甚多。憲德獨不聞之乎。四川清丈一事。既曾奉旨。朕豈肯推卸於臣工。但其舉行之緣。由始於該撫之陳奏。而非朕本意。君臣之間。同辦政務。是非得失。不容岐視。朕尚不肯推卸於臣工。則臣工又安可轉推卸於朕耶。數年以來。朕以清丈之事。時爲厯念。但有誠訓之言。從無獎許之旨。昨據合省謝恩之奏而論。似於地方有益。其功亦憲德之功。若果如姦民所言。有需索擾累之事。則該撫失於覺察。咎有攸歸。朕在九重之上。萬里之外。安能代爲之謀耶。著憲德將朕此旨通行刊布。曉諭川省士民。

務令遠鄉僻壤共知之。○丙午上詣

恩佑寺行禮畢。幸圓明園。○巡察湖廣吏科給事中王瓚奏言。各省兵制。有督標、撫標、提標、鎮標、協標各名目。督撫提標之兵。差事簡少。駐劄省會地方。習於驕肆。欺壓良民。短價強買。藐視同城文官。不加禮敬。且動輒夥衆。干求以勢挾制。倘或因公調遣。即多方求懇。借貸以致鎮協標兵聞風藉口。臣見聞所及。用敢奏聞。得旨。從來教練兵丁之道。固在乎技勇優長。尤在明曉禮義。謹守法度。聖賢所以著有勇知方之訓。數年以來。朕軫念兵丁。屢加恩卹。其該管官弁。若有扣剋糧餉者。必嚴加懲治。又爲督撫提標兵丁等籌畫生息之策。濟其吉凶之用。無非望其循理奉公。以受國家之恩養也。但聞有數省兵丁。驕縱之習難除。傲慢之風未改。而湖廣爲尤。甚今見給事中王瓚所奏。甚爲詳悉。切中兵丁之弊。此

實該管官員之責著直省督撫提臣切加訓誨嚴行約束倘有生事不法者即重治其罪毋得姑容以長惡習如徇隱寬縱經朕訪聞必將該管官從重議處該給事中雖稱鎮協之兵不若督撫提標之甚然兵志易驕難分優劣該管官亦應時加訓飭倘蹈故轍咎有攸歸著通行曉諭督撫提鎮等標共知之○丁未諭內閣古稱黃河之神上通雲漢光啟圖書禮曰三王之祭川也皆先河而後海惟神澤潤萬國福庇兆民自古及今功用昭著我朝自定鼎以來仰荷神庥尤爲彰顯或結爲冰橋以濟師旅或淤成沃壤以惠黎元或湧出沙洲作天然之保障或長就堤岸屹永固之金湯他如濟運通漕安瀾順軌有禱必應無感不通至於澄清六省之遙閱歷七旬之久稽諸史冊更屬罕聞神之相佑我國家者至矣朕敬禮之心至爲誠切因念江南河南等處皆有廟宇虔恭展祀而河源相近之

處向來未建專祠以崇報享典禮亟宜舉行查河源發於崑崙地隔遙遠人稀境僻其流入內地之始則在秦省之西寧地方朕意於此地特建廟宇專祀河源之神敬奉烝嘗以答神貺其如何加封神號及度地建廟一應典禮著九卿悉心詳議具奏尋議史冊所載漢祀河於臨晉宋令澶州置河清廟進號顯聖靈源公明以河清發源崑崙澤被中土特行致祭本朝順治三年封黃河神爲顯佑通濟金龍四大王之神康熙三十九年加封爲顯佑通濟昭靈效順金龍四大王之神查黃河發源西番枯爾坤山經河州之長寧驛流入中國應令該督委員於河州口外擇地建廟設立神像春秋致祭其加封神號內閣撰擬從之○又諭各省會試舉人向例給與盤費銀兩所以體恤士子助其資斧之需從前俱赴該省布政司衙門領取道途跋涉守候需時吏胥又多勒索扣剋之弊士子所得無

幾嗣後著在本州縣衙門照數領給該州縣取各舉人領狀申詳布政司於奏銷冊內報部查核庶吏胥無侵扣之事而士子亦免跋涉守候之苦若州縣稍有扣剋需索而督撫失於覺察者經朕訪聞將督撫一併議處○命改定大學士尚書品級大學士爲正一品尚書爲從一品○戊申陞江南江寧協領查爾都爲浙江杭州左翼滿洲副都統○禮部議覆四川巡撫憲德疏言陣亡建昌冕山營遊擊周玉麟志存克敵授命疆場請照例立傳設位入昭忠寺致祭應如所請從之○兵部等衙門議覆正黃旗漢軍副都統趙弘濟奏言外任文武旗員因奴僕用事營私以致本官婪贓虧空及緣事離任後或挾短飽颺或出資贖身或代本官隱匿營運影射爲民歸旗時僅將無用家人冊報請嗣後令該員將所帶管事家人姓名來歷到任限三月之內冊報督撫提鎮更換者准其續報事發分

別治罪應如所請從之○工部議覆四川巡撫憲德疏言官兵移駐打箭爐凡噶達與三渡吹音堡各處設有營伍自應安塘置舖以便遞送公文盤詰姦宄計共五十五塘并請修理塘房烟墩哨樓等項應如所請從之○正藍旗漢軍副都統徐仁奏言八旗武職官員於朝會處並不佩刀止令家人攜持殊違舊制得旨徐仁所奏甚是官員兵丁佩刀乃係定制凡朝會之處理應佩刀行走既係武職乃刀劍傭於佩帶令家人代爲攜持甚屬非理此皆由該管人員不行教誨之所致也嗣後應帶刀之官員兵丁人等凡朝會及行走之處俱令佩刀○已酉諭內閣今年三月京師一帶雨澤愆期朕衷甚爲憂慮齋心默禱至三月二十五日得降時雨似覺霑足朕心稍慰昨據直隸署總督唐執玉奏報各屬得雨情形畿輔雨澤尚未周遍朕悉心彈思推求體察朕之用人行政朝乾夕惕之念實

八年如一日此朕可以自信仰邀

上天垂鑒即在朝滿漢文武大臣等亦皆勤慎供職無貪殘不法之人忝竊高爵以致上千天和者惟是政務中有清查旗地寬免積欠二件乃近來降旨施行之事查國家定制旗人地畝不許民人典買例禁甚嚴乃無藉之徒不遵禁約彼此私相授受以致諸弊叢生姦偽百出爭訟告訐大爲人心風俗之害實有不得不清查釐正者朕又念此等積弊沿習多年按律究治有所不忍於是特降諭旨寬其違禁典買之罪且命動支內帑給價歸贖使旗地仍歸旗人不至爲民人巧佔民人仍得原價不至資本子虛永息爭端革除弊竇此朕格外之恩也或者差往清查之人奉行不善以致民心怨抑上千

天和靳茲雨澤乎又如查免積欠之旨乃今年二月中旬頒發者自是以後京師一帶風多雨少有微旱之象想此等拖欠錢糧之劣員

上虧國帑下剝民膏爲天理所不容國法所難宥或者

上天以朕查免之旨涉於邀譽市恩而非瘳惡懲貪之道是以昭垂此象以示儆乎近來舉行之事祇此二端而

天象如此朕心不能無疑著內閣九卿悉心詳議具奏倘此二事之外有應行陳奏之處亦著據實具奏毋得隱諱尋大學士等議奏清查旗地寬免積欠二事慮周惠溥輿情歡洽無可擬議但臣等辦事實多過愆有忝職守當益加省勉以仰副

皇上敬

天勤民之至意得旨人情自以爲是者多而能自省者少是以古昔聖賢莫不以箴規匡諫爲貴朕以誠心接待諸大臣若諸大臣偶有過愆朕即面加詰誡冀其速改若朕躬稍有過失則當隨時匡正以輔朕之不逮此乃切望於諸臣者也近因京師雨澤愆期朕默加

修省悉心體察一切政務皆與內外大臣等商酌而後舉行惟有清查旗地寬免積欠二事出於朕心之獨斷竝不由於臣工之條奏亦未諮詢商度於廷臣今見

天象如此朕心不能無疑是以降旨詢問至於諸大臣之供職尚屬勤慎小心若有應行教導後改之處朕自隨時指示○諭吏部道員有盤查錢糧審緝命盜案件之責是以州縣有虧空遲延等事該道與司府一例處分聞四川所屬州縣刑名錢穀等事竟直詳藩臬該道竝不與聞若有處分則將該道一併叅罰甚爲屈抑且非設官本意著吏部行文四川巡撫令該省四道於所屬州縣每年巡歷一週如有虧空那移諱盜等事即咨牒兩司詳報巡撫確查題叅其地方詞訟該道亦得聽受審斷凡各州縣案件俱從該道申轉以專守巡之職○添設雲南師宗州州同一員駐劄邱北地方從雲貴廣西總督鄂爾泰請

也 庚戌大學士等會議福建總督高其倬等奏言恭閱

福陵形勢其龍與

永陵共祖同源分宗抽幹高山天作瑞氣特鍾發自長嶺之西行於渾河之北萬峯拱照毓秀鍾靈羣水滌洄流輝裕慶惟是

陵前左畔水法因夏日溢口流衍以致稍更故道弓抱之勢微覺外張必須順導河流方稱盡善臣等伏思高其倬所奏應修之處適與

聖意相符合應如所奏將河身淤淺之處挑濬深寬興修石工三百六十二丈則水抱砂圓益增吉慶矣得旨是著平郡王福彭前往會同尚崇廩敬謹督理其監修官員交與內務府總管揀選二員奏請派往興工吉期著欽天監選擇以鑲白旗漢軍副都統倭星額協理本旗蒙古副都統事務兵部議覆雲貴廣西總督鄂爾泰遵旨查議廣西學政衛昌績條奏營汛事宜查廣西一省幅輦遼濶兵

單汎廣應爲增添桂林協改爲桂林營裁去副將改設遊擊一員添兵三百名慶遠協添兵五百名潯州協添兵一百名鎮安營添設遊擊一員原設守備改爲中軍守備並添設把總一員兵二百四十名永寧營添兵八十九名上林營添設把總一員兵一百名賓州營添兵四百名全州營添兵八十六名柳州府羅城縣添設千總一員兵一百二十名新泰營改爲新泰協裁去叅將一員設副將一員其提標及左右兩江鎮標思恩協貼防各汎之守備千把兵丁俱令撤回本處均應如所請從之○又議覆山西巡撫覺羅石麟遵旨查議山西巡察宋筠條奏防汎事宜查噶縣地當衝要應撥東路營外委把總一員帶兵二十名駐防興縣應撥鎮西城千總一員帶兵三十名駐防嵐縣僻處山陬應撥興縣之外委把總一員帶兵二十名駐防再偏關縣之鄧家山神池縣之甘河梁俱請調兵防

守均應如所請從之○辛亥陞鑲紅旗蒙古副都統宗室哈爾吉爲正黃旗護軍統領○以故喀爾喀輔國公敦多布額林陳子色內襲爵○壬子以原任吏部尚書福敏協理兵部侍郎事○戶部議覆雲貴廣西總督鄂爾泰疏言四川吞都一帶地方在金江之南與米貼井底壘相連距川省寫遠且隔大江應歸滇省管轄其磨坡等處諸彝居江之西北請撥歸川省管轄應如所請從之○旌表江南高郵州烈婦謝爾玉妻蘇氏守正拒姦忿激自縊給銀建坊入祠致祭如例○癸丑實授牧可登爲刑部左侍郎解工部右侍郎宗室塞爾赫任仍以內閣學士兼吏部侍郎行走調禮部左侍郎鄂爾奇爲工部右侍郎刑部左侍郎杭奕祿爲禮部左侍郎○甲寅以理藩院尚書特古忒爲內大臣○兵部議覆原署兩江總督范時繹等遵旨查議江南狼山總兵官王安國條奏標下右營遊擊守備

職司巡洋。今同駐通州城內。似屬未協。請將右營遊擊移駐呂四場。守備移駐餘西場。應如所請。從之。○乙卯

上禱雨於

大高殿。行禮畢回宮。

孝端文皇后忌辰。遣官祭

昭陵。兵部議覆國子監司業文保奏言。諸王貝勒貝子公等。間有行文該旗之事。竝無印信。關防不無刪改錯誤之處。嗣後請將長史

辦理家務之人。列名用包衣叅領關防。送至該旗查看。照例轉行。若無關防。不准收接。應如所請。從之。○丙辰。工部議覆江南河道總督孔毓珣等疏言。河道工程。奉旨酌議逐年加修。相應因地制宜。次第興舉。請於險要頂衝。隄身單薄之處。先加五寸增高培厚。次年再於次險之工。統加五寸。再次年將可緩者。一例增修。以後總酌分緩急輪流加培。約計每年黃河堤工。需銀二萬餘兩。運河堤工。需

銀七八千兩。除每年歲搶各工。仍照例估銷外。所有黃運兩河。應行加高各工。逐一確勘。將地名工段高寬丈尺。以及需用銀兩數目。應動款項。俱據實分晰具題。應如所請。從之。○戊午。諭吏部。庶吉士金相等。教習已久。今加考試。應分別授職。除彭啟豐已授修撰。鄧啟元已授編修外。其庶吉士金相。王興。吾。王丕烈。于辰。王泰。桂。鄒一桂。劉復。李重華。林聰。錢本誠。余棟。原。衷。戴。王雲。銘。楊嗣。環。俱授為編修。隋人鵬。劉東。寧。周祖。榮。李寶。賁。李直。張鵬。聃。李學。裕。呂熾。世臣。張乾。元。常。保住。郭石渠。俱授為檢討。舒明。學。問。荒。疎。著革退。○戶部奏請太平峪建立紅椿之內。撥換田房。遷移寺廟。一切事宜。得旨。風水地內。所有民間田畝。按其墾糧科則。照應得之價。加倍賞給。已經耕種者。俟收成後。再令交官村莊廬舍。悉照房屋間櫨。加倍先給銀兩。俟其將遷居之處。收拾周備。再令搬移。各村舍所種樹木。

亦著給與價值。一應寺廟於風水地紅椿之外照式官爲蓋造。如該寺廟有香火田地亦著將新建寺廟附近地畝加倍撥給。至所有墳墓悉照地之大小從厚賞給地價。俟卜有平穩之地再令遷移。務使民間從容寬裕。各需實惠。其應需各項價值悉於內庫支領。○工部議覆江南河道總督孔毓珣疏言宿遷縣黃河南岸鈔關前堤根坍塌桃源縣沈家莊亦屬險要俱請下埽修築以資捍禦應如

所請從之。○予故正藍旗漢軍都統一等侯朱之璉祭葬如例。○己未諭內閣朕澄清吏治整飭官方時時訓勉。小臣工實心供職以熙庶績而惠兆民。又恐職官甚多優劣不等或視誥戒爲具文不知儆惕是以遇有叅處之案率按例處分不稍寬貸。蓋欲其謹小慎微時時檢束自不至踰閑蕩檢干犯重罰也。而外省督撫等亦皆遵奉法紀察吏嚴肅不肯寬假姑容內外之考課如此竝非苛刻

以待臣下也。近年以來朕留心體察內外文武大小官員雖不盡大法小廉而奉公守法各勤職業者多朕心深爲嘉悅。但從前叅罰之案累積漸重擬於今歲秋冬之間開恩寬免以示獎勵。曾向大臣等言之。今者京師雨澤愆期朕虔加修省竝推求政事之闕失而不得其由因思朕原有寬免各官叅罰之心而未曾降旨。或者內外數百人員之中固有罰當其罪者亦有限於成例情屬可原者應

即頒諭旨廣沛恩施咸予以自新遷善之路。除特旨永停俸祿者不行開復外著將內外滿漢文武大小官員一應革職降級留任及罰俸停陞之案悉行寬免。准其開復。倘此降革人員開復之後將來有犯貪贓侵蝕不法重罪者著於本內聲明具奏。○工部議覆河東河道總督嵇曾筠疏言黃河北岸封邱縣荆隆口大溜頂衝應開引河一道自黑堽口起至柳園口陡厓河尾止計工長三千三百

五十丈請動帑興修應如所請從之○庚申諭內閣向因各省員缺需人朕於部選之外特旨命往甚多恐其中賢愚不等或有倚恃特用而生縱佚恣肆之心者又或該管上司不知朕心以其爲特用之員而存瞻徇姑容之見者是以曾有特用人員深負朕恩則加倍治罪之旨蓋欲其知所做惕以圖上進也然必其所犯之罪果係貪婪不法不可寬宥方行加倍懲治非謂因公註誤一切叅罰案件皆以其爲特用之員而概行加倍也從前屢降諭旨甚明近來該部及各省督撫尚有不問事之輕重概以加倍議罪者甚非朕立法之本意至於盜案越獄亦曾有加倍治罪之旨蓋因朕整飭吏治於地方事務不許隱匿是以有司不敢諱盜諱命每有案件即行詳報以致監禁之犯未免較多而姦宄兇惡之徒往往乘間越獄冀脫重罪又有罪本不至於死亦乘機越逃者尤爲逞姦玩法藐視

憲典是以有加倍治罪之條以懲頑慝又恐罪犯等不知此例誤蹈重辟特令各地方官刊木榜置於獄中使身繫囹圄之人莫不知悉免致一時誤犯以上加倍治罪二條係朕曾經降旨者乃內而法司外而督撫往往比照此例以加倍定擬具題又有將本犯輕罪議以加倍而抵之於死者尤非平允之道且國家立法原一定而不可易其有應行從重加倍者亦必待朕酌其情罪特頒諭旨非臣工所可擅定者也嗣後凡有議處議罪之條俱照本律定擬其有負恩犯法情罪重大應從重定擬者必須折衷平允不得擅用加倍字樣開蒙混苛刻之端負朕立法牖民警省防閑之至意○授一甲進士周霽爲翰林院修撰沈昌宇梁詩正爲翰林院編修○命署直隸古北口提督魏經國節制直隸各鎮總兵官後不爲例○辛酉諭內閣古稱蝗蝻生於水澤之中乃魚子變化而成者是以江南

淮揚之州縣地接湖灘往往易受其害蓋蝗之所生多因低窪之區秋雨停集生長小魚交春小魚生子水存則仍復爲魚若值水涸日晒入夏之後即化爲蟪不待數日便能生翅羣飛即被害之家亦莫知所自蓋以其地寥廓荒涼人跡罕至平時忽而不察及至鼓翼飛颺則有難於撲滅之勢所當審視體察防之於早者也凡直省地方向有蝗蝻之害者該督撫大吏應轉飭有司通行曉諭附近居民於大熱久晴之後週歷湖濱窪地及深山窮谷無人之處見有萌動之機無分多寡即行剪除消滅倘民力或有不敷即稟報該地方官督率人工協同助力更令文武官弁派出誠實兵役會同里長者民等留心察視不可疎忽怠玩如此則人力易施蟲災可杜於禾稼大有裨益但小民愚昧無知又復苟且慵惰其曉諭開導防患於未然者有司不得辭其責實心任事之良吏必不肯於此等

事膜外視之也○旌表河南項城縣烈婦李賢相妻聶氏拒姦不污抱忿投繯給銀建坊入祠致祭如例○壬戌調江南京口左翼副都統吳如譯爲鑲藍旗漢軍副都統陞浙江杭州協領蘭照爲江南京口左翼副都統○賑雲南南寧縣水災饑民○旌表廣西全州烈女徐應俊女徐氏年幼拒姦被刃殞命給銀建坊入祠致祭如例○癸亥諭內閣據直隸地方文武各官報雨奏摺稱今年三月及四月初旬兩次得雨今於四月二十四日又得時雨四野霑足二麥茂盛秋穀皆可播種等語據此則四月以前竟有未種之田可知矣夫農事貴乎及時二月土膏初動三月即爲播種之期況已得雨二次何以遲延觀望直待四月下旬方始播種倘小民怠惰偷安爲民父母者則當開導勸課使之踴躍趨事於南畝又或籽種牛力稍有不敷則當留心體察設法相助不使有後時之歎即以今歲

論之若從前三月得雨之時早先播種目今又得甘霖豈不更爲優渥假若霖雨愆期傍徨觀望則從前之急情遲延豈非小民自誤生計自荒恒產耶西北寒冷之鄉布穀或不宜太早若畿輔可以早種之地又當甘雨既零之時而乃袖手逍遙以待時雨之再沛不亦愚昧之甚乎況直隸地方春夏之交常稽雨澤豈可不及時努力致虛

上天甘澍之賜乎此皆愚民習於懶惰而地方有司又不以民事爲念漠然不加董率之故著該督傳朕諭旨通行申飭倘再有牧民之官輕視農事不實心化導任百姓之悠忽有誤播種之期者必從重議處○以吏部尚書河東河道總督嵇曾筠署江南河道總督河東總督田文鏡兼管河南山東河道總督○工部議覆江南河道總督孔毓珣疏言瓜洲運口堤岸塌卸江流商民漕運均屬可虞應於青蓮菴尤家碾等處挑挖越河一道并建

築草壩一座收束水勢請即動帑興修應如所請從之○河東總督田文鏡摺奏豫省各處河渠以及旁流支派共計二百七十餘道羣趨競赴於淮皆有助清敵黃之力必一律深通方能合流奏效今查上源各水悉屬暢達若下源之在江南境內者亦支支暢流則趨匯湖中其勢可以併力敵黃仰請敕下江南河督諸臣將淮水出湖之處並境內一切歸淮各河委官勘查速治深通則以之制黃

而河流順軌以之刷口而積墊咸除矣奉
上諭朕覽田文鏡所奏自是治河善策但衆水本皆入淮今又加以疏濬之功使各處停蓄之水無不宣通流暢則其勢較昔更大淮河能否容納於高堰堤工有無妨礙亦不可不籌畫萬金著將田文鏡奏摺抄錄發與嵇曾筠尹繼善會同悉心酌議○增陝西榆林神木府谷吳堡靖邊安塞保安等七處鄉試中額一名另編木字號取中從陝西巡撫武格

請也

大清世宗敬天昌運建中表正文武英明寬仁
信毅大孝至誠憲皇帝實錄卷之九十三

大清世宗敬天昌運建中表正文武英明寬仁
信毅大孝至誠憲皇帝實錄卷之九十四

敕修

雍正八年庚戌五月戊辰朔翰林院選拔

庶常原以作養人材今科進士特加考試並
命諸臣保舉除顧成天胡宗緒即授編修外
選取鍾衡倪國璉孫人龍周範蓮陶正靖沈
慰祖楊廷棟裴肇煦吳士珣曹一士吳履泰
嚴樹基王廷鴻蔣溥鹿邁祖徐景曾吳璋孫
灝朱鳳英柏謙徐以烜陳其凝任應烈程威
修阮學浩嚴璉孫倪城吳華孫王文璿林蒲
封毛之玉商盤鄂敏陳亮世佟保王宗燦嵇
璜林令旭李敏第劉元燮陳中張先躋高璿

監修總纂官光祿大夫經筵講官大學士兼兵部尚書總理兵部事務伯加十五級日郭爾泰
總裁官光祿大夫經筵講官大學士兼兵部尚書總理兵部事務伯加十五級日郭爾泰
總纂官光祿大夫經筵講官大學士兼兵部尚書總理兵部事務伯加十五級日郭爾泰
事三等伯加十二級日張廷玉光祿大夫經筵講官大學士兼兵部尚書總理兵部事務伯加十五級日郭爾泰
翰林院掌院事加三級日福敏光祿大夫經筵講官大學士兼兵部尚書總理兵部事務伯加十五級日郭爾泰
經筵講官議政大臣協辦內閣大學士事務禮部尚書仍兼太常寺鴻臚寺事日秦舒奉

富敏盧秉純韓彥曾許希孔薛韞楊秀額爾登額李賢經裘思錄色通額等五十三人俱著改爲庶吉士並修撰周霽編修沈昌宇梁詩正分別滿漢書教習○調江南安徽巡撫魏廷珍爲湖北巡撫陞浙江布政使程元章爲安徽巡撫調江南安徽布政使張元懷爲浙江布政使司布政使以兩淮鹽政噶爾泰兼理江南安徽布政使司布政使事務○已已調鑲藍旗漢軍副都統伊都善爲鑲紅旗蒙古副都統○以原任兩江總督范時繹協辦河東河工事務○喀爾喀輔國公根敦故遣官致祭○予故陝西布政使加太常寺卿銜方觀祭一次○庚午

考誠仁皇后忌辰遣官祭

景陵○辛未

上聞怡親王病篤幸王邸比至王已薨逝上親臨視悲慟不已左右大臣等懇請節哀乃回宮輟朝三日○壬申

上親臨怡親王喪次奠酒舉哀悲慟逾時回宮○癸酉調刑部尚書德明爲戶部尚書陞刑部右侍郎海壽爲刑部尚書以原任雲南巡撫常賚爲刑部右侍郎陞安徽布政使噶爾泰爲戶部右侍郎專管三庫事務○調福建總督高其倬爲兩江總督陞福建巡撫劉世明爲福建總督河南布政使趙國麟爲福建巡撫以河南按察使陳世倬署河南布政使司布政使以浙江按察使劉枬署江南安徽布政使司布政使正黃旗叅領劉章署浙江按察使司按察使河南驛鹽道張建德署河南按察使司按察使○甲戌諭內閣朕因怡親王薨逝中心悲慟雖強自排遣而飲食俱覺無味寢卧皆不能安蓋王之事朕誠敬忠愛之心八年有如一自自古以來無此公忠體國之賢王則朕所以待王之禮亦應在常例之外今朕素服一月以稍展思慕不釋之情此一月之內朕既素服則在廷諸臣遇朝

服之期亦著仍穿常服一切宴會俱不必行
凡朕加恩於王之處皆不足以酬王之碩德
豐功而在朝之諸王大臣官員等受國家之
恩必念國家失此賢王同深悲痛昨日朕親
臨奠醑之時見滿漢文武諸臣悲切之狀人
有同情朕心甚慰益見王之素行感人者深
也○署安徽按察使魯國華條奏回民居住
內地不分大小建不論閏月以三百六十日
爲一年私計某日爲歲首羣相慶賀平日皆
戴白帽設立禮拜清正等寺妄立把齋名目
違制惑衆應請嚴行禁革恪守典章違者照
律定擬如地方官容隱督撫徇庇亦一併議
處得旨回民之在中國其來已久伊旣爲國
家編氓即皆爲國家赤子也朕臨御天下。一
視同仁豈忍令回民獨處德化之外是以曾
頒諭旨訓以興孝勸忠望其型仁講讓服教
慕義共爲善良即數年來亦未見回民作奸
犯科逞兇肆惡者且其中有志上進者甚多

應試服官同於士庶而以文武科名出身洊
登顯秩爲國家宣力効忠者常不乏人至回
民之自爲一教乃其先代相沿之土俗亦猶
中國之大五方風氣不齊習尚因之各異其
來久矣歷觀前代亦未通行禁約強其畫一
也魯國華此奏甚屬苛刻怪誕回民何嘗不
遵正朔而祇以其私記時日即加以不遵正
朔之名回民何嘗不遵服制而祇以其使用
冠巾即加以不遵服制之罪至於禮拜清正
等寺名亦不過如各省村邑崇奉其土俗之
神皆爲祀典之所不載何獨於回民刻意吹
求指爲罪案乎若回民果有干犯法紀之處
國憲具在自當按律懲治並無曲宥回民之
條向後倘回民本無過愆而大小官員等但
因其習尚少有不同以此區區末節故意苛
求妄行瀆奏者朕必嚴加處分魯國華此奏
非有挾私報復之心即欲惑亂國政著將魯
國華交部嚴加議處○乙亥夏至祭

地於

方澤遣顯親王衍潢行禮○諭大學士九卿等

茲因怡親王之事朕心悲戚爾等請朕節哀

再三陳懇朕每事保惜精神不肯爲勉強之

舉時時以此訓諭臣工豈至今日而遂忘之

但以王之事朕一片忠赤之心至誠至敬王

之年齒小朕八歲不但賴王襄贊朕躬且望

王輔弼於將來豈料王竟長逝耶王顯名厚

德爲宇宙之全人垂休光於竹帛固不以壽

算之修短計而國家失此股肱心膂之賢王

在朕躬則甚苦矣因廷臣等請安奏懇畧將

朕意宣諭知之○丙子諭內閣怡親王忠孝

性成端方清直當年事我

聖祖皇考敬謹恪恭克盡子臣之道深蒙

皇考慈愛而王慎密有加小心安分此中外所

共知者逮朕御極之初命王總理事務王夙

夜匪懈公爾忘私精白一心無欺無隱其殫

竭忠誠贊襄於密勿之地者八年有如一日

至於軍務機宜度支出納興修水利督領禁

軍凡宮中府中事無鉅細皆王一人經畫料

理無不精詳妥協符合朕心無煩朕之指示

其有關於吏治民生之利弊有聞必奏每語

必詳而爲國家保護善類培養人材一片篤

摯真切之念形於寤寐王之懿德美行從不

欲表著於人而人亦無從盡知之朕即知王

最深而亦口不能宣筆不能述也是以雍正

四年特書忠敬誠直勤慎廉明八字以賜彼

時降旨朕深知王之德洞悉王之心覺此八

字實不能盡王之美善不過就王事朕之大

端而言耳蓋王實能佐朕治安天下朕實賴

王翼贊昇平徧觀自古史冊所載賢王懿戚

從未有可與王比倫者且王居心之和平公

正行事之寬厚仁慈皆足以享遐齡而綿壽

算豈意王遽舍朕而溘然長逝耶自去年冬

月王抱病以來朕縈於懷無刻稍釋商確醫

藥默禱

神祇以冀沉痾頓起乃今醫藥罔效祈禱不靈
天何奪我忠誠輔弼之賢王若此之速耶王
抱恙時居住交暉園與圓明園相近朕間欲
親往看視王再三懇辭而於一句半月之間
必力疾入圓明園與朕相見及王病勢漸加
力不能支惟恐朕心憂煩則稱交暉園乃起
病之所暫且移避遂養疾於西山無非欲與
圓明園相遠令朕不深悉其病狀可以安慰
朕心也及王回城中府第朕以祈雨回宮前

月得雨之後王屢次奏請朕幸圓明園是王
但恐以病狀煩勞朕心而於己身之生死全
不計及也及聞病勢沉篤朕方欲命駕臨視
乃王聞知即脫塵而去蓋王不欲以永訣傷
朕之懷是以顯此剛決之概其於去留之際
明白超脫若此在王成一忠孝正直賢智慧
覺之全人而朕頓失此柱石賢弟感痛悲哀
何能自己耶王之德行功績難以枚舉從來
豐勲偉烈必膺國家崇報之典惟王爲

聖祖皇考之令子爲我朝

列祖之功臣允宜配享

太廟列於從前建立大功諸王之次庶與王之
功德相副且可上慰

列祖

皇考在天之心而朕思念悲切之衷亦可稍解
於萬一其餘一切恩卹典禮該部會同大學
士九卿悉心詳察從優定議具奏尋議怡親
王功在社稷

皇上篤念忠勲特昭崇報配享

太廟實與王之功德相副其設位配享告祭禮
儀禮部另行繕摺具奏其致祭應於定例二
次外加祭一次墳碑交與工部敬謹建造祭
文碑文由翰林院撰擬謚號由宗人府議奏
得旨依議怡親王之懿德鴻勲自應錫以上
謚但恐一字不足彰王之美善古者有大功
賜之美號以表揚之朕曾親書忠敬誠直勤
慎廉明八字賜王字字皆王之實蹟今應否

於謚號之上加此八字取古人申錫美號之義著大學士九卿會議具奏○大學士等議覆寧遠大將軍岳鍾琪四川提督黃廷桂遵旨酌議松潘總兵官張元佐條奏潘州移駐營汛事宜○潘州兩河口原設守備一員把總一員兵三百名但兩河口與黃勝關相近達建寺地方在黃勝關與潘州適中處請將原設兩河口之弁兵移駐於達建寺其兩河口地方止於黃勝關駐防內抽撥分防○黃勝關向止額設漳臘營汛兵五十名未免單弱應於分防流沙東勝等處之兵添撥一百五十名將漳臘營守備移駐黃勝關○南坪營地方險要原設兵三百名應增兵防範請將小河營遊擊再帶兵一百五十名移駐南坪○漳臘營所管之包坐五寨等處請統歸潘州管轄流沙關汛等處請歸松潘鎮中營管轄雄溪紅花等堡請歸松潘鎮右營管轄則軍勢聯絡約束蠻番足資控制均應如所

請從之○旌表河南葉縣烈婦龔良翰妻陳氏守節拒姦忿恨自縊給銀建坊入祠致祭如例○丁丑諭大學士等準噶爾噶爾丹策零藏匿負罪潛逃之羅卜藏丹津抗違國法因特發兩路大兵聲罪致討期於今年進發直搗伊里今噶爾丹策零遣使特屆奉表陳奏謂已將羅卜藏丹津解送天朝因聞進兵之信暫行中止若天朝俯念愚昧赦其已往即將羅卜藏丹津解送等語朕欲將特屆遣回并差大員至準噶爾諭以受封定界敦睦睦鄰速將逃匿送出伊若一一聽命朕當寬宥其罪其進兵之期暫緩一年俟特屆起身之後著寧遠大將軍岳鍾琪靖邊大將軍傅爾丹參贊大臣陳泰蘇圖來京其靖邊大將軍印務著副將軍巴賽護理并令署振武將軍順承郡王錫保就近協理所有應行事宜著馬爾賽張廷玉蔣廷錫等詳議具奏尋議靖邊大將軍傅爾丹來京大約在九十月間

應令於起身之前行文知會寧遠大將軍岳鍾琪先後到京以便會同商酌得旨兩路大將軍於九十月間起身來京則到京之期已在冬底未免太遠著兩路大將軍在九月十五日前後到京現今差侍郎杭奕祿衆佛保同特磊往諭準噶爾岳鍾琪俟特磊回過軍營之後即將起程日期知會傅爾丹酌定起程靖邊大將軍印務已命副將軍巴賽等護理寧遠大將軍印務應令何人護理著岳鍾琪奏聞其陳泰所統官兵著查克丹署理蘇圖所統官兵著舒楞額署理再著副都統圖克善黑色前往軍前交與傅爾丹酌量派管軍營事務○命大學士朱軾總理水利營田事務理藩院左侍郎莽鵠立內閣學士對琳工部右侍郎何國宗協同辦理○以協理兵部侍郎福敏兼辦戶部侍郎事務○以正黃旗漢軍副都統趙弘濟鑲紅旗漢軍副都統尚崇坦俱署鑲藍旗漢軍都統○戊寅諭內

閣崇德報功國有令典懷思慕義人有同情凡在京文武官員平日曾受怡親王教訓知王之美善者許其各詣王府致奠申哀○己卯莊親王允祿內大臣佛倫等奏奉命辦理怡親王喪事所見齊集人員無不銜哀垂泣獨誠親王允祉當

皇上親臨回宮之後遲久始至迨宣讀

皇上諭旨之時衆皆嗚咽悲涕而誠親王早已回家且每日於舉哀之時全無傷悼之情視

同隔膜請交與該衙門嚴加議處得旨誠親王允祉情性乖張行事殘刻是以

皇考屢降諭旨宣示於衆今據爾等奏著宗人府諸王貝勒貝子公八旗大臣九卿詹事

科道會同定議具奏○裁山西陽曲縣臨汾

驛徐溝縣同戈驛祁縣賈令驛臨汾縣建雄

驛洪洞縣普潤驛靈石縣瑞石驛霍州霍山

驛聞喜縣涑川驛長子縣漳澤驛也留縣余

吾驛平遙縣洪善驛介休縣義棠驛鳳臺縣

太行驛永濟縣河東驛臨晉縣樊橋驛大同縣瓮城驛平定州平潭驛忻州九原驛代州鴈門驛驛丞各一員其驛務歸各該州縣管理從山西巡撫覺羅石麟請也○庚辰

皇后千秋節停止行禮筵宴○遣官祭

關聖帝君○壬午

上臨怡親王邸奠酒舉哀畢回宮○諭內閣朕名及諸兄弟之名皆

皇考所賜朕即位之初允祉隆科多等以諸王之名上一字與朕相同奏請更改朕不允行而伊等援引往例陳懇再三朕不得已奏聞太后勉強許之今怡親王薨逝朕回思昔日與王同事

皇考家庭孝友之情宛然如昨凡告

廟典禮所關有書王名之處仍用原名以誌朕思念弗釋之意○諭戶部年來甘肅地方辦理軍需雖一切動支公帑絲毫不取於民而輓運轉輸不無資於民力朕心軫念特將雍

正八年額徵錢糧悉予蠲免以示恩恤今聞該撫許容以兵餉無抵將歷年舊欠勒限一年全完民間甚為擾累以致不法之徒借端生事許容才具短淺識見鄙陋辦理此事甚屬錯誤夫本年錢糧既經豁免而仍嚴比舊欠大非朕加恩沛澤之意若云兵餉無抵自可具題請撥何得於蠲免之年而行催徵之舉除生事民人應秉公懲治外著將徵比舊欠之處即行停止○甲申

上幸圓明園○雲貴廣西總督鄂爾泰疏報雲南永善縣開墾本年分田地六十四頃有竒下部知之○丙戌諭內閣怡親王為朕辦理大小諸務無不用心周到而於營度將來吉地一事甚為竭力殫心從前在九鳳朝陽山經畫有年後因其地未為全美復於易州泰寧山太平峪周詳相度得一上吉之地王往來審視備極辛勤又恐隨從人等煩擾居民將飲饌之屬俱不令前驅預備常至昏夜始

進一餐其所擇吉壤實由王親自相度而得而臣工之精地理者詳加斟酌詢謀僉同且以爲此皆王忠赤之心感格神明是以具此慧眼卓識也其相近山水迴環形勢聯絡之處又有中吉次吉之地朕以王經營吉地實爲首功欲以中吉者賜之王驚悚變色惶懼固辭朕鑒其誠心遂寢其事已而在六十里外涑水縣境內得一平善之地曰此庶幾臣下可用者奏請賜給朕彼時遲回未曾降旨王於病中令侍郎劉聲芳懇切轉奏朕不得已允其所請王得旨喜極至於踴躍忭舞云皇上待我隆恩異數不可枚舉今茲恩賜則子孫世世俱受皇上之福於綿長矣即日遣護衛前往起土越數日護衛呈看土色王取一塊捧而吞之蓋王知朕眷王之深惟恐瑩域未定將來仍以前所欲賜之地賜之也其用心之謙謹周密至於如此王薨逝後朕詢問王府管事之人知王病中將身後之事一

一指示特畫親王墳塋圖一幅與其王妃及諸子曰我身後塋地之制悉照會典所載親王之禮行毋得稍有踰越如或稍過則汝等違我之治命矣昨王府之人以圖進呈朕覽僅有門三間享堂五間此國家經常之制非所以待有大功之賢王者但思王之生平謙抑退讓朕每加恩禮王必再四懇辭朕鑒其一一實皆出於至誠往往俞允今若身後獨不從其言朕心有所不忍然以豐功碩德不世出之賢王而寢園僅循常制則褒德顯功之典禮實爲缺畧朕心又有所不忍今如何使朕心之輾轉不忍者得以大慰而揣度王心亦受之而安且揆之於禮適爲合宜允協著大學士九卿等悉心詳酌定議具奏○戶部議覆江蘇巡撫尹繼善疏言蘇州府屬之常熟昭文二縣舊有丐戶不得列於四民邇來化行俗美深知愧恥欲滌前污請照樂籍惰民之例除其丐籍列於編氓應如所請從

之○戊子吏部題一等阿思哈尼哈番又一
拖沙喇哈番李鑄因罪革退銷去年次恩詔
所得拖沙喇哈番餘三等阿思哈尼哈番以
其姪孫李景唐襲替從之○己丑諭兵部怡
親王園寢在涑水縣水東村現在興工修造
著設立守備一員千總一員把總二員兵丁
五十名永遠守護俱隸太平峪副將管轄○
吏部議覆廣東總督郝玉麟疏言廣東肇高
廉羅道駐劄肇慶府控制千里以外之高廉
二府雷瓊道所轄雷州府在海之北瓊州府
在海之南俱鞭長莫及請添設巡道一員駐
劄高州分轄高雷廉三府改肇高廉羅道爲
肇羅道雷瓊道爲海南道併請將高雷廉道
海南道及原設之惠潮道俱加兵備道職銜
以樹聲威均應如所請從之○移江南望江
縣楊灣河巡檢駐華陽鎮從原署兩江總督
范時繹請也○庚寅

孝恭仁皇后忌辰遣官祭

景陵○辛卯宗人府等衙門議奏允祉情性乖
張行事殘刻

聖祖仁皇帝屢降諭旨宣示於衆

皇上御極以來時加訓誡多方保全乃伊下愚
不移罪惡日稔臣等謹就其罪之大者言之

允祉事

聖祖仁皇帝諸事違逆罔知愛敬

聖祖仁皇帝聖躬違和允祉毫無憂戚且懷冀
幸之意又如恭謁

陵寢允祉並不早集行禮使諸王大臣候至已

時始至

昭西陵午時方至

景陵任意怠忽有乖典禮其於母妃也肆行忤

逆又敬敏皇貴妃薨逝允祉服制未滿即行

剃頭此其不孝之罪一也當二阿哥廢黜之

後允祉居然以儲君自命見廷臣更正東宮

儀仗輒忿然謾罵此其妄亂之罪一也允祉

素日包藏禍心希冀儲位與逆亂邪僞之陳

夢雷親暱密謀遂將陳夢雷逆黨周昌言私藏家內妄造邪術拜斗祈禳陰爲鎮壓及事跡敗露允祉罪在不赦我

皇上法外施仁不忍加誅迨後在

皇上之前抗傲無禮諸王大臣合詞劾宗人府議以禁錮復蒙

皇上從寬止將伊降爲郡王薄示懲儆而伊毫不畏懼今年又蒙特恩復伊親王之爵而伊仍不知感戴此其狂悖之罪一也允祉向日

與阿其那塞思黑允禔等交相黨附時切覬覦比暱匪類肆無忌憚及至阿其那塞思黑逆跡敗露允祉乃密請交伊暗置死地意在歸過

皇上此其黨逆之罪一也我

皇上宵旰勤勞每於允祉進見之時賜坐優禮諭以勤政憂民諸事而允祉漫不樂聞但以伊閒居散適之樂娓娓陳述此其欺罔不敬之罪一也滿漢文武大臣皆受

聖祖仁皇帝教養深恩又蒙

皇上加意委任而允祉視抒誠宣力者如仇敵愾邪不軌者爲腹心此其奸邪之罪一也從前皇貴妃喪事允祉當齊集之期俱詭稱有另交事件推諉不前及前年八阿哥之事允祉欣喜之色倍於平時此其惡逆之罪一也允祉之子弘晟克頑放縱助父爲惡荷蒙皇上鴻恩從寬禁錮允祉反以此銜恨於心時行怨望此怨懟不敬之罪一也允祉在

聖祖仁皇帝時侵帑婪贓盈千累萬又恣意需索所屬仍復逋欠累累

皇上深用體恤特賜帑金俾其饒裕而允祉毫不感激每以催追之項怨忿瀆奏此其貪黷負恩之罪一也怡親王忠孝性成謨猷顯著允祉心懷妬忌值怡親王薨逝並不懇請成服又不躬請

皇上聖安且於怡親王府齊集之所每日遲至早散當舉哀時全無悲泣之情反有慶幸之

意此其背理蔑倫之罪一也。至於殘忍刻薄，徇私挾詐之處，難以枚舉。情罪重大，應將允祉削去和碩親王，革退宗室，即行正法。伊子弘晟、允禎放縱，助父爲惡，亦應革退宗室，即行正法。再伊子鎮國公弘景應革去公爵，並伊諸子及孫俱革退宗室，交與該旗編入佐領，更名披甲當差。允祉之女有品級者革去品級，其妻妾並弘晟之妻妾俱交與弘景允祉所屬佐領，應令該旗作爲公中佐領所有家產，並伊子家產俱係大內分給，應交與該旗查明交內務府得旨覽諸王大臣官員所議。若照議施行，朕心有所不忍。姑從寬曲宥，將允祉革去親王，其如何拘禁之處，候朕另降諭旨。弘晟秉性兇頑，助父爲惡，從前散禁於宗人府，今著嚴加拘禁。弘景爲人心性未定，尚不似其父兄之悖亂，著仍留公爵，以徐觀其後。允祉所屬人等作何派撥之處，朕另行降旨。○壬辰，湖廣安陸府知府談九敘等

恭請

聖訓

上諭曰：知府一官，有承上率下之責，關係吏治民生最爲緊要。爾等勿視爲傳舍，但務逢迎上司，以圖陞遷，爲榮身之計。果能察吏安民，實盡其道，即使終身不得遷轉，亦足留名譽於將來。若一味請託鑽營，希圖保薦，縱一時倖獲寸進，而公論難免，何能掩人之耳目哉？刑名事件，知府尤爲上下關鍵，務期明允，公當地方，始無冤民，不可聽屬員懇求，亦不可畏上司駁詰，而草率苟且，以致訟獄顛倒，下結民怨，上千。

天和若催科一節，固有考成。果遇水旱災荒，自當據實申詳，加意撫恤，不可隱匿以圖省事。亦不可捏報以滋弊端。夫寬大惠愛者，乃爲政之要道。朕非令爾等嚴厲苛刻以從事也。但古人云：養稂莠者傷禾稼，惠奸宄者賊良民。若保全貪官污吏，以博長厚之名，縱容地

棍土豪。以沽安靜之譽。此大有害於人心吏治者也。沽名邀譽。乃居官之大患。大凡在任時。貼德政之歌謠。離任時。具保留之呈牒。皆非真正好官也。惟去任之後。紳衿百姓。思念不忘。則不愧古之循良矣。知府與知縣不同。知縣爲一邑之宰。果能殫竭心力。使四境之內。民人樂業。便是良有司。至於知府。則有統轄屬員之職。若各屬之內。有一人居官不善。在知府分內。即爲一分曠職。不可云潔已謹守。遂可無忝牧守之任也。天下人才難得。儻過於苛刻摧殘。則因細故微瑕。而至於放廢終身者不少矣。總之遇好官。則當愛重保護。之遇中材。則當勸導扶掖。之遇劣員。則當懲治罷黜之。以此督課屬員。有不觀感興起者。無此情理也。至於叅罰案件。外官必不能免。朕從不肯以情有可原之案。廢棄賢員。常有因公叅處之州縣官。朕見其人才可用。而適格加恩。遷擢者。爾等勿存見小之念。顧惜功

名。局於庸衆之規模。而無遠大之器量也。將此諭旨。吏部通行天下之知府直隸知州。知之。○癸巳。諭內閣。禮記曰。聖王之制祭祀也。法施於民。則祀之。以勞定國。則祀之。能禦大災大患。則祀之。此崇德報功之典。千古之不易者。而人心懿好之公。感恩追慕。有功於一郡。則一郡祀之。有功於一鄉。則一鄉祀之。此又緣人情而制禮。自古及今。名賢碩彥。享俎豆而奉蒸嘗者。不可勝數。吾弟怡親王。忠孝兩全。智仁兼備。嘉謨經國。渥澤安民。此朝野所共知者。古稱聰明正直之謂神。王之靈爽在天。不泯著通行內外直省。有欲爲王建立祠宇。歲時展祀者。著奏聞。准其舉行。其不能深知王之功德者。不必行。○調署廣東巡撫傅泰來京。陞貴州布政使鄂彌達。爲廣東巡撫。調雲南布政使張允隨。爲貴州布政使。司布政使甘肅布政使葛森。爲雲南布政使。司布政使。擢吏部員外郎諾穆圖。爲陝西甘肅

布政使司布政使前往噶斯。辦理軍需。以陝西西安驛傳道趙挺元署甘肅布政使。司布政使。○命湖廣提督馮允中。以提督銜管理陝西西大通西寧兩處總兵官印務。實授岳超龍爲湖廣提督。陞湖廣沅州副將范毓麟爲直隸天津總兵官。署河南河北總兵官。○乙未諭宗人府。朕之諸幼弟。朕向來不能深知。從前曾據怡親王奏稱。二十一阿哥允禧立志向上。且深知感朕之恩。恭敬之念。出於至誠。朕從前降旨。將伊封爲貝子。著晉封貝勒。公允禩。仍封爲郡王。理郡王弘晷。著晉封親王。公弘景。受朕寬宥之恩。深知感激。著晉封貝子。○諭理藩院。前往岳鍾琪處。額駙阿寶帶領該旗兵五百名。目今行至何處。著行文阿寶。即於彼處駐劄候旨。綽本帶領鄂爾多斯兵五百名。亦著行文綽本。就近揀水草佳處。駐劄候旨。此一千兵。著行文詢問大將軍岳鍾琪。或今年調往巴爾庫爾。或俟明年

進兵之前。調往二者。孰爲有益。並兵丁錢糧足與不足。俱著大將軍岳鍾琪定議具奏。再派往噶斯之京城兵。歸化城兵。共五百名。此時將及到。彼著格默爾帶領。在噶斯駐劄。富寧亦著前往噶斯。與格默爾一併管理。達鼐著來西寧。仍與鼐滿岱辦理事務。所有扎薩克蒙古等兵。著交與達鼐管理。或在錫喇他拉地方。或在從前額駙阿寶奏請駐劄之烏闌穆倫等處。相視形勢。駐劄。俟明年文到之日。前往噶斯。其青海之一千五百兵。相近噶斯。今年只在各遊牧處預備。亦俟明年文到之日。前往噶斯。達鼐既到噶斯。管理之後。富寧著回西寧辦理事務。○兵部議覆福建提督石雲倬疏言。提標中營所轄之徐州墟桃州隘二汛。在萬山中。瘴氣薰蒸。官兵病故者多。請將駐防徐州墟之守備。調回府城。其原汛改設長坑地方。以桃州隘千總一員移駐防守。再派外委一員。步兵一百一十名居中

扼要至徐州墟桃州隘舊地各設兵十名即
於長坑汛內按月輪派以均勞逸應如所請
從之○丙申以鑲藍旗滿洲都統綽奇署右
翼前鋒統領○吏部題二等精奇尼哈番智
勇因罪革退銷去恩詔所得拖沙喇哈番餘
三等精奇尼哈番以其子延福襲替從之○
議敘攻取桌子山碁子山軍功喀爾喀扎薩
克台吉巴爾漢等賞賚有差○丁酉甘肅巡
撫許容疏報文縣松坪寨等三十九處番民
輸誠歸化編里納糧下部知之

大清世宗敬天昌運建中表正文武英明寬仁
信毅大孝至誠憲皇帝實錄卷之九十四

大清世宗敬天昌運建中表正文武英明寬仁
信毅大孝至誠憲皇帝實錄卷之九十五

監修總裁官光祿大夫經筵講官太僕寺卿臣保和殿大學士兼兵部尚書總理兵部事務三等伯加十五級臣鄂爾泰

總裁官光祿大夫經筵講官起居注太僕寺卿臣保和殿大學士兼兵部尚書仍兼吏部尚書翰林院

第五等伯加十五級臣張廷玉光祿大夫經筵講官起居注太僕寺卿臣保和殿大學士兼兵部尚書仍兼吏部尚書

翰林院掌院學士加二級臣滿漢光祿大夫經筵講官太子太傅兼內閣大學士兼禮部尚書加六級臣徐本光祿大夫

經筵講官議政大臣協辦內閣大學士事務禮部尚書仍兼吏部尚書鴻臚寺卿臣三泰等奉

敕修

雍正八年庚戌六月戊戌朔日有食之戶

部議覆署直隸總督唐執玉疏言永平府屬
喜峰口倉存貯灤州盧龍遷安撫寧昌黎樂
亭等州縣竝永軍廳分運米石各州縣應賠
虧折米二千五百餘石請照通州中西二倉
例一體豁免查歷年奏冊俱稱實在存倉應
著落接受交代之員賠補得旨喜峰口倉糧
積貯年久難免蒸變折耗况歷任各官更換
多人更難責令賠補所有未完米石著從寬
豁免四川巡撫憲德疏言噶達上中下三

渡吹音堡等處新駐官兵口糧前經化林協
副將楊大立請給本色而一路山徑險峻輓
運艱難懇敕督臣查郎阿提臣黃廷桂再行
酌議得旨噶達等處兵丁口糧據該副將等
稱彼地米價甚貴商販每斗須八九錢一兩
不等從前所定折色之價不敷買米之用請
永遠供運本色而憲德等則以民夫挽運艱
難奏請會同督臣再加酌議等語兵丁遠駐
邊方朕心深為軫念彼地米價既貴自當格
外加恩著憲德等就近酌量竝詢問弁兵等
或即照商販之價給與折色令兵丁自行採
買或多添腳價給與民夫運送本色散給兵
丁著該撫等悉心定議務令兵糧富足民力
不擾○二等阿思哈尼哈番明舍因罪革退
以其親伯之子德克精格襲替○己亥諭內
閣今科進士除選拔庶吉士外曹繩柱係現
任中書以六部主事用其馬丙等五十八名
著在六部額外主事上學習行走該部按各

部司分多寡掣籤分派具奏三年之後如能稱職該部堂官題補如不能稱職該部奏聞其內若果有才猷出衆明練政治之員於一年之後該堂官將情由聲明保奏帶領引見請旨此各部行走學習之員俱著照額外主事之例給與俸祿○又諭今科外用進士著就伊等本籍鄰近地方掣籤派往交與各該督撫分派藩臬衙門令其學習伊等中式之後原須候選數年始能得官今著學習三年委署試用一年約計四年之後題補實授與伊等候選之期相仿而又得學習吏治較之間居在家豈不大有裨益此三年之內若該地方需用人員仍著奏請另行揀選命往不必於新科進士內遷就委用儻進士中果有才具出衆平日熟練吏治不待學習者該督撫格外委署題補即於本內聲明具奏若才具庸常難以練習吏治情願改補教職者不拘三年之期准其具題改補其學習之員每

年公費若干該督撫於公用銀兩內酌量給與著行文各督撫知之○工部尚書李永陞緣事革職陞刑部左侍郎張大有爲工部尚書調盛京刑部侍郎兼理奉天府府尹王朝恩爲刑部左侍郎庚子以原任副都統高峒爲鑲藍旗漢軍副都統○吏部議覆雲貴廣西總督鄂爾泰疏言廣西富川賀縣僻處邊隅猺蠻盤踞應添設官兵防守請於富川賀縣適中之麥嶺地方專設同知一員爲平樂府捕盜同知并添設守備一員千總一員兵一百五十名同駐麥嶺再牛巖小水峽應每汛添設把總一員兵五十名長圳村龍窩村各添設一汛每汛設兵二十名賀縣屬之開山崗應添設一汛以外委把總一員領兵二十名防守聯絡會哨總歸平樂協統轄均應如所請從之○移江南潁州州同駐方家集地方從調任安徽巡撫魏廷珍請也○贈故吏部尚書馬爾漢太子太傅賜祭一次○

辛丑以大理寺卿黎致遠爲奉天府府尹兼理盛京刑部侍郎事務○壬寅敕封陝西河州口外河神爲開津廣濟佑國庇民昭應河源之神○大學士九卿等遵旨議奏本朝定例親王之謚一字郡王之謚二字而大戴禮檀弓注云古者以生號爲沒後之稱原不必一定也伏稽歷代史冊懿親爲輔弼者有矣至於怡親王奉公體國精白一心孰如王之忠者夙夜恪恭始終無斁孰如王之敬者蓋忱篤渠一念不欺孰如王之誠者事必當理言必由衷孰如王之直者經理百度而不以爲勞宣贊機宜而不著其迹孰如王之勤慎者清潔之操一塵不染洞達之識纖悉無疑孰如王之廉明者可爲生前之寵錫即可爲身後之休光以此加於謚號之上洵合人心之至公請將

御書忠敬誠直勤慎廉明八字加於怡親王謚法之上其一字之謚交與宗人府議奏得旨

覽奏怡親王申錫美號之典與古禮相符庶足表王平生之美善朕心深慰著依議行其一字之謚著宗人府會同大學士定議具奏尋宗人府等衙門擬謚請旨命謚曰賢○癸卯內閣學士張坦麟緣事革職陞詹事府少詹事鄧鍾岳爲內閣學士兼禮部侍郎○青海厄魯特扎薩克郡王色卜騰扎爾故遣官致祭○甲辰諭內閣周書洪範言人身五事若有得失在天之休徵咎徵即各以其類應之此即朕每日所諭天人感應之理捷於影響者也夫所謂修人事以感召天和者必須君臣上下各盡其道各殫其誠以爲昭事

上天之本若人君有朝乾夕惕之心而大臣官員不能承流宣化或君臣有移風易俗之念而民情士習不能革薄從忠則偏而不全不克成會極歸極之盛而欲冀

上天俯垂默佑普錫繁禧也豈不難乎是以爲

君而存推諉於官民之心者。非賢君也。爲臣爲民而存推諉於君上之心者。非良有司良百姓也。惟當各盡其道以待。

天恩近見直省各處奏報雨澤頗覺均調。麥秋亦屬豐稔。朕心深慰。但聞江浙雨水稍多。田禾間有澇溢之患。朕悉心推求其故。想因今年春夏之交。京師雨澤愆期。朕爲畿輔祈禱。竝憂慮及於江浙地方。已而京師得雨。而朕心則專爲江浙祈求。至南方多雨情形。朕未嘗聞知。但以少雨爲懼。所以朕屢諭外省大臣。凡覺有水旱之機。即當速奏。朕知之者。正爲此也。南方旣已多雨。而朕心仍復祈求。或因此一念。以致。

上天賜雨過多。浙省有澇溢之處乎。又考之洪範曰。狂。恒。雨。若。浙省素稱人文極盛之區。今年會試。朕加恩取中至七十名。而一甲三人。悉登浙士。或者士子之心。不免矜驕之氣。如洪範之所謂狂者。致干恒雨之徵。此朕就目。

前之

天象人事而推測之。有不能無疑者。朕每遇雨暘不時。即撫躬自省。不敢玩忽。況古聖人之垂訓。千古爲昭。惟願浙之多士。遇登進之榮。即凜盛滿之戒。見示儆之象。益深敬畏之心。必能仰邀。

天眷於方來矣。○以故一等阿思哈尼哈番又一拖沙喇哈番英壽姪班第襲職。○乙巳子故福建水師提督藍廷珍祭葬。贈太子少保謚襄毅。○丙午大學士等議覆廣東總督郝玉麟等遵旨議奏粵東更改營制事宜。○左翼鎮標右營遊擊請移駐蘆苞口汛。○新會營遊擊請改爲叅將。添設守備千總各一員。把總四員。兵六百七十七名。同原設之守備千總把總營兵等分爲左右二營。統隸叅將管轄。其添設之守備駐防崖門。向有將軍督撫三標貼防該縣兵丁俱行撤回。○河頭汛請添設都司千總各一員。把總二員。兵四百。

名兼防甕崗石窩龍逕各汛歸羅定協統轄向有督標原防各汛弁兵俱行撤回。龍門營請改隸增城營管轄其增城營遊擊改爲叅將一抽調廉州營把總一員兵九十名再添募兵三十名一併歸入化石營一崖州營遊擊請改爲叅將添設千總外委各一員兵一百十八名一請移原防市橋之虎門協右營都司一員帶兵一百二十名駐南村並移番禺縣縣丞一員同駐其地以司巡查一廣州春江二協請即以副將專營無庸仍隸左翼鎮標管轄並添設廣州協千總外委各一員兵一百四十五名其三水管亦添兵二十八名一左翼鎮標二營右翼鎮標三營及增城一營俱無守糧應酌量改戰爲守與通省畫一並添設右翼鎮標兵三百四十五名一香山縣請添設縣丞一員駐劄前山寨城稽查分管調原駐之守備防守縣城均應如所請從之○旌表陝西鄠縣烈婦楊性妻李氏

守節拒姦被毆殞命給銀建坊入祠致祭如例○丁未諭大學士等從前怡親王常在朕前奏稱白家疇一帶居民忠厚善良深知感激朝廷教養之恩今王薨逝而彼地居民人等感念王之恩德願自備資本建立祠宇歲時致祭輿情懇切足徵王之遺愛在人而民風醇厚亦即此可見朕欲將白家疇數村地丁錢糧永遠蠲免以爲將來祭祀香火之資並使良民均霑恩澤爾等確議具奏尋議白家疇等十村莊具呈建祠之鄉民共三百餘戶內有田土者甚少查得此地附近有入官田土三十餘頃需人耕種不若將此數村人口酌量多寡派撥地畝令其世世管業每年除辦祭物外俾得均霑餘潤所有應納錢糧永遠蠲免庶於鄉民俱有裨益從之○以正黃旗漢軍都統金以坦正紅旗漢軍都統伯李林俱暫行兼理鑲紅旗漢軍都統事務○戊申擢內務府郎中海望爲內務府總管○

雲貴廣西總督鄂爾泰疏報黔省黎平都勻等處生苗共二百七寨歸化供賦下部知之○壬子吏部題三等伯富達禮緣罪革退銷去恩詔所得拖沙喇哈番餘一等精奇尼哈番又一拖沙喇哈番以原立職之石廷柱孫慶德襲替一等阿思哈尼哈番已錫故銷去恩詔所得拖沙喇哈番餘二等阿思哈尼哈番以其親伯之二世孫穆爾泰襲職從之○甲寅陞太常寺卿署江西巡撫謝旻爲大理寺卿仍署江西巡撫印務○二等精奇尼哈番根敦查布因罪革退以其親兄達克薩哈襲替○乙卯山西巡撫覺羅石麟奏言六月初一日太原等處日食之期濃雲密布未見虧蝕紳民稱瑞理應奏賀得旨從前欽天監奏今年六月初一日日食九分二十二秒朕心深爲畏懼特降諭旨令內外臣工等悚惕勉最各盡厥職以凜天戒今石麟以山西省城當日食之時濃雲密

雨及雨霽之後日已復圓具本題賀宋嘉祐時日食入雲不見時議稱賀司馬光云京師不見四方必有見者今晉省陰雨豈能概論天下乎石麟所奏殊屬不合著將本發還○旌表山西朔州烈婦王善教妻劉氏夫亡逼嫁投井全節給銀建坊入祠致祭如例丙辰諭內閣凡內外大小事務必據實辦理始得其是非之正合乎人心之公若有挾制之弊及苟且遷就之情則事不得其正而違乎人心之公其爲吏治風俗之患不小矣至於文武雖屬兩途然同爲朝廷之官同辦國家之事實爲一體所當和衷共濟據實秉公以盡勿欺之道聞得外省有文官已申文書而武員恐其干碍或於中途掣回者或勉強令其更改者武旣可以施之於文則文亦可以施之於武似此挾制成風苟且遷就何以得事之實情除事之弊竇況目前雖草率結局而嫌隙自此而生文武不和實始於此著督

撫提鎮通行曉諭嚴加禁約。儻所屬有犯此等情弊者。即據實叅奏。毋得姑容。○河東總督田文鏡奏言。豫省紳衿感戴

皇仁恭建

萬壽碑亭。得旨。朕以實心實政。訓示天下臣民。如稱功頌德。建立萬壽碑亭。鏤金刻石之舉。皆屬粉飾虛文。朕所不取。前以豫省官方整肅。民俗醇良。感召

天和屢豐有慶。是以特加恩賜。用示褒嘉。該省官民紳士。感激朕恩。惟有益加黽勉。永爲循吏良民。以承

上天之眷佑。至於撰文建碑。稱揚功德。不過外觀之虛文耳。嗣後他省若有倣倣而行者。著該督撫先期諭止之。○丁巳。廣東總督郝玉麟奏言。瓊州府等處於本年三月十八日。祥雲朗見。五彩繽紛。自卯達辰。經兩時之久。得旨。年來各省奏報慶雲者甚多。朕竝未以爲祥瑞。該地方官民宜各修職業。益加黽勉。以

迓

天庥。○以故三等阿思哈尼哈番富來子舒通阿襲職。○旌表江南黔縣烈婦劉天元妻查氏拒姦不污。自刎殞命。給銀建坊。入祠致祭。如例。○戊午。予故江南河道總督孔毓珣祭墓。謚溫僖。○予故原任奉天副都統納秦祭墓。如例。○己未。諭戶部。甘肅地方雍正八年地丁錢糧。前已降旨蠲免。其河西四府州縣暨各衛所額徵糧料草束。又經一體免徵。朕念新歸內地番民。嚮風慕義。願附版圖。其地畝額徵本色糧草。與河西等處賦稅相同。亦應一體蠲除。俾令同霑恩澤。著將雍正八年河東之河州廳。洮州衛。歸德所。河西之西寧涼州府屬。應徵番糧。共一萬二千有奇。俱加恩蠲免。該督撫即督率所屬有司。敬謹奉行。俾番民均霑實惠。○諭兵部。上年派令滿洲兵五百名駐劄晉省。都統鄂善約束嚴肅。兵民頗覺相安。今鄂善奉差陝西。覺羅石麟接

受管理甚爲踈縱兵丁之中有聚飲酣醉恃衆毆打民人者有醉後混入民家者又今年六月初二日有兵丁之馬二十餘匹至東門外將民田喫損八九畝踏傷十餘畝次日鄉民聚集百餘人拴帶馬五六匹擁至巡撫衙門擊鼓喊叫撫臣始差官查究朕所聞者如此凡差往各省官弁兵丁朕每諄諄訓誨望其奉公守法與百姓聯爲一體休戚相關今派往晉省之兵恣意妄行嬉遊放肆不遵法令擾累居民甚屬可惡目今晉省已不須滿兵駐劄著護軍統領宗室哈爾吉前往太原府將滿洲官弁兵丁俱行撤回并會同巡撫覺羅石麟將生事不法之兵丁一一查出重加懲治即於太原府通衢枷號示衆其該管章京亦查出據實糾叅毋得稍有踈縱徇隱覺羅石麟身爲巡撫不能約束兵丁著交部嚴加議處○湖廣鎮總兵官周一德奏報白沙及明溪等處五月十一日慶雲麗天霞

光萬道自辰至酉萬目共覩得旨朕不以慶雲爲祥瑞湖南地方民多刁悍俗亦頑梗該省官員果能實心化導使之奉守法度化鷙悍爲循良易澆漓爲醇厚此則朕心之所謂祥瑞也○辛酉大學士等遵旨議奏怡親王瑩制宜用享堂七間享堂之外中門三間內圍牆一百丈中門之內建焚帛亭祭器亭中門之外建神厨五間神庫三間東西廂及宰牲房各三間碑亭一座其外爲大門三間週圍牆二百九十丈大門外設奉祠房二十間再加石橋二石牌坊一擎天柱二神道碑一俱斟酌典禮允合輿情得旨怡親王有遺言身後殯殮只用常服一切金玉珠寶之屬槩不可用王妃及諸子遵其遺言只以常服爲殯即平日所束之帶亦未曾用朕親臨其喪亦祇以血淚巾帕及所佩香囊附棺中示含玉之意誌永訣之哀蓋王天性節儉一生服食之需愛惜物力不肯多費絲粟故拳拳於

身後如此且識見高明深凜古人寶玉送死之戒是以附身附棺之物皆從其遺言不忍違其素志至於園寢之制則關係國家之典禮德懋懋官功懋懋賞乃古今之通義恐非朕所得私亦非王所可讓者今大學士九卿等詳明定議悉與典禮符合甚愜朕懷著依議行○癸亥諭內閣禮部尚書石文焯原係庸才內陞以來每事退縮毫無踴躍奮勉之心著革任以原品在八旗井田効力行走兵部尚書馬會伯在肅州委辦軍需以來諸凡推諉貽誤措置顛倒著革職仍令在甘肅署理總兵官事務効力贖罪○陞禮部左侍郎錢以壇爲禮部尚書左都御史署直隸總督唐執玉爲兵部尚書仍暫署直隸總督吏部左侍郎署兩江總督史貽直爲左都御史仍暫署兩江總督調倉場侍郎劉於義爲吏部左侍郎實授徐天相爲總督倉場侍郎○戶部右侍郎汪澂緣事革職陞內閣學士俞兆

晟爲戶部右侍郎實授孫嘉淦爲工部左侍郎仍管順天府府尹國子監祭酒事以左副都御史謝王寵爲宗人府府丞陞宗人府府丞冀棟爲都察院左副都御史擢監察御史顧琮爲太僕寺卿辦理水利工程事務○以工部右侍郎鄂爾奇內閣學士任蘭枝署戶部侍郎阿山教習庶吉士○山西太原總兵官袁立相因病解任陞浙江嘉興副將王緒級爲山西太原總兵官○乙丑諭宗人府怡親王第三子弘暉朕指配富察氏尚未婚娶而弘暉病故富察氏聞信即慟哭截髮至王府懇求持服守制彼時怡親王不允富察氏於門外跪哭以夜繼日王始終未允并未遣人與彼一語王之意以王子已故不忍再誤富察氏之終身也乃富察氏歸至母家持服守節二年以來之死靡他今年吾弟薨逝富察氏又至王門悲慟啣哀懇求服孝從前之事吾弟並未奏聞今王之管事人員以應否

准其服孝奏請。朕始知之。遂降旨准伊服孝。令進王府。諭王妃收以爲媳。富察氏以幼年之女。能知大義。矢志栢舟。其情可憫。其行可嘉。弘燾身後一應禮儀。俱照貝勒之例。著於弘燾親姪內。以一人爲弘燾之嗣。即襲封貝勒。令富察氏撫養。俾其無子而有子。以彰節女之厚報焉。○移江南定遠縣主簿。駐北爐橋東地方。從署兩江總督江蘇巡撫尹繼善請也。○丙寅。諭內閣。尚書舜典云。欽哉。欽哉。

惟刑之恤哉。朱子曰。所謂欽恤者。欲其詳審曲直。令有罪者不得免。而無罪者不濫刑也。吾弟怡賢親王嘗奏朕云。今法司衙門。凡有審問事件。並不究其情之虛實。動以夾訊。夫聽斷之下。求之於辭氣耳。目以察其情。設誠以待之。據理以鞫之。未有不得其實者。何庸夾訊。儻有証佐確據。情罪顯著。而本犯猶狡獪。不以實供。則不得已而用刑。若並不詳鞫其情。而槩用重刑。嚴訊三木之下。何求不得。

此重案之未免有冤抑牽累也。吾弟之言如此。是以八年以來。凡朕交王承審數十件。繁難大案。皆以誠敬用心。以情理感格。簡孚閱實。愚頑自將罪犯。委曲招吐。從未嘗夾訊。榜楚一人。而諸案情罪。無不允當。吾弟之存心忠厚如此。今外省有司。既不能聽辨五辭。無明決折獄之才。每遇重大案件。至期限將滿之時。慮及處分。則連用重刑。該犯欲緩須臾之命。凡官吏訊問之語。靡不承認。遂據其供。

招鍛鍊成獄。且凡遇命盜案件。其中牽連之人。有司亦明知其無辜。而欲爲開釋。恐致上司之翻駁。遂有非夾訊不能歸結之論。夫欲保全一己之功名。彌縫上司之查駁。無論情之虛實。罪之輕重。輒用三木以訊。每致未結而有刑斃之人。此其居心尚可問乎。吾弟怡賢親王存心仁恕。固不待言。而其本懷總不欲使天下有一冤抑之人。俾國家受濫刑之議。此其忠君愛國之心。出於誠懇篤摯。是以

凡有聽斷歸乎至當能使羣議帖服刑章式敘也今吾弟薨逝之後凡啟靈大祀之日上天必賜以清和景象而羣工黎庶各致其哀慕深情天之報吾弟亦云厚矣吾弟嘉謨入告之事不可勝數偶因戒飭問官輕用三木一節將吾弟敷奏之言宣示於衆且布告各省有司令咸以吾弟怡賢親王之聽訟居心奉爲按鞠之規範則明慎用刑庶幾咸中有慶矣著凡掌刑名衙門將此諭刊榜永示於堂署○丁卯諭內閣江寧織造郎中隋赫德具摺奏稱本年六月初一日日食之期江寧地方先期陰雨至午後則天色晴明萬物共見日光無虧地方咸以爲瑞特行奏賀等語朕彼時即批諭切責隋赫德此並非爾職掌應奏之事且以識見庸鄙之人而輕言天象尤屬誕妄又山西巡撫覺羅石麟奏稱太原等處濃雲密雨日食不見朕亦降旨切加申飭矣從來

天象之災祥由於人事之得失若上天嘉佑而示以休徵蓋欲人之知所黽勉永保令善於勿替也若

上天譴責而示以咎徵蓋欲人之知所恐懼痛加修省於將來也凡爲人者受天嘉佑而或驕矜縱肆怠惰前修則將轉福爲災矣受天譴責而或戒慎悚惕省改前愆則將化災爲福矣此天人感應呼吸相通之理朕所日日訓示天下臣民者况天之錫福降災即如人君之賞罰也凡爲臣者受賞一次則終身當有奮勉感激之心受罰一次則終身當有儆惕抱愧之意安有過後即淡漠置之俟再有賞罰之時而復知感懼者乎雍正八年六月初一日之日食乃

上天垂象以示儆所當永遠敬畏勿忘兢業之心詎可以偶爾觀瞻之不顯而遂誇張以稱賀乎山西地方偶值陰雨不可以概天下至隋赫德所稱江南日光不見虧缺朕推求其

故蓋日光外向。過午之後。已是漸次復圓之時。所虧止二三分。是以不顯虧缺之象。昔年遇日食四五分之時。日光照耀。難以仰視。皇考親率朕同諸兄弟。在乾清宮。用千里鏡。四週用夾紙遮蔽日光。然後看出考驗。所虧分數。此朕身經試驗者。若果虧蝕不及分數。則係欽天監推算之誤。又豈可因此而怠忽。天戒稍存縱肆之心乎。康熙三十六年二月初一日日食。是時我

皇考降旨。日食雖人可預算。然自古帝王。皆因此而戒懼。蓋所以敬天變。修人事也。若庸主則諉諸氣數矣。去年水潦地震。今又日食。意必陰盛所致。豈可謂無與人事乎。可諭九卿。如有人事應修改者。悉行奏聞。

皇考敬

天之心。誠切如此。是以

上天眷佑。本年即成蕩平。噶爾丹之大功。邊方寧謐。中外歡騰。此即轉災爲福之明徵也。又

康熙五十八年正月初一日日食

皇考在宮。敬謹齊肅。

特命朕同諸皇子。赴禮部衙門。虔誠禮拜。是日陰雲微雪。未曾顯見。

皇考諭廷臣曰。京師雖未曾見別省無雲之處。必有見者。況日值三始。人事不可不謹。或有缺失之處。諸臣應商酌確議。此皆我

皇考之垂訓。子孫臣民者。今見外省臣工中有因今年日食不顯而生欣喜之心。爲慶賀之

奏者。甚屬非理。大違朕心。特諄切宣諭。俾中外臣民共知之。○旌表湖北彝陵州烈婦毛秉德妻周氏。遇賊守節投巖殞身。給銀建坊入祠致祭。如例。

大清世宗敬天昌運建中表正文武英明寬仁
信毅大孝至誠憲皇帝實錄卷之九十五

大清世宗敬天昌運建中表正文武英明寬仁
信毅大孝至誠憲皇帝實錄卷之九十六

教修

雍正八年庚戌秋七月戊辰朔享

實錄卷九十六

太廟遣裕親王廣祿行禮○己巳陞光祿寺卿
史在甲為太常寺卿○以正白旗護軍統領
魏臘署正藍旗蒙古都統○庚午

上親詣怡賢親王殯所奠酒○諭內閣怡賢親
王月祭著行至明歲八月舉殯時明歲週年
及舉殯前期俱照大祭禮讀文致祭三年後
每歲俱行常祭禮此係特恩後不為例○辛
未予故湖北巡撫費金吾祭葬如例○壬申
諭八旗武職大臣等武藝者乃滿洲之本務

八旗大臣有管轄兵丁之責理宜操練武藝習勞苦耐寒暑以及疾趨超距撲跌等技留心諳習近觀大臣官員侍衛等值班俱不親佩腰刀一味偷安又不操練服習勞苦儻遇緊要處不能爭先獨使兵丁前進乎抑停留等待乎且至彼時力不能支即懷奮勇之心亦屬無用安能使兵丁克稱精銳乎從前皇考每歲行圍令衆人學習技勇服習勞苦及朕即位仰思

皇考付託之重八年以來勵精圖治未及巡幸郊外而武職大臣侍衛官員兵丁技力亦漸不如前不可不急爲整飭嗣後八旗武職人員及各省駐防之武職人員年未至五十五歲者勒限半年令各奮力學習一切技勇若仍有自圖安逸不肯學習者或經朕調來引見或經朕行幸時查出必重加懲治責革照違旨例治罪如有學而不能者准其告退○大學士等議覆寧遠大將軍岳鍾琪遵旨議

奏派出牧馬之鄂爾多斯青海蒙古兵一千名請於今年調赴軍營應如所請從之○改湖南永州府清軍同知爲理彊同知移駐江華縣添設道州江華縣遊擊千總各一員寧遠縣永明縣守備各一員道州江華寧遠永明之緊要各汛千總二員把總八員百隊十六員募添分汛兵丁共三百名從湖廣總督邁柱請也 癸酉諭兵部舊例武弁給與親丁名糧以爲養贍僕從家口之需前朕聞弁員等離任時即將隨丁名糧召募補足而接任之員陸續候缺每至數載不得養贍之資甚爲艱窘已特降諭旨嗣後武弁去任者將所有名糧不必募補留與接任之員俾其得需餘潤此無非體恤貧員給與養廉以免扣剋虛冒苦累兵丁之弊也近聞武弁等若有陞遷事故者於該員離任之日即將隨丁名糧按數開除其住支銀米歸作截贍項下彙報充餉俟新任之員到日方許申報起支朕

思署事之員不無往來車馬食用之費且各營署事多係部發候補試用之人並無俸薪等項應爲籌畫養贍之道嗣後武弁去任之時其親丁名糧照舊存留不必歸入截曠項下其署事之員若係候補試用者准其全行支給以作養廉若係現任之員兼理者准其支給一半將一半留在本營以爲修葺衙署添補器用之費即文該營守備存貯如有動用之處每季造冊申報該上司查核著各直省一體遵行

理藩院奏巴林扎薩克多羅郡王林穆布每日酗酒縱飲將護衛大受乘醉擅殺燒毀殘忍濫惡請革退王爵解京圈禁從之

四川巡撫憲德疏報建昌所屬木裡喇嘛率衆歸誠懇附版籍下部知之

甲戌諭內閣虞書曰明四目達四聰先儒註曰廣四方之視聽以決天下之壅蔽也蓋天下之患莫大於耳目錮蔽民情物理不能上聞則雖有勵精圖治之心而措置未必合宜

究難成一道同風之盛是以各省督撫大臣於本章之外有具摺之例又以督撫一人之耳目有限各省之事豈無督撫所不及知或督撫所不肯言者於是又有准提鎮藩臬具摺奏事之旨即道員武弁等亦間有之此無非公聽並觀欲周知外間之情形耳並非以奏摺代本章凡摺中所奏之事即屬可行之事也是以奏摺進呈時朕見其確然可行者即批發該部施行若介在疑似之間則交與廷臣查議亦有督撫所奏而批令具本者亦有藩臬等所奏而批令轉詳督撫者亦有聽其言雖是而不能必其奉行之無弊則批令實心勉勵還朕一是字者凡爲督撫者奉到硃批之後若欲見諸施行自應另行具本或咨部定奪爲藩臬者則應詳明督撫俟督撫具題或咨部之後而後見諸施行若但以曾經摺奏遂藉口已經得旨而毅然行之則凡錢糧之開銷官員之舉劾以及苗疆之軍務

地方之工程諸如此類督撫皆得侵六部之權藩臬皆得掣督撫之時矣行之日久滋弊必多爲害甚鉅不可不防其漸也且各省文武官員之奏摺一日之間嘗至二三十件或多至五六十件皆朕親自覽閱批發從無留滯無一人贊襄於左右不但宮中無檔案可查亦並無專司其事之人如部中之有司員筆帖式書吏多人掌管冊籍繕閱規條稽查原委也朕不過據一時之見隨到隨批大抵其中教誨之旨居多今於教誨之處則未見敬謹遵奉而於未曾允行之事件則以曾奏過三字含糊藉口以圖自便有是理乎況朕曾降旨凡摺中批諭之處不准引入本章以開挾制部臣之漸則奏摺之不可據爲定案又何待言乎著將此曉諭各省奏摺諸臣知之若督撫提鎮等以此愚弄屬員擅作威福准屬員據實揭報或該部或都察院即行奏聞若屬員等以此挾制上司肆志妄行著該

督撫提鎮等即據實參奏○諭都察院凡國家之事須實心辦理公同商酌務期妥協若以衙門人衆互相推諉因循怠忽此風斷不可長爾都察院衙門堂官及御史等所交事件理應同心辦理如堂官有不到之處爾等御史亦當共相協助何得視爲膜外今議設立巡檢一疏內稱設立巡檢原以助兵馬司耳目之所不及該鋪內一應盜逃以及黃銅賭博宰牛鬪毆打降酗酒等項應令該巡檢協理稽查不得專擅以侵司坊官之職守凡遇有地方應報事件當令該巡檢一面申報該城御史仍一面報明該司坊官庶不致生事滋擾等語夫既令其稽查又止許其報明不得擅專儻或地方有不法等事必待報明然後拘拏遇盜賊則盜賊已逃遇賭博則賭博已散遇酗酒則醉者已醒雖三尺之童亦知其斷不可行者爾等獨不計及此乎且設一官必有一官之職若止許其報明則與番

捕無異何必設此巡檢如恐其生事滋擾則當議令一面拘拏一面詳報不許擅自審理儻有不應拘拏之人牽連被累該城御史審明之日將該巡檢叅處方爲妥協爾等俱係言官乃本衙門應辦之事並不實心辦理遲延數月仍復草率定議甚屬不堪著將原本擲還另行詳細妥議具奏其都察院堂官及御史等一併交部察議尋議五城關內關外巡檢於該管地方遇有盜逃及黃銅賭博宰牛鬪毆酗酒等事將人犯立即拘拏報明司坊官詳解該城御史發落該巡檢不得擅自審理從之○乙亥諭內閣各省文武諸臣奏摺經朕硃筆批示者俱令呈繳以備稽查但向來未定呈繳之期以致各員遲早不一有二三月後乘便呈繳者有於年底彙齊呈繳者夫既奉硃批查辦此事下次查辦奏事之時即應將硃批原摺呈繳以備朕之檢閱若具奏此事而仍留硃批原摺於外則朕處無

檔案可稽未免難於辦理著通行曉諭凡接到硃批者仍照舊乘便呈繳若具奏此事應將原批一併呈進如所批查辦之事尚未就緒准將硃批存留俟辦理具奏之時一同呈繳○丙子雲貴廣西總督鄂爾泰疏報貴州上戛情等寨生苗抒誠歸化願附版籍下部知之○丁丑

孝懿仁皇后忌辰遣官祭

景陵○轉禮部右侍郎蔡世遠爲左侍郎陞內

閣學士吳士玉爲禮部右侍郎兼內閣學士行走○戊寅諭內閣國家効忠宣力之臣勲績茂著必膺崇報之典令其世享祚嘗雍正二年朕已勅建昭忠寺自開國以來致命立功盡忠報國之儔皆得春秋妥侑世世血食顧念古者大烝之祭凡法施於民以勞定國者皆得並列祀典永受明禋則我朝名臣良弼其經邦佐治黼黻昇平者皆祭法所必登朕欲爲之建立祠宇久矣即如怡親王之精

白一心忠誠體國勲在

社稷澤被生民其功德隆盛又豈一切効忠宣力者之所可比倫乎洪惟

太祖

太宗創業垂統厥有一德佐命之良

世祖撫綏萬邦實多奮庸熙載之彥迨我

聖祖臨御六十餘年其間良臣碩輔後先相望

據朕所深知者舉其一二如大學士公圖海

公賴塔大學士張英尚書顧八代馬爾漢趙

申喬河道總督靳輔齊蘇勒總督楊宗仁巡

撫陳瓚等持躬正直奉職公忠或垂節鉞之

勲或勵冰霜之節俯仰無愧爲朝野所共欽

終始不渝無瑕疵之可指似此等靖共爾位

不愧古大臣之風者正不乏人既樹羽儀於

一世宜隆俎豆於千秋且使世世爲臣者觀

感奮發知所慕效羣以臯夔稷契共相期待

則明良喜起之盛朕於斯有厚望焉著於京

城內白馬關帝廟之旁選擇吉地特建廟宇

命名賢良祠春秋以時展祀其應入祠之員

著內閣會同該部確查本朝滿漢文武大臣

才德著聞完名全節者詳慎開列具奏請旨

將來繼起之臣亦併得沾被恩光永爲盛典

○議政王大臣等議奏學士僧格貝子頗羅

鼐所領巡防兵應令於降雪後撤回俟明歲

進兵時仍往騰格里腦兒駐扎得旨今年大

兵既停進發著行文與僧格等令伊等酌量

於未降雪之前撤回明年著僧格仍舊帶往

其綠旗官兵照今年賞給之例賞給再發銀

一萬兩著頗羅鼐明年酌量賞給唐古特等

之兵○刑部議奏從前設立鼓廳衙門以達

民間冤抑原派科道輪流巡值嗣因歸與通

政司管理未派專員致有誣妄越訴之人踰

牆混行擊鼓請飭通政司每月派叅議一員

輪班掌管遇有擊鼓之人訊取確供奏聞請

旨其有因小事突入誑告者首犯杖一百徒

三年餘人減一等若捏告大款欲思洩忿及

將法司已經斷明事件妄圖翻案者首犯發邊遠衛所充軍餘人減一等如有教令主使之入各照首犯治罪從之四川巡撫憲德疏奏打箭爐口外需用糧米成都新繁等州縣士民情願不領夫價輸力輓運丹稜溫江等州縣士民情願捐米輸力運赴得旨士民等急公輸輓甚屬可嘉著該撫宣旨獎諭應領夫價仍著照數給領其已捐之米將存倉米石給還改山西保德州所屬興縣仍隸太原府管轄從山西巡撫覺羅石麟請也

己卯江南河道總督嵇曾筠疏報六月二十六七等日風雨連綿東省蒙陰沂州郯費滕嶧各地方山水暴發直注邳州溢入黃運兩河奔騰南注已飭該道廳等加謹保護無使漫溢得旨今年春夏之交北方雨澤畧少朕即慮夏秋之間雨水必多屢諭河臣加謹保護工程以防伏秋之汎今觀湖河漲溢情形有非人力所能捍禦者朕惟有修省戒懼以

凜

上天示儆之深恩更念邳州宿遷桃源等處水勢驟長禾稼室廬必遭淹沒深可憫惻著差往江南清查錢糧之侍郎馬爾泰彭維新御史安修德等星赴被水地方動支藩庫銀數萬兩速行賑濟並遴選廉幹人員帶往分派各處會同地方官悉心辦理勿稍稽遲勿令遺漏務使窮民人人安堵寧居咸得其所其被災之處今年額徵錢糧著悉行蠲免儻有已經完納者准作明年額徵之數聞山東發水之處民間田舍亦被損傷著巡撫岳濬遴選賢能官員前往查勘動支庫銀速行賑濟勿使一夫失所其應行蠲免錢糧之處著一併確查奏聞請旨河東總督田文鏡奏河南管河道拖克拖海玩忽河工於伏汎危險之時並不竭力督率搶護協理河臣范時繹安坐旁視藐法誤工請革職嚴審得旨拖克拖海以筆帖式微員用為河南南岸同知

經田文鏡嵇曾筠等大計特薦來京引見朕
看其人甚屬平常但因伊等合詞薦舉料其
必有所見於是准其卓異旋陞戶部員外郎
因其熟諳河工仍以陞銜管河工同知事務
今年春夏之間朕因嵇曾筠摺奏拖克拖海
可勝充寧道之任後見田文鏡將王鴻勳題
補充寧道降旨詢問田文鏡據田文鏡奏稱
王鴻勳宜於充寧道之缺拖克拖海在豫日
久熟練河工若用爲河道實爲駕輕就熟於
是與嵇曾筠會題請將伊補授河南管河道
朕降旨俞允以此等微末不堪之員數年之
內屢膺薦舉受朕深恩格外超遷至觀察大
員之職拖克拖海苟有人心宜何如奮勉急
公以圖報稱乃當河工伏汎危險之時而伊
視本身職掌如同局外顯因田文鏡未曾將
伊題補充寧道蓄憾於心又見差委朱藻到
工監督中懷嫉妬以爲功過成敗與己無涉
似此挾私廢公背恩藐法將上司屢次薦舉

之德一槩遺忘尚得謂之有人心者乎范時
繹乃一旗員朕念其爲勳臣之後加恩擢用
諄諄訓誨望其克紹家聲乃在江南總督任
內玩愒廢弛因循苟且無一察吏安民詰姦
禁暴之善政且其居心行事詐僞不誠巧令
朱鴻緒在朕前奏其操守廉潔至於日食不
數朕聞之惻然動念急令江南江西巡撫等
爲伊籌畫養廉之道及查明之後始知伊於
應得之項原係收受並不至於艱窘而朕猶
欲俾其用度寬餘仍令加增以與之無非成
就其操守使之專心殫力於封疆也乃江浙
地方潛藏匪類生事不法蠱惑人心朕令李
衛悉心查拏李衛果恪遵辦理又密諭范時
繹若浙江文到江南查緝人犯務必慎密拏
解勿使漏網豈料范時繹袒護私交縱容匪
類竟有與馬世珩通同作孽之事各犯供據
鑿鑿不能掩飾朕猶密諭李衛於審訊定案
之時留意保全勿使罹於重罪蓋猶諒其無

交結逆黨之心不過瞻徇情面之所致且范氏一門現今爲大員者止范時繹范時捷兩人耳勲臣後裔漸致零落朕心不忍所以委曲成全之者至矣范時繹到京朕仍不肯令其罷斥廢棄特命料理太平峪吉地工程以爲効力自新之路適因北河總督不得其人於是命伊前往膺茲重任伊出京之時朕面加訓勉伊亦自陳感恩悔過願圖後効情詞懇切豈料范時繹下愚不移以本身專司之務又當伏汎危急之時田文鏡所委各員俱上緊搶護而范時繹與拖克拖海安坐於旁竟同陌路視國事如弁髦視民命爲草芥此等負恩溺職之愆在他人尚且不可況在范時繹之身乎拖克拖海著革職即於河工險要地方永遠枷號示衆范時繹亦著革職將一切工程交伊加謹防護俟秋汎過後拏送來京將伊從前所犯罪案悉行查出從重定擬具奏儻今年秋汎防護不謹少有疎虞即

將范時繹拖克拖海請旨在貽誤工程之處正法凡人貪得求進之心無有止足而又不自知其分量受恩而永遠知感者少稍不滿意而心懷怨望者多是以上司待屬員之難亦如人君之待人臣也當其未用之前則思進用既進用矣又思邀君心之信任既信任矣又或以不及某某爲憾即如舉効之間若諸臣意見僉同人君亦何樂而不從之無奈彼此所言互異不得不斟酌審量以定去取而不從其言者又以此怏怏於心似此懷庸鄙之見者正不少也屬員之於上司始初被薦之時亦知感激及遲至一二年後州縣則以不得題陞府道爲憾矣府道又以不得題陞兩司爲憾矣偶見同列遷官即起妬嫉之念或見他人信用即生退縮之心如拖克拖海今日之事小人之情狀畢露不得不嚴加懲治以挽頽風而祛惡習著通行直省共知之 裁甘肅巡撫衙門筆帖式一員從甘肅

巡撫許容請也○庚辰陞詹事府少詹事趙殿最爲內閣學士兼禮部侍郎○調廣東提督王紹緒爲江南提督廣西提督張漉爲廣東提督陞雲南臨元總兵官張應宗爲廣西提督雲南督標副將魏肅國爲雲南臨元總兵官○辛巳大學士馬爾賽等遵旨議奏恩賞各鎮標兵營運生息備用銀兩按數酌擬陝西西寧鎮二萬兩涼州鎮一萬六千兩江南蘇松鎮一萬四千兩陝西寧夏鎮廣西左江鎮各一萬三千兩浙江定海鎮湖廣鎮軍鎮彞陵鎮福建漳州鎮汀州鎮陝西延綏鎮雲南曲靖鎮烏蒙鎮貴州古州鎮各一萬二千兩江南狼山鎮浙江黃巖鎮溫州鎮福建臺灣鎮福寧鎮山東登州鎮陝西肅州鎮廣東左右二翼碣石鎮雲南普洱鎮各一萬兩直隸正定鎮浙江處州鎮福建海壇鎮金門鎮山西大同鎮陝西興漢鎮廣東潮州鎮雲南鶴麗鎮永順鎮楚雄鎮開化鎮臨安鎮各

九千兩湖廣襄陽鎮江西南贛鎮陝西西大通鎮廣東高州鎮雲南永北鎮四川北鎮重慶鎮松潘鎮建昌鎮各八千兩直隸宣化鎮山東兗州鎮湖南永州鎮河南南陽鎮河北鎮廣東瓊州鎮廣西右江鎮貴州安籠鎮各六千兩直隸馬蘭鎮天津鎮江西南昌鎮福建南澳鎮左營廣東南澳鎮右營各五千兩行令各鎮總兵官會同督撫提督於該省藩庫照數支領料理營運從之○壬午中元節遣官祭

永陵

福陵

昭陵

昭西陵

孝陵

孝東陵

景陵○貴州巡撫張廣泗疏報南籠思南等三府開州清鎮等五州縣開墾本年分田地十

一項有奇下部知之 癸未復設江南蘇州府總捕同知海防同知各一員松江府董漕同知水利通判各一員常州府水利通判總捕通判各一員從江蘇巡撫尹繼善請也○添設河南太康縣縣丞一員祥符縣朱仙鎮巡檢一員從河東總督田文鏡請也 甲申以正藍旗滿洲都統查爾泰署鑲紅旗滿洲都統○移貴州南籠府通判駐威遠汛地方隸安順府統轄從雲貴廣西總督鄂爾泰請也○旌表貴州遵義縣烈婦張問明妻胡氏守正拒姦被刃殞命給銀建坊入祠致祭如例○乙酉戶部議覆雲貴廣西總督鄂爾泰遵旨酌定烏蒙總兵劉起元條奏苗疆事宜一烏蒙係改土新疆與威寧接壤應於松林嶺地方勒石定界以八仙海子歸烏蒙管轄稻田壩仍屬威寧管轄一烏蒙府設有永善一縣新經改流諸事尚未就緒應增置烏蒙一縣隸於該府一烏蒙地廣田多應將無業

田地每兵賞給三十畝或有餘丁准其倍給並量與牛種銀兩勸令開墾一苗俗向無學校應於各屬四鄉適中之所設立義學以廣化導一烏蒙係四達之區而道路險隘急應平治酌計二千餘丈請動支藩庫即行興修均應如所請從之 賑江南宣城等十七州縣水災饑民 丙戌總理營田水利事務大學士朱軾等疏奏交河縣所屬堤工水勢漫溢請將在工人員交部議處得旨今年雨澤頗調而北河堤工水勢漫溢蓋自吾弟怡賢親王薨逝遂至籌畫多疎防護鮮術河工關係國計民生最爲緊要朕心深切屢念其作何善後之計著詢問九卿具奏莽鵠立自差委以來因病尚未任事何國宗另有辦理工程著免其議處朱軾不能彈壓屬員使之殫力盡心著交部察議其專管分轄統轄各員著交部嚴加議處至漫溢一帶地方禾稼室廬必遭水患著該督遴選賢員星速查勘動

用公帑加意賑恤勿使稍有失所其被水應免錢糧之處著確查奏報候旨蠲免○添設直隸易州州同一員從署直隸總督唐執王請也○丁亥以兵部尚書查弼納充經筵講官○賑湖南靖州通道等四州縣水災饑民○戊子旌表鑲黃旗烈婦李錦芳妻王氏夫亡殉節絕粒捐生給銀建坊入祠致祭如例○壬辰遣刑部侍郎收可登署正藍旗滿洲副都統阿魯等分路賑濟直隸順德廣平等府水災饑民○癸巳諭內閣聞刑部右侍郎常賚回京路過西安府該省督撫二人及副都統四人率同文武等官奏請朕安乃於齊集之處副都統陸寶陳良棟等與巡撫爭論班次大夫體統朕思同爲滿洲大臣共事一方自應倍加和協彼此敬禮以爲官弁兵民之表率況請安關係大禮而乃於大庭廣衆之前互相爭競俾遠近傳爲笑談深可愧耻此番若係巡撫倡論在先朕自將巡撫議處

今聞爭論之端起於副都統等則其過不在巡撫矣大約武臣平日以文臣缺於周旋或有應付不到之處懷怨於心是以假公濟私加文臣以無禮而不顧大臣之體此風斷不可長西安副都統四人著交與總督查郎阿務將何人倡議何人附和之處一一查明無得稍爲徇隱其倡議之人交部嚴加議處附和之人交部議處若查郎阿不能據實查明朕即將副都統四人俱調來京另派大臣審訊嗣後西安一應會集之處巡撫班次著在副都統之上永遠遵行該省巡撫副都統等若因此番爭論之故文臣或有脅制武臣之意武臣或有怨忿文臣之心別尋事端暗生嫌隙經朕訪聞必究問根由將理屈之人從重治罪大凡文武不和皆起於私心蔽錮若公則未有不和者朕之訓誡至詳且悉同爲國家之臣同辦國家之事不能遵朕訓旨共矢和衷祇因一念之私遂至懷挾猜疑各立

門戶置國家公事於不問。有是理乎。嗣後各省僅再有文武不和者。朕定將文武官一併調取來京。嚴加究治。以爲人臣因私廢公者之戒。○甲午。河東總督田文鏡疏報山東兗州曹州等各府州屬於六月二十一等日。風雨連綿。山水暴發。臨河窪下之地。田禾室廬多被淹沒。被水之民。請動用存倉穀石大口。每月給穀三斗小口。每月給穀一斗五升。各給兩月口糧。其房屋倒塌無力修理者。於藩庫存公銀兩內。每戶酌給銀兩。以爲葺屋之費。得旨。前據總河嵇曾筠奏報南河水溢情形。知山東地方有發水被淹之州縣。已諭令該撫率同有司就近加意賑恤。今覽該督所奏。朕心深爲軫念。著照所請。轉飭司道府等官仰體朕心。按戶速行散賑。務令均沾恩澤。其無力修理房屋者。著賞給銀兩。速行修葺。俾得安堵棲身。勿使一夫失所。至於賞給口糧。著於兩月之外增添一月。其應免錢糧之

處。即曉諭停徵。著該督撫將如何蠲免之處。確查定議。奏聞請旨。○除四川涪州綦江等九州縣學田租稅從四川巡撫憲德請也。○乙未。遣正紅旗漢軍副都統韓光基戶科給事中羅鳳彩賑濟直隸宣化府屬西寧蔚州懷安等處旱災饑民。丙申。改雲南永昌道爲分巡迤西道。添設分巡迤東道一員。從雲貴廣西總督鄂爾泰請也。

大清世宗敬天昌運建中表正文武英明寬仁信毅大孝至誠憲皇帝實錄卷之九十六

大清世宗敬天昌運建中表正文武英明寬仁
信毅大孝至誠憲皇帝實錄卷之九十七

監修總裁官光祿大夫經筵講官太僕議政大臣保和殿大學士兼兵部尚書總理事務王等伯加十五級臣鄂爾泰

總裁官光祿大夫經筵講官起居注太僕議政大臣保和殿大學士兼兵部尚書總理事務王等伯加十五級臣鄂爾泰

事三等伯加十三級臣張廷玉光祿大夫經筵講官起居注太僕議政大臣保和殿大學士兼兵部尚書總理事務王等伯加十五級臣鄂爾泰

翰林院掌院事加二級臣滿漢光祿大夫經筵講官太子太僕保和殿大學士兼兵部尚書總理事務王等伯加十五級臣鄂爾泰

經筵講官議政大臣滿洲內閣大學士事務禮部尚書仍兼太常寺鴻臚寺事臣三泰等奉

敕修

雍正八年庚戌八月丁酉朔遣大學士蔣廷

錫祭

先師孔子○戊戌祭

大社

大稷遣顯親王衍潢行禮○己亥諭戶部前聞

直隸地方有被水之州縣朕心軫念已星遣

侍郎牧可登副都統阿魯等分路前往蠲賑

兼施茲據署督唐執玉奏稱各屬被水情形

消長不一有上諭所及之處而水勢消落可

免成災者亦有上諭未及之處而田廬被災

急須拯恤者著行文交與牧可登阿魯等照
該督所請悉心查勘核實通融其前諭未及

之處有應行賑濟者即交附近差往之大臣

官員等速行料理務令得所以慰朕拯恤災

黎之至意○又諭據河東總督田文鏡奏報

山東被水各州縣朕已降旨諭令動支銀穀

加意賑恤茲聞萊州府屬之昌邑壽光濰縣

青州府屬之益都沂水博興高苑臨朐濟南

府屬之鄒平等縣俱被水患民舍田禾不無

傷損著該督撫委員查勘應否與從前所報

州縣一體加恩之處一面辦理一面奏聞儻

再有續報被水者亦著遵照前旨速行料理

毋使稽遲○命奉天府府尹黎致遠將軍那

蘇圖會同平郡王福彭辦理

福陵工程事務○辛丑廣東高雷廉總兵官陳

倫炯緣事降調陞浙江瑞安副將蔡添譽為

廣東高雷廉總兵官○敘勦撫河州口外逆

番功官弁兵丁等分別陞賞有差○壬寅吏

部議覆江蘇巡撫尹繼善疏奏江蘇要地駐員防範事宜。一蘇州崇明一邑屹峙重洋爲江南屏障。所有武職設總鎮四營而文職止一縣令。應添設巡道一員統轄太倉通州二屬駐劄崇邑。至崇鎮四營向俱駐劄縣城而該縣所屬沙地極爲遼遠未免巡查不及應撥左營一營分駐永興沙其半洋沙應添設巡檢一員。大安沙應以原駐縣城之巡檢移駐並撥左營千把二員分防至戲臺等沙十處應各設哨船一隻派兵巡緝。一江蘇按察使見駐江寧與下江巡撫衙門相距太遠應改駐蘇州其蘇松道有巡緝之責不宜駐劄蘇城應改駐松江上海縣統攝通洋口岸至福山營係江防門戶應於蘇鎮四營內每營撥沙船一隻歸屬該營與京口狼山等汛按期會哨均應如所請從之。○予故進勦桌子山青海等處陣亡遊擊姬登第署守備張先志王伏金祭葬如例。千總施進祿傳瑾把總

賀奉金陳昌王谷弼楊之連等各祭一次。○癸卯諭兵部廣東地方山海交錯民徭雜處賊盜易於潛踪所恃以防範者則有安設之塘汛星羅棋布絡繹聲援無事則相爲守望一遇盜賊則協力擒拏勿使遁逸其水汛與陸汛不相比附者則應各自管轄巡防若陸汛設於江邊雖無舟楫亦當與水汛爲犄角之勢此設立防汛之本意也朕聞廣東防汛兵弁甚屬廢弛今年四月間三水縣太監沙汛有行舟被盜劫物殺人並無汛兵救護及賊衆去後亦不追拏其失事之處則緊貼汛地似此怠玩成風視同秦越則設立汛兵有何裨益彼河南浙江之防汛整齊嚴肅衆人皆知豈廣東之文武大臣獨不知之乎著該提鎮嚴行稽查整飭儻再有似此推諉怠忽者即將該管弁員題參兵丁從重治罪若該提鎮有心徇隱或失於覺察經朕訪聞定行嚴加議處。○甲辰寧遠大將軍岳鍾琪奏報

欽差大臣杭奕祿等帶同特屆於八月初四日到營。臣遵照諭旨。責以大義。惕以軍威。特屆等情狀。似若誠心感悟。隨於八月初六日。遣特屆等過營。訖。所有寧遠大將軍印務。臣遵旨交提臣紀成斌護理。隨印侍郎顧魯協辦。臣即於初八日起程赴京。已咨會靖邊大將軍傅爾丹。奏入報聞。○予故原任禮部尚書李周望祭葬如例。○乙巳。

太宗文皇帝忌辰遣官祭

昭陵○戶部遵旨議奏。京畿各府有莊屯之地。方旗人事務繁多。應以三百里內外爲一路。分爲八路。設官八員。分司辦理得旨。依議。旗莊等處設立官員。乃立法之始。必得賢能之人。實心辦理。訓導有方。始有益於人心風俗。茲所差往之員。著該管大臣於所屬內揀選保舉。差往之後。仍著留心訪察。或不能稱職。或在地方生事。保舉大臣據實奏奏者。免其誤保之處分。若不行參奏。經朕訪聞發覺者。

將保舉大臣一併議處。○丙午。諭戶部向來蠲免錢糧額徵漕米。不在所蠲之內。今年山東地方被水稍重。而直隸江南河南三省亦間有被水之州縣。夫地方既已歉收。則漕米輸將未免竭蹶。著將山東被水之州縣漕糧全行蠲免。直隸江南河南被水州縣之漕糧。按其成災分數蠲免。其山東未被水州縣應完漕糧。不必運送京師。即留於東省以充兵餉。○丁未。

太祖高皇帝忌辰遣官祭

福陵○戊申。秋分夕。月於西郊。遣裕親王廣祿行禮。○遣官祭關聖帝君。○己酉。甘肅巡撫許容疏報本年六月十五日。遵旨於河州口外營建河神廟宇。即有祥雲捧日。五色成文。至七月初五日。自積石關至撒喇城。查漢達斯等處百餘里。忽見黃河澄清澈底。凡歷三晝夜。官民喜躍稱慶。以爲從來未有之上瑞得旨。朕從來不

言祥瑞年來各省奏報慶雲醴泉鳳凰芝草之屬悉皆屏却。惟務君臣士庶修德行義以承

天眷。屢頒諭旨詳矣。今年春降旨於河州口外地方恭建廟宇。以答河神福國佑民之賜。而彼地河流即昭上瑞。顯著休徵。益見天人感應之理。捷如影響。若求之不以其道。或以己事。或出私心。則不但不能感通。且上干明神之怒。惟以公心爲昭事之本。必蒙

上天垂鑒而默佑之。其益加勉。曷風夜敬謹以受

天恩。○庚戌調浙江黃巖總兵官李燦爲江南崇明總兵官。陞浙江杭州副將吳進義爲浙江黃巖總兵官。○辛亥諭內閣。吾弟怡賢親王之事。朕躬至誠至敬。翊贊勛襄。裨益於宗社國家。民生吏治者。功勳懋著。自古罕有。比倫而其忠愛之心。肫誠篤摯。出於至性。更有非言詞稱述所能宣者。朕即加恩沛澤於常

格之外。究不能展朕崇德酬庸寤寐追思之念也。吾弟之子弘曉著襲封怡親王。世相承永遠弗替。凡朕加與吾弟之恩典。後代子孫不可任意稍減。佐領屬下等項亦不可那移更改。再者。朕於雍正三年春曾降諭旨。於王諸子之中。再封一郡王。以昭恩獎。彼時王再四懇辭。情詞諄切。朕不得已勉從所請。今吾弟薨逝。朕追念遺徽。中心輾轉。在賢王應有加隆之禮。在朕衷實有難已之情。雖與吾弟素願相違。朕亦不遑顧恤。弘曉著封爲郡王。世襲罔替。○壬子諭理藩院。輪班朝覲之蒙古王貝勒貝子公等。今歲著停其來京。○癸丑諭戶部。據湖廣總督邁柱奏稱。沔陽州錢糧自康熙五十五年至雍正四年積欠銀八萬九千二百餘兩。里民一聞清查。爭先完納。今已完銀二萬二千四十餘兩。其官侵役蝕包攬之項。仰請暫緩完治。一年追完。如逾限不完。照例治罪。其餘實在民欠。竝懇與以

一年之限分作三限徵收則民力寬紓等語
朕之降旨清查積欠者原以地方貪官污吏
及不法衿棍借民欠之名恣意侵蝕蠹國累
民爲害甚鉅不得不清釐懲治以儆將來今
於沔陽州通賦之內果查出侵蝕包攬銀三
萬餘兩而里民一聞清查即爭先完納可見
民心本屬善良而從前之間有拖欠者則官
吏衿棍導之爲非又或因該州近水常有滂
溢之事力量未免不敷竝非有心頑抗輕視
國課也其見在未完之民欠三萬餘兩朕意
欲開恩酌量豁免俟督撫造具清冊到日再
降諭旨目今著停止催徵竝將此旨出示曉
諭百姓知之其侵蝕包攬之項著照邁柱所
請寬限一年令其完納如逾限不完照例治
罪○諭兵部從前朕以武弁一年所得俸薪
不敷所用令自提鎮以至千把總俱量給與
親丁名糧以資養贍今各省添設外委千把
尚未議及念此外委人員所辦者千把總之

事而所食者仍止本身一分馬糧一應公差
紙筆衣馬之費實有不敷著將各省添設外
委千把總每員給與步糧一分即令伊之子
弟家人頂食以資養廉僅有巧借辦公名色
扣剋兵餉滋擾地方者著該管官即行揭報
該轄大員指叅毋得姑徇寬縱○陞通政使
司右叅議俞兆岳爲太僕寺卿順天府府丞
王潯爲光祿寺卿仍兼理順天府府丞事○
甲寅諸王滿漢文武大臣等以河州地方黃
河澄清合詞奏賀并請宣付史館垂示永久
得旨朕從來不言祥瑞諒王大臣等久已深
知朕心朕之祇事
上帝神明惟以公誠一念爲昭格之本果蒙
上天垂鑒頻年顯示嘉祥觀公誠之感通神捷
如此則懷不公不誠之心者豈能逃於
上天之譴責乎朕心不但不敢矜誇且因此倍
加乾惕更願天下臣工士庶各矢公誠之念
以受

上天之恩。著照王大臣等所請宣付史館。俾世世子孫臣民。恪遵朕訓。以綿福澤。○諭戶部。據馬爾泰等奏稱。邳州宿遷等十八州縣被水人民。已會同地方官查勘賑濟。擬給兩月口糧。其房屋倒塌者。給價安頓等語。凡此窮民。朕心深爲軫念。著將所定口糧之數。增給一半。竝於兩月之外。加賑一月。務令小民得所。○添設四川副都統衙門筆帖式一員。從四川巡撫憲德請也。○江南江寧右翼副都統德爾本。以老病乞休。允之。○旌表山東德平縣烈婦孟魁妻張氏。守正拒姦。自縊殞命。給銀建坊。入祠致祭如例。○乙卯巳刻。京師地震。○命查八旗兵丁。因地震致垣舍坍塌者。每旗各賞銀三萬兩。按各佐領人數均分。給圓明園八旗兵丁。每旗各賞銀一千兩。以爲修葺屋宇之用。○丙辰諭內閣。昨日地震。兵民房室牆垣。必有頽塌者。八旗兵丁。已降諭旨。每旗賞銀三萬兩。令該旗大臣。按名

分給。其內外城居民。每城著派出滿漢御史各一員。分查民間房舍。或屋宇倒塌。或牆垣頽缺。作速據實清查。分別具奏。朕將加恩賞給該御史等。務悉心秉公辦理。儻有吏役隱匿虛冒。扣剋等弊。經朕訪聞。將吏役從重治罪。該御史嚴加議處。○諭靖邊大將軍傅爾丹等。京師於八月十九日巳時。地震當時即止。不爲大患。近京東南正北各路。地覺微動。較京更輕。惟西北稍重。不過百里而止。京城內外及圓明園地方。俱好。朕躬甚安。但此番地動。較往年畧重。其年久之房屋牆垣。有坍塌者。損傷之人。亦不過千萬中之一二。至於出兵之大小官員兵丁等。凡有家口之在京城內外者。朕令細加訪查。悉皆平安。無恙。軍營離京甚遠。恐道路傳聞不確。致生疑慮。特頒諭旨。著大將軍等通行曉諭。官員兵丁等。咸使聞知。○禮部議覆。署直隸總督唐執玉等疏言。和碩怡賢親王。以天潢懿戚。作

帝室股肱綜理百爲綱維庶政上宣

主德下殫民謀直屬紳士商民等既蒙其惠愛
宜薦以馨香公請代題懇建專祠應如所請
於直隸省會清苑縣建祠一所任縣之穆家
口建祠一所天津建祠二所俾沐膏咏勤之
衆獲展春祈秋報之情從之○戊午命鴻臚
寺少卿顧祖鎮內務府郎中鄂善戶部郎中
阿蘭泰帶內庫銀二萬兩前往京師附近地
方察看地震情形加恩賑給○己未諭宗人
府康親王宗安心術狡詐行止輕浮豈堪爲
宗室之坊表不准管理宗人府事其宗令事
務著裕親王廣祿管理○移河南信陽州州
判駐平昌關改信陽汛爲信陽營添設守備
一員兵五十五名屬汝寧叅將管轄從河東
總督田文鏡請也○授故奉恩將軍席勒圖
子英俊爲奉恩將軍○庚申諭宗人府吾弟
怡賢親王第三子弘暉於前年病故彼時降
旨一切禮儀俱照貝勒之例行嗣又降旨於

怡賢親王諸孫之中以一人爲弘暉之嗣令
福金富察氏撫養今著將寧郡王弘晈之長
子永喜爲弘暉嗣襲封貝勒○壬戌諭諸王
大臣等數年以來遵化州

陵寢附近之地方雨暘時若年穀順成今年春
月畿輔微覺亢旱而遵化等處則雨澤調勻
民人樂業六月日食之期

陵寢之地方則陰雨不見本月十九日京師地
震朕繫念

山陵憂勞寤寐星遣侍衛等馳往看視今據差
回人員及守護

陵寢之大臣等奏稱十九日地覺微動較他處
更輕村舍牆垣悉皆無恙居民竟有未經知
覺者朕以手加額五內歡欣益見我

皇考之聖德神功際天蟠地受眷佑於
上帝貽福慶於蒼生若此之彰明較著朕感
上帝之慈恩念

皇考之功德特將近事之顯而可見者曉諭諸

大臣九卿等共知之○甲子命果親王允禮大學士蔣廷錫內務府總管海望總理三庫事務○丙寅諭內閣京師本月十九日地震朕恐懼修省感激

上天垂象示儆之恩倍加乾惕今年各直省收成頗好而其中又各有被水澇溢之處該省督撫大臣往往引過自責朕即批示竝宣諭左右大臣曰此非臣工之咎其過實在朕躬蓋今年春夏以來朕體中違和仰惟

宗社攸關

列祖

皇考付託之重不敢不保護此身是以屏除思慮葆靜頤養而勤政敬事之心實不及平時又因吾弟怡賢親王薨逝朕心悲悼有傷天和遂至水澇情形見於數省朕深知其由不肯諉過臣工而爲大臣者俱當撫躬自問默加省察以凜

天戒不在引過之虛文此朕從前曉諭臣工者

目今又有地震之異仰蒙

上天垂慈顯示儆戒惟有夙夜祗懼切加省改以戴

天恩除兵民人等屋宇傾圮者一一查賞外再將朕意曉諭內外知之○禮部左侍郎蔡世遠緣事降調轉禮部右侍郎吳士玉爲左侍郎陞都察院左副都御史王圖炳爲禮部右侍郎○陞雲南巡撫沈廷正爲河東河道總督貴州布政使張允隨爲雲南巡撫

大清世宗敬天昌運建中表正文武英明寬仁信毅大孝至誠憲皇帝實錄卷之九十七

大清世宗敬天昌運建中表正文武英明寬仁
信毅大孝至誠憲皇帝實錄卷之九十八

監修總裁官光祿大夫經筵講官保和殿大學士兼兵部尚書總理事務部事務大臣加十五級日鄂爾泰

總裁官光祿大夫經筵講官保和殿大學士兼兵部尚書總理事務部事務大臣加十五級日鄂爾泰

第三編自加十二級日福祿壽王元祿大夫經筵講官保和殿大學士兼兵部尚書總理事務部事務大臣加十五級日鄂爾泰

翰林院侍讀學士加十二級日福祿壽王元祿大夫經筵講官保和殿大學士兼兵部尚書總理事務部事務大臣加十五級日鄂爾泰

經筵講官保和殿大學士經筵講官保和殿大學士兼兵部尚書總理事務部事務大臣加十五級日鄂爾泰

敕修

雍正八年庚戌九月丁卯朔諭內閣昨因京

師地震凡兵民等屋宇傾圮者已降旨詳查
賞給銀兩以為修理之費而滿漢大小官員
等亦俱有修垣葺屋之事朕心軫念著將各
部院衙門官員八旗都統副都統統領叅領
佐領驍騎校護軍校等以及上衙門之世襲
官上三旗侍衛內務府官員步軍統領衙門
等官巡捕三營官弁每人俱賞給半年之俸
○諭八旗都統八旗兵丁等房屋傾圮者昨
已每旗賞銀三萬兩為修理之用聞該管之

都統官員等不論坍塌牆垣之多寡及有無
傷損人口之處一概均勻給散竝無差等其
名則均而實則不均之甚總因伊等潦草塞
責不肯以實心經理公事俾朕之恩澤不濫
不偏登衆兵於衽席也除從前所賞銀兩各
旗已經均給外朕再賞每旗帑銀三萬兩著
該旗大臣等悉心確查分別等次秉公賞給
務令寒苦之家實霑恩惠儻仍任意給發不
能公當者經朕訪聞必於該旗之大臣官員
是問至於八旗官弁已給半年之俸不在查
賞之內○戶部議覆福建巡撫劉世明疏言
臺灣縣水衝沙壓田園自康熙六十一年至
雍正四年無徵粟石應著落從前不行詳報
之知縣周鍾瑄等賠補但自五年以後應徵
原額已奉旨永行豁免則此項分賠粟石亦
應一體予豁以免離任窮員苦累應如所請
從之○戊辰諭內閣自古為治之道在於和
衷孟子曰天時不如地利地利不如人和蓋

天下之事。未有不和而能有成者。果能和矣。則天地神明。尚覺呼吸可通。而況於人乎。然能和之道。惟在於公。公則必不至於不和。不公則斷不能和。此又一定不易之理。朕所日訓誨天下臣民。而望其洗心滌慮。信受奉行。以共享昇平之福也。文武雖屬兩途。然同在一省一方之中。同辦國家之事。則不但有同舟之誼。實如手足臂指之同在一身也。人身一體不適。則百骸皆爲之不寧。此亦顯而易見者。奈何爲私欲蔽錮。而任肢體之互相戕賊。以貽腹心之患乎。數年以來。朕留心體察。內外同事臣工。頗能遵朕諭旨。勉矢和衷之義。即文武各官。同在一方。而各殫其職。無爭競嫉忌之念者。亦多有之。此皆人心風俗之善。亦該省文武大臣實心表率化導之功也。惟有廣東一省。惡習相沿。頽風難挽。文武既分爲兩黨。而文與文。武與武。又各分爲一黨。如楊文乾石禮哈常賚阿克敦官達之

互相排陷。仇怨相尋。則皆方願瑛一人從中播弄之所致。至於文武彼此告訐之言。不可殫述。文官則言武職諸員。或向知府包攬漏稅。或向州縣囑托人情。稍不如意。即出謗言。以勤謹辦事者爲過於躁急。以不徇私情者爲擅作威福。又如兵米一項。地方有司給與本色。而營弁以不能折價爲憾。往往蓄怨於心。此文員陳訴之大概也。武官則言文職諸員貪鄙。居心黨援。不解恃有承審之柄。藐視武途。大小有司。夤緣交結。武弁若拂其意。即啟釁端。以爲報復之計。常有武職查拏違禁之事。如賭博私宰等類。而文員則置若罔聞。或徇情釋放。又如礦山聚衆至數千人。係府縣官員之家人勾引姦徒開採。希圖重利。武弁遣兵驅逐。以致結怨益深。此武弁陳訴之大概也。年來似此等語。達於朕聽者不止數處。亦不止數人。雖出於怨懟之口。不足盡信。然亦未必皆全無影響之談。爾文武各員自

思之膺國家簡命之榮受管轄兵民之寄乃以營私網利之故相傾相軋效市井無賴小人之所爲而置人心風俗官方戎政於不問爾等不自知愧朕實爲爾等愧之也況督撫藩臬而有袒護文官之心則武弁必有被其屈者矣提督總兵而有袒護武弁之心則文員必有受其枉者矣文員而有袒護百姓之心則必有無辜受累之兵丁矣武弁而有袒護兵丁之心則必有無辜受累之百姓矣不和之故由於不公不公之害至使官弁兵民竝受其困爲臣工者尚可狃於故習而不猛省速改乎巡撫統率全省文員提督統率通省武弁至於總督則兼文武而統轄之者果能秉公持正無黨無偏以己身爲庶官之坊表而又時時宣揚朕諭俾其儆戒提撕若遇屬員有爭競告訐之事則以理判其曲直不存文武偏向之見過小者切加戒飭過大者即入彈章俾強弱不得相陵是非無或倒置

如此而屬員有不革面革心嚮風率教者無是理也朕今再頒諭旨通行曉諭著該督撫等遵照刊刻通省文武大小官弁各給一道俾令朝夕觀覽改前愆而敦善行儻再有蹈襲故轍罔知悛悔者則是冥頑不靈自違越於德教之外矣國法具在本人自無所逃而文武大臣表率無方訓導不力有忝封疆之任負朕倚任之恩亦定行嚴加處分不稍寬貸觀風整俗使亦當留心稽察可也 庚午

禮部遵旨議奏褒功列爵古有成規而肇錫嘉名尤屬旌庸盛典我朝佐命元勳承平良弼錫之公爵既已分爲一二三等以示寵榮皇上篤念舊勛更隆追獎誠宜考其生平之實蹟加以庸顯之令名謹按佐命之臣開疆拓土者宜倣漢之信武奉義建策唐之翼國開國宋之福國元之忠武壽國明之雄武靖寧等名其宣勞盡力於承平之日者宜倣漢之冠軍壯武富民褒德唐之安國宋之崇國成

國元之寧國定國明之崇信忠勤等名或就其所樹之勲予以安東征西定朔平南等名或就其立功之地予以秦晉齊豫吳越楚蜀粵閩滇黔等名上加征靖蕩平綏定安輯等字將原封一二三等之號仍冠美名之上至宗室等公則加封奉恩字樣外戚等公加封承恩字樣庶禮以義起名與實符宣之制敕昭舊烈而彌光襲之子孫趾前徽而踵美矣臣部將一二三等公并宗室外戚公誥命事實造具清冊移送內閣撰擬美名恭候欽定從之○辛未敕封浙江德清縣青溪廟神爲保濟顯佑侯○封故淳親王允祐子弘曥爲多羅淳郡王○壬申遣官祭歷代帝王○遣官祭城隍之神○理藩院叅奏喀爾喀扎薩克多羅郡王汪扎爾所辦軍前應用駝隻誤限不到怠玩軍務有負國恩應革去王爵將應襲之人奏請承襲從之○癸酉以署正藍旗滿洲副都統阿魯爲鑲紅

旗蒙古副都統仍兼理正藍旗滿洲副都統事○丙子實授黃文煒爲廣東按察使司按察使○賑江南建平縣水災饑民○丁丑諭大學士等從前直省應行起運錢糧該省撫藩以解部爲艱每至撥餉之時百計營求借備公協餉之名存留本省而戶曹堂司亦就中漁利將雜項稅課盡留該省司庫即正項解部者亦屬寥寥以致外省撫藩得藉存庫名色通同那用而州縣效尤亦不肯隨徵隨解官侵吏蝕虧空累累自怡賢親王總理戶部以來與二三大臣同心釐整直省一切正雜錢糧除實在存留併各封貯數十萬兩以備公用外其餘悉於春秋二季按數撥解從此各省不敢有虛收虛報之弊是以虧項漸清帑藏充裕今怡賢親王薨逝戶部大臣仍遵守遺規未嘗稍易但恐不肖司官及姦猾胥吏乘間覬覦希圖撞騙而無知外吏或冀倖可以復行舊習稍留掩藏虧空餘地仍令

書吏家人到京鑽營亦未可定。儻有此等或經戶部大臣察出參奏或朕親有訪聞定將撫藩革職究擬。司官書吏即行正法決不姑貸。○加河南河北道朱藻都察院僉都御史銜協辦總河事務。○旌表直隸栢鄉縣烈婦胡六妻張氏拒姦不污投繯殞命給銀建坊入祠致祭如例。○戊寅移陝西臨潼縣縣丞駐關山鎮從西安巡撫武格請也。○己卯工部議覆湖廣總督邁柱疏言湖南永順等處新設一府四縣原議府治在榔溪地方今查局勢狹隘未便建設請將永順府移駐猛洞以永順一協兵弁隨城駐扎其桑植同知應改為永順通判仍駐桑植司治永順同知移駐旦武營龍山縣移駐麂皮壩並移田家峒巡檢駐榔溪施溶州巡檢駐王村張家壩巡檢駐里耶均應如所請從之。○予故陝西西安將軍常色禮祭葬如例。○庚辰移貴州遵義府糧捕通判駐仁懷縣舊城其仁懷縣署

改駐生界地方撥把總一員兵五十名駐防從雲貴廣西總督鄂爾泰請也。○甲申諭內閣朕臨御萬方宵旰勤求惟以愛養斯民爲念數年以來除租減稅疊沛恩膏不但旱澇歉收之處蠲賑兼施即該省年穀順成不須寬賦而朕欲使民力饒裕每加格外之恩蓋國家經費既敷則藏富於民俾各家給而人足乃朕之至願也查各省錢糧朕特降諭旨蠲免者已多今次第舉行應及於江西湖北湖南三省著將辛亥年三省額徵錢糧各蠲免四十萬兩又念直隸乃畿輔首善之地應沛殊恩山東今歲被水之州縣稍多朕心甚爲軫念除二省澇溢地方已加意賑恤並將本年額賦照例蠲免外著將辛亥年二省錢糧各蠲免四十萬兩以上五省各該督撫應仰體朕心嚴飭有司敬謹奉行務令閭閻均霑實惠。○乙酉諭內閣朕覽高其倬等所奏太平峪吉地事宜甚屬妥協大凡讀書居官

之人通曉堪輿者甚少。即或知之。又往往以此爲諱。不肯身任其事。高其倬。乃封疆大臣爲國家樹績建勲。爲己身揚名垂譽。原不必以此爲宣力見長之地。乃其心以爲國家之事。莫大於此。以一身協贊。怡賢親玉。肩此重任。籌度萬全。無一毫瞻顧推諉之意。此實出於一片忠愛至誠之悃。不僅材識超羣已也。高其倬著賞給一等阿達哈哈番。管志寧明圖任擇善海望。保德等。地理明通。贊襄勤慎。一併議叙。○戶部遵旨覆奏太平峪所用民地已經加倍償給。其旗人地畝應請行旗查案得旨。旗人地畝若賞給銀兩。則旗人固得實惠。而佃種之人未免無地可耕。著再查入官地畝賞給。使原佃之人仍得耕種。○丁亥諭兵部。周瑛著發往北路大將軍傅爾丹軍營効力贖罪。○革北路軍營直隸正定總兵官魏麟職。以不能約束兵丁故也。○己丑以山東河南河道總督沈廷正爲都察院左副

都御史。○庚寅諭內閣。今年八月十九日地震。朕恐懼修省。以凜天戒。並將夏秋以來。朕躬靜攝。不能勤敬如前。以致上干

天和。引過自責。曉諭天下。今經一月矣。地氣尚未全寧。又值兩次陰雨。朕軫念露處之民。惻瘼乃身。未嘗不願與之共此苦也。惟是天地之災祥。皆由於人心之感召。朱子曰。吾之心正。而天地之心亦正。吾之氣順。而萬物之氣亦順。然則天地之心。安有不正者。其或有不正。乃從人心之所感。天地豈有降災於人之理也。尚書曰。作善降之百祥。作不善降之百殃。善惡之報。如影隨形。是人人有感格天地。錫福降殃之理。遇災而懼。上下貴賤當同此心。乃顯而易見之理也。當地動之日。朕偶先登舟。是以並未受驚。即既動之後。城內宮中及圓明園宮眷子孫長幼。內外侍從數百人。悉皆安吉。豈非

上天示儆之中。仍賜護佑耶。今者地動之象。久而未定。雖當日曾經

皇考訓諭曰。大動之後。必有微動。康熙十八年地動。至一月有餘。又曾見書籍記載。明成化時地動。至二十三日。是地動經月之久。亦向來之所有者。然虔修人事。以轉移

天心。必須君臣上下。各殫其誠悃。朕身居帳幕之中。寤寐悚惕。寢食靡寧者。已一月有餘矣。願爾大臣官員士庶兵丁等。人人誠心感激。

上天示儆之深恩。返來自問。思過省愆。不但惡事邪念。急宜掃除。即怨尤抑鬱之心。亦當屏絕。則

天高聽卑。必垂照察。不但地土寧靜。共獲安居。且可永免

上帝之譴責。斷無再罹險阨之虞也。朕非以地動之異。諉過於臣工黎庶也。朕之生平。先責己而後責人。先自勉而後共勉。願天下臣民共知朕心。○諭吏部。向來各處鹽政弊端甚

多。累民蝕課。難以清釐。多由鹽場大使不得其人之所致。是以定議於候補候選知縣等

員內。揀選命往令司大使之事。彼時該部因人員不敷。遂將監生捐納職銜之人。亦入於揀選之內。今行之二年。衆人漸啟鑽營之念。聞有央求同鄉京官出結。而私相餽送者。此風斷不可長。嗣後鹽場大使之缺。止准於候補候選人員內。揀選引見。不必用捐納職銜之人。儻或人員不敷。著將在部學習之人。及留京之拔貢生。令各部堂官及國子監祭酒等。擇其爲人謹慎。有身家可以辦事者。保送吏部。以備揀選。○安徽巡撫程元章疏報安慶泗州等四府州。開墾雍正七年分田地二百七十七頃有奇。下部知之。○辛卯。諭內閣。從前因吾弟怡賢親王氣體清弱。時常抱恙。朕諭令訪問精於醫理之人。及通曉性宗道教者。以爲調攝頤養之助。上年吾弟奏稱京師白雲觀近有一人。通曉心性之學。朕令召

來一見王以未曾深知不敢令其入見朕云
其人之學術精粗深淺朕面詢即知第召來
一見無妨也逾數日遵旨進見朕所詢問伊
不能對及諭以心性之學伊則偽作欽服之
狀極口稱頌朕察其虛詐中無所有畧加賞
賜而遣之後朕降旨與外省一二督撫令其
便中訪問通醫學道之人隨經李衛奏稱聞
中州有賈士芳者平素通知數學臣未曾識
面不能確知其人朕隨降旨與田文鏡將伊
送來初到時朕令內侍試以卜筮之事伊言
語支離啟人疑惑因自言上年曾蒙召見朕
始知即白雲觀居住之人也伊乃自言長於
療病之法朕因令其調治朕躬伊口誦經咒
並用以手按摩之術見伊心志姦回語言妄
誕竟有天地聽我主持鬼神聽我驅使等語
朕降旨切責伊初聞之亦覺惶懼繼而故智
復萌狂肆百出公然以妖妄之技欲施於朕
前伊欺世惑衆素行不端曾經巡撫楊宗義

訪問查拏伊始稍稍斂跡厥後仍復招搖今
則敢肆其無君無父之心國法具在難以姑
容且蠱毒魔魅律有明條著拏交三法司會
同大學士定擬具奏○雲貴廣西總督鄂爾
泰題奏建水州邊外猛弄寨長白氏納款歸
誠願附版圖下部知之○壬辰諭內閣直隸
水利營田吾弟怡賢親王殫數年之心力區
畫經營爲小民興萬世之利甫定規模而賢
王薨逝遂至防護多疎堤岸漫溢朕心憂慮
深恐將來日漸廢弛前功隳棄特命九卿等
籌畫善後之策今覽九卿所議多屬浮辭至
云凡怡賢親王所欲行而未竟者皆分別緩
急次第興工此語更屬支離夫已行而未竟
者則王之事也若云欲行而未竟者此乃游
移影響之談巧卸其責於王矣王既未曾見
諸施行則以後辦理之事皆諸臣之事若辦
理妥協王不居功若辦理不妥而以欲行二
字歸過於王朕豈忍聞此語乎當怡賢親王

經理之時。朱軾多病就衰。艱於跋涉。此衆人所共知者。至於莽鵠立性情偏僻。何國宗器量卑庸。祇因今歲工程緊要。姑且用之。非謂可以長膺此任也。且朱軾等居住京師。安能遙辦河工之事。自應特設管理大臣。以專職任。將其中事務。可以分派地方官者。則分派辦理。以收羣策之效。九卿所議。俱未及此。著另行詳議具奏。○雲貴廣西總督鄂爾泰奏。報永昌府邊外孟連土司每年願納廠課。鶴慶府邊外摠子每年願貢土產。得旨。孟連地方及摠子野夷地處極邊。自古未通中國。總督鄂爾泰化導有方。俾各輸誠效順。任土作貢。虔心向化。甚屬可嘉。其孟連土司廠課。每年六百兩。爲數太多。著減半收納。以昭柔懷。至意。摠子每年貢納土產時。著給鹽三百觔。以爲犒賞。○癸巳。

孝慈高皇后忌辰。遣官祭。

福陵。○乙未。諭八旗蒙古都統察哈爾地方原

係蒙古遊牧處所。若招民開種。則遊牧地方必至狹隘。且民人蒙古雜居一處。亦屬無益。著行文察哈爾總管等。查有此等擅行招民開種之處。作速據實呈報。將前罪悉行寬免。儻仍復隱匿。一經發覺。加倍治罪。○奉差通政使留保。會同山東巡撫岳濬。題報闕里文廟工程。遵旨敬謹修理。於九月十六日告竣。下部知之。○復設廣東潮陽縣縣丞一員。從廣東總督郝玉麟請也。

大清世宗敬天昌運建中表正文武英明寬仁信毅大孝至誠憲皇帝實錄卷之九十八

大清世宗敬天昌運建中表正文武英明寬仁
信毅大孝至誠憲皇帝實錄卷之九十九

監修鴻臚寺卿光祿大夫經筵講官太僕寺卿和碩大學士兼兵部尚書總理兵部事務三十四級臣舒爾圖奉

總裁官光祿大夫經筵講官起居注太僕寺卿和碩大學士兼兵部尚書翰林院掌院

第三十四級臣張廷玉光祿大夫經筵講官起居注太僕寺卿和碩大學士兼兵部尚書翰林院掌院

翰林院掌院學士加二級臣楊光祿大夫經筵講官太子太僕寺卿大學士兼禮部尚書加六級臣徐本光祿大夫

經筵講官議政大臣協辦內閣大學士事務禮部尚書仍兼官太常寺鴻臚寺事務臣三泰等奉

敕修

雍正八年庚戌冬十月丙申朔享

太廟遣莊親王允祿行禮○遣官祭

永陵

福陵

昭陵

昭西陵

孝陵

孝東陵

景陵○頒雍正九年時憲曆○丁酉王大臣等

議奏左道賈士芳性生悖逆術習妖邪假托

知醫之名顯露不軌之迹請照大逆律凌遲
處死其親屬男十六以上皆斬十五以下並
母女妻妾等給付功臣之家為奴得旨賈士
芳著改為立斬其應斬人犯著監候其應為
奴之妻女等暫著地方官嚴行看守○喀爾
喀澤卜尊丹巴胡土克圖遣使進九白年貢
宴賚如例○己亥以戶部右侍郎俞兆晟為
武會試正考官刑部右侍郎王國棟為副考
官○刑部等衙門議奏原任庶吉士徐駿狂
誕居心背戾成性於詩文稿內造為譏訕悖
亂之言應照大不敬律擬斬立決將文稿盡
行燒燬從之○寧遠大將軍岳鍾琪奏報巴
爾庫爾圖呼魯克等處屯田收穫青稞共一
萬一千六百石有奇下部知之○庚子諭禮
部大小官員帽頂從前定議未曾分別詳確
著該部再行妥議定制具奏尋議自親王至
公侯伯及一品大臣以上俱照見今所用帽
頂無庸更議外其二品以下朝帽頂與平時

帽頂俱按品分晰酌議。輔國將軍及二品官俱用起花珊瑚朝帽。嵌小紅寶石。奉國將軍及三品官俱用藍寶石。或藍色明玻璃朝帽。嵌小紅寶石。奉恩將軍及四品官俱用青金石。或藍色涅玻璃朝帽。嵌小藍寶石。五品官用水晶。或白色明玻璃朝帽。嵌小藍寶石。六品官用碑礪。或白色涅玻璃朝帽。嵌小藍寶石。七品官用素金頂朝帽。嵌水晶石。八品官用起花金頂。九品官及未入流俱用起花銀頂。進士舉人貢生仍用金頂。生員監生仍用銀頂。得旨依議。總督未加尚書銜者著爲正二品侍郎。及外省巡撫俱著爲從二品。○寧遠大將軍岳鍾琪靖邊大將軍傅爾丹俱遵旨來京陛見。○辛丑諭內閣。據寧遠大將軍岳鍾琪奏稱。吐魯番回目額敏和卓屯種地恭順効力甚屬可嘉。朕聞之深爲喜悅。額敏和卓賞緞二十疋。其種地効力之回民賞銀二千兩。著提督紀成斌差遣弁員前往吐

魯番會同額敏和卓秉公賞給。以示朕加恩外番之至意。○大學士等遵旨議覆烏蒙叛夷構逆。總督鄂爾泰已調撥川黔官兵刻期進剿。恐賊夷遠遁。渡江入川。請於沿江緊要之處分防堵禦。但川省各路汛地營兵。或有不敷。應行令提督黃廷桂召募充補。得旨。川省派撥漢土兵丁著每名賞銀五兩。此所派官弁兵丁俱聽鄂爾泰節制調遣。滇黔二省已派兵九千名。各處汛守或有應行添補之處著鄂爾泰斟酌便宜召募。○壬寅實授許良彬爲福建水師提督。調福建金門總兵官張起雲爲福建南澳總兵官。實授康陵爲福建金門總兵官。調福建福寧總兵官楊琮爲陝西涼州總兵官。廣東右翼總兵官李萬倉爲左翼總兵官。廣東左翼總兵官李惟揚爲右翼總兵官。○大學士等遵旨議覆署福建總督阿爾賽疏言。臺灣道府廳縣等官舊例到任一年之後督撫揀選內地之員赴臺協

辦俟半年後將舊員調回補用。統計前後不過年半而獨當其任者不過半年爲期太近該員未必不以任事不久草率塞責。諸務諉延請嗣後調臺各員俟到任二年該督撫選員赴臺協辦仍照例於半年後調回舊員則在臺各員既得盡心辦事又可免交盤頻疊及草率諉延之弊。應如所請從之。○又議覆署兩江總督史貽直疏言江南營伍廢弛亟宜修整請照浙閩二省之例於下江五十九營額兵三萬八千七百九十四名內除各官隨糧並餘尾例不應扣及缺數不及扣者不扣外其餘每守餉百名留出公糧三分自雍正辛亥年爲始陸續扣出各存本營將甲械旗幟次第整頓修理俟通完之日仍照浙閩二省例將所扣之糧募足補數以實營伍應如所請從之。○癸卯諭大學士等尚書查弼納著馳驛來京西路軍需著署督查即阿前往肅州辦理仍兼理川陝總督印務秦布著

回西安將軍之任護軍統領宗室哈爾吉著前往涼州代秦布統領兵丁仍著鄂善協理。○添設江南揚州府水利同知一員駐劄泰州東臺場從奉差辦理江南水利郎中鄂禮請也。○甲辰諭內閣各省人命抵罪之案其應輕應重朕確有所見者即降旨定奪若其情罪在疑似之間而擬罪在可輕可重之際朕心不能即定者方交與九卿定議以期平允乃往往見九卿定議之案概以減等發落覆奏如此則朕何不即令減等而必多此曲折乎凡此交與九卿定議之案其中有應行減等者或有可以枷責完結者亦有不可寬貸仍應按律抵罪者向後務期權衡允當寬嚴適中以副朕明罰敕法之至意。○又諭我朝定鼎之時漢軍從龍入關技勇皆爲可用今海內承平日久伊等耽於安逸且意在文職而不在武弁是以韜畧騎射遠不如前日今官至提鎮副叅者寥寥無幾而在內簡用

都統副都統時亦覺難得其人朕爲此時屢於懷常思漢軍生齒日繁當籌所以教養之道而額設之兵丁爲數又少似應酌量增添於國家之營伍旗人之生計均有裨益如外省之駐防漢軍子弟日漸繁衍而本身錢糧各有定數難以贍養應令餘丁回京披甲亦可望其成人又如外官隨任之子弟往往遊蕩荒廢前曾有旨悉令回京披甲當差習學弓馬以圖上進又如候缺之微員一時難以銓選者若情願披甲當差到應選時仍許輪班補用則在彼既可得受錢糧以爲餬口之資又可預先習學弓馬以備居官之用又如內務府人丁甚衆於充役當差之外其閒散人丁亦可撥入八旗披甲再五旗諸王之漢軍佐領仍屬本王外其貝勒貝子公等之漢軍佐領實無所用應撤歸旗下中公中佐領當差且可免掣肘之弊其如何增添漢軍兵額及如何妥協補充永遠可行之處著尹泰查

弼納石文煥石禮哈莽鵠立德祿等議奏尋議漢軍八旗總計領催鎗手礮手教爾布教養兵并銅匠鐵匠弓匠聽差護城看門及看守礮位火藥局教場等兵以至步兵門軍共一萬七千五百二十八名今請於原額之外酌量增添兵二千四百七十二名以足二萬之數但查上三旗一百二十七個佐領又半個佐領下五旗一百三十八個佐領應將上三旗佐領每旗均爲四十分下五旗佐領每旗添足三十分其上三旗所餘之七個佐領酌量撥入下五旗從前半個佐領下所轄人少俱以中公中壯丁補足之計添設佐領三個共二百七十分皆各勻整所有新添佐領下應增領催十五名步兵領催三名步兵四十八名每佐領下各補足鎗手四十名教爾布八名共應添補鎗手五百四十六名教爾布一千三百六十名上三旗每旗補足教養兵一百八十八名下五旗每旗補足教養兵一

百四十九名。共應增添教養兵五百名。如此則八旗漢軍佐領由此均齊。而兵丁足用。至挑補新添兵丁。見據八旗冊開在京閒散壯丁約萬餘人。此外各省駐防漢軍之餘丁。情願歸旗者。行令各該將軍咨送歸旗挑選充補。再外官隨任子弟。年至十八歲以上者。悉令歸旗。除情願讀滿漢書者。移送官學國子監肄業。並學習弓馬外。其情願披甲食錢糧者。仍准挑補甲缺。再候選微員。情願披甲者。亦准其披甲。如遇選期。輪班補用。至內務府見今查出過繼養子等項人丁。約二千餘名。亦應撥入各旗漢軍壯丁。不齊之佐領下一體挑選。披甲當差。至於下五旗漢軍佐領。除親王郡王屬下外。其貝勒貝子公等既有包衣佐領。則所屬漢軍人等。應歸入各旗公中佐領。庶漢軍不苦生計之無資。而國家亦收營伍之實效矣。從之。○以正紅旗護軍叅領岱林布署正紅旗蒙古副都統。○八旗都統

等遵旨議覆八旗官員俸祿嗣後每年二月俸祿檔案值開印之初。即便咨部。八月俸祿檔案於七月初五以前咨部。紅檔既過之後。不准增減。再襲職官員引見之後。其俸祿檔案俟該部覆奏行文到日。視其所裁之職行俸。如得俸之後。始經該部覆奏者。將行文到日以後之俸照所裁之職行。永著為例。從之。○免江南壽州合肥二州縣廬州一衛雍正七年分旱災額賦有差。○乙巳以鑲紅旗叅領索林署正紅旗滿洲副都統。正白旗前鋒叅領喜來署本旗蒙古副都統。○添設廣東吳川縣碭洲巡檢一員。從廣東總督郝玉麟請也。○寧遠大將軍岳鍾琪奏報哈密塔爾那沁等處屯田收穫青稞麥子共四千六百石。下部知之。○丁未命愉郡王允禩輔國公法爾善同散秩大臣伍格總理三陵事務。實授謝旻為江西巡撫。以散秩大臣范時捷署直隸古北口提督。大學士

等遵旨議覆辦理

文廟工程通政使司通政使留保疏言闕里

聖廟蒙

皇上發帑興工漸次告竣伏查康熙三十二年

聖祖仁皇帝修理

文廟工完之日一應諭旨典制俱經纂入幸

魯盛典今次修理想請照例恭錄

皇上前後頒發諭旨御書扁額並增設殿廡門

階之制度俎豆尊壘之儀式暨一切工程錢

糧自經始以至工竣悉令衍聖公孔傳鐸敬

輯成書光昭盛典應如所請從之○福建海

澄公黃應纘老病休致以其子黃仕簡襲替

○己酉諭內閣辦理軍需必得熟練之員方

爲有益陝甘二省州縣官員備辦軍需有經

手數年者有經手一二年者似此熟練人員

若因細過微瑕即行叅革則接任之員初辦

軍務未免生疎或至遲誤嗣後陝甘地方辦

理軍需之州縣官員若無大過其所犯情有

可原者著該督撫揆情度理量加寬宥若錢

糧微有不清而事屬因公者統俟大軍凱旋

之後查核明白以定功過○雲貴廣西總督

鄂爾泰疏言烏蒙蠻獠自改流設鎮臣不時

諄囑提防乃總兵劉起元乘臣往來黔粵私

派公費侵欺糧餉客民被劫混將頭人拷比

臣訪聞得實隨密差中軍副將魏翦國前往

按款確訊一面摘印以憑叅奏不意於八月

二十六日至二十九日夷衆叛逆圍城劫殺

總兵官劉起元等雖劉起元撫綏失宜激變

有由臣膺封疆重寄愧覺察之已遲恨叅革

之不早請賜罷斥速簡賢員料理總督事務

並暫假臣以事權督師進剿雖馬革裹尸亦

所至願得旨烏蒙逆苗悖叛已令遣發官兵

分路進剿總兵劉起元既苛刻於平時又不

能防禦於臨事粗疎暴戾自速其辜惟是遊

擊汪仁知縣賽枝大等倉卒遇害累及妻孥

深可憫惻著總督鄂爾泰查明具奏加恩賞

卹至於烏蒙蠻衆其性反覆靡常朕常慮其不能帖然寧謐今年春夏以來朕躬違和精神不能貫注及此鄂爾泰於夏秋之間亦抱恙而烏蒙遠隔千餘里豈計慮之所能周不但朕所深知亦中外所共諒也況鎮臣劉起元撫馭失宜防範鮮術事由激變責有攸歸該督引咎自劾竝請解任督師之奏大非朕心其節制滇黔川省各路兵丁之處仍遵前旨行○改陝西潼關縣大慶關巡檢歸朝邑縣管轄從西安巡撫武格請也○庚戌兵部議覆四川巡撫憲德疏言會鹽營所屬木里喇嘛六藏塗都遠處西南邊徼率衆歸誠將所管地方界址番民戶口數目造入版圖傾心內附請俯順夷情准其認納糧馬就近令會鹽營守備經收竝給與安撫司職銜頒給號紙以重職守應如所請從之○辛亥諭大學士等兵部尚書查弼納著爲副將軍命往北路與靖邊大將軍傅爾丹副將軍巴賽辨

理軍務副都統德祿著往北路軍前與隨印之內閣學士永國辦事副都統銜馬爾薩著授爲內大臣與陳泰蘇圖海蘭泰贊軍務戴豪哀泰石禮哈不必參贊軍務舒楞額不必來京著前往振武將軍處代馬爾薩辦事黑色圖克善俟大將軍到營著令來京石禮哈不諳滿洲軍營事務著管理綠旗兵丁但不可膺統轄之任著大將軍等酌量派委○諭兵部年來出征兵丁在外支給口糧而仍給與坐糧以養贍其家口蓋因其荷戈持戟効力戎行不忍令有內顧之慮也至各省土兵有派撥征勦者則於起程時賞給銀兩而無養贍家口之例朕思本身遠出在外則於營生之計不能兼顧其父母妻子或至俯仰無資深可軫念嗣後土兵之出征者除恩加賞賚外其父母妻子在家照守兵坐糧之例每月給銀九錢米三斗米折銀賞給著督撫提鎮差委官弁前往該地方會同土官秉公散

給務令均霑實惠。儻有侵蝕扣剋等弊。一經發覺。定行從重治罪。決不寬貸。目今雲貴川廣等省効力之土兵。即照此例行。竝將此旨通行曉諭各省土兵知之。○壬子諭內閣。向因大興宛平二縣近在輦轂之下。常有速辦之公事。不得不那移庫銀以濟用。而上司察知。每以虧空題叅。至於罷黜治罪。實爲可憫。用沛特恩於大宛二縣。各發庫銀一萬兩存貯該縣。儻遇有速辦之公事。准其詳明府尹動支應用。此朕體恤有司之至意也。近思辦理軍需之州縣。其急切應付之處。不容刻緩。而該州縣竝無存貯備用之項。若擅動公帑。又干嚴譴。有司實處兩難。不可不爲籌及。朕意欲於辦理軍需及事務繁劇之州縣。亦倣大宛之例。酌留帑銀以備急切公事之用。其如何舉行。俾辦公有賴而弊實不生。著大學士會同大將軍岳鍾琪總督高其倬悉心定議具奏。尋議嗣後辦理軍需省分請計其事。

務繁簡留銀三十萬兩或二十萬兩其公務簡少而錢糧又屬富饒之省分應酌留十五萬兩或十萬兩交督撫藩司酌發各府及直隸州存庫所屬州縣遇有緊急軍需即時請給其相距寫遠而事屬不容刻緩者准其一面具文一面先動本州縣庫銀支用俟給發後還項仍令逐案報銷督撫藩司嚴行稽核從之。○諭戶部陝西四川地方民風醇樸歷年逋賦甚少查每年徵收錢糧之期四月完半十月全完此定例也朕思四月十月既屆納課之期小民必須預先經營是麥穀未收之時即爲輸將之計或因稱貸而受剝於富豪或因預糶而大虧其價值且如甘肅地方有徵收本色者若在糧穀未穫之前更爲竭蹶歷來川陝錢糧既無拖欠之陋習若將四月完半者寬至六月十月全完者寬至十一月俟夏麥秋禾築場納稼之後從容完課俾民力紓徐以副朕愛養黎元之至意○雲貴

廣西總督鄂爾泰摺奏官兵報捷恢復烏蒙情形查東川一路烏獠性最冥頑煽惑諸苗江外則勾連涼山下方阿驢各賊以爲依仗江內則糾合巧家營者家海以爲黨援始於祿鼎坤成於祿鼎新祿萬福而東川之凡爲祿氏兇目起而應之近江則補以扯地方要截江路近城以則以擢地方窺伺城垣東川境內挖泥矣氏歹補阿汪等寨東川境外急羅箐施魯古牛畢古等寨迤邐至於武定尋甸所屬隘口沿途堵塞折毀橋梁以致行路斷絕威寧一路阿底爲咽喉鎮雄一路奎鄉爲鎖鑰悉勾通頭目互謀叛逆殺傷塘兵搶劫糧運且串結漢姦代傳木刻姦細四布惶惑民心臣一面飛調官兵丁分爲三路分防會剿一面出示曉諭令各地方官團練鄉兵以資守望復嚴緝漢姦密拏姦細訊確逆情隨皆梟示凡出師弁兵各賞銀兩毡衫棉襖運糧夫役照價增加給與通計兩省所調

官兵共一萬數千人土兵半之東川一路令臨元總兵魏翦國總統兵馬仍聽提臣張耀祖調度續因魏翦國被祿鼎明家人行刺帶傷祿鼎明正法隨改委楚姚總兵官官祿威寧一路令安龍總兵官哈元生總統兵馬以梧州副將徐成貞副之鎮雄一路有鎮雄營叅將韓勳勇敢可用仍令哈元生調度隨據韓勳在莫都都地方與賊血戰一晝夜殺賊數百連燬四寨賊衆奔散又在奎鄉連戰三日敗賊八千殺賊二千餘衆此鎮雄一路之情形也又據總兵官官祿遊擊王耀祖等前進東川擊敗探賊燒燬十三寨斬獲甚衆又遊擊何元等勦捕阿汪急羅箐殺賊三百餘人賊哀求投降搜擒男婦大小一百三十一口又遊擊紀龍等勦洗者家海逆獠斬殺無數此東川一路之情形也又據哈元生前進烏蒙擊敗賊衆數萬射死兇目黑寡暮末連踏賊營八十餘座直抵烏蒙恢復郡治此威

寧一路之情形也。見在飛催張耀祖分路窮搜務獲渠魁盡屠醜類。所有安插調劑事宜已飭徐成貞會同文員一面料理。其在事員弁功過各異。事竣分別具題聽候部議奉。上諭。凡犒賞此役皆從裕厚。不可稍存省費。小見於公用正項內酌量動用。摺奏以聞。○添設雲南宣威州學正一員。州學取進文武童生各八名。從陞任雲南巡撫沈廷正請也。○癸丑。以大學士孫桂正黃旗漢軍都統金以坦。俱兼管兵部尚書事。○陞江南江蘇按察使徐本為湖北布政使。司布政使直隸清河道王紘為江南江蘇按察使。司按察使。○甲寅。諭內閣。大學士馬爾賽張廷玉將廷錫自簡任綸扉以來。祇遵朕訓。仰體朕心。懋著忠勤。恪恭奉職。今年夏秋之間。朕躬偶爾違和。馬爾賽張廷玉將廷錫贊襄機務。公正無私。慎重周詳。事事妥協。至誠之惓方之史冊所載。一心一德之風。洵屬無愧。數月之中。朕躬

得以靜養。調攝者實賴伊等翊贊之力也。今朕躬已經全愈。宜加恩錫以褒良佐。以勵臣工。馬爾賽張廷玉將廷錫著各賞給一等阿達哈哈番。永遠承襲。仍各加二級。其所賜世職伊等或帶於本身。或給與伊子聽其自便。○又諭。向因四川地畝隱匿甚多。以致姦猾之徒欺其疆界不清。契券無據。侵陵攘奪。告訐不休。數年來內外諸臣奏請清查者不下數十人。蓋以田畝隱匿不但無益於國課。亦且有害於民風。朕再四思維。始遣科臣高維新等前往川省。會同道府州縣官料理清查之事。近聞該省州縣中有地少糧多之處。乃歷來地方官勉強加增者。此番清查並未核減。即如成都華陽郫縣溫江等處皆然。其他州縣或尚有與此相類者。著巡撫憲德轉飭布政使高維新等再加確查。若有糧賦稍重之處。即據實奏請核減。以副朕均賦恤民之至意。○乙卯。吏部題從前由部院郎官補授

叅領佐領者俱兼部院行走至部院各司官員承襲世職者其兼理之處未有定例請嗣後凡世職品與部院司員品相等者仍令兼理行走如有世職品太部院司員品小者俱令在世職上行走所遺部司員缺另行銓補永爲定例得旨依議嗣後世職品大不應兼理司員者果係才具出衆之員准該堂官具奏保留帶領引見其循分供職者照例開缺不得奏請兼理儻有請託徇情等弊該員引見時朕察其不稱保留或保留之後辦事不能妥協即將具保之該堂官嚴加議處○八旗都統等遵旨議覆凡奉旨賜與副都統職銜者嗣後諸事悉與副都統一體照蒙古漢軍副都統之例給與親丁錢糧二分如見任護軍叅領等官有蒙恩賜與副都統職銜者亦照此例至於年老告退人員雖賜與副都統職銜並無行走之處不必給與親丁錢糧再副叅領等官如係因叅領員缺委署者應

給與親丁錢糧若因叅領出征之缺委署者其親丁錢糧亦概不必給與從之○丁巳諭內閣山東今年偶被水患特命大臣會同巡撫查賑有房屋傾頽者賜以修葺之資並大發倉糧計口授食又准總督田文鏡之請將青萊登三府州縣存貯倉穀及通省捐監穀石照時價平糶其奉天販米商船亦准到東貿易是東省小民今歲三冬糧食有資可以無慮但恐明年青黃不接之時米價或致昂貴不可不預爲籌畫朕思奉天連年豐稔各州縣倉儲及莊屯收貯皆極充裕且與東省一海之隔順風揚帆一日可達應趁此時北風之便將奉天近海州縣存貯米糧運送二十萬石至山東海口交與地方官俟明年二三月間照市價平糶於小民甚有裨益著正白旗漢軍都統祖秉衡刑部左侍郎王朝恩前往奉天會同將軍府尹辦理○又諭陝西副將叅將等官派令出征者甚多其員缺俱

須另員署理而本省弁員各有辦理之事難以兼顧著大將軍岳鍾琪於直隸山西兩省參將遊擊內有平日知其才具可用者舉出具奏候朕酌量命往陝西以備委署之用其直隸山西之缺著該上司遞行委署再將來引見武弁時著兵部奏明有可勝陝西之任者朕酌量命往○戊午諭內閣烏蒙逆蠻不法雲貴四川見在用兵征勦聞川省之永寧建昌地方山路崎嶇所用軍糧皆須民人背負方能運送非若坦途之可以車馬馱載也舊例每糧一石運送百里給與腳價一錢而民夫一名止能背負米糧三斗百里之程須行兩日是百姓一日之所得無幾未足供其日用之資著該撫即行確查凡川省有山路險峻之處運送軍糧需用人力與永寧建昌相類者著將腳價速議加增一面奏聞一面即行給發其他雲貴等省若有似此腳價不敷之處亦著該督撫確查增添仍一面奏聞

該地方有司務當實力禁止侵冒等弊使力役之民實沾恩澤○禮部題據通政使留保疏報闕里文廟修理告成請遣官致祭以光鉅典得旨皇五子弘晝淳郡王弘晷前往告祭○己未陞陝西永固副將張嘉翰爲陝西西安西總兵官○戶部議覆巡視長蘆鹽政御史鄭禪寶疏言山東青登萊三府所屬之安邱蓬萊等十六州縣票鹽舊係招商辦課民情未便嗣後請革除商名聽民自行領票銷賣其應納課銀攤入地糧徵收造報應如所請從之○又議覆四川巡撫憲德疏言松潘鎮所屬南坪營涪州舊城內外及黑格郎會龍隆康等處空隙荒地請令各兵安插家口承墾永爲世業照松潘衛地糧之例按年起科應如所請從之○辛酉上詣恩佑寺行禮畢回宮○諭內閣通州石路兩旁

培土最為緊要。前已降旨交與地方官。但恐伊等未必實心培墊。著工部每季派出司官前往查看。並諭地方官知之。○總理太平峪工程事務保德疏言。

萬年吉地。圈入旗民地畝。請照原地上中下三則。將易州入官地畝加厚撥給。得旨撥給伊等地畝。著將辛亥年應納之錢糧寬免一年。○添設熱河巡檢一員。從署直隸總督唐執玉請也。○壬戌。以正紅旗護軍統領宗室哈爾吉為右翼前鋒統領。仍留涼州辦理軍務。

○調湖廣荊州左翼副都統阿克山為江南江寧右翼副都統。陞浙江杭州協領圖森為湖廣荊州左翼副都統。○陞江南安徽按察使馮景夏為江南安徽布政使司布政使。調江南江蘇按察使王紘為安徽按察使。司按察使擢浙江杭州府知府喬世臣為江蘇按察使。司按察使。○癸亥。陝西西安左翼滿洲副都統陸寶緣事革職。陞署正白旗滿洲副

都統僧保為陝西西安左翼滿洲副都統。○大學士等疏言。殿試武舉屆期。請派王大臣同原監試之大臣等考驗弓馬技勇。得旨著莊親王允祿、大學士公馬爾賽、大將軍公傅爾丹、都統侯陳泰、公同監考。○甲子。以禮部左侍郎吳士玉、正紅旗漢軍副都統韓光基俱署刑部侍郎。○命山東巡撫岳濬來京。陞見以刑部右侍郎王國棟署山東巡撫。吏部左侍郎劉於義協辦山東巡撫事務。○乙丑。

萬壽節停止朝賀筵宴。○遣官祭

福陵

昭陵

昭西陵

孝陵

孝東陵

景陵。○遣官祭真武東嶽城隍之神。

大清世宗敬天昌運建中表正文武英明寬仁
信毅大孝至誠憲皇帝實錄卷之九十九

大清世宗敬天昌運建中表正文武英明寬仁
信毅大孝至誠憲皇帝實錄卷之一百

敕修

雍正八年庚戌十一月丙寅朔戊辰諭內

閣闕里

文廟告成特命皇五子同淳郡王前往告祭
於十一月十九日從京師起程十二月十一
日行致祭禮於歲前回京此次皇子等往來
經過地方凡一切應用車馬口糧食物芻牧
等項俱係遣官動用錢糧備辦絲毫不取給
於地方如地方官吏有借名科派累及民間
及隨從人員借端需索騷擾地方者從重治
罪其經過住宿之處准居民人等前赴營盤

攜物售賣悉照市價給與沿途文武官弁其衙門在二十里以內者准其迎送若在二十里以外者不得擅離職守河東總督相隔路遠不必前來請安鄰省之督撫提鎮等亦不必來至於皇子等經過之地方凡大小官員等不許餽送禮物即食物亦嚴行禁止僅有不遵朕旨者著隨從之大臣即行參奏嚴加議處○又諭皇五子告祭闕里

寄錄本一百

二

文廟著派出滿漢御史各一員隨往稽察儻有不遵諭旨或隨從人員生事滋擾或地方官員苛派累民者著該御史即行稽察○策試天下中式武舉齊大勇等一百十八人於太和殿前○己巳諭內閣惟至聖先師孔子道冠百王功高萬世朕景仰企慕寤寐弗諼備舉崇奉之儀用申報享之願查世襲官爵歷代俱有成規而聖廟執事之員向來未加爵秩所當廣置官僚以光祀典今欲特設

聖廟執事官三品者二員四品者四員五品者六員七品者八員八品九品者各十員各按品級給與章服每逢

聖廟祭祀之時虔肅冠裳駿奔趨事凡此人員著衍聖公於孔氏子孫內選擇人品端方威儀嫻雅者報部充補每年各給俸祿銀二十兩其孔氏子孫內有情願充補之人或曾經出仕而退休在籍者或身有職銜而未曾出仕者以及貢監生童等皆可入選若屆鄉試之期有情願入場者准以監生入場應試朕意如此著大學士等會同該部定議具奏尋議闕里

聖廟雖有管勾典籍司樂等官分司執事而設官不過數員職銜又止七品制度威儀未爲周備嗣後應遵照諭旨按品增設執事官員給與章服祭祀時令其陪列執事每年各給俸銀二十兩其增設人員令衍聖公將本族之致仕在籍及有職未仕并貢監生童內

分別宗支遠近揀選人品端方威儀嫺雅者
詳慎酌定應與品級報部具奏充補此等人
員內有遇原職輪班應選者聽其就選赴任
其由貢監生員充補人員有情願鄉試者令
其一體鄉試若係童生准作監生編入四氏
號內照額取中再嗣後遇有此項人員缺出
俱令衍聖公揀選擬補報部彙奏從之○庚
午

上御太和殿視朝文武陞轉各官謝恩○陞右

翼前鋒統領哈達爲正白旗領侍衛內大臣
○辛未添設雲南都勻清江二協丹江一營
千總各二員把總各四員黃施營千總一員
把總二員從雲貴廣西總督鄂爾泰請也
壬申以鑲紅旗護軍統領輔國公伊爾登署
右翼前鋒統領正紅旗滿洲副都統宗室鄂
齊署鑲紅旗護軍統領陞鑲藍旗滿洲副都
統馬喇爲正黃旗護軍統領○以翰林院侍
講李清植提督浙江學政○癸酉以正白旗

護軍叅領拉薩立署正白旗滿洲副都統○
免貴州新墾起科暨由四川湖廣廣西改隸
各地畝本年分額徵銀三萬三千三百兩有
奇○甲戌浙江觀風整俗使蔡仕舫緣事降
調裁觀風整俗使缺○乙亥諭戶部向來各
處落地稅銀大半爲地方官吏侵漁入已是
以定例報出稅銀四百兩者准其加一級後
因查報漸多吏部定議報出稅銀八百兩者
准其加一級多者以此計算年來地方官員
皆知守法奉公凡有稅課皆隨收隨報不敢
侵隱其報出之數每倍於舊額祇恐將來不
無冀倖功名之人希圖優敘以致恣意苛索
擾累小民且落地稅銀非正項錢糧有一定
之數者可比侵蝕隱匿者固當加以處分而
爭多鬪勝者不但不當議敘亦當與以處分
其如何定議並如何議敘加級處分之處著
吏部戶部悉心妥議具奏尋議嗣後各省落
地稅及稅契銀兩如搜求需索以致盈餘之

數倍於正額。或將十數年以前置買產業苛索擾累者。令該督撫題叅革職。上司失察徇庇者。查出照例議處。其於正額外實在盈餘者。以八百兩爲率。准加一級。多者不得過三級。永著爲例。從之。丙子。諭內閣。凡漢軍人員之祖父。皆本朝開國時。從龍入關。是以受國家之恩。最爲優渥。而其中懋著功勳者。不但加恩於本身。且望其世世子孫居高位。食厚祿。綿慶澤於無窮也。無如其中有一種不肖之人。忘國家高厚之恩。背祖宗忠義之訓。自暴自棄。干犯王章。伊等不自念其先人。而朕於執法定罪之時。未嘗不念忠勳之後。竟罹罪譴。爲之含淚悽然。不忍頒發諭旨也。范時繹乃一叅領耳。朕念其爲名臣之後。加恩用爲總兵官。又特授江南總督之重任。且官階加至都統。尚書伊在江南玩愒廢弛。無一察吏安民之善政。視地方之事。如膜外。而鹽梟巨盜。待朕訪確姓名。密諭批示。始行緝捕。

又如江浙地方。潛藏匪類。蠱惑人心。伊不能禁約稽查。以端風俗。轉與私相往來。及伊到京。朕猶不忍令其廢棄。特令料理太平峪工程。適因北河總督不得其人。令伊前往。豈料伊正當伏汎危險。忍心坐視。曠職負恩。至於此極。此范時繹之大槩也。尚崇廩之祖尚可喜於

太宗文皇帝時。抒誠歸順。及吳逆變亂。尚之信雖干叛逆之條。而尚可喜則始終不失臣節。至其父尚之隆。侍從內廷數十年。小心勤謹。深受聖祖仁皇帝之恩。尚崇廩原係散秩大臣。朕望其成立。特加任用。令管理

陵寢事務。因奉天積習未改。特授伊爲盛京五部尚書。令其整理訓導。乃一到新任。行事乖張。叅奏從前差往辦理之官達。朕將官達召回。詰問官達陳奏。尚崇廩在任種種狂肆之狀。復據平郡王叅奏。朕令大臣等將伊與同

事官員一一傳齊質問則伊狂妄不敬背公
行私之處悉皆確實此尚崇廩之大槩也李
永陞原任河南南陽總兵官聲名不好隆科
多曾經叅奏朕查確將伊罷黜發往口外臺
站効力贖罪及朕恭閱

聖祖仁皇帝實錄見四川原任總督李國英平
寇捕賊懋著勞績詢其子孫則李永陞其嫡
派也遂降特旨將伊調回授以叅領之職後
又加恩遷擢至於都統辦理該旗事務似屬
盡心職守朕以爲感奮自新大改故轍遂授
爲工部尚書豈料伊一到工部之任遂作弊
營私婪贓纍纍延姦胥爲幕客以開招搖納
賄之門審訊鑿鑿無可置辯此李永陞之大
槩也此三人者均係漢軍世家之裔彼之祖
父効忠宣力如此國家之酬庸賞功如此而
彼之負恩辜德如此凡在廷臣工莫不爲之
歎息痛恨想伊祖父有知亦應含恨於九原
惟是朕再四躊躇若欲按律置之於法則追

念伊等前人勲勞拳拳弗釋若欲寬宥其罪
又恐開將來功臣子孫肆行不法之漸展轉
遲疑實不能決但思伊等所犯尚不似隆科
多年羹堯蔡珽不可赦宥今且施法外之仁
將范時繹尚崇廩李永陞釋放令伊等洗滌
肺腸遷善改惡儻能戴朕寬宥浩蕩之恩痛
自愧悔將來或另有使令之處若怙惡不悛
再有過犯定行正法莫希再邀寬典也○又
諭范時捷係開國名臣范文程之孫乃不念
國家培植之恩並不思伊祖宗積累之厚其
在陝西爲官時諂媚年羹堯辱身賤行不顧
爲人鄙笑朕令其來京辦理旗務則志氣昏
庸萎靡不振無心爲國家出力是以降爲藍
翎侍衛以示懲戒繼因

陵寢地方辦事需人將伊命往今范時繹獲罪
罷黜范氏子孫竟無現居大員之人范時捷
尚非棄材可比是以令其管理古北口提督
事務觀其如何改過自新一洗從前之愧耻

直隸總兵官俱聽范時捷節制後不爲例
以監察御史鄭禪寶內務府郎中鄂善俱協
理內務府總管事務○振武將軍順承郡王
錫保奏報鄂爾昆圖拉集爾麻泰等處屯田
收穫大麥小麥糜子共六千六百五十石有
奇下部知之○戊寅冬至祀

天於

園丘遣裕親王廣祿行禮○遣官祭

永陵

福陵

昭陵

昭西陵

孝陵

孝東陵

景陵

聖祖仁皇帝忌辰遣官祭

景陵○停止次日朝賀○己卯諭內閣據雲貴

廣西總督鄂爾泰奏報官兵恢復烏蒙情形

朕心甚慰烏蒙事起倉卒賊衆獸屯烏聚多
者萬餘人少亦數千而鎮雄叅將韓勲以奎
鄉四百人戰敗賊衆數千連破四寨賊蠻喪
胆總兵官哈元生副將徐成貞以二千餘人
破賊數萬數日之內恢復烏蒙此三人者實
爲功首著交部從優議敘其在事人員叅將
康世顯遊擊王耀祖張起紀龍王先何元王
友文曾長治土千總安天爵帶領官兵皆能
奮勇爭先蕩平賊寨各著勞績鎮雄州知州
徐德裕擒獲逆黨安輯居民亦屬可嘉凡此
人員著鄂爾泰分別次第具奏到日交部從
優議敘至隴慶侯之庶母二祿氏矢死効忠
解散逆謀四川沙馬土司沙氏立志不移親
身赴建皆係婦人能知大義應加特恩以示
嘉獎沙氏照其應得封典加一等給與誥命
二祿氏給以六品安人誥命並各賞銀一千
兩綵緞二十端其餘各土司有在軍前効力
及保境安分者令鄂爾泰會同黃廷桂憲德

查明酌量賞給。至滇黔進剿漢土兵丁。應照川省之例。每名賞銀五兩。其哈元生韓勲所統兵弁。皆奮不顧身。血戰數十陣。首先破賊。更屬勇壯。著每名賞銀二十兩。將此所賞銀數。交與哈元生等。視其兵丁中出力之多寡。酌量分別等次賞給。若一例均賞。亦可。叅將遊擊著賞銀五百兩。守備三百兩。千總一百兩。把總五十兩。以獎忠勤之將士。再另動司庫銀一萬兩。賞給哈元生爲伊軍前勦力及賞賚之費。該部遵諭速行。○以正白旗護軍統領魏臘署正白旗漢軍都統。鑲紅旗蒙古副都統富昌署正黃旗護軍統領。以戶科給事中羅鳳彩提督山東學政。改四川成都府屬松潘衛歸龍安府管轄。從四川巡撫憲德請也。○庚辰。戶部議覆河東總督田文鏡疏言。今年豫省被水。州縣收成雖有不等。實未成災。且士民踴躍輸將。所有奉旨蠲免之漕糧。請仍照額完兌。應如所請。得旨。士民

等急公奉上。甚屬可嘉。但被水州縣雖未成災。而收成分數既有不等。著該督確查歉收分數。仍照例蠲免。即將現在已兌漕糧。准作辛亥年正供。以示朕嘉惠豫民至意。○辛巳。諭內閣。皇五子前往山東闕里。專爲文廟祭祀大典。並不與聞地方一事。若有無知生事之人。向皇五子前告狀者。著地方官嚴拏治罪。將此預先通行曉諭。沿途官民兵人等知悉。○陞太常寺卿史在甲爲大理寺卿。○改江蘇江寧府屬溧陽縣歸鎮江府管轄。從署兩江總督史貽直請也。○壬午。吏部等衙門議覆寧遠大將軍岳鍾琪條奏設立邊方郡縣事宜。一。陝省延安府屬榆林靖邊神木三廳。管轄沿邊三十堡。除神木同知所轄東十堡。已改歸州縣管轄外。其榆林同知所管中十堡。靖邊同知所管西十堡。現今夷漢雜居。必須大員彈壓。請於榆林地方設知府一員。照磨一員。即將榆林州同靖邊經

歷定邊縣丞各改爲知縣懷遠堡亦改設知縣四縣俱添設典史一員榆林衛教授改爲府教授其榆林靖邊衛訓導俱改爲縣學訓導定邊懷遠二縣請將綏德膚施二縣之訓導改設俱歸新設之榆林府知府管轄。榆林添設府縣足資分理原設之榆林靖邊同知及波羅州同威武鎮靖巡檢榆林廣育倉大使各缺均請裁汰惟留神木同知一員以司糧捕。榆林道原轄延安綏德邠州等處今榆林既改爲府請將神木道改爲延綏道移駐綏德州管轄延安綏德邠州等處其新設之榆林府並延綏道所屬之直隸葭州吳堡府谷神木等州縣俱改歸榆林道管轄均應如所請從之。移雲南大理府通判駐所屬趙州迷渡地方裁迷渡巡檢缺添設白崖巡檢一員裁開化府經歷缺添設文山縣典史一員從雲貴廣西總督鄂爾泰請也。○癸未翁牛特扎薩克多羅達爾漢岱青貝勒厄

爾德卜鄂齊爾因病休致以其子台吉彭蘇克襲替。○予故署戶部左侍郎常德壽祭葬如例。○甲申湖南巡撫趙弘恩疏報會同總兵官周一德等撫綏六里紅苗地方安兵設汛苗衆各歸誠感戴納戶輸糧下部知之。○乙酉工部議覆辦理陝西寧夏渠工兵部侍郎通智等疏言本年三月奉旨察勘大清漢唐三渠水利事務查三渠應行修濬之處甚多惟唐渠爲尤甚宜於今冬備料明春興工其大清渠漢渠需用物料採辦全備至壬子年春間動工補修應如所請從之。○以故青海扎薩克輔國公達錫班珠爾伯祖子策凌襲爵。○旌表江南上海縣烈婦顧定妻朱氏逼姦不從刎頸完節給銀建坊入祠致祭如例。○丙戌賑山西天鎮縣旱災饑民並免本年分額賦有差。○丁亥諭內閣各省選拔生員到京朕俱特派大臣秉公考試分別等次進呈前有湖北應山縣生員楊可鏡一卷文

理荒疎經部議照例革去選拔項朕聞楊可鏡乃明臣楊漣之元孫昔順治四年楊漣之子楊之易爲江南松江府同知遭提督吳勝兆之叛捐軀殉難忠節凜然蒙

世祖章皇帝之恩優加贈卹此即楊可鏡之曾祖也朕思楊漣父子兩世忠義其後嗣子孫若稍能自立品行無虧雖文藝不工亦當格外造就楊可鏡准作選拔赴國子監肄業仍著禮部帶領引見○晉封喀爾喀扎薩克郡

王丹津多爾濟爲扎薩克和碩親王○戊子諭內閣朕即位之初清查戶部錢糧始知歷年以來虧空竟至二百五十餘萬兩之多是時怡賢親王管理部務奏稱此項虧空歷年已久若一一根究責令賠補則獲罪之人甚衆懇請寬免查完嗣後以本部餘平銀兩陸續代爲完補數年以來該部既有補帑之事是以各省解銀交庫之時平銀未免稍重但從前解京銀兩到部交納時雜費繁多又有

暗中包攬官吏勒索種種情弊此中外所共知者自怡賢親王管理三庫以來弊絕風清各色浮費悉行禁革雖餘平銀兩畧覺加添而較之從前雜費則減省已多且怡賢親王之意原欲俟虧空彌補全完之後仍將平銀裁減此亦王屢次陳奏於朕前者今庫中虧空之項俱已補足著將辛亥年春撥解部銀兩照從前餘平之數減去一半該部即行文各省巡撫布政使知之此項銀兩大約出自耗羨項下嗣後著留於本省以備地方公事之用若司庫官員有額外多索者著管理三庫之王大臣查叅若外省官員因此次恩旨將解部之項或有扣剋短少等弊亦著王大臣指叅議處增置福建督標水師營駐福州南門外之南臺設遊擊一員守備一員千總二員把總四員撥督標三營內戰守兵共九百名爲水師營兵從福建總督劉世明請也○和托輝特扎薩克多羅貝勒博貝故追

封郡王遣官致祭賞銀一千兩○旌表浙江蘭谿縣烈婦董長美妻吳氏拒姦不污投河殞命給銀建坊入祠致祭如例○己丑傳臚賜殿試武舉齊大勇等一百十八人武進士及第出身有差○復設四川北道一員駐劄保寧府從四川巡撫憲德請也○庚寅諭內閣凡朕降旨特交事件該衙門有即行辦理者亦有遲久尚未辦理者總因無專司稽察督催之人是以遲速不齊間有耽延嗣後著於滿漢文武大臣內派出數人管理欽奉上諭事件專任稽查督催之責其滿司官即用議政處辦事之員漢司官著派出之大臣等揀選委用○裁江南臨淮縣濠梁驛滁州滁陽驛江浦縣江淮驛六合縣棠邑驛丹徒縣京口驛江都縣廣陵驛儀徵縣水驛高郵州孟城驛寶應縣安平驛山陽縣淮陰驛清河縣清口驛宿遷縣鍾吾驛驛丞各一員其驛務歸各州縣管理復設潛山縣青口驛太

湖縣小池驛驛丞各一員添設南陵縣公館驛桃源縣古城驛驛丞各一員從署兩江總督史貽直請也○辛卯以原任北河總督范時繹為鑲藍旗漢軍副都統○復設廣東鹽運使衙門知事一員駐劄潮州府從廣東總督郝玉麟請也○裁福建南靖縣平南驛龍巖縣適中驛南平縣王臺驛將樂縣白蓮驛崇安縣興田驛驛丞各一員其驛務歸各縣縣丞巡檢等員管理從福建總督劉世明請也○封巴林輔國公桑里達為多羅郡王○壬辰署振武將軍順承郡王錫保摺奏八旗駐防官兵等呈稱營中行走已兩年有餘一應巡汛收放等類俱習學熟練情願仍留駐防俟大兵凱旋請不照前例三年更換等語理合奏聞得旨此奏甚屬可嘉著照官兵所請行種地綠旗官兵仍照舊更換○以故一等侯朱之璉子朱震襲爵○以故三等精奇尼哈番夏襄元子夏冕襲職○三等阿思哈

尼哈番阿林緣事革退以其弟蘇爾那襲替
癸巳諭議政大臣等五旗諸王屬下公中
佐領之缺在一旗內揀選易於得人若止在
該王屬下揀選未爲允當嗣後五旗諸王屬
下公中佐領缺出在一旗內如何揀選補授
之處著議政大臣會同兵部八旗大臣等詳
議具奏尋議五旗諸王屬下之公中佐領缺
出該王屬下若有人去得品級相當之員揀
選帶領引見補授如不得人即於該旗大臣
官員內揀選引見補授品級相當於佐領
之事亦有裨益從之 解山東布政使孫國
璽任以山東登萊青道孫蘭芬署山東布政
使司布政使 甲午戶部議覆原任長蘆鹽
政鄭禪寶條奏一山東行運散鹽地方逐一
確查除可以整包行運者照舊每包額重二
百二十五觔外其道路崎嶇車輛難行之處
許分作四包每包重五十六觔四兩著爲定
例一永利場之趙家坨請委令富國場大使

房家坨委令久山鎮巡檢各就近管理再移
駐外委一員撥兵九名協同巡役緝查其汀
河辛莊二處亦移駐外委一員撥兵九名協
緝一東省十場二縣存貯竈穀八千三百石
零舊無倉廩收貯又從無動用之處請歸併
附近倉廩存貯其有相隔州縣稍遠之處於
明春青黃不接時減價糶賣所賣銀兩俟秋
成後照數買交附近州縣倉廩收貯遇有應
行賑卹之處同民戶一體賑卹一請裁海倉
場大使缺歸併西由場管理復設官臺場大
使一員將壽光濰縣兼管之固堤場歸併官
臺場管理一嗣後經徵全完之場大使並州
縣等官請照地丁錢糧經徵五萬兩以下全
完之例督催分司運同運判照直隸知州知
府督催十萬兩以下全完之例鹽運使照布
政使督催五十萬兩全完之例俱給與紀錄
一次以示鼓勵均應如所請從之 添設船
廠四品官五品官六品官各一員領催八名

管轄原駐兵三百名從黑龍江將軍卓爾海請也

大清世宗敬天昌運建中表正文武英明寬仁信毅大孝至誠憲皇帝實錄卷之一百

大清世宗敬天昌運建中表正文武英明寬仁信毅大孝至誠憲皇帝實錄卷之一百一

敕修

雍正八年庚戌十二月乙未朔丙申以故

實錄卷一百一

三等精奇尼哈番德克精厄子伊靈阿故二等阿思哈尼哈番劉相子永壽各襲職丁酉靖邊大將軍傅爾丹自京回北路軍營戊戌諭兵部前因口外用兵哈密爲軍需往來之地特准大將軍岳鍾琪之請將駐防兵丁口糧鹽菜加恩增給又准署總督查郎阿之請將肅鎮兵丁折支米豆草束銀兩各行增給總以肅州哈密一帶地方兵馬往來物價未免昂貴故加恩於常格之外也今思嘉

峪關在肅州哈密之間其地苦寒所需兵糧皆從肅州轉運事屬一體其營汛兵丁折支米豆草束之價俱著照肅鎮之例米豆每石加銀五錢每草一束加銀一分其加增之期亦照肅鎮補行給發以示朕軫恤邊兵之至意○旌表烈婦河南封邱縣張伸妻張氏被強不染自縊完貞山西聞喜縣郭洪春妻李氏守正拒姦被刃殞命各給銀建坊入祠致祭如例○已亥陞署安徽布政使劉枬爲太

常寺卿○工部等衙門遵旨議奏直隸河工關係重大請設立河道水利總督一員駐劄天津令四道廳員及印河各官受其節制一切事務俱照河東總河例行其營田事務仍歸直隸總督管理從之○庚子

孝惠章皇后忌辰遣官祭

孝東陵○以故和托輝特扎薩克多羅貝勒博貝子班第襲爵○辛丑湖廣提督岳超龍疏報鎮算鎮所屬地良坡等處於

萬壽節祥雲五色捧繞日輪光華四射歷午未

申三時下部知之○勅封直隸滹沱河神爲

長源永濟滹沱河神○安南國王黎維禰遣

陪臣丁輔益等奉表謝恩進貢方物宴賚如

例○壬寅調鑲紅旗蒙古副都統阿魯爲正

藍旗滿洲副都統陞署正紅旗滿洲副都統

索林爲鑲紅旗蒙古副都統○以浙江平陽

副將馮吉品署福建福寧總兵官○寧遠大

將軍岳鍾琪自京回西路軍營○雲貴總督

鄂爾泰題雲南普洱府車里土司宣慰使刀

召金保故其子年幼請以其弟刀細悶納撫

孤協理下部知之○予故戶部侍郎管三庫

事務噶爾泰祭葬如例○旌表河南信陽州

烈婦劉卜世妻楊氏守正拒姦投繯畢命給

銀建坊入祠致祭如例○甲辰諭戶部今年

江南河東等省間有被水州縣已降旨發粟

蠲租並令該督撫加意撫恤但至明歲春間

青黃不接之時恐不無借資隣省買米減糶

之事。湖南湖北二省。向來積穀甚多。正在預
籌出陳易新之法。而今年又復豐收。穀價大
減。恐民間出糶維艱。朕特思酌盈劑虛之道。
著將從前商捐。及耗羨銀兩。存貯楚省藩庫
者。動支五萬兩。遴選賢員。分往所屬豐收價
平之處。糶買新穀。暫行收貯。俟隣省需米平
糶。即令委員來楚。照楚省原買價值。先儘倉
貯之穀。交買運回。以濟民食。仍將新穀補倉
價銀還項。如此。則隣省無責糶之虞。而楚省
又得出陳之益。事屬兩便。儻隣省可以不用。
則仍留楚省。於青黃不接之時。照價平糶。於
民亦屬有濟。著該督撫遵諭料理。並移會隣
省知之。○丙午。以和碩端柔公主。下嫁齊墨
特多爾濟。授爲和碩額駙。○丁未。以正藍旗
叅領達爾濟。署本旗滿洲副都統。正紅旗護
軍叅領伊克壽。署鑲藍旗滿洲副都統。○禮
部議覆四川巡撫憲德疏言。四川省城內原
設成都華陽兩縣。康熙八年間。將華陽歸併

成都。今因土廣人稠。復經分設。實與他處一
縣分爲兩縣者有別。又係省會首邑。請照中
學之例。歲科兩試。每縣各取進文童十二名。
歲試武童。每縣各取進十二名。應如所請。從
之。○戊申。以鑲藍旗護軍叅領胡琳。署正紅
旗滿洲副都統。○庚戌。諭內閣。今年直隸近
河地方。雖有被水一二處。而其餘州縣。俱各
十分收穫。何以京城及通州米價。皆至昂貴。
著大學士詢問九卿。現今直屬米價若干。將
所知逐一開明。並將如何使京城及各處米
石價平之處。詳議具奏。尋議。目今米價較春
間俱屬浮貴。五城各廠買米人多。每至擁擠。
請於每城暨通州。各添一廠。將成色米石。廣
爲減糶。至城內八旗及通州左右兩翼米局。
係收買之好米。請照春間市價。量加五六分。
糶賣。如從前價值稍浮。請照現議價值發賣。
並行令步軍統領。順天府府尹。嚴查窩囤之
弊。又定例。每年春季。以二月給俸米。三月放

甲米今請於辛亥年春季俸甲米各先期一月支放。秋季亦照此例。其各處賣米之錢請照戶部從前所奏於每月兵餉內量加支放。俾米價錢價俱各疏通。至於成色米石價值既賤尤便民間應隨時發糶不必拘定米數俟米價既平應停之時戶部再行奏聞從之。○禮部議覆四川巡撫憲德疏言茂州羌民久列版圖載糧入冊與齊民無異請照例與漢民一體應試科舉出貢卷面不必分別漢

羌額數憑文去取以廣樂育鼓勵之意應如所請從之。○又議覆四川巡撫憲德疏言渠縣已故知縣王質從征討賊建績致身請照例立傳設牌從祀昭忠寺應如所請從之。○辛亥調雲南布政使葛森為貴州布政使司布政使陞雲南按察使常安為雲南布政使司布政使雲南驛鹽道馮光裕為雲南按察使司按察使。○科爾沁扎薩克圖郡王撒胡喇克故遣官致祭。○癸丑命大學士朱軾兼

管兵部尚書事。○以吏部左侍郎劉於義為直隸河道水利總督內閣學士徐湛恩協辦河道事務。陝西西安左翼漢軍副都統陳良棟緣事降調調正紅旗漢軍副都統朱國極為陝西西安左翼漢軍副都統。○刑部等衙門會議呂留良身列本朝子衿妄附前代儀賓之裔追思舊國詆毀朝章造作惡言妄行記撰猖狂悖亂罪惡滔天甚至敢將聖祖仁皇帝誣讟指斥悖逆已極臣等莫不切

齒痛心允宜按律定罪顯加誅滅以扶人紀以絕亂源呂留良應判屍梟示財產入官伊子呂葆中曾叨仕籍世惡相濟前此一念和尚謀叛案内連及呂葆中逆跡彰著亦應判屍梟示呂毅中應擬斬立決伊子孫並兄弟伯叔兄弟之子及女妻妾姊妹子之妻妾應行文該督查明按律完結並行知各省府州縣將大逆呂留良所著文集詩集日記及他書已經刊刷及抄錄者於文到日出示徧諭

勒限一年盡行焚燬得旨呂留良懷悖逆不臣之心假託先儒糟粕餘論欺世盜名以致人心陷溺爲其迷惑已久愚昧之徒稱爲夫子幾謂其駕乎程朱之上甚至奉祀書院以尊崇之今其逆謀穢行無不敗露天下焉有喪滅倫常猶得託名於理學之林而著作尚有可取者乎今內外臣工等合詞陳奏朕思呂留良之罪從前諭旨甚明在天理國法萬無可寬然天下至廣讀書之人至多或者千萬人中尚有其人謂呂留良之罪不至於極典者朕慎重刑罰誅奸鋤叛必合乎人心之大公以昭與衆棄之之義至其所著書籍臣工等奏請焚燬復思呂留良不過盜襲古人之緒餘以肆其狂誕空浮之論有識見者固不待言即當日被其愚惑者今亦自然窺其底裏而嗤笑之也況其人品心術若此其言更何可取今若焚滅其迹假使燬棄不盡則事屬空文倘燬棄盡絕則將來未見其書者

轉疑伊之著述實能闡發聖賢精蘊而惜其不可復得也即呂留良書籍中有大逆不道之語伏思我

聖祖仁皇帝聖德神功際天蟠地如日月之照臨宇宙萬古爲昭豈呂留良所能虧蔽於萬一乎著將廷臣所議行文直省學政徧行詢問各學生監等應否照議將呂留良呂葆中劉屍梟示伊子呂毅中斬決其所著文集詩集日記及他書已經刊刻刷印暨鈔錄者盡行燔燬之處著秉公據實作速取具該生監等結狀具奏其有獨抒己見者令其自行具呈該學政一併具奏不可阻撓隱匿俟具奏到日再降諭旨○添設甘肅張掖縣驛丞一員駐劄沙河兼管沙河撫夷二驛高臺縣驛丞一員駐劄鹽池兼管鹽池雙井二驛改涼州平城驛兼管之通遠驛務歸平番縣管理從甘肅巡撫許容請也○勅封廣東徐聞縣廟神爲英佑驍騎將軍之神○免直隸蔚州

蔚縣二州縣本年分水災額賦有差○乙卯以鑲藍旗蒙古副都統敦巴署鑲紅旗護軍統領○調直隸天津都統拉錫回京以正藍旗滿洲副都統阿魯署直隸天津都統○護理寧遠大將軍印務紀成斌奏報準噶爾賊人乘我西路軍營不備傾其醜類二萬餘衆犯濶舍圖卡倫盜趕駝馬總兵官樊廷率副將冶大雄等領兵二千轉戰七晝夜救出兩處卡倫官兵會合總兵官張元佐等擊殺賊兵不計其數將馬駝牲畜悉行奪回得旨所奏逆夷盜趕駝馬情形大學士等可傳諭靖邊大將軍傅爾丹參贊陳泰蘇圖令其行文副將軍巴賽等駐牧和博克薩里之逆夷或遣賊衆至北路卡倫偷盜駝馬亦未可定宜小心防範不可疎忽亦不得聞信矜張務宜鎮靜嚴密萬全無弊傅爾丹等亦速馳赴軍營斟酌妥辦○四川巡撫憲德疏言川省回民感激

天恩集衆誦經恭祝

萬壽得旨數年以來凡內外臣民等感戴朕恩有欲建立碑亭及開設經壇以申頌祝者皆已嚴行禁止並令大臣官員彈竭誠意屏絕虛文曉諭所屬士庶兵丁等一體遵奉屢降諭旨甚明川省回民集衆誦經該撫不行禁止轉爲代題甚屬不合著嚴飭行並曉諭衆回民知之○賑江南壽州鳳陽等十州縣鳳陽長淮二衛水災飢民○丁巳諭大學士等大將軍岳鍾琪從西安由肅州前赴軍營途中如有調撥兵丁辦理軍務之處須用印信行文前所頒寧遠大將軍印信留在軍營今特將撫遠大將軍之印遣員齎送交與大將軍岳鍾琪領受大將軍未到軍營以前一切行文俱用撫遠大將軍印既到軍營以後仍用寧遠大將軍印將撫遠大將軍印繳回并著大將軍岳鍾琪接到諭旨印信之日通行所屬知之○又諭涼州駐防滿洲兵丁一千名

著右翼前鋒統領宗室哈爾吉原任都統鄂善帶領前往肅州。再著西安將軍秦布在西安駐防滿洲兵丁內挑選一千名交與副都統僧保張正文帶領前往涼州駐劄。再撥涼州綠旗兵丁一千名令山西太原總兵王緒級馳驛前往帶領赴肅州。太原總兵印務著宣化總兵李如柏署理。宣化總兵印務著三屯營副將高弘榮署理。固原提標兵丁或撥一千名或二千名令大將軍岳鍾琪酌量調撥。京營副將張存孝著加總兵銜馳驛前往肅州聽大將軍委署。統理寧夏將軍印務著刑部侍郎常賚署理。寧夏兵丁著預備一千名俟有調撥之處著副都統卓鼎統領前往。此各路所派弁兵及統領之員俱聽大將軍岳鍾琪調度節制。其辦理軍需署肅州總兵印務馬會伯亦聽大將軍派委。張存孝著賞內庫銀二千兩。僧保張正文卓鼎王緒級各賞銀一千兩。其調撥西安涼州滿洲及固原

提標涼州鎮標各官弁照例賞給二年俸銀。馬兵每名賞銀三十兩。步兵每名賞銀二十兩。寧夏官兵若有調撥之處亦照例賞給。諭戶部今歲山東被水之州縣朕心軫念殷切已令地方有司加意撫綏又特遣大臣等按戶查賑並給以修葺室廬之資其成災州縣之地丁錢糧及漕糧並行豁免欲使閭閻厚霑恩澤咸登衽席也。頃又思該省既有被災之州縣則本地所產之米較少於平時其不成災州縣應有交官漕糧若此時仍照舊徵收則米穀之存於民間者較少且恐因此而致穀價稍昂未免輸將竭蹶但查漕糧向無豁免之例今年之暫免徵收者出於朕之特恩至不成災之州縣尤難越格蠲除今再四思維著將東省不成災之州縣今歲應徵之漕糧停其徵收俾民間多留穀石則民力自覺寬餘俟明歲收成之後令百姓照數交官此項亦不必運送京師即存貯本省補完

今歲散賑之倉穀如此庶於地方大有裨益著即遵諭行○又諭朕查陝西臨洮府屬之保安堡番民歸化多年按照田畝起科共額徵糧八百一十五石五斗因該堡向日止設番兵一百二十名即以應納之額糧抵作應支之兵食伊等知種地而不完賦知充伍而不領糧相沿已久嗣因番兵差操未便於是另募內地民兵二百名以備防汛即將額徵之番糧充作兵丁之月餉其舊設番兵悉行開除惟是保安一堡與新附上下龍布阿步喇等番族界址相接新附番族俱按戶科糧每戶止納青稞一斗而保安則按田起科以不及千戶之番民歲徵糧八百餘石未免多寡懸殊非朕一視同仁之意著將保安堡番糧亦照新附番民之例每戶納糧一斗徵收在倉留爲積貯其現募之兵丁二百名所需糧料俱照例給與折色以示朕加恩番民之至意○擢工部郎中喀爾吉善爲兵部額外

侍郎○戊午諭大學士等固原甘涼等處兵丁有調撥派遣之用沿邊地方所關緊要著大將軍岳鍾琪署總督查郎阿作速行令各該提鎮於固原涼州甘州寧夏西寧等處人民內挑選漢仗勇健弓馬嫺習者招募充補兵額其衝要之處於原額之外各添設數百名以備調遣○又諭噶斯地方現有滿洲及歸化城兵丁五百名格默爾等帶領防守其從前派出之青海兵丁一千五百名亦著前往令格默爾等分派駐劄於額爾貢木柴旦木等處其扎薩克之官兵著移駐額駙阿寶駐牧相近之處聽阿寶管轄如有準噶爾信息力能進剿著阿寶帶領前進儻力稍不足即著進邊協同綠旗官兵防守○又諭范時捷著署理陝西固原提督即速來京請訓馳驛前往直隸古北口提督印務著鑾儀使路振揚前往署理福建陸路提督石雲倬廣東潮州總兵馬紀勲著前往陝西肅州到大將

軍岳鍾琪處有辦理之事。福建陸路提督印務著福建南澳總兵張起雲署理。南澳總兵印務著福建金門總兵康陵署理。○又諭江寧將軍鄂彌達在滿洲駐防兵丁內揀選一千名令副都統阿克山帶領前往西安駐防。再著副都御史二格由京師前往統領之。此派出兵丁著該督撫動支公用銀每人賞給三十兩。其應派官員著鄂彌達酌量派出。每員各賞給一年俸銀。於司庫動用銀兩支給。二格著賞內庫銀三千兩。阿克山著該省督撫於公用銀兩內各行寬裕幫給。再撥河南滿洲駐防兵五百名。著副都統職銜城守尉白清格帶領前往西安駐防。撥山西太原滿洲駐防兵三百名。著城守尉覺羅察庫帶領前往寧夏駐防。此二省派出官員每人各賞給一年俸銀。其兵丁各賞給銀三十兩。於司庫支給官員等照例給與馬匹。兵丁等於每人給三馬之外酌量增給。其河南城守尉印

務著總督田文鏡兼管。另派叅領一員轄理兵丁。太原城守尉印務著巡撫石麟兼管。白清格察庫起行。該督撫各行寬裕幫給。○陝西安西總兵官潘之善請假回籍調病。允之。○己未。孝莊文皇后忌辰。遣官祭昭西陵。○四川巡撫憲德疏報建昌鎮寧越營所屬番民里五呷等二百三十二戶向化歸誠。認糧納穀。下部知之。○辛酉。諭大學士等據查郎阿奏報肅州存營馬兵祇三百名。守兵祇四百名。協防之兵更不可少。已飛咨都統鄂善於涼州駐防滿洲兵內派兵五百名。遴委協理一員統領。星赴肅州駐劄。再甘涼提鎮二標馬步兵丁除原派出兵并見調應援外存營兵丁亦有汛防之責。如或另有調遣不便再於二標派撥等語。查郎阿於涼州駐防滿洲兵丁僅撥五百名。著想因未見朕另撥西安駐防滿洲兵丁一千名之旨。所以

不敢全撥應仍遵前旨令哈爾吉鄂善作速帶領兵丁前往肅州其涼州綠旗兵丁俟王緒級到後方行帶往此時諒未起程今或仍可將涼州前派之兵令王緒級帶領往肅或於查郎阿調甘待撥之寧夏兵丁內令王緒級帶領一千名往肅著大將軍岳鍾琪署督查郎阿酌商妥辦至查郎阿所奏摘撥馬匹陝甘各處營馬雖有一萬八千餘匹可供摘撥然營馬亦屬緊要著將上駟院之馬一千七百匹解送至西安交與巡撫武格分發喂養其摘撥四省營馬與採買之馬著岳鍾琪查郎阿先酌定應交與何處收牧即速行文知會各省文到之日再行解送至所指之處交收再查郎阿奏請西寧糧米撥運肅州一條西寧地方實關緊要存貯米粟不可輕動可令查郎阿知之將爾等所議馬匹糧運一摺查郎阿三摺俱錄寄大將軍岳鍾琪令其斟酌而行將此傳諭大將軍岳鍾琪總督查

郎阿知之○壬戌諭內閣皇五子致祭闕里文廟典禮告成回京奏稱恭謁孔林周視規制見享堂牆垣間有年久傾圮之處朕尊崇

先師夙夜罔斁今廟貌已經鼎新林園允宜修葺著欽天監選員前往會同衍聖公孔傳鐸相度方位宜於何時營治詳慎定議屆期朕命大臣前赴曲阜與衍聖公孔傳鐸協同敬謹修理務令崇閣堅固光垂永久以昭朕尊禮

先師之至意○諭大學士等準噶爾乘我不意傾其賊衆盜趕馬駝狡獪兇惡罪無可赦但西路所存駝馬不無疲乏是從前所議直搗伊里之計尚非萬全之道朕意欲於西路巴爾庫爾北路之卡倫外各築一城以重兵駐劄時出遊兵以掩擊其衆擒擄其人畜賊兵必撤其遊牧之所遠行藏退我當更進數百里擇地築城開墾屯種以資軍食駝馬牛

羊。無事牧放。有事則盡收入城。賊衆既無所獲。我軍一出。可以襲取其輜重。且賊必不敢踰我軍駐劄之城而東矣。著岳鍾琪詳悉定議。北路傅爾丹處。亦詳細密商之。○順天府進春。○癸亥。歲暮。祫祭。

太廟。遣裕親王廣祿行禮。○遣官祭

永陵。

福陵。

昭陵。

昭西陵。

孝陵。

孝東陵。

景陵。○遣官祭太歲之神。○甲子。諭大學士等。

自有軍務以來。喀爾喀等。甚爲出力。來歲大兵進剿之時。所有派在卡倫預備之二千名。喀爾喀兵丁。不必前往。俾其得以照管牲牧。著派出內扎薩克之兵二千名。前往卡倫駐劄。令科爾沁郡王羅卜臧喇錫翁牛特貝子

羅卜臧教漢公羅卜藏總統管理。此所派出之官兵。照例加與恩賞。○北路大將軍傅爾丹等。遵旨議奏。臣等閱看紀成斌奏摺。準噶爾賊人或分兵來犯。阿濟畢濟卡倫震動。喀爾喀公通摩克輝特公巴濟之遊牧。亦未可定。臣行文副將軍巴賽等商酌。挑選精兵二千名。令前鋒統領丁壽管轄。帶領副都統馬爾齊拉錫等。會同庫布可爾地方駐劄之察哈爾喀爾喀兵丁一千三百名。前往伊可斯腦兒地方附近處駐劄。以防護阿濟畢濟卡倫等處。并令王格勒克顏木聘爾公通摩克達錫達爾扎等。領兵一千名。前往丁壽處協同駐劄。再令副都統阿三公達福。領兵二千名。在庫布可爾地方駐劄。以爲應援。奏入。報聞。○旌表八旗節婦滿洲吉善妻董阿氏等八十二人。蒙古八格妻傅查氏等十人。漢軍佟仲典妻彭氏等二十二人。直隸各省節婦李錫予妻胡氏等五百五十八人。貞女吳氏

等二十二。人孝子趙萬全一人。孝婦朱氏一人。各給銀建坊如例。○是歲人丁戶口二千五百四十八萬四百九十八。又永不加賦。滋生人丁八十五萬一千九百五十九。田地山蕩畦地八百七十八萬一千七百六十頃十七畝有奇。徵銀二千九百七十八萬六千八百六兩有奇。米豆麥四百七十一萬八千六百九十五石有奇。草四百九十九萬六千七百三十二萬六千七百十九引。行鹽五百一十四萬九千一百十五引。徵課銀三百八十三萬八千四百十七兩有奇。鑄錢七萬五千七百八十六萬五千有奇。

大清世宗敬天昌運建中表正文武英明寬仁信毅大孝至誠憲皇帝實錄卷之一百一

大清世宗敬天昌運建中表正文武英明寬仁
信毅大孝至誠憲皇帝實錄卷之一百二

監修總裁官光祿大夫經筵講官太僕議政大臣保和殿大學士兼兵部尚書總理兵部事務三十四十五級臣鄂爾泰

總裁官光祿大夫經筵講官起居注太保保和殿大學士兼戶部尚書仍兼吏部尚書翰林院掌院

事三十四加十三級臣張廷玉光祿大夫經筵講官起居注太保議政大臣武英殿大學士兼工部尚書仍兼管

翰林院掌院事加二級臣福敏光祿大夫經筵講官太子太保保和殿大學士兼禮部尚書加六級臣徐本光祿大夫

經筵講官議政大臣協辦內閣大學士事務禮部尚書仍兼吏部尚書內務府事務三十四加六級臣

敕修

雍正九年辛亥春正月乙丑朔

上於宮中拜

神畢御殿王以下文武各官及外藩使臣等上
表朝賀停止筵宴○朝鮮國王李昞遣陪臣
李撓等表賀冬至元旦

萬壽節及進歲貢禮物賞賚如例○戊辰諭內
閣朕思惠養黎元之道莫先於除賦蠲租使
萬姓均霑渥澤陝西甘肅二省經理軍需數
年凡米糧芻牧車馬牲畜之類皆動支公帑
備辦一絲一粟不使擾民然朕每念地方既

有軍務縱不取辦於民財未嘗不資藉於民
力而陝甘二省之民人踴躍趨事甚為可嘉
年來已屢降蠲賦之旨茲特再沛恩膏將雍
正九年西安所屬額徵地丁銀蠲免十分之
三甘肅所屬額徵地丁銀全行蠲免該督撫
等可轉飭有司敬謹奉行務令閭閻均霑實
惠○以湖廣提督兼理陝西西寧西大通總
兵官事馮允中專管西寧總兵官印務正紅
旗漢軍副都統管承澤署陝西西大通總兵
官○己巳諭大學士等直隸古北口宣化鎮
及督標兵丁內著總督唐執玉會同提督路
振揚揀選馬兵一千名派委官弁領赴西安
山西太原大同兩鎮標營兵丁內著巡撫石
麟會同該鎮揀選馬兵一千五百名派委官
弁領赴甘州河南南陽河北兩鎮標營兵丁
內著總督田文鏡會同該鎮揀選馬兵一千
名派委官弁領赴西安並聽大將軍岳鍾琪
署總督查郎阿調遣再著湖廣總督邁柱將

附近陝西之標營兵丁預選二千名聽候調撥此所派弁員俱著賞給一年俸銀再令該督撫等寬裕幫給兵丁各賞銀三十兩給與兩個月行糧月餉馬三匹其派出官弁員缺該督撫等酌量委署兵丁額缺即行召募補足併行令岳鍾琪查郎阿知之○庚午命工部左侍郎馬爾泰協辦西安軍務正紅旗滿洲都統德成協辦青海噶斯軍務○副都統達鼐摺奏噶斯卡倫見被賊圍臣將關防交與鼐滿岱竝調取西寧綠旗兵三百名防範番子臣親率兵出邊往援柴旦木地方若賊人敗遁即領兵追襲得旨達鼐領兵前往應援格默爾等亦是但奏稱追襲甚屬孟浪巴爾庫爾之兵原爲搗賊人巢穴而設噶斯之兵乃爲駐防而設若來犯噶斯之賊兵無多勢均力敵則即行勦殺儻以勁力擾動青海則噶斯隘口屬無用之地即撤兵退至近邊形勝之處會集青海之兵駐劄防守儻賊勢

頗重即領兵退入邊內爾從前曾將西寧之兵調撥五百名今又爲番人調兵三百如果番人有事爾之三百兵丁何能濟乎兵力宜聚而不宜分頻頻分調是何計策防守邊圉較防守青海尤爲急務目今只宜堅守切不可急遽躁妄○辛未

世祖章皇帝忌辰遣官祭

孝陵○諭內閣陝西甘肅地方辦理軍需須用年力精壯才可辦事者命往以備差委見在分部學習人員內著該堂官保送其候補候選及降革官員無錢糧未清之案者漢軍人員著該旗大臣揀選保送滿漢大臣等若有深知之人不論漢軍漢人亦准其舉出若該員身有掛欠處分果係才能出衆亦准該旗及滿漢大臣等保送請旨此差往人員著交與巡撫武格許容協辦軍需侍郎馬爾泰酌量差遣委用將來辦事若好著該督撫等奏聞加恩議敘○又諭喀喇沁三旗土默特二

旗著派兵一千名。於二月間起程至張家口外。形勝地方居住。令貝子僧滾扎卜塔布囊羅布臧策布登統領前往預備軍營調遣。歸化城兵丁著派一千名令都統良敦統領。於二月間前赴涼州。聽大將軍調遣。其恩賞銀兩糧餉等項俱照例給發。○命給北路副將軍查弼納昭武將軍印馳驛前赴軍營。○癸酉諭大學士等甘涼二鎮皆係沿邊重地。必須兵力富足。方可內爲保障。外供調撥。著提督宋可進於涼州召募兵丁二千名。甘州召募三千名。如甘州本地不能足三千之數。可於寧夏召募補足。又西寧一鎮爲青海門戶。所關綦重。亦著召募二千名。此召募七千兵丁俱照例馬六步四支給錢糧。○又諭奉天兵一千五百名著副都統額爾勤統領。黑龍江兵二千名著副都統王常索倫總管。沙津統領。寧古塔兵一千五百名著副都統烏查拉統領。察哈爾兵一千名著總管達什統領。

前往北路軍營應賞銀兩寬裕賞給。其派出兵丁六千名著各該處將軍副都統等照數將餘丁充補。○寧遠大將軍岳鍾琪遵旨議奏。準噶爾逆賊犯界。所有添撥官兵事宜。臣詳加籌畫。派出固原提標兵二千名。委令慶陽協副將于義統領。陝西督標兵八百名。撫標兵二百名。檄調山西蒲州協副將沈力學統領。俱令隨臣出口。至安西沙州。地處極邊。其鎮協標營兵丁派調三千名。前赴巴爾庫爾。則二處城守單弱。除督臣已調撥甘提標兵一千名外。臣又派甘州兵一千名。分撥安西沙州駐劄。但甘州地方緊要。留汛之兵不敷守禦。而西寧爲青海門戶。亦宜防範。臣會同西安將軍秦布派出西安八旗兵丁三千名。令副都統蘇穆爾濟統領一千名。前往西寧駐劄。再派一千名隨後赴甘州駐劄。其餘一千名接續起程。暫駐涼州。以候調遣。但西安領兵大員除蘇穆爾濟見今派往西寧外。

祇餘副都統二員留辦公務不便更行派委
伏乞欽點諳練軍機大臣二員從京城馳赴
西安以便統領兵丁分赴甘涼得旨朕前調
撥涼州駐防赴肅之後即著於西安滿洲兵
丁內挑選一千名交與副都統僧保張正文
帶領前往涼州駐劄又念西寧爲青海門戶
特命副都御史二格馳赴西安帶領綠旗兵
一千名滿洲兵一百名前赴西寧駐防今岳
鍾琪將滿洲兵一千名撥往西寧殊可不
著仍遵前旨併傳諭武格馬爾泰俟二格到
日即於西安綠旗兵內或督撫兩標或城守
之兵共揀選一千名再會同秦布挑選滿洲
兵一百名令二格即行帶領前往西寧駐劄
其蘇穆爾濟帶領之滿洲兵一千名即令帶
往涼州俟僧保到涼之日蘇穆爾濟仍回西
安其所撥駐劄甘州之滿洲兵一千名著張
正文帶領前往聽候調遣至撥往涼州之兵
不必起身前去仍在西安候旨西安副都統

員缺著署副都統拉薩立馳驛前往署理
寧遠大將軍岳鍾琪又遵旨議奏甘州固原
肅州兵丁各派撥出口甘肅地處邊徼留汛
之兵不容單薄應各召募兵一千名俱以馬
六步四補入西安爲省會之區督撫兩標兵
丁派調出師所餘無幾應共召募步戰守兵
一千五百名至固原標屬悉係內地無庸募
補得旨朕屢降諭旨以甘涼肅西寧等處皆
沿邊要鎮必得重兵駐防既可彈鎮邊陲又
可分撥策應今岳鍾琪僅於甘涼二處議募
一千名想未接到朕之諭旨又於見今巴爾
庫爾情形未能確知是以尚存輕事之意見
固原標屬雖係內地但提標之兵已撥二千
名則自應召募補額西安督撫標之兵既行
召募則自當仍遵原制以馬六步四充補不
得悉補步兵可將甘涼固原西寧召募之事
傳諭范時捷宋可進令其辦理其西安督撫
兩標應募之兵著岳鍾琪查即阿武格馬爾

奏。仍照馬六步四之例。速行募足二千名。以充行伍。○甲戌孟春享

太廟。

上親詣行禮。遣官祭太歲之神。○乙亥。諭大學士等。準噶爾賊人乘我西路軍營不備。傾其醜類。犯我卡倫。盜趕駝馬。總兵官樊廷等領兵二千轉戰七晝夜。擊殺賊衆。又將盜去駝馬牲畜奪回。樊廷忠勇冠軍。頗得勝算。總兵張元佐。副都統綽般。台吉哀布三等。台吉定匝拉錫。領兵應援奮力夾攻。大敗賊人。副將張朝良。以孤軍被困。而能全師出圍。凡此將弁。皆見義能勇。致身効力。均屬可嘉。樊廷著賞銀一萬兩。給一等阿達哈哈番。張朝良治大雄俱著賞銀五千兩。給拜他喇布勒哈番。張元佐。綽般俱著賞銀三千兩。給拖沙喇哈番。台吉哀布著封公爵。三等台吉定匝拉錫著授爲扎薩克一等台吉。其餘有功將弁俱著大將軍岳鍾琪查明奏聞。加恩從優議

敘。再著署內務府總管鄂善。馳驛前往肅州。於軍需銀兩內動支十萬兩。令大將軍將此番出征弁兵等。查明戰功等第。按名賞給。至陣亡將弁兵丁。分晰查明造冊具奏。從優賞卹。該督撫動用正項錢糧。於安西地方建立忠勇祠。將陣亡之將士等。設造牌位。致祭俾義烈將士永遠流芳。以示朕崇獎忠勲之至意。○又諭準噶爾賊衆犯我西路。濶舍圖卡倫。今雖敗遁。或由噶斯一路遣兵擾亂青海地方。劫掠馬駝羊畜。亦未可定。二等侍衛殷扎納著加副都統銜。前往青海傳諭各扎薩克。於左右翼揀選兵丁一萬名。令王額爾得尼厄爾克托克托奈會同王益蘇克汪扎爾公阿拉布坦扎穆蘇。公阿喇布坦統領在青海緊要適中之地駐劄。派出之官員照伊品級賞給半年俸銀。兵丁每名賞銀五兩。再著內大臣克什圖前往青海與王額爾得尼厄爾克托克托奈等一同管理。克什圖所管阿

爾泰一路臺站事務著上都打布孫腦兒總管五十四張家口管站郎中倫岱辦理○又諭前令查弼納與順承郡王錫保同辦軍營之事今大將軍傅爾丹既不領兵前赴西路會剿查弼納仍以副將軍協同傅爾丹辦理軍務其昭武將軍印信查弼納攜至軍營交與傅爾丹收貯將來查弼納有分路帶兵之時即用此印○又諭西北兩路或尚有應撥兵丁之處朕思歸化城乃通行兩路之地著理藩院傳諭四十九旗扎薩克等按旗均算派出精兵五千名由各該遊牧處於二三月間前後起程沿途牧放馬駝至歸化城會齊擇形勝地方駐劄以備調遣其需用口糧於歸化城倉支領月餉於張家口同知存庫銀內動支戶部核算尋議科爾沁等十旗應派兵一千八百一十五名烏朱穆泰等十旗派兵五百六十九名翁牛特等十一旗派兵一千三百二十四名四子部落等六旗派兵二

百三十二名鄂爾多斯等六旗派兵一千六十名共兵五千名各派協理台吉管旗章京副管旗章京叅領佐領驍騎校等員令蘇尼特王垂際功蘇隆統領巴林王桑里達扎賴忒貝子特古斯協理再於歸化城內派兵一千名叅領二員佐領四員驍騎校四員令副都統塔爾馬善統領其銀米等項照例支給從之○丁丑以鑲白旗漢軍副都統補熙署直隸天津總兵官○命鑲藍旗漢軍副都統范時繹往陝西辦理軍需事務○辛巳祈穀於

上帝

上親詣行禮○以左都御史史貽直協理吏部侍郎事○雲南提督張耀祖緣事革職陞貴州安籠總兵官哈元生爲雲南提督雲南鎮雄叅將韓勲爲貴州安籠總兵官雲南督標中軍副將徐成貞爲雲南昭通總兵官廣西新泰副將董芳爲雲南臨元總兵官○癸未

諭內閣劉聲芳在太醫院効力有年屢加特恩用至戶部侍郎伊於部務茫無知識上年夏秋間朕體偶爾違和伊並不用心調治推諉輕忽居心巧詐深負朕恩著革去戶部侍郎仍在太醫院効力贖罪行走其從前所賞伊子廕生及舉人俱著革退戶部侍郎員缺著左都御史史貽直兼理冀棟朕聞其通知醫理加恩用至副都御史乃伊識見昏庸遇事推諉著革去副都御史補授御醫之缺効力行走○甘肅巡撫許容疏言甘省地方員缺衝要居多且辦理軍需俱須幹員請於直隸山東河南山西四省見任同知通判州縣內令該督撫各揀選才具優長辦事勤敏者五員咨送來甘委辦差使遇有要缺即行題補得旨著照所請行山東見有賑恤之事正須幹員經理不必揀選咨送○甲申諭大學士等準噶爾賊衆侵犯西路汛界盜竊駝馬乘我不備事起倉猝其力戰克敵者甚屬可

嘉而授命疆場者尤爲可憫前已降旨令建忠勇祠春秋祭享以表忠節矣茲應賞給世職令其子孫承襲永誌恩施副將徐宗仁著給與拜他喇布勒哈番守備劉貴才劉芳雨李國勲俱著給與拖沙喇哈番其應得卹典仍著該部察例具奏千總王大謨徐維新外委把總方正劉世勲俱著該部從優議卹此外如有應加恩卹之弁員俱著大將軍岳鍾瑛查明具奏凡陣亡兵丁於卹賞定例之外俱倍加賞賜其隨役人等有受傷亡故者照兵丁卹賞定例給賞朕今以酒三爵遙酹陣亡將士著署內務府總管鄂善將酒齋往軍營凡陣亡將士每名以羊一隻奠祭宣朕憫惻傷悼至意朕不得已而用兵本期全師克敵不損一人乃爲至願豈必捐軀致命始稱効忠報國乎今此陣亡弁兵朕雖加恩優卹而惻怛不忍之念愈覺難釋於懷著鄂善將朕諭旨徧行宣布令衆知之至所賞賚銀十

萬兩鄂善至軍營時或與大將軍岳鍾琪或與護大將軍印務紀成斌分別將弁兵丁建功出力之等次秉公賞給務使均沾恩賜以示國家酬庸獎勲之令典○命莊親王允祿管理正紅旗滿洲都統事務以鑲紅旗漢軍副都統富昌協理都統事○乙酉諭內閣朕聞洞庭一湖綿亘八百餘里自岳州出湖以君山爲標準一望杳渺橫無涯際而舵桿洲居西湖之中去湖之四岸或百餘里或二百餘里舟行至此儻遇風濤陡作無地停泊亦無從拯救多有傾覆之患昔人曾經創議若於此處建築石臺則狂風巨浪之中商船有挽泊之所實有裨益祇以水中立基工用浩繁事不果行朕以勤求民瘼爲心凡內外遠近地方疏濬修建工程可以利濟羣生者無不樂爲興舉况商賈行旅之往來可以避風波之險而登衽席之安尤事之亟宜舉行者查營田水利衙門有存公銀二十萬兩著解

送楚省交與總督邁柱會同巡撫趙弘恩遴選賢能之員相度估計悉心經理建築石臺以爲行舟避風停泊之所務期修造堅固垂諸永久毋得草率塞責○丙戌諭大學士等此次準噶爾之事出於不備總兵官樊廷等率領弁兵奮勇先登以寡敵衆兵丁中有凍傷手足者有冒犯鋒鏑者此等甚爲可憫著傳諭大將軍岳鍾琪令其各還內地營汛另選兵以代之至將弁等雖與兵丁不同亦當曲爲體恤樊廷爲軍功之首朕欲擢授提督茲令回居任所軍前山永副將張朝良降旨陞爲重慶總兵官其印務暫令他員署理凡此禦賊有功之將弁自總兵以至千把朕意俱遴員代其職任令暫回內地本任以息勞肩若云領兵大員一時難得其人朕已簡選石雲倬馬紀勲王緒級張存孝等數人命往軍前皆可充總兵之選况此後進取之策正須從容經理目前並非進剿之時伊等暫時

休息將來大舉再赴戎行。未嘗不可也。著岳鍾琪悉心妥議密奏以聞。樊廷統兵在外遣人報知大營。而外委把總馬能不畏賊鋒。閱歷險阻。以通音信。著以守備用。賞銀五百兩。其同馬能報信之二人及越山赴營之弁兵並著查明從優敘賞。○以奉天復州城守尉珠海署理奉天熊岳副都統事務。○丁亥諭內閣山東地方上年遭值水患窮民乏食朕心軫念屢頒諭旨并遣大臣賜粟賜金加恩賑濟不忍使一夫不獲其所又念該省上年禾稼歉收則今春青黃不接之時米價必致騰貴特命截留鄰省漕糧三十五萬石撥運奉天米穀二十萬石減價平糶以惠濟閭閻朕之爲東省民食計者亦備極籌畫矣細思上年濟兗東三府之被水較平時爲甚今發粟平糶固不慮價值之高昂而赤貧之民仍苦於糶買之無力且聞被水之後有餬口轉徙四方者今各省漸次資送回籍此等民人

回籍之後無以爲資勢必至於失業深屬可憫著侍郎劉於義牧可登巡撫岳溶確查實在窮民無力糶買穀石者再給兩月口糧以恤其困苦資其耕作查濟兗東三府尚有存倉穀四十萬石即將此爲散賑之需儻不敷用再將截留之漕米以二十萬石平糶以十五萬石增添散賑著該侍郎等遴選賢員作速分途辦理使黎民均沾實惠并傳宣朕旨曉諭百姓等受朕格外之恩當乘此春和努力耕種勿因失業而作邪僻之事勿因困厄而懷怨尤之心果能祇遵朕訓則豫順之氣自能感召天和賜以安全之福思之勉之○又諭據紀成斌奏報北山之賊已退而鄂龍吉一帶尚有賊營駐劄我軍貯糧之處宜籌畫萬全圖呼魯克收糧之筆帖式奇書以二百餘人竭力衛糧捍賊賊衆圍困數日能固守糧營保全軍實深屬可嘉著賞與拖沙喇哈番再賞銀

五百兩。其同在圖呼魯克之弁兵著岳鍾琪查郎阿查明到日從優敘賞。授鎮國公諾音托和女爲鄉君。塔德玉秩四品。戊子授理親王弘皙第六妹爲郡主。塔齊旺多爾濟爲和碩額駙第七妹爲縣主。塔齊旺多爾濟爲多羅額駙。封喀喇沁塔布囊羅布臧策布登爲輔國公。己丑賜大學士張廷玉贊猷碩輔。蔣廷錫萬幾賢輔匾額。庚寅諭內閣。上年江南邳宿等十八州縣遭值水患窮民乏食。朕心深切軫念。特命大臣會同該督撫動帑發粟撫綏賑恤。增給口糧之數。加添散賑之期。並賞給修葺室廬之費。務使被水黎民咸登衽席。今據該督撫等奏報正月十五日已滿散賑之期。朕思江南麥熟在四月之杪。其間青黃不接之時。尚應爲之籌畫。雖本省鄰境皆有平糶之米穀。而赤貧之民無資糴買者。仍復艱於餬口。深可憫惻。查揚州鹽義倉有積穀數十萬石。原備賑濟之用。著

動支二十餘萬石加賑窮民。四十日口糧。以濟其困乏。資其耕作。該督撫會同欽差侍郎彭維新等悉心奉行。並曉諭百姓乘此春和盡力南畝。勿再游手失業。有負朕痼瘼軫恤之至意。辛卯轉吏部右侍郎彭維新爲左侍郎。調禮部左侍郎兼內閣學士行走吳士玉爲吏部右侍郎。兵部右侍郎胡煦爲禮部左侍郎。陞內閣學士任蘭枝爲兵部右侍郎。署直隸總督唐執玉疏報保定冀州等三府州開墾雍正八年分田地八十一頃有奇。下部知之。

大清世宗敬天昌運建中表正文武英明寬仁
信毅大孝至誠憲皇帝實錄卷之一百二

大清世宗敬天昌運建中表正文武英明寬仁
信毅大孝至誠憲皇帝實錄卷之一百三

監修總裁官光祿大夫經筵講官太僕議政大臣內閣大學士兼兵部尚書總理事務三寶加十五級日那爾泰

總裁官光祿大夫經筵日講官起居注太僕卿和碩大學士兼戶部尚書內務府總辦尚書翰林院掌院

事王等信加十三級直張廷玉光祿大夫經筵日講官起居注太僕議政大臣武英殿大學士兼工部尚書仍兼管

翰林院掌院事加二級日福敏光祿大夫經筵講官太子太僕東閣大學士兼禮部尚書加六級臣徐本光祿大夫

經筵講官張次仲內閣大學士事務禮部尚書仍兼管太常寺鴻臚寺事王三泰等奉

敕修

雍正九年辛亥二月甲午朔○乙未諭內閣

實錄卷一百三

山東濟南兗州東昌三府從前積穀甚多因
去年水災之後朕特命大臣動發倉糧賑濟
用穀一百八十餘萬石又念今春二三月間
青黃不接小民粒食維艱再發倉穀二十萬
石截留漕米二十萬石重賑兩月是三府各
州縣存倉穀石俱作賑濟之用雖登萊青三
府尚有存倉之穀百餘萬石而轉運甚難與
濟兗東三府無益況天時不可預必自宜早
為籌畫積貯之計查去歲直隸收成頗豐目

今米價亦平。或從直隸採買米石令回空糧船運至東省。或將南漕截留數十萬石分貯水次州縣。爾等詳悉查議。再德州現有駐防兵丁。應否於德州照天津建倉之例。起建倉廩。以備每年截留存貯。儻河南山東有需用米石之時。則一水可通。似屬有益。爾等一并確議具奏。尋議通倉現存新收粟米十八萬石。請動撥十五萬石。再支戶部庫銀往通州天津等處。照時價採買粟米五萬石。分交回

空糧船帶往山東。暫於德州臨清二處收貯。並著該督撫將二處倉廩酌量添蓋。再令奉天將軍等動撥米二十萬石。於五月內運至天津大沽口。天津總兵等接運至德州交與山東巡撫酌量分撥。其東昌以下近水州縣應截留湖廣江西漕糧三十萬石。轉運存貯。俟今年秋收後將存貯之米或全行易穀或一半易穀令該撫酌量辦理。其應補穀八十萬石於壬子癸丑兩年採買完補從之。○實

授喀爾吉善爲兵部左侍郎○以正藍旗前鋒叅領滿丕署鑲白旗滿洲副都統○多羅愉郡王允禩薨輟朝二日賜祭二次造墳立碑謚曰恪○丁酉遣大學士尹秦祭

先師孔子○以鑲藍旗護軍統領色爾璧署
正藍旗蒙古都統仍兼署左翼前鋒統領事

大社

大稷

上親詣行禮○諭大學士等肅州甘州涼州移駐滿洲兵四千名。又涼州有歸化城兵一千名。尚無統領之員。寧夏滿洲兵現今不過六百名。著戶部古侍郎傳泰前往署理。寧夏將軍印務。其肅甘涼等處兵丁。著常賚前往。給以鎮安將軍印信。令其統領。仍聽大將軍岳鍾琪調遣○己亥。諭大學士等。常賚統領五千兵丁。或應會駐肅州。或應會駐安西。或仍暫分駐於肅甘涼等處。爾等行文知照。各該

處外。再傳諭大將軍岳鍾琪。署總督查郎阿。此五千兵丁。如有調遣。俾其自爲一隊。令常賚統領。不可零星分派。與綠旗兵丁混雜一處。恐滿漢彼此推諉。轉有未便。留此大隊。爲應援夾攻之師。甚爲有益。○陞甘肅布政使孔毓璞爲都察院左副都御史。仍留肅州辦理軍務。○戶部議覆湖廣總督邁柱疏言。湖南各營兵米。向例俱以六錢折給。今永順保靖桑植三營地方。係新闢苗疆。產米既少。商販亦稀。價值昂貴。若照內地六錢折給。兵丁日食不敷。請自雍正九年爲始。將永順營兵米以一兩折給。保靖桑植二營。以八錢折給。應如所請。從之。○庾子。諭大學士等。杭奕祿班第。衆佛保。著來京。○諭理藩院。市魯克巴部落人等。互相仇殺。貝子頗羅鼐遣使解和。宣朕威德。甚屬可嘉。著封爲貝勒。伊子一等台吉珠爾嘛特冊登。屢次領兵効力邊疆。著封爲輔國公。○陞湖南岳常道溫而遜爲山

西按察使司按察使。○吏部議覆福建總督劉世明等條奏臺灣事宜。一臺灣府南面向隸鳳山。北面向隸諸羅管轄者。俱應改歸臺灣縣管轄。一臺灣縣羅漢門地方緊要。請以臺灣縣縣丞移駐。與汛弁互相防查。一鳳山縣萬丹地方。請添設縣丞一員。管轄淡水枋寮口等處。其原設淡水巡檢移駐大崑麓。一諸羅縣笨港地方烟戶繁多。姦良莫辨。請添設縣丞一員。令其查拏巡緝。其原設佳里興巡檢移駐鹽水港。一彰化縣距大甲溪一百五六十里。溪北更爲遼遠。一切錢糧命盜等項。悉令赴縣。殊屬不便。請將大甲溪以北地方歸淡水同知就近管理。均應如所請。從之。○壬寅。吏部議覆廣東總督郝玉麟疏言。廣州肇慶二府屬。地處低窪。沿河田禾。惟賴圍基堅固。俾免水患。始獲有秋。向例屬縣承管理。但縣丞駐劄邑中。潦水驟發。猝難兼顧。惟巡檢所轄地方與民最親。偶遇潦漲圍基危

險即可督率鄉民救護。南海三水高要三縣事繁。請以縣丞爲督理。巡檢爲專管。高明四會兩縣事簡。請以知縣爲督理。巡檢爲專管。每年按時督率修築。凡遇潦水漲發。加意防護。儻有貽誤。入於大計內分別核叅。應如所請。從之。○禮部議覆江西巡撫謝旻疏言。江西棚民內文武童生。入籍在二十年以上。有田廬墳墓者。應准其各在居住之州縣一體考試。其入學額數。童生數滿五十名者。請於額外另取一名。數滿百名者。另取二名。數滿二百名者。另取三名。其最多者。亦以取進四名爲率。其不滿五十名者。應令與本籍童生一體憑文考取。應如所請。從之。○免直隸天津大城等三十四州縣雍正八年分水災額賦有差。○癸卯護理寧遠大將軍印務紀成斌奏言。逆夷準噶爾駐劄鄂龍吉之賊兵。於正月十一十二等日。漸次退去。拏獲被擄逃回之鄂爾多斯餘丁。詢知賊已遠遁。臣復差

委官弁各路偵探。俱無賊兵踪跡。隨於木城噶順鏡兒泉察罕哈麻爾陶賴搜濟一帶各設卡倫。安置弁兵。輪流更換。以資哨望。再查我軍十二營盤。自東至西。首尾驟難相應。臣於各標營兵內。除損傷有病之兵。現在調養外。挑得精兵一萬一千餘名。派出九千名。令總兵官張元佐樊廷顏清如曹勳分領防禦東西中三處。聯絡應援。得旨。紀成斌但言挑出精兵一萬一千餘名。其固守營盤若干。并安西肅州之兵六千人。作何分駐之處。並未詳晰。且牧放官羊之鄂爾多斯餘丁。被擄逃回。則各廠牧放之兵。亦必有被賊擄去者。其陣亡若干。被創若干。皆未言及。著傳諭大將軍岳鍾琪。逐一查明。據實密奏。如戰陣傷損之兵。內有殘廢者。照例給與半餉。其被擄逃回之鄂爾多斯餘丁。著送來京。有詢問之處。準噶爾降夷托克托和。及所獲賊夷布庫。著一併解京。○甲辰。

孝康章皇后忌辰遣官祭

孝陵○移福建臺灣淡水同知駐竹塹添設臺灣貓霧揀鹿仔港竹塹八里坌大社四處巡檢各一員從福建總督劉世明請也○乙巳諭大學士等駐藏之官弁兵丁等已經數年未曾更換朕心深爲軫念查從前派往之兵係陝西一千名四川一千名今陝西兵丁現有征勦準噶爾之事難以派往西藏四川新募充伍之兵甚多著提督黃廷桂巡撫憲德酌量於新舊兵丁內揀選二千名前往西藏將從前駐藏之兵換回其弁員等自總兵以至千把亦應更換若大員內一時不得職銜相當之人可揀選幹員加銜委署前往○諭貝勒頗羅鼐朕爲統一天下之主凡四海生靈一視同仁無分中外乃者附近帕爾城之布魯克巴地方人等起釁構兵互相仇殺朕聞之深爲不忍軫念於懷爾能仰體朕意遣使與班禪額爾得尼之使一同前往和說又

遣使宣諭朕之恩德布魯克巴地方人等遂感悟息爭輸誠向化各帶部落敬順無違且請朕施恩訓誨朕甚嘉悅布魯克巴地方人等自茲以往宜各守疆界共相和睦永遵佛教祇奉恩綸如能黽勉力行朕自益加優眷布魯克巴之諾顏林親齊雷喇布集後身喇嘛渣色禮布魯克古迹等著加恩賞賜噶碧東羅布喇嘛率衆先歸尤爲可嘉著從優賞給以示朕懷遠嘉順之至意爾可將此諭旨宣諭布魯克巴地方人等知之○雲貴廣西總督鄂爾泰遵旨查奏烏蒙陣亡殉難文武員弁遊擊劉崑馬秉倫把總周世美等忿激殺賊陣亡司獄陳天錫手刃妻妾隨即自刎通判劉鎮寶知縣蹇枝大教授李焜知事劉懋美巡檢葉徵祚並遇害應分別獎卹遊擊劉崑之妻張氏義不辱賊手刃兩女復同妾吳氏俱自刎及恢復烏蒙搜獲劉崑之子僅三歲并乳母婢僕等五口現在護送至省俟

事定送回原籍行咨四川撫臣加意存恤以爲忠義者勸得旨著該部分別從優賜予卹典遊擊劉崑之妻妾兩女見危授命義烈可嘉著一併從優議卹○丙午吏部議覆廣東巡撫傅泰疏言瓊州府屬之崖州感恩昌化陵水四州縣水土最爲惡毒正雜佐貳各員請援照臺灣教職之例於內地調補三年任滿稱職者以應陞之缺即用應如所請從之○兵部議覆雲貴廣西總督鄂爾泰疏言兩廣交界有礦賊盤踞兩省官員互相推諉以致宵小肆行良民被擾請於潯州南寧等府要害處所添設塘汛竝就近抽撥兵丁召募鄉勇使各相防宇庶汛地各有專責匪類無計潛藏應如所請從之○丁未春分朝日於東郊遣顯親王衍潢行禮○諭大學士等從前阿爾泰兵丁駐劄之時糧運維艱是以廷議海兵每月祇給米一斗併羊價五錢邇年以來羊價漸長所給銀兩不足羊隻之值

月米一斗亦有未敷不免半菽之虞朕心深爲軫念查察罕叟爾每年屯種所獲富有餘貯而運送糧石較前亦易著將現今調撥軍營防守之滿洲兵丁每名月給米二斗四升九合其戍守阿爾泰之滿洲兵丁每名月給米二斗至察哈爾土默特兵丁每名月給米一斗五升以示朕恩恤兵丁之意○陞正白旗內府護軍統領巴圖爲正黃旗滿洲副都統以鑲黃旗叅領吳禮署正白旗滿洲副都統○授輔國公永奇女爲鄉君壻伯殷試秩四品○浙江總督李衛疏言雍正八年夏秋之交淮北山東適有水警而浙省連歲豐收請將浙省永濟鹽義二倉及附近水次各縣存貯米穀內酌撥若干運往彼處平糶秋成買補在淮北需米之處米穀既多價值自平而浙省又得出陳易新彼此均有裨益從之○大計奉天直隸浙江河南山西廣西貴州雲南等省官員卓異官二十八員貪官一員

浮躁官十二員。年老官五十五員。不謹官三十六員。罷軟官十三員。有疾官二十六員。才力不及官三十四員。分別陞賞處分如例。○旌表江南泰州烈婦周德甫妻茆氏。拒姦不污。被刃殞命。給銀建坊。入祠致祭如例。○戊申。免兩淮通泰淮三分司所屬莞瀆等五場。雍正七年分。水災折價銀兩有差。○乙酉。諭大學士等。西藏駐劄弁兵。已降諭旨更換。護軍統領馬喇。內閣學士僧格。在藏年久。朕甚憫念。命正藍旗蒙古副都統青保。大理寺卿苗壽。前往替回。但二人一時回京。新任之人。不能熟悉西藏事宜。著馬喇先回。留僧格協同青保等。再辦事一年。馬喇。僧格。各賞銀一千兩。○陞鑲黃旗叅領查穆素。爲本旗蒙古副都統。調鑲黃旗蒙古副都統宗室滿珠錫禮。爲正紅旗漢軍副都統。○湖北按察使王肅章。緣事革職。陞湖南糧驛道刁承祖。爲湖北按察使。司按察使。○戶部議覆雲貴廣西

總督鄂爾泰疏言。貴州省新設古州鎮營。密邇粵西之柳慶二府。所有歲需兵米若干。請於柳慶每年糴三穀內支給。以粵省之穀。易黔省之銀兩。有所資。但持銀赴粵。亦有未便。應即於粵西額徵餘存銀內支出。作爲協黔兵餉。以給米價。及一切運米雜費。該管官於秋成後。照數買補。還倉。應如所請。從之。○又議覆漕運總督性桂遵旨。議奏漕糧過淮事宜九款。一。幫船到淮。原有津貼飯食之費。嗣後各幫請照例。將銀呈繳給發。不許私相授受。一。各省漕船。有米數丁舵姓名等冊。向來旗丁倩人代造。科派冊費。嗣後請飭行各幫自行繕送。一。漕船抵淮。應隨到隨收。飭吏役不得留難需索。一。總漕出署盤驗米數。短少應行細責。令中軍官約束行杖人役。毋許索詐分文。一。江浙糧艘由鎮江出口。方監梘篷。從前令催漕之員。就便查看。恐藉端需索。嗣後請俟過淮時。漕臣親加點驗。至揚州之三

空河係各省糧艘總匯之所應委廉幹之員前往彈壓。一漕船渡黃如汎地弁員不顧風色水勢混行催趲請照例議處或有疎虞加倍治罪。一漕船渡黃之後至白洋河及臺莊八閘俱係逆流水急必須添僱人夫往往弁兵串同人夫勒索請於重運北上之時將宿遷營遊擊委駐白洋河徐州營副將委駐臺莊八閘稽察約束僅有徇縱一併叅處。一各省應造漕艘務將價料照數給發毋許需索使費如造不合式將監造官叅處至空船南下漕臣逐加查驗諭令歸次速領三修銀兩上緊加修接濟新運如旗丁有以朽腐漕艘撞觸民船借端勒索者將該幫弁丁究處。一漕船出運各衛僉定正副二丁赴次交兌如有革丁衿監等竄身入幫即行拏究運官不行查拏一併究治均應如所請從之。○庚戌吏部議覆四川巡撫憲德疏言川省復設雙流等一十四縣內平武縣所屬之村鎮多有

離縣寬遠應改隸近縣者請將關家村石子村檢石壩紅豆樹等處歸江油縣管轄插鼓坪鄧家渡等處歸石泉縣管轄青蓮壩五郎溝等處歸彰明縣管轄再彰明與龍安府附近并請改隸龍安管轄均應如所請從之。○辛亥

上親耕耤田詣

先農壇致祭畢更服至耕所仍行四推禮畢上御觀耕臺命莊親王允祿裕親王廣祿信郡王德昭行五推禮吏部左侍郎宗室普泰大學士兼理戶部尚書事務蔣廷錫禮部尚書常壽兵部尚書金以坦刑部尚書勵廷儀工部尚書張大有都察院左都御史三泰通政使司通政使留保大理寺卿苗壽行九推禮各以次耕如儀

上御齋宮順天府官員率耆老農夫行禮畢至耕耤所農夫終畝王以下各官行慶賀禮賜茶停止筵宴。○壬子以翰林院檢討張若涵

充日講起居注官○添設湖南六里吉多坪同知一員。經歷一員。排補美隆團寨二處。巡檢各一員。從湖南巡撫趙弘恩請也○癸丑。陞翰林院侍讀學士王蘭生爲內閣學士兼禮部侍郎。仍留安徽學政任。以兵部右侍郎任蘭枝兼內閣學士行走○吏部議覆。江西巡撫謝旻疏言。江省十三府屬。向各有道員兼轄。續經裁缺歸併。現今南昌。撫州。建昌。袁州。瑞州。臨江。廣信。吉安八府。地方遼濶。皆無本管道員。則守令無所稽查。請將南昌。撫州。建昌三府。歸於督糧道袁州。瑞州。臨江三府。歸於鹽驛道廣信一府。歸於饒九南道吉安一府。歸於贛南道。各令就近管轄。應如所請。從之○戶部議覆。四川巡撫憲德疏言。貴州永寧縣。業經歸四川管轄。川省錢糧。現奉蠲免之旨。則永寧縣八年分額徵請一例。蠲免以廣恩施。應如所請。從之○寧遠大將軍岳鍾琪摺奏軍機事宜十六條一。吐魯番地方

饒沃。宜廣爲屯種。一。吐魯番通伊里之路。逆夷出入經由。必須嚴設卡倫。一。準噶爾所屬回子。先宜收撫。一。巴爾庫爾等處。宜多派兵丁。以分戰守。一。襲擊逆夷。使其不安駐牧。一。駐劄吐魯番兵丁之駝馬。宜酌定數目。一。領兵官員。請爲添派。一。牧放馬駝羊隻。應嚴加防範。一。酌添羊隻。以資兵食。一。巴爾庫爾之新城。宜積貯糧石。一。綠旗兵之餘丁。無庸添設。一。車兵之器械。請爲酌增。一。移兵駐劄吐魯番。宜預爲定期。一。屯種之農具籽種。宜預爲辦運。一。吐魯番。巴爾庫爾兩處駐防。宜通聲息。一。進剿兵數。宜預爲酌定。得旨。大將軍岳鍾琪。陳奏軍機十六條。朕詳細披覽。竟無一可採取之處。朕心深爲憂煩。岳鍾琪。以從前輕言長驅直入之說。又爲賊夷盜趕駝馬。既恥且憤。必欲襲擊進剿。勉強踐復前說。若以今日之勢。命伊統率大兵。直搗巢穴。能保其必勝乎。辦奏之事。皆未妥協。大學士等將

朕旨傳諭之○廣西巡撫金鉉題報桂平梧
潯南柳慶恩泗九府鬱林一州開墾雍正七
年分田地八百六十頃有奇下部知之○乙
卯

上幸圓明園○遣官祭

歷代帝王○遣官祭

關聖帝君○諭大學士等陝甘二省年來辦
理軍需雖皆動用正項錢糧民間無絲毫之
費然輸輓糧運伺候差徭不無勞苦朕已降
諭旨加恩獎勉但必得地方大吏仰體朕心
凡料理軍務固不可任其延緩而過於迫急
未免擾民查核錢糧固不可聽其浮銷而過
於苛刻則必致剝民督撫等大員嚴緊一分
則州縣官必於百姓加緊一倍如能寬容一
分則小民必得一分之惠武格馬爾泰二人
急公之心皆切但恐諸事過於苛迫可將朕
旨傳諭凡承辦州縣或於原額之外遲緩無
多而其人之才可用者不妨姑示寬容其

開銷物料脚運之費亦必斟酌時價不可刻
意核減但此旨不可宣露於人恐有不肖之
州縣借此遷延浮冒其漸不可長也○諭管
理旗務大臣等朕因八旗兵丁不甚整齊曾
屢降諭旨命都統等善為訓練俾各兵丁俱
成精銳乃至今尚未整齊此皆都統等未嘗
悉心訓練之所致也著傳旨與八旗都統等
於驍騎營兵內擇其年少無疾騎射不堪不
能滿洲蒙古言語之人滿洲蒙古每旗合派
一百名共八百名八旗漢軍合派二百名共
一千名在西廠子聖化寺等處設立一營令
其學習一切技藝更於驍騎營官員內擇其
年少而行走急情者滿洲旗分各派二員蒙
古漢軍旗分各派一員令與兵丁一同學習
使人皆成精銳至於八旗前鋒護軍內騎
射稍優年力精壯人材可觀而未經服習勤
苦之人有願入其中學習者亦著挑選一千
名另立一營令其學習其前鋒參領護軍參

領副護軍叅領護軍校之內有願與兵丁等一同在彼學習者每旗各派二員此項兵丁諸處俱不得差遣每日學習騎射所用之馬令伊等親身飼養以習勤苦營內一概不許漢語惟習清語或蒙古語其教習趨走超距及清語等事於索倫新滿洲烏拉齊內挑選好者分爲三四班令其教習至於總管二營不必派委都統等著將領侍衛內大臣散秩大臣職名開列朕酌量派委令其管理丙辰吏部議覆署直隸總督唐執玉疏言天津直隸州係水陸通衢五方雜處事務繁多辦理不易請陞州爲府設知府一員糧捕通判一員經歷一員教授一員訓導一員附郭置天津縣設知縣一員縣丞一員典史一員改州學正爲教諭此新設一縣同該州原轄之青縣靜海及滄州南皮鹽山慶雲一州三縣統歸新陞之府管轄其舊設之河間府海防同知應就近改屬天津天津舊設之州同吏

目應請裁汰再霸昌道屬之寶坻縣廣袤六百餘里其毗連之梁城所距寶邑甚遠一切公務該縣不能兼顧請將寶坻縣之江窪口起至西頭莊止路南一帶割歸梁城並改所爲縣設知縣一員典史一員教諭一員訓導一員舊設所千總一員應請裁汰均應如所請從之尋定天津新陞府曰天津梁城所新改縣曰寧河○戶部議覆署兩江總督史貽直疏言欽縣未完地丁銀共二萬六千餘兩俱係逃丁絕戶老幼廢疾無追之項據兩淮行鹽之欽商黃光德等具呈願爲代輸應如所請黃光德急公好義應量加議敘得旨兩淮鹽商數年以來屢加恩恤茲查免陋規數十萬兩商人感激情願捐貲以佐公事朕再三諭止而該督撫等僉稱輿情踴躍不能自己因令其即於本地辦理鹽義倉等務使其鄉人咸霑利賴近聞其中富商固有餘貲而無力商人務捐助之名轉於正課有未清者

已諭該督撫留心體察今黃光德代輸一項有無抑勒勉強情事著高其倬伊拉齊查明具奏○山西巡撫覺羅石麟疏報朔州於二月初四日馬邑縣於二月初六日各有慶雲呈瑞光輝燦爛經久不散下部知之戊午諭大學士等準噶爾父子濟惡背天逆理狡獪百端爲邊方之巨患朕繼述

先志綏靖西陲特遣兩路大兵聲罪致討數年以來慎選將士輓運軍需區畫周詳備辦饒裕而三軍之氣鼓勇直前人人思奮朕常教以古昔聖人之訓臨事而懼好謀而成天道惡盈謙冲受益軍氣當壯而軍心則不可驕此我將士及在廷臣工所共聞者也上年正月間西路大將軍岳鍾琪奏報雍正七年十二月二十八日夜巴爾庫爾軍營有紫氣祥光綿亘東北歷四時之久光華絢爛二月間又據署總督查郎阿奏報鞏昌府屬之靖遠衛紅嘴子地方乃黃河過渡之所每年正二

月間東風解凍河水漸薄冰橋既難行走渡船又難撐駕行李停滯歲以爲常乃今年正月官運糧車至此冰忽開融舟行無阻誠從來未有之奇遇等語朕覽奏不敢遽以爲喜輒行宣示於外特命封貯內閣以待大軍凱旋即此可以知朕心矣此番西路撥派之將士皆遴選訓練之精銳其氣勢倍覺壯盛遂未免有恃強輕敵之心以致賊人乘我不備侵犯汛界搶掠牧場并傷我兵弁豈軍志驕矜有干盛滿之戒

天心特以此示儆耶上年被賊侵擾之處朕與大將軍岳鍾琪等不能計慮於事先實難辭疎忽之過至於軍營牧放駝馬最宜布置有方乃以牲畜置於賊人來路之旁又與大營相隔遼遠被賊人乘機盜竊則審度形勢之謂何岳鍾琪更難辭咎又如達鼐統領噶斯之兵曾奏請製辦皮套等物以爲兵丁手足禦寒之具而西路兵丁去冬出戰之時冒犯

冰雪手足凍傷者多有則亦大將軍未曾留意於平時也。凡此既往之錯追悔無益。從來勝負乃兵家之常。禍福有倚伏之理。從前因疎忽而致虧損。將來自可因小警而成大功。惟望合營將士等以敬慎之心辦理戎事。以忠義之勇對越

上天自可仰蒙

上帝慈恩默垂保護。書經云

皇天無親惟德是輔。況準噶爾罄其所有甲兵。不過三四萬之衆。即以上年之事論之。小策零敦多卜係伊防守西拉百爾要地之首領。乃於冬間傾其人衆犯我卡倫我軍以數百人固守小營。彼不能奪竝不敢萌窺大營之念。僅於中途以全力邀截我師。四路畢集而我總兵官樊廷張元佐等以數千人擊敗彼數萬之衆。則賊之力量伎倆不過如是而已。蓋彼之所長在於偷盜駝馬而我師一時失於防範。遂爾墮其術中。竝非彼之兵力有餘

也。觀賊之虛張聲勢。分兵侵擾噶斯卡倫。窺伺圖呼魯克之糧石。我師以百餘人即可防守而追逐之。則更鼠竊狗偷之行。不堪之甚者也。總之行軍之道。心不可驕而氣不可餒。凡我將士務去從前驕矜之心而鼓將來勇敢之氣。候朕徐徐籌畫。必有蕩寇萬全之勝策。俾將士等歡欣鼓舞。奏凱歌而膺爵賞也。其軍營得傷患病之兵丁著用心調治。務令痊可。朕正籌畫加恩。使之更換休養。以恤勤勞。著大將軍將朕此旨通行曉諭。出征將弁兵丁知之。又諭從來備辦軍需於地方不無勞費。朕深知其弊。惟恐累及民間。是以於征勦準噶爾之舉。悉心密籌於數年之前。一絲一粟皆用公帑。而民間竝不知國家將有軍旅之事。從來未聞預備軍需。地方能如此毫不騷擾者也。此天下所共知。更爲三秦百姓所深悉者。及至大兵既出。時日既多。輓粟飛芻脂車秣馬。雖不取辦於民財。恐不免借

資於民力。此亦事勢之不得不然。祇以準噶爾狡獪兇頑。父子濟惡。實蒙古之巨患。爲國家之隱憂。若因循苟且。縱賊養姦。則狡寇一日不滅。邊境一日不寧。即內地之民亦一日不得休息。此朕熟思詳審。至於再三而出於萬不容已者。竝非好大喜功。利其民人土地而爲此舉也。即以上年之事言之。賊夷先遣使臣詐稱求和。及朕降旨暫停進兵。而賊衆乘我不備。大肆猖獗。然則此等狡寇固可置之度外。聽其貽害於邊方哉。即此愈見

聖祖皇考當年不得已之情。朕今日繼承

先志。不能不辦理之苦衷也。惟是國家設兵所以衛民。今因用兵而有不得不資民力之勢。朕心實爲憐憫。是以年來屢蠲陝甘二省額徵錢糧。使羣黎均沾膏澤。而三秦紳士庶民感激國恩。兼明大義。踴躍趨事。志切急公。二十年來如一日。朕實嘉之。如昨歲據督撫奏報甘肅士民等有願捐車輛以資輓運者。有

願捐草束以供芻牧者。朕皆降旨一一照數給與價值。而其服勞宣力之誠。悃亦大可見矣。今年添辦軍需。朕又切諭督撫有司等體恤民情。不得絲毫擾累其糧餉運費。特令加增。儻再有不敷。仍令據實陳奏。無非軫念民勞之意。惟望陝甘二省紳士庶民等歡欣鼓舞。勿懈初心。則和氣致祥。仰邀

天眷。不數年間必見膚功克奏。不但邊城內外共享寧靜之福。即爾等世世子孫永保安居之樂矣。查雍正九年甘肅所屬額徵錢糧業已全行蠲免。西安所屬額徵錢糧前降旨蠲免四十萬兩。著再蠲免四十萬兩。以昭朕體恤之恩。該督撫務飭有司敬謹奉行。使閭閻同受實惠。併將此旨刊刻頒布。俾陝甘二省遠鄉僻壤之民共知之。○又諭。上年臘月準噶爾侵犯卡倫。署大將軍紀成斌調取肅州安西兩路兵三千名。前赴軍營備用。據署總督查郎阿奏稱兩路弁兵起程時衣裝之費

分別借給銀兩俟將來按數扣除。朕思準噶爾之事起於倉猝。兩路弁兵於盛寒冬月。前赴軍營。日期忙迫。深可軫念。所借銀兩。悉著賞給。不必扣除。並將該弁兵分別加賞銀兩。著大將軍傳問伊等。或本人在軍營自領。或其眷屬在家支領。悉從其便。己未。

孝昭仁皇后忌辰遣官祭

景陵。諭內閣。上年秋月。山東地方山水爲患。即聞河南亦有數縣被水。朕以總督田文鏡身在地方。自能經理妥貼。冬間見總督邁柱奏摺。知豫省被水之民有覓食餬口於湖廣者。該省已陸續資送回籍。朕又切諭田文鏡督率有司。加意撫恤。且念豫省連歲豐稔。今不過數處歉收。自可支持度日。不致困窮失所。是以未遣專官前往查賑。今聞祥符封邱等州縣乏食窮民。沿途求乞。而村鎮中更有賣鬻男女爲山陝客商買去者。田文鏡欲將說合之中保媒人拘拏懲治。至於鄉村有糧

之家。多被附近窮民呼羣覬覦。於昏夜之中。逼勒借貸。有司不能究問。朕聞之深爲駭異。朕以愛養百姓爲心。惟恐一夫失所。即如上年直隸山東江南被水之州縣。朕皆疊沛恩施。豈獨於豫省之民靳茲膏澤。田文鏡近來年老多病。精神不及。故爲屬員所欺誑耳。夫賣鬻男女之事。在平時亦有之。此乃出於本人之情願。非官長所可禁止者。至於荒歉之歲。自以撫綏安插。使民不至離散爲第一義。若不能撫綏安插。而但禁其賣鬻子女以避離散之名。是絕其生路也。豈爲民父母者所忍言乎。刑部侍郎王國棟向曾在豫省居官。著給與欽差大臣關防。馳驛前往。將被水之州縣一一查明。飛飭該地方官動用本地倉穀錢糧核實賑濟。務使窮民咸登衽席。不得稍有遺漏。俟麥熟之後。奏聞停止。儻地方官奉行不善。怠忽從事。著王國棟嚴叅重治。其應行緩徵之州縣。著傳朕諭旨。即行緩徵。以

免追呼之擾○調江南江蘇布政使高斌爲河南布政使司布政使陞江南淮徐道白鍾山爲江蘇布政使司布政使署河南布政使陳世倬仍回河南按察使任○予故兵部左侍郎正黃旗滿洲副都統永壽祭葬如例○庚申以吏部右侍郎吳士玉兵部右侍郎任蘭枝俱暫署刑部侍郎事○以故喀爾喀輔國公根敦子薩木畢爾襲爵○辛酉兵部遵旨議奏西路陣亡將弁署叅將徐宗仁應贈爲署副將給卹銀六百兩署守備劉貴才應贈爲守備給卹銀四百兩各廕子弟一人以守備用署守備劉芳雨李國勲應贈爲守備各給卹銀三百兩千總王大謨徐維新均贈爲署守備各給卹銀一百五十兩外委把總方正劉世勲均贈爲千總各給卹銀一百兩俱廕子弟一人以衛千總用其餘宗仁等祭葬銀兩行文禮部工部照例奏明賜卹從之○壬戌清明節遣官祭

永陵。

福陵。

昭陵。

昭西陵。

孝陵。

孝東陵。

景陵○諭大學士等國家教養將士加恩於平時原欲其有勇知方緩急可恃以備干城之選果能臨戎遇敵奮勇先登勞績戰功卓然可紀尤當沛以殊恩優加體恤以獎忠誠而褒壯畧也上年冬底準噶爾之事總兵官樊廷等已頒諭旨厚加爵賞并令戰陣有功之弁兵更換休息中有侵冒水雪觸犯鋒鏑而損傷手足者令軍營加意調治送回本汛矣著大將軍岳鍾琪將此次隨樊廷張朝良等禦賊有功之將弁兵丁皆一一查明應令各回本任本汛者著另選撥以代之朕又思川陝二省地方數千里甚爲遼濶今西邊有辦

理軍需之事。總督一員。難於控制。向來川省曾設總督。今仍著添設四川總督一員。即以提督黃廷桂補授。四川提督著陝西固原提督紀成斌調補。陝西固原提督著陝西肅州總兵官樊廷陞授。陝西肅州總兵官著四川重慶總兵官張朝良調補。四川重慶總兵官著江南漕標副將馬義陞授。俟石雲偉馬紀勲等到軍營之後。樊廷等各回新任。紀成斌未回四川之先。其提督印務。仍著黃廷桂兼管。青海輔國公功額喇卜坦故。遣官致祭。旌表江南烈婦江寧縣金升妻許氏。絕粒完貞。歙縣吳宣來妻朱氏。自經守節。休寧縣楊恂妻金氏。絕粒殉夫。宿州趙佐妻戴氏。自縊殉夫。江南烈女無爲州童文成聘妻卞氏。王道聘妻謝氏。建平縣宗茂松聘妻王氏。俱夫亡間計。矢志投繯。來安縣葉觀光聘妻周氏。未婚夫故。絕粒捐軀。各給銀建坊。入祠致祭。如例。○癸亥。諭八旗大臣等。滿洲蒙古漢

軍及包衣佐領下家人。內有漢仗好行走。歷練能受辛苦。且長於鳥鎗弓箭者。著揀選二千名。發往西路軍營備用。此挑選時。聽伊等家主及本身情願入選者。即著賞本主銀一百兩。伊等凱旋之日。俱准爲另戶。再每口賞伊本主銀一百兩。至伊等前往軍營一切錢糧馬匹器械銀兩等項。著照馬甲之例另行賞給。○雲貴廣西總督鄂爾泰疏。奏勦撫橄欖壩有功文武官弁并陣亡陣傷官兵。請分別議敘賞卹。下部知之。○蒿齊忒扎薩克郡王阿噶尼斯達故。遣官致祭。

大清世宗敬天昌運建中表正文武英明寬仁
信毅大孝至誠憲皇帝實錄卷之一百三

大清世宗敬天昌運建中表正文武英明寬仁
信毅大孝至誠憲皇帝實錄卷之一百四

勅修

總纂官光祿大夫經筵講官太僕議政大臣保和殿大學士兼兵部尚書理兵部事務加十三級臣鄂爾泰

纂修官光祿大夫經筵講官太僕議政大臣保和殿大學士兼兵部尚書理兵部事務加十三級臣鄂爾泰

纂修官光祿大夫經筵講官太僕議政大臣保和殿大學士兼兵部尚書理兵部事務加十三級臣鄂爾泰

纂修官光祿大夫經筵講官太僕議政大臣保和殿大學士兼兵部尚書理兵部事務加十三級臣鄂爾泰

敕修

雍正九年辛亥三月甲子朔諭喀爾喀王貝

實錄卷一百四

勒等爾喀爾喀原係大部落因爾等先世但
知好佛誦經廢弛戎務曾被噶爾丹戰敗爾
等受

聖祖仁皇帝恩養教訓四五十年練習武藝非
比從前之怯懦去歲準噶爾賊人乘西路軍
營不備盜竊馬匹總兵官樊廷等率兵二千
救援卡倫與二萬賊兵交戰殺賊甚多旋即
遁歸僮賊人入爾等遊牧之地爾等當乘時
努力報恩雪耻朕遣兵進勦準噶爾原非利

其土地人民特爲爾等不能安寧之故耳。其深悉朕意。各加奮勉。毋忽。○乙丑。命左副都御史二格協辦肅州軍需事務。○大學士等議覆廣東巡撫鄂彌達疏言。烏鎗一項禁例甚嚴。但廣省之瓊州。孤懸海島。外與交趾連界。內與黎人錯處。居民多藉烏鎗以爲防禦之具。似未便照內地一例收繳。請將民間現有烏鎗。令報明地方官注冊。并令地方官嚴飭保甲。於十家牌內開明數目。一戶止許藏鎗一桿。其餘交官收貯。如違禁多藏。察出照例治罪。至關毆搶竊案內。執有烏鎗者。本罪應擬絞監候。不可再行加等。者仍照例定擬。外其徒罪以下。俱於各本罪上加二等發落。如有將烏鎗資助盜賊者。與本盜一例同科。該地方官有失於覺察及諱飾等情。照例降調。應如所請。從之。○豁免河南蘭陽縣浮沙地畝額賦二千五百兩有奇。○旌表直隸新城縣烈女梁玉養女閻氏姊妹拒姦同時被

刃。各給銀建坊。入祠致祭。如例。○丙寅。諭大學士等。寧遠大將軍岳鍾琪先後接到所降諭旨。辦理諸務。雖較之從前所奏。畧有頭緒。而中間尚有錯謬之處。如將肅州駐劄之固原寧夏兵丁二千五百名。撥到軍營者。原以補缺少原額也。又奏稱將此二千五百兵與撥出口之西安兵一千名。涼州兵五百名。駐劄圖呼魯克毛垓圖等處。若北路一有調遣。即將此兵丁從庫庫拖米一路赴阿濟卡倫。應援如四千名兵尚不敷用。再於軍營內挑選精兵四千名。於哈喇烏蘇直赴畢濟卡倫。應援等語。北路滿漢兵丁及察哈爾等處兵丁三萬餘名。加以喀爾喀數萬之衆。豈有尚資藉於西路應援之理。設賊人果傾其全衆犯我北路。則西路之師自應直向木魯河賊人留駐之所。及伊爾布爾和邵放卡之處。搶擄其牲畜。勦滅其人衆。又何暇分其兵衆以作應援之師乎。且阿濟畢濟去北路大軍之

營尚遠賊人豈能越我軍營而至而勞西路應援之兵乎此等設施實未妥協至請將滿洲歸化城兵丁交與常賚帶領至安西駐劄與朕意相符及將圖呼魯克糧石運交軍營收貯所議亦爲允協應照所請行○丁卯吏部議覆廣西巡撫金鉷疏言東蘭州新改爲流水土最惡所有正雜各官請於桂平等五府二州內揀選調補五年俸滿果能有益地方請於題咨到部之後即行陞用應如所請從之○免直隸故城清河二縣雍正八年分水災額賦有差○免江南江淮興武二衛應追旗丁歷年夫料銀十萬八千兩有奇○旌表河南登封縣烈婦趙毛兒妻劉氏強姦不從被勒殞命給銀建坊入祠致祭如例○戊辰諭大學士等準噶爾賊人留守駐防木魯河又於伊爾布爾和邵安設卡倫雖聲言欲犯北路朕料其詭計仍欲來犯西路也蓋生芝之脫回未必非賊之故縱令其傳述此信

以懈我西路防範之心爾等可傳諭岳鍾琪不可稍存輕忽之心賊夷率衆來犯如爲數無多西路之師固足抵禦剿戮即傾衆而來亦不可即調北路之兵恐賊兵復以大隊犯北路北路兵力不分方可全力擊剿至西路軍營現今兵馬果否敷用亦應詳審確實無致臨時周章又補撥兵丁原額或用本省之兵或用鄰省之兵或行召募令岳鍾琪詳議具奏○己巳吏部等衙門議覆浙江總督李衛條奏江南蘇郡地方營制事宜一蘇州係財賦重地五方雜處其最難者莫如胥閭二門稽查彈壓文武官弁均不可少請添設蘇州營守備一員把總二員外委把總二員分汛駐防并請將蘇州府經歷移駐社壇地方專司巡緝一蘇州舊設城守二營請將左軍改爲中軍以新設之守備爲左軍將許墅關汛把總一員外委把總一員及原防兵丁歸併管轄統成三軍營制一胥閭門外應添水

陸防汎請將提督衙門向設塘撥兵一百二十名。蘇州巡鹽兵二十名。壯丁五十名。撥入左營。酌量水陸分汎駐防。一。許墅關之東黃埭一帶。向設巡船二隻。請給與腰牌。以爲憑信。如無腰牌而冒充巡役及雖有腰牌而擅將查出私貨入己。或受賄徇縱者。分晰查究。如管關官員不能禁止巡攔作弊。文武官弁不能查拏匪類冒充一併議處。一。各處青藍布疋俱於蘇郡染造。踴坊多至四百餘處。踴匠不下萬有餘人。多係單身烏合。防範宜嚴。請照保甲之法。設立甲長坊長。與原設坊總互相稽查。一。踴匠多係外來傭作。必由人引進。號曰包頭。應著落包頭查明來歷。取具互結。送駐防文武員弁存案。以便稽查。均應如所請。從之。○免直隸交河縣雍正八年分水災額賦有差。旌表正白旗漢軍烈婦徐永德妻趙氏拒姦不污。投繯明志。給銀建坊。入祠致祭。如例。庚午。雲貴廣西總督鄂爾泰

疏奏征勦米貼逆夷有功文武官弁並陣亡陣傷漢土兵丁。請分別議敘賞卹下部知之。○辛未。免直隸蔚州西寧。雍正八年分水災額賦有差。○癸酉。正白旗蒙古都統巴爾米忒緣事革職。陞正白旗護軍統領魏臘爲本旗蒙古都統。○甲戌。裁福建總督衙門筆帖式四員。從福建總督劉世明請也。○乙亥。諭大學士等。寧遠大將軍岳鍾琪署總督查郎阿。因聞賊營脫回兵丁藍生芝傳說噶爾丹策零帶領部落家口移住哈喇沙爾。并有四月初一日。小策零敦多卜會兵去犯北路之言。籌畫四條具奏。隨傳問多爾濟波羅特據稱哈喇沙爾係回子所住耕種之處。相近有小城名科魯勒克。其地氣候炎熱。又甚隘小。僅可容千餘家。四面係開種田畝。不能牧放。多爾濟在哈喇沙爾居住最久。波羅特亦親聽彼地人傳說二人之言的確。與否雖未可必然。大約其地之不甚寬大。可知噶爾丹策

零若欲移住於此必率其全部而來少亦一二萬人哈喇沙爾果能容此大衆乎且以情理論之伊里爲賊之巢穴西北與圖爾古特哈薩克接境實皆賊之讎國噶爾丹策零又安敢舍其巢穴而遠居於哈喇沙爾乎如果率其大隊住於吐魯番相近之處則賊之注意在我已爾庫爾軍營而岳鍾琪乃云賊人由吐魯番一路直侵哈密截我營站乘勢侵擾安西肅州沿邊一帶等語據多爾濟波羅特俱云哈喇沙爾至吐魯番雖有路徑皆係沙磧其自吐魯番至哈密一由沙磧大隊難行一沿南山係一線細路又須仍從已爾庫爾經過然後得達二人之言果確則賊衆不能從哈喇沙爾直至吐魯番而吐魯番一路不能直侵哈密也明矣設賊人欲侵犯哈密已爾庫爾大營之大軍豈竟任其出入而令阻截臺站乘勢侵擾安西肅州乎至云賊人以大隊全赴西路攻我軍營賊勢甚衆我軍

衆寡莫敵當持重戒嚴堅壁固守一面知會北路遣兵應援一面飛調綠旗滿洲蒙古兵丁由無克克嶺三面夾擊等語從前事起倉猝彼時軍營兵馬無幾是以諭令岳鍾琪僅賊夷以大隊再犯當持重堅守以待應援今則現在軍營馬步車兵約有一萬九千餘名加以安西甘肅之兵六千名續派兵四千名共二萬九千名是兵不爲寡矣夫樊廷以馬步二千敵彼二萬轉戰七晝夜猶足以相當乃以二萬九千人之衆而云衆寡莫敵何懦怯至此且從前尚欲直至伊里搗其巢穴豈有賊人來至數百里內而無勦殺之策轉堅壁而不出乎獨不思我軍堅壁不出僅賊但虛張聲勢作攻我軍之狀而分其衆以侵擾圖呼魯克塔爾那沁哈密等處阻截營站斷我音問此時將任賊於軍營近地肆行無忌乎岳鍾琪又欲以圖呼魯克毛垓圖及安西之滿洲蒙古官兵由無克克嶺合會夾擊賊

人若果至巴爾庫爾賊即敗逃亦從濶舍圖一路直走伊爾布爾和邵而遁無克克嶺相去二三百里安所得夾擊之又云賊夷或令吉穆察之兵侵犯軍營而以哈喇沙爾之賊侵犯青海查哈喇沙爾之至青海必由噶斯噶斯之口甚隘斷不能行且賊人既遣人侵犯大營彼豈不慮我軍之勦殺自必留哈喇沙爾之衆以爲應援又何敢分其衆侵犯青海乎至慮賊之率其醜類悉赴沙洲等處尤爲背謬賊若由噶斯伊孫察罕齊老圖而進則此數路斷難容走萬餘人若由大道而來又不知何法可以越我已爾庫爾軍營而過也岳鍾琪於口外地方形勢茫然不知於軍務機宜亦覺昏憤凡巴爾庫爾軍營築城之要策及大軍勦賊之勝算並未籌及而但將旁枝末節盈篇累牘備極周詳朕披覽之下實爲煩憂如藍生芝所聞賊人有搶卡倫牲畜踐踏禾苗之語不思賊人若來搶奪我卡

倫牲畜我獨不能勦戮此搶奪之賊乎賊人可以踐我禾苗我不可以乘其踐踏而擒之乎岳鍾琪何以但能慮賊而不知籌已也又藍生芝云有哈密回子報信領路等語哈密回子之不可信由來已久亦當諒其苦情蓋其力量微弱遭準噶爾之凌虐恨之入骨而畏之如虎其或偶然通信於賊者乃恐懼之至爲將來自全之計我軍固不可不留意隄防然不可使彼有疑懼之心我之軍力能庇護哈密哈密自不爲賊人所用岳鍾琪不必因藍生芝之言而深究也至西鳳二府運糧一事原因軫念甘肅連年輓運軍糈民間不無煩擾是以特命范時繹到彼協同巡撫武格侍郎馬爾泰將西安鳳翔二府米石運至甘肅涼州以資軍食武格等議行本運之法俾西鳳二府官民任轉運之勞甘肅地方少得息肩朕意深以爲然今岳鍾琪查郎阿又爲遞運之議是與雍正元年設臺盤運相同

將來必有派撥協濟之累或更以交接卸責至將米石灌水攪沙從前誤累豈可復蹈爾等可傳諭岳鍾琪等知之○以鑲黃旗滿洲副都統宗室色布肯署鑲白旗護軍統領湖廣總督邁柱遵旨將沔陽州實在民欠糧銀三萬二千餘兩分晰造冊具題得旨朕愛養元元時下減賦蠲租之詔每思豁除舊欠則頑戶獨蒙恩蠲免新糧則善良均被澤此亦情事之易知者惟是沔陽民欠與他處不同該州近水常有滂溢之患朕所深悉其未完民欠銀兩著從寬豁免○丁丑免江南建平縣雍正八年分水災額賦有差○戊寅工部議覆江南河道總督嵇曾筠會同巡撫尹繼善疏言江南黃運兩河工程關係運道民生設官分職必須因地制宜隨時通變請將宿桃中河通判改爲宿遷運河通判安清中河通判改爲桃源安清中河通判其海防同知應移駐童家營改爲分管山安南岸河務

海防同知江防同知改爲楊河江防同知並添設童家營巡檢一員把總一員均應如所請從之○免直隸霸州文安等七州縣未完民欠糧米二萬一千六百石有奇○已卯免黑龍江墨爾根城等處官莊雍正八年分霜災額賦有差○庚辰諭大學士等原任都統覺羅佛倫於軍臺調回補授陵寢散秩大臣同伍格總理事務○以左春坊左庶子索柱兼大理寺卿事○吏部議覆江西巡撫謝旻疏言江西吉安廣信二府屬皆有永豐一縣文移印信不無混淆請另改嘉名以免滋弊應如所請從之○尋定廣信府屬永豐縣曰廣豐○辛巳

上詣恩佑寺行禮○壬午諭大學士等紀成斌聞賊人侵擾吐魯番之信即令樊廷等領兵四千前往應援此舉甚屬錯謬朕已降旨嚴切申飭至於從前採買吐魯番糧石本應給與運

價令其自送軍營乃計不出此而遣官發駝
遠行搬運致啟賊人偷盜之心及至去冬逆
夷猖獗之後猶不將辦糧之弁兵撤回此則
疎忽錯誤之甚者也惟是朕以怙冒萬方爲
心若坐視吐魯番之被寇侵陵而不爲之籌
畫保護朕心又有所不忍從前原曾降旨與
吐魯番人衆若畏懼準噶爾即移向近邊之
地居住是以拖克拖麻穆忒帶領之今移駐
近邊者皆享安寧之福可再行曉諭回子等
伊等儻自揣力不能敵不妨仍爲移避之計
朕當從厚賞給盤費竝令地方官善爲安插
使之得所若此番曉諭之後伊等仍復觀望
則賊人再來侵擾之時聽伊等自爲之計我
軍不便護庇矣○癸未諭內閣朕欲於在京
官員內揀選老成明白者數十員命往陝西
內地州縣辦理宣諭化導之事著大學士會
同該教習於庶吉士內揀選數員各部堂官
在本部學習人員內揀選一二十員國子監

祭酒等在選拔貢生內揀選二三十員俱交
送內閣帶領引見○免四川省所屬明正冷
邊各土司雍正八年分地丁額賦有差一旌
表直隸東明縣烈婦胡允爵妻趙氏強姦不
從自縊殞命烈女趙廷桂女趙氏猝遇強暴
拒姦被刃各給銀建坊入祠致祭如例○甲
申廣西左江總兵官齊元輔緣事革職調廣
西右江總兵官蔡成貴爲廣西左江總兵官
陞湖廣長沙副將周寶爲廣西右江總兵官
○大學士等議覆靖邊大將軍傅爾丹奏言
北路軍營遵旨築城查科布多地方接連布
婁爾與庫里野圖相近係進兵大道請於此
處築城應如所請從之○禮部議覆湖南學
政習窩疏言岳州府屬之澧州先經題准另
建考棚湖西六屬生童就近赴考另給岳西
府學鈴記改駐澧州今澧州改爲直隸州既
不屬岳州府管轄請將岳西府學裁去將該
訓導仍歸岳州府駐劄其岳東府學應仍改

爲岳州府學。又九谿永定二衛軍戶屯田俱散在澧州等處。今二衛改爲一縣。應將該衛文武舊生照依戶口田糧附近新縣者撥歸新縣。遠在各屬者撥歸各屬。應如所請。從之。

○乙酉。陞都察院左都御史三泰爲禮部尚書。○工部議覆刑部尚書勵廷儀疏言天生五材。鐵居其一。用以備軍資而造器物。所係綦重。向例鐵貨不許私出外境。而廢鐵不在禁例。近聞射利之徒。專收廢鐵。鎔化運至近邊近海地方貨賣。此風漸不可長。請嗣後有將廢鐵潛出邊境及海洋貨賣者。照越販硝磺之律科斷。以除姦弊。應如所請。從之。

○丁亥。諭大學士等。各省督撫著於所屬地方民人內召募揀選人材壯健技勇可觀者百餘人。咨送兵部奏聞。候朕揀派官員訓練教習。以備軍旅之用。武生武童及鄉勇民壯等俱可入選。每人本籍額外給與守糧一分。以養贍其家。口本人進京之時。著督撫動支公用。

銀兩賞給路費。○以工部左侍郎孫嘉淦充經筵講官。○授輔國公裕壽女爲鄉君。壻石履升秩四品。○雲貴廣西總督鄂爾泰題雲南永北府北勝土知州高熙勛故其孫高龍躍承襲年幼。請以高龍躍母木氏協理下部知之。○戊子。諭大學士等。都統伊禮布著帶領家選兵二千名。驍勇兵一百名。前往西路爲副將軍。若大將軍岳鍾琪有統兵行走之處。著伊禮布帶領滿洲兵丁一同前往。其分管家選兵護軍校延岱等二十員。各賞銀五百兩。○大學士等遵旨議奏。臣等謹將襲封一二三等公十員。並伊等先世開列名單。恭擬美名。進呈欽定。擬撰誥命。給與始封襲封之員。其宗室外戚公。應照禮部原議。宗室封爲奉恩公。外戚封爲承恩公。一併給與誥命。得旨。一等公圖海定爲忠達公。一等公賴塔爲震績公。三等公恩格德爾爲奉義公。一等公鰲拜爲超武公。一等公圖賴爲雄勇公。二

等公圖爾格爲果毅公三等公費英東爲信勇公三等公多尼庫魯克爲建烈公三等公和碩圖爲勇勤公一等公楊古利爲英誠公○己丑諭大學士等察哈爾地方居住之巴爾虎護軍披甲人等內著挑選一百名巴爾虎侍衛岱噶爾那木扎爾鄂欽敦柱克亦著派出此一百名兵丁令侍衛岱噶爾會同該總管詳加揀看其馬匹行糧照例辦理支給外侍衛四員各賞銀五百兩兵丁一百名各賞銀一百兩令其收拾預備俟京師兵丁定有起程日期即行文知會岱噶爾等帶領前往鄂爾多斯地方等候副將軍伊禮布領兵到時著伊禮布一併管轄帶往巴爾庫爾軍營若有行走之處著於彼處所有歸化城一千兵內殘弱者撥出百名存留營內將此一百名入於歸化城兵丁數內令其防範盜竊馬匹等事俟成功之時著侍衛岱噶爾各帶回本處○陞正藍旗蒙古副都統青保爲正

白旗護軍統領鑲黃旗護軍叅領薩穆哈爲正藍旗蒙古副都統○庚寅諭大學士等何祥書著赴北路軍營令大將軍傅爾丹酌量給與綠旗職銜管理九千車騎兵効力行走○壬辰陞工部右侍郎鄂爾奇爲都察院左都御史仍兼理工部侍郎事○禮部議覆山西學政朱曙蓀疏言山西專設運司一學自前任學政勵宗萬將民童冒籍商學者題請改歸本籍之後文武生員及應試童生爲數無多請將運學改爲中學於原額二十名之內減去八名取進文武童生各十二名原額廩增各四十名應減去一半止留廩增各二十缺應如所請從之

大清世宗敬天昌運建中表正文武英明寬仁
信毅大孝至誠憲皇帝實錄卷之一百四

大清世宗敬天昌運建中表正文武英明寬仁
信毅大孝至誠憲皇帝實錄卷之一百五

敕修

雍正九年辛亥夏四月癸巳朔享

太廟遣二十四阿哥允祕行禮○河東總督田
文鏡因病乞休得旨田文鏡著暫行來京調
理伊常服按察使陳世倌方劑亦著隨其來
京河東總督之銜原爲田文鏡而設今仍以
巡撫銜著浙江布政使張元懷署理該部將
從前河南巡撫關防查出送往交與張元懷
其河東總督關防仍留豫省俟田文鏡病痊
回任之日照舊管理○以大理寺少卿孫
國璽署浙江布政使司布政使鴻臚寺卿唐

繼祖署河南按察使司按察使○以故三等精奇尼哈番西靈阿子黑冷特襲職○免廣西歸順土州雍正八年分苗田銀兩有差○甲午以翰林院侍讀楊炳編修顧成天俱署日講起居注官○調湖北巡撫魏廷珍來京陞廣東布政使王士俊為湖北巡撫調湖南布政使楊永斌為廣東布政使司布政使陞湖南按察使張琛為湖南布政使司布政使直隸清河道胡瀛為湖南按察使司按察使

○調白都納副都統圖爾賽來京寧古塔副都統多索禮為白都納副都統陞三等侍衛巴爾岱為寧古塔副都統○乙未諭內閣朕因直隸州縣之被水不過近河村莊其他高阜之處收成豐稔彼此可以相資不致艱於謀食是以未頒加賑之旨今聞畿南州縣之中有被水輕重之不同其被水輕者民間可以支持而被水稍重者即有日食不敷之慮即如大名府屬之長垣東明開州等處皆地

勢窪下之區失業之民甚覺艱窘恐其他州縣亦有與之相類者今去來熟之時尚有月餘應籌接濟之道以資其耕作若從京師遣官分查必致稽遲時日副都統趙弘濟係上年散賑之員著馳驛前往保定會同該督唐執玉布政使王暮等查閱上年散賑檔案將其中被水稍重應行加賑之州縣一一確查明白遴選賢員星速分途前往會同該地方官或動倉穀或動帑銀核實散賑至麥熟之時停止儻奉行不力或有遺漏浮冒等弊經朕訪聞定將大小官員從重議處○丙申吏部議覆兵部左侍郎楊汝穀條奏舊例各項俸深人員俱於雙月推陞其知縣應陞之缺在京則主事中行評博在外則同知知州通判遇本月所出之缺挨俸陞用但中行評博其事甚簡而同知知州通判則有地方之責雖均屬知縣應陞而員缺各異向來照品級考次第先儘京缺後陞外缺是以歷俸最深

者推陞部寺諸員而俸次在後者轉得府佐
州牧殊未妥協嗣後請計本月出有幾缺即
擬陞幾人不論京缺外缺將本月論俸擬陞
之人吏部一體代為掣籤補授應如所請從
之○戊戌裁廣東澄海縣東壘河泊所大使
缺改設樟林鎮巡檢一員從廣東總督郝王
麟請也○己亥兵部議覆廣東總督郝王麟
條奏改設縣治事宜一裁海豐縣之甲子提
勝二所改置一縣於東海濶地方建立縣治

設知縣一員典史一員移海豐縣訓導為新
縣訓導改原駐東海濶千總為新縣城守營
千總一海豐縣屬地方有附近東海濶之坊
廊石帆吉康等三都並大安陳牙雲落礮峯
橫隴石陂黃塘賴僧朋塘上護赤荇廊公平
逕新田螺溪上下沙等十六屯請撥歸新縣
管理一舊設之東海濶巡檢應改為甲子巡
檢移駐甲子城與河田巡檢俱隸新縣管轄
其汕尾巡檢改為新縣黃沙坑巡檢一海豐

長樂興寧龍川永安五縣與新縣捕務應歸
駐劄碣石之軍民同知管理一請裁平海大
城海安大鵬雙魚五所改設平海所巡檢一
員該所原管軍屯丁糧歸併歸善縣管理大
城海安二所軍屯糧米歸併饒平徐聞二縣
管理並請添設新安陽江二縣縣丞各一員
駐劄大鵬雙魚二所城一請裁陽江縣太平
驛陽春縣樂安驛驛丞二缺其驛務歸各該
縣管理於太平地方添設巡檢一員以司捕
務均應如所請從之尋定東海濶新設縣曰
陸豐○復設廣西鬱林州州判一員添設鬱
林州撫康巡檢柳州府懷遠縣梅寨巡檢各
一員從廣西巡撫金鉉請也○庚子諭內閣
朕御極以來繼述

皇考聖祖仁皇帝入安區宇之
聖心旰食宵衣朝乾夕惕欲使薄海內外休養
生息物阜民安永戢兵戈咸登衽席以成蕩
平熙皞之治是以宣猷敷治之間宏綱庶務

凡有益於民生者莫不興舉。不便於民生者莫不屏除。若有幾微措置失宜。即五內展轉寤寐難安。豈肯好大喜功。興兵構難。使百姓有供應之勞。不遑寧處哉。惟是鋤暴乃所以安民。撫內必兼乎攘外。此古今不易之至理。帝王治世之常經。凡爾百姓。麤通大義者。即莫不知之。不必待高遠之識也。惟彼準噶爾一部落。原係元朝之臣僕。其始祖曰額森。額森之子托渾。漸至大員。因擾亂元之宗族。離間蒙古。惟恐獲罪。遂背負元朝之恩。逃遁藏匿於西北邊遠之地。煽惑匪類。要結黨與。自稱準噶爾。當我朝定鼎之初。各處蒙古傾心歸順。求為屬國。獨準噶爾一部落。違越於德化之外。至噶爾丹策妄。阿喇布坦二人。則尤狡獪兇頑之甚者。噶爾丹身為喇嘛。不守清規。不遵佛教。破戒還俗。娶青海鄂齊兒圖車臣汗之女為妻。又潛往青海地方。賊害伊之妻父。而擄其人衆。又復巧構釁隙。乘喀爾喀

之不備。發兵猝擊。以致喀爾喀人衆潰散。紛紛投我天朝。蒙

聖祖仁皇帝施恩撫恤。遣使前往噶爾丹處。諭令戢兵和好。多方開導。乃噶爾丹冥頑不靈。轉借追襲喀爾喀之名。犯我邊汛。彼時即行勦滅。復有何難。我

聖祖仁皇帝至仁如天。好生為德。特遣官員前往責問。是時噶爾丹惶愧恐懼。設誓撤兵。仍復潛住近邊。暗圖窺伺。且乘間搶掠蒙古牲畜。俾其不獲安居。我

聖祖仁皇帝始親統六師躬行天討。噶爾丹逆天背理。自速滅亡。此噶爾丹之始末也。策妄阿喇布坦者。乃噶爾丹之姪也。彼時既平噶爾丹。即可鋤絕根株。不留餘孽。祇因我

聖祖仁皇帝寬大仁慈。赦罪宥過。且念策妄阿喇布坦素與伊叔不相和睦。情有可原。於是加以

天高地厚之恩。將噶爾丹餘剩部落賞伊收管。

此時伊力弱勢微。甚爲恭順。其後則離間伊妻之父子。誘其妻弟攜帶萬餘戶。至伊住牧之地。因而強佔入己。由是勢力漸增。竟敢肆意妄行。窺伺青海。侵犯哈密。又潛兵入藏。殺害伊妻弟拉藏汗。毀壞寺廟。荼毒人民。我聖祖仁皇帝特遣大臣前往詢問。乃伊慙不畏。死阻兵抗命。因使臣率師甚少。兵力單弱。伊得肆其猖狂。此實天下臣民所共憤者。我聖祖仁皇帝仍賜包容。諭令兩路官兵姑緩前進。以俟其悔罪。誠若怙終不悛。則命將徂征。犁庭掃漠。此我

皇考之本意也。朕即位以來。伊雖遣使求和。而詐僞作姦。仍復如故。且將我青海叛臣羅卜藏丹津。收留藏匿。朕屢次降旨。諭以定界息兵。而伊狡飾支吾。巧幻百出。及策妄阿喇布坦身故。伊子噶爾丹策零繼立。其妄亂之性。狂悖之行。更過於其父。其遣使陳奏之詞。甚屬支離妄誕。即如前年西藏阿爾布巴等之

戕害康濟縣亦因與準噶爾地方相近而逃匿之羅卜藏丹津又係伊等姻戚彼此相依是以敢於悖逆朝命而仗準噶爾以爲狡兔之三窟也。似此世濟其惡之人以逞兇挾詐爲心。以劫物傷人爲事。不可以德感不可以理喻。無賴無恥。懷逆藏姦。時時欲戕害臣服我朝之蒙古部落。以壞我屏垣。若當此可以經理之會。而瞻顧因循。避興師動衆之名。爲耽逸偷安之計。將狡寇一日不滅。則蒙古一日不安。邊境一日不寧。內地之民一日不得休息。而首先疲於奔命者。即三秦之黎庶也。即以上年之事論之。賊夷先遣使臣爲稱請和。及朕降旨停兵。以待信息。而彼於深冬冰雪之時。傾其醜類。乘我不備。侵犯汎界。盜竊駝馬。然則此等狡寇。固可置之度外。聽其貽害於將來乎。從來窮兵黷武。爲聖帝明王之所深戒。而以大加小。以強陵弱。又仁人君子之所不忍爲者。況準噶爾彈丸之地。遠在極

北之區得其地不足以耕耘得其民不足以驅使即使減此朝食亦不足以誇廟畧而耀武功此皆

皇考與朕熟思審處先後籌畫數十年而出於萬不得已者也惟是地方有軍旅之事厲兵秣馬諸務紛繁雖不取辦於民財恐不免借資於民力向蒙

皇考軫念秦民勞勩所以加恩而優恤之者無待朕之縷述矣朕御極之元年即將陝甘二

省康熙六十年以前民屯衛所未完銀米豆草等項悉行蠲免又將舊例應完之三釐三合免其徵收數年以來西安所屬額徵錢糧或免四十萬或免八十萬甘肅所屬錢糧則連歲全行豁免他如展納課之定期寬帶徵之舊欠開墾地畝修築河渠悉動帑金永爲民利此皆朕之加惠於秦民者可約畧舉之也即以西陲用兵之事言之北路軍需交與怡賢親王等辦理西路軍需交與大將軍岳

鍾琪辦理皆定議於雍正四年者王大臣等密奉指示一絲一粟皆用公帑製備纖毫不取給於民間是以經理數年而內外臣民竝不知國家將有用兵之舉及至雍正七年大軍將發飛芻輓粟始有動用民力之時朕皆敕令地方有司照數給與腳價嚴禁剋扣短發侵蝕等弊儻有不肖官員借稱軍需科派擾民者著該管大臣即行題參革職先動帑金傳集百姓如數給還朕所以爲百姓防患除弊者亦極嚴切矣上年該督撫先後奏稱民人中有願捐草束以供牧養者紳衿士庶中有願捐車輛以資輓運者朕皆獎以溫諭仍令照數給與價值去冬賊夷猖獗之後將來軍餉較前未免繁多又特加添運價一切軍務悉令有司寬裕辦理朕豈肯因戎事緊急稍涉權宜使閭閻騷擾於萬一哉意謂三秦衆庶必能諒朕不得已而用兵之苦心悉朕不忍累民之至意矣乃近來風聞陝西之

民竟有怨朕而私相謗議者。總因十數年來陝西居住之允禩、塞思黑、年羹堯、延信等皆懷挾異志、包藏禍心。其脅從之黨實繁有徒。如塞思黑之令狐士儀、年羹堯之鄒魯淨一道人、延信之道姑王氏等皆公然以反叛爲衆人之倡。則其他匪類之造作妖言、暗中煽動者又不知其幾矣。地方既有姦回之人而又不值軍興、旁午或有司自顧考成間有奉行不善之處。是以愚民無知惑於邪說、溺於私情。偶因用力於目前遂忘受恩於平日。此亦事勢之所不免者。夫秦風樸直自古爲然。樸則易被人欺。直則善言易入。祇以向來未有宣諭化導之人而該省督撫以及有司既有刑名錢穀之專責。又有徵兵籌餉之軍需。簿書鞅掌難於兼顧。是準噶爾之始末邊防關係之情形。

皇考與朕奉

天討罪除暴安民萬不得已之苦衷。並未家諭

而戶曉。但聽僉邪小人搖唇鼓舌訛謗朝政。變亂是非。無怪乎草野之中被其迷惑者不少也。今朕特頒此旨遣左都御史史貽直侍郎杭奕祿署內務府總管鄭禪寶率領翰林院庶吉士及六部學習人員國子監肄業之選拔貢生等前往陝甘二省開導訓諭。覺悟愚蒙。儻合省民人等果能篤尊君親上之義消亢戾怨懟之情將見和氣致祥必邀

上天默佑迅奏膚功邊塞永寧烽烟屏息不但爾等安居樂業俯仰優游即爾等世世子孫共享昇平之樂矣。至於軍需各項悉動帑金差員辦理不得扣剋短少貽累小民所降諭旨至再至三著欽差大臣悉心訪察儻有不遵諭旨即行題參或所定官價有不敷用之處亦即據實奏聞。若兵馬經過之地有不遵紀律騷擾民間者小過即告知該管大臣懲治大過即行叅奏不得姑容務使兵民和洽內外輯寧以迓

天庥以副朕念。辛丑兵部議覆廣東總督郝王麟疏言。粵東山海交錯。民俗刁悍。其強排黎尚等處。儻有殷實商民。需用鳥鎗者。請照瓊州定例。止令長一尺五寸。家置一桿。赴官報明鑿字備用。所有從前私藏違式鳥鎗。限六個月悉令繳官。違者照私藏應禁軍器律治罪。其命盜案內有執用違式鳥鎗及未經鑿字者。將失察之地方官議處。儻該管官希圖隱諱。不行敘入。察出照諱盜例議處。應如所請。從之。廣東總督郝王麟疏奏瓊州府海口港門東西礮臺之前。壅沙一道。盤繞堅厚。延袤十餘里。爲海口增添護衛。兵民莫不慶忭。下部知之。壬寅戶部議覆署直隸總督唐執玉會同河東總督田文鏡疏言。東省邱縣之五營村莊。地處極西。孤懸北直界內。請改歸直隸廣平縣管轄。應如所請。從之。甲辰移廣西慶遠府同知駐宜山縣之德勝鎮。添設宜山縣龍門司巡檢一員。從雲貴廣

西總督鄂爾泰請也。乙巳工部右侍郎何國宗緣事革職。陞內閣學士趙殿最爲工部右侍郎。丙午諭兵部提督馮允中熟悉邊情。老成練達。但聞近患目疾。行走須人扶掖。於訓練操防。稍覺未便。西寧一鎮關係緊要。其總兵官事務著德成協同辦理。陝西固原提督樊廷。現在軍前。已降旨令回固原之任。俟樊廷到任後。著署陝西固原提督范時揆協同馮允中辦理陝西西寧總兵官事務。禮部議覆監察御史湯倓條奏。凡遇大祀中祀嗣後。請令六科散給事中。各道監察御史。照郎中例一體敬謹陪祀。永爲定例。應如所請。從之。旌表湖南茶陵州烈婦劉世祿妻李氏。強姦不污。被刃殞命。給銀建坊。入祠致祭。如例。丁未諭內閣。連年用兵邊塞。輓粟飛芻。不無資於民力之處。而草野之間。不知軍國邊防之重計。朝廷萬不得已之苦心。溺於私情。妄生疑議。是以特遣大臣官員前赴

秦省宣諭化導務使僻壤遐陬家喻戶曉不可視為具文潦草塞責更不可指稱公事派累地方儻奉行不力而轉令地方有供應之煩是朕之遣官非所以安之乃適以擾之也欽差大臣等已給與驛馬廩給其分派之官員等皆厚給公帑以為僕從車馬館餐行李之資所到地方一絲一粟不許索取該有司亦不許應付餽送儻有不遵朕旨者與受同罪決不姑貸若差往之官員等有生事滋擾而總理大臣失於覺察者朕將於大臣是問儻地方辦理軍需有騷擾民間而差往之大臣官員知而隱匿者別經發覺朕於欽差之大臣官員是問將此旨通行曉諭知之○以正藍旗蒙古副都統薩穆哈署正黃旗滿洲都統○議敘雲南削平法憂逆夷功在事官員兵丁人等加級紀錄賞賚有差○己酉孝端文皇后忌辰遣官祭昭陵○鑄給四川總督關防○庚戌授奉國將

軍哈孚喀子托錫為奉恩將軍○辛亥諭兵部向來千總六年俸滿該管上司保送兵部帶領引見得以陞用其平常之員即在外省註冊朕恐此等註冊人員內尚有可用之材故降諭旨有情願赴部者令其自行赴部具呈揀選引見今兵部帶領引見之註冊千總張文煜等十員人材弓箭尚屬可觀似此等人員由兵丁歷任千總於營務已閱歷有年若非朕降旨揀選引見伊等終於不得推用殊為可惜著行文各省督撫提鎮等嗣後千總年滿時務須加意遴選出具考語咨部如人材弓馬可觀而或有行止不端廢弛營務之處亦於咨文內聲明報部存案俟該員到部時查對儻有草率忽畧出具考語不符以致人材屈抑經朕察出定將該管上司加以處分○甲寅改陝西西安府永豐倉大使為西安糧道永慶倉大使從西安巡撫武格請也○以故青海扎薩克多羅郡王色卜騰扎

爾子策凌拉布坦襲爵○予故山西提督袁立相祭葬謚勤毅○乙卯議敘勦滅貴州八達寨逆獍功在事文武官弁左江鎮總兵官蔡成貴等及出征兵丁並陣亡候補守備李文仲等分別賞卹有差○予故禮部尚書常壽祭葬如例○丙辰廣東巡撫鄂彌達疏報瓊山儋州歸化等州縣生黎四百八十丁歸誠投納請入版圖下部知之○予故陝西涼州總兵官袁繼蔭祭葬如例○丁巳以翰林院編修王雲銘提督河南學政編修趙晃提督廣西學政編修吳延熙提督雲南學政○戊午諭內閣聞天津一帶民間漁船專以販魚爲業每年穀雨以後芒種以前是其捕取之時亦猶三農之望秋成也若此時稍有耽悞則有妨一年之生計矣目今天津運往山東積貯米糧皆僱覓漁船裝載然亦當聽小民之情願勿以濟山東百姓之儲而妨直隸民生之計著直隸總督天津總兵官速飭辦

理糧務人員就近酌量此時不可強僱漁舟致令失業此係積貯備用之米石俟過芒種以後運送亦未爲遲其速將朕諭通行傳知○禮部議覆廣西巡撫金鉅疏言泗城鎮安二府及慶遠府屬之荔波縣東蘭州太平府屬之寧明縣舊無應試童生請令外省及本省別府之人有情願入籍者咨查本省如無過犯准其編入烟戶入籍考試仍呈明學政註冊入學中舉之後照奉天定例不許搬回原籍其嫡親子男弟姪同時入籍有名者准其一體考試嗣後如有土屬內改流之州縣均請准照此例於十科後停止應如所請從之○庚申諭大學士等上年大將軍岳鍾琪在京時條議進兵事宜令河南採辦黑茶三萬五千封解送西安交與巡撫武格送至已爾庫爾軍營以備進兵賞賚之用今大將軍既停進發則茶封非所急需聞武格等以未奉部文停止仍委人員運送軍營似此不急

之務徒多勞費著即行文前去暫行停止又
今春命往陝甘効力人員若在內地差遣其
力量尚可自備資斧聞武格將伊等派往已
爾庫爾軍營亦令自出盤費並無幫貼恐微
員等力量不敷有誤公事一併傳諭辦理軍
需大臣等知之 豁免江南高郵山陽等八
州縣徐州一衛康熙五十一年起至雍正五
年止挑河築堤挖廢民田額徵銀七千七百
兩米四百二十石有奇 辛酉以散秩大臣
拉音署正黃旗護軍統領 壬戌諭內閣近
見蒙古旗分人能蒙古語言繙譯者甚少沿
習日久則蒙古語言文字必漸至廢棄應照
考試清文繙譯例考試蒙古文繙譯取中生
員舉人進士以備理藩院之用如有學習漢
書願就試漢文者照常准其考試於別部補
用著內閣會同理藩院議奏尋議八旗蒙古
旗分內能蒙古繙譯者請照考試清文繙譯
例三年內考取生員二次舉人一次進士一

次其考試蒙古舉人進士與考試清文舉人
進士合爲一闈令滿洲坐東號房蒙古坐西
號房取中後將滿洲蒙古各爲一榜其考試
生員派蒙古提督學政一員於清字日講四
書內視漢文三百字爲准出題一道考試舉
人進士派蒙古主考一員蒙古同考官二員
仍以清字日講四書一道爲首題再加清字
奏疏一道爲次題俱令其以蒙古文繙譯至
生員舉人進士額數著考試官選擇應取試

卷臨期奏請從之

大清世宗敬天昌運建中表正文武英明寬仁
信毅大孝至誠憲皇帝實錄卷之一百五

大清世宗敬天昌運建中表正文武英明寬仁
信毅大孝至誠憲皇帝實錄卷之一百六

監修總裁官先朝大臣協理官太僕寺卿和碩公孫士英兵部尚書理兵部事三等伯加十五級軍部用奉

總裁官九經大夫協理官起居注太僕寺卿和碩公孫士英兵部尚書理兵部事三等伯加十五級軍部用奉

第三等伯加十三級臣張廷玉先朝大臣經筵日講官起居注太僕寺卿和碩公孫士英兵部尚書理兵部事三等伯加十五級軍部用奉

翰林院掌院事加二級臣福祿先朝大臣經筵講官太子太傅兼開太學士禮部尚書加六級臣徐本先朝大臣

經筵講官議政大臣協理官開太學士事務官部尚書仍兼管太常寺鴻臚寺事臣三泰等奉

敕修

雍正九年辛亥五月癸亥朔諭大學士等據

實錄卷一百六

殷扎納達羅德成馮允中等先後奏稱青海
居住之公拉查卜台吉查漢喇卜灘從梭羅
木過黃河移往他處居住又聞戴青和碩齊
察罕丹津亦往他處遷移不在海流圖地方
住牧因撥派兵丁官買馬羊辦理之人不甚
妥協伊等暫行躲避等語朕因上年準噶爾
乘我西路軍營不曾防備傾其醜類盜竊駝
馬因念青海各扎薩克人衆恐遭逆賊侵害
是以諭令派出兵丁為防護之計每名賞給

銀兩爲衣裝之用。其諭令採買馬羊者原欲使伊等所有牲畜得變價值可獲利益。竝非大兵需此些微之助也。前殷扎納赴西寧時。朕面加訓諭。一切派兵採買之事。悉聽衆蒙古之便。不可絲毫勉強。竝慮蒙古王台吉科派所屬之人。諭令嚴行禁約。豈肯令差往之人。逼迫蒙古以從事乎。今拉查卜等無故遷移他往。其中自有情由。必係殷扎納等不能宣揚朕諭。使衆心共曉。而採買馬羊又不聽從其便。以致拉查卜等心懷疑畏。暫避差徭。雖拉查卜等甚屬孟浪糊塗。亦殷扎納等奉行不善之所致也。今特頒諭旨。曉諭拉查卜等。令其速回本處。竝將隱情據實陳奏。再傳諭德成達鼐。馮允中等。令其明白開導。善爲安輯。竝將伊等如何疑畏遷移之處。查明具奏。其餘地方事宜。俟侍郎衆佛保去時。再行詳諭。○琉球國王尚敬遣陪臣向克濟等奉表謝恩。進貢方物宴賞如例。○甲子諭大學

士等。鎮安將軍常賚著領兵前往安西駐劄。石雲倬著授爲西路副將軍。前往軍營。○諭兵部。今歲命往陝西西安駐防兵丁。派出直隸張家口營兵一百八十餘名。聞各兵家口。俱給與新募之兵。支領無可給發。以致各兵家口。三月未曾領餉。日食不敷。四路奔訴。凡兵丁撥派他往者。如馬兵一名。原領月餉二兩。則以九錢付本兵。爲途中鹽菜之用。以一兩一錢。爲養贍家口之資。所有兵米。亦仍令其家口支領。若有新募兵丁。則另行給與月餉。竝無以本兵錢糧。付新募兵丁之事。何以張家口官弁等。錯誤遲延。以至各兵家口。餉口無資。著該督該提鎮。卽速查明。照例給發。竝將遲誤之處。據實參奏。○山西巡撫覺羅石麟疏言。太原駐防兵丁五百名內。派出三百名。前往西寧。所有留營兵丁。不敷差委之用。據各旗間散丁壯塞爾泰等呈稱。自祖父

以來受國家養之恩。情願不領錢糧。當差効力。臣隨選得年力精壯。技藝可觀者一百名。不給錢糧。令其承應差使。俟有兵丁缺出。揀選頂補。得旨。太原各旗閒散丁壯等。既令當差學習行走。自當酌加恩澤。以示鼓勵。著每名月給銀一兩米三斗。以資其食用。該撫石麟時加教訓。務令勤謹効力。黽勉向上。若有名糧缺出。即將伊等揀選頂補。以副朕教養兵丁之至意。○移廣東瓊州協左營守備一員。帶兵一百二名。同原防弁兵。駐劉文昌舖前礮臺。從廣東總督郝玉麟請也。○乙丑。孝誠仁皇后忌辰。遣官祭景陵。○丙寅。諭兵部。樊廷從軍營進口。著即赴陝西固原提督之任。范時捷著仍留固原。俟立秋以後。樊廷乘驛來京。陛見。其提督印務。仍著范時捷署理。俟樊廷回任後。范時捷再往西寧協辦總兵官事務。○以詹事府少詹事張照署內閣學士。○加一等侍衛阿成阿。

副都統銜管轄家選兵二千名。前往西路軍營。○兵部遵旨議覆雲南烏夷背叛。所有陣亡殉難文武員弁。應照例予卹。署都司僉書劉崑應贈署遊擊署守備馬秉倫應贈署都司僉書各予祭葬。給銀四百兩。廕一子以守備用。把總周世美應贈千總。予祭葬。給銀一百兩。廕一子以衛千總用。其遊擊劉崑妻張氏。妾吳氏。同其二女一門殉。即應於遇害地方表立石碑。通鐫姓氏。仍各給銀建坊入祠致祭。司獄陳天錫手刃妻妾。自刎。官署應贈知縣。予祭葬。廕一子入監讀書。其妻妾並建坊入祠。通判劉鎮寶署知縣。賽枝太應贈按察司僉事。教授李焜應贈國子監助教。知事劉懋美應贈衛經歷。巡檢葉祚徽應贈縣主簿。並予祭葬。從之。○丁卯。諭大學士等。巴爾虎兵丁一百名。前赴巴爾庫爾軍營。由古爾班賽堪行走。路近而水草好。著由此路前往。所派兵丁。先令於鑲藍旗察哈爾地方齊集。

侯阿敏道嚆扎爾圖到時帶領起行京城所選驍勇兵一百名亦著由此路前往○戊辰諭大學士等今年三月間準噶爾賊人侵擾吐魯番紀成斌聞信即令樊廷等領兵前往應援此舉實欠詳審蓋賊人之意原欲疲勞我士馬故爲此出沒詭計耳彼時朕閱紀成斌之奏即降旨切加申飭越數日岳鍾琪奏到其所見與朕意相同又越數日紀成斌奏到知賊人未見我師果已潛遁無踪矣賊之狡獪如此是以朕諭令吐魯番人衆商酌遷移暫避之計蓋欲善爲保全之以俟大軍凱旋共享昇平之福也今據大將軍岳鍾琪奏報賊人於四月間又復侵犯吐魯番額敏和卓求請應援大營未曾發兵前往大將軍辦理甚是但朕細思之賊人若仍以千餘人騷擾吐魯番則彼地城垣兵力足以捍禦倘復增添賊衆吐魯番力不能支朕心有所不忍況伊等前次感恩望濟之言甚爲懇切朕又

有令其遷移暫避之旨料賊人必知信息倘乘其遷移之隙而侵害搶掠之是吐魯番之人因遵旨而受累尤朕所惻然者也可傳諭岳鍾琪令其確探賊耗衆寡若何情形若何久暫若何其應否應援之處酌量變通辦理不必拘執前說至於賊兵引去後吐魯番回子有情願遷移者又應如何沿途防護不受賊人劫奪侵陵之處著大將軍留心經理○奉天將軍那蘇圖疏言鳳凰城邊外設立陸路防汛之虎耳山等處有草河鰲河二水俱自邊內發源至邊外莽牛哨地方匯流入於中江其中江之中有洲名江心沱沱西屬鳳凰城管轄沱東係朝鮮國界址每年常有匪類私乘小船偷運米糧雖虎耳山設有陸路防汛而河水阻隔且界連朝鮮難以查緝請於草河鰲河匯流入江之莽牛哨地方設立小船四隻三板船二隻將駐劄虎耳山防汛之官弁一員兵丁二十名再添派官弁一員

兵丁二十名移駐於此立爲水師汛地若值冰凍之後仍撤回虎耳山陸路安設并令該管城守尉等督率稽查得旨所奏設立水路防汛之處既與朝鮮國連界著該部行文詢問朝鮮國王若設立水路防汛於該國有無未便之處俟回奏到日再行定議○己巳諭八旗都統等八旗所設錢局應照民間價值逐漸減價至每兩換大制錢一千文而止如此則錢價自平於民生實有裨益其隨時減價之處八旗務須畫一辦理○庚午旌表河南商水縣烈婦王三妻郭氏拒姦不污投繯殞命給銀建坊入祠致祭如例○辛未諭內閣用兵以籌餉爲先而輓運以得人爲要果得其人則民力不致煩勞國帑不致糜費而兵食饒裕士飽馬騰其裨益於公事良非淺鮮也年來西北兩路用兵籌餉事宜朕心甚費區畫北路軍糧范毓麟承領運送諸事諳練措置得宜朕深嘉獎已加優敘西路軍糧

向來俱係官運今行之日久難保無侵帑累民之處因思通政使趙之垣副將馬龍乃三秦世族且官至大員於本地土俗民情素所熟悉若照范毓麟之例領取帑銀轉輸輓運似屬可行之事朕將此詢問趙之垣據稱情願効力查內地軍糧運送巴爾庫爾軍營者年來經理已有頭緒但自軍營進勦之糧尚無轉運之善策著趙之垣前赴軍營與馬龍公同商酌如何運送之法聽其自行定議酌量舉行每石運價若干朕悉照數給與不令絲毫賠墊但不可有浮冒侵蝕之弊總與地方有司毫無干涉其間遲速機宜及道途防護等情則與大將軍該督撫等計議而行俟趙之垣到彼與馬龍商酌定議果能承領辦理具奏到日給與欽差關防○壬申諭大學士等鎮安將軍常賚著從安西前赴軍營與大將軍岳鍾琪副將軍石雲倬等計議進兵事宜但聞賊人有窺伺陶賴卡倫之信常賚

前赴大營時途次須小心防範或帶兵丁數百名護送或探聽賊人遠遁之後再行前往務慎重妥貼總以七月初旬至營為期其現在甘涼歇息之歸化城蒙古兵一千名已奉旨令其前赴軍營備用可令原管領之都統民敦等帶領出口務於七月初旬到營可傳諭查郎阿等並常賚知之○癸酉諭大學士等任國榮仍帶總兵銜前往北路軍營管理車騎兵兼司屯種事務著大將軍傅爾丹酌量派委照總兵官胡傑之例行走○諭內閣朕以江南蘇松等處積欠錢糧甚多弊端百出官民並受其害特令大臣等率領多員前往清查分別官侵吏蝕民欠務期至確至當以清積弊以除民累前聞各員奉行不善轉至閭閻有追呼之擾大負朕之初意已降旨嚴行申飭禁止催徵後又聞有司以民欠逼令認為侵蝕如父子兄弟異戶即為包侵又因別名立戶即加以包侵之罪又昨據清查

太倉州錢糧之溫而遜奏稱愚民每將自欠錢糧混開被吏侵蝕及經逐戶覆核實係自田自欠因出示通曉已皆據實稟改是民欠之中竟有捏稱侵蝕者著差往各員詳細確查有應行更改之處即行更改務使分晰清楚毫無疑竇以副朕釐姦剔弊嘉惠元元至意○授輔國將軍巴爾圖子謨章為奉恩將軍○雲貴廣西總督鄂爾泰奏報烏蒙逆賊悖亂將士忠勇忘身不三旬而復郡治不七旬而收全土今渠魁就擒並無漏網雲貴土兵已經通檄全撤得旨烏蒙改設府治之初諸事尚未就緒又值劉起元不善撫馭激成事端逆黨勾連幾有猝難收拾之勢而將弁軍士奮勇爭先旬月之間削平寇亂此皆總督鄂爾泰平時節制封疆以公忠表率官僚以義勇訓練將士而臨機應敵又復調度有方用能迅奏膚功永安苗境論功行賞當以鄂爾泰為先但念該督自聞賊變以來時時

以先事疎防引過自責。今軍事告竣。不肯自居蕩寇之功。屢次陳奏。情詞懇切。朕曲從所請。以成其謙抑之素志。若以功過而論。則一時疎畧之微瑕。豈能掩其多年教養之善績耶。特將朕意宣諭中外。共知之。所有陣亡帶傷及奮勇官兵。著該督查明送部。從優議敘賞卹。○甲戌。調貴州安籠總兵官韓勳為貴州古州總兵官。陞貴州大定副將劉朝貴為貴州安籠總兵官。雲南楚姚總兵官官祿緣事革職。調雲南永北總兵官柳時昌為雲南楚姚總兵官。○乙亥。

皇后千秋節。停止行禮筵宴。○遣官祭

關聖帝君。○諭大學士等。從前三月間。賊衆有二千餘人。來吐魯番。見我兵前往應援。賊兵即先行潛遁。今據大將軍岳鍾琪奏報。四月間。又有賊千餘來擾吐魯番。并有二百餘人犯我陶賴卡倫等語。朕看此情形。或者將來賊人由哈喇沙爾潛往噶斯地方。又如上

年故智。暗行騷擾。或增添人衆。窺伺青海。亦未可定。格默爾等所統兵力。未免稍單。朕前次曾有不應調撥西寧兵丁之旨。若此時有應用添兵之處。恐格默爾等亦不敢調取。德成亦不敢派撥。可傳諭德成達鼐。馮允中。管承澤。格默爾。鼐滿岱。福寧等。從前所以不令調撥兵丁者。蓋西寧軍務尚未就緒。自以固守根本為是。今西寧布置已定。兵力有餘。若賊人窺伺噶斯。自宜發兵應援。況目前青海蒙古兵丁。尚未攢集齊全。即器械等件。亦未周備。難以望其捍禦賊鋒。亦賴官兵為之保護。著德成等就近酌量。倘有用兵之處。或著管承澤。鼐滿岱帶領前往。或德成另議一二。人前往。至官兵派出之後。遇有本地添兵防守之處。即將土兵派出。此旨著德成。拉諭。衆佛保。殷扎納知之。○諭兵部。山東登州總兵官曾謨著調補山東兗州總兵官。山東兗州總兵官岳含奇著調補山東登州總兵官。前

降諭旨令湖廣預備兵丁二千名聽候西路軍營調撥之用。著岳含奇前往湖廣會同總督邁柱加意挑選人材壯健技勇優長者二千名。即令岳含奇帶領前赴西安駐劄其領兵之副參遊守千把等官亦著邁柱岳含奇揀選前往。此所派兵丁內將長於藤牌者挑選五百名或一千名充入二千名之數。若弁兵內有人材可用情願赴軍前効力者亦著邁柱岳含奇酌量派用。此二千兵丁於秋末冬初候旨從湖廣起身一應賞賚銀兩照例給與。其山東登州總兵官印務著浙江溫州總兵官冉起鳳署理浙江溫州總兵官印務著總督李衛遴選委用。○吏部議覆寧古塔將軍常德疏言寧古塔助教請照驛站官之例定限六年年滿之後令該將軍出具考語具題送部其由八品筆帖式補授者以主事等官用由無品筆帖式補授者以七品小京官等缺用應如所請從之。○補行湖南省雍

正八年分大計卓異官二員不謹官五員罷軟官五員。年老官九員有疾官二員才力不及官二員浮躁官二員分別陞賞處分如例。○戊寅雲貴廣西總督鄂爾泰疏言雲南普洱府添設新鎮額兵二千四百名除原留普威營兵一千四百名及新募補額外其餘調撥之兵俱有家口在各標營一時無力搬移未免分心兩地共計未搬家口兵丁八百名請賞給路費俾得成家立業。又黔省撥往古州清江等處鎮協營兵丁及滇省烏蒙鎮新增兵丁二千五百名內有道途搬移之費者並請一體賞給得旨數年以來滇黔兩省兵丁踴躍急公甚屬効力朕已屢加恩澤獎賞勤勞茲所派往普洱及古州清江烏蒙等處之兵俱從他處搬移安土重遷應加恩恤該督陳奏甚是著照所請給與遷移之資於公用銀兩內即行支給以副朕惠養兵丁之至意。○己卯諭大學士等西路軍營千總馬建

功奉差探聽賊兵信息。帶領兵丁十人前往。因人少力單。遇賊被害。竝傷兵丁石玉。張秀。閔得三人。深可閔惻。馬建功等。俱照陣亡之例。加恩卹賞。○授信郡王董額子查庫齊。爲奉國將軍。○寧遠大將軍岳鍾琪奏言。賊夷出沒無常。毋庸零星遠設卡倫。致滋賊人覬覦。今於鏡兒泉三處。安設大卡倫。并派兵丁登山瞭望。再於沿途五里一撥。安設塘站。直接軍營。一遇有警。接遞相傳。得旨。賊夷既施鬼蜮之技。出沒紛擾。意欲疲我士馬。竝使軍營馬匹。不得牧放。自當計議防範。擒剿之策。今安設大卡倫三處。固是。但此數千弁兵馬匹。如何牧放。看管可免。賊人窺伺。又三大卡倫之外。尚設小卡倫否。若於賊之來路。設小卡倫。仍屬照前。而更多一番防備。恐兵少力單。難於捍禦。若不設小卡倫。則賊之來踪。日間可以登高瞭望。昏夜則如之何。又不知此三大卡倫。果能全堵賊之來路。俾必不能近。

我軍營窺我牧場否。倘乘小卡倫撤回之後。越大卡倫。擾我沿路塘站。不可不防。至於阿寶所領鄂爾多斯兵丁。從前派往軍營者。原令專司牧放之事。乃大將軍等將伊等分散。派守各處卡倫。伊與綠旗兵丁等。言語不通。徒彼此推諉。甚屬無益。嗣後蒙古兵丁。不可似此零星派用。○庚辰夏至祭

地於

方澤。遣顯親王衍潢行禮。○諭內閣。從前因準噶爾之肆虐。吐魯番回民畏其侵陵。有情願移居內地者。諭令地方有司。善爲安插。撫綏使之寬裕。從容得所。頃聞在肅州居住之回子等。田瘠水少。收成歉薄。而所有牲畜。亦不敷用。生計未免艱難。此皆經管之員。辦理疎忽。而該省大臣。失於覺察之所至也。著署總督查郎阿。將從前辦理不善之員。查出題參。其有應行加恩撫恤之處。亦著查郎阿酌定。請旨。即將此曉諭吐魯番移住內地之回民。

知之○湖廣總督邁柱題湖南忠路安撫使
覃建侯故請以其子覃梓楚承襲下部知之
○癸未諭內閣朕視天下兵丁皆爲一體莫
不冀其生計有賴俯仰從容然養育於平時
者自有經常畫一之道而加恩於格外者則
不得不由近及遠次第舉行如恩賞兵丁生
息銀兩一事首先及於在京之八旗次則推
廣於外省駐防及督撫提督標下又次推廣
於各省鎮標皆令將軍副都統督撫提鎮大
臣會同經理以爲長久之計數年來固有料
理得宜可濟兵丁之緩急者而措置未協啓
人議論者亦往往有之則此事經畫之難可
知矣至於各省協標兵丁雖同列行伍而駐
劄分防之處與督撫提鎮相隔遙遠若偶遇
緩急必須文移往來多延時日始得領此數
金豈能濟其一時之用若照例給發則現今
督撫提鎮大臣辦理此事尚覺繁難未能妥
貼副將以下等官豈可交辦此事恐徒貽累

於弁員而無裨於兵丁之實用也近聞各省
協標兵丁有謂督撫提鎮等不爲代請而生
怨望之心者不知國家之施恩並無偏向戎
行之沐澤自有後先將來西陲軍務告竣國
用充饒朕自徐思周徧加恩之策若伊等不
察事勢此時遽欲均沾妄生冀倖是因朕逾
格之恩而啓非分之望則朕惟有將現行之
恩賞悉令撤回然後可以畫一豈不因數人
之無知而阻衆人受恩之路乎思之思之○
兵部議覆廣東總督郝玉麟疏言守備以下
革職之員除有籍可歸照例勒令回籍外如
本籍果無戶口田糧室廬墳墓者許該弁呈
明該管地方官咨查原籍取具該府州縣印
結報部聽其入籍當差應如所請從之○山
西巡撫覺羅石麟疏報忻州長子等四州縣
開墾雍正八年分田地一十七頃有奇下部
知之○甲申諭內閣西路軍營臺站自上年
十二月以來往來文移繁劇長途遞送從無

遲誤該管臺站官弁實心供職其在塘夫役人等効力亦屬勤勞著交與辦理軍務之署陝西總督查郎阿將京城至軍營一路兵臺官役等分別內地外邊加恩給與議敘賞賚

○乙酉

孝恭仁皇后忌辰遣官祭

景陵○丙戌吏部議覆巡察盛京御史釋伽保條奏盛京銀庫舊有司庫二員請照掌關防官之例三年期滿令該堂官出具考語送部以在京司庫及對品之小京官調補以防久留滋弊應如所請從之○丁亥廣西巡撫金鉷疏言教職一官無可展施縱有才能莫由顯著請於廣西現在教職內擇其年力強壯應對明白才品可觀之員咨送督臣分派雲南貴州兩省俟遇有州縣及佐貳等缺酌量試用題補並請通行各省一體遵行得旨訓士理民俱關緊要封疆學政各有專司定例彼此不得干預若將教官之優者悉改膺民

社之寄是以理民爲重而以訓士爲輕凡留司鐸之任者皆上司所棄而不取之人勢必使天下教官莫不希冀陞遷日萌鑽營倖進之念孰肯專心訓課爲國家長養人材乎況督撫不可干預學臣之事亦如學臣不得干預督撫之事也金鉷此奏豈非欲兼攬學政之權且沽教官之稱譽乎即據稱教職一官無可展施其才能莫由顯著既如此則又何知其可辦吏事而選用之手若以語言應對之間定人品之優劣分才具之短長恐鑒衡之失實者不少矣至於教官之賢者督撫原可隨時保舉而大計之年又可列爲卓異並非不得與於薦揚之選者金鉷實屬冒昧著將原本擲還○刑部等衙門議奏河南祥符縣陳兼優僕人單從禮之妻張氏因劉聖全逼姦不從守正自縊例應給銀旌表建坊墓前因係僕婦宜分良賤請停其入祠致祭從之○戊子雲貴廣西總督鄂爾泰摺奏廣

西思明土府所屬之鄧橫寨強暴恣橫積惡多年通計一百九十餘戶丁壯千人而兇徒聚處專事劫殺左有雷蓬右有那練暗結黨羽密竹層柵藉爲外衛深壕險坎設爲內坑鎗箭能出不能入兵役敢進不敢前黔苗滇獠之中從無此兇悍者從前提臣張溥以爲必不可縱而所委副將尚清昧於形勢輕率進剿致損兵威臣令鎮臣蔡成貴自二月十四日抵軍營搶築礮臺劉營駐守示以圍困之意一面督兵漸逼賊巢剋期攻入三月初四日據報我軍分中左右三路攻賊之四六九三甲占踞其要隘焚燬其寨柵殺死賊兵無數生擒一百餘賊悉行正法尚餘男婦六百餘名解赴省城聽候發落賊衆全平奏入報聞○己丑刑部議覆甘肅巡撫許容疏言番民納些誠心歸附乃被背逆土司黃璽正綁縛攢射至死不移忠義可嘉請照例旌表建立石碑刊列名姓仍製牌位入祠致祭應

如所請從之○庚寅湖北巡撫魏廷珍疏報荊門鍾祥等十三州縣襄陽一衛開墾雍正八年分田地一千三百三十頃有奇下部知之

大清世宗敬天昌運建中表正文武英明寬仁信毅大孝至誠憲皇帝實錄卷之一百六

大清世宗敬天昌運建中表正文武英明寬仁
信毅大孝至誠憲皇帝實錄卷之一百七

監修總裁官光祿大夫總纂修官太僕寺卿和碩大學士兼兵部尚書總理兵部事務三寶倫加五級臣鄂爾泰

總裁官光祿大夫總纂修官起居注太僕寺卿和碩大學士兼兵部尚書仍兼掌理吏部尚書翰林院掌院

事三寶倫加十三級臣張廷玉光祿大夫總纂修官起居注太僕寺卿和碩大學士兼兵部尚書仍兼掌理吏部尚書翰林院掌院

翰林院掌院事加二級臣福祿壽光祿大夫總纂修官太子太僕寺卿和碩大學士兼禮部尚書加六級臣徐本光祿大夫

經筵講官議政大臣協辦內閣大學士事務禮部尚書仍兼掌理吏部尚書三寶倫等奉

敕修

雍正九年辛亥六月壬辰朔○癸巳以左春

坊左庶子兼大理寺卿索柱兵部左侍郎楊

汝毅順天府府丞陳樹棠俱署都察院左副

都御史太常寺卿劉栴緣事降調陞大理寺

少卿張國棟爲太常寺卿○甲午諭大學士

等寧遠大將軍岳鍾琪摺奏準噶爾賊衆二

千餘人圍困魯谷慶之城晝夜攻打二十餘

日吐魯番回子奮勇出擊殺逆賊二百餘

人帶傷之賊甚多請以三千勁兵兼程而進

必獲全勝將來即以此三千兵丁駐劄吐魯

番合之回民足備防禦等語朕前次聞吐魯
番回民等感恩望濟之言甚爲懇切恐賊衆
再以大力侵凌伊等不能抵敵爲其所困已
降旨令大將軍岳鍾琪酌量發兵應援不必
拘執前說今岳鍾琪具奏之日尚未接到朕
旨是以仍作游移之詞凡用兵之道在於隨
機應變不容刻緩若果岳鍾琪確有所見即
應遣兵速往一面奏聞何必待降旨到日始
遣兵前往乎又奏稱挑選精兵三千名駐劄
吐魯番外餘剩壯健兵丁留駐新城防守儘
足備進擊烏魯木齊之數等語朕思我兵進
擊烏魯木齊之時若有賊衆繞道侵犯新城
當思應援勦殺豈可但作防守之計至於此
時應援吐魯番自屬應行之事但噶爾丹策
零性情躁妄此次失利之後或於冬季多添
兵力攻擾吐魯番未知我三千兵丁合之回
子之力便可以從容捍禦否且我軍既駐劄
吐魯番則將來不得不時爲應援岳鍾琪從

前曾有吐魯番駐兵數萬之奏。若此時駐兵三千將來因此牽制。有不得不加增之勢。此則舍本逐末。必不可行者也。朕又思吐魯番乃阿爾灰。哈喇沙爾兩路之關鍵。既有我軍駐劄。則將來築城於烏魯木齊時。呼吸相應。賊人不敢繞襲我軍之後。況我軍正欲進攻賊之巢穴。若賊人果以大衆來犯吐魯番。則我軍不勞遠行。可以就近殄滅之。亦是善策。總在岳鍾琪悉心籌畫。務期萬全。若將大營兵丁三千名。派往吐魯番。則此三千之數。當另行撥派以足額。吐魯番地方。難於多養馬匹。況此三千兵丁。乃爲防守之用。非爲追擊之用。所帶馬匹。可酌量存留。其餘仍遣回大營牧放。至於礮火鉛彈。多帶備用。上年官買吐魯番糧石。不必運送軍營。即著留貯吐魯番。以備大兵之用。吐魯番回目額敏和卓等誠心向化。盡力擊賊。甚屬可嘉。著大將軍傳旨獎勞。酌量賞給緞足銀兩茶葉等項。彼地

既遭賊人侵害。恐收成歉薄。糧食不敷。著即以官買糧石酌量賞給。務使回民得所。將此詳悉傳諭大將軍岳鍾琪知之。乙未。諭大學士等。河州副將馬雲於上年冬月在北山領兵敗賊。著有勞績。今聞病逝。著加總兵官銜。賞銀一千兩爲歸櫬之費。兵部議覆江南河道總督嵇曾筠疏言清江地方止有把總一員。不足以資彈壓。請添設守備一員。駐劄巡防。令把總聽其兼轄。應如所請。從之。○移廣東廣州府通判駐新城南海縣縣丞駐十三行。從廣東巡撫鄂彌達請也。○丙申。以散秩大臣伯欽拜總理

三陵事務。○封故愉郡王允禩子弘慶爲多羅愉郡王。○免江南宣城等四縣雍正八年分水災額賦有差。○丁酉。盛京工部侍郎陳福壽緣事降調。陞內閣學士對琳爲盛京工部侍郎。○以故科爾沁多羅扎薩克圖郡王撒胡喇克子沙晉德爾格爾襲爵。○戊戌。諭宗

人府。朕叔恭親王常寧昔年受

皇考友愛深恩。不知感激報効。而因循懶惰。悠忽終身。此中外所共知者。恭親王身後。

皇考因滿都護賦性庸愚。不便將伊承襲。以其弟海善襲封貝勒。令在內廷行走。教誨施恩。望其成立。以繼恭親王之後。乃伊性情暴戾。行止乖張。口出逆言。心無倫理。種種罪惡。不可殫述。嗣因步軍統領託合齊案內。款蹟敗露。革去貝勒。禁錮在家。未幾仍蒙

皇考寬宥慈恩。將伊釋放。遣往軍前効力贖罪。乃伊仍不悛改。輒敢違旨私回。若論軍法憲章。均無可赦。朕念其爲恭親王後裔。委曲全其性命。仍行拘禁。此海善之大概也。從前海善獲罪之後。無應襲之人。

皇考不得已。而仍用滿都護。且加以厚恩。畀以榮寵要職。無非欲其努力向上。改過自新。以延恭親王之一脈。乃伊下愚不移。轉入於阿。其那塞思黑。蘇努保泰等之邪黨。私相固結。

而不思

皇考高厚之鴻慈。其顛倒妄亂。至於如此。及朕即位以來。又復加恩任用。指示開導。以感動其天良。冀收後效。而伊顧戀匪黨。狡獪百端。搖惑人心。阻撓國政。且鑽營詐僞。行止卑污。其獲罪被參之案。不可枚舉。朕悉行寬宥。而保全之。此滿都護之大概也。滿都護之弟對青額。庸劣不堪。罔知愧恥。昔在侍衛班聯。曾因飲酒沉醉。竟溺於中和殿階級之上。此衆人所共知者。海善之子倫布。昔蒙

皇考深加恩養。令在乾清門侍衛班中行走。訓誨矜全。冀其上進。乃

皇考升遐之日。萬國臣民如喪考妣。而倫布布面無悲戚之容。目無涓滴之淚。朕以此知其未具人心矣。是以降旨。將伊與伊父海善一同拘禁。今已病故。此對青額。倫布二人之大概也。朕叔恭親王之子孫。大抵如此。假使稍有可望成立之人。則滿都護屢獲重罪之

後朕即可選擇而用之矣。祇因不得其人。是以將滿都護姑容曲宥。以至於今。今滿都護病故無子。見無可承襲者。朕念吾叔後嗣凋零。再四思維。或擇一人襲封貝勒。或賜襲郡王。以繼其後。然而得其人。則可以繼續先緒。不得其人。則必至廢墜家聲。且一時勉強襲封。而不克承受。將來獲罪被譴。難以保全。非所以成就之也。海善等即前車之鑒。若宗人府會同議政大臣八旗都統。滿洲尚書侍郎等。秉公詳慎。於恭親王子孫內。選擇可以襲封之人。公同舉出。奏聞請旨。若果不得其人。朕意欲照

皇考時。以朕弟淳郡王過繼純親王為嗣之例。於朕幼弟中。選擇一人。封為郡王。以繼恭親王之後。如此。則朕叔之王爵。可以長久綿延。而伊之親子孫。各守祿位。易於稱職。永遠同受國家之恩澤。似為有益。亦著會同悉心定議具奏。○庚子。寧遠大將軍岳鍾琪疏言。賊

夷圍困吐魯番。臣挑選馬兵三千名。令張元佐曹勳張存孝統領。於四月二十四日進發。又令顏清如帶兵二千名。前赴塔庫駐劄。又備兵四千名。令紀成斌統領。前赴陶賴要隘駐劄。僅賊人傾眾前來。臣即親身統領陶賴及塔庫二處駐劄之兵。兼程前往勦戮。惟是回民若令此時遷移。途中行走不能便捷。三千護禦兵丁。首尾亦不能相顧。擬將應援三千馬兵內。暫留一千名駐劄吐魯番。以為抵禦防範。其餘二千名馬兵。令其回營。如蒙准臣前奏。安設三千兵。駐劄吐魯番。臣即將駐劄塔庫之步兵二千名。令其前往補數。俟我軍進擊烏魯木齊之時。再令回民遷移內地。即將此一千兵丁護送。可無劫奪之患。得旨。應援吐魯番之舉。朕早已降旨。此奏尚有計算未到之處。今年秋間襲擊。是第一善策。至於應援吐魯番。乃相機不得已之舉耳。若但加意籌畫於應援之師。而不計及於襲擊之

舉是舍本而逐末也。且發應援兵丁三千名之外。又令顏清如領兵二千名。駐劄塔庫。紀成斌領兵四千名。駐劄陶賴。是已派兵九千。與前請旨駐兵三千於吐魯番之奏。大不符合矣。今年原議挑選精兵一萬二千名。進擊烏魯木齊。不知此所派應援吐魯番之九千兵。在此一萬二千名兵丁之外乎。抑即在其內乎。此兵平定吐魯番回營。人馬尚可進擊乎。況前奏設三大卡倫於要隘之處。安兵三千名。此非大營之精兵乎。今稱存營兵丁尚有萬餘。足以防禦。假若賊人既擾吐魯番。使我兵前往應援。又以大眾侵犯軍營。或再如上年之故智。繞過大營。驚擾塔爾沁。及圖呼魯克等處。則我軍之力既分。不識尚可剿殺耶。或但能防禦新築城也。奏摺中總未言及此。甚屬疎漏。至於吐魯番一部落。乃向來甚費商議置之度外者。即上年遣發弁兵駝隻往彼搬運米糧。亦俱未經奏聞。致生賊人

窺伺之心。屢次侵擾。此乃從前辦理錯誤。以致目今有不得不應援之勢。今大將軍親在軍營。若確見速應救援。便當遣兵迅往。何必遲迴審顧。且前次奏稱留兵三千名。便可防護吐魯番。萬無一失。今又將吐魯番應否留兵。及回民應否遷移。何時動身之處。請旨定奪。前後全不符合。顯有推諉之意。朕在數千里之外。豈能洞悉地方情形。與臨事機宜。預先一一計算。而指示之乎。殊失朕信任倚賴之初心矣。儻見此諭旨。以爲吐魯番不應移。內勉強順合朕意。輕率舉行。則尤其不可。予故陝西寧夏將軍席伯察。葬謚襄壯。○辛丑。予故直隸古北口提督魏經國。葬謚僖恪。○壬寅。諭內閣。今年仲夏以來。京師雨澤愆期。目前甚覺亢旱。朕於宮中齋心虔禱。尚未仰蒙

天降甘霖。輾轉思維。從來上天之錫福降災。悉由於人心之感召。尚書曰

作善降之百祥。作不善降之百殃。古人又曰福之至也。人自生之禍之至也。人自成之。蓋上天慈愛爲心。斷無降災於人之理。其遭值水旱饑饉者。皆由天下人之自取。所當恐懼修省。以凜

天戒。若因此而或生怨尤之心。則其獲罪更大。而爲無忌憚之小人矣。朕深明此理。時刻自儆。切切冀望天下臣民共修趨吉避凶之道。以承受

上天之恩。數年以來諭之詳矣。今茲亢旱之象。或由於朝廷政事之有闕。或由於臣工職業之不修。或由於士民心術之不善。有一於此。皆足以干

天和。而致祲沴。儻有無知小人。不察人事感召之故。不知

上天垂象之意。狂肆冥頑。敢生怨懟。則乖戾之氣。自外生成。

上天雖欲寬宥。而不可得矣。朕兢兢戒懼夙夜

靡寧。再四推求。欲得致旱之由。急行改易。凡屬臣工。均當撫躬自思。何處不能稱職。何事應當獲譴。一一省察。而悔改之。至爲士爲民者。雖無治人理事之權。而舉念之純疵。居心之善惡。

天高聽卑。實垂照鑒。苟無自作之孽。必不遭難。邇之條。總在吾君臣士庶。各自捫心。省愆思過。勿推於他人。而存自恕之念。勿諉諸氣數。而忘儆惕之心。則和氣致祥。時雨甘霖。必仰邀

上天之恩賜。勉之勉之。著將此旨。通行曉諭。在京官弁兵民人等。咸使知悉。其近京省分。若有缺雨之處。著一體宣示。又諭賭博之事。敗壞品行。蕩廢家貲。其爲害於人心風俗者。不可悉數。欲杜此惡習。則賭具之禁。自不可以不嚴。朕爲此拳拳訓飭。至再至三。凡地方大吏有司。有教養斯民之責者。皆當仰體朕心。奉行唯謹。不當視爲具文也。京師戶口繁

多五方雜處。年來稽查嚴密。不肖之徒頗知
斂跡。至於外省之稽查。較京師爲易。而督撫
以至守令。奉行不力。聞省會之地。有公然製
造賭具。列諸市肆。而不知畏懼者。百姓之貌
法若此。則大小官吏。能辭溺職之罪乎。步軍
統領衙門。屢次拏獲私賣賭具之人。供稱販
自外省地方。則外省之疎忽廢弛。顯有証據
矣。賭博難禁。而造賣賭具之禁。尚屬易行之
事。前年定例。凡失察造賣賭具之知縣。照溺
職例革職。知府革職留任。督撫司道等官。各
降一級留任。著該部將朕此旨再行宣諭。儻
嗣後有犯者。必照定例處分。不稍寬貸。○予
故雲南臨元總兵官魏翥國祭葬如例。○癸
卯諭內閣。仲夏以來。京師亢旱。雨澤愆期。朕
心焦勞。無時或釋。因思刑獄上關
天和。法司衙門。此時尤當加意。除重罪監候處
決人犯。不應寬釋外。凡有牽連待質及候審
候結輕罪之人。將來擬罪。不至於死而羈禁

在監者。著刑部堂官。逐一速查。應完結者。即
行完結。應保釋者。即行保釋。俟處暑後再行
審明結案。八旗高牆拘禁人犯。著該旗大臣
亦照此速行辦理。毋得稽遲。至於枷號人犯。
除情重罪大。奉旨永遠枷示者。不宥外。其有
限期未滿。枷號之犯。著照舊例。暫行保釋。於
處暑後補枷。以滿期限。刑部八旗順天府。五
城御史。可一體遵行。○添設貴州安順府同
知一員。駐卽岱。從雲貴廣西總督鄂爾泰請
也。○署直隸總督唐執玉疏報。霸州大城等
十四州縣。開墾雍正八年分田地。一百七十
頃。有奇。下部知之。○乙巳諭內閣。每年伏暑
之時。停訟停徵。久有成例。況今年五六月以
來。直隸山東河南等省。雨澤愆期。甚覺亢旱。
尤宜寧人息事。感召
天和。或恐庸劣有司。不遵定例。妄滋擾累。著
該督撫通行申飭。時加訪察。如有生事擾
民者。即行題叅。從重議處。○丙午靖邊大

將軍傅爾丹摺奏臣等於五月初六日至科布多築城地方。隨據烏蘇圖舒魯克卡倫駐防之侍衛巴爾善等。拏獲準噶爾賊夷塔蘇爾海丹巴一名。供稱噶爾丹策零派兵三萬。令大策零敦多卜、小策零敦多卜及大策零敦多卜之子多爾濟丹巴三人統領陸續起程至阿爾泰山奇林地方會合來犯北路。今小策零敦多卜已至察罕哈達地方。大策零敦多卜與伊子多爾濟丹巴尚未到齊。見在之兵止有二萬餘名。噶爾丹策零恐哈薩克國聞知乘虛來攻。預先派兵一萬。令大策零敦多卜之子納木扎爾達錫衛徵和碩齊總領駐防阿爾輝地方。又派兵一萬。令諾顏和碩齊總領駐防阿里馬圖西拉百爾地方。噶爾丹策零遊牧處兵丁不過二萬名保守。又供噶爾丹策零前令其妹夫羅卜藏策零帶兵一萬名往阿里馬圖西拉百爾駐劄防守哈薩克國羅卜藏策零因與噶爾丹策零不和率領

屬下三千餘戶來到大國噶斯地方。噶爾丹策零聞知派吳喇忒巴噶滿朱追逐。交戰被敗。復遣喀喇沁杜噶爾之子查袞追逐。因此大策零敦多卜遲延未來等語。臣思賊人尚未全至。乘其不備。正宜速迎掩殺。臣等揀選京城各省兵一萬名。輕裝由科布多河西路於六月初九日起程。分爲三隊。前鋒統領丁壽散秩大臣公達福副都統塔爾岱率領第一隊。叅贊馬爾薩副都統承保西彌賴率領第二隊。臣等統領大兵前進。沿途襲擊。其科布多築城地方留兵七千三百名。仍舊築城防守糧餉。令都統袞泰總兵胡傑等管轄。科布多河東係通奇林要路。派定滿洲兵二千名。俟都統侯陳泰副都統阿三到時駐劄管轄。與袞泰等互爲應援。所有統兵起程日期理合具奏。奏入。報聞。丁未。靖邊大將軍傅爾丹摺奏臣等於初九日分隊起程之後。遣前鋒統領丁壽叅贊馬爾薩副都統塔爾岱

等統兵率嚮道官前行瞭望賊勢。在扎克賽河地方擒獲準噶爾賊夷巴爾喀等十二名。據供小策零敦多卜牧場在察罕哈達地方。離臣等軍營止三日程途。僅有兵一千。尚未立營防守。大策零敦多卜因途中有病留駐和博克山。其子多爾濟丹巴已於小策零敦多卜山梁前駐劄。羅卜藏策零與噶爾丹策零不和率領其屬大約不往圖爾古特。即往青海等語。臣等乘夜進兵襲擊察罕哈達賊夷奏入報聞。副都統格默爾摺奏騰格里卡倫扎薩克諾爾布於五月二十八日背叛。擾亂臺站。劫掠馬匹。旋即逃至滾額爾吉庫庫烏蘇遊牧之處。臣即令扎薩克恭格、台吉阿拉布濟等領兵追逐。又令叅領巴顏等追至喀喇果爾地方。見恭格等已將諾爾布圍困。復又脫逃。巴顏等追緝至蒙古爾托羅海地方擒獲諾爾布。并其佐領里塔爾與恭格等押解回營。其効力之扎薩克台吉弁兵等

查明具奏奏入報聞。○戊申副都統達鼐摺奏青海原扎薩克公墨爾根戴青拉查卜等悖逆逃遁。渡梭羅木河而去。臣等率兵追至河濱。先將其子察罕拉布坦生擒。隨整兵往擊拉查卜營寨。拉查卜畏威迎降。跪叩投誠。臣等率領由梭羅木河大路回至青海遊牧處。其効力之台吉弁兵等查明具奏。得旨從前親王戴青和碩齊察罕丹津一聞伊姪拉查卜逃走。即將拉查卜部下人等收回。察罕丹津歷年効力行走。今已老病。仍感恩効力。甚屬可嘉。著賜大緞二十疋。再發銀一千兩。令其酌量賞伊部下効力人等。拉查卜雖係伊兄之子。朕知其素不相睦。至拉查卜之子察罕拉布坦能知伊父之非。不肯同逃。殊屬可憫。拉查卜甚屬庸愚。雖無故逃遁。見我兵追趕。即便迎降。罪尚可恕。著將伊送至京師。候將伊逃遁之故問明。將伊交察罕丹津之處。另降諭旨。其拉查卜公爵朕尚欲令其子

察罕拉布坦襲替。竝曉諭知之。○改廣東陽山縣星子朱岡巡檢二員歸連州管轄。從廣東總督郝玉麟請也。○己酉諭大學士等。大將軍傅爾丹奏稱。被獲準噶爾丹巴供云。噶爾丹策零之妹夫羅卜藏策零將伊屬下三千戶帶領歸至大國噶斯。噶爾丹策零聞知。追趕被敗等語。今噶斯正值青海有事之秋。儻羅卜藏策零率衆來歸。或係賊人詭計。著速行文達鼐衆佛保等。遠設巡哨偵探信息。儻噶斯路途有準噶爾賊人來歸者。將我兵整齊預備。務加詳審。果係真實。將伊頭目數人送至京師。其餘人等。於汛界內有水草處暫住。從優養贍。一面派兵照管。一面奏聞請旨。○諭刑部。凡竊賊滿貫者。定例擬絞監候。此等賊犯。論其情罪。無可矜原。而每年秋審之時。按律又不至於處決。是以往往監禁多年。不行結案。即該犯有悔過改惡之心。亦無自新之路。著刑部將各省此等賊犯。已經三

年者。一一查出。酌其情罪。或應釋放。或應減等發落。竝日後再有過犯。如何從重治罪之處。一併定議具奏。○陞一等侍衛四十三。爲永陵總管。○庚戌上召入大學士九卿等。諭曰。自五六月以來。直隸山東河南雨澤愆期。亢旱日久。我君臣間必有上千

天和之處。仰蒙

上天仁愛。特以旱災垂象示儆。朕心憂懼焦勞。時加修省。展轉思維。無以自解。此皆朕薄德之所致。無可推諉。但大臣等亦當敬畏悚惕。省愆思咎。各矢誠心。寤寐警勉。念此三省數百萬蒼黎。皆吾赤子。將來秋禾不登。無以養生。必致狼狽。若不先期籌畫。多方儲備。臨時雖欲補救。亦恐無及。著大學士九卿等悉心酌議。作何先期料理。務期人力能周。救荒有策。米穀可以轉運。膏澤不致稽遲。俾此被災民人咸慶生全。無一人轉乎溝壑。如此則朕

之殷憂。可以稍釋於萬一。或邀

上天慈鑒。稍寬吾君臣之譴責也。○諭刑部。在

京監禁人犯。其情罪尚輕。按律不至於擬決

者。已令該部該旗查明。暫行釋放。俟處暑後

再行酌議。寬減歸結。其外省輕罪人犯。亦應

酌量加恩。著將已經到部之案。其中有問擬

徒杖。而准其折贖者。該部查出。悉行寬免。結

案。○以原任禮部尚書石文焯。署直隸馬蘭

口總兵官。○寧遠大將軍岳鍾琪疏報。臣遵

旨。於巴爾庫爾。相度地勢。建築城垣。城身周

圍八里。高二丈。根寬二丈。頂一丈。擇於本年

四月十五日興工。并月城。礮臺。角墩。垛牆。一

應土工。於五月二十九日。俱已告竣。其四門

城樓。石橋。角樓。見在次第建造。其工價等項。

造冊呈覽。請敕部核銷。下部知之。○予故貴

州古州總兵官蘇大有。祭葬如例。○辛亥。寧

遠大將軍岳鍾琪疏報。賊夷圍困魯谷慶。四

十餘日。賴漢回官兵協力固守。殺死賊人二

百餘名。帶傷者甚多。賊人見攻魯谷慶城不下。遂圍困附近之哈喇火州城堡。用木梯三百餘副。為攻城之具。回民等。用鎗擊死賊人三百餘名。賊衆一聞大兵應援之信。倉皇逃遁。遺下馬匹刀鎗等件。竝拋棄所造飯食而去。及總兵官張元佐等。領兵兼程前進。賊衆已遠遁無踪。張元佐等到魯谷慶城下。回目額敏和卓。及回民老幼男婦。出城迎接。歡聲震地。張元佐等。因天氣炎熱。馬匹疲乏。雖官兵奮勇滅賊。不敢窮追。今臣將派往之馬兵。撥存一千名。駐劄魯谷慶。其餘兵丁。俱行撤回。若賊夷又率二三千人來侵。則官兵與回兵。可以抵禦。儻傾衆而來。臣當親統大軍。就近勦殺。以免我師遠行。若必令回民遷入內地。則俟我軍進擊烏魯木齊之後。即令官兵一千名護送行走。更屬無慮。得旨。賊夷侵犯吐魯番之舉。實由我軍屯運糧石。啓釁以致有不得不應援之勢。今官兵進行空勞。往返

恐將來似此無益之舉正多。不知大將軍亦曾計及此否。此番回民感戴救濟之恩。歡聲大震。將來賊夷切齒於吐魯番。必思報復。以大力侵凌之。儻至狼狽流離時。不知仍似此感戴乎。目今賊夷以三萬衆侵犯北路。見據靖邊大將軍傅爾丹等奏報。前岳鍾琪曾有親統大兵。前往吐魯番勦殺。而留紀成斌看守之奏。假若賊人此番不向北路而向西路。將賊衆分爲兩大隊。以一隊先侵吐魯番。及岳鍾琪領兵應援前往。賊人又以大隊侵犯軍營。再散其醜類於塔爾那沁。及圖呼魯克等處。不知我軍之力。尚可從容肆應否。今賊夷圍困魯谷慶。哈喇火州二城。官兵冒暑遠行。疲勞士馬。未遇一人。未戮一賊。而岳鍾琪奏摺中有奮勇滅賊之語。將以此番之舉。遂謂建功樹績於戎行乎。賊夷聞風而遁。可謂懼我軍威乎。即留兵駐防與遷移回衆。朕意尚無定見。大將軍身在軍營。與遙揣者不同。

若果確有所見。自當因時制宜。以身任之。總之向後若有應援吐魯番之舉。只可委將發兵。便賊首親來攻取吐魯番。大將軍亦不可統兵親往。吐魯番一切事宜。岳鍾琪當與伊禮布。常賚。石雲倬等。詳密籌畫。作速定議。壬子。實授宗室塞爾黑爲內閣學士兼禮部侍郎。以署盛京禮部侍郎左副都御史申珠。渾兼理盛京刑部侍郎事。署陝西總督查郎阿疏言。西鳳二府。撥運甘肅等處米一十五萬石。二府民人領運之時。惟恐遠涉長途。或有虧耗。每石多帶一二升以備添補之用。今途次安行。竝無虧折。據收糧之員節次具報。正米之外。多交餘米。或數十石。至數百石不等。交足之時。可得米千餘石。將米一併收貯。於邊儲軍糧。均有裨益。得旨。數年以來。秦省民人。運送軍需。俱無遲誤。是以朕屢次加恩。以示優恤。茲因輓運西鳳米糧。以資軍食。特令加添腳價。務期運送從容。而領運之

民人等敬謹承應。於交完正米之外。尚有餘米交官。其急公敬事之念。甚屬可嘉。著該署督等查明交米多寡之數。分別賞賚。務令本人實沾恩賜。勿致胥吏中飽。以副朕加惠秦民之至意。○協辦西寧總兵事務都統德成等摺奏。訊問被獲逆賊諾爾布里塔爾等。供稱青海各部落。合謀令我率騰格里兵丁反叛。郡王額爾得尼厄爾克托奈之子。阿拉布濟。亦欲作亂。約將青海全軍。前來救援等語。謹此據供具奏。得旨。朕料青海王台吉等。世愛國恩。斷無負恩背叛之事。親王察罕丹津。一聞伊姪拉查卜遁逃。即遣人追趕。郡王益蘇克汪扎爾。聞達錫策零搬移。即率兵將達錫策零帶回。郡王額爾得尼厄爾克托奈。父子宣力行間。伊子協理台吉阿拉布濟。見在與恭格。一同追擒諾爾布。伊等果有異心。寧肯如此奮勉宣力乎。著將諾爾布。里塔爾。俱解送來京。訊明原由。再行辦理。○

旌表江南南匯縣烈婦。顧奇妻朱氏。強姦不污。被刃殞命。給銀建坊。入祠致祭。如例。甲寅。

上以雨澤愆期。齋心祈禱。並命各部院大臣官員。設壇齋戒。是日。甘霖大沛。○乙卯。寧遠大將軍岳鍾琪。摺奏。據救援吐魯番。松潘總兵官張元佐回營。帶準噶爾投誠回子麻木雅兒道。倆二名。供稱。噶爾丹策零之弟。羅卜臧舒努。娶哈薩克阿布爾海里汗之女。見在哈薩克地方居住。前正月間。遣使到噶爾丹策零處。爭論其父所遺產業。又因噶爾丹策零殺其母。并其同胞之妹。與弟讐怨甚深。欲發兵相戰。二月間。哈薩克阿布爾海里汗發兵七萬。令伊弟布爾海里統領。將吹塔拉斯地方。所居準噶爾一千戶人畜。俱已擄去。又將準噶爾。在別處牧放之馬。擄去二三千匹。又噶爾丹策零。去年九月間。遣使往葉爾啓木哈什噶爾和通地方。勒索馬三萬匹。此三處

回子俱已反叛等語。理合具奏。奏入。報聞。
丁巳。諭內閣。朕因今年五六月間。直隸。河南。
山東三省。雨澤愆期。宵旰焦勞。無時或釋。深
恐秋稼不登。百萬黎民。艱於粒食。將來救荒
濟困。人力難周。特命大學士九卿等。竭慮殫
心。爲先事圖維之計。以贖

上天之譴責。稍解朕心之憂煩。昨大學士九卿
等會議。截漕通商。及遣官分查賞給籽種。捐
穀議敘各條具奏。朕已一一允行。又特降諭
旨。將山東河南二省。本年漕糧。暫停徵收。蓋
欲使本地之米。散布於民間。更勝借資於他
省也。今據河南署撫張元懷奏報。河南南陽
汝寧歸德四府。從前陸續霪被甘霖。六月十
四十五兩日。開封省城。大雨滂沛。四野沾足。
又據山東巡撫岳濬奏報。東省自六月以來。
陸續得雨。六府九州。膏澤已遍。直隸署督唐
執玉。亦以所屬得雨之州縣。陸續奏報。觀此
景象。仰蒙

上天矜憫下民。而賜以生全之慶。將來即有成
災之州縣。亦不至於甚廣。人力尚可展施矣。
朕以手加額。既感且慰。其廷臣所議預籌各
件。朕意仍照前議預備。爲是惟是本地紳衿
富戶。捐穀助賑。予以議敘一條。此等事向來
奉行不善。輒生虛冒濫竊之弊。且捐穀多寡
如何分別。議敘之處。原議俱未明晰。恐臨時
難於遵行。亦須預先定議。又河東二省漕糧
暫停徵收。將來成災之處。自另有恩旨。其不

成災之處。或用拆色交官。或仍徵本色。將此
穀石。即糶賣於本省之民人。二者孰於民間
有益。著大學士九卿。再行詳議具奏。尋議地
方紳衿富戶。捐穀十石以上。至三十石者。分
別給以花紅扁額。二百石以上。至四百石者。
分別給以頂帶。該地方捐穀至三千石以上。
將地方官從優議敘。仍嚴行申飭。毋得抑勒
苛派。以滋煩擾。至河東二省。本年應徵漕糧。
請照例折徵銀兩。於民間甚有裨益。從之。

諭兵部。前降旨令陝西固原提督樊廷。於秋涼時來京。陛見其印務著范時捷署理。今署陝西西大通總兵官管承澤帶領兵丁。前往柴旦木地方駐劄。其西大通總兵官印務著范時捷即前往署理。固原提督事務緊要。樊廷到任。且不必來京。陛見。候諭旨行。若有應奏事宜。著具摺陳奏。命刑部右侍郎王國棟前往河南。工部右侍郎趙殿最前往山東。各辦賑務。兼理稽查匪類緝捕盜賊之事。

一等精奇尼哈番那穆渣布緣事革退。以其族姪嘎爾當襲替。戊午。甘肅巡撫許容摺奏青海事宜。一。青海亂賊。必宜嚴懲。諾爾布等敢行稱亂。攪擾臺站卡倫。比之拉查卜等之潛逃。罪尤重大。見在搶奪臺站之達錫策零。已經王盆蘇克汪扎爾公阿喇布坦擒拏。應即治罪。而諾爾布之妻子亦被副都統達鼐押解來寧。其逃遁之衆。務必俘獲。誅其魁首。一。西寧兵馬無庸加增。計西寧鎮標額兵

四千名城守營額兵二百五十四名。又益之以西安綠旗兵一千名。滿兵一百名。又應援兵一千名。而鎮海南川等兵亦千有餘名。更濟之以土兵協防。見在士馬富餘。守禦援剿無虞不足。一。青海地方宜移駐滿漢官兵。查西寧至柴旦木地方相去八百餘里。而青海居其中。請於適中形勝之地駐兵防範彈壓。一。西大通鎮急宜專員辦理。大通一鎮。左爲西寧唇齒。右爲涼甘藩籬。關係綦重。今大通總兵印務雖德成馮允中。公同署理。往來照看。不能分身坐鎮。署鎮管承澤爲人畏懦。恐非將帥之才。請急簡賢員掌管印務。一。噶斯統兵大臣宜另行選擇。諾爾布等之變。副都統格默爾既不能預先撫馭於前。又不能即行擒剿於後。恐不足以膺茲鉅任。查散秩大臣副都統達鼐辦理夷情數載。道里山川亦已熟悉。近復追擒拉查卜等功亦可嘉。或以達鼐專司統領官兵。兼撫夷衆。以重職守。一。

青海夷人宜導之以大義

皇上懷柔荒服一視同仁即採買駱駝馬羊等類亦就彼之所欲售優給價值況興兵費帑欲勦滅準噶爾之逆賊者亦惟恐塞外回夷爲其侵暴取彼兇殘安茲良善凡經管官員理宜奉揚德意明白曉諭庶夷衆咸知我朝覆庇卵翼之恩各懷尊君親上之義矣奏入報聞○己未諭大學士等陝西西安督撫標下俱有新募入伍之兵丁必須勤加操演始可資戰守之用朕思撫標之兵有撫臣親自操演自然技勇日漸嫻熟督臣見駐肅州其標下弁員又大半隨往軍營見駐西安者未必多人或至訓練稀疏亦未可定侍郎馬爾泰辦理軍需駐劄西安若將督標之兵丁隨時練習加意教誨務使有勇知方以備國家干城之選○轉禮部右侍郎王圖炳爲左侍郎陞內閣學士吳襄爲禮部右侍郎○陞鑲白旗護軍統領公博爾屯爲鑲黃旗滿洲都

統正藍旗滿洲副都統覺羅海蘭爲鑲白旗護軍統領仍留軍營以左都御史三泰仍署鑲黃旗滿洲都統鑲黃旗滿洲副都統宗室色布肯仍署鑲白旗護軍統領○是日甘霖復大沛京師遠近霑足○南掌國王烏孫遣陪臣先教先喇等奉表謝恩下部知之○辛酉改湖北蘄州漢陽二營守備缺爲都司僉書從湖廣總督邁柱請也

大清世宗敬天昌運建中表正文武英明寬仁信毅大孝至誠憲皇帝實錄卷之一百七

大清世宗敬天昌運建中表正文武英明寬仁
信毅大孝至誠憲皇帝實錄卷之一百八

監修總裁光祿大夫經筵講官太僕寺卿禮部尚書總理事務處五等伯加十五級臣鄂爾泰

總纂官光祿大夫經筵講官太僕寺卿禮部尚書總理事務處五等伯加十五級臣鄂爾泰

纂修官光祿大夫經筵講官太僕寺卿禮部尚書總理事務處五等伯加十五級臣鄂爾泰

纂修官光祿大夫經筵講官太僕寺卿禮部尚書總理事務處五等伯加十五級臣鄂爾泰

纂修官光祿大夫經筵講官太僕寺卿禮部尚書總理事務處五等伯加十五級臣鄂爾泰

敕修

雍正九年辛亥秋七月壬戌朔享

實錄本二十一

太廟遣裕親王廣祿行禮 癸亥諭大學士等
噶斯一路甚屬緊要現今交青海王台吉等
將伊等遊牧之處如何保護備禦等事定議
其柴旦木地方不必用青海兵丁駐劄派內
地兵丁四千六百名防戍 大學士等議覆
陝西西安將軍泰布奏言西安額設兵丁八
千名今戶口繁滋將及四萬請於滿洲餘丁
內挑選一千名每月暫給餉銀一兩米三斗
令其當差遇有調遣之處即照馬兵例派往

俟兵事告竣陸續裁汰應如所請從之 旌
表湖北鄭縣烈女王自寅女王氏拒姦不污
自刃殞命給銀建坊入祠致祭如例 甲子
戶部議覆刑部侍郎韓光基查秦山西臨晉
虞鄉分界事宜一虞臨二縣中隔涑水一河
實天成界限請將沿河村莊坐落河南者編
入虞鄉坐落河北者編入臨晉以清界址一
臨晉原屬大縣今分設虞鄉而所徵錢糧仍
倍於虞鄉若將學額二十名兩縣平分實屬
偏枯應將臨晉照中學例加增五名其原額
學田酌量均分一臨晉之坡上一帶地方綿
長四十餘里地瘠民貧讀書無力請酌量村
莊遠近設立義學八處以廣教育一坡西角
杯村新設有把總一員吳王寨新設有巡檢
一員二村相去僅十餘里而坡東數十里無
官彈壓請將吳王寨巡檢移駐角杯村角杯
村把總移駐坡東之耽子村互相稽察一涑
水一河沿河田畝咸資灌溉所有邱家營一

聞正當急流衝射應行堵塞并加築月隄幫護於隄外量開渠口以潤地畝飭地方官勒石定界併設立偃長使輪流管約俱應如所請從之○丙寅諭大學士等柴旦木之北伊孫察罕齊老圖地方乃直達安西沙州之路爲巴爾庫爾軍營之後戶關係最爲緊要此處或駐兵一千名或八百名建築小城一座以爲捍禦再設卡倫以瞭望賊踪儻賊人前來爲數無多即可迎戰勦殺若傾其大衆而來則報知安西遣兵應援合力攻擊此乃防汛萬全之策若城工一時難成即先添兵丁爲冬月預防之計一切事宜著大將軍岳鍾琪即行定議舉行若岳鍾琪已領兵進勦即著副將軍等公同會議辦理○又諭駐劄柴旦木副都統格默爾擅離汛地領兵欲回西寧近邊地方甚屬悖謬理應以軍法從事朕念其派遣弁員追擒青海叛賊諾爾布著免死革職令往騰格里卡倫効力贖罪 陞翰

林院侍講學士提督順天學政楊超曾爲奉天府府尹○雲貴廣西總督鄂爾泰題廣西上映土知州許大運故其子許錫侯承襲年幼請以許錫侯母趙氏協理下部知之 丁卯諭大學士等傅爾丹從前奏稱準噶爾被擒之賊人丹巴曾供噶爾丹策零之妹夫羅卜藏策零帶領所屬三千餘戶來投噶斯一路曾降諭旨與達鼐等問明緣由今在有水草之處暫行安置今情形甚屬可疑不可墮其術中著密諭達鼐衆佛保德成等令其加謹防範不可妄動○命雲貴廣西總督鄂爾泰來京陛見以兩江總督高其倬署雲貴廣西總督江蘇巡撫尹繼善署兩江總督刑部右侍郎王國棟署江蘇巡撫○戊辰諭大學士等四十九旗扎薩克遊牧之地甚屬緊要今派京城八旗滿洲蒙古兵六千右衛歸化城兵二千自烏朱穆泰以及吳喇忒數扎薩克處派兵三千共派兵一萬一千名著於八

月起程九月間繞至吳喇忒遊牧地方後瀚海前適中處駐劄令其防護遊牧地方此所派扎薩克之兵著王札木巴爾扎布統轄每旗各派出協理台吉同往科爾沁等旗派兵六千盛京派兵五千俱繞至科爾沁迤西遊牧地方後駐劄其駐防吳喇忒等處之兵著都統穆森管領前往副都統薩穆哈協同管轄其科爾沁兵著王羅卜臧滾布貝子拉錫公噶爾弼管轄每旗各派大台吉同往盛京兵丁著尚書海壽統轄副都統博第黑龍江副都統多起納協同管轄又諭陝西西安巡撫武格著來京有交辦事件侍郎馬爾泰著署理西安巡撫事務杭弁祿協辦西安軍需其宣諭化導之事交與吏貽直鄭禪寶分辦大學士等議奏京城八旗滿洲蒙古兵共選派六千名應派管轄之員每旗派護軍叅領一員副護軍叅領二員委署護軍叅領二員護軍校七員從之○戶部遵旨議奏京

師錢價昂貴請酌定應行應禁事宜以期漸次疏通一民間錢多則價賤錢少則價增應令提督府尹五城御史不時巡查其有販運出京及囤積居奇者即行拏究一五城十廠糶賣成色米現在止餘五千餘石請令各廠再領通倉成色米四萬五千石均勻發糶所得錢文發五城錢舖照定價九百五十文兌換俟此項兌完即令官錢舖將所換銀兩照時價收錢循環流轉至八旗米局糶賣錢文亦交本旗錢舖照五城例循環收換一兵丁月餉現在一九搭放今戶部卯錢及五城賣米等錢共得三十四萬餘串官錢舖既有銀兩兌換不必於庫內再發則八九十月餉錢皆可以二成搭放俟十一月以後仍照舊例行一八旗五城現有錢文併所賣成色米之錢定價每市平紋銀一兩換大制錢九百五十文俟市價漸增官價亦漸增添以銀一兩合大制錢一千文為率不得因市價而遞減

一京城向有姦民勾通經紀豫發本銀於大小鋪戶收賣制錢多藏堆積俟錢貴始行發賣名爲長短錢應嚴行查禁從之○已已諭大學士等湖廣荊州兵丁著派一千名令副都統觀音保帶領前往西安駐劄步軍統領阿齊圖有事差往巴爾庫爾軍營其印務著莽鵠立署理○改江西浮梁永新龍泉萬安等營守備缺俱爲都司僉書從兩江總督高其倬請也○四川總督黃廷桂疏報西爐口外瞻對等處賊番糾黨搶掠尋經調遣官兵次第勦撫得旨進勦瞻對漢土官兵奮勇力戰直搗巢穴番衆率先輸誠已將賊首擒獻此次出征効力有功之弁兵等著酌量議敘賞賚所有傷亡漢土官兵著照例賞卹○庚午諭大學士等羅卜臧喇錫統領之扎薩克兵丁及盛京烏拉等處之兵從前曾令其至順承郡王軍營駐劄此內若有已到軍營者即駐劄彼處其未到者著在塔米爾地方會

同一處駐劄盛京船廠黑龍江之兵著額爾勤統轄烏察拉王常協管○以正紅旗滿洲副都統宗室鄂齊署鑲紅旗護軍統領○大學士等議奏西寧地方最關緊要設有調撥兵丁之處應預爲籌畫查莊浪地方係通西寧肅州之要路若添兵二千名將來自便調撥應將西安駐防之江寧河南滿洲兵內調撥一千名直隸河南之綠旗兵內調撥一千名遣往莊浪駐劄再將四川預備四千兵內撥二千移駐松潘以備西寧調遣從之○辛未孝懿仁皇后忌辰遣官祭
景陵○諭內閣朕因河南上年有被水之州縣今春小民乏食特命侍郎王國棟前往賑濟動用倉穀五十餘萬石續經該侍郎查有不應賑濟而冒領者議令著落該州縣追比朕思發粟蠲租乃國家愛養黎民之大典豈容冒濫升斗以滋弊端但今年夏月豫省州縣又有雨澤愆期之處朕心甚切憂勞惟恐收

成歉薄正遣大臣官員前往查勘其從前冒領之人未必皆係殷實之家今按數著追未免竭蹶用沛格外之仁將未完米石緩其追比俟將來年穀豐稔再行徵收還項大學士九卿等疏奏怡賢親王功德光昭中外謳思勿替宜崇報享以慰輿情前直隸總督唐執玉請於天津立祠已蒙俞允今復據各省督撫將軍等據所屬官弁紳士兵民公呈節次題請應准其各建祠宇以伸思慕之忱得旨從前降旨內外各省官民有實被吾弟怡賢親王之德澤誠心感激者准建立祠宇以展其追慕之忱今遠近各省紳士軍民合詞懇請雖賢王美善孚於懿好之公異口同聲不謀而合朕思天下至大其傳聞王之令名而未親被王之恩惠者若一體建祠展祀則與朕之諭旨不符即王平日謙抑為懷亦必不畝享也除畿輔之地王之功德理宜俎豆千秋已降旨俞允建祠外奉天爲

祖宗發祥之所仰蒙福佑篤生賢王爲國家宣猷佐政則俯順官民籲請建立祠宇於情理爲宜至於兩淮鹽務積弊多年自王總理戶部以來弊端永杜苛累全除衆商咸沐恩膏萬竈皆成樂土再者江南戶口殷繁水利最關緊要王念切民生留心諮訪將一切興修事宜奏聞於朕朕本欲俟直隸工程就緒之後令王前往江南爲萬民興久遠之計王亦身任不辭後以國政需王贊襄不能即往旋據陳時夏之奏王奏請速行朕因命督撫大臣等相度經營因勢利導今東南數千里河流疏通有灌溉之利而無泛濫之虞者實王創始之力也王之功德其顯著於江南者如此准於揚州地方建立祠宇一所以慰輿情浙江總督李衛前爲戶部司官時朕竝不知其姓名王在朕前極力保薦謂其才品俱優可當大任朕因將李衛屢加擢用至浙江總督浙人深受李衛之益者皆王薦舉之功也

准從浙人之請於杭州建立祠宇以申其感戴之誠其餘各省陳請建祠者俱不必行○以鑲藍旗護軍統領署鑲藍旗蒙古都統侯馬蘭泰委署前鋒統領前往北路軍營署右翼前鋒統領公伊爾登署鑲藍旗蒙古都統○兵部議覆雲貴廣西總督鄂爾泰疏言烏蒙一鎮中左右三營額兵止二千八百名而威寧鎮雄東川三營又止額兵各一千名應援防守均覺不敷請照廣西左江鎮之例置中前左右四營應添設前營遊擊一員守備一員千總二員把總四員外委千把六員兵一千六百名合原設之兵定為每營一千一百名鎮雄東川二營請各添守備一員把總二員兵二百名分為左右軍威寧營請改為威寧協裁叅將缺改設副將一員添設都司一員千總二員把總四員兵五百名分為左右兩營再曲尋所屬之尋甸州為東川烏蒙扼要之區請另置一營添設叅將一員守備

一員千總二員把總四員分撥督標兵八百名撫標兵二百名移駐尋甸其原防尋甸兵三百一十名移駐羅平均應如所請從之○予故正黃旗蒙古都統汪悟禮祭葬如例○旌表廣東歸善縣烈婦李亞長妻鄧氏拒姦不污扼吭殞命給銀建坊入祠致祭如例○壬申命固山貝子弘春署鑒儀衛鑒儀使○吏部議覆山東巡撫岳濬疏言東省沂莒二州自改為直隸州後錢糧倉穀沂州屬兗寧道管轄莒州屬登萊青道管轄查登萊青道遠駐萊郡去莒州六百餘里兗寧道遠駐濟寧去沂州五百餘里均覺鞭長莫及且兗寧道專司河務今管轄兗州一府沂曹東平三州統計二十七州縣一衛一所殊難兼顧請另設兗莒沂道一員駐劄沂州將兗寧道原轄之兗州府屬十四州縣一衛一所並直隸沂州及所屬二縣登萊青道原轄之直隸莒州及所屬三縣統計二十一州縣一衛一所

俱歸管轄如此則登萊青道分出莒州一屬無控制遼遠之虞而克寧道僅轄二州得以專理工程於河防亦大有裨益應如所請從之○兵部議覆福建福州將軍阿爾賽疏言驍騎校一官承查事件最為紛繁福州駐防四旗請照京城之例每旗添設副驍騎校五員三江口水師添設副驍騎校六員應如所請從之○又議覆湖南巡撫趙弘恩疏言鎮草鎮所屬四營紅苗地方現經分設塘汛請移前營遊擊一員添把總一員帶兵二百名駐劄池河移右營守備一員帶兵一百名駐劄巖口添千總一員帶兵一百名駐劄地良坡添把總一員帶兵四十名駐劄栗林再添把總一員帶兵四十名駐劄鴨保寨再添把總一員帶兵三十名駐劄火畧坪其餘小汛二十三處酌量安兵七百五十五名又黔省五汛乃鎮筵至六里必由之路應歸楚省設汛至栗林等寨應歸各營管轄竝添兵四百

名方足分防其左營汛地廣遠應再撥把總一員兵五十名分防勞神寨均應如所請從之○癸酉陞署正紅旗滿洲副都統胡琳為正紅旗蒙古副都統實授達爾濟為正藍旗滿洲副都統○靖邊大將軍傅爾丹摺奏臣等於六月初九日進兵十七日擒獲賊夷已陸續奏聞二十日遇賊二萬餘人連日交戰殺賊數千因賊夷踞山拒險難以仰攻移營和通腦兒地方誘賊邀擊賊人益兵尾追圍困軍營索倫察哈爾歸化城土默特喀喇沁兵丁俱乘機潰散逃遁臣等整齊殘兵且戰且走賊人追擊晝夜力戰臣傅爾丹等渡哈爾哈納河於七月初一日已至科布多修城地方前因索倫等處逃兵妄造訛言都統袞泰等以全軍失利奏聞今因賊人有從科布多河兩路來犯之信臣現在辦理防守之事其每日交戰情形陣亡之大臣官員查明續奏得旨前據北路都統袞泰等奏報大將軍

傅爾丹等領兵進剿爲賊所困。全軍失利。彼時已傳諭西路大將軍岳鍾琪令其加意防守。今據傅爾丹奏稱官兵爲賊誘敗。臣於七月初一日帶領兵馬回至科布多軍營等語。是從前北路逃軍所報。竟屬子虛。不過兵馬有傷損之處。大將軍等原無恙也。可即傳諭岳鍾琪知之。總之目前進兵之議。且不必言。而防守之策。倍當加意。著大將軍等照近日諭旨謹慎辦理。○甲戌。諭大學士等。大學士忠達公馬爾賽著授爲撫遠大將軍。先於派出京城兵內挑選一千名。輕騎前往圖拉等處形勝之地駐劄。會同喀爾喀副將軍王丹津多爾濟等辦理喀爾喀遊牧。及一切豫備防守事務。副都統達爾濟、富昌著同大將軍馬爾賽前去。續著侯馬蘭泰、副都統胡琳帶兵一千名前去。其餘兵四千名俱著預備停妥。俟大將軍奏請調遣時再令前往。八旗漢軍內派兵四千名。著都統李林、祖秉衡帶領

前往四子部落後面水草茂盛之處駐劄。以備調遣。其派出右衛及歸化城之兵各一千名俱暫在本地預備調遣。其餘兵丁若有調遣之處著馬爾賽會同丹津多爾濟商酌辦理。○又諭新挑曉勇弁兵一百名著副都統敦巴帶領五十名往駐噶斯。留五十名隨大將軍馬爾賽前往。每名各賞銀二百兩。○實授戶部左侍郎傅泰爲寧夏將軍。陞內務府總管海望爲戶部左侍郎。仍兼內務府總管。○調貴州按察使張鉞爲廣西按察使。司按察使廣西按察使張體義爲貴州按察使。司按察使。○吏部議覆江西巡撫謝昊疏言。九江府屬瑞昌縣之肇陳口地方險要。請添設巡檢一員。稽查巡緝。南康府屬之都昌縣縣治偏在西南。其東北地方離縣寫遠。請將都昌縣縣丞移駐適中之張家嶺。以資彈壓。並於蔡家嶺添設一汛。撥兵防守。又南康府楊林河泊大使所管湖課止數百兩。應請裁汰。

所有課銀各歸本縣徵解。均應如所請。從之。
○雲貴廣西總督鄂爾泰題廣西太平府全
茗土知州許以桓故請以其子許述章承襲。
下部知之。○乙亥諭大學士等前派出科爾
沁扎薩克等處兵丁共六千名。在各遊牧處
駐劄。恐一時未能會集。著減去二千名。止派
四千名預備。○戶部議覆甘肅提督宋可進
疏言涼州甘州西寧三處遵旨召募兵七千
名俱係貧丁。請借給銀兩於季餉內扣還。再
請每兵一千名添設千總二員。把總四員。與
外委千把分領教演。均應如所請。從之。○寧
遠大將軍岳鍾琪摺奏七月初五日據北路
都統袁泰等咨稱準噶爾賊夷以全力侵犯
北路。於博克托嶺相近和通腦兒地方靖邊
大將軍傅爾丹等被其圍困。臣思傅爾丹及從
征官兵奮力剿殺。自必破圍取勝。惟是賊夷此
番傾衆來犯北路。必以西路軍營上年遭其騷
擾。駝馬缺乏。難以進擊。因有輕視西路之心。臣

此時統西路精兵襲擊烏魯木齊伊恐我師
直搗巢穴。自必撤北路之兵回顧伊里我軍
既挫其鋒。即便旋師休息。嚴防汎界。是不待
交戰。而賊夷先已疲勞。臣不敢坐失乘虛進
擊之機宜。今帶領叅贊提督紀成斌理藩院
侍郎顧魯公。袞布都統良敦。總兵官張元佐
王緒級等。啟行前進。其軍營各項事務。暫交
副將軍石雲倬辦理。奏入報聞。○丙子中元
節遣官祭

永陵

福陵

昭陵

昭西陵

孝陵

孝東陵

景陵○諭大學士等據順承郡王錫保奏稱喀
爾喀遊牧之處俱已安頓妥協。兵丁亦漸次
到遊牧之界。喀爾喀三路副將軍各思効力。

臣等將禦賊守城之策會同商酌預備等語
觀此順承郡王錫保等辦理防範甚屬有方
但須謹慎之中愈加謹慎賊人到科布多修
城之處儻不行力戰或暫時圍繞待我策應
之師以施誑誘之計順承郡王喀爾喀副將
軍等切勿前往策應致墮賊人術中伊等止
應防護喀爾喀遊牧竝看守察罕叟爾地方
此最緊要之事果能固守即伊等之功矣若
賊人久圍科布多不去可俟各路兵丁俱到
察罕叟爾之時錫保等於喀爾喀兵丁及防
戍蒙古兵丁內挑選二三千名給與馬匹分
爲數起晝夜前進或尾賊後乘機將賊人馬
駝盡行趕出隨得隨殺賊人牲畜日漸虧損
自然逃遁矣但須防其知覺來追預思保全
之策無得鹵莽再我兵果蒙

天眷敗退賊衆亦斷不可深入追擊賊人逃遁
後凡應行看守之處尤宜嚴加防範若賊衆
被我兵擒獲或力窮來歸除凶悍必不容赦

者之外其餘稍有可原即從寬宥斷不可因
我兵受害之故妄行殘虐以圖洩憤至喀爾
喀等現在南遷遊牧兵丁赴察罕叟爾者甚
衆所帶糧糗未必敷用且需火藥鉛彈等物
查察罕叟爾所有穀石羊隻等物甚多量我
軍足用存備外著錫保酌量賞給喀爾喀兵
丁使之充裕勿存妄費錢糧難於銷算之見
朕斷不因所費過多即加譴責也將此傳諭
順承郡王錫保知之副都統達鼐侍郎衆
佛保等摺奏據逃遁被獲之貝勒達錫策零
供稱年幼多病因諾爾布作亂聞我旗下之
墨爾根阿里克鄂木布等同擾臺站搶掠馬
匹心懷恐懼於六月初八日隨母遷移八十
里在遊牧內圖古里克地方居住隨訴知王
盆蘇克汪扎爾竝遣人擒獲墨爾根等竝非
敢逃遁遠處等語查達錫策零之伯父貝勒
達顏其父貝子噶爾丹代青諾爾布皆實心
効力其伯父歿後因封達錫策零爲貝子其

父歿後

皇上施恩合兩貝子之爵封達錫策零爲貝勒
竝兼管扎薩克理應感恩報効乃無故潛逃
甚屬妄行請將達錫策零革去貝勒或降爲
貝子或降爲公爵伏候

聖裁得旨達錫策零年幼無知聽信謠言畏懼
遷移竝非有意逃遁且值王盆蘇克汪扎爾
追趕即迎前陳訴又將伊屬下掠馬之人等
送達錫策零從寬免其革去貝勒○丁丑諭

大學士等駐防柴旦木兵丁等前因遺失口
糧借過西寧西大通二鎮官兵一個月米麵
著將此賞給免其扣除還項○又諭據副都
統達鼐侍郎衆佛保奏稱青海之扎薩克等
現在聚兵七千名但器械馬匹未能齊備請
揀選三千名令其一年一換等語朕所以聚
此兵者特爲保全伊等家口及遊牧之計非
爲征伐調遣之用也其生計情形從前俱未
聞知今據達鼐等陳奏朕心甚爲惻然俟從

容料理必有加恩之處今所聚兵七千名著
選派三千名照朕從前所降恩旨官員賞給
半年俸銀兵丁各賞銀五兩一年一次更換
其更換之官兵亦照此賞給至兵丁駐防日
久盤費未必接續著賞給茶葉緞布等項及
每月所食之青稞再撥回之兵丁四千名官
員等著賞給三月俸銀兵丁等賞銀三兩令
其各回遊牧之所準噶爾賊人或來騷擾青
海之遊牧不可不防朕意欲將伊等遊牧預
行從容遷移擇妥協之處居住著伊等會同
詳議辦理賊人由遠路前來一無所得不待
戰而力盡矣我內地兵丁與賊交戰時青海
三千兵丁但追襲賊後量力將賊人馬匹趕
出所得之馬匹即著賞給趕出之人仍計所
得馬匹之多寡另行加恩議敘○吏部議覆
廣東巡撫鄂彌達疏言潮州府屬之潮陽縣
管轄一十三都地方遼濶請將洋烏減水二
都及雲落司巡檢改歸普寧縣就近管轄應

如所請從之。己卯諭大學士等副都統佟時茂劉汝霖著同李扶等帶領派出之漢軍步兵四千名前往北路軍營。又諭北路軍臺人員殊屬勤勞應大沛恩膏。此內廢員甚多其因何事革職情由並坐臺已經幾年之處交吏兵二部查明分晰呈覽朕看其情由或令開復或行寬免之處另降諭旨其坐臺已逾二年者俱著另委人員更換至在臺各蒙古俱著加恩賞賜。以原任吏部左侍郎阿克敦爲額外內閣學士隨撫遠大將軍印。戶部議覆直隸河道水利總督劉於義條奏天津截留漕糧事宜一漕米進倉旗丁向有津貼經紀及坐糧廳等茶果銀諸費今米既截留一切俱可不用其額設落崖進倉腳價請令旗丁自備給發。漕米收放必有折耗地方官恐有賠累於支放時每短少斛面查漕船抵通旗丁雇募剝船每百里給飯米一石耗米一石今既經截留省却剝船之費

請令旗下每米一百石給地方官耗米一石庶支放不致虧折短少。截留漕米入倉露囤必須鋪墊苫蓋若俱令地方官置辦爲費必多。查漕糧例有隨糧席片請令旗丁即於截留處交納。倘有不足再令地方官買補均應如所請從之。○庚辰諭大學士等從前令在科布多地方修城原欲駐兵進剿之意今宜以保固疆域爲要務賊退之後將科布多駐防兵丁悉行撤回。令於察罕叟爾扎布韓等處駐劄近於喀爾喀之遊牧便彼此易於策應。著行文大將軍傅爾丹順承郡王錫保會同喀爾喀副將軍等定議具奏。至科布多兵丁或乘青草即行撤回或俟阿爾泰嶺下雪之後徐徐撤回。令伊等公同酌量料理。○諭青海王貝勒貝子公台吉等爾等俱係顧實汗之子孫自祖宗以來依附內地邊疆恪順供職我

聖祖仁皇帝視爾等如子孫撫育六十餘年寵

遇之隆至優極渥且念爾等尊崇黃教是以我朝於達賴喇嘛班禪額爾得尼備極恩眷若準噶爾者暗遣賊兵侵犯西地殺害喇嘛毀滅供器實爲黃教之罪人爾等儻違棄先人崇祀之教辜負國家歷沛之恩一家之內興起兵戎以啟賊人僥倖之端雖愚昧之人亦不出此前者羅卜臧丹津聽信流言敢行背叛我朝發兵征剿逃竄在準噶爾處困苦辱耻爾等無不聞知今爾等若到彼處路途如許遙遠馬畜必至疲斃彼豈能爲爾等置立產業分與遊牧地方令爾等各統所屬依然保聚乎況準噶爾四面皆成讎敵終歲爭戰不休凡用兵之處必置爾等於前虐使任意豈若各守祖父基業永享太平之爲得乎爾等若不熟計利害聽伊誑誘之詞依附賊人妄思蠢動將來興師問罪必先及爾等彼時即欲悔禍國法不爾貸也朕所以頻降諭旨反覆開導令爾等會集兵丁小心防守將

屬下人早行移入者實冀保全爾等非欲調遣爾等爲進剿之用也爾等當思朕愛護安全之至意詳細曉諭屬下人等合力防範果能遵旨奉行朕自大沛恩膏爾等遊牧妻子既無吞併之憂而中外安居亦永享無窮之福矣諭管理旗務大臣等盛京係根本之地朕意欲於山海關中後所地方築造城垣揀選京師及盛京兵丁數千名將查出莊頭等之餘地給與伊等居住令其在山中採獵并學習技藝供應差遣著奉天將軍那蘇圖詳議具奏禮部議覆四川巡撫憲德疏稱故明烈婦四川渠縣禮部郎中李含乙妾王氏代嫡捐軀保全嫡子浙江總督李衛疏稱浙江平陽縣貢生李應官妻吳氏於順治五年山寇竊發被掠不污投江完節俱請旌表以彰節烈遺骸均應如所請照例給銀建坊入祠致祭從之甘肅巡撫許容題平番縣莊浪土司指揮僉事魯公訓故請以其孫魯

甸邦承襲下部知之○辛巳實授張照爲內閣學士兼禮部侍郎○擢鑲藍旗漢軍叅領諾爾渾爲兵部額外侍郎前往北路軍營○以正黃旗滿洲副都統巴圖署鑲藍旗護軍統領鑲紅旗護軍叅領達色署本旗滿洲副都統○癸未諭大學士等各省駐防兵丁生齒日繁現今餘丁甚多若聽其閒散既無從學習技勇而定額錢糧亦難以養贍家口著各處將軍於滿洲餘丁內擇其能騎射可供驅使者於額設兵丁之外添設若干名並作何給與錢糧操演技勇之處悉心定議而行○甲申諭內閣今歲五六月間直隸山東河南等處雨澤愆期朕即慮及上年被水低窪之地魚子存留今夏烈日蒸晒或變蝗蝻爲禾苗之患特令大學士傳諭直省督撫嚴飭屬員留心訪察預爲防遏茲據河東河道總督沈廷正奏報山東濟寧之南鄉新店等處有蝻子萌動已飭令撲滅又據署河南巡撫

張元懷奏稱光州所屬竹園內生有青蟲似蝗今已捕除從來蝗蝻始生之時以人力制之尚易而小民耽逸偷安憚於用力又恐踐踏禾稼瞻顧逡巡及至飛颺之後遠近蔓延勢不可遏是在實心任事之官員督率鄉民力爲捕治不得姑順輿情釀成大患著直隸山東河南江南等處督撫通行所屬實力奉行儻視爲具文苟且塞責將來飛颺之時朕必察其發生之處將該地方官從重治罪直隸山東河南三省欽差大臣科道等著一同留心訪察毋忽○福建按察使李玉鉉患病解任陞原任福建臺灣道劉藩長爲福建按察使司按察使○靖邊大將軍傅爾丹摺奏臣等於六月十七日擒獲厄魯特哨探賊夷二十三名供稱博克托嶺有賊兵二千駝馬萬餘遣叅贊蘇圖副都統戴豪等率兵三千往剿十八日遣前鋒統領丁壽統兵一千五百名應援與賊戰於庫里野圖嶺殺賊四百

餘名賊驅駝馬踰嶺敗遁十九日丁壽蘇圖等與臣傅爾丹合兵一處二十日賊兵二萬餘人從高埠衝突大營力戰一日殺賊千餘遣副都統塔爾岱馬爾齊率兵二千名奪占西山二十一日因賊營險要移營至和通腦兒誘賊邀擊遣丁壽蘇圖參贊覺羅海蘭副都統常祿西彌賴領兵據山梁之東塔爾岱馬爾齊屯守西山副都統承保居中策應參贊馬爾薩由東路公達福戴豪在前副都統舒楞額土默特公沙津達賴等在後俱保護行營臣傅爾丹統兵繼進移營時賊人列陣衝突軍營來攻丁壽塔爾岱兩軍丁壽等力戰殺賊千餘忽狂風驟雨水雹齊至丁壽等遂爲賊圍困臣傅爾丹遣兵將塔爾岱援出又令承保救援丁壽等因日暮未能解圍二十一日覺羅海蘭冲殺賊隊潰圍而出丁壽蘇圖馬爾齊俱自盡常祿陣亡西彌賴命索倫兵救援丁壽索倫兵俱潰散西彌賴隨亦

自盡二十三日賊晝夜犯臣大營力戰殺賊五百餘名土默特公沙津達賴等及察哈爾歸化城土默特喀喇沁兵一時潰散軍營止存滿洲兵四千名二十四日隨印侍郎永國及覺羅海蘭戴豪俱自盡臣等以餘兵退歸步設方營保護輜重以塔爾岱署前鋒統領達福舒楞額殿後承保統右翼馬爾薩統左翼臣傅爾丹與副將軍巴賽查弼納往來巡察副都統德祿捧攜敕印起行賊夷領兵三萬餘四面來侵二十五二十六連日力戰殺賊千餘二十七日殿後公達福陣亡二十八日臣等渡哈爾哈納河賊夷尾追冲突左翼力戰殺賊五百餘名遂登山嶺分兵二隊臣傅爾丹率德祿承保自右下山巴賽查弼納舒楞額自左下山臣傅爾丹於七月初一日至科布多修城地方兵丁陸續至營者共二千餘名臣傅爾丹隨遣弁兵往迎未歸諸將惟塔爾岱於初七日負傷至營巴賽查弼納

馬爾薩舒楞額今尚未至臣輕舉妄動以至敗績請將臣等正法用彰國憲奏入得旨此舉損兵敗績雖屬有罪朕覽爾等之竭瘁力戰寬恕其罪痛側難忍不覺淚下將朕親東之帶賜與軍營令傳爾丹繫之爾等忿激之下急思報復恐又妄動賊人雖來不可輕進追擊但能相機堅守即爾等之功科布多地方若難固守可回至察罕叟爾駐劄今已授馬爾賽爲撫遠大將軍領兵前來到時爾等

公同商酌料理○乙酉諭內閣朕以直隸山東河南夏間雨澤愆期特命截漕查賑既而三省陸續奏報得雨朕心稍慰茲聞直隸山東及河北彰德衛輝二府有窮民因秋成無望預爲渡河而南以圖就食者蓋因本地歉雨之時尚未聞截漕查賑之諭旨輒思就食他省若即令資遣還鄉恐時屆仲秋耕種之期已過轉致失所著該撫飭令沿河州縣於各渡口詳詢其所欲往地方有力不能自達

者量給路費仍知照該州縣善爲安插除有親朋可依及已傭工得食者聽其自便外其乏食之民著用截漕米石照例計口賑給有欲回本籍者即給資遣回其不願即歸者候來春給以資糧使之回籍俱照例動用存公銀兩造冊送部如各省樂善之家有能存恤周濟者該地方官酌量輕重賞給花紅旗匾最優者詳請題達給以頂帶以示鼓勵設愚民無知因隣省安插得宜仍復離鄉棄業該

地方官務悉心安集剴切曉諭令其勿離故土又聞渡河流民有欲往湖廣者去鄉更遠回籍愈難著該地方官即於所到地方安插務須規畫盡善無使一夫失所以副朕勤恤民隱子惠元元之意○靖邊大將軍傅爾丹摺奏臣回至科布多修城處驗看工程遂將逃遁之京城正藍旗副叅領官保阿達哈哈番陸格及首先造謀潰散訛言惑衆之索倫領催里色奔德爾圖先正軍法至黑龍江佐

領巴都馬始雖勸阻索倫後亦夥逃妄報科布多河西守卡倫之侍衛吳林泰擅離汛地至營報信前鋒叅領金柱前鋒校黑達色奉丁壽之令報信大營並不冲隊前進先還築城之處俱請革職効力贖罪土默特公沙津達賴由塔布囊晉封公爵不知圖報臨陣潰逃請勅部議罪駐劄科布多河東之叅贊侯陳泰副都統阿三聞臣等軍營圍困之信都統袞泰調取守城並不應援反率領所屬二千兵竝達錫領到察哈爾兵三百名急回扎布韓地方請交部嚴加議罪再歸化城之土默特副都統袞布夸蘭大里查布叅領塞楞皆背恩降賊凡被獲脫歸之人俱見其在策零敦多卜之營請先將其妻子正法至賊兵聞暫駐阿爾泰山嶺地方專候噶爾丹策零之信以決進退謹奏○丙戌諭大學士等吉黨阿著授爲護軍統領同欽拜帶領右衛兵丁前往北路軍前費雅思哈阿福塔齊付鄂

爾多巴什等俱賞給原銜給與俸祿著同庫齊圖隨漢軍兵丁前往視看道路水草齊什到京後俟馬蘭泰帶領兵丁起程時一同隨往○又諭原任盛京戶部侍郎傅鼎著調回往軍營効力○又諭傅爾丹奏稱歸化城之土默特副都統袞布夸蘭大里查布叅領塞楞背恩降賊請將其妻子按律正法等語朕思歸化城土默特等世受國恩凡遇用兵之地奮勇効力已歷多年總未有一背國降賊之人今袞布等不顧辱及祖父累及妻子貽羞於衆土默特縱按律處治罪所應得朕今法外施恩袞布等之妻子從寬免死仍令伊等照舊安居著行文與丹晉將此悉諭土默特弁兵知之○兵部議覆雲貴廣西總督鄂爾泰疏言黔省驛站下游自黃絲驛至平越府自平越府至楊老驛計程八十里道路崎嶇若由黃絲以下之虎場營分路自魚樑江直達楊老驛止五十里路亦平坦請裁去黃

絲一驛將平越一驛夫馬移駐酉陽塘又上游新改驛路六站內自毛口抵舍基塲舍基塲抵楊松楊松抵大山凹站路俱不甚均請將裁汰之黃絲驛馬匹官役即移駐於毛口以毛口河驛移駐烈當舍基塲驛移駐晉安縣屬之罐子窰大山凹驛移駐楊松楊松驛移駐晉安州屬之劉官屯庶道里均平驛遞商民均屬便益應如所請從之丁亥諭大學士等康親王崇安令於八月二十一日起身前往軍前著賞給內庫銀一萬兩其隨往該屬人員照順承郡王出征之例賞給應得馬匹照定例折價交與該王辦理又諭馬蘭泰曾經委署前鋒統領帶領滿兵今滿兵既暫停起身馬蘭泰著同漢軍兵丁前往其卡倫等處行走之滿兵令馬蘭泰專轄又諭八旗漢軍官兵應扣未完車本銀兩著悉行寬免調福建海壇總兵官呂瑞麟爲福建臺灣總兵官福建臺灣總兵官王郡爲廣

東潮州總兵官四川總督黃廷桂等疏言川省存貯米穀現止四十二萬石有零請早爲籌畫將常平倉捐例改穀作銀隨時糴買並酌開捐納事例將銀買穀存貯得旨川省乃產米之鄉積貯易於爲力該督撫請開捐納誤矣况改穀折銀又復將銀買米徒滋弊端更屬背謬但通省積穀止四十萬石爲數實少應如何增貯之處著大學士等詳議具奏戊子諭內閣現在川省才能之將弁不多欲將隣省幹弁揀選數員命往著詢問河東總督田文鏡湖廣總督邁柱於所屬武職人員內曾經歷練之人將所知者舉出一面奏聞一面令赴川省交與總督黃廷桂酌量委署題補又諭廣西道通交趾聞該地方有無知愚民拋棄家業潛往交趾地方開礦更有姦匪之徒潛逃異域以致追緝無踪者似此違禁妄行漸不可長著廣西巡撫提鎮悉心商酌於往來隘口及山僻可通之處撥

兵添飭令該管官弁加謹巡查僮有私行出口之人務押解原籍照例治罪庶愚民不致流離異地而姦徒亦不致遠颺漏網矣○已丑諭大學士等西路防禦賊人之事已屢經降旨與大將軍岳鍾琪等預爲留心料理但禦賊之道務須計出萬全朕披覽輿圖見軍營至肅州中間甚爲遼濶而邊外一帶如赤金柳溝金塔寺沙州瓜州等處散處之民人甚多牲畜亦衆萬一賊人乘其不備而侵擾之則巴爾庫爾之大軍何可分勢於各路堵禦凡此黎元皆吾赤子橫被擄掠荼毒於心實爲不忍況搶奪民人之牲畜即可爲賊衆之口糧則與我疲敝賊人之計亦大相左矣朕意當令居民預度就近可居之地一聞賊信即遷移以避之務期免其侵害若從前駐兵之處有應添兵力以保護百姓者亦著大將軍即行調撥但不可分大營之兵勢總之使賊人此次遠來一無所獲所謂不戰而

屈人之兵也但須善於奉行安慰民心勿使驚惶疑惑以致失所此朕惟恐邊外居民被賊侵害豫籌防範之大概也至於用兵之道固以防邊固本爲先而機會可乘亦不可失若但堅壁自守聽其肆行無忌雖有可乘之機仍復拘泥成見則又恐賊勢猖狂將來何所底止今冬西路既已預備賊衆若來我師以逸待勞以靜待動大將軍外觀形勢內度己力僅有可乘之機或發兵出擊以挫其鋒或堵禦隘口以遏其路或暗中埋伏以出其不意或趕逐馬匹以驚其衆心亦足使賊人喪膽但萬萬不可輕舉遠逐以分兵勢大將軍只在大營調度不可親身前去副將軍等亦酌量行之擊賊之時賊人以馬兵前來我師以步兵出擊實勝於馬兵禦敵不可棄長就短是以現在添派北路兵丁朕將漢軍步兵四千名派往大將軍等當共知此意則派撥各得其宜且使衆人各効其所長而大功

可成矣朕又細思西北兩路大營乃防邊擊賊之根本若果兩路大營堅固整齊不爲賊人所搖撼則彼必瞻顧徬徨恐我軍截其歸路掃其巢穴不敢肆行無忌即如今春之率衆潛歸不敢久留西路者恐北路之兵襲其後路也此番六月之不敢逼近科布多軍營者又恐西路之兵搗其巢穴也目前賊既得志於北路伊知北路兵力不能進取則今冬仍往西路且增添賊衆更多於侵犯北路之力量俱未可知總在大將軍先事圖維臨時權變勿貪功前進勿坐失機宜斯爲美善又如賊人侵犯剽掠多在風雨陰晦之時此際天氣潮濕鎗礮之火藥難出弓箭之力量軟懈二者均未便利當多備手鎗挑刀等械以爲擊賊之具可助鎗礮弓矢之力將此傳諭岳鍾琪等知之○吏部議覆廣東總督郝玉麟疏言新會開平兩縣連界之大官田地方與兩縣縣城遠隔請增置一縣設知縣一員

典史一員訓導一員分新會縣樂逕司巡檢改隸新縣縣學額取進文武童生各八名於新會原額二十名內撥取五名開平原額十二名內撥取三名均應如所請從之尋定新設縣曰鶴山添設奉天府牛莊城倉官一員從奉天將軍那蘇圖請也○庚寅內務府總管尚志舜年老休致實授鄂善爲內務府總管○大學士等遵旨議奏四川總督黃廷桂等奏請開捐積穀一疏查川省產米之鄉應遵諭旨無庸捐納但通省積穀僅四十餘萬石爲數實少酌於現存米穀雜糧外再買六十萬石共計有百萬之蓄庶足備用請分作三年隨民間穀價貴賤約計每年買穀二十萬石每石約價三錢動支夔關及鹽茶盈餘銀六萬兩分發州縣總期三年內買足至各府州縣衝僻繁簡不等其大縣應貯若干中縣若干小縣若干府倉若干倉廩作何先期添造或該地方應貯蕎稗雜糧之處令該

督撫分別酌議辦理得旨所議甚屬周詳妥協依議速行但每年穀價貴賤不等如畫定三錢恐價貴時或至抑勒強買價賤時不免侵漁冒銷著再行詳議具奏尋議四川穀石價值雖以三錢爲率每年貴賤不等應隨時斟酌如遇價賤不及三錢即可過於二十萬石之數或價值甚賤之州縣應及時採買詳請量加銀兩儻遇價值不止三錢亦可不及二十萬石之數或價值甚貴之州縣應停止採買以待來歲秋成總於三年內通融籌畫買足六十萬石之數買貯之後照定例存七糶三以免紅腐從之○移福建南安縣縣丞駐羅溪從福建總督劉世明請也

大清世宗敬天昌運建中表正文武英明寬仁信毅大孝至誠憲皇帝實錄卷之一百八

大清世宗敬天昌運建中表正文武英明寬仁
信毅大孝至誠憲皇帝實錄卷之一百九

出使使臣官大保延日講官廷君主太保原太子大保伯和殿大學士農戶部尚書仍舊吏部尚書翰林院掌印

第三等伯加十三級臣蔡廷干光祿大夫經筵日講官起居注太僕議政大臣武英殿大學士兼工部尚書仍兼管

翰林院掌院事加二級日福敏先疎大夫經筵講官太子師傅東閣大學士兼工部尚書加六級

經廷議官議政大臣協辦內閣大學士事務禮部尚書仍兼管太常寺鴻臚寺事廿三

敕修

雍正九年辛亥八月辛卯諭大學士等四

十九旗扎薩克遊牧之地甚屬緊要科爾沁等處遊牧兵丁著派數千名駐劄圖拉克爾倫等處見在軍前扎薩克兵丁著撤回數千名與伊等合爲一處盛京兵亦派二千名共一萬有零賊來侵擾喀爾喀等遊牧處可以照管爾等會同科爾沁王額駙羅卜臧滾布等詳議具奏尋議選派科爾沁十旗兵二千名教漢等十一旗兵一千名烏朱穆秦十一旗兵一千名再軍前撤回兵丁四千名連盛

京派出二千名共爲一萬委員管轄照例賞給銀兩口糧往駐克爾倫地方捍禦得旨此等處兵丁俱行選派暫在該處預備聽候調遣○癸巳諭大學士等肅州金塔寺原種進貢之哈密瓜朕思與其種瓜何如種穀以資民食著行文該督撫等嗣後不必進獻竝著曉諭彼處人民知之○命鑲藍旗護軍統領侯馬蘭泰正黃旗滿洲都統查克旦鑲黃旗滿洲都統公博爾屯原任西安巡撫武格爲撫遠大將軍大學士公馬爾賽叅贊○以鑲黃旗滿洲副都統宗室諾穆柱署正藍旗護軍統領陞署正紅旗蒙古副都統雅瑚爲正紅旗滿洲副都統以貝子弘春署正紅旗漢軍都統鑲白旗漢軍副都統倭星額署正白旗漢軍都統正藍旗叅領杜賚署本旗滿洲副都統○丁酉遣大學士尹泰祭先師孔子○諭青海蒙古及番夷人等朕統御萬方凡中外民人皆一視同仁莫不欲使

之得所爾等沿邊番夷及青海蒙古同受國家撫綏保護之恩竝無岐視目今準噶爾賊人窺伺邊境或將來侵擾青海蒙古而黃河以南之蒙古畏避賊鋒投奔近邊番夷之地亦未可定爾番夷等須留心照看切勿因向日曾有嫌怨乘其危急而加以戕害若蒙古中有不法之徒搶掠番人者許番人用力抵禦不必退縮將來事定之後朕自然以理斷其曲直分別賞罰番人蒙古皆朕赤子果能遵朕諭旨彼此相安同受朝廷之恩澤方是爾等之福思之思之吏部議覆署兩江總督尹繼善疏言淮安府屬之山陽縣揚州府屬之江都縣事務殷繁幅輒遼闊請各添設知縣一員分治查山陽縣屬廟灣鎮見有城池營汛請改爲縣城令新設之縣駐劄再添設縣丞一員典史一員移朝陽司巡檢駐草偃口鹽城清溝司巡檢駐上岡將鹽城縣學訓導撥歸新縣又查江都縣原轄新舊兩城

今酌量分界舊城西屬舊縣東屬新縣新城南屬舊縣北屬新縣其邵伯上官二巡司并邵伯驛俱歸新縣瓜洲萬壽二巡司并廣陵驛俱歸舊縣將原設之主簿訓導各一員撥歸新縣并添設典史一員再如皋縣東沿海一帶港口繁多縣令鞭長莫及請添設主簿一員駐掘港場均應如所請從之尋定山陽新分縣曰阜寧江都新分縣曰甘泉免雲南東川烏蒙二府屬雍正八年分未完銀米有差以故嵩齊忒札薩克多羅郡王阿噶尼斯達子策凌喇布坦襲爵戊戌祭大社
大稷遣皇五子弘晝行禮乙亥
太宗文皇帝忌辰遣官祭
昭陵調江南江寧將軍鄂彌達爲山東青州將軍以正白旗滿洲都統穆森署江南江寧將軍內大臣拉錫署正白旗滿洲都統陞江寧協領阿爾胡禪爲山東青州副都統庚

子

上召入出兵王大臣等諭曰康親王本月二十一日不必起程朕另定期著王諭所屬人等愛惜馬力相擇水草從容前往推河等處大將軍馬爾賽到軍營後或令康親王駐劄克爾倫地方管轄扎薩克盛京等處兵丁或將扎薩克兵丁派數千名滿洲兵內之懦弱者派數千名駐劄圖拉扎克拜達里克等處令康親王管轄著大將軍馬爾賽順承郡王會同定議 諭大學士等據副將軍石雲倬奏稱七月十三四等日有準噶爾賊人侵擾吐魯番副將王廷瑞等分兵迎敵與賊連戰屢勝生擒賊人七名殺賊二百餘人獲軍器馬匹不記其數等語王廷瑞分兵迎賊甚屬孟浪此番賊衆不過一二人王廷瑞等幸獲小勝不但不足爲喜朕更爲吐魯番憂之賊人屢被吐魯番之敗創其懷恨益深必復以大衆報復石雲倬可速傳旨曉諭吐魯番

嗣後賊人來犯但當堅守城垣不可迎戰若魯谷慶一城可以容住回民人衆則合防守之官兵堅守一城愈妙如一城不能容住多人則別住於相近之哈喇火州等處將馬匹牲畜速行收拾城中柴草預爲多貯以備應用賊衆若分兵來圍彼此堅守堅壁清野俾賊人無所施其伎倆且有大量軍襲其後奪取其馬匹坐致疲敝自必遠遁亦不可追逐賊衆長於騎射吐魯番如於馬上比決勝負則回民十不及賊人之一若固守城垣以拒敵賊人亦十不及回民之一用我之長乘賊之短此萬全無弊之道也凡事持重鎮靜爲之但能保護吐魯番城垣人衆其功勝於殺賊多矣 以左都御史史貽直協辦陝西西安巡撫事務吏部議覆山西巡撫覺羅石麟疏奏增汰佐雜等官事宜一大同府屬之大同縣係衝繁疲難要缺縣令而外止有典史一員不敷委辦請添設縣丞一員一寧武府

所屬四縣向係衛所今改併爲縣其倉糧業歸各縣經管所有舊設之神池利民倉大使二缺萬億廣盈永寧寧化倉副使四缺俱請裁汰查寧化倉距縣百里所有倉糧請即委寧化堡原設之巡檢收放一永寧州所轄之方山堡離州寫遠請添設巡檢一員駐劄舊城一代州既改爲直隸州管轄三縣請裁原設邊儲倉大使缺改設糧捕州判一員代州所屬繁峙縣之平刑關最屬險要請裁原設倉大使缺改設巡檢一員一直隸平定州原設州判一員奉裁未久請照舊復設直隸解絳二州均屬繁難要缺請各添設糧捕州判一員均應如所請從之 辛丑

太祖高皇帝忌辰遣官祭

福陵 諭大學士等此次派往軍前之漢軍兵四千分作四隊前往第一隊著都統李林統領二隊著副都統佟世茂統領三隊著副都統劉汝霖統領四隊著都統祖秉衡統領漢

軍人等不善牧養馬匹貝子僧滾扎布公羅卜藏策布登帶領前往之喀喇沁一千兵亦著分作四隊派入漢軍兵內凡漢軍牧養馬匹與行軍事宜令其指示著叅贊侯馬蘭泰管理火器營兵部侍郎諾爾渾沿途照看推河地方過冬俟明年草生時著大將軍馬爾賽另備馬駝接迎漢軍兵丁將伊等原乘馬匹交與喀喇沁兵暫行牧養此喀喇沁兵著僧滾扎布等統領在推河駐劄俟大將軍到時調遣而行 署陝西總督查郎阿奏言陝甘二省正值軍興之際一應領兵差委需用將備甚多仰懇敕部揀發遊擊十二員守備十二員命往陝西以便酌量委署得旨凡在京引見之武弁稍有可用者朕即分發各省以備題補委署之用安得尚有餘剩人員數十名之多朕思上年冬月陝西固原提督樊廷率領弁兵擊敗賊衆懋著勞績朕已諭令各回內地營汛休息以示恩恤凡此有功

之人自有材技優長可膺超擢者著查郎阿問明樊廷等秉公揀選若果奮力行間人材可用即以微弁兵丁題補委署遊守等缺亦可不必以越等爲嫌務期舉用公當以副朕獎勞賞功之至意○封喀喇沁固山貝子僧滾扎布爲多羅貝勒○壬寅實授劉師恕爲內閣學士兼禮部侍郎仍留福建觀風整俗使任○以詹事府少詹事吳應棻提督順天學政○癸卯諭內閣今年五月間直隸山東

河南三省雨澤愆期大有亢旱之象朕心憂懼寢食靡寧特命大學士九卿等預籌賑恤備用之策務使三省蒼黎無一夫之失所隨經廷臣定議截留漕糧以備三省賑濟專遣大臣經理其事再令翰林科道等官分往各州縣親身查勘助理散賑朕俱降旨允行嗣於六月二十八九等日京師地方

天賜甘霖四野霑足隨據署直隸總督唐執玉山東巡撫岳濬署河南巡撫張元懷陸續奏

報各該省霑被雨澤及秋禾秀實情形茲據巡察御史寶啟瑛奏稱順天永平宣化三府收成六七分八九分者居多此皆

上帝垂慈矜憫下民而錫以再造之福也朕思截留漕糧原以備地方緩急之需應仍照前旨交與差往之大臣辦理外至於分派大臣官員等前往各省查勘散賑者因恐被災甚重而地方又復繁多難以全委之於該省有司也今則地方官可以料理若添設欽差轉致有司之推諉所有差往河東二省之員即著回京直隸巡察御史等亦不必兼管查賑之事該大臣等於辦理截漕事竣後亦著回京其三省得雨稍遲之州縣即交與該督撫督率地方官秉公查勘有應行散賑之處悉心辦理務令窮民咸登衽席儻怠忽從事奉行不力責有攸歸○靖邊大將軍傅爾丹摺奏臣世受國恩蒙

皇上矜全撫恤實同高厚復恩施望外授以大

將軍重任耳提面命訓諭周詳臣不能遵奉聖訓妄動輕舉損折國家歷年生聚教養之將士上勞

聖慮辜恩負罪不惟法不可容即臣心愧赧亦難以偷生於人世今

皇上不即加誅降旨慰諭復加賞賜實從古未有之隆恩但臣此次進討大臣數人悉已身故臣若不勉勵將士收軍而回轉使賊人得計因與副將軍巴賽查弼納等計議我等若死於敵則已今若輕生自殺其如國體與將士何惟當竭力護衛餘兵至建城之處以待國討茲惟有同心鼓勇力戰擊賊因遂曉示軍營奮兵帥衆轉戰而出同時分軍統領者巴賽查弼納馬爾薩舒楞額等至今並無消息損兵折將至於如此臣不但無以仰對天威亦何以腆顏統衆皇上縱格外施恩不加誅戮臣死之日難見陣亡將士於地下也今臣已至城所安置哨站

竝傳諭喀爾喀副將軍等令其備運糗糧固壘深溝以息將士招集商人謐寧蒙古諸務悉已就緒伏乞

皇上速遣賢將統率大軍將臣調回同臣妻子一併正法以昭國憲奏入得旨朕從前諭旨甚明朕之處事豈肯不持大義以定是非而聊爲此目前慰勉之理惟輕信賊言冒險深入中賊說計是爾之罪至不肯輕生自殺力戰全歸此爾能辨別輕重之處事定之後朕自有辦理之道爾若念慮紛擾以致血氣消耗不能報仇雪恥上損國威下玷家聲罪尤甚焉爾其勉勵勇氣安心敬攝計圖遠大以答朕恩 甲辰遣官祭

關聖帝君 諭內閣雲貴廣西總督鄂爾泰來京陛見於署督高其倬到滇之後起身著乘驛按程而行所過地方派撥弁兵護送沿途文武官員悉按該管上司之禮迎送供應○以內大臣拉錫爲正白旗領侍衛內大臣

戶部左侍郎海望爲內大臣仍兼戶部侍郎行走以署左副都御史兼大理寺卿索柱爲額外內閣學士陞陝西寧夏左翼副都統卓鼎爲陝西寧夏將軍署理鎮安將軍事務以傅泰仍署理寧夏將軍事務刑部侍郎常賚爲西路副將軍調西路副將軍正黃旗滿洲都統覺羅伊禮布爲撫遠大將軍叅贊靖邊大將軍傅爾丹摺奏科布多修城處所既當奇林庫里野圖大路二道又與布拉罕大路相近且於阿爾泰小路通連之處甚多地方實屬緊要臣至修城處所之時城垣周圍已高築五尺此際見令綠旗兵丁等加力修築將城牆高築一丈合計垛城共修一丈五尺其於防守事宜已爲堅固但周圍十有二里甚屬遼濶見今在城兵丁共計一萬五千九百餘名僅足看守城池若再於城垣兩邊要隘添兵駐防庶賊衆來時可以協力攻禦查修城處所離察罕叟爾約計一千四

百餘里難於策應伏乞

皇上敕令盛京船廠黑龍江內扎薩克等處兵丁前往築城處所駐劄防守於軍務實有裨益奏入報聞丙午諭大學士等據靖邊大將軍傅爾丹仍欲令兵丁在科布多地方駐劄防護爾等會同大將軍馬爾賽將應駐應撤之處確議具奏再將查克旦率領駐劄庫布可爾地方兵丁應否撤於察罕叟爾之處一併議奏尋議科布多駐劄兵丁遠隔察罕叟爾千有餘里難於互相捍衛察罕叟爾地方與喀爾喀遊牧之地相近如將大兵會集一處駐劄不但軍威強盛而防護亦有裨益應將科布多兵丁撤回察罕叟爾其駐劄庫布可爾兵丁亦應撤回察罕叟爾從之諭理藩院青海扎薩克一等台吉恭格効力有年前羅卜藏丹津叛逆時在哈麻爾嶺奮勇殺賊今又追擒諾爾布著加恩封爲公爵改江南江寧城守右營遊擊缺泗州浦口二

營守備缺俱爲都司僉書從兩江總督高其倬請也。丁未戶部議覆署直隸總督唐執玉疏言雍正四年永定河開挖新河挖去東安永清武清三縣民田共四百四十頃有奇俱已給價訖其原額錢糧請於雍正四年爲始悉予豁免應如所請從之。○戊申諭大學士等從前降旨令馬喇回京今藏內見有僧格巴進忠邁祿青保苗壽等數人辦理事務馬喇著遵前旨回京一路防衛兵丁或四五

亦誑稱噶爾丹丹津同其女來藏乘其不備進兵襲取藏地今送回蘇爾雜之言正噶爾丹策零施行姦計若唐古特部落少爲玩忽即蹈從前策零敦多卜之故轍矣準噶爾賊人既殺拉藏豈有實心將蘇爾雜送回西藏令代父職之理著頗羅鼐將此情由曉諭衆唐古特知之準噶爾賊人揚言發兵五千護送蘇爾雜道途險阻全軍豈能齊到目今西藏有內地兵丁二千名換班兵丁五百名又駐防又木多兵一千名見催來藏爾處亦有訓練蒙古兵丁應與駐扎西藏大臣會同商議於阿里者斯肯圖魯克里野等處要隘遠設卡倫詳加瞭望協力防守準噶爾賊衆若以兵隨蘇爾雜斷不可容留即迎戰擊退賊敗走時亦斷不可追襲蘇爾雜父兄被人殺害伊豈不忿恨若果思報仇并感戴朕恩帶領數人恭順來歸爾等收留悉心安頓至若立汗之事當令達賴喇嘛班禪額爾得尼秦

聞於朕方可建立豈可令噶爾丹策零任意妄行頗羅鼐原扶助拉藏効力行走後因拉藏被賊殺害朕令爾料理西藏事務爾約束唐古特實心効力是以加恩封爾爲貝勒今蘇爾雜若果率領數人來歸爾即行奏聞候朕另頒敕旨己酉諭宗人府順承郡王錫保自派往軍前以來辦理軍務克殫誠心勤勞宣力甚屬可嘉王之祖多羅額郡王亦係國家懋著勞績之賢王著將錫保晉封順承親王諭內閣雍正七年八月內降旨陝西四川直隸山東山西河南等省所派出征之大小官弁俱係能員嗣後六省所出之官弁員缺著該上司委員遞行署理准其昇俸俟凱旋之日將出征之員與委署之員合并比較揀選引見請旨補授蓋欲使効力疆場之人即可得缺陞選而委署稱職之材亦得兼收竝用實兩全之道也但今行之二年委署之員漸多實授之員漸少每遇缺出該管大

臣往往以不得合例委署之員甚費籌度前經署陝西總督查郎阿請將委署之員越次再行委署朕已降旨允行又請揀發遊守等官二十四員爲陝甘二省之用朕又降旨令將出征有功新回營汛之人揀選題補矣今思各省出征之員未能即回本任而委署之缺日積日多則題補之法應行變通著於十缺之中分出三缺爲出征弁員陞補之缺北路者交與大將軍馬爾賽西路者交與大將軍岳鍾琪揀選題補其餘七缺則將本省之弁員或即行題補或暫行委署令該管大臣酌量施行其直隸之缺交與提督路振揚甘陝二省交與署督查郎阿河東二省交與總督田文鏡四川交與總督黃廷桂山西交與石麟石麟著以巡撫署理山西提督事務給與印信通省武弁聽其管轄庚戌諭大學士等北路軍營鑲藍旗蒙古都統袞泰著爲內大臣補授湖廣荊州將軍馬爾賽至軍營

令袞泰來京正黃旗滿洲都統查克旦著爲
內大臣 實授鑲黃旗滿洲都統公博爾屯
爲內大臣 辛亥

上詣

恩佑寺行禮 大學士忠達公撫遠大將軍馬
爾賽起程

上命

皇四子弘曆告祭

奉先殿王以下官員俱至西長安門外送行

敕諭撫遠大將軍馬爾賽奉

天伐罪治世之常經鋤暴除兇安邊之遠畧逆
賊噶爾丹策零者狂悖冥頑父子濟惡妄欲
侵凌我屬國窺伺我邊陲包藏逆心狡焉思
逞朕以此賊不除終爲衆蒙古之隱患是以
命將興師聲罪致討然稱兵耀武非朕本懷
臨以天威許其悔悟未嘗督責將士立事掃
除此朕數年以來靖固邊圉撫綏屬國之謨
畧也茲特命爾爲撫遠大將軍統領滿洲蒙

古綠旗大兵爾其彈壓邊疆肅清壁壘申明
紀律鼓勵戎行鎮靜以俟機神明以制勝持
重以固守整衆以宣威勿恃兵強而輕視賊
徒勿謂己能而不納衆論密偵遠探廣意外
之防維先事熟籌決萬全之勝算勿冒險以
輕進勿貪功而深入各路大兵及蒙古兵丁
聽爾調遣凡過駐劄處加謹約束兵將所過
地方申嚴軍令毋得騷擾百姓毋得淫人婦
女毋得離散人之父子夫婦毋得損壞人之
墳墓室廬毋得強取貨物毋得驅役平民其
或臨戰退縮貽誤撓亂軍機者文官四品以
下武官三品以下即以軍法示衆官兵有犯
小過者徑行處治有勞必錄有過必懲法紀
務極嚴明賞罰悉期公當賊中有窮蹙來歸
者加意撫恤其不抗拒官兵者勿加殺戮一
切機宜爾商酌調遣有應知會西路寧遠大
將軍者即行知會一同辦理爾其嚴重精詳
殫心奮力以副朕戡亂靖逆安民綏衆之至

意欽哉故敕 癸丑諭王大臣等內務府佐領下每旗酌量增挑護軍或一百名或二百名設立鳥鎗營其作何操演及應給錢糧米石之處著莊親王內務府總管會同大學士等詳議具奏尋議查見今護軍營內並無鳥鎗請每旗增挑護軍二百名於各佐領內管領下馬甲內擇其材技可觀者挑取如或不敷於間散人內挑取合新挑護軍與舊護軍內共挑六百名爲鳥鎗護軍行文火器營令其派人教習每旗應添設護軍參領各二員侍衛委署護軍參領各二員護軍校委署護軍參領各五員護軍校各十五員副護軍校各五員從之○諭兵部各省挑選勇健兵丁二千名該督撫送到時著莊親王內務府總管常明料理安頓即交與原任提督柏之蕃原任副將繆宏加意訓練○甲寅秋分夕月於西郊遣顯親王衍潢行禮○寧遠大將軍岳鍾琪奏報臣遵旨襲擊烏魯木齊於七月

十二日自巴爾庫爾啟行從伊爾布爾和邵地方經行五百餘里直至穆壘河地方並無賊夷卡倫於二十三日臣統領大隊沿途擊賊至阿察河有賊夷數百人在前引誘臣即嚴整攻殺賊夷敗走我兵追至厄爾穆克河賊夷在隔河踞住山梁排敵三處約有三四千人臣先令總兵張元佐等領步兵爲右翼提臣紀成斌等領馬兵爲左翼總兵王緒級曹勦等領兵由中路而上居中策應又令參將黃正位等帶領勇健兵從北山抄襲賊人之後官兵齊進奮勇爭先飛奔山梁直衝賊隊自辰至午將三處山梁俱皆奪取賊夷往西敗遁殺死賊夷不計其數因山路崎嶇天色將晚我兵不便窮追臣即收兵劄營於二十四日接奉

上諭令臣畧行襲擊即撤兵回營臣追趕賊夷離納鄰河不遠至烏魯木齊僅有兩日路程因烏魯木齊一帶賊夷搬移已空深入無益

臣於七月二十五日統領大兵回赴巴爾庫爾仍按程埋伏精兵禦後以防賊夷尾隨偷盜馬匹臣遵旨襲擊緣由并旋師日期理合奏聞得旨岳鍾琪此次領兵襲擊賊衆進退遲速俱合機宜弁兵等鼓勇爭先同心効力甚屬可嘉著岳鍾琪將在事有功之人分別造冊送部俟成功之日一併從優議敘賞賚其陣亡及帶傷之兵丁著照例賞卹靖邊大將軍傅爾丹摺奏准大學士等咨稱副將軍巴賽查弼納叅贊馬爾薩副都統舒楞額等率兵進剿至今無信應查明奏聞臣自至科布多後詳細訪問巴賽等總無確音今有從賊營脫回之正紅旗前鋒校薩明阿據稱中賊刀傷被擒在賊營遇土默特夸蘭大里查布云副將軍巴賽查弼納於六月二十八日越嶺至一小河俱各戰歿又有賊營脫回之正黃旗護軍海壽係叅贊馬爾薩傳事之人據供六月二十八日隨馬爾薩至哈爾哈

納河相近紅石崖下馬爾薩中鎗陣亡海壽救援被擒等語至舒楞額未得確音俟查明再奏奏入報聞乙卯諭大學士等人未多駐劄之雲南兵一千名令其前往西藏備用爾等已行文與總督鄂爾泰及西藏辦事大臣等但雲南省城轉行又未多路途紆遠可行文與駐劄又未多之大員此旨到日該員即將兵丁應用之馬匹衣裝等項料理齊備將弁等統領即速起身按程前進不必候雲南文書其一應馬匹衣裝口糧俱著寬裕應付毋得遲誤諭內閣朕聞各省駐防兵丁技勇多屬生疎營伍亦覺廢弛所養馬匹多不足額漢軍尤甚且遇急用之時竟有將營馬私賣者今特頒諭旨通行曉諭著該管大臣官弁悉心整理勤加訓練務令軍容嚴肅武備周全朕或於明年春月各差科道等官前往查看儻仍蹈故轍一經叅奏定將該管大臣官弁嚴加議處丙辰諭大學士等據

右衛將軍宗室申穆德奏稱右衛餘丁見有八百餘名此內可以披甲者尚多著交與申穆德等於餘丁內挑選添設馬兵五百名丁已諭理藩院據青海郡王額爾得尼厄爾克托克托奈奏稱年力衰邁請令伊子代伊在軍前行走額爾得尼厄爾克托克托奈曾經効力之人甚屬可憫著將伊子內可以襲替王爵者指出一人朕加特恩封爲長子令代伊効力行走 戊午調湖廣彝陵總兵官杜森統領四川松潘官兵前往西寧以直隸山永副將冶大雄署湖廣彝陵總兵官 戶部議覆廣東總督郝玉麟疏言瓊州一鎮孤懸海外產米稀少又龍門協兀立海中遇風信不順商販難渡兵憂艱食香山虎門二協兵民稠集廣海一寨僻處海隅商販罕到均應豫籌積貯之法請將見存鹽政節省及養廉餘剩銀兩買穀一萬六百石分貯各鎮協營遇青黃不接之時借給兵丁於秋收散餉

時照數買補概免加息應如所請從之 免江南無爲寧國等十州縣鳳陽長淮二衛雍正八年分水災額賦有差 予故一等承恩公達爾馬祭葬如例 己未以鑲紅旗護軍叅領圖爾泰署鑲藍旗蒙古副都統 庚申以正紅旗滿洲副都統宗室鄂齊署鑲紅旗蒙古都統

大清世宗敬天昌運建中表正文武英明寬仁信毅大孝至誠憲皇帝實錄卷之一百九

大清世宗敬天昌運建中表正文武英明寬仁
信毅大孝至誠憲皇帝實錄卷之一百十

監修總裁官光祿大夫經筵講官太僕寺卿和碩大學士兼兵部尚書總理兵部事務三等伯加十五級臣彭爾泰

總裁官光祿大夫經筵講官起居注太僕寺卿和碩大學士兼兵部尚書總理兵部事務三等伯加十五級臣彭爾泰

事三等伯加十三級臣張廷玉光祿大夫經筵講官起居注太僕寺卿和碩大學士兼兵部尚書總理兵部事務三等伯加十五級臣彭爾泰

翰林院掌院事加三級臣福敏光祿大夫經筵講官太子太僕寺卿和碩大學士兼兵部尚書總理兵部事務三等伯加十五級臣彭爾泰

經筵講官起居注太僕寺卿和碩大學士兼兵部尚書總理兵部事務三等伯加十五級臣彭爾泰

敕修

雍正九年辛亥九月辛酉朔諭內閣前據奉

天將軍等奏請設立水路防汛於草河。靉河等處朕因此地與朝鮮國連界恐於該國或有不便之處特行降旨詢問今該國王奏請仍遵舊例著照所請不必添設防汛亦無庸交兵部再議○壬戌諭大學士等從前三姓地方人等俱歸入旗分編為佐領七姓地方之人見今仍打牲捕貂聞伊等漢仗甚好與三姓地方無異著行文該將軍常德於七姓人等內如有漢仗好情願披甲効力者查明

數目具奏○衍聖公孔傳鐸老病乞休允之
以其長孫孔廣榮襲爵○癸亥諭八旗都統等訓練兵丁須步行敏捷乃為善技若勤習漸進一日即可行至一百四五十里著八旗都統副都統前鋒統領護軍統領等將所轄弁兵內年五十以下者皆令演習務期服勞耐久俟一年後特指一處試看若不能行至所指之地朕惟該管大臣是問若有步行超越者朕分別賞賜○諭喀爾喀弁兵等喀爾喀騎射諳練丁壯強幹勇於戰陣厄魯特不嫻騎射性懦弱而誇張惟長槍是賴一經敗北不敢回視後因喀爾喀傾心經典惟以尊崇佛教為事不習技勇而厄魯特巧詐性成乘爾七旗不備突然加兵是以被其攻擊不能保全遂至失所當土謝圖汗澤卜尊丹巴胡土克圖奔赴

聖祖皇帝請救時

聖祖憐念從前恭順納貢收留養贍安插內地

其喀爾喀各頭領仍照向來等次晉封汗王貝勒貝子公台吉扎薩克加恩賞給俸祿令各回原處居住安享康樂迄今已三四十年的矣從前大兵於烏闌布通地方擊敗噶爾丹噶爾丹復來犯克爾倫地方

聖祖親統兩路大兵征勦噶爾丹於圖拉地方被我兩路大兵擊敗勢窮力竭奔至薩克薩圖古里克地方死亡殆盡其後因策妄阿喇布坦煽誘離間意在收取喀爾喀

聖祖洞悉其情保護喀爾喀於疆界處駐兵十有一年又以準噶爾逼近喀爾喀不免侵擾命大兵踰阿爾泰深入額敏寨爾地方再三掃蕩厄魯特肝膽俱碎今知噶爾丹策零又欲侵擾喀爾喀朕於扎克拜達里克及察罕叟爾等處不惜千萬糧餉添兵數萬特為喀爾喀耳邁來北路軍前將軍大臣等輕兵進勦未及深察地利頗為失律然鏖戰十有餘日殺傷賊人數千行軍勝負乃其常事聞爾

喀爾喀以宵小捏傳準噶爾賊由科布多烏闌古木地方兩路來犯之語坐臺喀爾喀竟各棄牲畜搶奪驛馬離站四散爾喀爾喀各台吉感恩効力朕所深知爾等屬人止據流言遽爾驚竄何懦怯之甚歟爾等試思之準噶爾賊人盜取馬匹而外不敢與勁敵曠日持久計其人眾不過三四萬內地大兵數萬見駐爾地西疆何必畏懼退縮乎今準噶爾賊動曰往食懦弱喀爾喀即此一言豈丈夫之所堪受昔日噶爾丹攻擊爾等時和托輝特根敦貝子希卜推哈坦巴圖魯等尾隨噶爾丹擊敗準噶爾取其馬匹駝隻和托輝特亦喀爾喀部落人也爾等何不效法之嗣後喀爾喀各部人將朕所降諭旨各銘於心凡遇行陣坐卡殿後等處勇往効力斷不可上負

聖祖及朕深恩竝貽羞於爾部主不過數年勞瘁便可永息兵革常享安樂矣其各勉之○

甲子副都統達鼐等遵旨議奏青海拉查卜原係貝子。從前羅卜藏丹津叛亂時餘衆俱赴西寧伊獨逃往喀木地方從寬降爲公爵。今又無故逃遁。拉查卜理應正法。但伊因畏懼逃遁。追兵一至即便迎降。請從寬免其正法。將拉查卜交與西寧總兵官永遠圈禁。其長子察罕拉布坦預先歸降。請停其承襲公爵。授爲扎薩克一等台吉。管領該旗佐領下人至與拉查卜同逃之扎薩克台吉查漢喇卜。難向係圖爾古特微末台吉。相依親王戴青和碩齊察罕丹津。因不從羅卜藏丹津叛亂。皇上加恩授爲扎薩克一等台吉。乃無故逃遁。追兵既至尚不迎降。以致被擒。理應正法。但竝未乘亂生事。亦從寬交與西寧總兵官加鎖嚴禁。再查漢喇卜。難之族弟協理二等台吉達爾濟。見在駐牧居住不肯同逃。請將查漢喇卜。難之扎薩克台吉令其承襲。則伊屬

佐領不至改隸他人。矣得旨。拉查卜係察罕丹津兄之子。察罕丹津効力有年。著將拉查卜寬免。交察罕丹津管轄。查漢喇卜。難從前征勦羅卜藏丹津亦曾効力。并著寬免。交伊弟台吉達爾濟嚴加管束。餘依議。○乙丑諭內閣。寧夏橫城口及黃甫川邊外閒地與鄂爾多斯接壤。內地民人越界耕種。而蒙古等私索租價。每至生事互爭。經該部堂官奏請照例定界。朕遂降旨交與該督撫確查定議。今據該地方官派員與鄂爾多斯之扎薩克等會勘。請照原定之例分界。經大學士議政大臣等議覆。准行。朕爲天下主。薄海內外一視同仁。若照廷議立界。俾民人蒙古各守疆址。彼此無爭。揆之事勢。似屬有益。著行文鄂爾多斯之扎薩克王等再加詳悉詢問。各抒所見。公同商酌具奏。到日再降諭旨。○陞正黃旗蒙古副都統鼐格爲鑲藍旗蒙古副都統。○丙寅授淳度親王允祜女爲郡主。壻色卜

騰多爾濟爲和碩額駙○以公伊爾登署鑲藍旗滿洲都統○靖邊大將軍傳爾丹摺奏臣等遵旨公議率科布多兵丁撤回察罕叟爾地方今陸續自賊營脫回之人俱云賊兵在夸額爾齊斯地方查夸額爾齊斯在阿爾泰之傍科布多城之西南相隔不遠而與布拉罕路口甚近見今城內所有官物甚多今若退兵率衆回行萬一賊隨後援犯甚屬可慮至官物內可土埋者惟鐵器其餘糧二萬三千石銀八十萬兩火藥鉛子帳房緞布茶葉等皆軍營要物大約需駝一萬二千隻方能運載臣已行文於順承親王竝喀爾喀三處副將軍傳集駝隻到後臣領兵由科布多河東北一路往赴察罕叟爾駐劄奏入報聞○丁卯陞左都御史鄂爾奇爲兵部尚書仍協辦工部事務協理兵部侍郎福敏爲都察院左都御史仍兼管戶部兵部侍郎事務左副都御史申珠渾爲盛京禮部侍郎仍暫管

盛京刑部侍郎事○以鑲藍旗護軍參領石圖五十六俱署本旗滿洲副都統○貴州提督楊天縱以年老乞休命加太子太保銜致仕○調雲南提督哈元生爲貴州提督陞廣西左江總兵官蔡成貴爲雲南提督調雲南永順總兵官霍昇爲廣西左江總兵官○靖邊大將軍傳爾丹摺奏據陸續賊營脫歸之海壽巴顏毛勒垂扎木素畢立克圖等供稱賊人從和通腦兒交戰地方向西北前行月餘渡額爾齊斯河大策零敦多卜在夸額爾齊斯居住小策零敦多卜在喀拉額爾齊斯居住賊兵約有三萬自圖拉拖灰及庫克德勒蘇地方散布住劄小策零敦多卜意欲退回大策零敦多卜決意進兵由畢濟一路前往擄掠公通庫克攻取察罕叟爾在杭愛地方過冬等語謹此奏聞得旨朕覽地圖夸額爾齊斯離巴爾庫爾甚近雖隔沙磧聞雪降冰凍之後即可行走見今西路軍營各路俱

嚴固防守似無可慮但恐賊人自夸額爾齊斯過哈布塔克拜塔克經由鹽池圖呼魯克以盜劫塔爾那沁之牲畜殊屬可虞大將軍岳鍾琪務籌防範萬全之策再嘉峪關至巴爾庫爾一路臺站甚爲緊要賊若從旁衝入臺站自被其阻隔將此行文岳鍾琪查郎阿知之○戊辰諭大學士等前因北路軍營大臣尚少降旨令伊禮布由阿濟畢濟前赴察罕叟爾等侯大將軍馬爾賽今賊人來擾阿濟畢濟亦未可定伊禮布不可冒險前行著行文伊禮布令回至巴爾庫爾軍營候旨○諭理藩院邊疆地方報稱鄂羅斯之郎喀前來鄂羅斯近來甚屬恭順伊等貨物至楚庫拜姓處即行申報而邊疆地方遲延致使伊等久候時值隆冬其盤費馬畜未免困苦朕特施恩著理藩院派官一員于戶部庫內領銀一萬兩前往賞給以爲途中買換馬畜之資○靖邊大將軍傅爾丹摺奏賊人侵犯洪

甲舒魯克地方離科布多城有五十餘里臣將馬匹牲畜收入城中固守奏入得旨大將軍馬爾賽竝無軍營急辦事務今賊人又來犯科布多地方可行文令其緩行前進若臺站已斷或酌量回來或尋嚴固地方駐劄偵探○己巳諭大學士等賊人來犯科布多或以全力侵察罕叟爾扎克拜達里克亦未可料著行文順承親王錫保王丹津多爾濟等保固軍需馬匹并喀爾喀游牧處賊人凡有侵掠錫保乃總理調遣事務之人斷不可輕離察罕叟爾即有調遣事宜錫保可遣彼處之大臣等領兵前去王丹津多爾濟雖係副將軍亦宜與錫保在一處辦理若無朕旨斷不可輕動○庚午諭四十九旗扎薩克蒙古等爾等於太宗皇帝時即敬順歸降創業之際輔佐効力至於朕身受恩四世爾等感戴之忱朕所確知爾等之騎射技藝亦倍勝於準噶爾但恐

爾等之意以喀爾喀遠居絕塞準噶爾即有劫掠亦不過及於喀爾喀爾等可置於度外不知喀爾喀之王台吉俱係爾等成吉思汗之苗裔一姓之兄弟也準噶爾者自元朝背叛至今世爲爾等仇敵喀爾喀乃衆扎薩克之屏障可置於度外乎從前

皇考親自領兵在圖拉昭莫多地方威噶爾丹保全喀爾喀者亦爲爾衆蒙古也其後策妄阿喇布坦之兵來侵哈密被我兵擊敗來擾吐魯番被我兵勦殺又暗使策零敦多卜等襲破西藏

皇考爲爾衆蒙古奉佛之地遣將興師破賊定藏今朕於兩路駐劄大兵亦爲爾內外之蒙古也前大將軍傅爾丹等輕信賊言輕兵深入千餘里賊人據險來犯遂至失利然傷殺賊人至於數千亦互有勝負也嗣後王台吉與弁兵等果能出羣効力朕自從優議敘并賜與世襲巴圖魯達爾漢之號使令名垂於

永遠準噶爾事定之後干戈永息長享太平之樂矣勉之勉之○宗人府遵旨將恭親王子孫十二歲以上者八人帶領引見得旨前因滿都護病故無子海善雖有子恐不能保守恭親王家業故特交與諸臣議奏今經宗人府查明引見始知海善子孫甚多朕看倫木布之子斐蘇人聰慧尚可保守家業著將斐蘇仍封爲多羅貝勒將原管佐領查明給回○辛未諭大學士等澤卜尊丹巴胡土克圖乃七旗喀爾喀供養之大喇嘛額駙敦多卜多爾濟可加意防備若賊人有來侵庫倫之信將胡土克圖遠避來至多倫腦兒居住○以署江南按察使古通政喬世臣署江南江蘇巡撫調署江蘇巡撫王國棟署浙江巡撫湖北按察使刁承祖爲江南江蘇按察使司按察使以鴻臚寺卿署河南按察使唐繼祖爲湖北按察使司按察使○兵部議覆湖南學政習窩疏言考試武童定例技勇漢仗

好者用好字號印卷移送內場擇其文理明通者取進如好字號不足再於合式卷內取進但武童之外場好者或策論不通或請鎗手代考或點名入號時調換試卷又合式武童自揣技勇不及慣爲倩代以致作姦犯科種種情弊嗣後請於武童考試外場時每人供單一紙各令親書籍貫三代年貌俟取進時再令覆寫親供嚴加驗對以絕內外場調換之弊至考試內場將好字號武童與合式武童隔別坐號以防臨時代倩之弊著爲定例應如所請從之○壬申靖邊大將軍傅爾丹摺奏據烏蘇圖舒魯克卡倫之侍衛達什爾圖報稱賊人駐劄紅鄂羅腦兒地方約有萬人又科布多城外三十餘里有賊兵五六百名往布延土前去等語臣等固守城池如攻城賊兵人少勢弱即相機勦殺奏入報聞○癸酉予故一等侯馬爾英祭葬如例○甲戌廣東總督郝玉麟因病請假允其暫解印

務在署調理以廣東提督張漣署廣東總督調福建陸路提督張起雲署廣東提督以福建福州將軍阿爾賽署福建陸路提督福建福州右翼副都統顧宏譽署福州將軍○吏部議覆江西巡撫謝旻條奏設官移駐事宜一南昌府屬新建縣之吳城一鎮前經部准署撫臣張坦麟奏請將南康府同知移駐彈壓遂以吳城改隸南康府屬之星子縣管轄查吳城鎮前後左右俱屬新建若改隸星子凡遇查拏匪類拘審人犯關移往返轉致稽延請仍隸新建一吳城鎮商民繁雜縣屬遠應設大員彈壓請令南康府同知兼轄吳城捕務其相近之樊家壠及松門吉山等處俱令該同知管轄一吳城汛地原係南昌水師營弁兵駐防嗣因改隸星子故於九江協內派撥弁兵防守今既復歸南昌應將九江協弁兵撤回仍於南昌水師營派撥一松門吉山俱在鄱湖之中二山相去十里控禦迨

遠只有吉山一汛請於松門添設一汛亦令
南昌營水師撥兵駐防均應如所請得旨依
議前經張坦麟條奏請將南昌府新建縣之
吳城鎮改隸南康府星子縣管轄經部議准
行在案今該撫謝旻奏稱不便從前張坦麟
冒昧陳奏妄事紛更甚屬不合嗣後文武官
員等僅有將地方不可施行之事妄自陳奏
舉行經後任復請更改者將原奏之人交部
議處儻原奏本是而後任妄爲指摘或有意
翻案者經朕察出亦必從重處分將此永著
爲例○乙亥諭大學士等行文康親王崇安
前往軍營同訥爾渾李林在漢軍營行走聽
大將軍馬爾賽調遣○浙江總督李衛江南
提督王紹緒俱來京陛見以江南崇明總兵
官李燦署浙江總督河南南陽總兵官馬世
龍署江南提督浙江紹興副將宋愛署河南
南陽總兵官○丙子陞正白旗滿洲副都統
博第爲鑲白旗護軍統領以原任荊州副都

統偏圖署正藍旗滿洲副都統杜賚俱爲正
白旗滿洲副都統陞二等侍衛蘇爾鼐爲鑲
白旗滿洲副都統調陝西西安左翼滿洲副
都統僧保爲陝西寧夏左翼副都統實授拉
薩立爲陝西西安左翼滿洲副都統陞山東
德州城守尉席爾塔爲歸化城右翼副都統
署鑲藍旗滿洲副都統五十六爲歸化城左
翼副都統○工部議覆署河南巡撫布政使
張元懷疏言黃河遷徙無定隄工險易不常
所有汛弁衙署應建於各工適中之地請將
豫河營守備改駐祥符縣埽頭集懷河營守
備改駐祥符縣陳橋庶上下計里均勻可以
彼此兼顧應如所請從之○丁丑諭大學士
等上年西路擊賊有功及帶傷患病之兵丁
前已降旨令其各回內地營汛休息調理以
示恩恤其凍傷手足致成殘疾者舊例查其
子弟一人入伍食糧仍令地方官每月給米
三斗養贍終身朕思本兵若成廢疾而家無

可以入伍食糧之子弟恐月給官米三斗不敷餬口之用實爲可憫著該管大臣確查上年西路兵丁因擊賊受傷致成廢疾而家無子弟入伍者俱給與守糧一分以終其身用示朕加恩優恤之至意○振武將軍順承親王錫保摺奏據圖壘卡倫之察哈爾章京西拉等報稱圖壘毛海控科爾苦克齊圖等處俱有賊兵往來又賊兵二千餘由阿哈爾拜已至奎蘇地方并分兵往大蘭一路等語臣即令喀爾喀副將軍郡王額駙策凌貝子羅卜藏等統兵分路往尋賊踪如有偷盜牲畜之賊即行擊殺賊如大隊來犯合兵會剿奏入報聞○旌表山東滕縣烈婦曹思慶妻殷氏拒姦不從投繯殞命給銀建坊入祠致祭如例○戊寅諭大學士等從前大將軍馬爾賽奏稱聞賊人有來犯科布多之信臣請暫居第十五臺候順承王再發咨文差人至推河探信賊人來犯察罕叟爾臣往會漢軍兵

營調右衛一千兵歸化城一千兵在吳喇忒北形勝之地駐扎以安慰內地扎薩克若無賊信仍往察罕叟爾等語朕以此奏甚是宜駐臺站不必前往察罕叟爾辦事令將右衛一千兵歸化城一千兵俱各妥備聽候馬爾賽調遣續經馬爾賽又奏稱賊人駐於科布多地方近處臣自第十五臺起行差人前去探信急赴察罕叟爾等語朕以此奏妄謬仍令其遵旨駐劄臺站朕兩次所降諭旨尚未到今馬爾賽又奏稱賊人已在奎蘇地方欲會合漢軍四千兵喀喇沁一千兵并調右衛歸化城各一千兵前赴推河等語凡事宜審定之後方可相機而行若聞一賊信即輾轉不定如何辦理馬爾賽今帶領七千兵至推河何用此奏甚屬不合近喀爾喀副將軍丹津多爾濟奏稱若令漢軍兵四千駐扎在四子部落旗分皆曠野之地如遇雪大之年必無柴薪請將此兵駐劄於歸化城相近有柴

之處等語已經行文於領兵前往之侍郎諾爾渾等令暫駐於歸化城翁滾山附近有柴木水草之處候旨爾等行文馬爾賽賊人若無侵犯察罕叟爾搶臺等信仍遵前旨駐劄臺站儻有賊信急退回於歸化城相對第十四臺駐劄候旨○調刑部尚書勵廷儀爲吏部尚書仍專管刑部事務陞直隸河道總督劉於義爲刑部尚書仍署理北河總督事務○吏部議覆廣東巡撫鄂彌達疏奏添設移駐官弁事宜一粵東新會開平兩縣交界之大官田及清遠英德兩縣交界之大埔坪均屬衝要請各設捕盜同知一員專司督緝一大官田同知所轄有新會新寧兩縣距廣南韶連道駐劄之地甚遠請將該同知歸肇羅道就近統轄大埔坪同知所轄有廣寧長寧兩縣距惠潮肇羅二道駐劄之地甚遠請將該同知歸廣南韶連道就近統轄其大埔坪地方請撥右翼鎮標左營千總一員帶兵三

十名駐防協緝並受該同知管轄一陽江縣之海陵島電白縣之沙塍墟離縣寫遠均爲要地請各添設巡檢一員以資防範一粵東理徭同知向係兼管連州連山陽山三州縣捕務後因改爲理徭軍民同知專理徭事所有三州縣事務停其兼管邇年以來徭人馴服事理不繁請將三州縣捕務仍歸理徭同知一體查察一欽州如昔司止設巡檢一員不足以資彈壓請將廉州府同知移駐其地再崖州外接安南內鄰五指生黎請將瓊州府海防撫黎同知移駐其地又高州府屬之梅菜地方姦徒出沒請將該府通判移駐專司捕務又羅定州屬東安縣之西山夙稱盜藪請將原設羅苛司巡檢改爲西山司巡檢移駐稽查并撥河頭營把總一員帶兵二十五名駐防協緝其羅苛司原管地方改歸東安縣典史專管一崖州水土惡毒正雜各官俱列邊俸其移駐之海防撫黎同知如果三

年之內撫綏有術黎民安堵請照例以應陞之缺即用一潮肇二府通判請兼捕盜職銜各分地方經管督緝潮州府同知見駐饒平縣黃岡專理海防事務請將附近之饒平惠來海陽潮陽澄海普寧六縣捕務歸該同知專管其附近郡城之揭陽大埔程鄉鎮平平遠五縣捕務分與通判督緝肇慶府屬之高要高明新興陽春陽江五縣捕務歸肇慶府同知管理德慶封川開建四會四州縣捕務歸通判管轄均應如所請從之己卯遣官祭

歷代帝王遣官祭城隍之神改浙江撫標中軍遊擊乍浦水師遊擊缺俱爲叅將台州協樂清瑞安中軍守備錢塘水師麗水營昌石汛守備各缺俱爲都司僉書從浙江總督李衛請也喀爾喀鎮國公索諾木班珠爾故遣官致祭庚辰諭大學士等據大將軍馬爾賽奏稱本月十四日臣從第十九臺

退回欲往會漢軍兵營已行令領兵侯馬蘭泰等於吳喇忒之愛卜哈河地方擇看水草駐劄候臣調遣等語前伊數次奏摺朕俱明降諭旨令伊駐劄臺站今馬爾賽若離臺站往會漢軍兵營諸凡信息從何得聞漢軍兵既令駐劄吳喇忒之愛卜哈河地方伊又欲何處調遣奏事並不候旨意見昏憤甚屬不合爾等可行文馬爾賽令漢軍四千兵喀喇沁一千兵俱於歸化城翁滾山附近有柴木水草之處過冬馬爾賽仍遵前旨於歸化城相對第十四臺駐劄吏部議覆署直隸總督唐執玉疏言順天府各州縣程途遠近惟通州爲適中之地請將西南兩路同知所管之大興宛平東安永清固安房山良鄉涿州等州縣以及東路同知所管之新設寧河縣旗人一切刑名事件改歸通州理事通判就近審理各由該路捕盜同知核轉再解臬司道路既不紆迴人犯得免拖累應如所請從

之○辛巳陞正藍旗蒙古副都統薩穆哈爲鑲白旗滿洲都統仍署理正黃旗滿洲都統事務○旌表山西鳳臺縣烈女張性女張氏未婚守貞姑亡自盡給銀建坊入祠致祭如例○壬午兵部議覆四川總督黃廷桂疏奏四川新設總督衙門請駐劄成都府并設中左右三營以資調用查川省隘員遼濶軍民番苗雜處加以西陲辦理軍需陝督一員難以控制所以特設四川總督若督撫提臣同駐省城不但有首重尾輕之勢而三標兵丁同聚一城亦屬繁多且事關裁減營制改建衙署該督未經會商提督不便遽議見今提臣既在軍前印務係督臣兼管一切軍務差遣提標弁兵足資調撥應准其暫駐成都并令先置中營一營設副將一員守備一員千總二員把總四員至所稱口外各衙門往來移咨事件須用繙譯請設筆帖式二員蒙古筆帖式一員應如所請從之○癸未喀爾喀

澤卜尊丹巴胡土克圖遣使進九白年貢賞賚如例○甲申以翰林院侍讀楊炳編修開泰俱充日講起居注官○調署正白旗滿洲副都統吳禮署正藍旗滿洲副都統○命貴州省開局鼓鑄從雲貴廣西總督鄂爾泰請也○乙酉禮部議覆雲貴廣西總督鄂爾泰疏言貴州大定府舊係州學原額取進童生十五名威寧舊係府學原額取進童生二十名今大定既改州爲府應於原額十五名之外加增五名至威寧雖以府改州而讀書向學之士不少請仍准進學二十名免其減額應如所請從之○丙戌諭大學士等歸化城北翁滾地方係八旗察哈爾西界四子部落毛明安吳喇忒東界於適中形勝之處調度二面亦屬容易著行文於大將軍馬爾賽令伊帶領漢軍兵四千會同喀喇沁兵一千名往翁滾地方環山有樹木水草之處駐劄以鑲白旗滿洲副都統蘇爾鼐署正白旗護

軍統領○禮部尚書錢以壇以年老乞休命加太子少保銜致仕○喀爾喀瓦齊賴巴圖土謝圖汗汪扎爾多爾濟遣使進九白年貢賞賚如例○丁亥

孝慈高皇后忌辰遣官祭

福陵○陞一等護衛阿林爲正藍旗滿洲副都統以正黃旗參領馬世佐署鑲紅旗漢軍副都統○吏部議覆山西巡撫覺羅石麟疏言晉省吉州并所屬之蒲縣及隰州并所屬之

汾西縣舊係平陽府統轄經前撫臣諾岷題准將吉隰二州改爲直隸州以蒲縣鄉寧二縣歸吉州管轄以大寧永和汾西三縣歸隰州管轄但歷考舊制蒲縣實爲隰州之門戶而汾西實爲平陽之臂指請將吉州屬之蒲縣改隸隰州隰州屬之汾西縣仍歸平陽府一切政務庶爲妥便應如所請從之○兵部尚書署直隸總督唐執玉因病乞假允之○戊子陞內閣額外侍讀學士阿蘭泰爲都察

院左副都御史○以刑部尚書署北河總督事劉於義署直隸總督調河東河道總督沈廷正爲直隸河道總督陞河南河北道協辦總河事朱藻爲河東河道總督河南布政使高斌爲河東副總河山東糧道徐聚倫爲河南布政使司布政使○以一等侍衛額林沁署鑲紅旗蒙古副都統正白旗參領朱震署本旗漢軍副都統鑲白旗參領祖應祥署正藍旗漢軍副都統○己丑

皇后病篤移駐暢春園

上親往看視逾時回宮未刻

皇后崩逝

上痛悼不已又欲親臨含殮諸王大臣等懇請節哀竝停止親往

上勉從之○庚寅

上輟朝五日在京諸王以下及文武各官公主王妃以下及旗下二品命婦俱齊集暢春園舉哀持服二十七日在外督撫將軍提鎮及

文武各屬免其齊集舉哀制服亦不必遣官進香○諭內閣雍正十年時憲曆仍照定例於十月初一日頒發直省其進呈及頒發在京各衙門著該部另擇日期○領侍衛內大臣英誠公豐盛額等奏言紫禁城宮殿尚未繕完

皇后梓宮請暫停暢春園九經三事殿然後移往田村蘆殿安奉從之

大清世宗敬天昌運建中表正文武英明寬仁信毅大孝至誠憲皇帝實錄卷之一百十

大清世宗敬天昌運建中表正文武英明寬仁信毅大孝至誠憲皇帝實錄卷之一百十一

監修總裁官光祿大夫經筵講官太僕寺卿弘明和殿大學士兼兵部尚書總理事務等因欽此○

總纂官光祿大夫經筵講官起居注學士兼工部尚書弘明和殿大學士兼兵部尚書總理事務等因欽此○

纂修官光祿大夫經筵講官起居注學士兼工部尚書弘明和殿大學士兼兵部尚書總理事務等因欽此○

翰林院掌院學士兼工部尚書弘明和殿大學士兼兵部尚書總理事務等因欽此○

經筵講官光祿大夫經筵講官起居注學士兼工部尚書弘明和殿大學士兼兵部尚書總理事務等因欽此○

敕修

雍正九年辛亥冬十月辛卯朔亨

太廟遣莊親王允祿行禮遣官祭

永陵

福陵

昭陵

昭西陵

孝陵

孝東陵

景陵○癸巳諭大學士九卿等皇后崩逝朕心

震悼此時即欲親臨含殮大臣等以朕躬初

愈。本日已經臨視，不宜再勞。懇詞力阻，朕勉從其請，暫停前往。今該部具奏祭奠禮儀日期，朕思

皇考昔年於

皇妣孝誠仁皇后

孝昭仁皇后之喪，如何親臨盡禮之處，朕雖未見至康熙二十八年

皇妣孝懿仁皇后崩逝當

梓宮未移之時

皇考朝夕臨奠及奉移之後，每遇祭祀日期，悉皆親往。此朕所親見者。今皇后自垂髫之年奉

皇考恩命，作配朕躬。結禱以來四十餘載，孝順恭敬始終一致，忍焉長逝，實深愴惻。一切致祭典儀，本欲親往以展悲懷。乃自上年以來，朕躬違和，調理經年，近始痊愈。醫家皆言尚宜靜攝，不可過勞。因思上年怡賢親王薨逝之後，朕悲情難遏，曾親奠數次，頗覺精力勉

強朕躬受

皇考付託之重

宗社攸關，為億萬臣民所倚賴。今夙恙初痊，正當加謹保護。況目前軍務緊要，一切機宜甚費籌畫。若又親臨喪次，不但往來奠醊之間，外勞形骸而觸景增悲，更致內傷心氣。實非攝養之所宜。即朕自度力量，亦覺勉強。但今皇后喪事，國家典儀雖備，而朕躬禮數未周，於理恐有未協。於情實為難忍。權衡輕重之間，如何可使情理兼盡，以慰朕心。著公同定議具奏。尋議

聖躬所關至重至大，時屆初冬，天氣乍寒

聖躬雖已全安，尚須加謹保護

大行皇后諸事俱已遵照舊章儀文，隆備前月二十九日

皇上已經臨視，若遇祭祀之期，又復親往奠醊，勞動悲傷，實非所宜。伏查明代會典，皇后喪儀止載皇子及百官應行典禮，無親臨祭奠

之儀今

大行皇后喪次有皇子朝夕祭奠若遇祭期例可遣官致祭伏乞停止親往於理允協於情亦復甚安從之 甲午諭禮部皇后那拉氏作配朕躬經四十載奉事

皇祖妣孝惠章皇后

皇考聖祖仁皇帝

皇妣孝恭仁皇后克盡孝忱深蒙慈愛服膺朕訓歷久而敬德彌純懋著坤儀正位而小心

益至居身節儉待下寬仁慈惠播於宮闈柔順發於誠悃昔年藩邸內政聿修九載中宮德輝愈耀茲於雍正九年九月二十九日崩逝惻惟壺職襄贊多年追念懿徽良深痛悼宜加稱諡以永休光著內閣翰林院擬奏應行典禮爾部詳察以聞尋大學士等議奏恭惟
大行皇后肅雍德懋慈惠性成孝道盡於庭闈
蒙

聖心之慈愛內則修於中閭佐

帝治以勤勞至敬允合乎坤儀厚德祇承夫乾
健謹按諡法慈惠愛親曰孝夙興恭事曰敬
恭擬

皇后尊諡曰

孝敬皇后得旨依議（乙未諭八旗都統等訓練兵丁甚為緊要著於教養兵間散滿洲或養子開檔人內不論旗分惟視其人材壯健可用者增挑二千名給與錢糧米石著弘昇與護軍統領博第副都統倭星額專管訓練其應派管教之員著弘昇等會同該旗都統酌量派委其盛甲器械著工部造給、以一等侍衛阿岱為額外副都統）大學士等議奏西寧撤回台吉滾濟扎布所領科爾沁兵七百名令赴察哈爾八旗昂古里等處適中之地駐劄應自京城派正藍旗蒙古副都統黑色同駐以防盜賊再京城預備六千兵丁內請派二千名令都統薩穆哈副都統胡琳

帶領於張家口外陶賴廟察罕托羅海左近地方駐劄以便彼此聲援從之。撫遠大將軍馬爾賽摺奏據二十九臺章京達賴報稱賊人越那穆山嶺至白格爾察罕鄂爾格地方將輝特公巴濟圖爾古特郭莽喇嘛之徒弟及厄魯特王色卜騰旺布之班第俱行掠去賊兵大半進西爾哈郭畢向郭多里巴爾哈孫前去又一隊賊兵向杭愛由圖拉前進總在厄爾得尼招會齊攻取喀爾喀遊牧奏入報聞。湖廣總督邁柱題湖北高羅安撫使田國鼎故請以其子田昭承襲下部知之。福建巡撫趙國麟疏報福清等六縣開墾雍正八年分田地十五頃有奇下部知之。賑江南滁川潛山等七州縣水災饑民。丙申以奉移。

大行皇后梓宮遣淳郡王弘曥告祭。丁酉奉移。大行皇后梓宮暫安奉於田村蘆殿諸王以下

文武官員齊集跪送安奉畢行禮舉哀。戊戌諭大學士等歸化城地方緊要前所派京城兵四千名內著派出二千名令副都統胡琳歸化城副都統席爾塔帶領前往歸化城駐劄其胡琳原領張家口外駐劄之兵著都統薩穆哈副都統宗室諾穆柱統領歸化城副都統五十六著先往會同都統丹晉辦理事務康親王令其暫住歸化城候旨。又諭爾等寄信與順承親王從前朕意以賊人雖侵犯科布多城糧餉不繼自必退去今聞賊人又分撥兩隊一隊搶奪卡倫直至阿濟畢濟及公巴濟遊牧處其一隊越過庫庫嶺竟投哈拉阿濟爾汗地方又因厄魯特等海車零及多爾濟色卜騰等屬下之人乘機搶掠臺站斷截是以令馬爾賽帶領大軍從臺站一路前往推河扎克拜達里克等處駐劄厄魯特若將搶掠之牲畜接濟賊人則賊人既得糧餉勢必久居或以大力來犯察罕叟爾

擾亂喀爾喀或由阿濟以犯西路軍營俱未
可定順承親王處若通信於傳爾丹有可以
退回機會整兵速回察罕叟爾則兵力益覺
壯盛矣儻此際賊人已圍困科布多應如何
退賊及應否應援之處順承親王會同喀爾
喀副將軍等商酌萬全而行 撫遠大將軍
馬爾賽招奏據辦理扎克拜達里克糧餉原
任巡撫西琳報稱賊人來至扎克拜達里克
城南噶里特地方劫掠牧場駝馬因守城兵
少未敢追逐又據三十一臺至四十二臺章
京額林沁等陸續報稱各臺俱有賊踪係在
推河居住厄魯特王色卜騰旺布及貝勒多
爾濟色卜騰之屬下人乘機擄掠奏入報聞
○己亥諭大學士等大將軍馬爾賽著於漢
軍兵內揀留八百名土默特兵內揀留二百
名在二十七二十八臺之間翁機等處擇水
草茂盛之地駐劄專行照管軍臺運路令都
統李林統領其土默特之兵著於土默特參

領內選擇幹員可以管轄者給與副都統職
銜令其管領 調正藍旗滿洲副都統博什
希爲本旗蒙古副都統 刑部等衙門議奏
據辦理青海事務都統德成等擒獲叛賊諾
爾布里塔爾解部審訊諾爾布係圖爾古特
一小姓台吉來至青海依人生理於羅卜藏
丹津叛逆時伊父曾効涓埃
皇上格外加恩不令隸屬青海特授扎薩克一
等台吉又選派柴旦木軍前忽行叛逆搶劫
馬匹拒捕官兵里塔爾身爲佐領附逆作亂
俱應照律擬斬解往青海立決示衆查諾爾
布叛逆時妻子皆在遊牧地方聞信即來請
罪應免其爲奴其胞弟色特爾布穆旣不知
情又追捕拉查卜有功
皇上已加恩令其承襲扎薩克一等台吉諾爾
布妻子即交與色特爾布穆管束養贍奏入
得旨諾爾布里塔爾俱著解送西寧口外即
行正法免其示衆餘依議 庚子諭理藩院

輪班朝覲蒙古王貝勒貝子公等。今歲著停其來京。○以散秩大臣伯欽拜理藩院左侍郎納延泰副都統阿岱俱爲撫遠大將軍參贊。○改廣東化石營守備缺爲都司僉書。從廣東總督郝玉麟請也。○辛丑初祭

大行皇后。遣理親王弘哲行禮。○是日

上釋服。○壬寅。釋祭

大行皇后。○諭大學士等。青州駐防官兵。目今即著選派其應行補放官員。著八旗都統會同將軍鄂彌達揀選。派此兵丁時。將餘丁內之次等者撥出。即交與將軍鄂彌達副都統阿爾胡禪在八旗教場操演。青州府建造城垣房屋。至明歲始能告竣。與其到彼始行學習。不若此地即行操演。此派往官兵。仍照常給與俸餉。其員缺令八旗都統等揀選補放。應派之兵二千名。不必撥派蒙古。止於滿洲內揀選。○以山東青州將軍鄂彌達署正黃旗滿洲都統。○癸卯。諭大學士等。天氣寒冷。

帶領喀喇沁兵丁之副都統塔爾馬善著賞銀一千兩。貝勒僧滾扎卜。公羅布臧策布登各賞元狐帽一頂。貂皮馬褂一件。前派出之士默特官兵。已降旨於大將軍馬爾賽酌量賞賜。今喀喇沁兵丁亦照例賞給。○甲辰。諭大學士等。今預備派出之察哈爾兵二千名。其缺額著挑補。察哈爾八旗佐領多寡不同。此次挑補兵丁。不必拘泥旗分佐領。但擇漢仗好者挑取。若不得二千名。即一千五百名或一千名亦可。所挑兵丁。照常支給錢糧。並賞與製造軍器銀兩。再察哈爾地方居住之厄魯特。不拘旗分。著共派四百名。每翼各二百名。至照看伊等妻子遊牧。亦屬緊要。伊等父子弟兄內。但看其漢仗好者揀選。不可全行派出。○加一等侍衛圖爾賽副都統銜往北路軍營。○大學士等議覆。四川總督黃廷桂等奏稱達賴喇嘛移座泰寧。故泰寧協原駐兵五百名。以爲防護。查泰寧至打箭爐道。

路險阻請再撥兵五百名添防泰寧協則軍威震疊與裡塘已塘西藏聲勢聯絡應如所請從之○乙巳諭撫遠大將軍馬爾賽爾從前奏稱備兵一事已行文於順承王等語爾領兵尚未至察罕叟爾並不軍前之情形即欲指示順承王殊覺不合現今蒙古扎薩克等俱遵靖邊大將軍印信行事若又用撫遠大將軍印信調遣則蒙古等難以遵行撫遠大將軍印信除奏章及行部咨文鈐用外其調遣兵丁等事不准鈐用昨爾又奏稱將吳喇忒毛明安四子部落蘇尼特阿霸垓等旗察哈爾兩翼各預備兵一千聽爾調遣等語吳喇忒等扎薩克察哈爾旗分皆邊外之兵豈可妄動爾即欲預備調遣亦當請旨乃並不奏聞即行調遣甚屬背謬再爾所偵探軍機並不確實即行具奏辦事亦甚含糊嗣後爾宜盡其所長効力行走○丙午諭內閣朕聞今年各扎薩克旗分所種之穀皆已被

旱稍長又復經霜未曾收穫以致乏食今特遣侍衛章京前往加恩賞賚著傳諭該扎薩克及官員等蒙古人眾皆伊等所屬部落米穀未收不能度日自應預爲籌畫生計今朕加恩賞給銀米伊等若不實心辦理日後朕必聞知伊等有何顏面以對朕乎○諭八旗都統等王公及閑散宗室等所有口外牧場看守牲畜之蒙古其有馬匹牲畜田產者尚可度日若並無馬匹牲畜田產者伊等家主豈能瞻養因致妄生事端則累家主不少矣與其任伊等遊蕩莫若命大臣前往收養著通行曉諭八旗王公宗室並大臣官員以至閒散人等伊等所有口外蒙古內如有此等無馬匹牲畜田產不能照看養贍情願報出者令伊等家主各行報出○擢戶部郎中吳金爲額外內閣學士○以鑲黃旗漢軍副都統德爾芬署正藍旗護軍統領○丁未諭大學士等年來因征勦準噶爾將滿漢兵丁

陸續派出特令召募以實營伍凡膺募兵之任者自應秉公持正不徇情面精選技勇壯健之士則戎行可收實効而軍餉亦不至於虛糜朕聞召募新兵多屬本營兵丁之兄弟子姪親戚朋友互相援引該管將弁惟期充足數目不復較量人才以致老弱無能者俱得入選而民間強壯之人莫由入伍是將選兵重大之務視為具文矣現今降旨募選兵丁著該部通行曉諭令該管大臣官弁等屏除向來積弊公正辦理將來朕必遣官考驗若有將老弱無能之人冒濫入伍者必將挑選之員從重議處若技勇之人不敷挑選著聲明緣由請旨毋得苟且塞責又諭派往歸化城駐劄滿洲兵二千名暫且停其前往仍令伊等預備戊申陞湖北巡撫魏廷珍為禮部尚書改山西蒲州協中軍守備及運城澤州吉州隰州石樓靖安等營守備缺俱為都司僉書從署山西太原總兵官李如

栢請也奉天府府尹楊超曾疏報遼陽海城等九州縣開墾雍正八年分田地一百三十項有奇下部知之已酉諭大學士等據馬爾賽奏稱漢軍兵丁馬匹已挑選換給喀喇沁兵丁今所剩馬六千餘匹俱疲瘦不堪乘騎等語朕思既無馬匹漢軍兵丁斷不可前往著副都統圖爾賽席爾塔帶領土默特兵一千名前進令其自十三臺至二十七臺每隊派兵二百名分為五隊派撥滿洲侍衛官員管理照看臺站運糧道路防範賊盜前至推河扎克拜達里克探聽儻有賊兵信息即在翁機地方駐劄以長鎗營參領佟善署正藍旗蒙古副都統青海厄魯特郡王額爾得尼厄爾克托克托奏摺奏皇上憫臣年邁特降恩旨於臣諸子之中異日可襲王爵者命臣舉出一人加恩封為長子代臣効力行走伏思臣長子阿拉布濟奉旨領兵住扎柴旦木因擒獲叛逆諾爾布已蒙

恩授爲一等台吉臣之三子索諾木丹津年二十三歲立志向上守正而行臣遵旨請將此子襲替奏入得旨索諾木丹津著照伊所請封爲長子阿拉布濟効力行間加恩晉封爲輔國公○免江南邳州山陽等二十三州縣潼安一衛雍正八年分水災額賦有差○庚戌諭大學士等據侍郎納延泰奏稱準噶爾賊人搶奪阿濟卡倫將公通摩克旗下兩個佐領擄去其公通摩克巴濟王格勒克顏木聘爾等扎薩克之遊牧俱向南移往納穆勒土哈拉博羅雅蘇圖烏蘇圖等處朕思公通摩克旗下既被賊人搶奪兩個佐領其牲畜等物必致散失伊等雖將遊牧南移料其人衆必有匱乏失所者著即傳諭總督查郎阿提督宋可進作何遣人前往料理安插務使人人得所其餘被賊侵擾遷移之公巴濟等或亦有倉猝遷移遺散牲畜至於匱乏者亦著照看料理○以大理寺少卿署浙江布

政使孫國璽署河東副總河○改直隸督標中軍守備缺爲都司僉書從原署直隸總督唐執玉請也○辛亥諭大學士等前命侍郎納延泰往大將軍馬爾賽軍營參贊今馬爾賽既暫在歸化城駐劄著納延泰回京○諭理藩院今年冬令甚寒額駙阿寶率伊所屬人等著暫於青海地方駐劄俟明春來京至伊等欲於何處居住問明再定公主帶領伊子婦於今年由西安一路來京著行文甘肅陝西山西直隸巡撫等派選賢員沿途加意照看護送並酌量給與口糧雇騾資助並將此旨傳諭公主額駙知之○以正白旗滿洲副都統偏圖署正藍旗護軍統領○壬子諭大學士等沿邊一帶地方最爲緊要向來額設之兵太少古北口宣化大同三處應召募兵丁添入防汛以實營伍獨石口以東至山海關皆屬內地各處營汛仍照舊規其獨石口以西至殺虎口一帶中間緊要隘口必須

查勘明白以定添兵多寡之數。至於邊牆年久倒塌而地當緊要者亦應酌量修築以肅邊境。著御史舒喜、天津總兵官補熙會同古北口提督路振揚親往踏勘召募之兵。何處應添若干。何處應駐大員。或將叅遊改爲副協。邊城何處應行修理。路振揚等可會同各該提鎮詳悉定議具奏。天津總兵官卬務著鑾儀衛冠軍使孫承恩暫行署理。路振揚現有召募兵丁之事。今既奉差公出其募兵之事。著路振揚遴選公明可信之人代爲辦理。再差副都統韓光基前往古北口督率查驗。尋議邊防最關緊要。直隸山西沿邊一帶提鎮協標及各口汛兵額設之數尚覺不敷。請於直隸古北口提標添兵一千六百名。獨石口添兵六百名。宣化鎮標添兵二千名。張家口三營添兵八百名。山西大同鎮添兵二千七百零八名。殺虎口添兵一千零四名。朔平府城守添兵八百名。得勝路添兵二百八十

八名。助馬路添兵二百名。直隸山西二省各添兵五千名。至添加多寡之處該提鎮確有所見即據實陳奏從之。厄魯特郡王色卜騰旺布摺奏。臣父阿拉布坦由阿爾泰原遊牧地方投順以來世受

皇恩。今聞賊人信息正欲與貝子茅海車零計議。遷於內地遊牧。不意茅海車零二人率領管旗章京班第佐領索圖等兵五百餘人叛投噶爾丹策零。臣與寨桑數人兵百餘人現在此居住。請旨如何安置。奏入得旨。色卜騰旺布素爲朕所嘉與。今感戴朕恩竭力保護所屬人等不致妄動。具奏請旨可嘉。可憫已。諭理藩院遣人照看矣。伊可酌量嚴密之處即遷移駐牧。朕隨即加恩并其所屬寨桑官員以及間散人等亦俱加恩。務令其寬裕。

癸丑大祭

大行皇后遣裕親王廣祿行禮。兵部議覆福建總督劉世明疏言臺灣淡水地方遼濶請

抽調鎮標各營汛兵丁四百名以資防範添設淡水汛守備一員帶武洛汛把總一員新東勢汛外委一員兵一百六十名駐劄山猪毛口其土地公崎大崎頂蘭坡嶺三處並請各設一塘每塘安兵五名應如所請從之○管理阿爾泰臺站郎中倫岱摺奏前因賊人擾亂臺站不通臣遵旨按站沿臺安撫蒙古前至二十二臺皆已安定隨據賽爾烏蘇等處管理臺站委署章京常保報稱由二十三臺直抵三十臺皆接續安撫又據鄂爾齋圖果爾等處管理臺站之員外郎俄星額報稱順承親王令其帶兵由四十七臺至三十一臺俱已接續寧靖奏入報聞○甲寅繹祭大行皇后○白都納副都統多索禮緣事革退以一等侍衛伊特倫署白都納副都統○吏部議覆署陝西巡撫史貽直疏言叅革興安州知州張勤寵除嗜酒貪佚無故稽留屬員各輕罪不議外其收受紗燈計價三兩六錢

按律應擬杖七十得旨張勤寵嗜酒貪佚無故稽留屬員此等舉動難以居官臨民議以斥革洵不為枉若計贓論罪必有貪婪實蹟方可引律定擬今以紗燈微物所值不過幾金即論贓議以杖責則苛細太甚大失平允之義封疆大臣察吏當執公平之法而定罪亦當體可恕之情張勤寵杖罪著寬免副都統銜阿成阿摺奏臣率領二千家選兵行過噶爾賓郭畢因嚮導之蒙古逃去臣即從古爾班賽堪山後尋覓水草行至烏克爾空克爾地方知賊人搶奪扎克拜達里克北邊臺站所領官兵一聞賊信俱願晝夜兼程前往勦賊臣遂率領官兵於十月十七日至扎克拜達里克與辦理糧餉之原任巡撫西琳協同備兵守城仰懇

皇上隆恩賞賜兵丁糧餉補買馬匹前赴巴爾庫爾地方奏入得旨爾等沿途未得嚮導尚能勉力至扎克拜達里克可憫可嘉今不必

前往巴爾庫爾即駐劄扎克拜達里克候旨
其糧餉馬匹等事已降旨於西琳從厚辦理
賞給○乙卯滿月致祭

大行皇后 諭大學士等北路安設卡倫之侍
衛莫爾渾等因賊兵侵擾阿濟一路伊等投
往西路軍營今思阿濟等處可以不必安設
卡倫莫爾渾等著岳鍾琪送令回京再巴爾
庫爾軍營現有歸化城降賊叅領理查布之
子杭金著莫爾渾等帶來又前派西路之家
選兵二千名因阿濟畢濟有賊人信息已從
古爾班賽堪山後由揆通巴扎爾一路前往
扎克拜達里克地方駐劄寄信與岳鍾琪西
路不必探訪接應擢理藩院郎中綽爾多
爲正黃旗蒙古副都統署理藩院侍郎鑲
黃旗蒙古都統鄂善緣事革職陞鑲黃旗護
軍統領色爾璧爲本旗蒙古都統調正白旗
護軍統領青保爲左翼前鋒統領仍留西藏
振武將軍順承親王錫保摺奏準噶爾賊

人大策零敦多卜小策零敦多卜多爾濟丹
巴等於八月十一日自夸額爾齊斯至索爾
畢烏拉克秦地方留兵四千以爲應援領兵
二萬六千來犯科布多等處因科布多察罕
叟爾扎布韓軍營兵威強盛防守嚴密遂直
抵克爾倫侵取喀爾喀遊牧令賊將海倫鄂
爾哲等領兵三千前去劫掠策零敦多卜之
兵向蘇克阿爾達胡屯劄又令小策零敦多
卜之子曼濟領兵三千往鄂爾海錫拉烏蘇
等處搶掠牲畜九月二十日臣令王丹津多
爾濟額駙策凌等合兵向蘇克阿爾達胡擊
賊二十一日至歐登楚爾地方遣台吉巴海
等領兵六百名夜至大策零敦多卜賊營擒
賊三人而還大策零敦多卜遣賊將滾楚扎
卜錫拉巴圖魯領兵三千來追巴海等誘至
歐登楚爾大營二十二日王丹津多爾濟策
凌列陣力戰自辰至午陣斬賊將喀喇巴圖
魯其賊將錫拉巴圖魯身負重傷率賊敗遁復擒殺

數百餘賊是夜策零敦多卜等即移至台錫里山屯劄二十五日曼濟兵敗回營俱退至哈布塔克拜塔克地方遁去臣等思準噶爾賊人乘機深入分路侵犯妄思劫掠仰仗天威王丹津多爾濟額駙策凌等領兵直抵賊巢奮勇擒殺賊兵遠遁臣等現在選兵追襲其有功將士查明再奏得旨喀爾喀副將軍親王丹津多爾濟郡王額駙策凌等率領喀爾喀弁兵奮勇爭先戰敗準噶爾勦殺擒賊甚屬可嘉丹津多爾濟從前効力已加恩封爲親王著賞銀一萬兩郡王額駙策凌晉封爲和碩親王亦賞銀一萬兩扎薩克圖汗親王策旺扎布雖未歷戰陣在軍營同順承王宣力辦事亦賞銀五千兩其餘王貝勒貝子公衆台吉官員兵丁內懋著勤勞者著順承王查明具奏加恩優賞○賑山東濱州新城等八州縣水災饑民○丙辰

上詣

恩佑寺行禮畢回宮○諭大學士等武格著來京不必前往軍營○晉封固山貝子弘春爲多羅貝勒○以江西道御史姚世榮提督江西學政○振武將軍順承親王錫保摺奏前於歐登楚爾地方大敗賊兵賊人遠遁臣等隨選滿洲蒙古兵四千人令王丹津多爾濟額駙策凌等分路追擊今據王丹津多爾濟等報稱大兵登達爾畢山瞭望賊踪並無煙塵計賊人由台錫里地方已過阿爾泰山雖以前進追擊隨即撤兵又據扎薩克圖汗親王策旺扎布報稱遣協理台吉拜都布等領兵追賊經過察罕布爾噶蘇以至通奇爾地方見賊人由畢濟巴爾魯克兩路逃去已過阿爾泰山嶺不能追及因將兵撤回奏入報聞○丁巳諭兵部山西大同總兵官徐起鳳著來京大同總兵官員缺著肅州總兵官張朝良調補肅州總兵官員缺著蒲州副將沈力學補授沈力學現在軍前著行文大將軍

令其到肅赴任沈力學未到之先著署永固協副將王成相署理大同總兵事務緊要且近有挑選兵丁之事張朝良未到之先著李如栢暫行署理其太原總兵官印務著石麟委員署理張朝良到晉時著石麟酌量或令張朝良逕赴大同之任或李如栢在大同辦理之事未竣即令張朝良暫署太原總兵印務振武將軍順承親王錫保摺奏據額駙策凌咨稱有親王喇嘛扎卜旗下人額林陳來自策零敦多卜營內擒獲訊供據稱額林陳於和通腦兒交戰時被賊擄去今策零敦多卜遣送我王喇嘛扎卜書信等語又稱大小策零敦多卜多爾濟丹巴前領兵三萬來犯時圖爾古特之墨爾根綽爾濟輝特公巴濟率伊旗人歸順即引導將公通摩克策登扎布旗分俱行搶擄又欲搶奪喀爾喀遊牧請澤卜尊丹巴胡土克圖至杭愛地方過冬因大兵雄壯前歐登楚爾地方交戰時賊兵

大敗巴圖魯寨桑等陣亡傷殘者甚多因遷於阿爾泰之北行至察罕布爾噶泰地方安營大策零敦多卜等付噶爾丹策零寄我王喇嘛扎卜之書并云我等原在一處居住甚相和好因噶爾丹博碩克圖汗與爾等不睦各自散居後爾等投順中國當差納貢深爲爾等憾之爾等係成吉思汗之後裔並非人之屬下何不將遊牧仍移於阿爾泰與我會居一處共享安樂以聯舊好如有兵戎協力相距等語今將原書呈覽奏入報聞○寧遠大將軍岳鍾琪摺奏無克克嶺卡倫乃通哈密及五堡要路其附近有搜濟卡倫今據搜濟卡倫遊擊哈仁鳳報稱有賊人四五百名侵犯無克克嶺傷擄坐卡兵丁隨前往陶賴一路等語臣思賊人敢於陶賴逗留者其中必有詭計或賊人有大隊侵犯吐魯番以此賊衆探信或因北路有事料我軍前往應援遣此賊衆窺探埋伏大隊乘虛而入或又思

侵犯西路先以此賊衆引誘我軍追擊墮其
伏中。今臣等已知會哈密加謹防範固守并
將軍營馬匹俱收入城中諸事準備僅賊兵
勢衆堅壁守城挫其銳氣若賊兵不多發兵
勦殺斷不敢貪功妄動有負委任奏入報聞
○移雲南永善縣魯甸巡檢駐副官村從雲
貴廣西總督鄂爾泰請也○改河南陳州營
守備缺爲都司僉書移太康千總駐陳州沈
邱把總駐太康太康外委把總駐沈邱從原
任河南南陽總兵官馬世龍請也○戊午諭
大學士等八旗察哈爾俱累世効力之舊人
從前征討南方勦滅噶爾丹並隨圍出獵以
及數年用兵於準噶爾宣力之處不可枚舉
此次達什率領察哈爾兵一千名較衆先到
軍營又擊敗準噶爾賊人策零敦多卜等奪
回駝馬等物甚屬可嘉昨厄魯特大臣來京
奏稱舊察哈爾人等之生計反不如新厄魯
特等語朕聞之惻憫今沿邊居住之蒙古並

王大臣等馬羣之蒙古多有伊主不能養贍
者似此生計艱難朕心不忍爰命大臣前往
查勘令伊等各得養贍將朕此旨通行傳諭
○諭靖邊大將軍傅爾丹等爾等在科布多
地方恃勇輕進墮賊詭計致失地利損兵折
將軍前獲罪我朝例所不貸本應執法究治
但傅爾丹整頓餘兵回至科布多地方固守
城池賊衆併力來犯復能列陣以待賊人遠
遁隨即遣兵各處截殺奪回被掠馬駝此次
擊賊可贖爾等前罪今朕已盡行寬免惟陳
泰罪不可宥爾等嗣後須黽勉効力朕自格
外加恩○己未
萬壽節停止朝賀筵宴遣官祭
福陵
昭陵
昭西陵
孝陵
孝東陵

景陵（遣官祭真武東嶽城隍之神

大清世宗敬天昌運建中表正文武英明寬仁
信毅大孝至誠憲皇帝實錄卷之一百十二

監修總裁官光祿大夫經筵講官太僕寺卿兼翰林院掌書等因欽此

總纂官光祿大夫經筵講官起居注太僕寺卿兼翰林院掌書等因欽此

纂修官光祿大夫經筵講官起居注太僕寺卿兼翰林院掌書等因欽此

翰林院掌書等因欽此

經筵講官光祿大夫經筵講官起居注太僕寺卿兼翰林院掌書等因欽此

敕修

雍正九年辛亥十一月庚申朔諭大學士等

大清世宗敬天昌運建中表正文武英明寬仁
信毅大孝至誠憲皇帝實錄卷之一百十一

昨據順承親王及傅爾丹等奏報知北路賊
兵已退邊境寧謐已寄知大將軍岳鍾琪令
其不必發兵往阿濟畢濟矣但思賊兵雖離
北路冬間或向西路西應仍前防範至於吐
魯番屢拒賊兵賊人啣恨將來擾害吐魯番
勢所必有今雖暫派官兵三千名駐防然究
非長久之策回民應否遷移官兵何時可撤
著岳鍾琪悉心籌畫具奏○又諭此次喀爾
喀兵丁丹津多爾濟額駙策凌等率領征討

竝未奏有和托輝特貝勒班第之名。伊之遊牧在何處。輝特公已濟已叛降。準噶爾喀爾喀公通摩克之遊牧。又不知如何。今喀爾喀等之遊牧。俱已內移。若和托輝特移住之地。嚴密完善。令其居住。如稍有可虞。即令東移。○又諭額駙阿寶之子哀布。帶伊屬下兵五百名。効力行間。勤勞懋著。朕曾降旨與岳鍾琪。令其撤回原遊牧處。以示寬恤。今據岳鍾琪奏稱。此軍在營甚有裨益。仍請留駐等語。朕念此兵効力已久。理應撤回。但時值冬寒。不便遽撤。著暫在軍營。俟來年青草發生時。再令回伊原遊牧處。從前已加恩賞著岳鍾琪。再添給銀兩。竝傳諭額駙阿寶知之。○頒雍正十年時憲曆。○辦理西藏事務。護軍統領馬喇。額外內閣學士僧格。摺奏班禪額爾得尼貝勒頗羅鼎遣人齎送官兵酥油炒麪牛羊乾糧等物。臣等累經發還。伊等堅不領回。是以收留分給官兵。得旨馬喇僧格可將

班禪額爾得尼頗羅鼎所送之物。核算價值。充裕給與銀兩。竝傳諭伊等。朕遣兵在藏駐劄。特爲衆唐古特防守地方。使之寧謐。豈有絲毫貽累之理。今所送諸物。勢必在伊屬下衆人攤派。未免滋擾。且我兵糧餉。竝不缺乏。無須幫助。此番給還銀兩。竝非外視爾等也。可傳諭唐古特咸悉朕意。○辛酉。諭大學士等。派往歸化城兵二千名。著副都統綽爾多同胡琳帶往。綽爾多著賞銀三千兩。準備起程。乾清門侍衛南岱。授爲一等侍衛。於虎鎗上行走之索倫新滿洲內。挑選九名。令伊統領。隨此次兵丁前往。照看馬畜。每人賞銀二百兩。至一切應得之項。仍照出征官兵之例給與。○正白旗蒙古副都統馬哈達緣事革職。調副都統宗室諾穆柱爲正白旗蒙古副都統。仍留軍營。○壬戌。諭大學士等。從前曾令漢軍兵四千名。即在歸化城過冬。現今賊雖敗遁。明年或又來侵犯。宜預爲防範。此四

千兵丁俱熟練鎗礮之技。令其看守城垣。甚有裨益。今於年內預備妥協。揀擇吉日。馬爾賽統領由上海一路。按程至扎克拜達里克駐劄。○又諭扎克拜達里克處。發遣人犯。俱著從寬免罪。即令充爲綠旗兵丁。給與糧餉。在彼効力。年過六十以上。有情願當兵。在彼居住者。留作兵丁。其並無妻子。已過六旬。願回內地者。俟城工告竣。夫役回來時。將伊等由驛站從容發回。各歸本籍。○癸亥靖邊大將軍傳爾丹摺奏。臣等公同會商。以十月十三日。大兵自科布多城起程。弁兵各給口糧。所有帑銀六十八萬七千三百兩。分令各大臣官員兵丁攜帶。並將火藥鉛子。均勻馱載。就近由布婁爾烏哈爾扎沿途食雪。向察罕叟爾進發。十月十七日。行至綽諾海拉琥地方。據振武將軍順承親王咨稱。九月二十二日。戰敗賊夷。大策零敦多卜等俱已逃遁。喀爾喀副將軍等分路遠追。因賊夷已踰阿爾

泰山嶺。即撤軍回營。等語。臣遂統率大兵。選擇水草。休養馬匹。向察罕叟爾。緩行至揆通烏闌地方。又咨稱。驛站俱已接續。所有軍機事件。應仍由大將軍處奏聞。不必據咨轉奏。所有臣等回赴察罕叟爾。領兵起程日期。理合繕奏。得旨。傳爾丹既至察罕叟爾。著將靖邊大將軍印。交順承親王掌管。振武將軍印。著傳爾丹掌管。協同順承親王辦理事務。○改河南陝州營守備缺爲都司僉書。添設千總一員。從署河南河北總兵官范毓禔請也。○甲子諭大學士等。爾等可傳諭傳爾丹。伊原與順承親王不和。王諸事並無過失。近日傳爾丹輕進。以致虧損官兵。若大將軍印務仍命管理。非但衆心不服。即傳爾丹心亦不安。伊既失蒙古等之心。綠旗兵丁亦未必孚信。伊所恃者。惟數索倫耳。豈知首先潰散。幾致伊於危殆者。即索倫乎。順承親王諸事。遵朕指示。領大兵在察罕叟爾。賊夷懼其聲威。

不敢侵擾。旋即敗遁。朕今令傅爾丹爲王協理。以贖前愆。至殲賊立功。惟王是賴。傅爾丹宜悉心盡力。勉圖報効。若仍執前見。妄存私意。與王不和。不但無益於國家。傅爾丹恐益增罪戾矣。○又諭。朕聞漢軍兵四千名。自京至歸化城。傷損馬駝甚多。及至歸化城。變賣衣物。任意費用。甚屬不堪。且路途尚近。即如此窘迫。亦甚屬懦弱。著行文馬爾賽。此次領兵大臣等。若不加意統攝。致兵丁仍蹈故轍。或有逃回者。馬爾賽即行拘拏。應懲治者。懲治。應正法者。正法。再行文歸化城都統丹晉。右衛大同。宣化等處總兵官。凡兵丁家人內有逃回者。拏獲奏聞。即行正法。其不加約束之大臣官員。從重治罪。馬爾賽將此曉諭大臣官員兵丁知之。此兵到扎克拜達里克地方。馬爾賽加意操演。嚴行約束。○以浙江衢州副將葉應龍署江南崇明總兵官。○乙丑。諭大學士等。山東登州乃濱海重鎮。所轄地

方遼濶。查該鎮本標及所屬兵丁。除水師外。額兵六千餘名。似不敷用。再自添設河東總河之後。將南河總河標兵歸於河東總河管轄。而以漕標兵一千餘名。改歸南河總督。於是兩河標兵及漕標操防之兵。俱覺不敷。此四處兵。應否酌量增添。爾等詳查議奏。尋議登州一鎮。延遠二千餘里。本鎮標兵及所屬文登等十營。除水師外。共額兵六千三百餘名。汛廣兵單。實屬不敷。臣等酌議。應添兵一千名。駐劄鎮城。以實行伍。至河東總河標兵一千九百二十一名。江南總河標兵一千九百餘名。漕標兵四千五百名。各有防河催漕等差。均覺不敷。請將漕標及兩河標兵。各添設一千名。與添設登鎮陸路之兵共四千名。交與總漕總河。併登鎮總兵官精選技勇壯健之人。照馬四步六之例。召募充補。再查登鎮水師。現在共兵八百五十名。趕繒船十隻。船七隻。所轄海面島嶼甚多。往來巡哨。差

使頗繁。應添艍船三隻。兵一百五十名。以足一千之數。所添兵丁。務選熟於海道及通曉水戰之人。召募充補。艍船令山東巡撫委員監造。至各處應加守備千總等員及應建營房。令總漕總河登鎮會同該督撫詳悉定議。從之。○陞左都御史署西安巡撫史貽直。為兵部尚書。○以翰林院編修汪由敦署日講起居注官。大學士等遵旨議奏。扎克拜達里克地方甚屬緊要。馬爾賽所領漢軍兵四千名。即令馬爾賽統領前往。扎克拜達里克地方駐劄。現今可分作八隊。諾爾渾富昌帶領首隊。於十二月初一日起行。李林祖秉衡佟時茂劉汝霖各領一隊。隨後而行。其餘二隊交馬爾賽於營總內揀選二人各帶一隊行走。馬爾賽帶領後隊。於十二月初八日起程。殿後。儻遇嚴寒大雪。難以行走。即在推河等處駐劄。俟明歲春融。再至扎克拜達里克。馬爾賽起程時。撫遠大將軍印交送康親王。

暫管。另給一印。與馬爾賽伊領兵到扎克拜達里克時。與欽拜阿成阿等所領兵丁俱聽順承親王調遣。察罕叟爾處所有盛京烏喇及索倫新滿洲等兵丁。應令順承親王在內酌派數百名。遣往馬爾賽處。在哨探瞭望。緊要處差遣。歸化城亦屬緊要。馬爾賽至扎克拜達里克時。令將圖爾賽等所領土默特兵丁一千名。遣回歸化城。圖爾賽席爾塔仍同僧滾扎卜等統領喀喇沁一千兵丁。由扎克拜達里克以至十三臺處分駐。照看臺站。察罕叟爾處調扎薩克兵二千。令其駐劄推河京城所派胡琳綽爾多帶往之兵丁二千名。令其於本月擇日起程。前往歸化城。俟到彼之時。精選一千名。於二月間。令侯馬蘭泰副都統達爾濟胡琳統領。往鄂爾昆之西形勝地方。與扎薩克兵丁合一處駐劄。其餘兵丁一千名。令副都統綽爾多統領。在歸化城駐劄。再派四子部落毛明安喀爾喀吳喇忒鄂

爾多斯兵丁二千名。令鄂爾多斯王查木陽四子部落王阿喇布坦多爾濟統轄。又選派察哈爾厄魯特兵各二百名。令總管雅圖統領。俱於明年二月前往吳喇忒之西界形勝地方。駐劄。得旨依議。馬爾賽著給與綏遠將軍印。阿克敦等即令隨馬爾賽前往辦理印務。○改直隸張家口協標左右二營遊擊。河間通州大名石匣三屯山永等協中軍守備。懷安城西城赤城滴水崖懷來城靖安堡長安嶺樂亭三河采育豐潤張灣寶坻廣平順德杜勝忠順王家圩曹家路密雲城潘家口燕河路懷柔城新雄易水白石口沿河口河屯等營守備及正定府龍固營大名協右營守備各缺俱爲都司僉書。從署直隸提督路振揚請也。○丙寅。諭內閣。朕聞各省漢軍駐防兵丁營伍俱屬廢弛。而鎮江爲尤甚。前已降旨。令將軍王鈇加意整理。俟明春專派官員前往考驗。今值管理蘇州織造事務海保

回南之便。因思蘇州與鎮江一水相通。計程不過二百餘里。就近稽查。最爲便捷。著海保回蘇之後。於今冬明春。時常往來京口。將兵丁技勇。營陣規模。以及馬匹戰船。甲冑鎗礮器械之完備與否。一一查驗。會同王鈇。勤加操練。務令水師陸路兵丁等技藝嫻熟。武備整齊。將來或有調撥差遣之處。接奉諭旨。數日之內。即可起程。如此。方爲國家有用之勁旅。俟明年二三月間。朕再遣專官前往察看。○諭喀爾喀汗王貝勒貝子公扎薩克台吉並各屬下人等。近日準噶爾賊夷噶爾丹策零。寄信與王喇嘛扎卜。稱喀爾喀厄魯特法教相同。本屬和好。及噶爾丹博碩克圖時失睦。既而我父追念前好。曾屢奏皇帝。乞將喀爾喀青海復舊安置。今皇帝欲將我如喀爾喀青海。入於旗下。佐領之內。給與封號。以故我等興兵至此。若能成事。則將喀爾喀青海照舊安置。即不能成事。亦

不令統屬於人等語。此實係賊夷姦詐離間之詭計。從前爾喀爾喀人等被噶爾丹戰敗以致失地。我

聖祖皇考憫念爾等歸誠存恤愛養。將喀爾喀諾顏等按伊原品封爲汗王。貝勒。貝子。公。扎薩克。屬下人等俱各賜生業。安享富饒。令歸原遊牧處。爾等之感恩報德同心効力。乃人所共悉者。準噶爾賊夷出狂悖之言。借安置爾等爲詞。欲肆行擾亂。即論爾等之封號親王。郡王。貝勒。貝子等爵位俱係我朝冊封宗室子孫兄弟之號。其餘臣下雖効力立功。竝無封貝子之例。惟四十九旗扎薩克成吉思汗之後博爾濟錦氏台吉等誠心歸順。我太宗皇祖俱賜以宗室封號。視如骨肉。結爲姻親。累世榮寵。何嘗視爲奴僕乎。至編設旗分佐領亦欲其易於查考。以便加恩。竝恐扎薩克等互起爭端之故。今已及百年。何嘗役使爾等一人乎。自分旗以來。爾喀爾喀之鄂托

克達魯哈等屬便於查管。遇饑饉則賑濟之行圍出兵。則厚賞之。可有催徵之事乎。此亦爾等所共知者。準噶爾賊夷姦詐狡獪。外託黃教而擾亂藏地。違背教原。口雖稱爲青海喀爾喀兩家。而又搶掠爾等。將胡土克圖。俱欲搶奪。姦惡極矣。且準噶爾一姓自厄爾栢克尼古勒蘇克齊汗之後興兵擾亂諸部落殘殺博爾濟錦氏幾至斷絕。至今讎怨未已。今策零敦多卜前來被爾喀爾喀等勦殺敗遁。賊夷懷恨必深思欲報復乘隙擾亂。若賊夷之事不定。則爾喀爾喀不得安。衆蒙古亦不得安。朕是以不惜國帑。發數萬大兵遠行征勦。綏靖邊圉。祇爲爾等生全之計也。爾屬下人等宜仰體朕心。各加奮勉。藉朕威力。效法此次進兵之王。貝勒。貝子。公。台吉等。朕必爲爾等勦滅賊夷。永保安寧。前者噶爾丹作亂時。爾等互爲搶掠盜竊。今又有搶掠盜竊者。此種惡習。甚屬愚賤。其務力爲悔改。且爾

等既屬內地多年。共知法度。若舍棄遊牧。擅行掠竊。干犯王章。何不力戰賊夷。立功雪恥乎。即爾等歸順賊夷。亦斷不能保全爾等。令爾等安享也。爾等宜熟計之。○諭青海王貝勒貝子公扎薩克台吉等。近日準噶爾賊夷遣策零敦多卜二人。領賊衆越阿爾泰來侵。喀爾喀欲搶掠克爾倫。及劫取澤卜尊丹巴胡土克圖。被喀爾喀副將軍王丹津多爾濟額駙策凌等。率兵分路迎擊。勦殺生擒。並獲其駝馬。賊夷敗遁。因轉思離間。寄書與喀爾喀善巴岱青王之孫王喇嘛扎卜希圖誑誘。擾亂成事。喀爾喀深知賊夷詭計。父子前後一轍。忿怒痛恨。不改初心。今爾青海台吉等。久荷

聖祖皇考冊封位號。褒寵顯榮。歷有年所。至於編設旗分。以便稽查賞賚。復恐扎薩克以強陵弱。互起爭端。譬之厄魯特內。有得沁者。有鄂托克者。有扎薩古爾者。有得默齊者。皆爲

易於管轄而已。爾有饑饉。朕必加周給。隨獵行兵。必加賞賚。從無徵輸。爾蒙古者。朝廷恩典至優至渥矣。若以封號旗分爲賤。亦可奏明酌改。且爾厄魯特之台吉阿巴賴諾顏之子孫。現在準噶爾處。果爲帥領乎。抑爲屬下乎。即如羅卜藏丹津降附賊夷。即將伊所屬分散爲奴。較之受天朝封號。孰榮孰辱。準噶爾原係成吉思汗之奴隸。爾等俱係成吉思汗之弟哈布圖哈撒爾之子孫。若以博爾濟錦氏諾顏等之先世論之。準噶爾乃爾等之奴隸也。奈何甘心自屈。受制於奴隸乎。可自思之。爾等當知賊夷詭計。勸諭屬下。分別利害。令其亦如喀爾喀等之奮勇立功。豈可甘爲懦怯。受賊夷蹂躪乎。朕因準噶爾反間致書。故又諄諄降旨。爾等如能遵行。則可以保全妻子。遊牧永享安寧之福矣。○丁卯。諭大學士等。科布多兵丁。回至察罕叟爾時。著烏察拉暫留軍營。袁泰來京。塔爾岱回原任。○

諭內閣四川順慶府知府馬世端原係巡撫
憲德題陞之員。今因溺職被參。憲德自行檢
舉數年以來。凡遇督撫自行檢舉之案。朕皆
令大學士等兩擬票簽進呈。是以憲德此案。
大學士等於照例擬票外。亦添從寬免議一
簽。但朕詳閱此本。主鴻勳縱役殃民。馬世端
徇情容隱。乃司道揭報。而督撫題參者。朕思
司道既已揭報。則憲德安能隱匿不參。與督
撫查出糾參者不同。難援自行檢舉之例。免
其議處也。憲德仍交部議。嗣後有與此等相
類者。不必兩擬票簽。○諭大學士等。準噶爾
賊人策零敦多卜等寄字與貝勒多爾濟色
卜騰。原欲傾陷多爾濟色卜騰。欲行離間之
意也。多爾濟色卜騰受朕恩甚重。伊亦感激
効力。豈肯墮其術中。但伊屬下人等。原非伊
之屬人。與伊不和。若仍在喀爾喀遊牧地方。
難以居住。爾等寄信多爾濟色卜騰。令伊父
子向內移住。朕加恩給與生業。將準噶爾賊

人所寄之信。竝與多爾濟色卜騰觀之。○改
山東臨清。沂州。沙溝。梁山等營。守備缺。俱為
都司僉書。從山東兗州總兵官曾謨請也。○
戊辰。諭大學士等。王丹津多爾濟具奏。據投
誠之厄魯特多爾濟供稱。噶爾丹策零現在
夸額爾齊斯遊牧。因有哈薩克之人常來搶
掠馬畜。殺擄人衆。是以噶爾丹策零親統兵
一萬。在遊牧外。相隔一日路程。防守等語。查
夸額爾齊斯與伊里甚遠。而云噶爾丹策零
在彼遊牧。此言固屬謬妄。但策零敦多卜領
兵現在夸額爾齊斯居住。不可不預為防範。
阿濟畢濟乃賊人出入之要路。今廷臣議稱
阿濟畢濟在西北。兩路軍營之間。應駐兵二
三千名。防守堵禦。朕思阿濟等處。與巴爾庫
爾相隔二三百里。從前朕屢降諭旨。令岳鍾
琪但經理西路之事。而不必旁及北路者。因
彼時賊人情形。似欲專擾西路也。今賊人既
盤踞夸額爾齊斯。則其意全在北路矣。若岳

鍾琪以大將軍擁兵四五萬而但坐鎮無事之堅城。於理可乎。然廷議於阿濟等處駐兵二三千名。朕意以爲兵數太少。必得萬餘名。方爲有益。爾等行文於岳鍾琪。詳悉妥議具奏。至十月間。無克克嶺卡倫被賊擄去兵丁賊人直至南山一帶。盜竊馬匹。我軍四五萬駐劄巴爾庫爾。一聞賊信。將馬匹收入城中。塔爾那沁離營不過二三百里。而不能保護馬匹。仍聽賊徒肆行無忌。大將軍與數萬官兵。未知所司何事。爾等行文併及之。○陞四川按察使劉應鼎爲四川布政使。司布政使以原任四川布政使高維新署四川按察使。司按察使。○改江蘇嘉定縣江灣司巡檢爲南翔司巡檢。移駐南翔鎮。從原署江蘇巡撫王國棟請也。○改湖北湖南撫標中軍遊擊缺俱爲參將。督標中軍守備黃州龍陽九谿永順等協中軍守備道士湫永定等營守備各缺俱爲都司僉書。從湖廣總督邁柱請也。

○己巳諭大學士等。前派出吳喇忒西界駐防之鄂爾多斯王查木陽。西子部落王阿喇布坦多爾濟著來京請旨。○又諭。前聞喀爾喀公通摩克被賊搶擄。向內遷移遊牧。但未知遷於何處。著派員外郎齊里克特往通摩克遊牧處。將通摩克及伊屬下人內有知曉阿濟畢濟等處路程之人。一並帶赴京城。其附近居住之扎薩克等遊牧。一併閱看。○陞正藍旗滿洲副都統達爾濟爲鑲黃旗護軍統領。仍留軍營。正藍旗滿洲副都統阿林爲正白旗護軍統領。仍兼管副都統事務。正黃旗前鋒參領扣婁爲額外護軍統領。署本旗護軍統領。○庚午。諭大學士等。巴爾庫爾所有阿寶屬下之兵。甚屬効力。已降諭旨。加恩賞賚。其鄂爾多斯之五百兵丁。亦甚効力。因彼處不可無蒙古兵丁。是以將此五百名兵。仍留於巴爾庫爾。著大將軍岳鍾琪照賞賜阿寶兵丁之例賞給。其歸化城之土默特兵

一千名。朕原擬三年撤回。今尚未能。即撤此土默特之官員兵丁。歷年各處派撥。亦甚勤勞。著大將軍岳鍾琪。亦加恩賞賚。其領歸化城兵丁前去之都統良敦。先於阿爾泰出兵効力。十有餘年。今又領兵前往。朕甚嘉之。欲另行更替。一時未得其人。今特頒恩賚。將朕元狐冠一頂。貂皮短褂一件。狄袍一件。銀二百兩。賞賜良敦。○浙江總督李衛疏言。嘉興府屬七縣。竝杭屬之海寧一縣。於九月初旬。正當禾苗秀實之時。忽生細蟲。以致禾穗黃萎。雖不至成災。但分數小減。而所獲之米。青白不一。且有米粒細小者。僅可食用。難以完漕。請將嘉興等縣。今歲應完漕米。改照雍正元年四年每石折銀一兩。或照雍正五年一兩二錢之例。出自

聖恩。得旨數年以來。杭嘉湖三府百姓。於額徵錢糧。急公輸納。竝無逋欠。甚屬可嘉。今茲數處小有蟲災。米粒稍碎。不能完漕。應令減價

折收。以示體卹。著照雍正元年四年之例。每石折銀一兩。徵收解部。○移四川小河營遊擊駐南坪。改永寧協左右營遊擊。夔州協中軍守備。小河通巴。忠州。平番。柏香。馬邊。天壩。安阜。梁萬。阜和。寧安。德靖。潼綿。等營守備。各缺。俱爲都司僉書。從四川總督黃廷桂請也。○辛未。諭大學士等。自甘州山丹。肅州金塔寺。至額濟內。古拉。鼎坤。都倫。阿濟達。巴漢。薩克薩圖。古里克。紅鄂爾。阿濟爾。汗。白格爾。等處路程。著侍衛圖勒車。鄉導侍衛法。籌原任協領根敦扎卜等。馳驛前往肅州。將每站水草路程里數。可否設臺運糧駐兵。及有遼闊平坦地方。可否屯田。竝賊衆自阿濟前來路程。詳悉看明具奏。歸時仍從坤都倫進山丹口。其涼州邊內路程。一併詳細閱看。圖勒車等。每人賞銀三百兩。○以陝西寧夏協領劉敬思。署陝西寧夏右翼副都統。○靖邊大將軍傅爾丹摺奏。臣率領大兵。於本月初六

日。已至察罕叟爾。京師滿洲兵臣自行統率在察罕叟爾之東。已顏布拉克地方過冬。歸化城土默特之兵。令與王桑里達居住之濟斯布隆地方附近駐劄。盛京船廠右衛察哈爾喀喇沁土默特綠旗兵。離滿洲營相去五里。次第安營。黑龍江兵丁。令在大營之北。扎哈蘇泰呼集爾圖地方駐營防守。奏入得旨。交辦理軍機事務。大臣等議奏。尋議本月初四日。靖邊大將軍印。既令順承親王掌管。應行文順承親王。將各處弁兵。如何擇地屯劄之處。會同傅爾丹酌量辦理。從之。○敕諭靖邊大將軍順承親王錫保奉

天伐罪。治世之常經。鋤暴除兇。安邊之遠畧。逆賊噶爾丹策零者。狂悖冥頑。父子濟惡。妄欲侵陵我屬國。窺伺我邊陲。包藏逆心。狡焉思逞。若不深加懲創。實爲衆蒙古之巨害。是以命爾爲靖邊大將軍。統領滿洲蒙古綠旗大兵。一切事宜。爾與副將軍和碩親王丹津多

爾濟和碩親王和碩額駙策凌振武將軍傅爾丹等。酌定方畧。公同計議而行。勿謂己能而不納衆論。勿當事會而致失機宜。勿恃兵強而輕視賊寇。密偵遠探。備極周詳。各路大兵及蒙古兵丁。聽爾調遣。凡遇有警。即遣發官兵應援撲剿。有能擒斬賊首者。奏聞加恩優賞。有情急來歸者。加意撫恤。其抗拒官兵者。毋加殺戮。兵將所過地方。須申嚴紀律。毋得騷擾百姓。毋得淫人婦女。毋得離散人之父子夫婦。毋得損壞人之墳墓室廬。毋得強取貨物。毋得驅役平民。其或有臨戰退縮。貽誤擾亂軍機者。爾會同商議。文官四品以下。武官三品以下。即以軍法示衆。官兵有犯小過者。會同商議。徑行處治。毋氓沒戎行之勞績。毋寬縱違法之弁兵。法紀務極嚴明。賞罰悉期公當。一切機宜。爾商酌調遣。振武將軍傅爾丹。綏遠將軍馬爾賽。俱聽爾調度。有應知會西路寧遠大將軍者。即行知會一同

辦理爾其嚴重精詳。殫心奮力。克奏膚功。永清邊徼。以副朕戡亂靖逆安民綏衆之至意。欽哉。故敕。○壬申。

聖祖仁皇帝忌辰遣官祭

景陵。○癸酉。改山東文登膠州二營中軍守備。

寧福壽樂二營守備。各缺俱爲都司僉書。從

署山東登州總兵官冉起鳳請也。○甲戌。諭

大學士等。副都統黑色帶領在昂古里地方

駐劄科爾沁之兵。離家二年。効力行走。領兵

之科爾沁。台吉滾濟扎布。教漢台吉羅卜藏

著各賞元狐帽一項。狍狸獐馬褂一件。其餘

台吉。管旗章京。副章京等。各賞銀三十兩。參

領。佐領等。各賞銀二十兩。驍騎校等。各賞銀

十兩。兵丁。各賞銀五兩。○又諭。朕因陳泰罪

不可宥。曾嚴降諭旨。今傳爾丹奏摺內仍以

陳泰爲參贊。開列職名。甚屬錯誤。爾等行文

與順承親王。陳泰至察罕叟爾時。著即革職

鎖拏嚴審具奏。○以鑲黃旗蒙古都統色爾

璧署本旗護軍統領。○戶部議覆阿思哈尼哈番李永陞條奏。八路旗莊官員原爲化導旗民稽查戶口而設。必需通曉吏治之人。方收經理之效。嗣後差滿更替。請將八旗武職官員停其差往。行文各部院衙門。揀選才能司官。併行文八旗滿洲漢軍都統。保舉候補科道及主事通判以上人員。送部引見。派委如實心任事。化導旗民。令總督巡察御史分別等第奏明。文部議敘。若所轄地方有戶口不行清查。及入官人口。借名贖身。潛匿境內。或旗人犯法。及該員生事擾害者。均照律議處。應如所請。從之。○蘇尼特郡王垂際功。蘇隆故遣官致祭。○乙亥。兵部議覆雲貴廣西總督鄂爾泰疏言。恩賞各省兵丁營運生息銀兩。督撫提鎮等標業經領訖。至協營兵丁尚未頒給。雲南省共兵四萬七千九百八十八名。督撫提標與各鎮標共領銀十一萬九千兩。分給協營已屬有餘。貴州省共兵二萬八

千六百餘名。今威寧協添兵五百名。都江一帶約須添兵四千名。而古州一鎮尚未請領賞銀。撫提兩標安籠一鎮共止領銀二萬二千兩。現在不敷分給協營。廣西省共兵二萬一千七百餘名。撫提兩標左右二江鎮已共領賞銀四萬一千兩。若分給協營所少無多。黔粵兵丁每名賞銀二兩。便足以資營運。所獲生息儘可濟用。再營運利息之處必須公平辦理。嗣後各省如有將營運銀兩或占百姓行業或重利放債與商賈小民爭利者請將出納官弁照騷擾地方索詐部民財物例治罪。該上司照失察屬員貪劣例議處。並請通行直省將軍督撫提鎮一體遵行。應如所請。從之。○丙子以原任西安布政使塔林爲額外內閣學士。署刑部右侍郎事。○丁丑大學士等議奏據辦理西藏事務護軍統領馬喇等奏言。頗羅鼐蒙恩授爲貝勒。又令辦理前藏後藏噶隆事務。今具稟懇求印信。以便

行文該管地方。與軍機調發事務。應如所請。令禮部鑄給辦理危藏噶隆事務多羅貝勒銀印一顆。交於頗羅鼐掌管。從之。○戊寅諭大學士等。各省出征之員未能即回本任者前曾降旨。著於十缺之中分出三缺爲出征弁員陞補之缺。西路交與岳鍾琪北路交與馬爾賽題補。今馬爾賽授爲綏遠將軍。領兵駐劄扎克拜達里克。其靖邊大將軍印務已交與順承親王掌管。嗣後題補北路弁員著順承親王辦理。○豁免福建鳳山縣水衝田地額賦二百八十兩有奇。○己卯諭八旗都統等。八旗漢軍兵丁技藝俱未嫺熟。皆失於訓練所致。今於額數之外挑選丁壯二千名另設一營教習訓練。務期精銳。再八旗漢軍勲舊大臣等子弟因其父兄失於教導。甚乏可用之才。朕心深爲憐憫。現今尚耿石李洛祖祭王諸家之子弟無論在京在外。其年至十五歲以上二十歲內外者著揀選帶領引

見朕量其才器令其學習行走。日後俾得成就。以副朕加恩造就勲舊子弟之至意。○陞吏部左侍郎彭維新爲都察院左都御史。轉戶部右侍郎。俞兆晟爲左侍郎。以鑲藍旗漢軍副都統韓光基爲戶部右侍郎。仍兼理副都統事務。○旌表江南太和縣烈女李二牛女李氏。拒姦不污。被刃殞命。給銀建坊。入祠致祭。如例。○庚辰。諭大學士等。喀爾喀郡王汪扎爾前因追殺逃走之吳梁海。由貝勒封爲王爵。去歲軍營送駝誤期。經部議黜革。此次出兵。著賞給汪扎爾貝勒原爵。同公策凌旺布領兵前往。○辛巳。添設三姓地方副都統一員。佐領六員。防禦四員。筆帖式二員。披甲八百名。從寧古塔將軍常德請也。○壬午。諭兵部。朕因各省駐防兵丁技勇多屬生疎。營伍亦覺廢弛。所養馬匹多不足額。其中漢軍爲尤甚。已於今年八月間。先行曉諭申飭。俟明年春月。各差科道等官前往查看。儻仍

不悛改。嚴加議處。朕思營伍廢弛。兵丁怠惰之習。若該管官弁等果能實心整頓訓練。數月之內即可改除。惟是馬匹不敷額數。若責令一時購買足額。或致馬價昂貴。兵丁力量艱難。況如南方諸省。平時既難喂養。而一時急切買補。又較難於北方。著該將軍等酌量稍爲變通。現養幾匹。其所少者。存價於官。一有調遣即可購買應用。不致遲誤公事。此朕格外體恤之特恩。若再奉行不力。一經查出。弁兵等俱不寬貸。○癸未。冬至。祀天於圜丘。上親詣行禮。遣官祭永陵。福陵。昭陵。昭西陵。孝陵。

孝東陵

景陵

大行皇后○停止次日朝賀○甲申諭大學士等領兵往歸化城之副都統綽爾多從前已賞銀三千兩今聞伊家甚貧寒著再賞銀二千兩管轄索倫兵丁之侍衛博爾本察著賞銀一千兩○調鑲白旗滿洲副都統蘇爾鼐爲正藍旗滿洲副都統陞直隸天津協領烏訥徵爲鑲白旗滿洲副都統○乙酉諭大學士等朕去歲屢降諭旨令喀爾喀等將妻子牲畜向內遷移於嚴密處居住乃並不預行遷移以致貝勒策登扎布等旗分被賊劫掠牲畜傷損皆不能遵旨之故耳昨傅爾丹奏請將策登扎布之屬下分給衆喀爾喀等養贍據此辦理甚不妥協應查明戶口給與產業今扎薩克圖汗王策旺扎布奏請將伊等被掠之官馬官駝令伊部落內照數賠補策登扎布屬下之人被賊擄掠朕深爲惻然正

欲施恩豈有著落伊等賠補牲畜之理著俱寬免交與王丹津多爾濟報銷以故輔國公巴賽子輔國將軍奇通阿襲爵○以故超武公達福子岱屯襲爵○丙戌月祭

大行皇后○大學士等議奏據靖邊大將軍順承親王錫保奏言厄魯特貝勒多爾濟色卜騰呈稱今年率領所屬遶過推河不料台吉索諾木吹濟引誘屬下四十餘戶一同叛逃現今所餘之人亦屬難信請率領伊等向內遷移至歸化城等處遊牧居住應如所請從之○戊子諭理藩院從前

皇考時曾將蒙古王台吉等之子姪著在內廷教養今扎薩克之蒙古國戚台吉等喀爾喀之王貝勒貝子公扎薩克等之子姪內十五歲以上者著來京在內廷教養○陞貴州清江副將趙文英爲雲南永北總兵官○大學士等遵旨議奏據傅爾丹奏稱管領喀喇沁兵一等塔布囊丹巴從軍勦賊衝鋒力戰受

傷入骨。今因傷發病故。臣等遵旨從優議卹。或贈爲扎薩克一等塔布囊。或授爲輔國公。恭候欽定。得旨。丹巴著追封輔國公。世襲罔替。刑部議覆。甘肅巡撫許容條奏。回民居住之處。嗣後請令地方官。備造冊籍。印給門牌。以十戶爲一牌。十牌爲一甲。十甲爲一保。除設立牌頭甲長保正外。選本地殷實老成者充爲掌教。如人戶多者再選一人爲副。不時稽查。所管回民。一年之內。竝無匪盜等事者。令地方官酌給花紅。以示鼓勵。應如所請。從之。工部議覆。河東河道總督沈廷正疏。言山東運河戴村壩工程。嗣後請歸捕河廳管轄。今東平州州判專司其事。戴村壩以下至分水口一帶汶河。係東平州地方者。仍歸捕河廳統轄。係汶上縣地方者。歸運河廳統轄。以專責成。應如所請。從之。雲貴廣西總督鄂爾泰題。廣西太平府龍英土知州趙作晉病故。無嗣。請以其弟趙作梁承襲。下部知

之。己丑。禮部議覆。琉球國中山王尚敬奏請。遵依舊典。嗣後仍二年一貢。應如所請。得旨。朕因琉球地處重洋之外。奉表修貢。遠涉風濤。深爲軫念。曾經降旨。將雍正八年貢物。准作十年正貢。今該國王奏請按期入貢。情詞懇切。具見悃誠。著仍遵前旨。若十年貢物。已經遣使起程。即准作十二年正貢。十一年不必遣使前來。將此行文該國王知之。

大清世宗敬天昌運建中表正文武英明寬仁信毅大孝至誠憲皇帝實錄卷之一百十二

大清世宗敬天昌運建中表正文武英明寬仁
信毅大孝至誠憲皇帝實錄卷之一百十三

監修總裁官光祿大夫經筵講官大學士兼兵部尚書理兵部事三等伯加十五級臣劉世明

總裁官光祿大夫經筵講官起居注太僕寺卿太僕寺卿和殿大學士兼戶部尚書仍兼管倉庫院

第三等伯加十三級臣張廷玉光祿大夫經筵講官起居注太僕寺卿太僕寺卿和殿大學士兼工部尚書仍兼

翰林院掌院事加二級臣福敏光祿大夫經筵講官太子太僕寺卿太僕寺卿和殿大學士兼禮部尚書加六級臣徐本光祿大夫

經筵講官議政大臣協辦內閣大學士事務禮部尚書仍兼管倉庫院事加六級臣湯懋才等

敕修

雍正九年辛亥十二月庚寅朔日有食之

辛卯諭大學士等前將寧夏滿洲兵丁派撥
一千名往西路備用今已爾庫爾大營已有
滿漢兵三萬四千餘名其寧夏滿兵應令仍
回本營著將軍卓鼐挑選一百名留在軍營
聽用其九百名於明年春間著伊禮布帶領
回至寧夏○諭內閣收可登著革退刑部侍
郎侯伊承審事件具奏之後再離任刑部侍
郎員缺著西安巡撫武格補授西安巡撫事
務仍著馬爾泰署理吏貽直協辦○以正黃

旗護軍統領馬喇為工部尚書實授扣婁為
正黃旗護軍統領○以一等伯欽拜為內大
臣副都統阿岱為正紅旗護軍統領俱仍留
軍營○調鑲白旗滿洲副都統烏訥徹為江
寧左翼副都統江寧左翼副都統李柱為鑲
白旗滿洲副都統○封科爾沁台吉鄂齊爾
為輔國公○壬辰諭理藩院西藏一等台吉
噶錫巴那穆扎爾色卜騰具奏謝恩進獻方
物從前因伊父噶錫鼐於阿里地方陣亡經
頗羅鼐奏請將噶錫鼐贈為一等台吉令伊
子噶錫巴那穆扎爾色卜騰承襲聞噶錫巴
那穆扎爾色卜騰甚是勤勞効力伊又係康
濟鼐之兄子康濟鼐誠心効力始終不懈並
無子嗣今將噶錫巴那穆扎爾色卜騰格外
施恩封為輔國公世襲罔替○轉吏部右侍
郎吳士玉為左侍郎調兵部右侍郎任蘭枝
為吏部右侍郎○以鑲紅旗護軍叅領法喀
署本旗滿洲副都統○以故一等侯田象坤

子田存德故一等侯馬爾英子馬國鍾各襲爵寧遠大將軍岳鍾琪奏報巴爾庫爾圖呼魯克等處屯田收穫青稞三萬六百八十石有奇下部知之○癸巳刑部議覆原任西安巡撫武格條奏流犯有年踰六十老病龍鍾者請照孤貧之例准其撥入養濟院給以口糧俾得全活餘年應如所請從之○廣東布政使楊永斌條奏定例鐵器不許出禁貨賣而洋船私帶禁止尤嚴粵東所產鐵鍋每連約重二十觔查雍正七八九年夷船出口每船所買鐵鍋少者自一百連二三百連不等多者至五百連併有至一千連者計算每年出洋之鐵約一二萬觔誠有關係應請照廢鐵之例一體嚴禁違者船戶人等照例治罪官役通同徇縱照徇縱廢鐵例議處嗣後令海關監督詳加稽察至商船煮食器具銅鍋砂鍋俱屬可用非必盡需鐵鍋亦無不便外夷之處於朝廷柔懷遠人之德意竝無違

礙得旨鐵觔不許出洋例有明禁而廣東夷船每年收買鐵鍋甚多則與禁鐵出洋之功令不符矣楊永斌所奏甚是嗣後稽察禁止及官員處分商人船戶治罪之處悉照所請行粵東既行查禁則他省洋船出口之處亦當一體遵行永著為例甲午以原任江南松江提督柏之蕃署鑲黃鑲白兩旗漢軍都統一等侍衛永昌署正白旗蒙古副都統鑲紅旗護軍叅領伍什圖署正紅旗蒙古副都

統 乙未

孝惠章皇后忌辰遣官祭

孝東陵 陞船廠協領哲庫訥爲寧古塔副都

統 丙申以內閣學士僧格爲理藩院額外

侍郎陞內閣侍讀學士雙喜爲內閣學士兼

禮部侍郎以兩江總督尹繼善協辦江南

江寧將軍事務給通政使趙之垣副將馬

龍肅州運糧欽差關防 丁酉以故一等公

達爾馬兄一等伯發爾薩襲封一等公以發

爾薩從弟靈德襲封一等伯○戊戌陞內務府郎中丁皂保爲內務府總管○靖邊大將軍順承親王錫保奏報鄂爾昆圖拉集爾麻泰等處屯田收穫大麥小麥糜子共一萬六百三十石有奇下部知之○乙亥命顯親王衍潢理親王弘哲齋冊寶上

大行皇后尊謚冊文曰地宏厚載承乾道以時行月炳陰暉助曦輪而垂照正位彰母儀之盛化茂周南視躬備婦德之全名高嫺淑式稽令典宜表徽稱皇后那拉氏毓質粹和秉心柔順蘭閨佩訓蹈女史之規型朱邸來嬪嫺天潢之禮度問安內殿盡孝謹於

先皇侍宴禁闈奉懼愉於

母后逮登大寶爰陟坤寧處貴逾謙居尊彌懋深懷恪敬凜夙夜於椒庭永念兢勤贊微咨於黼座恩流九御頌樛木之慈仁儉率六宮敦葛覃之澹約禕衣肅穆方期福履之綏璜珮渺茫忽感音容之隔乃頒綸命聿詔近臣

考謚法之相符詢僉謀而惟允特以冊寶謚

曰孝敬皇后於戲播鴻聲於萬國永煥金匱揚燬行於千秋光騰瑤牒祇膺寵賁用具哀榮○陞署鑲紅旗滿洲副都統達色爲陝西西安右翼滿洲副都統○復設福建督標右營叅將一員福寧左營閩安右營遊擊各一員建寧左營汀州左營延平右營漳州中營興化右營守備各一員改撫標中軍遊擊缺爲叅將福協右軍守備福州將軍標下中軍守備臺灣北路淡水營守備長福營右軍守備卽武城守右營守備泉州城守營安海汛守備同安營灌口汛守備各缺俱爲都司僉書從福建總督劉世明請也○庚子以冊謚孝敬皇后頒詔天下詔曰朕聞治家教國化始宮闈維坤承乾義隆翊贊誠徽音之茂著必顯號之昭垂禮記曰謚以尊名成周以來斯爲鉅典皇后那拉氏仁慈天賦淑惠性成祇事

皇祖妣孝惠章皇后

皇考聖祖仁皇帝

皇妣孝恭仁皇后備蒙慈愛克以孝稱佐朕內政經四十載溫恭實本乎至誠祇肅常形其匪懈自膺冊命於今九年儉以持躬思能逮下綜六宮之庶務而靜正咸宜樹萬國之母儀而安貞允協懋宣淑範久著令聞朕盱食宵衣勵精圖治瞻茲宮壺良資贊襄今雍正九年九月二十九日崩逝深為愴悼追維恪慎之光儀洵洽褒揚之彝憲爰詔所司詳稽禮制慎擬徽稱祇告

太廟以本年十二月初十日冊謚為孝敬皇后於戲德美關雎懿行長輝乎典冊道光禕翟鴻名永著於寰區頒示天下咸使聞知○諭理藩院東路派喀爾喀兵三千名著步軍統領阿齊圖去令侍讀學士渣克旦與阿齊圖協同辦理此派出兵丁每人賞銀五兩令渣克旦同二等侍衛阿敏道帶領至大將軍順

承親王軍營照王指示之處駐劄仍令兵丁等不時操演○辛丑兵部議覆廣東總督郝玉麟疏奏添改弁兵事宜一翁源縣之礮下鄉離城百餘里請添設巡檢一員以資彈壓一博羅縣城請留原設把總一員兵四十五名其原防之都司撤回府城餘兵六十八名抽撥長寧縣城以資防禦所有舊駐惠州府城之左營守備一員亦請移駐長寧管領該縣兵丁一長寧縣屬窩底山附近之老虎坳請添設一汛移千總一員帶兵八十名駐防於附近老虎坳之芳崗山頂建礮臺一座撥兵二十名以資犄角又翁源縣屬之礮下鄉長寧縣屬之錫場山請各設一汛每汛設外委把總一員兵四十名以上四汛統歸惠州協管轄一提標中營舊有貼防興寧縣五家坊汛兵四十名不隸興寧營管轄未免呼應不靈請撤回中營於提標五營內共抽兵三十一名撥入興寧營合之該營原額共足三

百名之數。其五家坊汛地。即令興寧營撥防。再將軍標向撥兵五十名。貼防龍門營鐵岡汛。增城營向撥兵四十二名。貼防番禺縣白沙塘等四汛。查龍門營見歸增城統轄。而將軍標即在番禺縣城。請將將軍標貼防鐵岡汛兵撤回。就近防守番禺縣四汛。增城營貼防番禺縣兵撤回。就近防守鐵岡汛。均應如所請。從之。○癸卯。改廣東瓊州協左營守備興寧和平。碣洲東莞三水四會那扶等營守備各缺。俱爲都司僉書。從廣東總督郝玉麟請也。○甲辰。靖邊大將軍順承親王錫保摺奏。據寧古塔副都統塔爾岱呈稱。

皇上恩旨。念塔爾岱宣力可憫。令回原任。但大兵正值滅賊之期。是塔爾岱報國雪恥之日。若負罪而還。何顏見七十有七之老母。且塔爾岱傷痍悉已平復。仰懇仍留軍前等語。謹此代奏。得旨。朕覽塔爾岱所奏。爲之惻然。若准伊所奏。朕實不忍。若不准。則軍中難得此

練習之賢將。今暫依所請。賞伊母銀一千兩。再賞塔爾岱一千兩。資伊用度。○奉天府府尹楊超曾疏言。奉天各屬。從前一切公務。皆取給里下。總計一歲之科。派多於正額之錢糧。如遇奏銷地丁驛站大造編審人丁。大計考察官吏等項。自臣衙門家人書吏。以至治中知府州縣各處。均有陋規銀兩。名爲造冊之費。歲科考試生童。自府丞至治中知縣衙門。亦有陋規銀兩。名爲考試之費。至大小官員到任。凡修理衙署。鋪設器用。以及查點保甲。換給門牌。印捕等官。紙張飯食。俱行攤派銀兩。每項約有數十兩。至百餘兩不等。更或銜靈里書。從中指一派十。侵收包攬弊竇多端。臣已嚴飭各屬。勒碑永禁。竝令嗣後徹底澄清。不許絲毫派累。得旨。從來地方科派陋規。甚爲民間之擾累。楊超曾通行查禁。辦理甚是。但恐相沿已久。官吏人等尚有陽奉陰違者。又恐日久法弛。將來接任之員。或有仍

襲從前之陋習者著將楊超曾所奏宣示於外令奉天官吏人等永遠遵行以除積弊以惠閭閻○改山西撫標中軍遊擊缺爲叅將殺虎協中軍守備天城陽和高山渾源廣昌平刑忻州右衛并坪利民神池八角朔州樺林鎮西保德懷仁等營守備各缺俱爲都司僉書從山西巡撫覺羅石麟請也○雲貴廣西總督鄂爾泰題雲南景東土知府陶大鑑故請以其子陶淳承襲下部知之○乙巳諭內閣逆賊呂留良以批評時藝託名講學今罪蹟昭彰普天共憤內外臣工咸以罪犯私著之書急宜焚燬爲請朕以爲從來無悖逆之大儒若因其人可誅而謂其書宜燬無論燬之未必能盡即燬之而絕無留遺天下後世更何所據以辯其道學之真僞乎以故燬書之議概未允行頃者翰林顧成天奏稱呂留良所刊四書講義語錄等書麤浮淺鄙毫無發明宜敕學臣曉諭多士勿惑於邪說爰

命在廷儒臣詳加檢閱茲據大學士朱軾等於其講義語錄逐條摘駁纂輯成帙呈請刊刻徧頒學宮朕以逆賊所犯者朝廷之大法也諸臣所駁者章句之末學也朕惟秉至公以執法而於著書者之爲醇爲疵與駁書者之或是或非悉聽之天下之公論後世之公評朕皆置之不問也大學士朱軾等既請刊刻頒布學宮俾遠近寡識之士子不至溺於邪說朕思此請亦屬可行姑從之以俟天下後世之讀書者○諭大學士等侍讀學士渣克旦見今派往喀爾喀地方操兵防範著給還侍郎原銜○禮部題孝敬皇后百日例應行致祭禮但適值來年正月請於十二月二十一日行三滿月致祭禮二十五日行百日致祭禮從之○丙午實授諾爾渾爲兵部右侍郎○旌表陝西固原州烈婦陳茂生妻段氏拒姦不污被毆殞命給銀建坊入祠致祭如例○丁未諭大學士等

紀成斌久歷戎行曾有戰功是以朕加恩用至總兵官後因大將軍岳鍾琪極力保薦謂其可以大用始將伊擢用四川提督令在西路協贊軍務上年岳鍾琪來京陛見將大將軍印信交與紀成斌護理乃紀成斌隄防疎忽爲賊人所窺始則盜竊馬駝既則逼近軍營無所忌憚此時紀成斌一籌莫展幸賴樊廷等奮力出擊以寡敵衆大挫其鋒而賊衆始退紀成斌之罪誠擢髮難數朕猶暫寬其罪俾得黽勉効力以贖前愆乃伊一年以來怠忽凌巡每見欽差大臣但言我實乃已爾庫爾弁兵之罪魁紀成斌有忝職守深負朕恩著革去提督改爲副將交與岳鍾琪凡有差遣之處令其効力贖罪若仍不知愧悔著即叅奏嚴究四川提督著陝西延綏總兵官顏清如補授陝西延綏總兵著陝西沙洲副將張豹補授紀成斌著補授陝西沙洲副將又諭派出古爾班賽堪地方駐防之鄂爾

多斯王查木陽四子部落王阿喇布坦多爾濟著各賞銀一千兩鄂爾多斯台吉策旺多爾濟額默根索諾木著各賞銀五百兩征勦準噶爾賊人喀爾喀貝勒冊卜登賞元狐帽一頂貂皮馬褂狄袍各一件銀五千兩○大學士等奏請派員赴扎克拜達里克推河翁機三處地方修築城垣得旨扎克拜達里克地方著副都統銜馬哈達原任巡撫圖理琛等前往推河地方著副叅領桑吉柱等前往翁機地方著原任將軍來文等前往都察院左副都御史阿蘭泰緣事降調以加副都統銜阿成阿爲都察院左副都御史加侍衛胡習禮副都統銜俱仍留軍營○以寧古塔副都統塔爾岱爲內大臣在軍營叅贊行走○兵部議覆福建總督劉世明等疏言福建陸路武職官員籍隸本省者請於附近江西省揀選調補其江浙兩省陸路都司以上官員請以本籍五百里之外缺題補至拔補千

總仍照定例止避本營其千總題補守備請
照文官教職之例止避本府應如所請從之
○改雲南督標中軍守備廣羅騰越劍川三
協中軍守備順雲營守備貴州遵義黔西二
協左右營遊擊平遠定廣二協中軍守備普
安永安安順新添平伐仁懷石阡等營守備
廣西新泰思恩平樂慶遠等協中軍守備上
思龍憑旭轟上林富賀三里麥嶺等營守備
各缺俱爲都司僉書從雲貴廣西總督鄂爾
泰請也○雲貴廣西總督鄂爾泰題廣西鎮
安府向武土知州黃道遠故請以其子黃宸
承襲下部知之○戊申陞正藍旗前鋒叅領
阿那布爲本旗蒙古副都統仍留軍營○吏
部遵旨議覆直省府州縣等缺地方之要簡
不同人才之優絀各異必人地相宜方於吏
治民生均有裨益嗣後除道府員缺係請旨
補授並沿海沿河苗疆一切應行題補之缺
仍照舊例遵行外其同知通判知州知縣內

經督撫冊報係衝繁疲難四者俱全或兼有
三項之缺最爲緊要請令各該督撫於見任
屬員內揀選熟諳吏治品級相當之員具題
調補所遺之缺歸部銓選至衝繁疲難四項
內兼有二項以及專有一項之缺據各省冊
報十居八九若概歸在外題補恐外省調缺
太多見任屬員不敷揀選調補之用應照例
歸於月分陞遷如初選之員到任後或人缺
不稱仍令該督撫酌量具題對調再各省丁
憂病故在外所開之缺向來扣留知照督撫
將試用人員委署今衝繁疲難既經分別則
在外所開缺內如係四項俱全或三項相兼
者請照舊例扣留令該督撫將見任屬員選
擇調補所出之缺將試用人員署理其不兼
四項三項之缺歸部銓選至嗣後有應設應
改之缺令該督撫即於改設本內將四項或
全或兼或專等因分別聲明直隸各省一體
遵行從之○改四川撫標中軍遊擊缺爲叅

將從四川總督黃廷桂請也。己酉恭纂

聖祖仁皇帝實錄聖訓告成禮部具儀注監修總裁大學士等奏請呈送

大內尊藏

上御太和殿設鹵簿奏樂監修總裁副總裁纂修等官奉表恭進

實錄聖訓行禮畢諸王貝勒貝子公及文武各官等奏言恭惟

聖祖仁皇帝深仁厚澤盛業隆猷纂輯成書慶流萬葉臣等不勝懼忭禮當慶賀

上傳制曰

皇考聖祖仁皇帝厚德豐功彌綸宇宙光天之下知識之倫莫不霑被

聖化歌詠太平朕纘承統緒於

皇考一言一動時時奉爲法守爰命大學士等恭輯

實錄聖訓茲者纂修告成朕得朝夕誦述身體力行亦俾萬世子孫臣民欽遵弗替朕心慰

悅與卿等同之於是諸王以下文武各官行慶賀禮。庚戌諭內閣欽惟我

皇考聖祖仁皇帝神聖首出臨御萬邦六十餘年至德豐功際天蟠地自昔史冊所載罕見比倫雍正元年朕命大臣等督率官員敬謹纂修

實錄昭垂萬世迄今九載編輯成書朕心嘉慰應加恩議敘以獎勤勞監修總裁官及纂修提調收掌繙譯謄錄等員與執事人等著查照康熙十一年之例斟酌議敘其筵宴賞賚亦著該部察例行。○月祭

孝敬皇后。○平郡王福彭疏報修理

陵工告竣得旨平郡王福彭督率官員等修理永陵護隄

福陵水法石工潔誠襄事敬謹竣工甚屬可嘉在事人員著分別議敘再

福陵紅門前大路與

寶城甚近車馬俱由山根左畔行走有關風水

著行文奉天將軍府尹嗣後於渾河東南西南無關風水之處設立船廠以渡行人紅門前大路及山根左畔嚴行禁止行走渾河以北凡係風水之地所有草木不許擅動至遷移房屋禁止耕種地畝著賞給房價補還地畝封喀爾喀扎薩克輔國公阿努里爲固山貝子壬子諭大學士等貝勒阿寶并伊子哀布在西路軍營甚屬効力阿寶又帶所屬兵丁防範遊牧殊爲可嘉著賞還伊郡王原爵以廣東廣州左翼副都統馬士傑署廣東廣州將軍○命左副都御史阿成阿爲綏遠將軍馬爾賽叅贊○癸丑大學士等遵旨議覆據靖邊大將軍順承親王錫保叅奏喀爾喀郡王敏珠爾多爾濟扎薩克台吉成滾扎布調往軍營逗留不至扎薩克一等台吉鄂穆布濟擅離汛地回往遊牧罪難寬宥請將伊等郡王台吉俱行革退得旨王敏珠爾多爾濟之祖墨爾根濟農古祿什稀乃喀

爾喀內首領扎薩克從前恭順進貢後遇噶爾丹之亂甚屬効力此次調兵敏珠爾多爾濟遲誤未到或有別故著將敏珠爾多爾濟成滾扎布調取來京扎薩克台吉鄂穆布濟既派在庫布可爾地方駐劄伊聞賊信私離汛地罪不可赦猶能保守伊之遊牧未被賊掠尚屬可矜著將鄂穆布濟亦調取來京俱俟朕面詢後再降諭旨○授故奉國將軍武格子年尼保爲奉恩將軍○復設湖北孝感縣馬溪河巡檢一員改應山縣平里市巡檢爲平靖關巡檢移駐三里店從陞任湖北巡撫魏廷珍請也○裁四川松潘衛守備缺改設龍安府同知一員照磨一員俱駐松潘添設南坪巡檢一員從四川總督黃廷桂請也○改河南督標中軍守備缺爲都司僉書從河東總督田文鏡請也○寧遠大將軍岳鍾琪奏報哈密塔爾沁等處屯田收穫青稞麥子共五千石下部知之○以故喀爾喀鎮

國公索諾木班珠爾子貢格阿喇布坦襲爵

甲寅

孝莊文皇后忌辰遣官祭

昭西陵百日致祭

孝敬皇后諭兵部法爾薩巴爾米忒著委署

護軍統領巴爾米忒著給還都統原銜貴

州按察使張體義緣事革職陞貴州貴東道

方顯爲貴州按察使司按察使○以廣東海

關監督準泰署福建福州將軍福建陸路提

督張起雲患病解任以廣東潮州總兵官王

郡署福建陸路提督○乙卯諭大學士等今

年陝西西鳳二府併同華等州屬輓運甘涼

西肅等處兵米十五萬石各運戶因馱載牛

隻疲乏在甘借領庫銀一萬八千餘兩另催

牲畜轉運此項銀兩應於運戶原籍即行催

追還項朕恐運戶中不無力量艱難者已經

降旨寬以一年之限今據署西安巡撫馬爾

泰布政使碩色等奏稱藩司衙門有連年平

餘銀兩請充公用朕思運戶借領官銀雖係

應還之項然伊等領運兵米如期運到並無

遲誤應加格外之恩以昭獎賞藩司衙門既

有平餘銀兩著照數抵還運戶借領之項免

其催追以示朕體恤秦民之至意○丙辰諭

大學士等古爾班賽堪地方駐滿洲蒙古兵

五千名甚屬緊要護軍統領達爾濟著給與

將軍印信令其總統鄂爾多斯王查木陽四

子部落王阿喇布坦多爾濟俱授爲副將軍

原任散秩大臣四格巴匝爾原任侍郎傅鼎

俱賞給原銜與副都統胡琳並在叅贊上行

走達爾濟見在歸化城著減從馳驛來京面

請訓旨再赴軍營○丁巳歲暮裕祭

太廟

上親詣行禮遣官祭

永陵

福陵

昭陵

昭西陵

孝陵

孝東陵

景陵

孝敬皇后（）遣官祭太歲之神（）戊午靖邊大將軍順承親王錫保摺奏臣遵旨遣人詢問和托輝特貝勒班第見在移駐地方今據呈稱本年秋間因準噶爾賊逆來犯由原駐桑金答賴等處東遷至塞楞格河北山厄格地方駐牧聞逆賊逃遁已踰阿爾泰山嶺仍由厄格地方前進來至塞楞格河同扎薩克根敦貝勒車蘇隆等部落於南北兩岸駐牧山嶺險峻樹木叢繁更兼河流深濶占據要害可以禦敵奏入報聞（）議敘北路蘇克阿爾達湖地方擊敗準噶爾賊夷功喀爾喀貝勒冊卜登扎薩克台吉齊巴克扎布葛木丕爾齊旺協理台吉巴海厄莫根羅卜藏及弁兵等俱賞賚有差（）旌表八旗節婦滿洲族保

妻喀拉氏等一百十五人蒙古卓特巴妻洪氏等十六人漢軍蕭璋妻線氏等二十七人直隸各省節婦曹淮妻楊氏等共七百六十五人孝子邊溥終等二十三人貞女聶氏等十九人孝婦邵氏一人孝女楊氏一人各給銀建坊如例（）是歲人丁戶口二千五百四十四萬一千四百五十六又永不加賦滋生人丁八十六萬一千四百七十七田地山蕩畦地八百七十八萬六千一百九十頃八十畝有奇徵銀二千九百七十九萬七千五百一兩有奇米豆麥四百七十六萬八千四百八十七石有奇草五百一萬七千七百二十七束茶三十二萬八千七百二十引行鹽五百一十九萬二千三百四十四引徵課銀三百九十五萬一千一百兩有奇鑄錢十萬四千八百七十五萬九千六百六十有奇

大清世宗敬天昌運建中表正文武英明寬仁
信毅大孝至誠憲皇帝實錄卷之一百十三

大清世宗敬天昌運建中表正文武英明寬仁
信毅大孝至誠憲皇帝實錄卷之一百十四

監修總裁官光祿大夫經筵講官太僕寺卿弘文館學士兼兵部尚書總理兵部事務三等伯加十五級臣鄂爾泰

總裁官光祿大夫經筵講官起居注太僕寺卿弘文館學士兼兵部尚書總理兵部事務三等伯加十五級臣鄂爾泰

事三等伯加十三級臣張廷玉光祿大夫經筵講官起居注太僕寺卿弘文館學士兼兵部尚書總理兵部事務三等伯加十五級臣鄂爾泰

翰林院掌院事加二級臣福敏光祿大夫經筵講官太子太僕寺卿弘文館學士兼兵部尚書總理兵部事務三等伯加十五級臣鄂爾泰

修撰議官議政大臣協辦內閣大學士事務禮部尚書仍兼官太常寺鴻臚寺事務臣等奉

敕修

雍正十年壬子春正月己未朔

實錄卷一百十四

上於宮中拜

神畢御殿王以下文武各官及外藩使臣等上

表朝賀停止筵宴○朝鮮國王李昫遣陪臣

李檉等表賀冬至元旦

萬壽節及進歲貢禮物宴賚如例○癸亥孟春

享

太廟

上命

皇四子弘曆行禮○遣官祭太歲之神○乙丑

世祖章皇帝忌辰遣官祭

孝陵○丁卯順天府進春、諭八旗兵丁等兵可百年不用。不可一日不備。帝王之治天下。未有不以明武備爲先務。而兵丁之武藝。亦未有不勤加訓練。而能有成者。從來士農工商。各治一業。苟不專心竭力。則其業必不精。況兵丁所司者。皆戰鬥之事。彎弓挾矢。冒鎗衝鋒。非膂力剛強。不能披堅執銳。非技藝嫺熟。不能克敵宣威。奈何怠惰苟安。虛度歲月。

實錄卷一百十四

不思國家設兵之本意。不念自己專司之職業。乎爾兵丁等。世受國恩。朝廷愛養。猶如赤子。凡八旗將軍大臣等。多由行伍出身。漸登榮顯。爾等誠能立志向上。奮勉自勵。勤加練習。技勇可觀。將來建立功勳。馳名軍伍。不但本身有上進之階。且光耀宗祖。榮及子孫。受福曷可限量哉。國家承平日久。人人耽於安逸。武備漸弛。今當邊陲用兵。是以降旨令勤加操演。又念操演之兵。若仍輪流值班。則其

實錄卷一百十四

力難以兼顧。而工夫未免間斷。是以不令該班俾得專心訓練。又復給以飯錢。資其食用。無非體恤爾等之勤勞也。爾等各宜勉力學習。如騎射長槍之類。必令純熟精強。用成國家之勁旅。以柔弱怯懦爲恥。以安逸華麗爲戒。人之力量用之則日增。不用則日減。如出城操練之際。正可演習步行。又何必騎馬乘車。徒多糜費。嗣後果能仰遵朕訓。努力向前。且互相勸勉。鼓勵銳氣。朕必聞知。加以格外之恩賞。如有不肖之徒。苟且怠玩。甚至妄生怨言。搖惑衆聽。此不但藐視公事。自誤功名。實爲人心風俗之害。經朕察出。必以軍法從事。勉之勉之。諭八旗該班兵丁等。目今軍興之際。兵丁等訓練操演。甚爲緊要。若以操演之兵。仍令照舊該班。則訓練未有專功。技藝難以純熟。是以特加挑選。令其每日操演。將爾等分作兩班。輪流當差。所以使操演之兵。得專心學習也。然人果有上進之志。何時

不可黽勉何地不可學習。即如爾等換班之時。原可練習技藝。雖該班之地。不便演放鎗礮。而拉弓相撲舞棍。趨走等技藝。在領班之大臣官員。未嘗不可訓練。爾等慎勿以未經入選。不在操演之列。自甘懦弱。而不勤加訓練也。夫該班與操演。俱係一體出力。且操演兵丁。如有缺少。自必於該班兵丁內挑補。則爾等不更當奮勉乎。見今雖將爾等分爲兩班。較前稍爲勞苦。然較之軍前之人。則勞苦又相懸絕矣。數年後。仰邀

聖訓卷一百十四

四

天眷大兵凱旋之時。爾等差使。仍得暇豫從容。儻目今不思黽勉。但偷一時之安。以致技藝生疎。則日後必爲無用之廢人。國家經制錢糧。豈有養贍廢人之理。如有此等無知不肖之徒。一經查出。除革退錢糧外。仍從重治罪。○甘肅巡撫許容奏言。臣以沿邊要地。或有蠢動。加意防範。今准甘提。涼鎮各咨稱。准署督臣。令貝勒丹中。在阿拉克山阿爾坦特布

什等處駐牧。竝准其部下人等。至邊內貿易。又據肅州報稱。遵奉署督臣。安插公巴濟旗下。領催哈喇等戶口。於哈魯鼎地方。給以米麵茶封。又據寧夏道府報稱。奉署督臣。遵旨安插公通摩克。公巴濟人衆。於賀蘭山後。竝將喀爾喀部落。扎薩克。台吉。鄂穆布濟。扎薩克。台吉。多爾濟。王格勒克。顏木聘爾。公喇旺。公完舒克等。一體安插。支給米麵茶封。近又據地方官稟報。鎮夷口內紅布湖地方。住有夷帳。云是巴濟公部落。爲賊衆迫脅。逃避內地。臣聞鎮夷口外之巴濟公。已叛歸準噶爾。而伊等部落。言稱避賊。豈可深信。置之內地。恐至藏姦。且寧夏地土平漫。僅隔一賀蘭山。竝無險要。涼之鎮番。孤懸塞北。自涼抵肅。徑竇繁多。外通邊牆。而諸夷漸次逼處。人心難測。在查郎阿。宋可進。自必悉心籌畫。防範嚴密。而臣鯉鯉過慮。殊懷隱憂。請嗣後塞外附屬諸夷。未奉諭旨。安插。而伊等口稱避賊。內

聖訓卷一百十五

五

徙者。不許縱令入口。即有力量單弱。不足禦賊。而勢當應援者。寧可遣兵遠護。不宜拔帳近移。伏惟

聖裁。奏入。報聞。○己巳諭吏部。凡因公註誤降調人員。赴部候補。應行引見者。從前未令督撫出具考語。嗣後各員赴補。文內著督撫將伊居官如何之處。出具考語。爾部於摺內註明具奏。帶領引見。○辛未祈穀於

上帝。遣莊親王允祿行禮。○乙亥諭內閣。京師自冬及春。未得雨雪。畿輔地方及近京各省。雖有奏報得雪者。亦未普遍。需足因思。上年十一月十五日。月食。據欽天監觀候。曾引占書。燕趙旱禾。麥有傷之語。朕心甚為憂懼。擬於正月祈穀之期。虔禱

上帝。以迓天和。後因朕躬偶感風寒。醫家奏請避風靜攝。是以未曾躬親祀典。此心愈加乾惕。惟茲數月以來。雨雪未降。顯係

上天垂象。以示儆甚可畏也。朕虔誠修省。體察政治之闕失。以期仰格

天心。大學士九卿等。各宜恪慎齋戒。至誠祈禱。尤當洗心滌慮。殫職奉公。以為敬

天祈福之本。京師為四方輻輳之地。民食浩繁。更宜豫為籌畫。至於該督撫等。各自敬謹修省外所屬地方。雨澤之有無。播種之遲早。務期悉心訪察。先事圖維。儻二麥歉收。必思患豫防。勿使黎民有乏食之虞。方不負朕之委

任。儻有玩忽隱飾等弊。經朕訪聞。必加嚴譴。內外大臣等。領此諭旨。務在實心奉行。不必以空言覆奏。諭大學士等。張家口外領兵駐劄之都統薩穆哈。著來京。令都統綽奇副都統宗室滿珠錫禮前往。綽奇所管鑲藍旗事務。著平郡王福彭署理。丙子。署陝西總督查郎阿奏言。臣遵旨委遊擊朱奇芳等出口。至阿拉克山貝勒丹中處。派人協同詢問。公通摩克等。遷移遊牧之處。今據朱奇芳等

具稟前至諾顏喀拉地方見公通摩克回稱王格勒克顏木聘爾在錐崙地方駐牧公喇旺欲往哈魯魯去扎薩克台吉鄂穆布濟并巴濟旗下佐領翁鄂柴等俱欲往綽確去此等地方俱於賀蘭山甚近扎薩克台吉多爾濟與我附近駐牧扎薩克台吉西里扎布仍在古爾班賽堪地方我等產業牲畜俱被逆賊搶劫屬下之人漸至饑餓兼無居住帳房見今皇恩甚重仰懇給發口糧等語臣查諾顏喀拉等處係喀爾喀遊牧之地於哈魯魯賀蘭山甚近臣暫將王格勒克顏木聘爾併公通摩克人等酌量給發茶麵帳房等物其作何料理安插之處伏祈

皇上敕部議覆施行得旨大學士等議奏尋議王格勒克顏木聘爾公通摩克等被賊劫掠今遊牧俱移於諾顏喀拉等處駐劄應派章京一員動支戶部銀二萬兩馳驛前往將王格勒克顏木聘爾公通摩克屬下查明戶口

善加撫育台吉及屬下之人每家各賞牛羊牲畜每人賞給銀六兩以製帳房其所賞之牲畜於未滋生之前行文查郎阿交與寧夏官員將一年所食之口糧麵茶等物辦理賞給得旨通摩克率領屬下之人向內移行路遇賊人搶掠人口牲畜甚為可憫王格勒克顏木聘爾之戶口牲畜亦被劫掠著賞給二人銀各一千兩以為立產之具餘依議○己卯諭內閣寧夏為甘省要地渠工乃水利攸

關萬姓資生之策莫先於此是以朕特遣大臣督率官員等開濬惠農昌潤二渠又命修理大清漢唐三渠以溥萬民之利年來惠昌二渠及唐渠工程漸次告竣於民田大有裨益其大清渠漢渠雖未竣工然聞連年加謹堵壘極力挑濬水澤已可敷用不過湃崖開座有應行修理之處可以從容經理非比唐渠之必應及時速成也目今甘省軍興之際輓運兵糧正需車輛茲因修理渠工又復催

車運送物料。恐小民承應公事。力難兼顧。有誤春耕。所當酌量變通。以體恤民隱者。查寧夏有專司水利之同知。若將未竣之渠工。交與該員。照通智史在甲等所料估之處。於每歲春工內。分年陸續修理。再令寧夏道鄂昌勤加督率。不時稽查。務期工程堅固。利濟有資。使民田永霑膏澤。通智史在甲。將各件與鄂昌交代清楚。即行回京。其在工効力之文武官弁。交與該署督查郎阿計其在工之久暫。訪其奉職之勤惰。量其辦事之能否。應留陝題補委用者。留陝題補委用。應咨部請旨者。咨部請旨。應發回本地者。發回本地。其見任武弁及兵丁等。派撥渠工効力者。俱令各歸營汛。在工夫役等。交與鄂昌將附近者。令歸南畝。遠來者。酌量遣回。○陞福建澎湖副將陳勇。為福建海壇總兵官。以廣東瓊州副將蘇福。署廣東潮州總兵官。○庚辰。署陝西總督查郎阿奏言。據大學士等咨稱。甘州係

沿邊要地。賀蘭山亦附近寧夏。領催哈喇等二十七戶。係叛逆輝特公巴濟屬下。安插於此。究有未便。應飭令甘寧文武員弁。嚴加防範。不時稽查。將來作何安插之處。再行酌議。臣即密令甘提臣宋可進。寧夏鎮臣李繩武等。會同文員。加謹防範。小心查察。令酌量安插於附近邊牆之內。嚴加管轄。以固疆圉。奏入。報聞。○辛巳。封順承親王錫保子熙良為世子。○大學士等議奏。據厄魯特郡王額駙色卜騰旺布。告稱屬下人等。見存遊牧處。有四百二十戶。其內有十四寨桑。若將伊等移住內地。其中未出痘疹者多。未免恐懼。但見在遊牧。又與賊交界。伏乞皇上施恩。往西移於喀爾喀河附近居住。甚屬堅固。至屬下人等牲畜。並無倒斃傷損。力能遷移等語。應如所請。移住於喀爾喀河地方。伊屬下人等。既稱牲畜豐足。力能遷移。不必更加賞給。得旨。色卜騰旺布屬下人等。不隨

逆賊誠心歸附伊主。甚屬可嘉。著加恩賞給
寨桑等銀各一百兩。屬下人等。每戶銀十兩。
色卜騰旺布感念朕恩。不受準噶爾賊人之
欺誘。屬下逃竄。又効力往追。著加恩賞銀一
千兩。壬午。命少保雲貴廣西總督鄂爾泰
爲保和殿大學士。兼兵部尚書。陞雲南督
標中軍副將潘紹周爲廣西右江總兵官。
癸未。寧遠大將軍岳鍾琪奏言。臣因入冬以
來。積雪甚深。嚴飭卡倫之弁兵。祇令登城瞭
望。不許分遣遠哨。詎料駐防鏡兒泉副將馬
順。不遵軍令。陽奉陰違。擅遣弁兵遠出巡哨。
以致城北山內兵丁。突遇賊夷。被傷二名。衝
失一名。副將馬順隨遣遊擊楊玉守備張嵩
先後帶兵追趕。賊夷遠遁。其違令之副將馬
順。理合參奏。得旨。鏡兒泉卡倫離軍營不及
百里。駐兵不少。賊來即至。傷失兵丁。一任遠
遁。岳鍾琪是何防範。且安設卡倫。原爲巡探
如雪霧黑夜。尤宜加意。若止令登城瞭望。不

許分遣遠哨。以爲恐有疎防。是必將待賊臨
城而後防矣。是何軍令。岳鍾琪不知自咎。僅
以副將陽奉陰違爲詞。朕實不解。將岳鍾琪
與副將軍等交部嚴察議奏。甲申。給駐劄
古爾班賽堪將軍達爾濟建勲將軍印賞銀
二千兩。議敘追勦準噶爾賊人功科爾沁
郡王羅卜臧喇錫巴林郡王桑里達扎賴特
貝子特古斯翁牛特貝子羅卜臧教漢公額
駙羅卜藏喀爾喀公敏珠爾屠巴巴木丕爾
多爾濟扎薩克台吉旺扎爾旺布達錫丕爾
根敦諾爾布扎卜齊旺扎卜特克錫策卜登
拉布坦等。各賞賚有差。寧遠大將軍岳鍾
琪奏言。去年襲擊賊夷。沿途細看。有穆壘地
方。形勢險要。兼可屯種。若於此建築城池。駐
兵二萬。賊兵斷難飛渡而東。再於巴爾庫爾
駐兵一萬。於魯谷慶皮禪等城。添設官兵足
一萬之數。如此。則賊兵來時。我軍互爲犄角。
前後邀截。可令大創而去。若將來穆壘駐兵

有未協之處請將臣置之重典妻子從重治罪得旨穆壘果爲要隘之地可以堵截賊人來路又與魯谷慶等處互爲聲援著照所奏定議舉行○乙酉禮部題

孝敬皇后冊謚禮成請照例遣官敕諭朝鮮國王得旨上年十一月已計告該國王今因冊謚禮成又遣官員前往恐外藩不無迎送供應之煩此次不必命使爾部照頒示各省之例一體行文朝鮮將朕此旨傳諭該國王知

之○調江南京口左翼副都統蘭照爲福建福州右翼副都統陞福建福州協領朱廷桂爲江南京口左翼副都統○調陝西寧夏總兵官李繩武來京陞福建福州將軍標下副將蕭生岱爲陝西寧夏總兵官以雲南普洱總兵官邱名揚署四川松潘總兵官○署直隸總督劉於義疏報永平等府開墾雍正九年分田地四百四十八頃有奇下部知之○丙戌諭大學士等穆壘駐兵一事最關緊要

若大將軍岳鍾琪定議舉行可於綠旗兵丁內揀選二萬名遣往其魯谷慶等處應添兵若干亦酌量派出西路蒙古兵丁較少應酌議添撥以資行間之用前京城派往之驍勇兵一百名巴爾虎兵一百名額駙阿寶屬下兵丁五百名俱著派去軍營所有歸化城之土默特兵丁內挑選五百名鄂爾多斯兵丁內挑選三百名一併帶往再北路副都統達什帶去察哈爾兵一千名亦著往西路原任總管班第給與副都統職銜令其與達什一同管領達什班第二人各賞銀一千兩其察哈爾兵弁著順承親王酌量每人賞給銀兩俾其行裝寬裕給與馬匹於二月杪三月初由阿濟一路前去至阿寶之兵前曾降旨令於今春撤回本遊牧處今既留在軍營著大將軍岳鍾琪量加恩賞可即傳諭兩路大將軍知之○又諭侍郎顧魯軍前効力有年著授爲內大臣在西路叅贊上行走賞銀一千

兩。又諭綏遠將軍馬爾賽至軍營時著副都統阿岱前赴順承親王處在叅贊上行走。江南京口右翼副都統張天植休致調浙江杭州右翼漢軍副都統陳世璠爲江南京口右翼副都統陞杭州織造隆昇爲浙江杭州右翼漢軍副都統。丁亥諭理藩院厄魯特郡王額駙阿寶之子公衮布在西路軍前甚屬効力著加恩封爲固山貝子。裁雲南賓川州賓居巡檢缺添設景東府猛統巡檢一員從陞任雲貴廣西總督鄂爾泰請也。戊子諭內閣廣東總督郝玉麟病痊著仍回原任辦事。陞湖廣永順副將楊凱爲湖廣鎮算總兵官。改江西撫標中軍遊擊缺爲叅將武寧鉛山瑞州撫州廣昌鄱湖興國文英永鎮橫岡羊角永豐樟樹南康南湖等營及南昌贛州城守營守備各缺俱爲都司僉書從署兩江總督尹繼善請也。

大清世宗敬天昌運建中表正文武英明寬仁信毅大孝至誠憲皇帝實錄卷之一百十四

大清世宗敬天昌運建中表正文武英明寬仁
信毅大孝至誠憲皇帝實錄卷之一百十五

監修總纂官光祿大夫經筵講官太僕寺卿翰林院侍讀學士臣等謹將乾隆十五年正月十五日奉

總裁官光祿大夫經筵講官太僕寺卿翰林院侍讀學士臣等謹將乾隆十五年正月十五日奉

旨三等伯加十三級張廷玉光祿大夫經筵講官太僕寺卿翰林院侍讀學士臣等謹將乾隆十五年正月十五日奉

旨三等伯加十三級張廷玉光祿大夫經筵講官太僕寺卿翰林院侍讀學士臣等謹將乾隆十五年正月十五日奉

旨三等伯加十三級張廷玉光祿大夫經筵講官太僕寺卿翰林院侍讀學士臣等謹將乾隆十五年正月十五日奉

較修

雍正十年壬子二月己丑朔諭大學士等據

臣等謹將乾隆十五年正月十五日奉

奉差原任巡撫布蘭泰奏稱翁機修城地方

並無樹木土少沙多不能修城等語翁機係

通軍營大路適中之地其附近地方或有可

以修城之處即離驛路稍遠但可掘井取土

即可修城著交與驛站官員踏勘奏報○添

設廣東香山縣黃梁都巡檢一員從廣東總

督郝玉麟請也○庚寅諭內閣我朝撫有方

夏

列聖相承惟以愛養黎元為本

聖祖仁皇帝臨御六十餘年恩施累洽於九州
蠲賑動逾乎千萬深仁厚澤決髓淪肌朕登
大寶仰體

皇考仁愛之

聖心勤恤閭閻疾苦之民隱宵旰孜孜凡可以
厚民生布膏澤者至周至渥歷年以來蠲免
賑恤之條疊沛頻施海內亦既共知而共見
矣惟是任土作貢者治世之常經勸善懲惡
者馭民之大法禹貢以三壤成賦周官以九

臣等謹將乾隆十五年正月十五日奉

式經邦國家經費皆取給於正供聖人恤民
之心無窮而取民有制亦不能頻施逾格之
恩以紂國用也至於遊民情農王政所禁姦
胥墨吏國法不容使蠲租免賦而姦黠頑惰
之屬皆得濫沐恩膏良善急公者轉未能均
需惠澤又豈為政之道哉朕以為蠲除歷年
之逋賦而使頑戶偏蒙其澤不若減免新歲
之額徵而使眾民普受其惠數年來曉諭中
外者屢矣是以清查帶徵錢糧如直隸河南

山東山西浙江等省民間完納者最多朕皆特沛殊恩於該省豐稔之年將額徵正賦蠲免四十萬兩無非欲將帶徵完納之數仍散於良善之氓使比戶均被恩施竝未收之府庫此亦天下所共知共見者江南蘇松等處財賦甲於天下而歷年積欠亦較他省爲最多朕既豁免康熙五十年以前之未完者其五十一年以後應徵之項復寬限十年十五年帶徵以紓民力又思此等逋賦實在民欠者固多而官吏侵蝕者正復不少特遣大臣官員等會同撫藩及地方有司逐一徹底清查分晰官侵吏蝕民欠三項以除混朦之弊又恐承命之員以徵納清釐致滋紛擾悉將帶徵各項停其輸納嚴諭各員實力奉行務使分晰清明毫無疑竇今據侍郎彭維新巡撫尹繼善等奏報清查告竣自康熙五十一年起至雍正四年通計各屬積欠共一千一十一萬六千三百兩零其中侵蝕包攬者共

四百七十二萬六千三百兩零實在民欠者共五百三十九萬零俱核對明白無有混淆朕因江蘇逋賦積弊叢生籌畫多年而爲此清查之舉所以經國計清吏治實欲厚民生而除民累也苟有益於羣黎百姓朕即樂沛浩蕩之恩况朕敬承

皇考寬賦恤民之鴻慈於蘇松額徵浮糧豁免四十五萬兩積歲計之其數何啻幾千百萬豈於區區之積逋有所靳惜哉但念官役之侵蝕姦徒之包攬蠹國害民固爲法所不容而民欠纍纍亦皆抗玩疲頑之習日積月累以至於斯也今欲概行豁免不惟墨吏姦胥罔知懲戒且積久欠糧之頑戶無不需恩被澤自以爲得計而急公之善良不與焉洵非阜民善俗之道也則與其蠲除歷年之逋賦孰若免新歲之額徵爲大有益於斯民乎再四斟酌欲將侵蝕包攬之項分作十年帶徵實在民欠之項更加寬緩分作二十年帶徵

嗣後從壬子年爲始本年帶徵之項完納若干朕即照所完之數蠲免次年額徵之糧若干若官吏百姓等果知悔過急公於每年帶徵額數外多完若干朕即將次年錢糧照多完之數豁免如此則朕之清釐積欠竝無絲毫入官實皆沛爲萬民普被之澤而貪墨姦蠹之徒無所徼倖抗玩疲頑之習知所儆惕庶幾吏治肅清而民風淳厚共成比戶可封之俗矣著該督撫督率地方官實心奉行其官吏侵蝕之項務於本人名下著追毋得株連以滋擾累其民欠之項俱按各戶花名完納毋得波及兄弟親戚致令蠹役藉端苛索儻有奉行不善生事擾民者該督撫即行題參嚴加議處至於侵蝕錢糧之官吏皆係應加重罪之人第以歷年既久人數繁多不忍概行執法施恩法外寬爲分年帶徵若廢員中有能悔過自新不拘年限先行完納者應分別准其開復以示獎勵其依限完納者寬

免其罪胥吏中有先期及依限完納者亦酌量加恩寬免其罪○以署鑲黃旗漢軍都統柏之蕃爲廣東廣州將軍鑲藍旗漢軍副都統范時繹署鑲黃旗漢軍都統○吏部議覆廣西巡撫金鉷疏言歸順土知州岑佐祚緣事革職查無應襲之人請改土爲流設知州一員吏目一員駐劄州城舊設州同一員移駐舊州地方把總一員移駐龍邦村其頻崗屯隘上勾榮勞四邦各隘酌設百隊土兵以資防守均應如所請從之○改廣東撫標中軍遊擊缺爲參將從廣東巡撫鄂彌達請也○辛卯諭內閣我朝從前文武大臣持躬正直奉職公忠樹績建勲完名全節者朕已降旨於京師賢良祠永遠展祀以彰令範因思外任大臣鎮撫封疆宣猷布化忠勇効命威愛宜民其政績卓然可紀者若於身故之後建立賢良祠俾得永膺祀典既足慰兵民懿好之公亦足爲後來居官者之勸如近日之

將軍蔡良提督張起雲總兵蘇大有魏蕭國皆素有賢聲勤勞王事而歿於官者允宜在賢良之列著直省各於省會之地建立祠宇其與祀之人即從近年爲始向後凡有應請入祠者該地方督撫於一人各具一本請旨不必彙奏○又諭前朕降諭旨令漕標及江南河東總河標兵各添設一千名照馬四步六之例召募充補今浙江總督李衛奏稱南方畜養馬匹甚難此時購買亦甚不易若仍

照馬二步八戰守各半之例可以少畜馬匹而於營制亦合著即傳諭總漕總河及河東總河俱照此辦理○又諭推河駐防之二千蒙古兵丁著侯馬蘭泰管理公博爾屯著往扎克拜達里克在馬爾賽參贊處行走○調直隸河道總督沈廷正來京以刑部左侍郎王朝恩爲直隸河道總督○大學士等遵旨議奏白格爾地方在察罕叟爾西南扎克拜達里克正西賊人若由阿爾泰阿爾木克圖

布拉罕巴爾魯克畢濟阿濟等路前往額濟內等處俱由此路經過實屬扼要請於此處駐兵一萬可以阻截北路軍營西南一路之賊人且與察罕叟爾扎克拜達里克相離不過三四百里可資應援又係古爾班賽堪之總口若駐兵於白格爾已據險勢應將原派古爾班賽堪之五千兵令建勳將軍達爾濟移往白格爾駐防再將現今扎克拜達里克家選兵二千名綠旗兵五百名令左副都御

史阿成阿帶往並行文大將軍順承親王於扎克拜達里克及察罕叟爾軍營之綠旗兵內均派二千五百名以足一萬之額調至白格爾地方令達爾濟總管從之○又議覆奉天將軍那蘇圖遵旨查奏山海關外中後所舊城西邊地方查出多餘之地五萬七千晌有餘此處可以造城駐兵四千名於盛京所屬滿洲漢軍餘丁內每旗挑滿洲兵三百名漢軍兵二百名居住照例給與錢糧地畝等

項添設官員管理應如所請將盛京餘丁內
挑選四千名添設駐防但此等餘丁現在十
六城居住應令仍在各舊住處當差操演不
必另行築城設官從之○壬辰以額外內閣
學士署刑部右侍郎塔林爲吏部右侍郎仍
兼理刑部事調工部左侍郎孫嘉淦爲刑部
左侍郎辦理吏部侍郎事仍兼順天府府尹
以吏部右侍郎任蘭枝辦理刑部侍郎事擢
大理寺少卿陳樹萱爲工部左侍郎○辦理
哈密事務員外郎永恒等奏言正月二十二
日準噶爾賊兵突來侵犯哈密城垣臣等在
城上觀望週城四五里覺賊兵勢衆不便輕
敵貝子額敏於城外要地揀選強壯回兵埋
伏擒獲賊人蒙克據供領兵賊人係色布騰
策零那木扎爾等由烏魯木齊前來知哈密
等處牲畜甚多特遣兵六千來攻哈密等語
臣等晝夜守城相機勦殺將所擒賊人交與
貝子額敏看守其所供情由理合繕奏奏入

報聞○癸巳諭大學士等侍讀學士阿蘭泰
與巴爾米忒前往科爾沁地方賞賜兵丁事
完著俱往軍營協同博第辦事○戶部議覆
雲貴廣西總督今陞大學士鄂爾泰疏言黔
省遵義府屬之正安州現在州治地僻人稀
並無城郭其土坪舊治地勢寬濶編民亦衆
請將正安州治移駐土坪又綏陽縣旺草里
離縣寫遠接壤土坪請將旺草里改歸正安
州管轄俱應如所請從之○甲午諭大學士
等費雅思哈伍什巴著往推河地方與侯馬
蘭泰一同領兵駐劄其伍什巴所管兵丁著
護軍叅領委三代管副都統塔爾馬善著同
阿成阿前往將軍達爾濟軍營在叅贊上行
走○又諭察哈爾總管副總管之缺因本地
無應補之人是以於京城蒙古旗分官員內
揀選補授伊等俱係由披甲護軍陞用之員
口外遊牧地方並無產業艱於謀生未免向
屬下人等混行勒索致被訐告爲稽查官員

奏奏若竟照貪婪之律治罪殊屬可憫嗣後於京城揀選補授察哈爾總管副總管辦事官員作何施恩賞給之處著酌議具奏尋議嗣後察哈爾總管請賞給帳房四架馬十匹牛十頭羊八十隻副總管帳房三架馬八匹牛八頭羊六十隻辦事官員帳房二架馬六匹牛六頭羊四十隻賞給之後伊等再有勒索苛累等弊查出將產業追還從重治罪從之○以兵部尚書鄂爾奇內閣學士班第爲繙譯鄉試正考官內閣學士索柱德齡爲副考官○乙未以漕運總督性桂署刑部尚書禮部尚書魏廷珍爲漕運總督○以故蘇尼特扎薩克多羅郡王垂際功蘇隆子旺臣襲爵○丙申諭內閣冬春以來京師未得雨雪朕與諸大臣等戒懼修省虔誠祈禱以冀仰格天心聞畿輔地方及河南山東雨雪亦少山西陝西二省雖有得雪之處亦未周徧朕心憂

慮深恐二麥歉收小民難於餬口已切諭該督撫等多方籌畫爲思患預防之計從來天人感召之理捷如影響所賴該督撫等以恤民之心爲格天之本果能使民氣舒暢未有不感召天和者至於清理刑獄亦祈求雨澤之要務除在京已命刑部法司清查案件速行歸結以免拖累外其畿輔地方及河東山陝等省郡縣繁多有司賢否不一其中或有聽斷刻覈濫及無辜者或有淹滯羈留塵案莫結者或有牽連待質致悞恒業者該督撫大吏等當悉心體察嚴飭屬員速爲清理應釋放者釋放應取保者取保務期平允矜憫俾閭閻各安生業其他政令稍有不便於民者急思力爲改圖總在該督撫等體朕若保赤子之心各切痼瘼乃身之念至誠惻怛勤求民隱殫竭實心普行實政庶幾上天昭格早降甘霖勉之勉之轉理藩院古

侍郎衆佛保爲左侍郎實授納延泰爲理藩院右侍郎○以陝西肅州總兵官張朝良署山西太原總兵官○丁酉遣大學士尹泰祭先師孔子○賜喀爾喀多羅貝勒冊卜登信勇名號○寧遠大將軍岳鍾琪奏言據辦理哈密事務員外郎永恒查斯海副將焦景琮貝子額敏呈稱正月二十一日鴨子泉卡倫見有準噶爾百餘賊人往來二十二日賊兵逼近哈密城池登城瞭望約有三千餘人等語臣查哈密地方有副將焦景琮帶領官兵一千五百名駐防又叅將韓良弼帶領山西綠旗兵八百名駐劄城內足資固守但賊人既已侵逼哈密自應遣兵截殺臣隨遣總兵官曹勦等帶領綠旗兵五千名星夜由回落免大坂五堡地方截其後尾直至哈密應援又遣總兵官張豹帶官兵二千名由濶舍圖嶺前赴哈密接應又據永恒等報稱二十三日城池左近賊兵甚少其大隊俱往南湖黃

蘆岡向東北沿山一帶前赴塔爾那沁等語臣查塔爾那沁地方有提督顏清如帶兵四千名駐劄城內可以固守又令總兵曹勦等於黃蘆岡一帶相度地勢據其要隘相機掩殺臣更慮賊人或由毛垓圖爾庫爾等路竄入北山逃遁歸巢查北山正西及西北兩路有巴漢恩度爾插漢專津二處俱係賊人必由之路臣更派副將軍石雲倬帶領原任兵部尚書馬會伯率綠旗兵三千二百名前赴巴漢恩度爾一路埋伏署鎮安將軍卓鼐帶領前鋒統領宗室哈爾吉副都統僧保張正文等率驍勇官兵暨八旗滿兵共三千八百名前赴插漢專津一路埋伏副將軍常賚帶領都統良敦總兵官張存孝等率滿漢兵三千二百名前赴無克克嶺地方截殺臣等軍營兵馬現在準備接應理合繕奏奏入報聞○戊戌祭

大社

大稷遣皇五子弘晝行禮○大學士張廷玉等
奏言恭遇纂修

聖祖仁皇帝實錄臣等承敕監修得窺金匱石
室之藏恭紀

聖德仁功之盛榮幸已極乃以瑤函告竣特頒
議敘恩綸稽考舊章應加官保伏思臣等游
沐隆恩已膺極品何敢以載筆微勞更邀議
敘況追思

聖祖仁皇帝數十年教育之恩即捐糜頂踵何
足仰酬萬一伏祈俯鑒微忱免加議敘視從
優獎賞更爲光榮矣得旨

皇考聖祖仁皇帝實錄告成監修總裁官等積
多年之心力敬謹纂修勤勞懋著允宜加恩
議敘以示褒獎乃張廷玉等具奏懇辭情詞
誠切朕若允其所請於心實有未慊若不允
所請又似不察其懇摯之情將原摺發出著
諸王九卿會議具奏尋議大學士張廷玉等
仰沐國恩至爲深重奏辭議敘實屬悃忱伏

乞俯賜俞允從之○大學士鄂爾泰奏言古
州丹江等處開闢苗疆一皆凜遵

聖訓宣布仁威將士用命非臣之能況數年以
來疊受殊恩異數臣自問百無一酬伏乞
皇上俯鑒愚忱准免議敘得旨覽奏情詞懇切
具見誠悃卿忠勇懋著使苗梗向風不但綏
靖苗疆之功績爲人所難能而仔肩重任之
公誠亦大臣中所罕有國家酬庸賞功關係
鉅典非卿可以己意遜讓亦非朕可以私心
增減者仍遵前旨行○己亥

孝康章皇后忌辰遣官祭

孝陵○兵部遵旨議奏陞任雲貴廣西總督鄂
爾泰貴州巡撫張廣泗辦理苗疆勦撫允協
鄂爾泰應給與一等阿達哈哈番查鄂爾泰
現係三等阿思哈尼哈番應併爲一等精奇
尼哈番張廣泗應給與拜他剌布勒哈番得
旨大學士鄂爾泰節制雲貴廣西三省歷有
歲年於所屬苗疆無不悉心經理使蠻夷等

慕義嚮風咸登樂土至於古州等處生苗自昔未歸王化鄂爾泰運籌調度勦撫兼施俾苗人懷德畏威抒誠內嚮疆圉開拓邊境輯寧數年以來之功績實非尋常平定苗疆剪除寇賊者可比鄂爾泰著授一等伯爵世襲罔替用獎殊勲餘依議○寧遠大將軍岳鍾琪奏言據駐劄塔爾沁提督顏清如陸續報稱正月二十三日準噶爾賊人占據天生圈山口遣叅將米彪帶兵六百名前赴三道大坂防範馬廠隨即督兵守城自辰至酉賊人始退西北山下二十四日米彪領兵行至白楊溝一帶與賊對敵賊人退敗隨遣副將陳經綸帶領官兵一千五百名出城禦敵賊人由西南原路而逃陳經綸領兵追逐沿途搜勦等語臣查賊人率衆長驅深入塔爾沁一帶原圖擄掠牲畜今軍營所留馬匹騾頭俱在山南四道溝畢留大坂內牧放官兵防護嚴密牲畜並無傷損奏入報聞○庚子

諭內閣國家典禮首重祭祀每當齋戒日期必檢束身心竭誠致敬不稍放逸始可以嚴昭事而格神明朕遇齋戒之日至誠至敬不但殿庭供設銅人即坐卧之次亦書齋戒牌存心警惕須臾弗忘至內外大小官員雖設齋牌於官署但恐言動起居之際稍有褻慢即非致齋嚴肅之義查明代祀典凡陪祀及執事之人有懸祀牌之例今酌定齋牌之式令陪祀人員佩著心胸之間使觸目警心恪恭罔懈并得彼此觀瞻益加省惕其於明禋大典愈昭虔潔著傳諭各部院及八旗並直省文武官員一體遵行○寧遠大將軍岳鍾琪奏言臣令總兵官曹勦統領副將紀成斌等率兵應援哈密於正月二十七日將至二堡地方正遇賊人大隊約有五千餘人即奮勇進擊交戰一晝夜二十八日賊衆登山抵拒曹勦等復四面奮攻爭先力戰從卯至午賊衆大潰殺傷無數奪其馬匹牛羊并救出

兵丁及漢回商民數百名所餘賊兵由沙磧敗遁西逃曹勦領兵搜捕直抵二堡下營二十九日曹勦自二堡行至柳樹泉總兵官張豹協同哈密副將焦景璫塔爾沁副將陳經綸等與曹勦合兵一處乘夜追勦臣思賊人背腹受敵縱有殘寇兔脫勢必逃至無克克嶺臣隨知會副將軍石雲倬常賚署鎮安將軍卓鼐等派遣滿漢兵丁六千名於無克克嶺南山口之梯子泉一帶截殺仍著總兵官曹勦將所領官兵在沙磧泉駐劄以張聲勢所有大捷緣由理合繕摺奏報得旨大將軍岳鍾琪奏報各路撥派官兵進勦堵截及總兵曹勦等擊敗賊人之信調度有方運籌亦備官兵奮勇効力擊敗賊衆朕心嘉慰惟是曹勦領兵一路正當賊鋒其所帶兵丁稍覺單弱而勇健將弁亦覺尚少再賊人若由無克克嶺逃遁則有常賚石雲倬等堵邀擊殺假若敗殘餘賊由沙磧而遁必由齊

克塔木經過吐魯番之官兵早能得信與回民併力邀擊豈不更善又穆壘駐兵一事朕已降旨與岳鍾琪令其計議舉行則吐魯番回民遷移之事可以緩商至穆壘築城若事在必行以速爲善今賊夷受創而去乘機動工更覺順便竝令岳鍾琪速議奏聞 癸卯大學士等議覆直隸古北口提督路振揚等查奏直隸山西邊境事宜直隸獨石口參將請改爲副將添設都司一員千總二員把總三員馬營堡把總改爲千總再添撥千總一員龍門路城都司改爲遊擊趙川堡把總改爲守備張家口路屬柴溝堡添設參將一員把總一員其應添兵丁請於宣化鎮兵內抽出四百三十名再招募四百名以敷防守至於山西沿邊各營路將領應行增添新平路助馬路俱添設千總把總各一員將軍會堡添設千總一員馬市水口改原設外委把總爲千總平魯路添設把總三員得勝路添設

把總二員鎮弘堡鎮邊堡弘賜堡鎮羌堡拒門堡保安堡鉄山堡威虎堡迎恩堡焦尾城添設把總各一員其應添兵丁於大同鎮殺虎協朔平城守營內抽撥足額無容另爲招募所有直隸山西一帶邊牆無庸修築其坍塌各口應用木柵鹿柵堵塞均應如所請從之予故廣東潮州總兵官馬紀勲祭葬如例甲辰以世子熙良署鑲紅旗漢軍都統正黃旗蒙古副都統滿丕緣事降調陞正黃旗叅領瞻岱爲本旗蒙古副都統一等待衛衛哈達哈爲鑲藍旗蒙古副都統二等侍衛覺羅七十五爲三姓地方副都統○乙巳諭內閣扎薩克旗分地方各處耕種所收米石存倉原爲伊等地方荒歲之用目今喀喇沁等處米石盡行散賑伊等屬下蒙古倉廩空虛不可不預爲之備著於賑濟米石外再行施恩每石給發價銀一兩交與各該扎薩克等買米存倉收貯俟入倉之日報部部內差

員查驗若將給價買補之米不行入倉及有侵蝕等弊必從重治罪高齊武郡王雅穆聘爾科爾沁貝子烏爾呼滿爾故各遣官致祭○丙午大學士等議奏陳泰世受國恩身爲叅贊傳爾丹統兵進剿之時特授伊兵二千令在科布多河岸駐劄以備敵兵乃陳泰一聞索倫逃兵訛言即畏懦領兵回向扎布韓地方後經傳爾丹屢次催調陳泰惟事推諉又不即赴科布多殊干法紀應照律擬斬秋後處決行文軍營令將陳泰解送來京交刑部監候得旨陳泰之罪斷無可赦著照擬處斬即在軍營監禁至秋審時擬爲情實具奏俟命下之日再行正法○丁未諭內閣朕聞西寧北川口外白塔地方出產石煤係附近漢土番回民人等取販賣以爲生計每畝納稅錢三十文西寧府委員收解充餉約計每年收銀一千九百餘兩近因西陲用兵之際西寧移駐兵弁較前爲多率皆用煤以供

炊爨煤價漸至昂貴若仍照例徵收稅銀恐價值不能平減於兵民均有未便著將應收稅銀寬免該督撫轉飭有司實心稽查儻胥吏人等有照舊私收或借端需索者務令察出治罪諭刑部凡監候待質人犯除強盜案件不應寬釋外如人命等案內有正犯未獲牽連餘犯監候待質已過三年者著取保釋放俟緝獲正犯之日再行質審儻暫行釋放之際有私自逃匿者除保人重懲外定將本犯嚴拏從重治罪著直省一體遵行○江西布政使李蘭緣事降調陞江南安徽按察使王紘爲江西布政使司布政使直隸按察使姜穎新患病解任以光祿寺少卿竇啟璘爲直隸按察使司按察使浙江寧台道孫詔爲安徽按察使司按察使戊申調湖廣彝陵總兵官杜森爲陝西大通總兵官陞山永副將治大雄爲湖廣彝陵總兵官○裁山西吳城青龍二驛驛丞各一員從山西巡撫

覺羅石麟請也○己酉理藩院奏言喀爾喀扎薩克多羅郡王達瑪林多爾濟緣遲誤軍需已革王爵其子例不准襲應否將其弟多爾濟扎爾襲爵恭候欽定得旨多爾濟扎爾著襲封扎薩克多羅郡王○辛亥寧遠大將軍岳鍾琪奏言準噶爾賊人由五堡之南沿沙磧敗遁若尋有水草路必繞至無克克嶺一路西竄臣前派副將軍常賚石雲倬所領之官兵六千餘名俱於正月二十九日午未時齊至無克克嶺臣與副將軍常賚面議官兵一到無克克嶺畧爲歇息即令石雲倬挑帶四五千名先赴梯子泉一路截殺署鎮安將軍卓鼎帶滿兵三千名隨後接應其餘官兵令常賚帶領守截無克克嶺山口三十日午後賊人適在山口二十里屯住石雲倬等如即遣發官兵乘夜潛襲滅此自不待朝食詎料初一一初二等日杳無捷音至初三日始據卓鼎咨稱初一日賊兵業已逃竄初二日

即遣驍勇官兵近搜遠捕賊人從陶賴大坂之西越向納庫山遁歸臣思將軍三員帶兵萬餘乃觀望不前以致賊人驚覺遠颺深爲駭異及副將軍等陸續撤兵回營詢其情節據常賚卓鼐等同稱三十日午後見有賊人屯住山口石雲倬總不發兵直至戌時始派兵一千五百名令總兵官張存孝帶領在山下等候又數次遣人攔阻不許前進石雲倬安寢帳房初一日天明始領兵東行十餘里隨即安營造飯煎茶纔轉西而行張存孝至賊人屯住之處餘火未息報稱賊人竄遁不遠請其速行前進追剿石雲倬又傳令撤兵不許追襲臣以梯子泉一帶實逆賊歸巢之要路又慮無克克嶺之西南尚有塔庫納庫一路亦係賊人歸途務須派兵堵截查有涼州右營外委馬得玉乃熟識塔庫納庫道路之人令其馳赴行營聽候發兵領路不料石雲倬大怒以馬得玉爲多事欲行責治竝不

發兵邀截賊人果由塔庫納庫一路逃歸坐失機會石雲倬乖戾僨事臣實難代爲隱諱不得不據實奏聞得旨辦理軍機大臣嚴察議奏尋議石雲倬應革職交與岳鍾琪同常賚卓鼐等詢問確供解京按律究擬從之○

壬子春分朝

日於東郊遣平郡王福彭行禮○諭大學士等派往白格爾地方之蒙古兵甚少著於鄂爾多斯六旗內再派一千帶領前往仍照前令王查木陽協理台吉策旺多爾濟額默根等會同該扎薩克選派俟整束行裝完備即與王查木陽所領二千兵一同起程著王查木陽等於六旗協理台吉大員內揀選人去得能管轄兵丁者二員再酌派官員帶領前往王查木陽若已起程著六旗扎薩克貝勒貝子公台吉等會同選派務將器械馬匹辦理整齊令其起程其賞賜兵丁銀兩另派員隨後送往又諭據大將軍岳鍾琪奏報賊人

從納庫一路遁逃併撤兵回營各情由此次賊夷狂肆昏亂深入重地投身羅網乃自速滅亡也我師既以逸待勞且我衆彼寡但能申明軍紀要截擊殺竝不必奇謀異算斷不致兔脫狼奔今乃坐失機會不但不能屠戮且使賊人由坦途而遁此實朕與廷臣意料所不及者其領兵之石雲倬已降旨治罪至大將軍岳鍾琪素諳軍旅本非庸材緣懷游移之見致乖戰守之宜前車之鑒非止一端嗣後當深悟前非痛自省惕先事綢繆臨事堅定壹號令以振軍聲示威信以齊衆志庶可以奏膚功而收後效朕猶深望之○江西南昌總兵官陳王章緣事革職陞陝西洮岷副將王廷瑞爲江西南昌總兵官仍領兵駐劄吐魯番以陳王章仍署南昌總兵官○癸丑諭大學士等內閣學士索柱一家著出包衣佐領入上三旗其入於何旗何佐領之處著伊自定○又諭前議三四月間穆壘築城

駐兵一事已降旨大將軍岳鍾琪令其酌量辦理今再四思維以數萬官兵移駐穆壘春間馬駝既恐驢力不足且時日稍覺忙迫未必事事皆能就緒不若遲至六月夏秋之交將諸事預行慎密辦妥大兵迅發一舉可成將來預備兵丁之時須出其不意速完城工則戰守皆易矣穆壘駐兵之舉既緩則吐魯番之兵糧當急爲籌畫吐魯番既有官兵三千名若再加三千名則軍勢益壯不但可以保護回民即將來禾稼在野之時賊人前來踐踏我師合回衆擒剿之亦易爲力此時發兵三千前往就便可以將米糧運送或由沙磧小路零星運往亦可儻催哈密之人運送而令吐魯番之人接應皆照數給與腳價著岳鍾琪悉心妥議辦理又諭西路軍務關係緊要軍營之中協辦大臣甚少福建總督劉世明於西邊情形素所諳悉著馳驛來京面請訓旨前赴軍營先賞藩庫銀一萬兩製

辦行裝福建總督印務著廣東總督郝王麟署理廣東總督印務著廣東巡撫鄂彌達署理廣東巡撫印務著廣東布政使楊永斌署理廣東布政使印務著江南蘇松常鎮道甘汝來署理郝王麟未到閩之前福建總督印務著阿爾賽暫行署理仍兼管提督事務○又諭西路副將軍石雲倬已革職議罪朕欲於各省督撫提鎮中簡用一人前往軍前協辦軍務貴州巡撫張廣泗才幹優長實心任事數年以來苗地用兵該撫親歷戎行深諳軍務著即馳驛來京面請訓旨前往軍營爲副將軍賞藩庫銀一萬兩製辦行裝貴州巡撫印務著廣西布政使元展成前往署理廣西布政使印務著廣西按察使張鉞署理廣西按察使印務著廣西慶遠府知府徐嘉賓署理○又諭從前因歸化城留兵甚少諭令副都統圖爾賽等帶領土默特一千兵前往照看臺站俟馬爾賽所領兵丁至扎克拜達

里克時將土默特兵丁撤回貝勒僧滾扎布等領往之喀喇沁一千兵令駐扎臺站今噶斯一路土默特兵丁俱經撤回歸化城歸化城既已添兵圖爾賽等領去之土默特一千兵著暫行停止撤回仍令看守臺站喀喇沁一千兵丁著往扎克拜達里克地方屯扎候旨○甲寅

孝昭仁皇后忌辰遣官祭

景陵 諭內閣雲南鶴麗總兵南天祥朕另有簡用之處著即起程赴江南江寧府候旨其雲南鶴麗總兵員缺著廣西梧州副將楊國華補授○又諭綏遠將軍馬爾賽軍營著將護軍統領職銜吉當阿委署前鋒統領建勳將軍達爾濟軍營著將副都統塔爾馬善委署前鋒統領 移江南淮徐道駐宿遷縣從江南河道總督嵇曾筠請也 乙卯諭大學士等賊人侵犯哈密塔爾那沁等處所派官兵征勦堵截其中多有步行者雖因將領無

能觀望退縮致令賊衆逃遁而兵丁之奮力前驅勤勞實堪軫念著大將軍將大營塔爾那沁哈密等處此次出征之兵丁查明分別賞賚其陣亡受傷之兵丁尤可憐憫著查明照例賞卹○又諭哈密被賊侵擾回民等併力抵禦甚屬可嘉聞其在外牧放之牲畜一時不及收回者被賊人盜去雖據報賊遁之後仍將牲畜奪回但恐遺失倒斃者已多朕心深爲軫念其遺失牲畜之頭目回民等著賞銀一萬兩守城禦賊者著賞銀五千兩按名分給其擒獲賊人者優加賞賚務令均沾恩澤以工部尚書馬喇兼管正紅旗滿洲都統事務免直隸邢臺等七縣雍正九年分電災額賦有差○丙辰遣官祭

歷代帝王○遣官祭

關聖帝君○靖邊大將軍順承親王錫保奏言臣等欽奉

皇上諭旨以現在軍前大臣甚少恐不敷調遣

命在軍營夸蘭大官員內如有可勝副都統護軍統領之任者令臣等密封題奏今有新調船廠佐領委署前鋒噶賴大阿思哈同額駙策凌効力行間黑龍江協領委署前鋒噶賴大布爾沙科布多進兵時奮勇奪占山嶺甚屬効力率領新調右衛兵丁參贊內大臣伯欽拜實心辦事善於約束馬爾賽處副都統塔爾馬善從前在阿爾泰巴爾庫爾兩處軍營俱屬効力請賞給阿思哈布爾沙副都統職銜令欽拜塔爾馬善前來察罕叟爾軍營得旨馬爾賽辦事甚不愜朕意扎克拜達里克軍營全賴欽拜一人白格爾地方駐劄大員內亦無歷練之人故授塔爾馬善爲達爾濟軍營參贊并委署前鋒統領著將欽拜塔爾馬善暫留扎克拜達里克白格爾地方阿思哈布爾沙著照順承親王所請俱授爲副都統職銜丁巳旌表烈婦江南宿松縣方才妻田氏夫亡逼嫁全節自刎江西泰和

縣蔣日萃妻劉氏孀居拒賊赴水完貞各給銀建坊入祠致祭如例

大清世宗敬天昌運建中表正文武英明寬仁信毅大孝至誠憲皇帝實錄卷之一百十五

大清世宗敬天昌運建中表正文武英明寬仁信毅大孝至誠憲皇帝實錄卷之一百十六

款修

點修總裁官光祿大夫經筵講官太僕寺卿和碩大將軍吏部尚書總理事務處副都統等十四員日即開奏
總裁官光祿大夫經筵講官太僕寺卿和碩大將軍吏部尚書總理事務處副都統等十四員
事主事伯四十三級日張建至光祿大夫經筵講官起居注太僕寺卿和碩大將軍吏部尚書總理事務處副都統等十四員
翰林院掌院學士日福敏光祿大夫經筵講官太子太僕寺卿和碩大將軍吏部尚書總理事務處副都統等十四員
經筵講官太僕寺卿和碩大將軍吏部尚書總理事務處副都統等十四員

雍正十年壬子三月戊午朔諭大學士等坐

卡兵丁專司瞭望哨探之事較之在營駐劄兵丁更為辛苦且汛地離營既遠市買鹽菜未免多費著傳諭大將軍岳鍾琪除三大卡倫外其他各處坐卡兵丁每月加賞銀一兩羊價七錢俾伊等食用充足以示朕格外加恩之至意嗣後儻再有疎忽貽誤之事定行從重治罪其如何挑選輪班之處聽大將軍酌量辦理○以翰林院編修汪由敦充日講起居注官○己未旌表正黃旗漢軍烈婦王

守貴妻李氏拒姦不污被毆殞命給銀建坊入祠致祭如例 庚申諭兵部向因落第武舉其中不無才力可用之人是以令本省督撫提鎮秉公考驗將年力精壯弓馬可觀者留營給與額外馬糧一分令其差操學習俾得熟練營伍以備將來將弁之用原令該管大臣慎重遴選使人材有所造就也今聞外省庸劣無能之人頗有濫充者著該部通行各省將技勇可用之武舉令其充補經制馬糧其不願留營及騎射生疎材力不及者令其回籍自行學習不得留營虛佔額糧之數儻該管大員有徇情草率仍令庸劣濫充者將來考驗查出定行從重議處 實授王郡爲福建陸路提督 大學士等遵旨議奏辦理軍機處密行事件所需鈐封印信謹擬用辦理軍機印信字樣移咨禮部鑄造貯辦理軍機處派員管理並行知各省及西北兩路軍營從之○裁雲南磨者井烏得井鹽大使

二員添設白石谷井復隆井鹽大使二員改琅鹽井吏目缺爲大使從陞任雲貴廣西總督鄂爾泰請也 旌表廣西鬱林州烈婦文秉世妻梁氏遇賊拒姦被刃殞命給銀建坊入祠致祭如例 癸亥 上親耕藉田詣先農壇致祭畢更服至耕所仍行四推禮畢上御觀耕臺命顯親王衍潢莊親王允祿裕親王廣祿行五推禮吏部尚書勵廷儀戶部右侍郎韓光基禮部尚書三泰兵部尚書金以坦刑部左侍郎武格工部尚書張大有都察院左都御史福敏通政使司左通政福柱署大理寺卿索柱行九推禮各以次耕如儀上御齋宮順天府官員率耆老農夫行禮畢至耕藉所農夫終畝王以下各官行慶賀禮賜茶停止筵宴○以鑲黃旗滿洲副都統宗室色布肯署鑲白旗護軍統領○甲子以西路副將軍刑部右侍郎常賚爲內大臣仍留軍

營原任總督倉場侍郎托時爲刑部右侍郎
○敕封浙江海寧縣海神爲寧民顯佑浙海
之神○乙丑諭內閣直省各府州縣設立壇
墀致祭

社稷及風雲雷雨山川城隍之神每歲春秋展
祀以崇報享典至重也從前初建之時有司
或視爲具文規制未必周備及歷年旣久漸
有傾圯之處又未必及時修葺是以僻遠之
郡縣規模簡畧禮儀草率者往往有之甚非
肅將禋祀之本意也著禮部查照定例行文
各該督撫轉飭府州縣敬謹如式修理以重
祀典仍令造冊報部每遇該管官員陞遷事
故俱照先農壇忠孝節義祠例入交盤項內
查明接受則有司自顧考成經理益加虔恪
矣○添設山西平定州甘桃舖驛丞一員從
山西巡撫覺羅石麟請也○丙寅改陝西慶
陽靖遠西鳳潼關波羅神木定邊漢中永昌
中衛花馬池河州洮岷永固等協中軍守備

缺及沙州協左右營鳳翔城守營邠州營藍
屋營富平營金鎖關營七里關營綏德營廊
州營文縣營碾伯營嚮水堡懷遠堡常樂堡
雙山堡建安堡高家堡鎮羌堡安邊堡鎮靖
堡新城堡張義堡蔡旗堡安遠堡三眼井堡
橫城堡威遠營清水堡梨園堡馬營墩堡硤
口堡孤山堡大霸堡保安堡歸德堡黃墩堡
踏實堡赤金營柳溝營岔口營岷州營舊洮
堡西固堡南川營守備各缺俱爲都司僉書
從署陝西總督查郎阿請也○丁卯清明節
遣官祭

永陵

福陵

昭陵

昭西陵

孝陵

孝東陵

景陵

孝敬皇后○諭辦理軍機大臣等聞打牲烏喇丁壯繁衍至二三千名伊等俱係打牲爲業能習勞瘁著船廠將軍常德會同該總管等於打牲烏喇餘丁內簡拔年力壯健者千人爲兵令該管官親加訓練即屬船廠將軍統轄其作何訓練及補放官職等處著常德妥議辦理○諭內閣湖南鎮筵地接苗疆原轄四營額設兵丁三千名以資彈壓嗣因議分四路塘汛直抵六里新營該撫以六里新經招撫地方緊要奏請添設兵丁四百名曾經部議准行今聞六里開闢之地所設永綏協營幅幘五百餘里以形勢而論尚在鎮筵之外止安設兵丁一千六百名至鎮筵所管苗疆界址亦僅五百餘里現有額兵三千名較之永綏兵制數已加倍且永順保靖等處已建設營汛與鎮筵益成犄角是鎮筵額設之兵儘足以供守衛而資調遣新增兵丁甚屬無益著該督撫提鎮等確查地方形勢有

要緊營汛應添兵丁之處即將鎮筵新設之四百名酌量派撥以資防禦不必固執前見務於地方營伍實有裨益以爲經制久遠之計○戊辰諭辦理軍機大臣等目今三姓地方添設兵丁尚書海壽現在船廠著前往三姓地方俟副都統七十五到日會同辦理挑補兵丁修造城垣房屋及教導兵丁等事俟料理完畢即行來京調寧古塔副都統哲庫訥爲白都納副都統仍留軍營以一等侍衛伊特倫仍署白都納副都統禮部議覆朝鮮國王李昉咨稱明史內朝鮮列傳訛載先世李侗篡奪一事雍正四年奏請昭雪已蒙聖恩令史臣改正伏祈早爲頒發查現今明史尚未告竣該國王所請伊國列傳應俟明史告成再行刊發得旨部議甚是但該國王急欲表伊先世之誣屢次陳請情詞懇切著照所請將朝鮮國列傳先行抄錄頒示以慰該

國王懇求昭雪之心 寧遠大將軍岳鍾琪奏言據馬廠遊擊龍有印解送擒獲準噶爾賊人已顏等供稱領兵來犯哈密係台吉色布騰及小策零敦多卜之子策零那木扎爾等噶爾丹策零去年九月內調兵六千名在烏魯木齊地方會齊至奇台附近處過冬今年正月十二日由奇台起程於二十日夜間過無克克嶺前赴哈密其侵犯阿爾泰之兵去年十一月間小策零敦多卜回至哈喇沙爾大策零敦多卜回至他爾巴哈台留小策零敦多卜之子曼濟在撥東齊地方過冬今因哈薩克兵擄掠準噶爾七百餘戶噶爾丹策零已將曼濟撤回欲往哈薩克地方發兵等語理合錄供繕奏報聞 庚午

上幸圓明園 改江南安慶撫標中軍遊擊蘇州城守營遊擊缺俱為叅將江寧城守協標左營遊擊壽春協安慶協河標督標漕標京口將軍標等中軍守備缺及廬州亳州溧陽

平望泰興掘港楊舍孟河黃浦柘林青村南匯東海蕭營小關子窰子港等營守備各缺俱為都司僉書從署兩江總督尹繼善請也 辛未旌表江南烈婦常熟縣章揆蒼妻馬氏夫亡逼嫁投河全節江都縣陳國材妻周氏矢志殉夫吞金殞命烈女儀徵縣朱世蓮聘妻方氏未婚夫殞絕粒完貞浙江烈婦富陽縣楊友松妻朱氏同媳楊愈奇妻宋氏俱拒賊不污赴水完節永康縣王姓妻陶氏奪嫁不從投繯殞命各給銀建坊入祠致祭如例 壬申諭辦理軍機大臣等據管轄烏朱穆秦等十旗扎薩克兵丁之阿霸垓郡王扎木巴爾扎布等奏請自京派遣大臣同伊等管轄兵丁吳禮布著賞與護軍統領職銜已特馬授為侍讀學士前往會同王扎木巴爾扎布等訓練兵丁 豁免福建建軍漳平等四廳縣產廢無徵額賦銀八百二十兩有奇 賞阿霸垓郡王扎木巴爾扎布銀一千兩

貂帽貂皮短褂。朕袍各一。烏朱穆秦鎮國公彭蘇克拉布坦銀五百兩。貂帽朕皮短褂。皮袍各一。○癸酉諭內閣。工部尚書馬喇。從藏回京。朕詢及沿路番子等生計景況。據奏稱番子等仰賴皇恩。俱得各安生理。此內得爾格特之部落番子。向來甚屬恭順安分。自隸內地之後。更加勤謹効力。於一應差使行走無誤。鼎格等亦稱伊等事達賴喇嘛甚屬恭敬等語。得爾格特人衆從前出兵藏內。曾經効力。今復於一應差使竭力行走。甚屬可嘉。理應特沛恩澤。以示鼓勵。得爾格特之爲首土官。著給與宣慰司職銜。再賞緞十疋。銀三千兩。令伊酌量賞屬下辦事勤謹之頭目等。○乙亥上詣恩佑寺行禮。○丁丑以原任副都統滿泰爲正黃旗滿洲副都統。○大學士等奏據寧遠大將軍岳鍾琪奏報賊人敗遁。及臺站牧廠情形諸摺。情詞互異。前後舛謬。岳鍾琪以無

克克嶺爲賊遁歸必由之路。其梯子泉地方恐賊鋌而走險之道。則當派撥兵丁時。即應指定兩處酌遣官兵邀截。而必俟已至無克克嶺始令往梯子泉。并令石雲倬等畧爲歇息。是賊人之得從塔庫納庫潛遁而歸者。雖石雲倬之罪。而岳鍾琪亦難辭咎也。又前奏塔爾那沁各廠看守甚嚴。賊人一無所得。後又奏報失去牲畜。并各廠弁兵亦有損傷。且云截殺賊人。收回羊馬。所得足償所失。覲然不以爲恥。殊非人臣奏對之體。又無克克嶺離軍營僅九十里。賊兵過嶺而軍營茫然不知所設。坐卡兵丁此時何在。且鏡兒泉搜濟察罕哈麻爾復設三大卡倫。專爲探信而設。乃一無聞見。則平日所云傳遞號炮頃刻可至者。尚足恃乎。當草枯馬瘦之時。賊以五六千人入我卡倫。越過軍營直至塔爾那沁。我兵三萬餘衆周圍密布。既任其來。復任其去。賊並不奔沙磧。竟由小路而去。似此玩忽縱賊。奏報不實。深負

聖恩有玷倚任請將岳鍾琪敕部嚴加議處得旨該部嚴察議奏○以故喀喇沁輔國公丹巴長子丹津襲爵○戊寅諭內閣向因武員養廉不敷以致扣剋兵餉是以酌定親丁名糧以爲養贍家口之費又因營伍公用無資定有額兵百名准抽二名之例似此曲加體恤無非施恩於弁員使應有之兵數再無虛冒以收戎行之實用也近聞各省中尚有數處不能全除空糧之弊或於親丁名糧之外仍有家人長隨頂名支領者又有字識匠作之類亦得濫充額數暗佔兵糧者且或遊手之輩賄求濫充而勇力之人轉不得入選每遇調撥差用則委靡退縮不耐勞苦前歲湖廣提標曾以兵丁二百名調補鎮筵四營其中逃避者即已過半又如援剿黔苗時提標兵丁往來鎮筵六里等處跋前疐後行役維艱國家歲費帑金養一兵期獲一兵之用若實存之名數既有空虛而在伍之兵丁又復

怯懦不振則所謂武備修明者安在乎著該管大臣用心稽查勤加訓練務將陋規永革諸弊悉除毋得溺於積習苟且因循負朕委用儻屢經訓飭之後仍有不知悛改者定當加以嚴譴○兵部議覆陞任雲貴廣西總督鄂爾泰疏言黔楚交界之生苗久居化外今銅仁所屬坡東坡西向化歸誠者一百五十一寨均宜設協安營移兵駐劄請於銅仁協添兵八百名大定協添兵五百名遵義協添兵一百八十八名鎮遠營添兵一百名令原設將弁帶領分防松桃水城等處裁去思南營叅將一員留守備一員與所轄之石阡營俱歸鎮遠營遊擊管轄移正大營同知駐劄松桃大定府通判駐劄水城均應如所請從之○旌表江南和州烈婦陶爾盛妻倪氏拒姦不污投繯殞命給銀建坊入祠致祭如例○己卯諭喇達克汗德中納木扎爾朕統御寰區內外視爲一體凡撫恤遠人獎勵恭順

懲治悖逆皆朕分內事也爾德中納木扎爾遣使向辦理藏務大臣等呈稱臣惟以辦理國事尊崇佛教量力行走採取葉爾啟木準噶爾處信息報知貝勒頗羅鼐轉行奏達乞早降恩諭等語朕覽之甚爲嘉悅從前因爾父尼瑪納木扎爾與貝子康濟鼐同心報効朕已沛恩膏今爾亦效法爾父與貝勒頗羅鼐一體効力甚屬勤勞嗣後益加黽勉以紹前徽則永享朕恩於無既矣茲特頒恩賜賞給緞疋等物爾其祇領特諭○封喀喇沁塔布囊厄爾德尼爲輔國公○陞廣西潯州副將田玉爲雲南曲尋總兵官○庚辰諭內閣從前額駙阿寶曾奏請移駐遊牧原令伊今年來京再行定議青海現今無事著阿寶來京伊屬下人等可交付親信之人管約俟青草發生時暫移於鄂爾騰等處駐牧阿寶到京之後將伊遊牧應於何處移駐之處爾等詢問議奏○果親王允禮奏言八旗添設之

副護軍校副驍騎校等每月俱支給錢糧五兩若遇閏月較之護軍校驍騎校六十兩俸銀更多五兩請嗣後副護軍校副驍騎校等每月仍支給錢糧五兩將閏月應領之五兩裁去至護軍校驍騎校等六十兩俸銀請照副護軍校副驍騎校等按月支給俾伊等每月得領錢糧於度日有益而所領銀兩亦屬均平得旨副護軍校副驍騎校等閏月錢糧著照常給與護軍校驍騎校等俸銀著照所請每月給銀五兩○免山東濱州新城等八州縣雍正九年分水災額賦有差○裁雲南曲靖府通判缺添設元江府通判一員駐劄他郎南安州州判一員駐劄硯嘉姚州州判一員駐劄普溯改臨安府原轄之新平縣歸元江府管轄普洱鎮原轄之元江營歸臨安鎮管轄其元普沅威鎮改爲普洱沅威鎮臨安澂江鎮改爲臨元澂江鎮移元江營守備駐劄他郎從陞任雲貴廣西總督鄂爾泰請

也旌表湖南鄱縣烈婦翁士明妻郭氏拒姦不污被刃殞命給銀建坊入祠致祭如例
辛巳理藩院遵旨帶領軍營被叅之喀爾喀郡王敏珠爾多爾濟等引見得旨軍前退縮之罪例不容寬但敏珠爾多爾濟患病是實未能領兵前往以致伊旗下派出之兵半被賊兵截回念伊祖墨爾根濟農首先來歸其功甚大蒙我

聖祖皇考優恤今伊獲罪之故亦屬可原免其革退王爵著另派賢能台吉前往軍營管伊旗下兵丁俟伊病痊時再赴軍營効力贖罪
扎薩克台吉鄂穆布濟私離汛地罪固難寬但爲賊人截阻不能通信回歸游牧嚴行保守使賊人秋毫無犯且人亦去得免其革退
扎薩克台吉著與王格勒克顏木聘爾一同管轄屬下兵丁前往建勳將軍達爾濟處効力贖罪成滾扎布由科布多地方逃回後奉調軍營又未前往人亦不及著革退一等台

吉 癸未以翰林院侍講俞鴻圖編修吳應枚俱署日講起居注官 以戶部郎中常有署鑲藍旗滿洲副都統 陞雲南騰越副將蘇應選爲雲南永順總兵官 甲申諭內閣各直省督撫提鎮標下之兵丁朕俱賞給生息銀兩以濟其緩急之用而各省協營甚多一時難以普及欲俟軍務告竣國用充裕再思周遍加恩從前所頒諭旨言之詳矣上年大學士鄂爾泰在雲貴廣西總督任內奏稱滇省舟楫不通所有生息銀兩分派營運則易聚總生息則難若督撫提鎮各標賞銀過多轉致不能營運漸生弊端因將各鎮應領銀兩令與各協營均勻分給同受國恩黔粵兩省亦彷彿照此辦理此鄂爾泰因地制宜行之於邊遠三省使兵丁均霑賞賚者今據廣東總督郝玉麟奏稱廣東督撫提鎮各標蒙賞帑銀共十萬兩計每年生息除賞給督撫提鎮標兵外尚有餘剩銀兩應照各協營

寨兵數之多寡均勻分給。於雍正癸丑年開賞等語。朕愛養兵丁一視同仁。本欲令其均霑恩澤。但次第經理不得有先後之別。今鄂爾泰郝玉麟通融辦理。俾協營兵丁亦有以濟其緩急。深慰朕加惠戎行之至意。著各省督撫等酌量本地情形。悉心籌運。若可以照此變通辦理。則協營兵丁可以早受恩賞。誠屬有益。但各省地方之利息輕重不同。餘銀多寡不一。若不能行之。省分不必勉強從事。倣而行之也。乙酉四川巡撫憲德奏言。紫古喇廠開礦之初。忽有蠻夷數百將商人砂丁攔途刦殺。四十五名。臣就近移咨建昌鎮臣趙儒。差兵嚴緝。儻或夷人猖獗。必需添兵征剿。應聽督臣派遣。外臣請暫駐建昌會商料理。四川總督黃廷桂奏言。紫古喇廠開礦商人被番蠻刦殺一案。由於官商網利越界。至水墨崖開採礦砂。以致激變生事。臣已行令鎮臣趙儒飭委遊擊沈國卿帶兵六百

名駐劄適中扼要之地。調取番目宣布國威。曉以利害。勒令擒獻。亮首若敢抗拒。負固即將官兵分佈駐劄守禦要隘。俟秋成之後。派調漢土官兵前往剿捕。奉

上諭。建昌等處開採之舉。由於趙儒之陳奏。且稱開採若行。則窮民可得養贍之資。而蠻人亦得挖礦以餬口等語。後經部議行令巡撫憲德查奏。隨據憲德等議。准開採。朕始降旨。允行。年來外省督撫之奏請開採。以便民利用者。朕皆嚴切訓諭。務令本地民情相安。絲毫不擾。而後可以舉行。況建昌蠻夷地方。尤宜加意慎重。今紫古喇廠開挖伊始。即有夷人刦殺之事。則該管官員之辦理不善。可知。雖云官商越界。採取礦砂。以至激變。假若該督撫董率有司。平日善於化導。俾番衆奉法畏威。實心嚮化。即偶然取砂越界。何至敢肆行刦殺耶。巡撫事務繁多。憲德查賑事竣。著仍回省城。不必留駐建昌。黃廷桂所奏調取

番目勒獻兇首如敢抗拒負固即添兵剿捕著照所奏行○丙戌辦理軍機大臣等議覆靖邊大將軍順承親王等奏言臣等遵旨將軍營年老殘疾人等詳加察閱京城八旗奉天船廠黑龍江右衛寧夏察哈爾歸化城喀喇沁土默特等處并防戍綠旗弁兵等官弁共五十九員兵丁共一千五百五十二名俱係殘疾候青草出時酌量辦理發回各該旗該地方等處應如所請得旨裁汰官兵內効力被傷著有勞績若俱行革退甚屬可憫著各該管大臣等察明題奏官員賞給半俸兵丁賞給半餉官兵內如有病痊可以起用者奏聞請旨○丁亥諭辦理軍機大臣等朕覽大將軍岳鍾琪陸續奏摺知官兵騎赴軍營之馬及塔爾那沁等處牧放之馬有沿途疲瘦倒斃者有傳染時疫委棄者有被賊人刦奪者現今存剩馬匹寥寥無幾夫以多年購買預備之馬匹而棄之有如草芥其咎將誰

歸乎又據岳鍾琪奏稱穆壘駐兵俟所調駝馬到營之日即速起程等語口內解送之馬遠涉長途不令休息即欲驅使前赴穆壘其力實有不能目今口內駝馬陸續解送軍營賊人探知必又生窺伺之念且將來移駐穆壘之後所有駝馬牲畜甚多如何牧放佈置以防偷盜岳鍾琪須悉心籌算思患預防毋得仍蹈前轍再者朕聞軍營中自大將軍以及將弁皆用兵丁之力伐木取土蓋造房屋兵丁等雖勉供使令而退有怨言夫兵丁身列戎行枕戈荷戟冒鎬衝鋒是其職業至於興作力役非其事也是以從前築城時凡兵丁等之情愿傭工者朕皆照數給與工價而不忍輕用其力將弁欲蓋造房舍自當捐已資以僱夫役豈可圖一身之便安而不恤兵丁之勞苦使伊等操練辦公之外復竭蹶以供其私役乎從來爲將帥者與士卒同甘苦然後可以得其歡心而鼓其銳氣今軍營之

行事如此豈不與古人領兵之道相左乎將來移駐穆壘時儻有復蹈前轍者經朕訪聞必加嚴譴

大清世宗敬天昌運建中表正文武英明寬仁信毅大孝至誠憲皇帝實錄卷之一百十六

大清世宗敬天昌運建中表正文武英明寬仁信毅大孝至誠憲皇帝實錄卷之一百十七

教修

雍正十年壬子夏四月戊子朔享

太廟遣世子熙良行禮 諭果親王等圓明園官兵應廣其陞遷之路增補官員其如何增補之處著議奏尋議圓明園原設每旗營總各一員副護軍叅領各三員護軍校委署叅領各四員護軍校各十員副護軍校各九員今請於八旗現有之副護軍叅領內每旗揀選一員補授護軍叅領隨營總辦事向例副護軍叅領係五品今請准為四品其護軍校委署叅領請准為五品每旗增補護軍校四

員副護軍校五員又內府三旗護軍參領共三員今增補營總一員亦請准爲四品令掌管關防再隨關防之筆帖式每旗選補四名內府三旗亦各令選補四名從之 己丑加湖廣鄖陽副將馬化正總兵銜前往四川泰寧統領兵丁 庚寅諭辦理軍機大臣等前鋒統領穆克登在軍前効力年久現今打牲烏喇地方添設新兵著穆克登前往操練大學士等遵旨議覆據內務府總管鄂善奏稱臣遵旨於喜峯口冷口古北口沿邊內外所有打牲壯丁並村莊園圃等額丁內揀選情願充兵漢仗壯健者共得一千名伊等俱係熱河附近之人請於熱河地方操演烏鎗弓箭揀選弁員教習至所選丁壯於五十名內委充領催一名十名內補放隊長一名督率操演再於內務府廢員內揀選引見委充首領二名副首領四名令其約束給與拜唐阿糧餉所需火藥弓箭旗幟等項於該部支

取再查此項丁壯俱無地土應於丈出羨餘地畝內每名撥給九十畝養贍家口並將熱河現有空房每三名共撥房一間居住每月給餉銀二兩米一斛等語臣等查兵丁一千名不可無專管大臣請派漢軍副都統一員令其管理訓練參領二員令其協同管理至所選丁壯三名共給空房一間甚屬窄狹查伊等有攜帶妻子者給與兩間如未帶者給與一間其京城派往副都統參領各給官房一所首領教習等每人各給官房三間每月行程副都統十兩參領八兩首領副首領各五兩教習等各四兩餘俱應如鄂善所請得旨此項兵丁著內務府郎中佛標加副都統職銜在熱河地方管理訓練餘依議○辛卯兵部等衙門議覆陞任雲貴廣西總督鄂爾泰疏言都江河道開通地方遼濶宜添設文武官員分防彈壓上江請置一協設副將一員遊擊二員守備二員千總四員把總

八員兵二千二百名分爲左右營下江請置一營設遊擊一員守備一員千總二員把總四員兵八百名九股適中之台拱請置一營設叅將一員守備二員千總二員把總四員兵一千名分爲左右軍其古州鎮原議駐城兵三千名內請撥五百名分佈各汛清江協分防柳羅之兵四百名內請抽出二百名以一百名防守大營後山一百名添駐公鷺城內至黃施營原設遊擊一員千總一員把總二員俱應裁汰兵五百名撥歸台拱營新設兵丁之內仍令分駐舊施秉稿貢二處所餘黃施守備一員千總一員把總二員兵二百名即改爲專營以上各協營俱歸古州鎮統轄再於都勻府設理苗通判一員駐劄上江永從開泰天柱等縣添設縣丞三員分駐下江古州清江等處又廣西慶遠府屬之荔波縣離府治五百餘里山路險遠請改隸貴州都勻府管轄均應如所請得旨朕與大學士

鄂爾泰面加商酌新疆遼瀾直通楚粵兼有內地舊汛非古州一鎮所能統轄查都江清水二江地界形勢兩路劃然牽合歸一終難控馭而古州鎮處都江之適中清江協處清江水江之適中遙對雄峙各踞要區若於清江協裁去副將改設一鎮並於九股亦裁去叅將改設遊擊將新疆之丹江營台拱營與內地之銅仁鎮遠黃施天柱石阡平越等協營俱歸管轄其餘都勻協黎平營並新設之上江下江諸協營仍隸古州鎮管轄則弁兵原止如舊俸餉亦不須增添於數千里苗疆可無鞭長不及之慮更屬妥協著將清江協改鎮以雲南永北總兵官趙文英調補餘依議○陞湖廣寶慶副將周起鳳爲陝西西寧總兵官統領四川兵丁駐劄西藏賞銀五百兩○壬辰諭辦理軍機大臣等西路兵丁口糧從前議定每名日支粟米八合三勺或炒麵一觔駐劄之時本無不足惟有事行走及對

敵之際晝則追奔攻擊夜則防範巡查非駐劄之時可比恐舊數稍有不敷嗣後凡遇此等日期著每名日支粟米一升其應支炒麵之日每名日支一觔四兩俾兵丁等口糧寬裕以昭朕格外加恩之至意至分派屯種各兵耕耔播耨胼胝爲勞其耕種之一月內所支口糧亦照行走攻戰之兵米麵一體增給著即傳諭大將軍岳鍾琪等知之○諭兵部正藍旗滿洲副都統李柱著前往西藏更換邁祿回京賞銀一千兩整理行裝約計川兵赴藏換班之期李柱自京馳驛赴川與兵丁一同進藏○署山東布政使孫蘭芬緣事革職調河南布政使徐聚倫爲山東布政使司布政使陞監察御史鄭禪寶爲河南布政使司布政使○免直隸赤城縣雍正九年分電災額賦有差○湖北巡撫王士俊疏報襄陽縣開墾雍正八年分田地一百六十頃有奇下部知之○癸己免雲南貴州所屬烏蒙清

水江古州丹江等處兵丁借支銀兩有差○喀爾喀扎薩克貝子喇布坦故遣官致祭○丁酉賜朝鮮國進香使臣李槁等宴賚如例○調署正藍旗滿洲副都統吳禮署本旗蒙古副都統以正藍旗叅領庫爾禪署鑲白旗漢軍副都統○戊戌實授蔡永文爲直隸正定總兵官○己亥諭辦理軍機大臣等大兵移駐穆壘選得六月初四日己時從大營啓行爾等可傳諭岳鍾琪將一應事宜預先留心備辦但軍營切宜慎密以防洩洩○庚子禮部議覆署浙江巡撫王國棟疏言原任浙江温州磐石營殉難遊擊加贈副將熊應鳳妻陳氏妾繆氏於順治十五年值海賊陷城隨夫殉節投繯殞命因伊孫授官遠方久稽旌表請加恩補給應如所請照例給銀建坊入祠致祭從之○辛丑工部議覆陞任雲貴廣西總督鄂爾泰疏言滇省水利全在昆明海口現經修濬膏腴田地漸次涸出至如盤

龍江金陵銀稜寶象海源馬料明通馬溺白沙等河俱與海口相近宜建閘築壩令雲南府水利同知巡查并請於昆陽州添設水利州同一員駐劄海口以專責成再通省有水利之處凡同知通判州同州判經歷吏目縣丞典史等官請加水利職銜以資分辦均應如所請從之○壬寅調江西按察使樓儼來京以降調江西布政使李蘭爲江西按察使司按察使○禮部遵旨議奏故廣州將軍蔡良福建陸路提督張起雲貴州古州總兵官蘇大有雲南臨安總兵官魏肅國俱應於各省城賢良祠設位致祭從之○癸卯解福建布政使潘體豐任陞福建按察使劉藩長爲福建布政使司布政使以原任福建按察使李王鉉仍爲福建按察使司按察使○予故戶部尚書德明祭葬謚端勤贈太子少保○甲辰
孝端文皇后忌辰遣官祭

昭陵○乙巳調刑部尚書海壽爲戶部尚書實授性桂爲刑部尚書吏部等衙門議奏宗人府府丞謝王寵自陳有疾懇賜罷斥應照例准其休致從之兵部遵旨議覆大學士鄂爾泰等參奏寧遠大將軍岳鍾琪玩忽縱賊奏報不實應行議處查岳鍾琪身爲大將軍專制邊疆賊夷以五六千人從無克克嶺入我卡倫侵犯哈密岳鍾琪茫然不知令賊劫掠牲畜從塔庫納庫緩騎遁歸岳鍾琪智不能料敵於平時勇不能殲賊於臨事律之軍法百喙難辭應削去公爵并革去官保世職暨總督職銜仍令暫護大將軍印務以圖後効得旨岳鍾琪著削去公爵并革去官保降爲三等侯仍留總督職銜護大將軍印務戴罪立功○補行廣東省雍正八年分大計不謹官三員罷軟官六員年老官十八員有疾官三員才力不及官四員浮躁官一員分別處分如例予故原任吏部右侍郎如左

都御史銜王沛懌祭葬如例○丙午諭辦理軍機大臣等阿齊圖受朕殊恩用至大臣竝不感恩報効輒將交辦事件任意推諉及至差往之處又將竝未交辦之事矢口言論私出怨言沿途復向地方官勒索餽送騷擾驛站卑鄙不堪阿齊圖著革職前往博第巴爾米忒操練兵丁之烏爾輝地方効力贖罪行走○調工部尚書張大有爲禮部尚書以署鑲黃旗漢軍都統范時繹爲工部尚書仍兼管都統事務○移安徽宿州州同駐徐漢口從安徽巡撫程元章請也○旌表山東清平縣烈女董九福妹董氏守正拒姦投水殞命給銀建坊入祠致祭如例○丁未諭內閣從前四川建昌總兵官趙儒條奏開採會川寧番等處鉛銅各廠彼時朕即不以爲然詳問該撫憲德據憲德回奏極言有利無害是以交部議行乃兩年以來竝無成效徒滋煩擾著將原請開採人員交部察議具奏所開礦

廠著封閉其開採商民該地方官妥協辦理令其各回本籍○戶部議覆署雲貴廣西總督高其倬疏言雲南昭通府四面環山兵餉轉輸不易本地田畝頗多曠廢急宜開墾俾兵食有資且省轉輸之費請委員專辦墾務將昭通所有地畝定爲水旱生熟四項分給兵民徠戶及土人等墾種應如所請從之○議敘平定烏蒙鎮雄苗夷功貴州提督哈元生等加級紀錄有差陣亡及帶傷兵丁等分別賞卹如例○予故福建金門總兵官署福建陸路提督張起雲祭葬謚恪毅○戊申辦理軍機大臣等遵旨議覆黑龍江將軍卓爾海等奏稱據達巴哈博爾本察等相視呼倫貝爾附近之濟拉嘛泰河口處地方遼闊水草甚佳樹木茂盛可以種地築城請揀選索倫打虎兒巴爾虎鄂倫春之兵三千名遷移其地將伊等編爲八旗左翼自修城處至鄂羅斯交界處游牧右翼在喀爾喀河游牧共

編爲五十佐領各添佐領一員驍騎校一員每旗各添副總管一員并鑄給總管關防設筆帖式二員請將達已哈管理左翼博爾本察管理右翼凡駐防官兵等各給馬匹牛羊以立產業官員每年給與半俸兵丁每月給銀一兩其軍器旗幟等項該部製造賞給再濟拉嘛泰河口處至齊齊哈爾共六百八十里請設立卡倫十處護送往來行人均應如所請得旨依議總管關防著博爾本察掌管

○己酉諭理藩院額駙查穆蘇著加恩賜祭一等台吉既有賜祭之典嗣後額駙等身故俱著一體加恩賜祭○刑部議覆安徽巡撫程元章疏言亳州壽州私鑄兩案俱起於雍正七年夏秋間或鑄一月或鑄二三月即行停止亳州案內爲首之柳四丁林公及匠人陳三良潘瑞等應擬斬立決傭工炊爨之柏雲唐章知情鄉約之李維賈錢使用之李大回子等均應擬絞立決壽州案內受賄不報

之捕役蘇標應擬絞監候商同私鑄未經鑄成之貝爾明楊聖遠等俟獲日另結俱應如所請得旨亳州壽州等處姦民私鑄錢文經朕訪聞確實於雍正七年秋間敕令步軍統領差役前往拏獲多人則其合夥私鑄爲時已久事理顯然今該督撫等將各案查審具奏俱稱私鑄起於雍正七年之夏秋或鑄一月或鑄二三月即行停止朕體察情由其中顯有草率支飾等弊私鑄大干法紀若督撫究問疎忽將來何以示懲至於亳州案內柏雲唐章李維李大回子等俱以知情不報擬以立絞又覺太重況壽州案內受賄疎縱之捕役蘇標止於擬絞監候則柏雲等之罪不應在蘇標之上又亳州案內有商同私鑄因無人掌爐未經鑄成者亦應酌量議減此數案內私鑄日期及錢文多寡之處著該督撫再加確審務得實情不得草率結案其情罪稍有可原之人分別治罪亦著另行審結

庚戌陞貴州銅仁副將劉永貴爲雲南永北總兵官仍辦理銅仁協事務○予故廣西左江總兵官周寶祭葬如例○辛亥命大學士鄂爾泰署鑲黃旗滿洲都統○壬子諭內閣據奉天府府尹楊超曾奏報永吉州城內失火延燒房舍一千餘間朕心深爲軫念著該將軍及地方官確查被火窮民賑恤毋令失所○癸丑調直隸天津總兵官范毓麟爲廣東潮州總兵官以原任雲南曲尋總兵官孫士魁爲直隸天津總兵官署河南河北總兵官鑲白旗漢軍副都統補熙仍署直隸天津總兵官○鑲藍旗滿洲都統平郡王福彭等奏言各省來京引見官員俱蒙恩不令久候嗣後凡襲職旗員由外省來京請隨到隨奏不令久候多費以仰副體恤臣工之至意從之○甲寅諭理藩院察哈爾人等居住近邊歷年與內地之人一體効力行走從前定制察哈爾處官員內有職掌者給與半俸無職

掌者給俸四分之一伊等俱係國家効力之人今特沛恩膏有職任官員給與全俸無職任官員給與半俸○諭果親王允禮等近見圓明園兵丁氣象較前甚優圓明園之八旗及內府三旗著賞給教習人員令伊等子弟學習漢書其一切事宜著定議具奏尋議設立學舍當視營房之遠近鑲黃正黃正白鑲白四旗營房相近請設學舍一所教習二名正紅鑲紅二旗營房相近設學舍一所教習一名正藍鑲藍二旗營房隔遠內務府三旗原同一營設學舍三所教習三名其教習人員在八旗及內府生員內選取給與錢糧季米四年一換訓誨優者咨行吏部即以筆帖式用劣者革退另行選補從之○乙卯工部議覆陞任雲貴廣西總督鄂爾泰疏奏全漢水利事宜一嵩明州之陽林海疏深河道水勢暢流周圍草塘均可招民開墾一宜良縣共開河五道其四道俱經引水灌田惟江頭

村所開舊河地形稍高應自胡家營北接舊河另開一道以資灌溉一尋甸州尋川河中
有整石四十餘丈難以開鑿應另添沙河十五里俾得暢流一東川府城北漫海一區地
本肥饒因積水棄置今開河建閘水消田出亦可招民承墾一浪穹縣羽河等處築堤四十
餘丈但補苴一時急宜委勘加修一臨安等屬應修應築工程暨通粵河道嵩明州河口
俱請委員查勘及時興工務期深通堅固以垂永久均應如所請從之○改直隸泰寧
營左營守備爲中軍都司兼管左營從直隸泰寧副將姜德成請也○丙辰諭內閣八旗
訓練之兵及四班值宿之兵朕從前降旨鼓勵訓誨大臣官員等理宜將此諭旨不時宣
讀令兵丁記憶乃至今尚有未聞者著交與訓練兵丁之大臣及八旗都統護軍統領等
將朕旨書寫於各旗操演及會操之處宣讀令兵丁聽聞其守衛及各門值班之處亦著

實貼該管官員等教令熟讀記誦互相砥礪各加奮勉兼可學習清話又聞八旗訓練之法大臣等並不盡一是以會操時不能整齊
夫訓練兵丁不可無總統稽察之人著派拉錫常明莽鵠立范時繹永福於八旗訓練兵
弘昇所管訓練兵青州訓練兵及內府佐領訓練兵漢軍訓練兵共十二營內輪流稽察
大學士鄂爾泰亦乘暇前去總統察閱○京察滿漢各官不謹官四員罷軟官三員年老
官一員有疾官六員才力不及官六員浮躁官一員分別處分如例○旌表山西偏關縣
烈婦高成雲妻李氏拒姦忿激墜城殞命給銀建坊入祠致祭如例

大清世宗敬天昌運建中表正文武英明寬仁
信毅大孝至誠憲皇帝實錄卷之一百十七

大清世宗敬天昌運建中表正文武英明寬仁
信毅大孝至誠憲皇帝實錄卷之一百十八

敕修

雍正十年壬子五月丁巳朔山東巡撫岳濬

疏奏濟兗東三府自冬暨春雨澤稀少今濟

南雖幸得雨而兗東二府尚未均霑二麥未

能暢發穀豆亦欠滋生糧價漸昂民間乏食

請照上年米船免稅之例俾商販雲集再請

照上年截漕之例將南漕米截留四十萬石

以備平糶得旨岳濬所奏二事著該部速行

各該處照上年之例行毋得稽遲但通商截

漕料理尚需時日不能濟目前之用著該撫

藩等悉心經畫速籌目前接濟之策或散米

臣等謹將山東巡撫岳濬所奏二事恭摺具奏

乾隆四十二年五月二十二日奉旨該部知道欽此

事三十四日加三級日張廷玉等奏大員等因欽此

臣等謹將山東巡撫岳濬所奏二事恭摺具奏

臣等謹將山東巡撫岳濬所奏二事恭摺具奏

臣等謹將山東巡撫岳濬所奏二事恭摺具奏

或賑粥或借貸倉穀因地制宜遴選賢員實力辦理務令窮民得霑恩澤無致流離失所
○戊午諭大學士等山東兗東二府雨澤愆期貧民乏食已令該撫速行辦理賑濟第恐本省官員不敷差委著將各部學習人員及國子監選拔貢生內令該管大臣擇其人材可用而有身家者咨送吏部揀選十數員或二十餘員帶領引見命往東省交與巡撫岳濬以備委辦賑濟之事又諭刑部尚書勵廷儀患病著在寓靜心調理其刑部尚書事務著都察院左都御史彭維新暫行署理○以翰林院侍講俞鴻圖提督河南學政○浙江杭州左翼漢軍副都統楊長泰年老解任陞鑲黃旗漢軍參領張正興爲浙江杭州左翼漢軍副都統○調山東布政使徐聚倫爲河南布政使司布政使河南布政使鄭禪寶爲山東布政使司布政使○以故一等侯馬爾琿子馬國鍾襲爵二等阿思哈尼哈番

李永陞緣事革職以其叔之子李永安襲替
己未

孝誠仁皇后忌辰遣官祭

景陵○庚申諭達賴喇嘛朕撫馭寰區惟期海宇蒼生安居樂業宣揚佛法同歸於善爾喇嘛特遣使問安獻頌抒誠具奏荷蒙

上天恩慈朕躬甚安爾喇嘛其副朕振興黃教寧謐蒼生之至意悉心梵典闡揚化導俾各向善今來使西歸特賜敕諭一道銀器綵緞巾帕等項並寄來使特諭辦理軍機大臣等奏言從前奉旨令各省將軍查明餘丁數目添設兵丁今據該將軍等各就本地情形定議惟江寧餘丁有一千三百五十餘名應選取滿洲五百名蒙古一百名共挑額外兵六百名每月各給餉銀一兩五錢令習技藝俟有驍騎缺出於此內選補至天津餘丁俱係幼穉荊州杭州寧夏成都河南等處所有餘丁多不過二三百名少者僅三四十名均

無庸添設應俟將來餘丁繁庶該將軍等再行查明定議奏聞從之。辛酉諭內閣山東兗州東昌二府地方遼闊戶口繁多現在辦理賑濟之事若得本省人員前往更可周徧妥協朕思在京居官及赴部候補候選者充東二府之人必多伊等既能熟習風土人情又諳閭閻桑梓必能實心辦事以甦民困著大學士等於此項人員內揀選一二十員奏聞令往山東與地方官按戶按名查勘賑濟每人在京酌賞銀兩以爲路費俾其星速起程又諭春夏以來京師雨少朕心甚切憂勞著傳諭刑部於刑名案件加意慎重並遵照上年六月之例速查完結其應行保釋者准其保釋以原任正紅旗漢軍副都統李楠爲鑲藍旗漢軍副都統以署河南南陽總兵官宋愛署湖廣永州總兵官添設貴州提標兵三百五十名以提標後營專管安順府城守事從貴州提督哈元生請也 壬戌吏部

議覆山西按察使溫而遜條奏江南素稱澤國河湖交通臣歷任江南見丹陽至鎮江口數十里河身稍窄糧艘往來常至擠塞雖現在疏通恐數十年後復至於淺各府州縣有兼司水利之名而無講求水利之實太湖新設同知分管水利亦未能料理妥協請於蘇松常鎮四府太倉一州五處適中之地設一道員專司河湖水利俾其巡歷上下審量情形整修器具隨宜調度庶責成專而收效速其原設太湖同知可以裁汰均應如所請從之 癸亥諭八旗都統等八旗借支公庫及廣善庫銀兩數十年來拖欠未完者尚有四十餘萬當時原因旗人每遇急需即向人那貸以至每年所得俸餉不足補償愈至窘乏於是特設公庫廣善庫以周其不足而伊等罔知感恩任意花費至有偽捏事端一人名下多至三四千金者國家庫帑百姓脂膏豈容恣其虛誑盜竊濫用情甚可惡是以其人

雖故亦於其子孫弟姪及家下披甲人等俸祿錢糧坐扣一半俾人知祖父欠帑日後爲子孫之累庶冒領侵蝕之風可以少息但八旗官兵賴俸祿錢糧應差欠帑人數衆多僕生計艱難未免有誤公事著將八旗借欠公庫廣善庫案內人員本身已故將伊子孫等坐扣一半俸餉抵補伊祖父舊欠者開恩豁免以降旨之月爲始照舊賞給此朕格外之恩後不爲例其餘虧空侵蝕那移婪贓等項仍遵前旨分別查奏 甲子諭大學士等趙之垣著來京張體義著給與按察使銜前往肅州與副將馬龍一同辦理運糧事務○喀爾喀土謝圖汗汪扎爾多爾濟故遣官致祭賜銀一千兩 乙丑授輔國將軍塞楞額子務爾圖爲奉恩將軍 丁卯諭大學士九卿等京師地方冬間少雪數月以來自近京以至直隸山東雨澤愆期而兗州東昌尤甚朕心深爲焦勞日夜思維必朕與在廷諸臣政

事有缺以致

上天示儆飲食寤寐無刻稍安虔誠修省冀格天心爾諸臣當恐懼悚惕以凜

天戒凡用人行政及各部院事務關係民生利弊應行應改之處周詳審察苟有所見或公同具奏或自行陳奏至於刑名衙門尤宜慎重大小事件均期至公至當不可稍有疎忽朕之諄諄誡諭出於憂勞敬畏之實意竝非虛飾求言之名爾諸臣各宜殫心竭慮切實指陳務使民生攸賴感召

天和以副朕軫恤羣黎之至意 又諭秦省民風醇樸朕所素知第因近年以來有一二匪類捏造浮言妄冀鼓動衆聽朕恐無知愚民一時不察被其迷惑是以特遣大臣官員等開誠布公宣諭化導從前陝甘二省民人深知感戴國家教養之恩今復悉西陲不得已用兵之處聆受諭旨各皆開悟踴躍朕心深爲嘉悅但軍興日久轉粟飛芻不可再擾民

力其輓運之價朕已屢次加添近聞路徑僻遠之地尚有不敷又或採辦草豆等項時價低昂不等是該督撫等尚不洞達朕意矣向後著悉心體察有應行奏聞者即據實陳奏朕自加恩不使官民等有賠累之苦著將此旨曉諭陝甘二省官民等共知之○擢監察御史雅爾呼達爲太常寺卿○添設杭州駐防蒙古八旗每翼防禦二員從杭州將軍阿里衮請也○戊辰諭辦理軍機大臣等護軍統領阿思海著授爲前鋒統領令往西路軍營管轄滿洲兵行走侍郎武格至巴爾庫爾時著給與揚武將軍印統轄巴爾庫爾滿洲兵伊禮布在叅贊內行走協同武格辦事總督劉世明著授爲副將軍統轄巴爾庫爾綠旗兵與武格馬會伯商酌辦理事務○又諭巴爾庫爾出征之西安滿洲兵三千名寧夏兵一千名出口已將二年冬衣不無敝損應行加恩添補查莊浪現有存貯皮袍褂三千

套皮帽三千頂著署督查郎阿巡撫許容再於蘭州添製皮衣一千套皮帽一千頂俱於秋間解送軍營賞給西安寧夏滿洲兵以示朕格外加恩之至意江寧織造內務府郎中許夢閔疏奏原任江寧織造綏赫德已將司庫八十五筆帖式已圖借用銀兩代爲賠補應免重追得旨向來織造官員往往爲司庫筆帖式所愚弄恣意妄行侵盜國帑及至事發總恃有織造代賠置身事外積弊若此斷不可不加懲戒江寧織造綏赫德離任時大有虧空朕特降旨令接任許夢閔徹底清查以清弊蠹乃許夢閔以司庫等借用之項稱爲綏赫德已經代賠無庸重追獨不思綏赫德管理織造關稅兩項其代賠之銀即係兩項贏餘均爲國帑安得不核實歸公而乃私取以償屬員侵盜之項乎許夢閔瞻徇情面草率完結著交與內務府嚴加議處綏赫德著革職司庫八十五筆帖式已圖等名下

虧缺之項悉從本人追出交官再織造本非大員而在外體統任意僭越至於司庫筆帖式官職尤卑乃以欽差爲名妄自尊大與督撫拜帖稱呼俱用平行禮妄誕已極嗣後著嚴行禁止儻有以片紙隻字干謁地方官及不按品級規矩僭越妄行者定行從重治罪
己巳遣官祭

闕聖帝君擢監察御史舒喜爲禮部右侍郎以浙江温州總兵官丹起鳳署山東登州總兵官庚午諭辦理軍機大臣等去年遣往巴爾庫爾軍營之京城驍勇官兵一百名巴爾虎兵一百名原令於襲擊烏魯木齊旋師之後即行撤回此兵俱係精銳軍營現資差遣暫停撤回每人著再賞銀三十兩以爲整理衣服等物之用戶部等衙門議覆署理兩江總督印務蘇州巡撫尹繼善等疏言雍正五年泗州虹縣睢寧宿遷桃源五州縣原報淤地經原任總河齊蘇勒題請委員

丈勘共二萬三千三百三十頃零設立潼安一衛專司其事今奉諭旨以從前丈勘辦理草率未盡確實或致賦浮於田令臣等再加確勘隨委道府等官分丈五州縣臣等伏查泗州等處河湖浸逼地力瘠薄舊例行糧之地照部弓折算徵輸雍正三年未工漫溢黃水由睢宿桃趙泗虹之安河匯歸洪澤湖田疇淹沒至雍正五年未工堵築黃水消涸泥沙停淤一律淤平行糧舊地與新淤之地莫能驟辨從前委員但見有淤即爲丈勘未經細查其地原有舊糧止知照部弓計畝起科未經確察舊例原有折算今道府等官丈勘確實照例扣除行糧舊地外丈出部弓地六千九百七十七頃零實係新淤皆可耕種照各州縣科則舊例折算共地三千八百九頃零應各歸該州縣地界管轄納糧於雍正十年入額徵收潼安衛守備缺應請裁去以節冗費再原報淤地於雍正六年起徵賦額浮

多小民難以輸將其六七八等年未完錢糧如係無地虛額應請核實豁免俱應如所請從之○軍前一等侯陳泰緣事革退以其弟圖巴襲爵○以故一等精奇尼哈番董永蕃子董斯教三等阿思哈尼哈番金世鐸子金璋各襲職○辛未大學士九卿等遵旨議奏近因京師少雨直隸山東雨澤未過上厘聖心將用入行政應行應改之處令臣等陳奏謹將現在賑恤事宜十款條列○刑部等衙門現將監禁者查明保釋其直隸山東各州縣情罪較輕及干連待質人犯亦暫行保釋至八旗緩決人犯有情罪稍可寬貸者刑部查明分別奏請減等發落○被災州縣該督撫查明分數將本年錢糧照例奏免外其有雖不成災而收成歉薄應徵錢糧亦暫緩追呼或分年帶徵以紓民力○凡州縣地畝相錯有田在被災境內而納糧在別縣者亦應查明一體賑恤○一得雨以後無力農民不能

置辦籽粒應令該地方官查明酌借籽種銀兩秋成後交還一耆老義民量其捐穀多寡或給匾額或給頂帶榮身生監人等或准作貢生縉紳人等或刻石書名以爲衆勸○候補候選有力之家捐貲多者加級更多者照本職加銜其地方官有能捐俸糴穀廣行賑濟者量其所捐分別議敘有因公罰俸降級停陞者准予開復一商賈米豆船隻既奉恩旨免其關稅樁頭地方官派員巡察禁止搶竊至於價值聽民間照時糴買一賑濟成例凡有地可種者不在應賑之例但有地畝之家現在無收實與無地畝者同受飢餒應查驗酌賑又有逃荒出外聞本地受賑舉家歸里往往以造冊已定不能添入爲辭應嚴飭地方官一體補入加賑一散賑平糴之外有盈餘穀石聽民間借貸或令田多之家具呈領穀聽其轉行分給至秋收逐戶收繳一寬東二府未經賑濟之先或已有轉徙他鄉者地

方官即行查報酌量安插俟秋成資遣回籍其經過鄰省地方仍照雍正九年之例週給資遣一禮部現同各部院諸臣在顯佑宮等處虔誠祈禱查有

天神壇

地祇壇太歲壇及四海龍王之神亦應虔誠祈禱得旨照所奏速行○壬申諭內閣附近京師小縣城內所有駐防滿洲兵丁俱係協領等官管束因無總轄大員故教訓兵丁稽察官員之事殊爲疎忽應交相近駐劄之大臣兼管若近

陵寢者即令

陵寢大臣管轄近天津者即令天津都統管轄若附近無有大臣駐劄之處著由京師特派大臣一員令其統轄每年巡察一次則官兵各加奮勉遵法而地方可無妄行生事之人著大學士鄂爾泰詳酌議奏尋議喜峯口冷口羅文峪俱與

陵寢相近此三處駐防官兵請交

陵寢處大臣等稽察管轄三河玉田順義縣永平府係直達山海關之大路此四處交與山海關總管滄州與天津相近交與天津水師營都統德州係山東所屬交與青州將軍各就近稽察管轄獨石口古北口張家口錢家店鄭家莊昌平州六處係一路寶坻縣固安縣雄縣霸州彩峪保定府良鄉縣東安縣八處係一路俱無可兼管之處應由京城派副都統各一員令其總理每年秋季前往稽察一次分別勸懲務令勤加操演謹守本分其官員優劣亦令分別具奏從之○陞太常寺卿張國棟爲宗人府府丞兵部議覆直隸河道水利總督王朝恩等疏言直隸河標現在議設營制請將附近天津之務關路叅將改爲河標左營中軍副將務關守備改爲中軍守備仍駐務關張灣營守備改爲河標右營遊擊仍駐張灣務關崔黃守備改爲右營

守備移駐天津其崔黃留把總一員駐防仍歸左營管轄武清之蒲溝汛暨楊村蔡村務關三汛俱歸左營管轄務關以北安平灤縣香河西儀四汛與張灣二汛俱歸右營管轄添設隨標千總一員歸右營管轄把總一員歸左營管轄竝於左右兩營抽兵六十名駐防天津再務關原轄之寶坻一營永樂一汛距河遙遠請仍歸鎮標管轄均應如所請從之 癸酉諭內閣八旗人員借欠公庫廣善庫官銀本身現在而未完者著一併開恩豁免 貴州布政使常安摺奏黔省下游苗疆兵米有由陸路運送者需用人夫應交與地方官催覓從前軍興之際日給三分今可否量為加增庶幾永遠行之無累於民又來牛城垣為八寨之藩籬通古州之大道若建石城益資捍蔽奉

上諭苗地站路崎嶇險峻原非坦途且將永為定例自應仿照時價給發著署撫元展成等

或計站道之遠近按站定價或就站道之里數按里給銀每夫每日議定幾分務使敷用可以永遠遵行至來牛地方即建築土城未嘗不可以捍蔽但聞該處土鬆難保堅固且取石亦不甚遠若建石城可以一勞永逸著元展成委員確估妥議具奏 甲戌諭戶部福建臺灣府彰化縣經兇番擾害之後百姓耕種未免失時該縣所有雍正八九年分未完穀六千五百餘石著悉行豁免 工部議覆江南河道總督嵇曾筠疏言楊州府屬芒稻河開座工程向係動支商捐款項修築是以歸鹽政管理而令商人承修查商人素非熟諳未免草率嗣後請歸印河官管轄竝添設閘官一員以司啟閉應如所請從之 乙亥豁免江南吳江震澤二縣坍沒湖田額徵銀一千一百三十兩有奇 丙子諭內閣商書曰天作孽猶可違自作孽不可逭此甚言自作孽之不可也

天心仁愛必不作孽於人。凡禍福災祥之來皆由人事之感召。而

天本無心也。即如地方之水旱災荒必有所自。或由於朝廷政事之缺失。或由於臣工職業之乖差。或由於有司教令之煩苛。或由於民間風俗之澆薄。有一於此皆足以干

天和而致沴戾。是以數年來每當晴雨不時朕必虔心修省。思過省愆。切諭大小臣工。戒懼悚惕以凜

天戒。但思天下人民衆多。良頑不一。或有愚昧無知。因饑饉困厄而生愁怨之心者。夫平時心術詐僞。習俗乖張。仰蒙

上天垂象示儆。而又不自改悔。轉相怨懟。竟忘上天降罰之由來。視爲己身無辜。而獲譴者。背天逆理。莫此爲甚。朕即修省祈禱。亦未必能代伊等解免。而寬其罰也。每見一州一縣之中。相隔不遠。而雨澤多寡不均。收穫豐歉各異。此即顯而可見者。朕竝非諉其責於天下臣

民也。臣職之有虧。民風之不厚。皆朕之過。所望天下臣民遵朕訓諭。各盡其道。以爲敬

天之本。偶逢旱潦。逾加悚惕。寤寐之中不敢有幾微怨望不平之意。如此則和氣致祥。必能轉災爲福。思之勉之。○辦理軍機大臣等議。覆散秩大臣塞楞等奏言。臣等至察哈爾地方。會同各總管。遵旨查明八旗諸王大臣官員等所進蒙古及移居就食蒙古。共計八百餘戶。內選得諸練騎射堪以充兵之壯丁。共五百七十餘名。請五十名編爲一佐領。共十一佐領。分充護軍。領催驍騎。給以月餉。令操練騎射。鳥鎗等項。其製備軍器馬匹銀兩。照例給與。內有正黃旗原任侍衛阿拉布坦。所進蒙古已數一佐領。該佐領員缺。請於伊子弟內補授。准爲世管佐領。其餘各佐領俱係湊集各處蒙古編隸。應爲公中佐領。於察哈爾間散官廕生護軍校驍騎校內揀選補授。其護軍校驍騎校員缺。於察哈爾前鋒護軍

領催內選補至所選壯丁外其餘閒丁無可依賴生計維艱應照厄魯特佐領下閒丁例每名月給銀五錢再察哈爾貧苦兵丁請每戶賞銀十兩每名賞布二疋其牧場蒙古每名止賞布二疋均應如所請從之○添設廣東南海海防軍民同知一員從調任廣東總督郝玉麟請也○丁丑鑲黃旗蒙古副都統吳佟海患病解任陞署正藍旗蒙古副都統吳禮為鑲黃旗蒙古副都統一等侍衛郭多渾署正藍旗蒙古副都統○吏部尚書辦理刑部尚書事務勵廷儀故遣官往奠茶酒○旌表鑲黃旗滿洲烈婦那丹柱妻白氏矢志殉夫投繯殞命給銀建坊入祠致祭如例○戊寅諭辦理軍機大臣等科爾沁台吉滾濟扎卜等帶領扎薩克兵丁七百名駐劄昂古里地方今口外無事令赴圖爾賽錫爾塔台站處駐劄管束到日著圖爾賽等於從前帶去歸化城土默特一千兵內撤五百名令回歸

化城○己卯

孝恭仁皇后忌辰遣官祭

景陵○

上詣

恩佑寺行禮○庚辰諭兵部去年六月準噶爾

賊夷犯我北路弁兵奮勇進剿遂致失利其

効力之官員兵丁已降旨軍營著優加賞賚

至於陣亡之大臣官員兵丁今據大將軍順

承親王詳查造冊送部此陣亡人等皆荷國

家歷年養育朕原欲伊等建立偉功以膺國

家重賚伊等世受國恩篤思報効勇往直前

以致身陷疆場雖誤入危機而致命効忠誠

切可憫朕自聞報以來至今中心悽惻難釋

於懷著交該部按冊詳查應加贈廕及祭葬

賞卹之處照例分別詳議具奏○護寧遠大

將軍岳鍾琪奏言據駐劄魯谷慶總兵官王

廷瑞報稱有從賊營脫回之蒙古兵納圖里

等口稱烏魯木齊之北奇林地方聚有賊兵

三萬欲侵犯阿爾泰等語臣隨遣侍衛噶查爾圖守備郎建業等帶領滿洲兵五十名巴爾虎兵五十名蒙古兵一百名綠旗兵一百名前往哨探隨據伊等回營稟稱哨探賊蹤行至鄂龍吉地方遇賊殺賊四名擒賊垂木丕爾達爾扎等八名到營臣各加嚴訊俱供烏魯木齊附近吉木塞地方共有兵三千名係台吉色布騰統領分路遣人哨探一往色必忒地方已遇大兵擒勒一往陶賴無克克等處小策零敦多卜在奇林地方共聚兵三萬俟秋深馬肥前往阿爾泰侵犯喀爾喀遊牧那親哈什哈帶兵一千名前往魯谷慶大策零敦多卜之子納木扎爾達錫等領兵一萬前去哈薩克地方出兵等語臣復遣噶查爾圖等帶兵前往吳爾圖地方抄截賊人歸路一面飛飭總兵官王緒級副將花天立率兵一千五百名在陶賴一帶搜山勦捕謹奏得旨侍衛噶查爾圖等遇見賊衆勦殺生擒

甚屬可嘉噶查爾圖賞銀一百兩郎建業賞銀六十兩滿漢蒙古兵丁等賞銀一千兩分別賞賚以示獎勵○是日甘霖大霽四野沾足○辛巳諭辦理軍機大臣等據岳鍾琪奏稱賊人小策零敦多卜在奇林地方聚兵三萬欲侵犯喀爾喀遊牧我兵宜嚴加防備著將岳鍾琪奏摺錄寄順承親王馬爾賽達爾濟令伊等偵探信息賊人若以全力來犯應如何防禦若分路以輕兵來犯應如何截殺預行詳細定議務期妥協不可輕率○以翰林院修撰彭啟豐爲雲南鄉試正考官編修趙大鯨爲副考官刑部郎中畢誼爲貴州鄉試正考官編修王峻爲副考官○署雲貴廣西總督高其倬題雲南耿馬宣撫使罕世藩以病休致請以其子罕國楷襲替下部知之○旌表河南息縣烈婦宣棟妻高氏拒姦不污自縊完貞給銀建坊入祠致祭如例○癸未禮部議覆直隸總督劉於義疏言天津改

州爲府請照府學例取進文武童生各二十名。設廩增各四十名。天津縣仍照天津州舊額取進文章十八名。武童十五名。廩增各二十名。天津、滄州二州縣請另立商學。商籍取進文章八名。武童七名。竈籍取進文章七名。武童六名。即歸天津府學考課督率。設廩增各二十名。其現在河間府學商竈二籍生員悉改歸商學。又河間府舊有撥入天津武童三名。撥入滄州武童二名。俱請改入天津府學。又寶坻縣分設寧河縣。其入學額數請酌量分派。寶坻縣取進文武童生各十二名。廩增仍循舊額。寧河縣取進文章十一名。武童八名。廩增各二十名。均應如所請。從之。甲申諭內閣。八旗辦事。不諳悉條例。諸事每多未協。朕思各部司官多有熟悉則例。識見明通者。若於郎中員外等官內慎加揀選。每旗添設二員。助都統副都統辦理旗務。似有裨益。該員於本職部務仍照舊辦理。都統等奏

事時該員隨副都統之後。本章奏摺內亦著列名著大學士會同各部堂官加意揀選。務在得人。若司員不敷揀選。科道侍讀等官亦可選用。○頒

御製重修闕里

聖廟碑文墨筆收藏闕里。以爲世守。從衍聖公孔廣榮請也。碑文曰。朕惟

上天垂佑。蒸民篤生。

至聖先師孔子。以仁義道德。啟迪萬世之心。而三綱以正。五倫以明。後之繼天御宇。兼君師之任者。有所則倣。以敷政立教。企及乎唐虞三代之隆。大矣哉。聖人之道。其爲福於羣黎也甚溥。而爲益於帝王也甚宏。宜乎尊崇之典。與天地共悠久也。曲阜廟庭。爲孔子里宅。毓聖鍾靈之地。神爽式憑。明禋祇肅。廟貌崇闕。由周而來。久且加盛。我皇考聖祖仁皇帝。德符元化。悟徹性天。自羲農堯舜禹湯文武周公之道。集成於孔子者。一

一體於身心宣爲政治聖統在上應運而承
康熙甲子東巡狩臨幸闕里謁奠廟林殷禮
隆儀漢唐莫及朕躬膺丕緒志切美牆即位
之初加封

先師五代王爵詣雍釋菜題額歌詩佩德報
功之願夙夜罔釋於懷雍正二年闕里聖廟
不戒於火有司奏告朕悚惕靡寧詣廟致祭
旋發帑興修命大臣專董厥役殿廡規模悉
準宮闕製器備物亦令繪圖呈式裁酌協宜
數年內諄諭執事臣寮經營周至纖毫無憾
始愜朕衷七年冬有司具奏大成殿上梁前
二日慶雲見於曲阜合詞稱瑞朕以天人感
應理固不爽而誠敬微忱詎能邀

上帝

先師之垂鑒用是祇將祀事倍增試額俾普
天率土被聖人之德化者同心感慶庶足以
廣教澤而答嘉庥而撫躬警勉恒朝夕凜凜
焉朕嘗謂帝王之尊聖尊其道也尊其道貴

行其道居行道之位而能擴充光大達之政
令修齊治平得其要紀綱法度合其宜禮樂
文章備其盛凡聖道之未行於當時者悉行
於後世雖去聖久遠而心源相接不啻親授
於一堂之上默證於千載之前如是而欽崇
褒顯悉由於中心誠服而治化日盛聖道斯
尊且夫聖人之道一天道也天以曠民之責
屬之聖人刑定贊修代天宣教彝倫惇敘禮
法彰明後之帝王奉其道以治世師承罔教
資益良多然則尊天尊聖理原合一今茲之
崇禮

至聖正所以欽若

昊天而於修建廟庭之重典有不至誠至敬者
哉朕勤求上理宵旰孜孜冀以仰述

皇考之鴻謨丕揚

先師之厚澤爰敬推上天篤生聖人與聖人
承天立教垂憲奕世之意勒文碑石以昭示
臣民於無極而系以辭曰天心覺世聖治承

天治法道法。聖聖相傳。三五之隆。以道致治。峻德宏昭。豐功遠被。聞知續統。至聖挺生。中天復旦。文教昌明。經緯三才。陶融萬象。體具中和。功侔參兩。表揚六籍。程式五常。如會滄海。若揭秋陽。惟我

皇考。聰明睿智。苞蘊圖書。匯宗洙泗。德與聖合。禮爲道崇。升堂容肅。過里恩隆。緒纘朕躬。勤圖紹述。至訓煌煌。箴銘宥密。惟皇建極。惟聖時中。古今雖邈。心理攸同。作帝王師。與天地配。開闢一人。神靈如在。奕奕新廟。輝映尼防。金絲在御。車服盈堂。煥乎天文。五雲示慶。錫佑者天。承庥者聖。敢云瑞應。鑒厥微誠。普祈洪貺。永福編氓。文治光華。日星晶麗。木鐸揚聲。垂億萬世。乙酉夏至祭

地於

方澤遣平郡王福彭行禮

大清世宗敬天昌運建中表正文武英明寬仁信毅大孝至誠憲皇帝實錄卷之一百十八

尚書鄂爾奇署步軍統領○癸巳解宗人府右宗正德昭任以平郡王福彭爲右宗正以故二等阿思哈尼哈番岱奇里子達桑阿襲職○甲午諭八旗官員人等昔人云和氣致祥乖氣致異此天人相感之至理古今不爽朕以此訓導天下臣民至詳且悉矣去夏今春京師亢旱地猶微動未息朕戒慎恐懼思過省愆幸邀

上天慈恩錫以霖雨不致大爲災患然所以垂象示儆必有由來朕留心體察於旗人得一二事似有抑鬱不舒之氣以致上千

天怒朕不得自寬衆亦各應自省也如用兵準噶爾一節八旗將士遠役於外父母妻子愁望於家或者以爲朝廷不恤士卒有此可已而不已之舉不知準噶爾賊夷狡獪兇頑世濟其惡擾害我臣服之蒙古窺伺我西北之邊疆若不加創懲則蒙古不獲安居邊塞不能寧謐我八旗之人尚得優游燕處度外置

之乎是知

皇考經理於前朕紹述於後皆出於萬不得已竝非窮兵黷武欲拓地開疆而疲勞將士於沙漠窮荒之地也觀近日賊夷跳梁之狀以我朝大兵駐劄邊境而猶心懷覬覦敢肆狂逞則從前雖欲棄置不問以圖息事寧人其可得乎我滿洲八旗人等素有忠義之心勇敢之氣爾等祖父自從龍入關以及各處征討削平寇亂皆以捐軀致命爲榮以老死牖下爲恥今乃承平日久習於宴安因數年之征戍即生愁怨之心而忘乃祖乃父之勞績何志氣隳惰自暴自棄一至於此乎從來急公殉難者享千古不朽之榮名而秦凱獻功者膺國家寵褒之爵賞豈但出征弁兵當勇往爭先即其父母妻子亦當深知大義遏抑私情務其遠大則忠君報國之悃誠必蒙上天垂鑒默加福祐大功可以立成凡列在我行者均受國家通格之恩澤矣又如催追虧

空一節。聞八旗人等亦以爲苦累。獨不思居官之人。侵盜國帑。剝蝕民膏。律以國法。皆在不赦之列。朕以習染既久。人數衆多。不忍加戮。特從寬典。勒追還項。以儆將來。使知侵盜橫取之物。不足以長子孫。庶可以止姦貪。而厲廉恥。此朕之苦心。實欲爲人心風俗計也。若云朕爲財物計。而爲此綜核之事。獨不思十年以來。朕之減除正賦。蠲免積逋。與夫興修工程。賑濟賞賚。加惠於官弁兵民者。所費不下數千萬。曾無吝惜。豈有惟與旗人較量錙銖之理哉。且雍正三年以前之舊欠。朕已令該旗大臣等查奏酌免矣。朕之意旨。旗人既未能悉知。該管官員又不能宣布開示。每於催追之時。過於嚴刻。甚且牽累無辜。此庸劣不忠之大臣。奉行不善。而更隱示以奉朕意旨。致令若輩心懷怨懟。朕旨果如是乎。夫獲罪而不知悔沐恩而不知感。此皆乖戾之氣。均足上千。

天和用是再頒諭旨。通行曉諭。儻八旗人等果能遵朕訓誨。洗滌肺腸。共矢愛君親上之懷。永絕昧理欺公之習。不但朕之沛澤施恩。必先自旗人始。而

上天福祐善良。諸事吉慶。亦可預信其必然矣。○乙未諭辦理軍機大臣等。前因西路軍營兵丁行走攻擊之時。從前所定口糧不敷。朕已加恩增給。今思兵丁駐劄之時。亦應使之口糧寬裕。以鼓勤勞。其如何酌量加增之處。爾等妥議具奏。尋議駐劄之兵。與行走坐卡之兵。俱十日給米一斗。十日給麵十二觔半。則口糧皆可充裕。得旨依議。兵丁等遇有調遣行走之時。每月著再加賞羊價銀七錢。○署陝西興漢總兵官董紹祖緣事革職。以陝西西鳳副將米國正署陝西興漢總兵官。○盛京考察滿漢各部官員。不謹官一員。罷軟官一員。有疾官二員。分別處分如例。○予故議政大臣領侍衛內大臣克什圖祭葬。謚勤。

恪旌表江蘇丹陽縣烈婦凌從俊妻周氏守正拒姦投繯殞命給銀建坊入祠致祭如例○丙申護寧遠大將軍岳鍾琪奏言據駐劄魯谷慶總兵官王廷瑞稟報賊人寨桑額爾克得松領賊二千名分東西二路來犯哈喇火州城叅將劉廷琰擊李英等分兵迎敵殺傷賊人俱皆敗走劉廷琰等領兵追剿賊人遠遁因見黑霧大風不便窮追撤兵回城臣等仍飛飭總兵王廷瑞晝夜嚴防時加哨探理合繕奏報聞○丁酉諭內閣上年冬間北方雨雪稀少朕恐今歲夏間蝗蝻萌動已密諭該督撫留心防範項間江南淮安府屬之山陽阜寧二縣海州所屬之沐陽縣揚州府屬之寶應縣各有一二鄉村生發蝻子雖目前萌動之處不過數里然恐捕治不力漸致蔓延爲禾田之害著該督撫有司督率人役鄉民速行撲滅無俾遺種僅有怠忽從事者即行糾叅從重議處○諭八旗官員人

等朕自御極以來普天率土未嘗岐視而八旗人等尤國家教養百年望其遂生復性共享安樂於久遠若其中頑劣貪鄙之習故加寬縱將爲人心風俗憂無所底止朕實不忍聽其陷溺不爲援手有負

皇考之付託也從前嚴治貪婪清釐帑項即追呼牽擾有所不恤者誠欲八旗人等各思罪愆漸自醒悟知有所不爲庶無往不利此朕訓愛之初心也昨於雍正三年以前虧空各項令查奏酌免諭旨內業經明白曉諭今特再沛恩膏將雍正三年以後九年以前八旗官員人等應追銀兩除本身虧空侵蝕借帑及貪贓盜用等項不准查免外其有年遠之案於雍正八年恩旨以後發覺者與本身已故著落子孫追賠坐扣俸餉抵補者或本身雖在其應追之銀實係分賠代賠無著之項或因公那用並未入己者又或應追之本人已經豁免而開欠之人尚在著追或本身已

經寬免而在奉旨以前報出田房人口抵補其間人口病故田房變價不敷仍行追補者著該旗將各項情由造冊開送內閣轉奏候朕酌量分別加恩寬免此次諭旨著再遍傳俾八旗人等深知朕恩恪遵朕訓洗心滌慮痛改前非循理奉公謹身節用以副朕教育諄誠之至意○戊戌諭大學士等固原提督樊廷來京陛見懇求前往軍營領兵効力朕勉從其請令伊暫回固原之任李繩武著馳驛來京面請訓旨仍回固原署理提督印務○以原任甘肅布政使鍾保協理步軍統領事務○調鑲藍旗蒙古副都統哈達哈爲正藍旗漢軍副都統以署鑲紅旗滿洲副都統噶爾錫爲鑲藍旗蒙古副都統○予故雲南曲尋鎮總兵官陳清祭葬如例○己亥加正藍旗護軍參領色爾古楞副都統職銜仍往北路軍營看守察罕叟爾倉庫賞銀二千兩○辦理軍機大臣等議覆寧古塔將軍常德

遵旨議奏八姓地方人內請挑兵一千名編爲十佐領各設佐領一員驍騎校一員照三姓例給與俸餉器械查三姓地方寬濶應建築城池令三姓八姓官兵等一併駐劄從前八姓人戶不習耕種請俟來年二月給與牛種口糧令其開墾再打牲烏喇人丁現有二三千人亦請挑兵一千名分爲八旗編爲十佐領各設佐領一員驍騎校一員每旗設防禦一員每翼設協領一員給與俸餉等項與船廠兵丁一體差操均應如所請從之○庚子諭內閣雲南迤東道管轄昭通東川普洱等處半係新疆俱關緊要非歷練強幹之員不能勝任雲南糧儲水利道黃士傑辦事實心且素爲昭東夷民所信重著加按察使銜調補迤東道仍兼管昭東廠務○辛丑禮部議覆寧古塔將軍常德奏言長白山爲發祥福地神迹顯著請於烏喇之板山望祭處蓋造享殿以肅祀典應如所請從之○裁山西

代州營千總一員。兵一百四十名。添設冷泉關營千總一員。兵九十一名。改冷泉關營把總爲潞澤營把總。並添設潞澤營兵四十九名。撥潞澤營兵十名。歸澤州營。從山西巡撫署提督事覺羅石麟請也。○壬寅。以原任提督陳天培。帶領勇健營兵丁。往陝西涼州駐劄。給勇健營總統關防。○移廣東化州梁家沙司巡檢。駐平定堡。從署廣東總督鄂彌達請也。○癸卯。以署鑲藍旗滿洲副都統常有。協辦戶部侍郎事務。○命提督安徽學政王蘭生。再留任三年。○調署鑲藍旗滿洲副都統。常有爲正紅旗蒙古副都統。仍兼理鑲藍旗滿洲副都統事務。○甲辰。和碩恒親王允禩薨。輟朝三日。加祭二次。造墳立碑。謚曰溫。○宗人府以允祉病故。奏聞。得旨。三阿哥允祉。向來秉性乖張。器量狹小。皇考每言其不識忠孝大義。自朕即位以來。屢次加恩。不知感激。時爲開導。不知省悟。朕皆

優容之。近年則强悍難制。漸無忌憚。經諸王大臣等參奏。朕不得已。將伊拘禁於景山之永安亭。令伊眷屬隨往。供其使令。並將伊子弘景封爲貝子。以承其家業。此朕委曲措置之苦心也。近伊患病。醫官前往調治。奈病勢沉重。醫藥罔效。朕心惻然。一切殯葬之禮。著照郡王例行。賞內庫銀五千兩。料理喪事。○乙巳。以翰林院編修吳龍應爲四川鄉試正考官。編修李重華爲副考官。刑科給事中劉吳龍爲廣東鄉試正考官。編修錢本誠爲副考官。檢討范咸爲廣西鄉試正考官。編修鄒一桂爲副考官。編修王安國爲福建鄉試正考官。吏科掌印給事中嚴瑞龍爲副考官。翰林院侍讀學士許王猷爲湖南鄉試正考官。修撰周霽爲副考官。○丙午。諭兵部。滿洲武進士。未經挑選侍衛者。除特旨補授京營守備外。嗣後俱著以本旗護軍校驍騎校等缺用。○戊申。諭理藩院。喀爾喀車臣汗冊卜登

拜音珠爾年幼料理部落事務恐有遺誤著多羅郡王垂扎卜協同辦理○領侍衛內大臣宗室額騰吉因病解任以鑲白旗滿洲都統薩穆哈爲鑲黃旗領侍衛內大臣○己酉護寧遠大將軍岳鍾琪奏言甘涼肅州安西之兵於五月間起程來赴軍營馬匹至自長途未經歇息恐多疲瘦擬將馬匹暫牧休養於六月二十間啟行前赴穆壘得旨官兵移駐穆壘從軍營起程吉期京中原擇六月初四及六月二十七日今岳鍾琪奏稱馬匹應暫休養於六月二十間啟行朕思大軍遷移駐劄之際務令諸事從容方爲有益著即定期六月二十七日起程邊地雖早寒然七八月間建築城工地土諒不至凝凍也○予故太子少傅吏部尚書仍專管刑部事務勵廷儀祭葬加祭一次謚文恭○庚戌福建巡撫趙國麟奏言臺灣北路大甲西番不法殘害官兵經臺灣總兵官呂瑞麟同臺灣道倪象

愷帶領兵壯勦撫兼行已將脅從之朴仔離等社先後就撫續有鳳山縣南路姦民乘機聚衆殺傷官兵經陞任陸路提督王郡親率弁兵勦追解散今南路姦匪陸續拏獲究審現在嚴緝首犯吳福生到日即可定案其大甲西番土官率領全社男婦老幼四百十九名造冊就撫現在查訊實情究出首先定擬仍於各莊緊要之處設兵防護所有南北兩路安定情形理應具奏報聞○喀爾喀和碩親王達什敦多卜故遣官致祭辛亥總督倉場侍郎岳爾岱因病解任以禮科給事中兆華署總督倉場侍郎○吏部題二等精奇尼哈番兼一拖沙喇哈番六哥故銷去恩詔所得四拖沙喇哈番餘一等阿思哈尼哈番兼一拖沙喇哈番以其子沙津襲職從之○壬子兵部議覆署直隸天津總兵官補熙奏言直隸各營俱設有教場以便簡閱騎射准通州一營獨無查原設教場在城南門外將

臺遺址猶存順治中國爲旗地值操演之時另擇民間隙地迄無定所難免妨農害稼之累請敕部將原場撥還該營庶於訓練有益應如所請從之○癸丑諭內閣大學士蔣廷錫現在患病尚須調養戶部尚書事務著兵部尚書鄂爾奇左都御史彭維新署理刑部尚書事務著浙江總督李衛署理鄂爾奇仍管兵部尚書事吏部議奏派往軍前辦事官員遇俸滿應陞雖經指缺因未引見不准實授其新任之缺既已空懸而現出之缺例不另補請嗣後除口內奉差人員仍俟引見補授其派往軍前辦事官員有俸滿應陞者得缺即具題補授令食陞缺之俸准其陞轉所遺員缺歸部月選俟該員回京日照例補行引見如此則員缺不致久懸而効力各員愈加感激矣從之○甲寅以內閣學士德齡充經筵講官○甘肅巡撫許容奏言五月間五月間甘省各屬俱陸續得被甘霖因從前

得雨稍遲豆麥有薄收之處其臨屬之蘭州鞏屬之靖遠涼屬之平番得雨最遲夏禾麥豆俱已枯槁止可補種晚禾得旨朕念甘省備辦軍需未免煩勞民力而各屬內又有收成歉薄之州縣意欲將本年甘肅各屬錢糧全行豁免以加惠秦民但諭旨到日已屆初秋開徵既久錢糧多已完納不能普遍沾恩凡得雨稍遲之處著許容將舊欠新賦悉行停徵再與查郎阿悉心計議或將備辦軍需州縣之錢糧全行蠲免其中收成稍薄者再加賑恤其不辦軍需之州縣而收成又復照常者仍照額賦徵收著會同密議具奏○乙卯諭內務府現今天氣炎熱著海望會同署步軍統領鄂爾奇在各門設立冰湯以解行人煩渴工部所窖冰塊如不敷用即將崇文門宣課司餘銀採買辦理永著爲例○豁免湖南湘陰縣流沙地畝額賦銀二百兩有奇

大清世宗敬天昌運建中表正文武英明寬仁
信毅大孝至誠憲皇帝實錄卷之一百十九

大清世宗敬天昌運建中表正文武英明寬仁
信毅大孝至誠憲皇帝實錄卷之一百二十

教修

雍正十年壬子六月丙辰朔以署戶部尚書

鄂爾奇管理三庫事調正藍旗蒙古都統

莽鵠立為鑲白旗滿洲都統禮部議覆貴

州學政晏斯盛條奏考察核事宜一造報

優劣事實該府州縣及教官隨時具報務在

訪查詳確一學臣按試事竣方詣學講書勢

必聽講寥寥適成具文請照舊例於按試次

日舉行一苗童應試加取一名請用漢廩生

同苗生聯名保結苗童五名互結以杜漢童

冒占其苗童名目改為新童苗卷改為新卷

一武生以弓馬技勇爲先考試外場請將好字合式中等字樣鈐記卷面與內場相較分別等次其騎射時照武童例當面書寫親供磨對字跡庶無頂替代倩情弊一學政衙門行查批審事件請令府州縣悉照各上司例依限完結如承審遲延查取職名咨部議處均應如所請從之○丁巳諭吏部凡官員議處之案多係本任乃亦有年久而後發覺或逾年而後結案者該員已經陞遷方行議處如在外州縣陞至道府在內司官陞至堂官過原任內有應行議處之案舊例照原任品級處分朕思伊等所犯情罪自有重輕儻不過尋常詿誤輒照原任品級處分似於情理未協況此等人員久經歷任其材必有可用如因原任事發悉照原品降調畧無差等殊非愛惜人才之意著該部悉心詳酌作何分別定議具奏尋議内外文武官員陞任之後過原任事發應降調者除貪贓酷刑營私作

弊等案外其餘尋常詿誤事件情罪尚輕俱於現任內議以降調則處分更得其平從之○禮部議覆署浙江巡撫王國棟疏言杭州府新城縣已故宜都知縣周甸妻陳氏於順治二年賊寇竊發氏與姑羅氏避難山中猝遇寇至欲刃其姑氏以身衛姑抱姑求釋寇釋姑劫氏而行氏行踰里許隨奪寇刃自刎時年二十二歲從前湮沒未獲旌表今奉旨闡揚孝行節義理合題請旌典以勵風化應如所請照例給銀建坊入祠致祭從之○己未陞內閣學士署戶部侍郎事阿山爲吏部右侍郎○陞雲南鶴麗總兵官南天祥爲江南提督○癸亥諭內閣大學士鄂爾泰上年來京陛見朕以雲貴廣西三省地方緊要本欲令其回總督之任今因西北兩路軍務尚資協贊經理其眷屬不便久住滇南著總督高其倬等將大學士家口料理進京其雲貴廣西地方緊要事宜有應知會大學士鄂爾

奏者仍行知會並三省文武官員應稟報者照常稟報將此通行曉諭三省官弁知之辦理軍機大臣等奏言山東河南兩省應交粟米除支給京城官兵外每年俱有餘剩又有歷年存倉粟米現在甚屬豐裕嗣後請令山東河南兩省於應交粟米內每省改交豆五萬石運送至倉分交八旗米局平價賣與拴馬官兵則八旗應需馬豆永遠足用而民亦樂於改米交豆殊爲兩便至八旗官馬於四月出口時每馬一匹給空草一束至八月進口因已收穫可以牧放不復給草查沿邊收穫甚遲官馬進口時田禾大半未刈官馬不便牧放多至疲瘦嗣後請於官馬進口時照出口例沿途支給空草從之○又議覆領侍衛內大臣拉錫等奏言查得察哈爾左翼四十六佐領右翼三十五佐領共八十一佐領兵共五千餘名除現在出征及預備調遣外八旗止餘兵五百名即看守遊牧亦不敷

用今察哈爾巴爾虎孳生蒙古壯丁一千四百名弓箭可觀人丁壯健連各處覓食人丁共二千有餘請將此人丁編設十九佐領合之舊有八十一佐領共成一百左右翼各派五十佐領共設兵七千則一應差使俱得整齊應如所請從之○甲子兵部遵旨議覆北路陣亡官員兵丁應得卹典除副將軍宗室公巴賽叅贊覺羅海蘭應移交宗人府詳議喀喇沁歸化城土默特口外蒙古人等應交與理藩院詳議外自副將軍以下披甲從役以上俱請照會典開載之例各給與應得賜卹銀兩其各官如有世職大者照世職給與如世職小及無世職者照本身職銜品級給與京城八旗大臣官員兵丁從役令各該旗都統查核及察哈爾奉天寧古塔黑龍江右衛寧夏等處令該將軍查核將各官有無世職造冊送部臣部移咨戶部給發賞卹銀兩務令官員兵丁從役之父母妻子的屬親

領至副將軍以下驍騎校護軍校以上應加
贈廕移咨吏部定議應予祭葬移咨禮工二
部定議其陣亡之原任副都統阿岱等七員
均應照伊原品賜祭一次各廕一子入監從
之予故辦理青海噶斯事務正紅旗滿洲
都統德成祭葬諡勤僖予故協理西藏事
務陝西寧夏總兵官包進忠祭葬如例丙寅
陞大理寺卿史在甲爲都察院左副都御史
禮部議覆順天學政吳應棻疏言宗聖
祠奉旨追封五世王爵而新置之牌位各處
舛錯未能畫一請照國子監所書字樣通行
直省畫一遵奉查國子監崇聖祠字樣係肇
聖王木金父公之位裕聖王祈父公之位詒
聖王防叔公之位昌聖王伯夏公之位啟聖
王叔梁公之位應通行直省遵照成式改製
安奉從之丁卯護寧遠大將軍岳鍾琪奏
言據賊營脫歸之鄂爾多斯參領阿玉錫供
稱噶爾丹策零令小策零敦多卜領兵三萬

來犯北路賊兵隊內有投降準噶爾之公巴
濟達錫達爾扎貝子茅海台吉冊凌協理台
吉盆蘇克岱青等五人引路以大隊搶掠察
罕叟爾附近居住之喀爾喀等直至克爾倫
地方巴濟并獻計與噶爾丹策零云喀爾喀
等俱係懦弱之人可以肆行搶掠等語謹據
供繕奏得旨巴濟等有負國恩實當誅戮伊
竝不以投順賊人爲恥反欲取信於賊妄稱
喀爾喀懦弱易於搶掠殊屬可惡喀爾喀等
一聞此語自必痛心切齒奮勇爭先矣著行
文順承親王曉諭軍前喀爾喀等知之旌
表山東曹州烈婦朱大肖妻崔氏拒姦不污
投縋殞命給銀建坊入祠致祭如例戊辰
諭辦理軍機大臣等前派往西北兩路出征
之滿洲蒙古漢軍大臣官員等於起程之時
朕令寬裕給與跟隨人數其家中隨甲銀米
仍留爲該員家口養贍之資竝未令其裁革
項聞戶部於本年三月間行文各處以各員

在外既有隨甲則家中不應重領銀米將各員隨甲銀米停其支領且自雍正七年大兵起程之日爲始凡家中領過銀米於本人應領俸銀俸米之內照數坐扣還項該部因慎重錢糧之意並未請旨遽爾通行甚屬錯謬殊非朕體恤出征人員之本意今特頒諭旨凡軍前之大臣官員等家中已領之隨甲銀米不必扣還其應領之項照常給與並將此旨通行各處軍營知之 己巳四川總督黃

廷桂奏言建昌鎮所轄竹核地方當涼山之中爲苗疆腹心其東南一路有吡姑及魚紅地方層巒疊嶂爲諸蠻出入門戶俱請添設遊擊一員守備一員千總二員把總四員兵五百名谷堆地方爲咽喉要道請添設都司一員千總一員把總二員兵四百名其東北一路有格落地方乃蠻部出沒之處請添設都司一員千總一員把總二員兵四百名至於大赤口爲竹核左翼門戶且有諸彝盤踞

請添設參將一員守備一員千總二員把總四員兵八百名其小河壩地方所在險要請添設都司一員千總一員把總二員兵四百名又竹核西距靖遠營一百七十餘里中係諸彝巢穴請於適中之勒必鐵地方撥靖遠營守備一員把總一員兵一百五十名駐守再竹核去新舊營汛甚屬遼遠非建昌一鎮所能統轄請將竹核協副將改設總兵一員左右二營都司改設遊擊二員再增中營遊擊守備各一員千總二員把總四員兵三百名共一千五百名分爲三營以成體制其竹核迤南一帶有阿都等處地方更大彝蠻愈衆俟設鎮安營之後再行次第料理得旨黃廷桂所奏竹核安兵設鎮一事關係緊要朕聞川省蠻地從前雖屢次用兵然或懸賞誘致指爲投誠並未加以懲創又或允蠻逃避而附近良懦轉遭搶擄以致衆心不平前案未結而釁端復啟又或畏難退縮捏報撤師

草率完結此次竹核安兵設鎮務須籌畫周詳布置完密俾邊圉永靖始爲有益大學士鄂爾泰熟悉彼地情形著悉心詳議具奏尋議川屬凉山一帶週圍數千里竹核適當其中形勢寬平四達蠻境各種番蠻皆反覆不常岳鍾琪前議於竹核設副將一協兵止一千二百名固屬單弱不足以資控制今黃廷桂請將竹核改協爲鎮并分設各營所議已屬周詳但名爲一鎮兵不過一千五百名且總核兵數雖有四千名而零星分布仍不足壯聲勢而鎮番蠻據臣愚見竹核鎮營固須妥算而阿都等處應并熟籌兵力宜合不宜分蠻巢宜遠不宜近但使我勢聯絡不必是處設防臣謹擬於竹核一鎮設兵三千名內撥兵一千名分駐吡姑格落等處魚紅大赤口阿都沙馬普雄地方各設參將一營額兵各一千名互爲犄角則凉山雖濶蠻種雖繁而一重鎮五大營上連建昌下接昭通三鎮

雄峙舊營環拱控馭則指臂相牽擒剿則呼吸立至如果將弁得人似可邊圉永靖其作何安設塘汛可否抽撥弁兵伏祈皇上敕下黃廷桂等毋專執成議亦毋以臣言爲然熟商妥酌請旨定奪從之 辛未諭辦理軍機大臣等從前應行發遣黑龍江等處罪犯曾改發扎克拜達里克等處令其開墾耕種後因伊等在彼甚不得力是以停其改發上年賊人窺伺扎克拜達里克彼時所有罪人跟隨官兵守護城垣竭力捍禦甚屬可憫朕已加恩除其罪名令充綠旗兵丁入伍効力續據順承親王等奏稱伊等深知感戴朕恩共思黽勉可見有罪之人予以自新之路仍可望其改惡從善若發往黑龍江三姓諸處不過終身爲人奴僕而已朕意嗣後將應發黑龍江等處人犯遣往北路軍營附近可耕之地令其開墾効力在伊身可以努力自新而於屯種亦甚有益其如何遣發安置

之處爾等詳議具奏 以提督江南學政詹事府詹事張廷璐爲浙江鄉試正考官刑科掌印給事中王瓚爲副考官通政使司右叅議邵基爲江西鄉試正考官翰林院侍講喀爾欽爲副考官編修李錦爲湖北鄉試正考官編修鄧啟元爲副考官 鑲黃旗滿洲副都統延福緣事革職調鑲黃旗蒙古副都統吳禮爲本旗滿洲副都統陞王府長史德敏爲鑲黃旗蒙古副都統仍兼長史行走○壬申署雲南貴州廣西總督高其倬奏言雲南普洱府屬思茅土把總刀興國勾結苦蔥蠻悖叛煽動元江夷人圍攻普洱府城又通關大寨猺夷附和苦蔥過阿墨江直犯他郎地方元江營守備馬漢勛率把總康天錫奮勇殺賊賊衆敗退賊益兵來攻康天錫深入陣亡臣即調遣迤東迤西官兵令臨元鎮總兵官董芳總統節制由元江景東兩路趲期進剿報聞○癸酉諭理藩院額駙阿寶從前曾

請駐牧原駐地方著照所請駐牧伊原有房舍歷年已久著交與地方官修理再賞銀二千兩以爲安插屬下人等之用 甲戌陞左翼前鋒統領青保爲正藍旗蒙古都統仍留西藏以鑲白旗滿洲都統莽鵠立兼理正藍旗蒙古都統事務 靖邊大將軍順承親王錫保等奏言據賊營脫歸之喀爾喀根都爾錫等供稱小策零敦多卜領兵於奇林處會齊從布拉罕等處發兵一萬五千和通胡爾哈等處發兵一萬五千二路來犯阿爾泰於七月間進兵等語臣等詳思準噶爾賊性姦狡或一路而來或分路前進俱不能預定今將特斯路預防一萬精兵擇水草處駐劄外再將軍達爾濟所領兵丁尚未到白格爾范清曠所運之米已有三千餘石運到白格爾地方應加防守臣等現派原任提督周瑛何祥書等統領三千綠旗兵丁前赴白格爾駐劄又調副都御史阿成阿所領家選兵二千

臣處黑龍江兵一千內扎薩克兵一千喀爾喀兵二千同駐台錫里山以三千綠旗兵爲翼在白格爾深溝高壘嚴排鹿角防守糧米既可要賊之來路策應達爾濟遠來之兵亦甚有益奏入報聞○旌表江南桃源縣烈女劉文生女劉氏強姦不從投繯殞命給銀建坊入祠致祭如例○乙亥實授索柱爲內閣學士兼禮部侍郎○旌表陝西興平縣烈婦于天良妻張氏拒姦不辱被刃殞命給銀建坊入祠致祭如例○丙子喀爾喀扎薩克鎮國公屠巴故遣官致祭○戊寅吏部議覆署廣東巡撫楊永斌疏言潮陽縣屬洋烏一都前經題明全歸普寧管轄但該都原分首尾中三段請將附近潮陽之洋烏頭洋烏中仍歸潮邑管轄至貴山都之洞仙經等八十六村亦應照界割歸普寧管轄應如所請從之○予故護軍參領加副都統銜綽殷祭葬如例 己卯以浙江杭州左翼副都統張正興

署湖廣提督○辛巳辦理軍機大臣等遵旨議奏喀爾喀扎薩克一等台吉策勒克率領四十餘人與準噶爾賊人連戰二次奮勇殺賊以致陣亡伊子孫屬下人等俱被賊人搶擄其子密什克被賊擒去十日方能脫出現在伊母處
皇上軫念策勒克等實心効力特沛恩膏賞策勒克妻銀五百兩緞十足伊屬下人等各賞銀十兩緞一足得傷者加賞銀五十兩順承親王已行文扎薩克圖汗親王策旺扎卜遵旨頒給至策勒克之一等台吉其子密什克或蒙恩加等承襲恭候欽定得旨台吉策勒克奮勇陣亡可憫可嘉策勒克著追封輔國公令伊子密什克世襲罔替伊等家產牲畜著順承親王豐裕賞給以圖永久○壬午吏部議奏八旗都統印房筆帖式五年効力期滿調補部院者向未議定何等品級現在俱用爲無品筆帖式請照八旗左右二司筆帖

式之例定爲八品令其食俸庶品級均平以示鼓勵從之○癸未署陝西總督查郎阿甘肅巡撫許容奏言閏五月間臨鞏平涼西寧所屬州縣暴雨冰雹傷損田禾西碾二縣麥豆生虫已委員查勘加意撫綏得旨甘省預備軍雷而州縣中又有被災歉收之處該督撫須多方賑恤毋使貧民失所至於西寧乃滿漢官兵駐劄之所口糧草料需用更多尤宜詳審情形悉心籌畫作何料理之法期於軍需民食兩有裨益○署西寧總兵范時捷奏言西寧一鎮邊牆最爲緊要向例交與營汛員弁捐修原屬有名無實因循日久未能完竣臣思衝要之地必須整理完固庶稽查防範有所資藉再西寧鎮城乃番夷來往要區今亦有頽塌之處隨咨商署督臣查郎阿撫臣許容等經署督臣委員會同估勘聽署督臣酌議興修外合先奏聞得旨西寧城垣邊牆皆應酌量修理但督臣查郎阿等事務

繁多且相隔路遠難於指示稽查范時捷駐劄西寧著就近管理酌量定議○甲申戶部議覆廣西巡撫金鉷疏言桂林府屬之永寧州地居萬山之中爲犴獐出沒之所向年改州之初有富祿常安二鎮設有狼兵守隘每名各給兵田二十畝富祿鎮狼兵五十六名頭目管事官屬五名又該鎮養贍田三百二十畝常安鎮狼兵八十四名又該鎮養贍田三百二十畝竝無頭目等名色兩鎮共給兵田三千七百畝各自耕種不輸差餉此項田畝原在額荒數內自清查首墾將所給田畝令與民一體陞科各兵養贍無資何能供應差遣請將富祿常安二鎮原給兵田仍循舊例免其陞科至富祿鎮向有頭目管事官屬人等原不隨兵差操實屬虛糜應請革去將伊等名下田畝添設狼兵九名以昭畫一均應如所請從之

大清世宗敬天昌運建中表正文武英明寬仁
信毅大孝至誠憲皇帝實錄卷之一百二十

大清世宗敬天昌運建中表正文武英明寬仁
信毅大孝至誠憲皇帝實錄卷之一百二十一

監學司中光祿大夫監議官大錄議政大臣侍和政大學士兼兵部尚書總理兵部事三等伯加十五級臣鄂爾泰

楊敬亭，字大友，江陰人。官主事。居江大，係大子。大學得和說。大學士兼戶部。尚書。仍兼官吏部。尚書。翰林院掌院。

第三十四卷臣張廷玉跪奏為
江蘇巡撫
大得賑恤大臣不棄
大學士兼工部尚書仍兼

翰林院掌院事加二級臣福祿壽加二級大夫正議大夫太子太保東閣大學士兼禮部尚書加六級臣徐本堯祿大夫

錢收大臣臣等聞大
王守理部書。衆官大
學青島。下臣三泰
年春。

教修

雍正十年壬子秋七月乙酉朔享

太廟遣世子熙良行禮諭內閣我朝設立各省駐防兵丁原以捍衛地方申明武備其歷來所定規條俱屬盡善無可更張乃近有以一二事瀆陳朕前者一則稱駐防兵丁子弟宜准其各省鄉試獨不思國家設立駐防兵原令其持戈荷戟備干城之選非令其攻習文墨與文人學士爭名場屋也在弁兵之子弟有能讀書向學通曉文藝者原聽其來京應試以廣伊等進取之途竝未禁其從事

文學也若悉准其在外考試則伊等各從其便競尚虛名而輕視武事必至騎射生疎操演怠忽將來更有何人充駐防之用乎況我聖祖仁皇帝臨御六十一年所以教養弁兵者至周至渥如果應行早已著為令典又何待今日之喋喋數陳乎一則稱駐防兵丁身故之後其骸骨應准在外瘞葬家口亦應准在外居住獨不思弁兵駐防之地不過出差之所京師乃其鄉土也本身既故之後而骸骨家口不歸本鄉其事可行乎若照此行之日久將見駐防之兵皆為漢人是國家駐防之設竟為伊等入藉之由有是理乎以上二條皆事之必不可行者著將朕旨頒布於外俾無知之人豁然醒悟不得再行妄奏○又諭工部尚書馬喇不曉部務辦理該旗事件亦多昏瞶率意著革職○實授常有為戶部右侍郎仍兼理副都統事務○以陝西寧夏將軍傅泰為正紅旗滿洲都統仍署寧夏將軍

世子熙良署正紅旗滿洲都統正白旗蒙古副都統圖克善緣事革職調正藍旗蒙古副都統郭多渾為正白旗蒙古副都統仍兼正藍旗蒙古副都統○丙戌陞刑部左侍郎武格為工部尚書轉刑部右侍郎托時為左侍郎擢刑部郎中覺和托為刑部右侍郎○以翰林院編修吳文煥為陝西鄉試正考官編修李天寵為副考官提督安徽學政內閣學士王蘭生為江南鄉試正考官檢討吳大受為副考官○丁亥山東巡撫岳濬疏報曹州鉅野縣民李恩家本年六月初五日牛產瑞麟脣身牛尾遍身皆甲甲縫有紫毫玉定文頂光彩爛生實為盛德瑞徵請詔付史館宣示中外得旨山東地方前歲被水百姓不獲寧居去夏今春雨復愆期朕遣官發粟賑恤多方幸未至流離失所即京師去夏今春晴雨亦不均調西北兩路不得已用兵征戍將士露處於外備極勞苦朕心戒懼修省但知

感

上天垂象示微之恩不敢望嘉祥之誕錫今聞瑞麟產於東省實增愧悚該撫奏請詔付史館宣示中外皆屬虛文將朕朝乾夕惕對越上天之愀忱曉諭天下臣民共知之○戊子以原任戶部侍郎汪潒爲大理寺卿○戶部議覆漕運總督魏廷珍疏言淮安府城內漕標城守等營兵餉俱係各州縣旋解旋支並無預備銀兩請撥司庫銀三萬兩永遠存貯淮安府庫如兵餉撥解未到時遇有急辦之事即先爲動支俟解到即行補項應如所請從之○己丑諭內閣朕師傅原任尚書顧八代子孫甚貧著加恩賞銀一萬兩○庚寅諭辦理軍機大臣等京中送往軍營之器械等項甚多驛站雖備有車輛每遇物件繁多之時官車不能敷用勢必僱募民車運送寬裕給與價值惟是官吏等奉行不善每於數日之前即將商民車輛牲口拘集於驛站地方令

其守候備用至起運日期始給運價其餘耽擱之日並不准算以致商民探知信息即行遠避行旅畏懼不前嗣後著嚴行禁止○又諭八旗及各省之出征護軍叅領協領以下驍騎校以上等官俱係揀選派往之員因俟伊等凱旋現在各缺俱委員署理今軍務未定伊等軍前行走勞苦轉不得陞遷朕心深爲憫念嗣後應陞副都統之出征叅領協領等官內該管大臣如有深知者即將伊等保送兵部俟副都統缺出時列名具奏其副護軍叅領以下驍騎校護軍校以上各缺應將出征人員作何補授之處爾等確議具奏尋議八旗出征人員應陞缺出理應補授但伊等出征以來有無効力之處在京大臣無由而知應令各該都統及駐防將軍等據實查明出具考語咨部註冊伊等應陞缺出准與在京應陞官員一併列名具奏補授其缺仍行署理至軍前副護軍叅領以下驍騎校護

軍校以上人員內如果有効力之處亦令該將軍聲明咨部俟有缺出補授從之○調鑲白旗護軍統領邁祿爲左翼前鋒統領仍留西藏以鑲黃旗蒙古都統色爾璧仍署左翼前鋒統領○禮部議覆湖北巡撫王士俊疏言荊州府江陵縣爲

關聖帝君盡忠授命之地塚墓現在當陽今有五十二代孫歲貢生開朝泰歲時奉祀請照解州洛陽守祠之例授爲五經博士准其

世襲應如所請從之○辛卯議敘纂修

聖祖仁皇帝實錄大臣官員人等陞職加級賞賚有差○壬辰諭內閣甘肅地方年來預備軍需雖事事取辦於公帑而百姓輸輓効力亦甚勤勞朕心軫念屢加恩澤聞今歲蘭州平涼西寧等府所屬州縣內有雹損蟲傷之處已諭該督撫留心賑恤停止催科嗣聞從前雨少之處俱已霑被甘霖秋成可望朕心深慰因念甘肅爲軍需總匯之區百姓急公

趨事所當格外加恩以昭朕子惠元元獎勞

賞善之至意著將河東河西各屬民戶屯戶及番民等本年應徵各項銀米草束一概蠲免若有已經完納者准作來年正賦該督撫等務體朕心督率有司敬謹奉行俾秦民均霑實惠儻有豪胥猾吏舞弊作姦使澤不下逮者經朕訪聞定將該管大小官員嚴加議處○解陝西甘肅布政使諾穆圖任陞陝西寧夏道鄂昌爲陝西甘肅布政使司布政使○敕封廣西興安縣海陽山神爲安流襄績之神○予故輔國公賴士祭一次造墳立碑如例○癸巳以鑲黃旗叅領佟山署陝西寧夏右翼副都統○甲午

孝懿仁皇后忌辰遣官祭

景陵○添設江南江寧水師守備一員把總二員駐劄江口歸江寧將軍統轄京口水師都司千總把總各一員駐劄高資港歸江陰副將兼轄移朱張圩千總駐大沙順江洲大港

把總駐朱張圩歸鎮江營管轄從署兩江總督尹繼善請也○乙未諭辦理軍機大臣等訓練烏朱穆泰十旗兵丁著散秩大臣色楞前往與吳禮布協同辦理○賜大學士鄂爾泰第宅一區○命四川省開局鼓鑄從四川巡撫憲德請也○丙申命戶部尚書海壽專管刑部事務工部尚書范時繹兼管刑部事務調兵部尚書鄂爾奇爲戶部尚書刑部尚書性桂爲兵部尚書以左都御史福敏署工部尚書○護寧遠大將軍岳鍾琪奏言移駐穆壘官兵臣等遵旨於六月二十七日辰時分作兩路啟行臣同副將軍常泰統兵一萬二千名由濶舍圖大路直進副將軍張廣泗同署鎮安將軍卓鼎統兵七千餘名由鄂龍吉之北約洛圖一路前進兩路官兵約於濶舍圖地方會合吏派官兵四千餘名委副將譚定邦馮廷雄總理糧運護送車輛駝隻分爲四運而進又委總兵岳舍奇帶領湖廣官

兵殿後凡應行事宜統俟師抵穆壘之後次第料理奏入報聞○丁酉命少保大學士伯鄂爾泰督巡陝甘經畧一應軍務頒給印信○以刑部左侍郎托時兼理工部侍郎事○禮部議覆河東總督田文鏡疏言扶溝縣故明鴻臚寺鳴贊郝騰繼妻高氏遇流寇破城守貞不屈被刀殞命請照例建坊入祠以旌節烈應如所請從之○戊戌諭辦理軍機大臣等西路軍營事務岳鍾琪辦理總不妥協著回京其寧遠大將軍印務著署陝西總督查郎阿署理副將軍張廣泗暫行護理查郎阿年來辦理軍務事事合宜克勝大將軍之任但肅州路遠未便來京請訓今特命大學士鄂爾泰馳驛前往肅州傳朕訓諭查郎阿著先期料理並賞給公用銀一萬兩陝西總督印務及所辦軍需事著直隸總督劉於義前往署理賞銀五千兩朕有訓諭劉於義之處亦著大學士鄂爾泰傳旨許容范時復俱

著在肅等候。查郎阿起身時著知會提督樊廷一同出口。以浙江總督署刑部尚書李衛署直隸總督。安徽巡撫程元章署浙江總督。湖北布政使徐本署安徽巡撫。原任陝西甘肅布政使鍾保署湖北布政使。司布政使。○己亥中元節遣官祭。

永陵

福陵

昭陵

昭西陵

孝陵

孝東陵

景陵

孝敬皇后○諭內閣朕命大學士鄂爾泰前赴肅州計議軍務。署將軍傅泰著即在寧夏等候。西安將軍秦布侍郎署巡撫馬爾泰著於八月內到肅等候。大學士有面傳之諭旨。秦布起身時將軍印務著侍郎杭奕祿暫行署

理。又諭貴州提督哈元生朕另有簡用之處。著馳驛來京。陛見。並賞給公用銀三千兩。製備衣裝。貴州將弁內有伊平日所深知之幹員。准揀選四五人。令其隨後來京。亦著巡撫給與驛馬。并酌量每人賞給銀兩。以資路費。以廣西左江總兵官霍昇署貴州提督。廣西新太副將崔善元署廣西左江總兵官。○庚子。陞內府護軍統領永福為護軍統領。前往北路軍營。在順承親王叅贊處行走。調署浙江巡撫。刑部右侍郎王國棟回京。以署浙江總督程元章兼管巡撫事務。調山西布政使蔣洞來京。加侍郎銜。前往肅州辦理軍營事務。以山西按察使溫而遜署山西布政使。司布政使。○辛丑。敕諭吏部尚書署寧遠大將軍查郎阿奉天伐罪。治世之常經。鋤暴除兇。安邊之遠畧。逆賊噶爾丹策零狂悖冥頑。父子濟惡。妄欲侵陵我屬國。窺伺我邊陲。包藏逆心。狡焉思逞。朕以此賊不除。終為眾蒙古之巨患。是以命將興師。聲罪致討。乃

數年以來。岳鍾琪調度無方。制防鮮術。運籌決勝。並件機宜。爲將士之所輕。致軍心之不振。深負任使。有忝元戎。茲特命爾署寧遠大將軍印務。統領陝西等處大兵。一切事宜。爾與副將軍常賡張廣泗酌定方畧。公同計議而行。勿謂已能而不納衆論。勿當事會而猶復遲回。勝算期於萬全。神機定於方寸。整衆須如山岳之重。撻伐以奮雷霆之威。鼓勵戎行。申明紀律。遠偵密探。先事預防。各路大兵及蒙古兵丁。聽爾調遣。凡遇有警。即遣發官兵應援撲剿。賊中有情急來歸者。加意撫恤。其不抗拒官兵者。毋加殺戮。凡遇駐劄之處。加謹約束。兵將所過地方。申明軍令。毋得騷擾百姓。毋得淫人婦女。毋得離散人之父子夫婦。毋得損壞人之墳墓室廬。毋得強取貨物。毋得驅役平民。以副朕戡亂靖逆安民綏衆之意。其或有臨戰退縮。貽誤擾亂軍機者。爾會同商議。文官四品以下。武官三品以下。即

以軍法示衆。官兵有犯小過者。會同商議。徑行處治。毋泯沒戎行之勞績。毋寬縱違法之弁。兵法紀務極嚴明。賞罰悉期公當。一切機宜。爾商酌調遣。有應知會北路靖邊大將軍者。即行知會。一同辦理。爾其殫乃心力。數殫謀猷。克奏膚功。永綏邊徼。欽哉。故敕。諭辦理軍機大臣等。據靖邊大將軍順承親王錫保奏稱。七月十四日。賊衆來侵烏孫珠爾處。傳爾丹等接戰。數次敗賊前隊。及賊兵後隊全至。盡力衝突。我師失利。還歸大營等語。烏孫珠爾處。傳爾丹領兵萬餘。既已破賊前隊。則後隊自應敗去。如何我師遂被衝散。回營用兵失機。罪在不赦。去歲傳爾丹冒昧進剿。損傷官兵。迨回科布多時。尚能整頓軍旅。邀截賊衆。是以特恩寬免其罪。理應竭力報効。冀雪前恥。何以又致債事。儻因賊衆我寡。恐有疎失。相機回營。尚屬可原。若係輕躁懦弱。以致失機。即應革職。嚴加議處。或官兵內有

見敵先潰者即應正法示衆著大將軍順承親王秉公詳查據實陳奏○以翰林院編修劉統勲爲河南鄉試正考官刑部郎中崔琳爲副考官編修梁詩正爲山東鄉試正考官編修王承堯爲副考官編修于辰爲山西鄉試正考官雲南道御史原裘戴爲副考官○旌表饒黃旗滿洲烈婦前鋒永德妻五查喇氏聞夫陣亡投繯殞命給銀建坊入祠致祭如例○壬寅命署江南江寧將軍穆森來京以原任湖廣荊州將軍吳納哈爲江南江寧將軍○以前鋒統領穆克登爲散秩大臣西路軍營叅贊○癸卯諭兵部凡分發各省試用之武進士原令其學習營務必須弓馬優嫻熟諳營伍方可題補近見兩部於武進士題補守備時不計科分之淺深弓馬之優劣概以爲合例以致督撫提鎮因一時營員內不得合例之人遽將科分尚淺營伍未諳之武進士題補轉不如用久歷行伍之人於營

務有裨益也嗣後武進士題補守備若科分不及應選之期即屬不合例可傳諭各省知之○管理工部果親王允禮條奏寶源局鼓鑄錢文事關重大新派之員未能諳練嗣後請於期滿之時將滿漢人員內酌保一員留任一年新舊輪番更替庶局務得以諳練從之○甲辰移直隸天津府鹽捕通判駐青州分司所屬之越支場裁滄州分司所屬之利民阜民利國富民海盈阜財六場鹽大使缺其竈戶歸各該州縣管轄從長蘆鹽政鄂禮請也○乙巳諭辦理軍機大臣等國家重務在於用兵凡領兵大員有表率之職者必合志同心聯爲一體屏畛域之見去推諉之私始能奮勇直前以濟公事焉有各懷疑貳互相推卸尚能壯三軍之氣而成克敵之功乎○劉世明武格伊禮布等志氣頹惰俱懷怨望之心而劉世明與武格又復彼此推諉將一營軍務視爲兩歧伊等俱係國家重用之大

臣而居心行事如此無怪乎將弁兵丁等相率效尤急情偷安無振作同仇之氣也似此深負簡任全不思國家不得已而用兵之苦心著嚴切傳諭劉世明武格伊禮布知之○大學士蔣廷錫病故遺疏奏聞得旨大學士蔣廷錫受

皇考聖祖仁皇帝知遇之恩簡直內廷教誨玉成二十餘載自朕即位由學士陞任侍郎旋擢尚書簡命為大學士蔣廷錫才識優長經猷明練其總領度支則謹慎出納釐剔弊端其叅贊機務則恪敬小心周詳慎密綸扉重地倚賴方殷上年忽患疾症特遣良醫調理漸次獲痊今夏舊恙舉發較前加劇朕心憂慮切諭太醫竭力調治每日病狀著兩次奏聞方期夙疾有瘳豈料溘焉長逝朕心傷悼輟朝一日其所用棺殮之屬皆頒自內府已命內大臣率領侍衛賜奠茶酒應得卹典著察例具奏樞櫟回籍時再著散秩大臣帶領

侍衛前往奠酒送其起程戶部滿漢堂司官亦著往送沿途文武官弁在二十里以內者俱著至櫬前弔奠並遣人護送安徽巡撫程元章疏報潛山等七縣開墾雍正九年分田地七十頃有奇下部知之○丙午以一等侍衛保明署鑲黃旗滿洲副都統○添設廣西馬平縣屬三都汛穿山鎮巡檢各一員從廣西巡撫金鉷請也○丁未諭內閣侍郎杭奕祿著由西安前赴寧夏等候大學士鄂爾泰有面傳之旨其西安所辦軍需事件著內閣學士德齡協同左都御史貽直辦理

山東巡撫岳濬疏報曲阜縣六月二十五日午時皎日正中慶雲環捧日輪五色絢爛又於日之西南有霞光三道歷午未二時絢縵不散正值

孔林工竣之時上瑞疊臻千秋罕遇得旨朕素不言祥瑞惟有朝乾夕惕感

上天垂象示儆之恩何敢冀嘉祥之疊錫已屢

降諭旨訓教天下臣民矣。但自信生平尊師重道。至誠至敬。闕里爲

聖人之鄉。尤切羹牆之慕。乃前歲

文廟重新。慶雲湧見。今園林工竣。復覩嘉祥。

或者朕誠敬之衷。爲神明之所歆格。故顯示以象。用昭日監在茲之義。與朕感慶之下。倍

增虔悚。爰諭天下臣民共知之。○已酉。諭內

閣二等侍衛哈岱著加護軍統領銜。帶打牲

烏喇兵一千名。前往西路軍營。○又諭。據湖

南巡撫趙弘恩奏。稱南嶽爲朕主壽之山。廟

宇碑亭。宜加重葺。朕思皇天無親。惟德是輔。

朕受

天眷命。爲天下主。一行事。一舉念。皆

上天

皇考之所照臨。若身無失德。自蒙垂慈護佑。儻

德行有虧。居心行事。獲罪於天。天下億萬臣

民。豈能代朕祈禱而寬其譴責乎。朕御極以

來。無日不以此訓示天下臣民。凡有奏請建

壇誦經。爲朕祝釐延壽者。悉嚴諭禁止。至於山嶽江河之神。爲地方捍禦。禦災錫福。兆庶者。則虔修祠廟。潔誠展祀。以申報享之忱。竝非爲朕一身祈福也。

上天

皇考實鑒此衷。南嶽之神佑我楚民。廟貌久未修理。應照該撫所請。敬謹舉行。惟是趙弘恩陳奏之詞。識見鄙陋。不知朕心。用頒此旨。再行宣諭。俾衆共知之。○以左都御史福敏協

理大學士。內務府總管鄂善。署兵部侍郎。○

庚戌。諭內閣。楚南所屬地方。山嶺重復。產鐵

之處甚廣。採取最易。凡農民耕鑿器具。與窮

黎之衣食。皆藉資於此。雖歷來飭禁。而剗挖

難以杜絕。但廢鐵出洋。例有嚴禁。楚南地方

產鐵既多。外來射利商販。每於就近設爐。錘

鍊運赴湖北漢口發賣。或由漢口轉運兩江。

遞販。以致出洋亦未可定。不得不立法查察。

以防其漸。著湖廣督撫與兩江督撫會同悉

心妥議本地應否准其創挖開口如何稽查務期民用有資而弊端可杜庶公私兩有裨益○江南河道總督嵇曾筠疏報高堰石工告成得旨洪澤湖爲東南諸水總匯之區全賴高堰大堤以爲保障朕特發帑金建立石工以爲久遠之計乃二年以來風濤恬靜汛水安瀾工作易施成功迅速此皆湖神默佑之功朕心深爲感慶著重修廟宇虔誠展祀以申報享其修築堤工之大臣官員及効力各官俱著分別議敘○辛亥以翰林院檢討隋人鵬署日講起居注官○壬子諭禮部制科以四書文取士所以覘士子實學且和其聲以鳴國家之盛也語云言爲心聲文章之道與政治通所關鉅矣韓愈論文云惟陳言之務去柳宗元云文者所以明道不徒務采色夸聲音而以爲能也况四書文號爲經義原以闡明聖賢之義蘊而體裁格律先正具在典型可稽雖風尚日新華實竝茂而理法

辭氣指歸則一近科以來文風亦覺丕變但士子逞其才氣辭華不免有冗長浮靡之習是以特頒諭旨曉諭考官所拔之文務令雅正清真理法兼備雖尺幅不拘一律而支蔓浮夸之言所當屏去秋闈期近可行文傳諭知之○添設山西繁峙縣平刑站大同縣聚樂站驛丞各一員從山西巡撫覺羅石麟請也○癸丑諭內閣普泰鄂善俱著在吏兵二部辦事行走范時繹著兼辦兵部事務不必管理刑部刑部尚書事務著唐執王管理又諭向來大計叅劾官員除貪酷發審外其餘俱送部引見嗣後特叅文武官員比照大計之例列在浮躁不及等款亦著送部引見永著爲例○諭禮部滿洲教習俱係旗人每月給與公費竝無別項差使不過在館充數三載即得一官爾等當不時稽查分別優劣如果教導有方即當奏聞其不能稱職者亦應題叅今值酌定成例之初凡教習期滿作

何補用之處。著會同大學士等妥議具奏。尋議嗣後滿洲教習三年期滿其行走勤謹。教道有成者。列爲一等。係舉人。以小京官即用。貢生。生員。以筆帖式即用。已補筆帖式之貢生。生員。照舉人例用。列爲中等者。再留教習三年。如教導有成。帶領引見。照例咨部選用。不能稱職者。禮部不時查叅。從之。○陞正藍旗滿洲副都統蘇爾鼐爲本旗護軍統領。○移山西孟縣芹泉驛駐平定州測石舖。從山西巡撫覺羅石麟請也。

大清世宗敬天昌運建中表正文武英明寬仁信毅大孝至誠憲皇帝實錄卷之一百二十一

大清世宗敬天昌運建中表正文武英明寬仁
信毅大孝至誠憲皇帝實錄卷之一百二十二

監修總裁官內閣大學士兼翰林院掌院學士總纂修官內閣學士兼翰林院掌院學士

纂修官內閣學士兼翰林院掌院學士纂修官內閣學士兼翰林院掌院學士

纂修官內閣學士兼翰林院掌院學士纂修官內閣學士兼翰林院掌院學士

纂修官內閣學士兼翰林院掌院學士纂修官內閣學士兼翰林院掌院學士

纂修官內閣學士兼翰林院掌院學士纂修官內閣學士兼翰林院掌院學士

敕修

雍正十年壬子八月乙卯朔以監察御史戴

永椿署山西按察使司按察使○靖邊大將

軍順承親王錫保奏言自今準噶爾賊人前

赴厄得爾河源地方臣等偵探已確酌議於

奔博圖山嶺發兵堵截共派滿洲蒙古兵一

萬八千名令王丹津多爾濟總統額駙策凌

王羅卜臧喇錫桑里達貝子特古斯羅卜藏

公羅卜藏叅贊查克旦塔爾岱阿岱前鋒統

領塔爾馬善副都御史阿成阿副都統阿那

布胡習禮額爾勤烏察拉王常哲庫訥阿思

哈布爾沙貝勒僧滾扎卜公羅布臧策布登
沙津達賴等分派督率於七月二十一起
程奏入報聞○丙辰諭宗人府海善從前甚
屬狂妄近已悔改著加恩賞給貝勒原銜○
免雲南昭通東川二府雍正九年分未完額
賦以八年被兵瘡痍未復也○丁巳遣大學
士尹秦祭

先師孔子○改廣西右江道原轄之鎮安府
歸左江道管轄南寧府原轄之湖潤寨及下

雷土州俱歸鎮安府管轄從廣西巡撫金鉞
請也○戊午祭

大社

大稷遣皇五子弘晝行禮○給內務府總管丁

皂保侍郎銜○己未秋分夕

月於西郊遣顯親王衍潢行禮○庚申諭辦理

軍機大臣等前經降旨令盛京等處備兵以

候調遣今派盛京船廠黑龍江兵一萬其盛

京兵著護軍統領扣婁副都統白爾赫圖率

領船廠兵著領侍衛內大臣薩穆哈率領黑龍江兵著盛京侍郎和善內閣學士吳金率領俱於目下起程至達里剛愛過冬以便來年青草發時各處調遣○以吏部右侍郎任蘭枝為順天鄉試正考官翰林院侍讀楊炳為副考官○禮部議覆順天學政吳應棻疏言順天府童生考試舊例除大宛二縣屬府丞專理外其餘二十三州縣於州縣考試後俱由霸昌道錄取轉送查霸昌道駐劄昌平州各州縣有往返八九百里或六七百里者殊屬未便嗣後請就近改歸四路同知各按所屬州縣錄取轉送永著為例應如所請從之○壬戌諭內閣向來偷挖人參之犯若係滿洲蒙古則發往江寧荊州有滿洲兵駐防之省城當差若係漢軍漢人則發往廣東廣西雲貴烟瘴地方當差近聞發遣廣東人犯例在崖州陵水等處此地水土最惡易染疾病每多傷損朕思此等不良之輩雖孽由自

作然其情罪較之盜犯尚覺稍輕即發遣之本意亦欲全其性命也今因水土不服以致傷生殊可憫惻若將此等人犯改發沿海一帶衛所入伍充軍俾得保全軀命似亦法外之仁著廣東督撫會同按察司確查議奏其雲貴廣西等處地方風土有與此相類者亦著該督撫將如何改發之處妥議具奏○兵部議覆河東總督田文鏡疏言登州鎮新添兵一千名其中石二營請添設千總一員把總一員外委三員以資約束應如所請從之○西路副將軍張廣泗等奏言臣等自巴爾庫爾起程七月十一日直抵穆壘竊見穆壘地處兩山之間築城其中形同釜底又兩山蔓延叢雜受敵甚易據守甚難實非屯兵進取之地查巴爾庫爾地處平原南北兩山南山綿亘數千里直至伊里北山漸折而西南至濶舍圖與南山鎖合實為巴爾庫爾之關鍵再西出烏闌烏蘇口則北山已斷南山之

北即屬沙磧。是以康熙五十四年間。大兵屯駐已爾庫爾。即於濶舍圖派兵駐守。今請於濶舍圖駐劄重兵。濶舍圖以西之烏蘭烏蘇口。南山一帶之陶賴無克克嶺。北山一帶之小濶舍圖色必忒。鄂龍吉察罕哈麻爾鏡兒泉。及糧運臺站經由之噶順吳爾圖。哈必爾漢等處。俱各安駐兵丁。則與已爾庫爾大營。形勢通聯。可免賊人窺伺。但此事宜迅速舉行。交冬降雪。則沙磧地面。賊人肆意出沒。萬難籌畫矣。得旨。所奏甚為明晰。著速即辦理。竝傳諭大學士鄂爾泰。署大將軍查郎阿。目下撤兵之後。如何防範進勦。竝吐魯番回衆。作何安插之處。詳悉酌議辦理。○張廣泗又奏。言臣抵穆壘之後。身親閱歷。見大將軍岳鍾琪調度兵馬。籌運糧餉。以及統馭將士之處。多屬乖方。不敢不據實列奏。一穆壘兵丁除滿洲蒙古外。其餘旗多係步兵。而日行站程。俱係五六十里至七十餘里不等。路徑崎

嶇。身負口糧。器械炎日奔走。沿途困憊。迨行抵穆壘。全無布置。及探有賊騎窺覷。岳鍾琪倉皇忙迫。令圍營官兵沿山架梁。兩三晝夜不得休息。其派撥兵丁。旋派旋移。畧無寧所。一穆壘城工未就。駐劄營盤關係甚重。臣與副將軍常賚兩營所駐。正當西北要衝。乃派兵止二三百人。或百餘人。即岳鍾琪營盤。亦僅兵丁數百人。倘遇有警。將何以抵禦。至於部曲隊伍。自有一定統束。岳鍾琪每值調撥。繫於各營分攤。在兵丁則為雜湊。在官弁則非本管。且如鎮協。以至千把。所屬兵丁。一經抽撥。即應以該管官帶往。餘留者。竟乏統束。卒遇別有調撥。不得不另委將弁。官與兵素不相識。徒滋紛亂。一準噶爾賊人。專資馬力。我兵制敵。必須馬步兼用。而岳鍾琪立意用車。查車戰利在平原。今自己爾庫爾至穆壘。沿途溝塹崎嶇。或紆道繞過沙磧。情勢總不相合。至馬步兵丁。除弓箭鳥鎗外。止令各帶

木棍一根。大刀長戟等械全無預備。官兵莫不竊議。一岳鍾琪堅執穆壘地方。可以收放駝馬。今經細勘。並無收放之處。倒斃甚多。因令綠旗兵留馬二千匹。餘悉趕赴烏闌烏蘇。濶舍圖一帶收放。查烏闌烏蘇。濶舍圖祇駐二千餘兵。差使繁多。何能分管牧馬。且距穆壘甚近。萬一賊人窺伺。勢難兩顧。殊屬可虞。一穆壘駐兵數萬。糧運最爲緊要。岳鍾琪初謂車行甚易。加以駝運。至九月可運貯十萬石。不致缺悞。今查車路多亂山大嶺。必須遠從沙磧。正屬賊人出沒要衝。難於防護。兼之岳鍾琪一聞賊信。不論虛實。輒令停止糧車。似此遲緩。轉瞬冰雪在地。運送更艱。數萬之衆。何所托命。一岳鍾琪罔恤士卒。號令不明。鎮將大員。時加呵斥。參遊以下。日事鞭撻。平時議論風生。或聞小警。張皇失措。性復剛愎。不喜人言。題奏事件。奉到諭旨。數月不宣。臨事突然傳示。令人莫測。誠僞諸事。怪僻。難以

悉數。臣雖力圖規正。無奈置若罔聞。軍務重大。不敢代爲徇隱。伏祈

皇上乾斷。奏入報聞。○改直隸馬蘭鎮屬之松棚路千總一員。羅文峪把總一員。兵一百一十一名。仍歸薊州協管轄。從署直隸提督路振揚請也。○癸亥。

太宗文皇帝忌辰。遣官祭

昭陵。○諭辦理軍機大臣等。據副將軍張廣泗等奏稱。穆壘形勢。四面受敵。必不可以駐劄。大兵收廠運道。正在可虞。交冬下雪之後。賊人無處不可出沒。甚難籌畫等語。上年據岳鍾琪奏稱。巴爾庫爾屢被賊人侵擾。穆壘形勢。實爲萬全之地。願以全家性命。保其有益無害。是以廷議允從其請。今張廣泗等所奏如此。則岳鍾琪欺罔之罪。擢髮難數矣。目今賊人聞知穆壘駐兵之信。必悉力前來阻撓。侵擾。惟是賊衆現在盤踞北路。未必更有多人。分向西路。我兵速乘此時撤回。巴爾庫爾

乃第一要策也。不必更有遲回。至所稱濶舍圖。烏闡烏蘇等處。各分別駐兵等語。伊等身在地方。必有真知灼見。聽其酌定就近辦理。務期妥協。至於吐魯番回民。年來輸誠向化。情甚可憫。我兵既撤之後。回民應如何料理。或酌留官兵在彼防護。或將頭目緊要之人。安插近地。著張廣泗等就近商議辦理。○又諭。聞北路所派四省綠旗官兵數年以來。有陸續在軍前病故者。今年七月間。該管將弁始接到部文。而各兵家口從前所領月餉。例應從病故之日追出。歸入截曠項內。朕思國家養育兵丁。加恩優渥。而出征身故之兵丁。尤朕所格外矜憫者。其未奉文之先。家口所領月餉。悉著加恩免追。再今年七月間。該提鎮等始接部文。而所轄協營道路遠近不齊。奉文先後不等。其秋季餉銀。必有已經散給者。著將各兵應扣秋季之項。無論已領未領。一概賞給。以示朕恩恤故兵之至意。○甲子。

遣官祭

關聖帝君。○乙丑。

太祖高皇帝忌辰。遣官祭。

福陵。○以一等侍衛巴靈阿。署奉天錦州副都統。○添設四川泰寧巡檢一員。從辦理泰寧事務。都統鼎格請也。○丙寅。免江南滁州。寧國等五州縣雍正九年分水災額賦有差。○丁卯。以鑲紅旗叅領德義。署本旗滿洲副都統。鑲紅旗護軍叅領七格。署正藍旗蒙古副都統。○兵部議覆奉天府尹楊超曾疏言。奉天地方。旗民雜處。住址參錯。每遇強劫重案。旗員民官互相推諉。並無一定責成。嗣後如旗員管轄地內有民人失事者。將該管旗員查叅疎防。限年緝獲。民官免其查叅。仍令與旗員協緝。其民官管轄之地有旗人失事者。亦照此例處分。至遇有人命等案。請令旗民官員會同查驗。仍照該管地址分別議處。應如所請。從之。○移福建龍巖縣縣丞駐溪。

口雁石司巡檢駐適中驛從署福建總督郝玉麟請也○戊辰調鑲白旗滿洲副都統李柱爲正藍旗滿洲副都統○己巳以刑部右侍郎覺和托協辦步軍統領事務○山東巡撫岳濬疏言東省自閏五月內甘雨溥降從前被旱之處次第均霑穀豆雜糧皆得及時布種六七兩月雨澤均調秋禾暢茂現今收穫登場爲歷年未有之豐稔得旨令歲春月東省郡邑雨澤愆期而兗東二府爲尤甚朕心憂慮遣官發粟糶賑兼施從前嗷嗷待哺之民有所倚恃心志安貼豫順之氣感召

天和遂得連沛甘霖轉荒歉而爲豐稔即目前之事觀之益知朕平日切切以天人相感之理訓示天下臣民者確乎其不爽也民爲邦本食乃民天凡爲官者思欲感召

天和必以暢悅民情爲本平時與百姓同其好惡不使閭閻有抑鬱之情偶值雨暘之不均旱潦之將兆即據實奏聞俾朕得早爲百姓

經營以爲補救挽回之策在民則當安分循理共敦善良偶遇災祲即思招致之有由恐懼警惕不敢因困苦而生愁怨之心如此上下交修官民胥勉將見和氣致祥災沴不作比戶享盈寧之福矣勉之勉之○庚午辦理軍機大臣等議奏據辦理藏務侍郎僧格等奏已爾布國雅木布葉楞庫庫穆三汗在西藏極邊遠處萬里之外與中國從未相通今仰慕

皇仁特遣使請安進貢方物辭意誠懇應令來使至京朝見但天寒路遠往返務須二年應行文僧格等宣布

皇上體惜遠人之意轉諭來使令其旋歸並加恩賞賚給與馬匹更換俾得從容起程得旨依議隨敕諭已爾布國雅木布葉楞庫庫穆三汗據爾等奏稱從前不知內地禮儀未遂觀光之志今遣使朝覲恭請訓諭進貢之物不多畧盡恭敬之忱等語朕爲天下主一視

同仁爾等汗越在邊遠自古未通華夏慕朕仁化萬里輸誠朕甚嘉悅所進方物悉已收納第念道路遙遠往返艱難爾使臣即由西藏遣回爾等汗但與西藏貝勒頗羅鼐協力和衷維持黃教以副朕普育羣生之至意特賜緞疋玻璃磁器各種一併發往○予故太子太傅文華殿大學士兼戶部尚書蔣廷錫祭葬加祭一次謚文肅○壬申北路副將軍王丹津多爾濟額駙策凌奏言臣等奉大將軍王錫保調委統領滿洲蒙古索倫喀爾喀等兵二萬餘人追擊準噶爾逆賊至厄爾得尼招地方於八月初五日遇賊連擊十餘次日暮追至大山梁間殺賊萬餘尸遍山谷河流盡亦負傷逃走者甚衆所獲器械駝馬牛羊無算現在賊衆逃往鄂爾昆上游向推河而去臣等率領大兵自厄爾得尼招起程尋敗賊踪跡追勦前進奏入報聞○癸酉諭辦理軍機大臣等據王丹津多爾濟等報稱八

月初五日在厄爾得尼招地方我兵與賊人交戰賊衆大敗由鄂爾昆之上游向推河逃遁而去等語可將原摺錄寄大學士鄂爾泰署大將軍查郎阿知之賊人既由西爾哈腦兒投阿爾泰而去若遇雪阻截必向阿濟一帶潛行向已爾庫爾以覓生路大學士鄂爾泰等速將北路得勝情由寄知已爾庫爾軍營令其於阿濟要隘之處派兵堵截毋得疏忽再者穆壘大兵撤回之時賊人或於中途窺伺或潛襲我軍之後務須加意防範至於已爾庫爾乃根本之地亦須計算萬全俱著大學士鄂爾泰等就近妥協籌畫○諭理藩院輪班朝覲之蒙古王貝勒貝子公等今歲著停其來京○叅贊內大臣侯馬蘭泰奏報八月初九日賊夷二千餘人來犯西爾哈招臣親選兵一千一百名同副都統費雅斯哈土默特總管珠胡代喀爾喀協理台吉孫都布帶領出城迎擊賊兵大敗斬殺百餘人所

獲器械無算。次日追至那壘果爾地方。賊夷連夜遁去。隨行知綏遠將軍馬爾賽。呈報大將軍順承王訖。奏入。報聞。○甲戌調福建臺灣總兵官呂瑞麟。為福建金門總兵官。廣東碭石總兵官蘇明良。為福建臺灣總兵官。○八旗都統等遵旨議覆。著守倉庫舊係八旗馬甲。應盡行撤回。以便操演。請於八旗滿洲蒙古漢軍或閑散人。或養子開檔人及官兵之家。下陳人內。挑取二千二十四名。照步甲例。給與錢糧米石。專令看守倉庫。其中有應挑取護軍馬甲者。照常挑取。至管轄此項兵丁。每旗滿洲蒙古漢軍合派十員。統計八十員。再於降級革職官員內。挑選一百二十人。共為二百員。令其管轄。此所派降革人員。如不實心効力。交部分別加等治罪。其有勉力行走五年無過者。令該管大臣。於伊等應陞之缺。一併列名從之。○乙亥諭辦理軍機大臣等。劉世明由侍衛之職。朕加恩用至總

兵提督。伊在提鎮任內。居官尚好。是以用為福建巡撫。陞授總督。上年西路領兵需人。朕念伊熟悉邊地情形。特召來京。命為副將軍。授以巴爾庫爾領兵之重任。料伊受朕深恩。必思匪勉。宣力為將弁之表率。豈知伊苟且瞻顧。退縮不前。全無奮勵振興之氣。既忝職任。重負國恩。著革職。交與署大將軍查郎阿。照總兵或副將之例。於領兵艱苦之處。令其効力贖罪。倘再有錯誤疎忽。即行參奏。在軍前正法。○行聖公孔廣祭。以孔林工程告竣。率其族人七十四人來京。赴圓明園謝恩。上召孔廣祭入見。諭曰。爾為至聖先師後裔。當存聖賢之心。行聖賢之事。一切秉禮守義。以驕奢為戒。且爾年齒尚少。尤宜勤學讀書。敦品勵行。凡爾同族之人。亦當共相勸誡。共相砥礪。為端人正士。爾等果能遵朕訓諭。學問日進。品行醇謹。不墜家聲。

即所以報國恩也。諭畢，賜孔廣蔡松花石硯一方，蟒錦緞七疋，族人緞各一疋。江南松江提督馬世龍疏言：「今年七月間，海潮泛溢，沿海被水，弁兵衣食未免不敷。臣已咨商督撫，預支一月俸餉。歲內陸續扣還，得旨：「弁兵被水，衣食不敷，朕心深為軫念。所支一月俸餉，著即賞給，不必扣還。」戊寅，以鑲藍旗蒙古副都統噶爾錫署本旗護軍統領。○靖邊大將軍順承親王錫保奏言：「副將軍王丹津多爾濟額駙策凌等追賊至厄爾得尼招奮，勇擊殺賊衆萬餘，除檄行綏遠將軍馬爾賽建勲，將軍達爾濟各領兵截殺外，臣選派三千兵馬，委扎薩克台吉葛木丕爾前鋒叅領達度等率往截殺。即日起程，奏入報聞。」○己卯，諭內閣：「倉場侍郎岳爾岱前經告病，近已痊愈，著仍回倉場之任。」○命莊親王允祿管理正黃旗滿洲都統事務，以正紅旗滿洲副都統雅瑚署鑲藍旗護軍統領。○壬午，遣官

祭

歷代帝王。遣官祭城隍之神。○四川、川北總兵官張玉年老休致，以四川夔州副將王廷詔署四川、川北總兵官。○移廣東合浦縣縣丞駐永安地方，從署廣東總督鄂彌達請也。○癸未，實授李衛為直隸總督，郝玉麟為福建總督，程元章為浙江總督，鄂彌達為廣東總督。徐本為安徽巡撫，楊永斌為廣東巡撫，鍾保為湖北布政使，司布政使甘汝來為廣東布政使，司布政使。○甲申，命撥戶部庫銀二百萬兩，解送北路軍營，備賞給有功官兵之用。○添設山東濟寧河標城守營千總一員，把總二員，從河東河道總督朱藻請也。

大清世宗敬天昌運建中表正文武英明寬仁
信毅大孝至誠憲皇帝實錄卷之一百二十二

大清世宗敬天昌運建中表正文武英明寬仁
信毅大孝至誠憲皇帝實錄卷之一百二十三

監修總裁官光祿大夫經筵講官太僕寺卿弘文館大學士兼兵部尚書總理事務正副加十五級臣鄂爾泰

總裁官光祿大夫經筵講官太僕寺卿弘文館大學士兼兵部尚書總理事務正副加十五級臣鄂爾泰

第三等伯加十五級臣張廷玉光祿大夫經筵講官太僕寺卿弘文館大學士兼兵部尚書總理事務正副加十五級臣鄂爾泰

翰林院掌院事加二級臣楊敏光祿大夫經筵講官太子太保東閣大學士兼禮部尚書加六級臣徐本光祿大夫

經筵講官議政大臣協辦內閣大學士書禮部尚書仍兼管太常寺鴻臚寺事臣王泰等奉

致修

雍正十年壬子九月乙酉朔諭辦理軍機大

臣等。此次準噶爾逆賊志欲搶奪澤卜尊丹
巴胡土克圖侵掠喀爾喀部落直越察罕叟
爾大營由杭愛山肆行猖獗王丹津多爾濟
額駙策凌參贊大臣塔爾岱及諸王大臣台
吉等共領滿洲蒙古喀爾喀等兵二萬奮勇
尾追千里到鄂爾昆河厄爾得尼招地方諸
王大臣及台吉官兵等同心協力為國輸誠
奮勇攻擊將三萬逆賊斬殺大半餘賊喪膽
奔逃甚屬可嘉此次軍功非尋常勞績可比

官員兵丁著從優議敘。其隨從額駙策凌在克爾森齊老地方擊賊官兵著加倍議敘。領兵効力之王貝勒貝子公扎薩克台吉等應賞巴圖魯名號。陞授職銜。今於議敘軍功之先。特沛恩綸。喀爾喀和碩親王丹津多爾濟著賞給智勇名號。喀爾喀多羅貝勒冊卜凌著賞給超勇名號。喀爾喀多羅貝勒冊卜登。從前在阿爾泰軍前著有勞績。去年在蘇克阿爾達胡地方攻擊準噶爾。又懋著勤勞。朕已賞給信勇名號。此次在厄爾得尼招大敗準噶爾賊衆。又復追擊。効力前驅。冊卜登著封爲多羅郡王。扎賴特固山貝子特古斯從前在阿爾泰軍前曾効力行走。此次在克爾森齊老擊賊甚力。在厄爾得尼招。又復大敗賊衆。建立功勳。特古斯著封爲多羅貝勒。敕漢輔國公羅卜藏隨從額駙策凌。在克爾森齊老擊賊。又在厄爾得尼招大敗賊衆。又與貝勒冊卜登塔爾岱等追擊賊衆。効力前

驅羅卜藏著封爲固山貝子。喀爾喀扎薩克一等台吉巴海從前在阿爾泰軍前曾効力行走。去年亦著有勞績。此次在厄爾得尼招大殺賊衆。建立功勳。喀爾喀扎薩克一等台吉葛木丕爾。去年懋著勞績。此次在克爾森齊老額駙策凌隊內力戰得傷。回至察罕叟爾軍營調治痊好。復行前往追擊賊人巴海。葛木丕爾俱著封爲輔國公。塔爾岱著授爲黑龍江將軍。統領軍營東三省兵丁。卓爾海著授爲內大臣。署理黑龍江將軍事務。其餘扎薩克喀爾喀王貝勒貝子公台吉內若有似此勞績出衆之人而遺漏者。著大將軍順承親王丹津多爾濟額駙策凌查明具奏。又諭朕念馬爾賽之祖圖海功績。令其配享聖祖皇考於太廟。馬爾賽所襲之三等公爵。加爲一等。擢用爲大學士。復賞阿達哈哈番。令伊子承襲恩施稠疊。衆所共知。朕以爲馬爾賽必感戴殊

恩實心爲國効力。因授爲大將軍。遣往軍前。乃伊未至歸化城。先將馬匹牲畜傷損數千。在口外第八臺處。聞科布多地方。準噶爾賊衆消息。便自怯懦。奏請往歸化城。又將馬匹牲畜。不擇好水草之處。收放折損大半。且不禁約兵丁。縱其貪饕飲食。肆意糜費。以致變賣衣服。如此乖謬妄爲之罪。朕猶寬恕。與以効力贖罪之途。授爲將軍。令往扎克拜達里克。而馬爾賽沿途又不調養駝隻。倒斃數千。

然朕猶優容之。望其効力也。頃準噶爾賊衆來犯察罕叟爾之大兵。直越杭愛。搶奪喀爾喀等部落。王丹津多爾濟策凌。叅贊塔爾岱等。率領大兵尾追至鄂爾昆之厄爾得尼招地方。大敗賊衆。殲其大半。賊拋棄馬畜及一切器械。膽裂奔敗。大將軍順承親王已劄令馬爾賽會同達爾濟截殺。王丹津多爾濟等亦以賊衆大敗。投往推河。行文於馬爾賽。且馬爾賽接閱順承親王等劄後。奏稱賊若來

推河。必緣衣克教拉而遁。今已將衣克教拉左近之草焚燒等語。如此則馬爾賽自應如前所奏。率兵前往推河預備截殺。乃賊衆既至推河。而馬爾賽猶逗留。留扎克拜達里克。至十三日始出城爲追趕之狀。行二三日。聞有賊兵將往白格爾之語。即藉端而回。夫以徒手敗走之賊。不行追逐。知而放去。又不奏明達爾濟領兵往追。情由朕以馬爾賽必有怯懦逗留。明知故誤等情。曾降諭旨於大臣等。

今據叅贊胡琳叅稱。一聞賊來推河信息。將軍達爾濟等即整齊二標兵丁前往截殺。賊衆而馬爾賽並不發兵。傳臬請兵殺賊。至於跪求伊亦決不允許。至十三日因臣等標下兵起程。馬爾賽不得已同行。至半路而回。等語。馬爾賽擁兵萬餘。有心耽誤國事。豈但大負朕之深恩。自古以來如此背負國家者。史冊中亦爲罕觀。國法軍法俱難寬宥。著將馬爾賽之綏遠將軍領侍衛內大臣公以及賞

給阿達哈哈番俱行革退其將軍印務著欽
拜暫行署理領侍衛內大臣員缺著侯馬蘭
泰補授其公爵係伊祖圖海立功所得著馬
禮善承襲今已行文令馬爾賽明白具奏俟
回奏時將馬爾賽正法之處另降諭旨○又
諭軍營叅贊正紅旗蒙古副都統胡琳著補
授鑲藍旗護軍統領喀爾喀王敏珠爾多爾
濟旗分協理台吉孫都布著給與扎薩克一
等台吉職銜賞銀五百兩副都統費雅思哈
著賞給護軍統領職銜○又諭此次準噶爾
賊人前來時額駙策凌屬下及喀爾喀扎薩
克滾布冊凌遊牧等處俱被擄掠著順承親
王查明照舊歲賞給被搶喀爾喀產業之例
一面辦理一面奏聞○又諭喀爾喀扎薩克
圖汗策旺扎布親王喇嘛扎卜公扎薩克等
畏懼退縮俱由陣前逃回遊牧目今行兵之
際軍法豈可姑容著行文順承親王丹津多
爾濟額駙策凌將陣前逃回之汗王以下台

吉暨領兵之副都統等查明嚴加治罪○諭
西路軍營將弁兵丁等噶爾丹策零父子兇
頑世濟其惡戕害臣服我朝之蒙古部落窺
伺我邊疆國家不得已用兵之苦心已屢經
曉諭官弁兵丁等知之矣夫三軍司命在於
將帥朕慎重其選以岳鍾琪乃將門之子久
歷行間從前用兵青海曾有勞績且於西陲
情形素為熟練伊亦自信克當此任是以命
為西路大將軍一切徵兵運餉選將設官之
事凡有所請無不允行實冀其殫心竭力奏
績邊疆為一勞永逸之計豈料伊秉性粗疎
辦事濶畧平居志大言大似有成算及至臨
時則張皇失措意見游移且賞罰不公號令
不一不恤士卒不納善言自奉太豐待下鮮
惠今畧舉其失機一二事言之前年冬月陞
見入都軍營之事全無料理以致賊人盜竊
駝馬傷我弁兵嗣後朕時時降旨諭令慎密
周防乃今年正月賊人越過大營直至哈密

及塔爾那沁等處搶掠牲畜戕害回民伊將令不行調度無術竟令已入網羅之寇賊由坦道遁逸而去又如穆壘駐兵之舉實由岳鍾琪之奏請且稱願以全家性命保其萬全乃我兵移駐之始即有賊人潛過穆壘河東搶擄馬匹傷害官兵現今運道收斂時受侵擾此皆岳鍾琪失算誤國之昭著者其他顛倒昏情疎忽錯謬之處不可枚舉以統兵之人居心行事如此無怪乎三軍之士離心解體兵氣爲之不振也朕思用兵之事關係重大似此一籌莫展屢失機宜則軍務何日能竣我三軍之士何時得以休息用是特降諭旨將岳鍾琪調回京師以吏部尚書陝西總督查郎阿署理大將軍事務命大學士鄂爾泰親至肅州頒賜敕書指授方畧查郎阿素性忠良赤心爲國虛懷謙受能體下情自辦理軍需以來事事妥協邊疆情形皆所深知一到軍營與副將軍張廣泗常賚等合志同

心和衷共濟必能運籌決勝靖寇安邊是在爾將弁兵丁等鼓舞奮興急公努力盡洗從前萎靡怠惰之習合千萬之人爲一心則忠誠感格和氣致祥必邀

上天之默佑迅速成功膺國家優隆之爵賞是此日之更換將帥酌改規模實爾西路軍營通塞否泰轉移之機也今年七八月間賊兵以三萬人侵犯北路深入厄爾得尼招地方意欲迎奪喇嘛攔掠喀爾喀蒙古我師奮勇前追殺死賊兵萬人積屍如山河水盡赤賊夷乘夜逃奔拋遺馬匹牛羊器械不計其數而我兵受傷者不過十餘名領兵之大小將弁未損一員此實行間將士合力同心仰邀天祐之明驗也今賊人既受大創於北路未必不輕視西路重整餘力以向巴爾庫爾冬春防範尤宜嚴密不可疎忽著署大將軍等將此曉諭各營將弁兵丁咸使知悉至岳鍾琪屢次失機之罪甚大律以國法不容寬貸又

聞軍營弁兵無不含怨著署大將軍查郎阿通行詢問軍營將弁兵丁等岳鍾琪自領兵以來果屬事事乖張人心共怨否抑或尚有可取之處否務使三軍之衆人人各抒已見據實舉出即有互異不妨兩奏以聞○正黃旗漢軍都統金以坦緣事革職陞正黃旗漢軍副都統趙弘濟爲本旗漢軍都統鑲紅旗漢軍副都統尚崇坦緣事革職擢鑲藍旗副叅領尚崇璧爲鑲紅旗漢軍副都統○丙戌戶部議覆湖南巡撫趙弘恩疏言乾州所屬甕流溪等九寨及新撫夸坨上下二寨苗民慕化輸誠願納糧賦應如所請其糧賦令乾州同知徵管坐撥鎮草營兵餉從之○丁亥上詣怡賢親王殯所奠酒○鑲紅旗蒙古都統鑾儀使公噶爾薩緣事革職以散秩大臣公訥親爲鑾儀衛鑾儀使○移直隸永寧路原駐柳溝守備一員帶兵三十名竝添派永寧城四海冶堡周四溝堡三處兵三十一名駐

防岔道城撥永寧路外委把總一員駐防柳溝從署直隸提督路振揚請也○庚寅上以怡賢親王次日發引復親詣殯所奠酒○調鑲白旗漢軍副都統倭星額爲本旗滿洲副都統○命署兩江總督尹繼善來京陛見以漕運總督魏廷珍署兩江總督兵部尚書性桂署漕運總督○署貴州巡撫元展成疏報安順思南等府開墾雍正九年分田地一百四十頃有奇下部知之○壬辰諭辦理軍機大臣等康親王崇安母妃患病著將撫遠大將軍印交與歸化城都統丹晉收貯崇安即速來京○諭內閣今年江浙地方海潮驟長沿海居民被水衝溢朕已敕令該督撫等加意撫綏毋使窮民失所近聞江南南匯縣下砂頭二三場等處竈戶鹽丁被水者甚衆著將商捐義倉及嘉興存貯米石動支賑卹迅速料理俾獲寧居○癸巳諭辦理軍機大臣等朕念博爾屯之祖舊日勞績將博爾屯

屢加任用伊竝不阻勉向前因命往扎克拜達里克馬爾賽軍前効力乃王丹津多爾濟等在厄爾得尼招大殲賊衆之後所有疲困奔逃之賊前至扎克拜達里克伊有精兵萬餘竝不邀擊懦怯觀望俾其遁去博爾屯如曾勸馬爾賽而不允其罪尚輕如竝未經勸過則伊之首領亦難保矣一切情節著據實回奏其叅贊大臣內大臣都統俱著革去以間散公在軍前効力行走甲午陞署倉場侍郎兆華爲盛京戶部侍郎命寧古塔將軍常德前往北路軍營以正白旗滿洲副都統杜賚署寧古塔將軍旌表直隸廣平縣烈婦張文玉妻王氏拒姦不從被毆殞命給銀建坊入祠致祭如例乙未諭青海王貝勒貝子等今年七月間準噶爾策零敦多卜帶領三萬賊衆侵擾內地被喀爾喀副將軍王丹津多爾濟等帶領滿洲等兵二萬將賊兵截殺幾盡喀爾喀等既能如此奮勇殺賊

爾等何獨不能乎各宜鼓舞振興踴躍効命賊兵前來侵擾青海祇有噶斯一路爾等須在緊要隘口預備看守儻有賊兵前來務期協力追殺悉行勦除將此曉諭爾等部落知之大學士伯督巡陝甘經畧軍務鄂爾泰奏言北路逆賊於八月初五日在厄爾得尼招地方被我兵大敗由鄂爾昆河源向推河地方逃去查畢濟一帶乃逆賊敗遁必由之路中間有衮他馬哈之沙磧係畢濟要隘離巴爾庫爾不過三百餘里臣隨於八月二十八日咨行護寧遠大將軍印務張廣泗令其挑選滿洲察哈爾精兵二千名交前鋒統領阿思海總統佐以副都統達什選綠旗精兵一千名交總兵官張存孝總統佐以副將馮廷雄即日起程前往衮他馬哈堵截竝令阿思海等一到衮他馬哈即遣弁兵哨探畢濟一帶如有賊踪飛報張廣泗領兵追勦又令張廣泗備兵數千名遣發繼進以壯聲援得

旨。鄂爾泰身在肅州。一聞信息。即調遣兵丁截殺賊衆。斯可謂爲國之大臣。達爾濟諾爾渾。欽拜等。擁兵萬餘。駐劄扎克拜達里克。遇準噶爾窮寇徒手奔逃。並不迎擊。待其已過。虛作追趕之勢。怯懦不堪。將此寄與伊等知之。○改湖南衡州府屬桂陽州爲直隸桂陽州。管轄臨武藍山嘉禾三縣。從湖南巡撫趙弘恩請也。○丙申。工部議覆湖南巡撫趙弘恩疏言。六里苗疆新設永綏協。駐劄兵丁。查有吉多坪地勢寬廣。實爲扼要。請建造城垣官署。并設倉廩數間。貯穀以備兵食。至乾州向設百戶。請照舊安設。令與汎弁一同居住。額徵雜糧。即令各百戶按數徵收。再苗民漸知向化。所有永綏民苗兵丁。應許其互結姻親。並於每里設立義學二處。以資教導。均應如所請。從之。○丁酉。諭喀爾喀七旗王貝勒貝子。公。台吉。屬下人等。去年朕降旨。令爾等移居內地。爾等並不感悅。遵行。朕又屢次催

促。始勉強遷移。此次準噶爾賊兵前來。幸王丹津多爾濟等帶領大兵將賊兵殺敗。爾等始得脫免。否則爾等部落豈能保護產業牲畜。朕思爾衆喀爾喀本屬一體。豈有甘居庸懦受人庇護之理。嗣後各宜激烈奮發。將賊兵悉行勦滅。不特永享昇平。抑且垂光史冊矣。勉之。○浙江布政使張元懷。緣事革職。調江西布政使。王紘爲浙江布政使。司布政使以原任通政使司右通政宋筠署江西布政使。司布政使陞河南南汝道盧煒爲河南按察使。司按察使。○授故奉恩將軍佛照弟多義爲奉恩將軍。○旌表山東濟寧州烈婦徐國柱妻吳氏。拒姦不從。服毒殞命。給銀建坊。入祠致祭。如例。○庚子。諭內閣。穎俊懦弱。兩營兵丁二千名。欲其馬上嫺熟。故給馬二百匹。令其學習。今聞兩營兵丁內有騎射可觀者。亦有騎射雖屬生疎。而馬上尚能發矢者。以此觀之。則學習至一二年後。馬上可以嫺

熟矣八旗操演兵丁雖令學習步射鳥鎗走
遠等技但滿洲兵丁以馬上嫻熟爲要著計
八旗滿洲兵丁數目每十名給馬一匹即將
旗下餽養之官馬撥給俾兵丁等於馬上操
演竝令小心秣飼勿致損傷（以領侍衛內
大臣拉錫署太僕寺卿）護寧遠大將軍印
務張廣泗奏言穆壘一處難以駐兵業經臣
等備奏情形竝請移駐濶舍圖地方在案今
於八月二十八日臣與署鎮安將軍卓鼐參
贊顧魯墜在營鎮將等密商將大營全撤自
穆壘起程於三十日已回濶舍圖但細閱濶
舍圖地方路徑叢雜氣候嚴寒兼之城堡尚
未築完四處草廠盡被賊人燒燬實亦難於
久駐臣等不敢固執前議請將大兵盡行撤
回巴爾庫爾惟於附近緊要處酌量安兵駐
守查得陶賴無克二處係賊人南來徑路
各安兵一千五百名搜濟察罕哈麻爾二處
係賊人西來大路各安兵一千名又鏡兒泉

噶順竝烏普土克爾忒克三處在巴爾庫爾
之北賊人或由沙磧或由北山皆可前來應
於鏡兒泉安兵二千名噶順安兵五百名烏
普土克爾忒克安兵一千名又圖古里克圖
爾庫爾二處在巴爾庫爾之東北乃賊人自
阿濟畢濟越沙磧而來之要路應各安兵一
千名仍於一切要隘之處分安小卡倫遠行
哨探另派兵丁看守牧廠哈密塔爾沁二
處亦俱添兵防守再穆壘大兵既撤則吐魯
番孤懸一隅所當預籌駐兵運糧之道查吐
魯番原駐兵八千名竝現留押運糧糈之兵
丁五百名係分駐魯谷慶哈喇火州皮禪洋
海勒木津塞木津漢墩七處查勒木津塞木
津漢墩三處俱與賊近聲勢不能聯絡請將
三處官兵速行撤回歸併魯谷慶哈喇火州
皮禪洋海四處分駐竝將三處回民亦俱移
至魯谷慶等處城內居住庶免賊人窺伺而
我兵亦易於防範矣奏入報聞（辛丑喀爾

喀扎薩克圖汗副將軍策旺扎布緣事革爵以其族弟多羅郡王格勒克顏木聘爾襲替（壬寅諭辦理軍機大臣等喀爾喀貝勒策穆楚克納木扎爾帶伊屬下兵丁前往軍營因中途病足令伊弟與子將兵前往伊自回部猝遇色卜騰旺布屬下奇爾吉斯等背叛伊率屬下人拒戰身受鎗傷而亡其屬下兵丁奮擊奇爾吉斯等悉行斬殺甚屬可嘉著順承親王查明有已故受傷者議敘恩賞策穆楚克納木扎爾受傷身故朕心軫念著派侍衛部屬各一員前往祭奠賞銀一千兩）以正黃旗滿洲副都統噶爾錫署正紅旗蒙古都統（癸卯諭八旗漢軍都統等朕從前因八旗漢軍佐領下壯丁多寡不均特降諭旨著令均勻當日辦理此事之大臣等應將世襲佐領之壯丁仍添入壯丁不足之世襲佐領內不應將公中佐領之壯丁添入世襲佐領之內乃正紅旗從前勻派壯丁時將內

務府撥出之人添入甚屬錯謬八旗漢軍有似此辦理者俱著查明其壯丁不足之世襲佐領仍將世襲佐領之壯丁撥補量其壯丁之多寡或將兩姓合為一分佐領或將三姓合為一分佐領令其輪流管理則將來補授佐領時亦易得人再公中佐領之壯丁不足者仍將公中佐領之壯丁撥補著八旗漢軍都統等公同詳查畫一辦理（乙巳諭辦理軍機大臣等據索倫總管博爾本察等奏稱呼倫貝爾等處今歲所種地畝因旱歉收俟明年多為種植等語朕思種地一事如交與伊等則訓練兵丁必致貽誤著行文將軍卓爾海於齊齊哈爾愛渾墨爾根三處臺丁及水手屯丁內撥派五百名動用彼處存貯正項錢糧酌量給與盤費並置辦犁具籽種等項令其前往呼倫貝爾地方於明年春間及時耕種至秋後著卓爾海將如何收穫之處據實奏聞其動用銀兩仍著報部照數解還

丁未陞都察院左都御史彭維新爲戶部尚書。戊申解廣東按察使黃文偉任陞廣東肇羅道張渠爲廣東按察使司按察使。大學士伯督巡陝甘經畧軍務鄂爾泰條奏邊地屯田事宜一總理屯務副都御史孔毓璞請頒給關防以昭信守。一客民首報地畝應分別給與工價每籽種一石上等地給銀二兩中等一兩五錢下等一兩二錢其夫役人等除每月給與工價口糧外每年再加賞銀一兩皮衣皮帽銀二兩至所委監種人員暨跟役每日給銀六錢庶食用有資而驅遣無誤一屯田所需夫役俱在甘涼肅一帶僱募令各地方官出具保結以免逃逸其口內口外沿途往返給與口食並築土堡一座酌量可容夫役居住牛畜亦即於此圈餵。一屯田各處一應僱募夫役添補農具以及給散工價收穫禾稼等事俱著地方官協同稽查辦理庶免遲延偷竊等弊。一各項動用銀兩

應令總理屯務大臣奏報在軍需銀內動支另行報銷從之。己酉諭辦理軍機大臣等據順承親王錫保奏稱傅爾丹在烏孫珠爾地方並不整備官兵預籌堵禦之策輒輕調官兵進擊以致有誤軍機傅爾丹著革去公爵并令侍衛內大臣振武將軍。又諭北路軍營現有大將軍印信其振武將軍印信著收貯若有調遣之處請旨派人掌管。封故恒親王允祺子弘旺爲和碩恒親王。陞理藩院侍郎僧格爲鑲紅旗蒙古都統仍留西藏以理藩院侍郎納延泰署鑲紅旗蒙古都統。護寧遠大將軍印務張廣泗奏言臣等於八月二十八日自穆壘撤兵酌量分派令太原總兵官王緒級等帶兵四千五百餘名由南路往陶賴無克克搜濟等處駐劄又派松潘總兵官張元佐等帶兵四千餘名由北路往鏡兒泉噶順察罕哈麻爾等處駐劄臣與副將軍常賚署鎮安將軍卓鼐等領兵六

千餘名由中路行過噶順溝即將大兵交與常賚等管領臣輕騎兼程於初八日已抵巴爾庫爾辦理一切機宜常賚等大兵隨於初十日亦抵巴爾庫爾駐劄其分派由南北兩路前往之官兵亦於初八九十等日各抵駐劄之處沿途慎重防維竝無賊人窺探尾襲等情奏入報聞○庚戌諭內閣各部院堂官職任綦重必秉公潔已方能表率屬員朕諄諄訓諭奚啻再三近聞各部院堂官內尚有私受餽送者此端漸不可開爾等當反躬自省各加勉勵至於承辦國家事務惟期恪循天理至當至公不可稍涉偏私以致寬嚴失中又若本衙門堂官爲司官書吏所朦蔽而別衙門堂官有所見聞即宜互爲規戒休戚相關不得謂於己無與漠然不顧也爾等皆國家大臣聆朕諭旨當各自警惕遏抑私情和衷交勉以成昇平之治○調正藍旗蒙古都統青保爲鑲黃旗滿洲都統仍留西藏命

大學士鄂爾泰署鑲黃旗滿洲都統○大學士伯督巡陝甘經畧軍務鄂爾泰奏言邊地屯田最關緊要查肅州城南九家窰地方有荒地一區土高無水不能播種其九家窰之北上寨中寨水堡上鹽池等四堡俱係熟田亦因水源不足兼有漏沙每歲不過薄收請於上流鑿山開洞引千人壩之水逆流而上以避漏沙則九家窰荒地可墾且餘水下注則上寨等四堡熟地更可加倍豐收於民生軍需均有裨益從之 辛亥

孝慈高皇后忌辰遣官祭

福陵○壬子

上回宮○癸丑

孝敬皇后週年忌辰遣官致祭 諭辦理軍機大臣等察罕叟爾城甚小止可屯積米石是以順承親王又修木城朕意欲照扎克拜達里克城開展濶大著行文順承親王明歲動支錢糧修築或令彼處兵丁或由京師遣工

匠前去著順承親王一併議奏 授故奉恩將軍基壽子四十一爲奉恩將軍、甲寅添設江南漕標城守營把總一員外委把總一員漕標左右兩營把總各一員外委千總把總各一員從漕運總督魏廷珍請也

大清世宗敬天昌運建中表正文武英明寬仁信毅大孝至誠憲皇帝實錄卷之一百二十三

大清世宗敬天昌運建中表正文武英明寬仁信毅大孝至誠憲皇帝實錄卷之一百二十四

監修總裁官光祿大夫經筵講官大學士兼兵部尚書總理事務三等伯加五級臣鄂爾泰

總裁官光祿大夫經筵講官起居注太僕寺卿太子太保保和殿大學士兼兵部尚書翰林院

事三等伯加三級臣張廷玉光祿大夫經筵講官起居注太僕寺卿太子太保議政大臣兼兵部尚書

翰林院掌院事加級臣福敏光祿大夫經筵講官太子太保東閣大學士兼禮部尚書加六級臣徐永光祿大夫

經筵講官議政大臣協辦內閣大學士事務禮部尚書仍兼管太常寺鴻臚寺第臣三泰等奉

敕修

雍正十年壬子冬十月乙卯朔享

太廟

上親詣行禮○遣官祭

永陵

福陵

昭陵

昭西陵

孝陵

孝東陵

景陵

孝敬皇后○頒雍正十一年時憲曆○命領侍衛內大臣英誠公豐盛額承恩公慶復在議政處行走○

上詣

恩佑寺行禮畢。幸圓明園○丙辰。諭辦理軍機大臣等。蒙

天眷佑我國家。大軍在厄爾得尼招地方。大敗賊人。追奔逐北。凡我將士。不可因此懈弛。當仍如未敗賊時。一切備禦防範。尤加嚴固。朕

意今年賊雖敗北。明年或悉其衆力。越阿爾泰山。分爲數路。每隊一二千人。隨便潛來侵襲卡倫牧場。擾亂喀爾喀人等。得隙則進。不可則回。均未可定。賊計若出此。則我察罕叟爾。白格爾地方之兵。難於四出應援。著行文順承親王。與丹津多爾濟。額駙策凌等。將喀爾喀遊牧。移於僻遠堅固之處。令賊斷不能到大兵。分爲數隊。如何勒殺。如何衝突。令賊無隙可乘。預行詳計妥辦。毋忽○戊午。諭辦

理軍機大臣等。今年賊衆來侵之時。順承親王雖屢行文馬爾賽達爾濟等。令相機而行。並未示以如何截殺。如何堵禦。王身爲大將軍。馬爾賽等乃所屬之將。喀爾喀地方。及賊人所行路徑。王所素悉。乃不爲先期指授。殊屬疎忽。且馬爾賽失誤軍機。坐視殘寇免脫。王即應嚴加劾治。直待朕降旨將馬爾賽拏問。始行參奏。甚屬優柔觀望。著行文訓飭○陞吏部左侍郎吳士玉爲都察院左都御史

○吏部議覆雲南巡撫張允隨疏言。鎮沅府恩樂縣。係新經改流地方。請照小縣例。設立鎮沅府教授一員。恩樂縣教諭一員。二學取進童生各八名。分定土著寄籍各四名。其廩增出貢。統俟人文日盛。再議增置。應如所請。從之○兵部議覆署兩江總督魏廷珍疏言。漕標東海營汛。改設趕繒船隻。應添兵九十二名。並設千總一員。防守汛地。派把總一員。管轄船隻。應如所請。從之○己未。諭吏部。朕

見月選知縣內有由外省教職推陞者動經數月始能到京其雲南遠省竟有遲至一年者及由京赴任又需時日以致新選之地懸缺太久雖有署印之員視為傳舍事務不無廢弛應如何酌量變通有裨吏治爾部妥議具奏尋議嗣後應陞知縣之教職以及經歷等官請按其俸次深者預行截取二十員令該督撫詳加驗看給咨赴部與月選官一體陞選該員截取到部之日即將本任之缺照

例銓選其有不勝縣令之任者該督撫聲明緣由咨部註冊除正印官不准陞用外其教諭應陞教授及經歷等官應陞佐貳者仍照例陞用再教職等官內有題定三年或五年俸滿即陞者臨期令該督撫給咨赴部仍照月分陞用從之○正黃旗滿洲副都統巴圖緣事革職調正藍旗滿洲副都統阿魯為正黃旗滿洲副都統正紅旗蒙古副都統常有為鑲藍旗滿洲副都統擢鑲白旗副護軍叅

領富達禮為正紅旗蒙古副都統仍留軍營○調江西南贛總兵官劉章來京陞見○庚申調正黃旗蒙古副都統綽爾多為鑲紅旗滿洲副都統陞王府長史阿揚阿為正黃旗蒙古副都統○陞陝西寧夏協領恭格為陝西寧夏右翼副都統仍留軍營○辛酉諭辦理軍機大臣等聞得此次在厄爾得尼招敗賊時索倫等勞績茂著從前曾降諭旨厄爾得尼招大敗賊人之官兵內有在烏孫珠爾

處戰敗者功罪相當不必議敘爾等可行知順承親王厄爾得尼招戰勝之索倫內有在烏孫珠爾行間行走者仍照常議功獎賞○理藩院奏杜爾伯特固山貝子班珠爾等三旗地畝歉收請賞給被荒人等米石并借給買米銀兩得旨若俟行文扎薩克等行查未免遲延其扎魯特兩處地方著派出侍衛達哈蘇拉戶部司官一員帶銀一萬兩到破將家口數目查明賞賑杜爾伯特與黑龍江相

近著速行文將軍卓爾海會同該處御史將杜爾伯特蒙古人等家口數目查明。或動用倉穀。或動用庫銀。酌量賞給。○壬戌。諭內閣。領侍衛內大臣奏事之班次。不宜隨部院衙門。嗣後領侍衛內大臣前鋒統領護軍統領。合為一班。列於八旗奏事班次之後。內務府國子監合為一班。列於都察院理藩院奏事班次之後。鑾儀衛光祿寺。合為一班。列於內務府國子監奏事班次之後。○又諭宣化鎮署總兵官高弘榮。以放廢旗員。朕加恩擢用。乃聞伊才既平庸。人復衰惰。所屬之營伍。多不整齊。甚至貪黷居心。營私蝕帑。芳蹟昭著。深負朕恩。高弘榮著革任。將朕所聞各款。交與總督李衛審擬具奏。路振揚身為提督。何以並不查叅。顯係徇庇。直隸提督等官。著受總督李衛節制。宣化總兵印務。著署直隸天津總兵官補熙署理。天津總兵官印務。著署湖廣永州總兵官宋愛署理。宋愛未到天津。

之先。著長蘆巡鹽御史鄂禮暫署。○鑲白旗蒙古副都統羅密緣事革職。陞一等護衛那蘇泰為鑲白旗蒙古副都統。以鑲紅旗叅領穆敦署本旗滿洲副都統。○陝西甘州提督宋可進。緣事革職。以原任西路副將軍劉世明署陝西甘州提督。○癸亥。諭辦理軍機大臣等。喀爾喀副將軍王丹津多爾濟。自用兵以來。實心効力。去歲奮勇追殺準噶爾賊人。今又在厄爾得尼招統領滿洲蒙古喀爾喀兵丁。大敗賊衆。斬馘萬餘。挫其鋒銳。賊人喪膽。望風逃遁。自是軍威遠震。疆圉寧謐。喀爾喀扎薩克等。可共享太平之福。如此建立大功。雖賜伊墨爾根已圖魯之號。朕心猶為未足。向來外藩蒙古王等之子。並無晉封世子之例。朕念丹津多爾濟勞績昭著。用加特恩。著照宗室王等之例。將伊長子多爾濟色布騰封為世子。再翁牛特貝子羅卜藏喀爾喀扎薩克台吉齊旺。俱在厄爾得尼招奮勇殺

賊貝子羅卜藏著晉封爲貝勒扎薩克台吉
齊旺著晉封爲輔國公。命振武將軍叅贊
都統查克旦在靖邊大將軍叅贊上行走。
以江西袁州副將李登科署江西南贛總兵
官。禮部議覆奉天將軍那蘇圖疏言奉天
八旗漢軍設立清文義學業經二年有餘而
讀書子弟不盡通曉書義良由事非專設兼
未得善教之人所致請將奉天八旗漢軍二
十四佐領內每兩旗合爲一學共立義學四
所每學設清文教習一員以司訓課應如所
請從之。○停止本年直省秋審勾決情實罪
犯。甲子諭內閣馬爾賽本屬庸材我
皇考聖祖仁皇帝念伊祖大學士圖海舊日功
勲望其子孫成立將馬爾賽少年襲封公爵
訓誨成全優加擢用乃伊不能仰承
聖恩致遭罷黜旋經一載我
皇考不忍令其廢棄仍命襲封且加以格外之
恩榮身兼數職無非勉勵玉成以繼名臣之

後也及朕御極之初仰體
皇考優待勲臣之盛心首先及於圖海晉封一
等公配享

太廟兼立專祠永承禋祀又推恩及於馬爾賽
念其家世不同歷官年久加恩優待賞賚便
蕃此舉朝所共知者雍正五年大學士富寧
安奉差陝西滿洲之在內閣者僅有馬齊一
人又因年老不能辦事而滿洲之官階資格
可用爲大學士者復不得其人是以前馬爾
賽備員政府以爲班聯領袖其實未能贊襄
一事敷奏一言稍有補於政治之萬一此亦
舉朝所共知者朕初即位時命伊兼管鑲藍
旗都統伊以不能辦事力辭朕亦曲從其請
蓋其苟且偷安不能出力之心朕早已知之
至於伊歷來貪贓不法之案漸次敗露者朕
皆暗中爲之消弭其應追之贓銀數萬兩又
復降旨悉行寬免更賞世職以逮其子孫賜
帑金以固其操守凡所以恩待之者遠出諸

臣之上。以為馬爾賽苟有人心。必無有不知感恩圖報之理。去年六月間。傳爾丹統領北路大兵。駐劄科布多。悞被賊人所誘。貪功輕進。至於敗北。得順承親王調度運籌。重加整理。軍聲復振。朕因傳爾丹既已失機。不可再膺元戎之寄。順承親王久勞於外。既有保障之功。應令暫解軍務。回京休息。於是將馬爾賽授為北路大將軍。畀以討賊防邊之重任。伊在京承命之時。即有退縮怨望之意。及領兵行走。並不教訓兵丁。愛惜馬力。未到歸化城。而馬匹已陸續倒斃於道矣。行至第八臺。聞賊人有侵擾科布多信息。即逡巡畏懼。奏請退回駐劄。相機前進。乃至歸化城時。又不於水草好處牧放馬匹。日事遷移。以致兵丁之馬。損傷大半。其意以為馬力不敷。便可藉口推托。以遂其退避之姦志也。伊在京面奏。朕云。為將之道。必須與士卒同甘苦。乃伊到歸化城。即伐木取材。蓋造暖室。全忘士卒之

露處。竟欲久居於此。為娛老之計者。且心懷怨望。於衆大臣齊集之前。口稱領兵為大將軍。不如發遣黑龍江。反為安逸。其但有己而不念國家。悖逆庸愚。一至於此。朕知其不可以為大將。改授為綏遠將軍。令其領兵赴扎克拜達里克駐劄。以為堵禦邀截之計。今年七八月間。賊人侵犯察罕叟爾。輒敢越過杭愛深入我境。搶掠喀爾喀地方。是時大將軍順承親王。派委副將軍蒙古王丹津多爾濟額駙策凌參贊大臣塔爾岱等率領官兵尾隨賊人之後。於八月初四日。追至厄爾得尼招地方。與賊人相遇。鏖戰一日。自黎明至於昏黑。賊衆大敗。殺賊萬餘。積屍遍野。河流盡赤。賊人魂膽俱喪。拋棄馬畜器械。乘夜逃遁。此次對壘。仰荷上天恩佑。我軍大小官員。只損二人。兵丁被傷者不過數十。乃從來罕聞之盛事。大將軍順承親王及蒙古王丹津多爾濟等。即將賊兵

大敗情形。並由推河潛逃之信。馳報馬爾賽等。令其發兵堵賊歸路。軍營將士。無不踴躍奮往。有滅此朝食之心。而馬爾賽立意坐視。按兵不舉。同事之大臣等。再三約會陳說。馬爾賽堅執不從。傳臬以機不可失。情急至於跪求。而馬爾賽始終不允。且向達爾濟等差來之人云。我兵不令出城。夜間賊人來時。我兵只在城上吶喊助威。爾等兵丁。若昏夜來我城下。我即施放鎗礮等語。似此悖逆之言。

聞者莫不駭異。及聞賊人既已潛逃。達爾濟等。又復約會進剿。而馬爾賽遷延不行。直至次日。方領兵緩行五十餘里。虛作尾追之狀。又越二日。行數十里。託言賊已遠去。追趕不及。遂領兵回營。此胡琳身在軍前。目睹情形。具摺陳奏者。朕又降旨詢問軍營叅贊欽拜等。據欽拜。博爾屯諾爾渾回奏。賊人由推河等處逃遁。馬蘭泰兵力單弱。博爾屯願領兵前往應援。馬爾賽不允。嗣議截殺賊人之事。

諾爾渾向馬爾賽云。我等應即派兵迎截。若再遲延。儻賊人全過。便坐失機宜。是時李秋云。我等惟當固守城池而已。馬爾賽惟以李秋之言為是不聽。諾爾渾等之言。及至佐領扎木素告稱。我向扎克拜達里克來時。見沿途賊人陸續經過等語。馬爾賽正傳集會議問。而李秋又向馬爾賽堅執守城之說。諾爾渾等又再四告稱。如後面尚有賊人。此番經過之時。決無燒荒之理。視此燒荒情形。即係

後面確無餘賊之明証。我等急當追剿。斷不可失此機會。馬爾賽方領兵起程。及到博木喀拉地方。僅選兵七百名。令欽拜前進。馬爾賽竟回至扎克拜達里克等語。此欽拜。博爾屯。諾爾渾回奏之大概也。朕又降旨詢問馬爾賽。馬爾賽回奏之摺。一味支吾。強為推卸。馬爾賽縱賊之罪。百喙其能辭乎。況欽拜等尚皆惶懼認罪。而馬爾賽猶復覲顏巧辯。無一媿赧之辭。冀售欺於萬一。則其蓄心狡獪。

姦險更可知矣。此次賊人大敗之後，狼狽不堪。馬爾賽擁兵萬餘，不必出奇制勝，但肯遵循常理，堵截賊之去路，實可使之一騎不返。即或有逃奔餘黨，而我師以大隊追襲其後，必不使殘敗之寇得以漏網生還。實乃秦凱成功易於完結軍務之機會也。馬爾賽身任統兵之職，地當扼要之區，賊過不行堵截，賊去又不尾追，端坐空城，視同秦越。衆人苦勸之言，堅執不聽，竟令入網之獸復得免脫。將來餘孽跳梁，一時未能剪滅，伊誰之咎。似此有意阻撓軍機，紊亂國事，豈非尋常失機之比。馬爾賽不思國家高厚之恩，不念伊祖積累之舊，在國為叛臣，在家為逆子，不忠不孝，莫此為甚。若馬爾賽此番情罪，或為人臣所問，尚可念其先世之勲，曲加寬貸。而馬爾賽縱寇之罪，豈可貸乎。且伊之負恩如此，朕撫躬自思，加厚恩而招怨望，朕實無以自解。亦實有所不甘。此皆朕之識人之明，誤用匪

人朕先謝罪

宗社臣民將馬爾賽正法，以為人臣受恩深重而心懷悖逆者之戒。著詢問在京滿漢大臣九卿及北路軍營扎克拜達里克軍營將弁等，令據實即行回奏。大凡微員庶民治罪之案，皆屢經審訊而後定，豈有馬爾賽為國家大臣，不加審訊而遽行治罪之理。馬爾賽之心之罪，朕知之甚悉，見之甚確實，無幾微可疑。昔年

皇考對朕兄弟輩，曾數次面諭圖海乃我朝第一良臣，將來應配享

太廟

皇考厚待圖海之恩，誼朕無時敢忘。今將馬爾賽治罪之時，愈益思念及此，伊既忍悖我皇考，逆伊祖父，朕執大法以理天下，而於不忠不孝之人姑息寬宥，遲迴不決，實無以對我皇考。亦負伊祖圖海之忠心矣。至於李林世受國恩，不思報効，居心妄誕，行事乖張，前在廣

東將軍任內。縱令所屬兵丁擁鬧巡撫公堂。鎗傷守備。大干法紀。經三法司議將李林擬斬監候。雍正六年朝審。九卿擬以情實具題。原應不赦。朕念其為勲臣之裔。免死釋放。旋又降旨將伊補授都統。仍襲伯爵。此朕宥過錄用。莫大之恩也。去年北路派出漢軍兵丁。揀選領兵大員。朕因李林為漢軍世族。管兵多年。諸事尚屬素暗。特旨將伊派往。料其感恩悔過。必能黽勉自新。豈知伊中懷叵測。於軍機緊要之時。一言債事。其罪與馬爾賽等。著一併訊問具奏。○禮部等衙門遵旨議奏。我朝勲舊名臣。屢選異數。雍正二年。已敕建昭忠寺。祀勤事授命諸臣。勸忠之典。至優且渥。茲復命於京城內。建立賢良祠。春秋展祀。其應入祠之滿漢文武大臣。臣等公同詳酌。如怡賢親王之精白一心。忠誠體國。勲在社稷。澤被生民。允宜首請入祠。其元臣良輔。如大學士公圖海。公賴塔。大學士張英。尚書顧

八代馬爾漢趙申喬河道總督靳輔。齊蘇勒。總督楊宗仁。巡撫陳瓊等。久在

聖明灼見之中。入祠崇祀。於禮相符。此外滿漢文武大臣。或望著巖廊。或勲銘竹帛。或操嚴冰蘖。或績懋封疆。謹核其事蹟。參之衆論。擬定大學士范文程等三十五員。均應入祠崇祀。得旨。原任將軍阿喇納。恪謹持躬。忠誠奉職。從前西陲用兵。宣力年久。收復吐魯番。平定青海。俱有勞績。原任都統馮國相。樸誠自矢。從無過愆。向來各旗公庫。俱有虧空。唯馮國相所管正藍旗。全無欠缺。此即其出納謹嚴。操守潔清之實証。阿喇納馮國相應否入賢良祠。著九卿會議具奏。尋議。原任將軍阿喇納都統馮國相。按其事實。洵屬賢良大臣。允宜一體崇祀。從之。○乙丑。諭辦理軍機大臣等。吐魯番回民遷移近邊一事。據副將軍張廣泗等計議明晰。伊等身在軍營。自有確見。但不知此際有無賊人阻滯。所議遷移之

事。曾否舉行。若果於冬月遷移。則天氣寒冷。深可軫念。雖張廣泗等奏稱塔爾沁向有城堡。儘可令回民暫住。令其耕種。朕思此地並無房屋。回民何以棲身。查哈密地方和暖。其城外五堡等處。原係哈密回民居住之所。若將移來之回民。分派此地。暫行安插過冬。令額敏和卓轉飭本地回民。就近照看。似為有益。若哈密回民。果能同心照看。使之得所。朕必將額敏和卓及回民等。加以重賞。至於

吐魯番新來之回民。著查郎阿等。重加賞賜。派委幹員。加意撫綏。諸凡寬裕料理。務使伊等不知有遷移之苦。將來若令其在塔爾沁居住。可早為辦理物料。以便及時興造房屋。俾獲寧居。爾等可將此寄信前去。並令劉於義等知之。臘冬月不即遷移。可遲至春間。再議舉行。○以故喀爾喀凡齊賴已圖土謝圖汗汪扎爾多爾濟子敦丹多爾濟襲爵。○丙寅。諭內閣。鄂爾昆種地處。止有原任內閣

學士傅德一人辦事。著原任都統金以坦原任郎中圖彌善前往協同辦理。○免四川建昌鎮屬靖遠會川。栢香等營。貼防兵丁借支糧務軍需銀五百四十五兩。○丁卯。以刑部左侍郎孫嘉淦為順天武鄉試正考官。翰林院檢討張若涵為副考官。○辦理軍機大臣等遵旨議奏。張家口外居住之察汗喇嘛等徒衆。共一百七十丁。合之歲饑來投之蒙古及副都統瞻岱等所進新平口外蒙古共六百有五丁。請以五百五丁。編為三個佐領。賞給額駙策凌收管。餘一百丁。以七十丁賞給喀爾喀公密什克。三十丁賞給一等台吉丹津。並按戶給予牲畜。以資活計。從之。○戊辰。諭辦理軍機大臣等。據將軍達爾濟奏稱。撥派鄂爾多斯之兵三十名。原屬精壯。乃協理台吉策旺多爾濟與貝勒達西喇卜坦諾衣羅卜查木蘇將兵丁私行更換。三千兵內。五百餘名。不堪調用。又逃亡四百餘名等語。朕

不惜國帑數千萬億。極邊遠塞。駐劄兵丁。特欲保全喀爾喀內扎薩克之故也。伊等理應各自奮勉。勦殺賊人。乃私換兵丁。肆意遁逃。此係扎薩克等從來未有之事。今派侍郎納延泰。選補缺額之兵。將逃回官兵。嚴加治罪。爲首逃遁者。即著正法。貝勒達西喇卜坦諾衣羅卜查木蘇協理台吉策旺多爾濟長史護衛等。俱著嚴加治罪。其不堪調用之兵五百名。著回原游牧處所。夫懲罪勸功。乃國家之大典。今歲八月。副將軍王丹津多爾濟額駙策凌等。於厄爾得尼招地方。大敗賊衆。喀爾喀王台吉等。俱已賞給巴圖魯之號。備得封典陞銜。恩及子孫。又動庫帑二百萬兩。分賞官兵。給與功牌。去歲喀爾喀西邊扎薩克圖汗部落數扎薩克。被賊搶擄。陣亡受傷人等。朕俱施恩重賞。其與賊交戰已故之一等台吉策勒克。已贈爲公爵。令伊子密什克襲替。至於奴僕房產衣裝等項。亦盡行賞給。著

納延泰。即將策旺多爾濟等貽誤情節。告知圖爾古特貝子丹中。王阿寶。六旗鄂爾多斯三旗吳喇忒毛明安。四子部落及遷內游牧居住喀爾喀西邊扎薩克等。伊等既在一處居住。與喀爾喀內扎薩克有何分別。如果訓誨屬下人等。不使相奪相盜。接壤地方。酌設卡倫。有一二不肖小人犯法。即秉公懲治。則其餘自不敢妄爲矣。伊等誠能凜遵國法。協力勦賊。不過勞苦數年。將來豈不各享太平之福乎。公通摩克屬下人等。去歲雖加恩賞。但親屬被擄。有欲尋求妻子者。亦有已身被擄。尋求妻子脫回者。著交與公通摩克等。務令給與妻室家產。加意照看。如有投來之人。亦收留養贍。詳詢賊信。即報知辦事官員。郎中偏圖侍衛常明。乃專理西界喀爾喀扎薩克等事之員。如有此等人。一面交扎薩克照看。一面據實奏聞。○又諭達爾濟處遣回不堪調用之鄂爾多斯兵五百餘名。沿途不可

無統轄之員。著叅贊散秩大臣四格帶回沿途管束。到鄂爾多斯時。四格著回京。至鄂爾多斯扎薩克王台吉內能辦事之人甚少。令王查木陽帶四五人馳驛至鄂爾多斯。俟侍郎納延泰到彼。會同揀選兵一千名。於明年三月間。著查木陽親領前赴軍營。○以故嵩齊忒扎薩克多羅郡王雅穆聘爾子巴特馬策凌喀爾喀扎薩克固山貝子喇布坦子旺扎爾各襲爵。○己巳。諭內閣。賢良祠之王大臣。應各立小傳。以紀生平事蹟。著左都御史吳士玉吏部右侍郎任蘭枝禮部右侍郎吳襄擬稿進呈。○諭辦理軍機大臣等。張家口外駐劄之兵二千名。歸化城駐劄之兵一千名。若令往三旗吳喇忒右邊喀爾喀北界之紅郭爾鄂隆等處駐劄。保護西界之喀爾喀內地扎薩克等遊牧實屬有益。且可就近調遣。著散秩大臣瞻布副都統哈達哈於今冬帶領張家口之兵前往歸化城併駐劄歸化

城之兵分為三隊。著滿珠錫禮同哈達哈富達禮同瞻布諾穆祜同綽爾多各領一隊行走。若兵丁馬匹不敷。令都統丹晉每兵再給馬一匹。揀擇水草好處收放過冬。多派兵丁看守牧廠。勿致亡失疲瘦。○以故郭爾羅斯輔國公策旺扎卜子策楞襲爵。○辛未。諭內閣。直隸河南等省驛馬。有每年准報倒斃三成四成之例。而陝甘兩省向因地僻差少。不在准報之中。今西路軍興。羽書絡繹。地方有司。不無賠補之苦。朕心軫念。除偏僻州縣仍照舊例外。其自潼關至西安一路。自西安由秦鞏南路平涼北路至蘭州。又自蘭州由涼甘一帶至肅州嘉峪關由莊浪一帶至西寧。又自榆林延綏寧夏沿邊一帶至涼州。各歸驛遞馬匹。俱照直隸河南等省之例。十分之內。准報倒斃三分。領銀買補。作正項開銷。如有過三分之數者。勒令賠補。儻恃恩旨。或扣尅草料。不加謹飼餵者。著該督撫即行題參。

其准報三分之數。俟軍務告竣。仍照舊例停止。○以原任雲南巡撫甘國璧為鑲白旗漢軍副都統。正藍旗漢軍副都統徐仁。緣事革職。以內務府總管丁皂保為正藍旗漢軍副都統。○壬申。以湖廣衡州副將崔起潛署湖廣永州總兵官。○朝鮮國王李昫以恭遇考敬皇后冊諡禮成。遣陪臣李宜顯等奉表稱賀。兼謝頒給朝鮮列傳稿本恩賞。賚如例。○癸酉。大學士九卿等奏言

聖祖功德常昭

景陵瑞芝疊見。恭請宣付史館。昭示中外。得旨。朕從來不言符瑞。時時訓諭天下臣民。屏虛文而務實行。是以數年來各處奏報慶雲嘉穀等事。朕悉降旨訓勉。未嘗宣示於外。以為祥瑞也。惟是今歲秋間。準噶爾賊人侵犯北路。深入我境。我師奮擊。大獲全勝。殲賊萬餘。行間軍士及邊外蒙古。無不額手歡呼。以為從來未有之大捷。非荷

上天

皇考默佑。何能至此。朕心方深感激。而瑞芝適產於

景陵。天人協應。信而有徵。仰見

上天

皇考福國庇民。特賜嘉祥。以昭示天下之臣庶也。朕與諸大臣等。同此慶幸。歡忭之。惓忱著照所請。宣付史館。○喀爾喀澤卜尊丹巴胡土克圖。遣使進九白年貢。宴賚如例。○甲戌。

上詣

恩佑寺行禮畢。回宮。○乙亥。諭內閣。翰林官冒降旨記名。褒獎議敘。及申飭訓誨處分之處。著繕寫一單。於題請陞轉派差時。將單隨本進呈。以備查閱。科道亦照此例行。○丙子。諭內閣。據安西總兵官張嘉翰奏。稱安西本無土著。所有兵丁缺額者。一時難以募補。可否將安西靖逆所屬衛所軍流人犯。內擇其年力精壯者。補充營兵。以實行伍等語。凡軍流

人犯多係生事不法身獲重罪之人安西靖逆衛所地方遠在口外難於管束此乃從前辦理錯悞今張嘉翰請於此內召募兵丁更屬不合此等人犯應撤回改發於口內沿邊地方若陝西口外有從前似此發遣者俱照安西之例撤回○己卯

上御太和殿視朝諸王及文武陞轉各官謝恩

○庚辰諭辦理軍機大臣等岳鍾琪受朕深恩重加任用西陲討賊之舉伊亦身任不辭

是以用為西路大將軍一切徵兵運餉選將設官凡有所請無不允行實冀其殫心竭力無隱無欺克著綏靖之績乃伊秉性粗疎辦事怠忽將國家軍旅重務視同泛常且賞罰不公號令不一不恤士卒不納善言傲慢不恭剛愎自用以致防禦追擊屢失機宜軍務廢弛士氣不振以多年預備之馬駝牲畜數十萬或被賊人偷盜或因失養損傷及至需用之時寥寥無幾而凡陳奏於朕前者皆虛

假詐偽之詞為怙過飭非之計其悞國負恩之罪難以悉數岳鍾琪著革職交與兵部拘禁候朕另派大臣訊問○轉吏部右侍郎任蘭枝為左侍郎陞都察院左副都御史孔毓璞為吏部右侍郎仍留肅州辦理軍需○辛巳大學士伯督巡陝甘經畧軍務鄂爾泰疏言肅州為軍需總匯凡押運糧石解送馬匹最關緊要必須考核勤惰分別勸懲方於軍務有益從前未有定例以致車馬損傷米石缺少隨時責詰貽誤相仍請嗣後凡押運糧石出口如糧數全完車騾無損者每一運註冊記功一次三運亦如之三運紀錄一次四運加一級五運外委千總准其實授現任千把守備以應陞之缺補用其押運怠玩者以次記過細責降級革職分別處治至解送軍前馬匹定例處分太輕而又有罰無賞無以示鼓勵請嗣後凡解送馬匹每三百匹為一起如驍力壯健全無病瘦者每一起記功一

次二起以至五起皆比照運糧有功之例敘賞。其怠玩者。病瘦十匹以下。罰俸一年。倍之者降一級。再倍之者。千總外委。網責守備革職。俱今在肅帶罪効力。如此。庶勸懲並舉。寬嚴適中。而軍紀以肅。軍需無誤矣。從之。○壬午。諭辦理軍機大臣等。達鼎所掌總理青海番子事務。關防著侍郎馬爾泰掌管。○喀爾喀。瓦齊賴已圖土謝圖汗敦丹多爾濟遣使進九白年貢。宴賚如例。○癸未。

萬壽節。停止朝賀筵宴。○遣官祭

福陵。

昭陵。

昭西陵。

孝陵。

孝東陵。

景陵。

孝敬皇后。○遣官祭真武東嶽城隍之神。

大清世宗敬天昌運建中表正文武英明寬仁信毅大孝至誠憲皇帝實錄卷之一百二十四

大清世宗敬天昌運建中表正文武英明寬仁
信毅大考至誠憲皇帝實錄卷之一百二十五

監修總裁官光祿大夫經筵講官太僕寺卿保和殿大學士兼兵部尚書禮部尚書吏部尚書翰林院

總纂官光祿大夫經筵講官起居注太僕寺卿保和殿大學士兼戶部尚書仍兼吏部尚書翰林院

事三等伯加三級臣張廷玉光祿大夫經筵講官起居注入保謀政大臣武英殿大學士兼工部尚書仍兼

翰林院掌院事加級臣福敏光祿大夫經筵講官太子詹事府學士兼禮部尚書加級臣徐本光祿大夫

經筵講官議政大臣協辦內閣大學士事務禮部尚書仍兼詹事府鴻臚寺卿臣三泰等奉

敕修

雍正十年壬子十一月甲申朔諭內扎薩克

實錄卷一百二十五

王貝勒貝子台吉等爾等自歸附本朝以來

蒙恩覆育如一家人八十餘年安居樂業凡

遇行軍與滿洲兵丁一體馳驅準噶爾賊人

原與衆蒙古結爲仇讎是以準噶爾噶爾丹

敗喀爾喀時便窺伺內扎薩克我

皇考以準噶爾不滅爾喀爾喀扎薩克斷不得

安居故遣大兵殄滅噶爾丹又於策妄阿喇

布坦備兵防範此皆爾等所共知者嗣因噶

爾丹策零凶暴殘刻居心狂悖朕仰體

皇考軫恤衆喀爾喀扎薩克之意不惜數千萬
糧餉駐兵極邊此豈務勤遠畧以快私意乎

夫本朝中外一統即全獲準噶爾之土地人

民何增毫末總爲衆蒙古生計安寧起見不

得不爾也準噶爾去年來侵擾時因傳爾丹

錯誤以致我兵受傷賊人逞志今年又悉力

領兵三萬前來我大兵分爲二隊接戰傳爾

丹一隊失機準噶爾因此益驕欲劫取澤卜

尊丹已胡土克圖而收獲喀爾喀遂突入喀

實錄卷一百二十五

爾喀地方我大兵尾追至厄爾得尼招地方

大敗賊衆殺賊萬餘人賊惶懼而逃若我大

兵此次不獲全勝爾等豈得安居乎準噶爾

既已破膽若不乘此進取使賊人乘間復振

兵勢併力而來爾等豈不滋擾乎今據大將

軍順承親王奏請軍需馬匹十萬羊四十萬

山羊十萬俱於喀爾喀內扎薩克處採買已

經准行聞從前丹津多爾濟採買馬匹時將

臆體壯大者選留羸老者退還爾等便生怨

望。夫丹津多爾濟採買軍需並非私事。若以不任馳驅者塞責。伊豈能堪。因以撥回而爾等反咎丹津多爾濟謬矣。此次採買之事。朕特交與王額駙近侍台吉協助爾等扎薩克酌量照數選買。送往軍營。於從前所估之價加增給付。聽屬下情願不可抑勒。并酌給送牲畜人行糧。若一二年內軍務告竣。朕另行加恩。軍務乃朕與爾等所共之事。朕發數千萬錢糧採買牲畜。爾等自當効力資助。儻仍前苟且塞責。以致有誤軍需。將以為準。噶爾之賊可停其征討乎。抑爾等有所不願耶。再王丹津多爾濟欲令興安山後之扎薩克等採買。其興安山前之扎薩克亦俱有牲畜。著各將該旗內願賣之牲畜若干。先期報明。儻若山後數目不敷。再將山前之願賣者補足。如此。則軍需不致有誤。而屬下亦不致擾累矣。○以署直隸馬蘭口總兵官石文焯總理三陵事務。○丙戌諭辦理軍機大臣等。前據副

將軍張廣泗奏稱十月間料理吐魯番回民遷移之事。若有賊人阻撓。則遲至來春再作計議等語。比來未見西路奏聞。想賊人於北路大創之後。力量衰竭。不能復侵擾吐魯番。亦未可定。回民乘此遷移。似屬應行。朕思回民誠心歸嚮。屢拒賊鋒。甚屬可嘉。而冬月寒冷之時。倉皇轉徙。又甚可憫。除在途加意保護外。伊等到時。務須安插妥貼。重加賞賚。出其望外。使老幼男婦咸慶得所。不可為愛惜錢糧起見。稍負遠人內附之心也。爾等可傳諭查郎阿張廣泗等知之。○又諭寧古塔將軍常德著為靖邊大將軍之副將軍。○湖廣襄陽總兵官楊鵬年。老休致。陞湖廣黃岡副將焦應林為湖廣襄陽總兵官。○戊子冬至。

祀

天於

圜丘

上親詣行禮。○遣官祭

永陵

福陵

昭陵

昭西陵

孝陵

孝東陵

景陵

孝敬皇后○停止次日朝賀○己丑諭辦理軍機大臣等凡將軍大臣嗣後遇有軍前投誠及擒獲之厄魯特并脫回人等俱宜詳悉詢問彼處實信真知灼見則於辦理一切事務俱有裨益如止計聽聞順適而以賊逆勢窮力盡等情引問彼投來之人隨問而供既不能得其實情於事何益著即行文查郎阿等知之○庚寅諭辦理軍機大臣等三處牧廠挑選之一千兵於明年青草發生時令往吳喇忒地方駐劄著將馬蘭泰調回管轄此兵費雅思哈著暫管推河兵丁○調安徽學政

內閣學士王蘭生提督陝西學政以詹事府少詹事姚三辰提督安徽學政翰林院侍講喀爾欽提督山東學政右春坊右中允范咸提督山西學政檢討吳大受提督湖南學政侍讀楊炳提督福建學政調廣東肇高學政侍讀學士陳惠華提督廣韶學政以司經局洗馬繆曰藻提督廣東肇高學政編修徐以升提督廣西學政國子監司業隋人鵬提督四川學政編修吳應枚提督雲南學政順天學政詹事府少詹事吳應芬江蘇學政詹事府詹事張廷璐湖北學政翰林院侍講凌如煥貴州學政山西道御史晏斯盛俱仍留任○辛卯陞正藍旗漢軍副都統哈達哈為本旗蒙古都統調正紅旗漢軍副都統宗室滿珠錫禮為本旗蒙古副都統俱仍留軍營以鑲白旗滿洲都統莽鵠立仍署正藍旗蒙古都統鑲紅旗護軍叅領伍什圖署正紅旗蒙古副都統調廣東廣州左翼副都統馬世傑

為正紅旗漢軍副都統陞廣東廣州副將毛
克明為廣東廣州左翼副都統○盛京戶部
侍郎和善等奏言齊齊哈爾地方於九月二
十八日十月十五日大雪兩次草俱掩沒官
兵難以行走因會同將軍卓爾海等商酌停
止起程令暫居各屬城所明年或前往達里
剛愛或調遣別處候旨遵行得旨著照和善
等所請暫令居住明年青草發生時著遶過
興安山嶺由呼倫貝爾直至克爾倫圖拉地
方緩行休養馬匹務於七月內前抵軍營○
癸巳諭辦理軍機大臣等上都打布孫淖兒
太僕寺馬廠人內挑選之兵一千名已將侯
馬蘭泰調回管轄建勳將軍達爾濟人罷軟
著以護軍統領銜往推河代馬蘭泰之任建
勳將軍印信著署綏遠將軍欽拜署理欽拜
所掌綏遠將軍印信著順承親王收貯另派
大臣一員前往扎克拜達里克領兵駐劄○
陞江南安徽布政使馮景夏為都察院左副

都御史江西按察使李蘭為江南安徽布政
使司布政使調湖北按察使唐繼祖為江西
按察使司按察使陞湖南辰沅靖道王柔為
湖北按察使司按察使○乙未諭吐魯番頭
目額敏和卓等吐魯番部落遠在邊境之外
去巴爾庫爾軍營尚有七八百里易為賊人
之所窺伺我師難於庇護朕以仁愛為心是
以聽其自便不強其歸順我朝致受賊人之
侵擾也乃前歲岳鍾琪並未奏聞直以己意
遣官帶領駝隻前往採買米石致啟賊人侵
擾而額敏和卓與回衆等誠心歸嚮我朝努
力奮勇抗拒賊兵上年賊衆三次圍攻回衆
與官兵併力抵禦不但全城無恙且出其不
意乘間擊刺屢剋賊鋒忠勇之氣甚屬可嘉
然賊夷狡獪異常時以侵擾吐魯番為疲敝
我師之計是以副將軍張廣泗等議將爾等
搬移近邊之地以避賊人侵害前月具奏到
日朕深念爾等移徙之時賊人或於中途窺

伺。又恐天氣寒冷。男婦老幼。苦於行役。屢降諭旨。令署大將軍等於途次。加意防護。到時善為安插。務令人人得所。此數月以來。朕無時不以爾等安土重遷。繫於心也。今閱署大將軍查郎阿等奏報。回民大小一萬餘口。已於十月十四十七等日。陸續起程。羣情踴躍。計日可到。朕心甚為欣慰。因思年來。爾等屢遇強寇。而未遭其戕害。今安穩遷移。永居樂土。世受我朝恩庇。此皆爾等忠誠感格。

上天顯賜福祐之明徵也。除已降旨令署大將軍等悉心部署。並優加賞賚外。額敏和卓著封為扎薩克輔國公。其餘頭目等有應加恩賞。授官職者。俟大將軍查奏到日。再降諭旨。著將此通行曉諭。回民共知之。○頒賜湖南沅江縣生員譙衿。

御書世篤仁風匾額。以七世同居孝友可嘉也。○以江南河標副將許仕盛署江南狼山總兵官。○丙申。

聖祖仁皇帝忌辰。遣官祭。

景陵。○丁酉。諭內閣。聞陝西甘涼沿邊一帶。營伍廢弛。總督劉於義事務繁多。不能親身察閱。著禮部左侍郎杭奕祿來往稽查。悉心整頓。給與欽差大臣關防。凡有辦理事宜。俱與劉於義酌行。山西近邊營伍與陝西相近者。亦著杭奕祿一體稽查。與山西巡撫石麟酌行。工部左侍郎署西安巡撫馬爾泰。奉差西寧。西安巡撫印務著兵部尚書史貽直署理。內閣學士德齡協辦其軍需事務。亦著德齡協同史貽直料理。○諭兵部。八旗都統等朕看滿洲武舉武進士等於綠旗營不甚相宜。若與綠旗官員一體擢用。恐於營務未諳。亦且壅滯。伊等陞遷之路。嗣後將伊等如何補用。及如何陞轉之處。爾等會同詳議具奏。尋議。八旗滿洲蒙古武舉武進士內有人才出眾。騎射嫺熟者。除蒙特恩選用外。其餘俱請交各該處以伊等應得之缺補用。但伊等應

補品級不同則陞用亦宜分別嗣後將滿洲蒙古武舉照漢人武舉例會試後請派大臣驗看分別等次才優者列為一等交與該旗於護軍校驍騎校等缺挨次委署試用行走三年勤慎明白者入於應陞護軍校驍騎校人員內帶領引見補授騎射平常者列為二等駁回該旗令其學習以圖會試上進內有願在該旗當護軍前鋒効力之人亦著挑取令其當差行走學習嫻熟時揀選補用其滿洲蒙古武進士除特恩挑選侍衛外其餘請交該旗於護軍校驍騎校等缺挨次補用行走三年諳練稱職者入於應陞人員內帶領引見補授再此等人員係實授者自有應得之俸其委署者照副護軍校副驍騎校例給與錢糧米石所服頂帶悉照委署官員之例滿洲武舉武進士既議以旗員補用則現任內九門滿洲千總應請改補以昭畫一嗣後內九門千總缺出請照外七門千總例將漢

軍武舉及漢軍捐納人員補用至漢軍武進士仍照舊例以營衛守備補用從之○吏部題部院衙門筆帖式缺出例於考取繙譯人員內按旗挨名補用但各旗出缺多寡不同借缺還缺之例頗滋弊端請嗣後照各部主事例不論旗分按定等第名次補用得旨借缺還缺易滋弊端誠如部議惟是筆帖式一途係各旗人員出身之路若本旗一時無應補之人即將別旗人員頂補恐行之日久漸致人少嗣後該旗筆帖式缺出如不得應補之人暫將原缺存留積至十缺內外將別旗應補之人帶領二十員引見候旨補授○戊戌以正紅旗護軍叅領岱林布署本旗蒙古副都統正白旗護軍叅領孫達立署鑲紅旗蒙古副都統○河東總督田文鏡以久病未痊奏請解任調理允之○己亥署鑲藍旗蒙古副都統圖爾泰緣事革職以鑲黃旗護軍叅領金柱署鑲藍旗蒙古副都統○以河東

副總河孫國璽署河南巡撫○旌表河南光州烈婦田茂妻李氏強姦不污被勒殞命給銀建坊入祠致祭如例○庚子以兵部右侍郎通智協理理藩院右侍郎事○加兩江總督尹繼善兵部尚書銜陞湖北巡撫王士俊為河東總督實授喬世臣為江蘇巡撫以內閣學士協理西安巡撫事德齡為湖北巡撫原署西安巡撫噶世圖協理西安巡撫事兼辦西路軍需內閣侍讀學士阿蘭泰辦理河東副總河事解河南布政使徐聚倫任陞江南江蘇按察使司承祖為河南布政使司布政使擢江南安慶府知府徐士林為江南江蘇按察使司按察使○大學士伯督巡陝甘經畧軍務鄂爾泰疏言武備軍威火器最重貴速利遠火藥宜精若硝味不淡炭體不輕磺色不淨而又配合不勻工夫不細則氣滯不靈三軍難恃以為勇臣因經由邊郡見各標營堡施放鎗礮火烟不直且半濃黑知製

藥多不如法曾經嚴飭指示大畧惟是揀材置料硝易而磺難硝賤而磺貴惜費省工輒以藉口而陝甘兩省素稱地不產磺必赴外省採買運費工價未免浩繁肅州極邊每磺一觔則價值一錢至二錢不等軍需要地接濟維艱查肅州嘉峪關金佛寺堡之所管汛地內南山隘口抵朱魯郭巡運而西有硫磺山一座周圍四五十里遍產硫磺環山遠近並無番夷住牧若委員開採依法煎熬合算人工運費每淨磺一觔值不過五分而出產甚多用之不竭不獨便利軍需亦足接濟陝甘兩省標營需用事關邊陲武備現與劉於義面商委員經理一面先支銀數百兩交總兵沈力學作本開工理合奏聞得旨開採硫磺固於軍需有益但行之日久不無私販盜賣之弊著署督劉於義飭令總兵沈力學派兵防護實力稽查俟開採足用後奏聞請旨○又疏言甘涼肅為軍需彙集之地倉儲緊

要請將現行捐納款項改折本色糧石在甘涼肅等處交納得旨邊地改折米石以便積貯於軍需誠為有益但在本地採買恐價值騰貴轉不便於軍民除甘涼肅本地民人援例者准即以所有糧石交納外其他處捐納人等俱應由他處運交不得於甘涼肅採買著該督等通飭曉諭稽察禁止○移福建漳州府同知駐平和縣南勝地方改南靖縣車田地方歸漳浦縣管轄從福建總督郝玉麟請也○辛丑諭辦理軍機大臣等西路軍營所需馬匹向由鄂爾多斯等扎薩克處採買今北路所需馬匹又於彼處採買趕送則西路反致難得矣著將六旗鄂爾多斯所買馬匹停其趕送北路交與各旗牧養豫備西路需用吳喇忒烏朱穆秦等處所買馬匹著備北路需用○予故禮部尚書加太子少保銜錢以塏祭葬諡恭恪○癸卯以鑲藍旗護軍叅領覺羅佛凝裁署正白旗滿洲副都統○

辦理軍機大臣等遵旨議奏發遣黑龍江罪犯蒙恩旨仍前改發北路軍營屯種予以自新之路請嗣後此等人犯改發於軍營附近之處一切衣食照康熙五十八年酌定條例著該處給發由京城派弁兵遞送軍前該犯在途有妄行不法逋逃拒捕者即於本處立斬至臺站所裁車輛牛隻應仍前添設以備沿途需用從之○禮部題鑲黃旗原任領侍衛內大臣公音德端方恪慎王事克勤請崇祀賢良祠製牌立傳從之○甲辰諭辦理軍機大臣等綽奇從前擢任將軍因不能稱職調補都統又不能整飭和協舉動乖張及遣往軍前益覺昏憤今既奏稱身得殘疾著革職來京○調廣東高雷廉總兵官蔡添畧為廣東碣石總兵官○予故太子太保河東總督田文鏡祭葬諡端肅○乙巳陞鑲白旗漢軍副都統甘國璧為正黃旗漢軍都統以原任總兵官董象緯為正黃旗漢軍副都統○

丁未八旗都統等議覆正黃旗漢軍都統趙弘濟奏言八旗候補候選內外文職人員內有不能即行補用者有降級調用及由部院衙門撥回不能即得對品之缺者此內不無人材可用之人令其久於候缺誠屬可惜請嗣後此等人員內有情願就武職効力者令該旗大臣等驗看揀選其可習騎射年力精壯之人帶領引見令在該旗効力行走如果不誤委用照伊等品級相當之缺具題補用應如所請從之○旌表河南汝州烈婦田復興妻郭氏拒姦不辱被刃殞命給銀建坊入祠致祭如例○己酉加吏部尚書管理河道總督事嵇曾筠太子太保○辦理軍機大臣等議覆工部左侍郎原署西安巡撫馬爾泰奏言額塞爾津城介在山谷之中人由各處行走不得見其踪跡哈爾垓圖地方乃各路隘口總會之所水草亦好應將額塞爾津城駐劄步兵撤回合計西寧大通馬步兵丁共

派二千名於哈爾垓圖詳看耕種地方令兵丁等作何開墾并將修葺城堡之處悉加籌畫專交與諾穆圖傳寧辦理再董科爾寺與西寧相近現有叅將一員領兵五百名駐劄無庸添兵阿布海雅蘇地方天氣甚冷不便駐兵扎哈素泰地方水草尚好其西寧居住之西安綠旗兵丁一千名京師滿洲兵丁二百名臣與達鼐二人輪班每年十月初帶往扎哈素泰等處駐備策應至正月間仍回西寧居住均應如所請得旨哈爾垓圖地方駐劄兵丁著伊禮布統領尹扎納管承澤協同管理修城種地事務著諾穆圖傳寧辦理○又議覆工部左侍郎原署西安巡撫馬爾泰奏言由四川調至多巴地方駐劄之兵二千名不耐寒冷所乘俱係川馬調往口外殊不得力置之西寧亦徒費錢糧查西寧大通二處除出征及預備兵丁之外尚有六千餘名足敷防守僅有應行添兵之處涼州現有直

隸河南兵一千名可以調遣請將川省兵丁仍發回本省各歸原汛應如所請從之予故湖廣提督署都督同知岳超龍祭葬如例○庚戌鑲藍旗漢軍都統耿化祚緣事革職陞正紅旗漢軍副都統韓光基為鑲藍旗漢軍都統○禮部議覆江南河道總督嵇曾筠疏言洪湖為黃運兩河之保障高堰乃淮揚二郡之屏蔽蒙恩發帑金百萬興築石堤為民捍患兩載告成請

御製碑文以垂久遠應如所請從之○辛亥大學士等議覆江蘇布政使白鍾山條奏海疆事宜一沿海鎮標餉銀宜就近撥解狼山鎮駐劄通州陸路至蘇州八百六十里往返需時水路必經海洋風濤可虞蘇松鎮駐劄崇明縣渡海至蘇七百二十里輓運尤覺艱難現今添設太通道駐劄崇明帛轄太通二屬可以就近稽察催督請嗣後狼山鎮餉即於通州及附近州縣撥給蘇松鎮餉即於崇明

及附近州縣撥給一崇明宜多儲米穀以濟民食崇明孤懸海外地不產米先經巡撫喬世臣奏准於江廣產米之處採買積貯請即將此項米內撥一萬石收貯崇明縣倉以備平糶○沿海沙洲宜分築土墩以避風潮愚民生長海濱止知魚鹽覓食但有沙洲漲出爭向居住罔知自衛請飭令地方官督率沙洲居民於農隙挑築土墩高至二丈為度不但潮至可以趨避並可瞭望海洋俱應如所請從之○辦理軍機大臣等議奏據署陝西巡撫史貽直奏請統轄勇健營兵丁提督陳天培總兵官徐起鳳罷軟廢弛不能約束兵丁以致沿途生事妄行惟總兵官周一德明白諳練紀律森嚴可以管轄勇健營兵丁前往軍營應如所請得旨依議陳天培徐起鳳俱著革職○壬子調福建金門總兵官康陵為南澳總兵官

大清世宗敬天昌運建中表正文武英明寬仁
信毅大孝至誠憲皇帝實錄卷之一百二十五

大清世宗敬天昌運建中表正文武英明寬仁
信毅大孝至誠憲皇帝實錄卷之一百二十六

監修總裁官光祿大夫經筵講官太僕議政大臣保和殿大學士兼兵部尚書總理兵部事務三等伯加十三級臣鄂爾泰

總纂官光祿大夫經筵日講官起居注太僕議政大臣保和殿大學士兼兵部尚書仍兼掌吏部尚書翰林院掌院

事二等伯加十三級臣張廷玉光祿大夫經筵日講官起居注太僕議政大臣武英殿大學士兼禮部尚書仍兼管

翰林院掌院事務加二級臣福敏光祿大夫經筵講官太子太傅東閣大學士兼禮部尚書加六級臣徐本光祿大夫

經筵講官議政大臣協辦內閣大學士事務禮部尚書仍兼管太常寺鴻臚寺事務三等奉

敕修

雍正十年壬子十二月甲寅朔諭理藩院額

駙策凌之馬羣今年被賊騷擾著於口外官

馬羣內賞給馬二千匹牛一千頭羊五千隻

再額駙屬下人等之產業有被賊騷擾者曾

否另行賞給已經飭查爾等再行知順承親

王務令饒裕均霑實惠○工部議覆署貴州

巡撫元展成疏言來牛城垣為古州之大道

應遵旨建築石城其各汛俱建築土城土堡

請即動支庫項委員興修以資新疆保障應

如所請從之○署貴州巡撫元展成題鎮遠

府土通判楊世基故請以其子楊懋承襲下部知之。乙卯諭內閣孫嘉淦於雍正元年尚係翰林院檢討朕看其爲人似屬樸實屢加任用遷擢數年之間官至侍郎實望其殫竭誠心爲國家宣猷効力乃伊偏執自用從前屢有陳奏皆迂濶瑣碎不可見之施行者朕切加訓誨冀其開擴識見至近日則緘默不言竝無一事之敷陳矣伊爲國子監祭酒乃瞻顧私情將親弟孫揚淦薦用爲監丞孫揚淦行事乖張士論不服以致孫嘉淦聲名大損此衆所共知者國子監教習人員特爲教育人材而設伊等分派之後有實心供職者亦有怠惰廢弛者自應分別用舍以示激勸卽稱職人員之中有通曉事體可膺牧民之寄者亦有熟習文藝可勝司鐸之任者又當因材器使以資實用是在祭酒等秉公分晰陳奏朕前始可免冒濫名器用違其材之弊朕爲此屢降諭旨孫嘉淦身爲大臣專司

成均之職寧不知之今於引見教習期滿人員時朕令舉其所知而孫嘉淦竝不據實陳奏遽稱宋鎬一班六人俱屬可用及朕詳加詢問又忽稱方從仁實不堪用一時任意反覆顯係欺罔應加重懲以爲人臣詐妄負恩者之戒著將孫嘉淦革職交刑部究擬具奏尋議孫嘉淦懷私欺罔應照律挾詐欺公者擬斬監候秋後處決得旨孫嘉淦從寬免其治罪著在戶部銀庫効力行走。吏部議奏據兵部咨靖邊大將軍和碩順承親王錫保將陣亡大臣官員造冊送部照例予襲世職查副將軍尚書查弼納叅贊內大臣馬爾薩斯副都統蘇圖覺羅海蘭應授拜他喇布勒哈番兼拖沙喇哈番散秩大臣一等公達福副都統戴豪西彌賴常祿前鋒統領丁壽侍郎永國應授拜他喇布勒哈番二等侍衛德明等一百一十八員及領催委署章京之傅成格等一十六員均應授拖沙喇哈番其祭

募銀兩各按品級照例恤賞從之○旌表正黃旗滿洲烈婦前鋒圖拉妻薩克達氏鑲白旗護軍五格妻博爾吉那氏護軍額里赫妻瓜爾佳氏護軍常住妻寧佳氏俱聞夫陣亡投繯殉節各給銀建坊入祠致祭如例○丙辰吏部議覆福建總督郝玉麟疏言向例臺灣鎮協三年報滿候用叅將遊擊守備二年報滿題陞而在臺文員歷俸二年半止議加級似未盡一請嗣後臺灣道准鎮協例三年報滿恭候酌用知府同知通判知縣各員照叅遊守例二年報滿題明候陞應如所請從之○丁巳陞鑲黃旗護軍叅領胡什巴爲景陵總管○陞正黃旗滿洲副都統阿魯爲鑲藍旗滿洲都統○山東兗州總兵官曾謨緣事革職陞廣東肇慶副將李建功爲山東兗州總兵官已未

孝惠章皇后忌辰遣官祭

孝東陵○庚申實授吳金爲內閣學士兼禮部

侍郎○辛酉諭內閣朕妹純愍公主在日賦性柔嘉秉心淑慎今額駙策凌又在北路建立戰功晉封親王純愍公主著追封固倫公主賜祭一壇竝修理墳塋以昭恩眷○諭辦理軍機大臣等從前車臣汗部落兵丁曾派撥三千名隨軍厄爾得尼招地方交戰時惟有一千二百餘名其餘一千八百名俱行逃回續經順承親王奏請派撥車臣汗部落兵一千名前赴軍營現已准行爾等可行文特古忒除軍營所有車臣汗兵一千名與明年換班兵一千名外再另派三千名令渣克丹阿敏道帶領在伊等遊牧西界操練則於保守遊牧諸事大有裨益如不能足三千之數或一千或二千俱可著特古忒會同王垂扎卜及扎薩克等公同撥派又聞得從前貝子顏楚卜多爾濟旗分及扎薩克台吉沙克都爾扎布旗分之巴爾虎等潛逃鄂羅斯地方彼處不容伊等入境仍住我卡倫外竊取喀

爾喀等什物特古忒現在車臣汗部落著會同王垂扎卜扎薩克等將脫逃之巴爾虎作何收回之處商議辦理收回時著渣克丹阿敏道開導理法加意訓練○又諭聞管轄呼倫貝爾地方居住索倫打虎兒兵丁之博爾本察達巴哈拉不和衷辦事不可不派大臣總統著護軍統領博第前往博第起程後著費雅斯哈前往烏爾輝音查漢地方協同蒙古王等管理扎薩克軍務○壬戌諭內閣鄂齊以間散宗室朕加恩用爲散秩大臣及都統等官又因西藏微勞命伊襲封公爵乃怠忽因循並不實心効力雍正五年西藏阿爾布巴背叛傷害康濟鼐朕將西藏人等不合情由面問鄂齊伊視爲泛常信口奏對其在藏料理未協之處全然不知愧懼則居心之泄慢可知矣復命管理天津水師慢無約束一任兵丁擾累地方是以降旨革退公爵在侍衛內行走繼又念伊在宗室中尚爲通曉

事務不忍令其放廢仍命管理副都統及護軍統領印務冀其自新以贖前愆豈料伊貪利納賂於胡五贖身案內又私得銀兩准其歸宗甚屬卑鄙無恥著將鄂齊革任交與宗人府拘禁照所得銀數十倍追出○輔國公經召緣事革退以其姪璐達襲爵○癸亥靖邊大將軍順承親王錫保奏報鄂爾昆扎克拜達里克等處屯田收穫大麥小麥糜子共九千四百石有奇下部知之○添設湖北漢陽府同知一員駐劄漢口鎮專司督捕該鎮及漢陽漢川二縣巡緝事宜仍兼理清軍水利等務其移駐漢口鎮之通判仍回漢陽府城駐劄協理孝感黃陂二縣捕務從陞任湖北巡撫王士俊請也○甲子御書匾額賜大學士鄂爾泰額曰公忠弼亮○諭辦理軍機大臣等額駙策凌於明年回軍營時令京城操演之兵及沿途宣化大同右衛歸化城等處兵丁俱候額駙閱看○諭八

旗漢軍都統等爾等有素所熟識之人可勝副都統之任者各行保奏其世家子弟入去得者不拘等次亦著保奏○旌表山東嘉祥縣烈婦金榮貴妻陳氏拒姦不污被毆殞命給銀建坊入祠致祭如例○乙丑諭內閣呂留良治罪之案前經法司廷臣翰詹科道及督撫學政藩臬提鎮等合詞陳奏請照大逆之例以昭國憲朕思天下讀書之人甚多或者千萬人中尚有其人謂呂留良之罪不至於極典者又降旨令各省學臣徧行詢問各學生監等將應否照大逆治罪之處取具該生結狀具奏其有獨抒己見者令自行具呈學臣爲之轉奏不得阻撓隱匿今據各省學臣奏稱所屬讀書生監各具結狀咸謂呂留良父子之罪罄竹難書律以大逆不道實爲至當竝無一人有異詞者普天率土之公論如此則國法豈容寬貸呂留良呂葆中俱著戮屍梟示呂毅中著改斬立決其孫輩俱應

即正典刑朕以人數衆多心有不忍著從寬免死發遣寧古塔給與披甲人爲奴倘有頂替隱匿等弊一經發覺將浙省辦理此案之官員與該犯一體治罪呂留良之詩文書籍不必銷燬其財產令浙江地方官變價充本省工程之用○辦理軍機大臣等議覆黑龍江將軍卓爾海奏言查打牲人共二千三百四十九名請挑選一千名令往齊齊哈爾城北本爾得地方居住編爲八旗於打牲處現任官員內派副總管四員佐領八員驍騎校八員訓練操演歸打牲處總管統轄臣於每歲春秋親往查閱其軍器俸賞等項照例給與免其進貢貂皮應如所請從之○兵部議覆廣東總督鄂彌達疏言粵東廣州府係海疆省會中間一帶如潭州與黃梁都等處海口宏濶竝無藩籬之阻請於潭州畧草汛築土城一座移守備一員率兵一百二十名駐劄於黃梁都築土城一座移都司一員率兵

一百二十名駐劄此外凡附近省城之險要地方請各酌添墩臺並撥弁兵分駐應如所請從之○丙寅諭辦理軍機大臣等聞揚武將軍工部尚書武格在軍前捏造撤兵之說惑亂軍心著拏解來京嚴加訊問○以西路副將軍張廣泗爲正紅旗漢軍都統仍留軍營命泰郡王弘春管理正紅旗漢軍都統事○實授元展成爲貴州巡撫張鉞爲廣西布政使司布政使陞廣西蒼梧道耿麟奇爲廣西按察使司按察使○鑄給浙江杭州將軍衙門左右二司印信並給協領叅領佐領等官鈐記從將軍阿里袞請也○添設廣東惠州協興寧營千總一員外委把總一員從廣東總督鄂彌達請也○丁卯陞內閣學士張照爲刑部左侍郎仍兼內閣學士行走署理順天府府尹事總督倉場侍郎岳爾岱患病解任調盛京戶部侍郎兆華爲總督倉場侍郎陞廣東觀風整俗使光祿寺卿焦祈年爲

順天府府尹裁觀風整俗使缺○江西按察使唐繼祖患病解任陞湖北糧道張廷樞爲江西按察使司按察使○先是靖邊大將軍順承親王等遵旨議奏馬爾賽負恩縱寇不忠不孝即誅戮不足蔽辜臣等傳集文武官員恭宣諭旨詳加詢問莫不異口同聲痛心切齒李林曾犯重愆棄瑕錄用乃復懷姦濟惡法所難寬應將馬爾賽李林即正典刑以昭國憲兵部等衙門議奏馬爾賽世受國恩身邀異數爲北路將軍手握重兵坐視賊人逃遁有心僨事貽誤軍機應將馬爾賽梟示軍前李林庸懦貪狡與馬爾賽姦惡相濟應一並正法得旨馬爾賽著即處斬免其梟示李林著在軍前監候秋後處決至是命副都統索林奏事郎中張文彬馳驛前赴扎克拜達里克軍營將馬爾賽正法○予故原任貴州提督加太子太保致仕楊天縱祭葬謚襄壯○戊辰以鑲藍旗護軍叅領色爾登署正

黃旗滿洲副都統○大學士等議覆漕運總督性桂奏言江南蘇松等州縣潮溢爲災內有勘不成災之處或經風雨虫傷所產稻米顆粒不齊易致震變請酌留漕糧四十萬石於明年平糶漕糧既淨民食亦得有資應如所請從之○己巳諭辦理軍機大臣等此次賊人大敗現今歸化城無備兵之事著將撫遠大將軍印信移取回京收貯康親王崇安不必前往○辦理軍機大臣等議覆額駙策凌奏言此次征勒準噶爾之索倫兵丁業經加恩賞賚所有奮勇効力之營總章京等竝請另行獎賞以示鼓勵應如所請將索倫營總班圖巴里孟古海薩爾圖俱授副都統職銜仍會同布爾沙管轄索倫兵丁營總那斯太等佐領克什克圖章京布賴等賞給孔雀翎領催達魯義等賞給藍翎從之○免山東泰安滋陽等五十一州縣本年分旱災額賦有差○庚午諭辦理軍機大臣等從前署大

將軍查郎阿摺奏請將吐魯番回衆在肅州所屬王子莊安插經廷臣議令署總督劉於義等確勘詳查妥協辦理朕思回民等輸誠嚮化自應選給水土饒衍氣候和煦之地俾得樂業安居肅州之王子莊水泉甚少可墾之地不敷回民耕種查瓜州地土肥饒水泉滋潤氣候亦和與回民原住地方風景相似且現在開墾可種之地甚爲寬濶足資回民耕收由塔爾那沁遷至瓜州路不甚遠可免跋涉之勞著署總督劉於義巡撫許容將吐魯番回衆即於瓜州安插其築堡造房給與口糧牛種等項亦即行估辦交原任潼商道王全臣料理再令查郎阿即於軍營派一武職大員先赴瓜州會同王全臣悉心妥辦回衆自塔爾那沁遷移之時著提督顏清如沿途照看至瓜州安插事畢顏清如仍回軍營辦事○諭內閣貴州提督哈元生才幹優長實心辦事伊母年逾八旬訓子有素今在籍

病故著賜祭一壇以示恩眷○刑部等衙門議奏逆賊嚴鴻達梟獍性成心懷叛逆與呂留良黨惡共濟誣捏妖言實覆載所難容爲王法所不貸嚴鴻達應凌遲處死已伏冥誅應戮屍梟示其祖父父子孫兄弟及伯叔父兄弟之子男十六以上皆斬立決男十五以下及嚴鴻達之母女妻妾姊妹子之妻妾俱解部給功臣之家爲奴財產入官沈在寬傳習呂留良嚴鴻達之邪說猖狂悖亂附會詆譏尤宜速正典刑凌遲處死其嫡屬等均照律治罪又呂留良案內黃補菴自稱私淑門人所作詩詞荒唐狂悖車鼎豐車鼎賁刊刻逆書往來契厚孫用克陰相援結周敬輿甘心附逆私藏禁書黃補菴應擬斬立決妻妾子女給功臣之家爲奴父母祖孫兄弟流二千里車鼎豐等俱擬斬監候又呂留良案內被惑門徒房明疇金子尚應革去生員杖一百僉妻流三千里陳祖陶沈允懷沈成之董

呂音李天維費定原王立夫施子申沈斗山沈惠侯沈林友應革去教諭舉人監生生員杖一百徒三年朱霞山朱芷年從學嚴鴻達時年尚幼小張聖範朱羽采令伊等幼子從沈在寬附學訓蒙審無與沈在寬交好之處應無庸議得旨嚴鴻達著戮屍梟示其孫著發寧古塔給與披甲人爲奴沈在寬著改斬立決黃補菴已伏冥誅其嫡屬照議治罪車鼎豐車鼎賁孫用克周敬輿俱依擬應斬著監候秋後處決房明疇金子尚俱著僉妻流三千里陳祖陶等十一人著以杖責完結張聖範朱羽采朱霞山朱芷年著釋放○署寧遠大將軍查郎阿奏報巴爾庫爾圖呼魯克等處屯田收穫青稞一萬二千六百石有奇魯谷慶屯田收穫糜子麥子共三千六百石有奇下部知之○理藩院左侍郎衆佛保緣事革職轉理藩院右侍郎納延泰爲左侍郎陞內閣學士班第爲理藩院右侍郎○考察

天下軍政卓異官三員貪官二員年老官三員有疾官二員才力不及官一員分別陞賞處分如例○壬申順天府進春○大學士九卿等以廣東總督鄂彌達等所進瑞禾奏請頒示中外宣付史館得旨朕從來不言祥瑞數年以來各省嘉禾瑞穀悉令停其奏報今年廣東督撫以該省所產之穀長莖多穗爲史冊所未載具摺奏聞朕爲粵東農民稱慶偶令廷臣觀覽竝非誇張瑞應也所請頒示中外宣付史館之處不必行○以鑲白旗滿洲都統莽鵠立兼管火器營事務○禮部議覆陝西學政潘允敏條奏陝屬新設榆林府學請照寧夏等府例取進文武童生各十二名定邊懷遠二縣照小學例取進文武童生各八名榆林靖邊原係衛地今既添設府學衛縣武童舊額十二名應減取四名平涼府取進童生向附入平涼衛八名今衛地既歸各州縣管轄則衛籍童生應就所歸州縣考

試其府學二十名額數統於平涼府本屬童生考取同州華州綏德秦州韓城郃陽清澗秦安三原等九州縣請照府學取進文章各二十名商州澄城華陰醴泉等四州縣請照大學取進文章各十五名岷州照中學取進文章各十二名該州訓導一員移駐西固固原州及通渭縣請照大學取進文章各十五名漳縣照中學取進文武童生各十二名甘涼二府請照府學取進文章各二十名永昌縣照中學取進文章十二名慶陽府之環縣照中學取進武童十二名鞏昌府之會寧延安府之米脂二縣俱照大學取進武童各十五名均應如所請從之○移湖北應城縣崎山鎮巡檢駐長江埠松滋縣紅崖巡檢駐磨盤州監利縣瓦子灣巡檢駐朱家河從陞任湖北巡撫王士俊請也○癸酉陞內閣侍讀學士王以魯爲內閣學士兼禮部侍郎擢浙江鹽驛道王鈞爲光祿寺卿○陞兵部

右侍郎諾爾渾爲鑲紅旗漢軍都統仍留軍營。正黃旗蒙古副都統阿揚阿爲鑲紅旗護軍統領仍署本旗蒙古都統事。陞署江南督標副將武進陞爲福建漳州總兵官。辦理軍機大臣等議覆稽察黑龍江等處御史章格疏言發遣黑龍江地方之覺羅等子孫生育甚蕃竝無教訓之人日流汙下且有在彼披甲者查該處之甲特爲養贍該處之人若多爲覺羅所得則有碍於本處人等生計若不令披甲覺羅等又無以爲生且既披甲必致與兵丁一體驅使又恐歷年久遠覺羅等之子孫或致難以查考請嗣後將覺羅內遣往人等有彼處身故者行文該將軍將伊妻子送回京城交與伊伯叔等管轄教訓應如所請但覺羅原與平民不同犯罪至於發遣必其情罪重大不可輕恕者若發遣身故又令伊妻子回京殊覺煩擾請嗣後覺羅等有應行僉妻發遣者俱免其發遣永遠拘禁

於該旗高牆之內庶覺羅不肖之人知所畏懼而亦無煩擾之事矣從之○戶部議覆雲南巡撫張允隨疏言滇省各府州縣或兵多米少或兵少米多米少則輓運維艱米多則紅朽足慮請將廣西廣南鶴慶永昌永北曲靖尋甸羅平南寧太和南安鎮雄保山新平支山會澤等處額徵條銀每兩折收米一石阿迷寧州路南雲龍雲州鎮南通海蒙自永平姚州元謀等處額徵秋米每石折收銀一兩其普洱攸樂威遠鎮沅等處以一兩折給兵丁不敷買食請酌量增給竝於癸丑年爲始停止採買均應如所請從之○福建總督郝玉麟疏報臺灣北路大甲西等社兇苗不法官兵進剿克期寧謐得旨嘉獎下部議敘○復設廣東督標右營右哨二司把總一員從廣東總督鄂彌達請也○以故喀爾喀扎薩克多羅貝勒策穆楚克納木扎爾子成滾扎卜襲爵喀爾喀扎薩克固山貝子策旺諾

爾布老疾解退封其子冊穆楚克扎卜爲扎薩克鎮國公以故科爾沁扎薩克固山貝子烏爾呼滿爾子瑪哈瑪裕里襲爵○予陣亡輔國公巴賽祭葬諡襄愍○乙亥一等伯英德緣事革退以其親叔祖之孫一等侍衛馬爾遜襲替○丁丑諭辦理軍機大臣等營總席爾瑞著授副都統銜仍留軍營○諭八旗旗員子弟久隨外任不但伊等安逸遊蕩荒廢無成而在署干預地方之事每壞伊等父兄聲名是以從前議定外官子弟十八歲以上者悉令歸旗或讀書肄業或披甲食糧使之各有成就不至廢棄此朕教養之恩也至伊等子弟中有可以助其父兄辦理事務或別有情節不能相離者朕原准其奏聞請旨而道府以下官員不能自達於朕亦有督撫代奏之例今太原知府劉崇元將伊姪劉度昭私留任所涇陽縣縣丞羅思哈將伊子什勒誑稱年歲未及不行咨送似此怠玩功令

之員不可不加懲戒劉崇元羅思哈俱著解任送伊子姪來京該旗大臣奏聞請旨嗣後倘有不行奏聞而私留子姪在任者悉照此例竝交部議處辦理軍機大臣等遵旨議奏黑龍江將軍卓爾海等請以該處水手及驛站閒散壯丁三百有四名再於呼倫貝爾餘丁內揀選一百九十六名共五百名今往伊敏河各尼河等處耕種地畝查呼倫貝爾處兵丁蒙恩賞給畜產每日操演技藝牧放牲畜竝無閒暇應止於水手壯丁內遣一百有四名往伊敏河二百人往各尼河已足敷種地之用現今博第前往呼倫貝爾此項種地之人即交博第等管轄并令派員經理俟秋收後該將軍奏聞從之○署陝西總督劉於義疏言金塔寺地方緊要存城兵少經臣奏請將高臺之滿洲兵五百名移駐金塔寺廷議以高臺之兵現備明春調往大營請於甘州提標新募兵內撥派實屬允協但臣等

前因時近嚴冬一面已知會高臺兵自涼州徑赴金塔寺駐劄現在安頓妥帖金塔寺離肅州僅百餘里較高臺更覺近便請俟此項兵調赴軍營之後再將甘州新兵檄調奏入報聞○戊寅

孝莊文皇后忌辰遣官祭

昭西陵○庚辰諭理藩院額駙策凌子策布登扎卜隨父軍前行走甚屬効力著封爲輔國公素巴錫立奏請派差報効著授爲內大臣○復原任禮部左侍郎蔡世遠職銜○禮部尚書張大有故遣禮部堂司官前往祭奠○辛巳歲暮祫祭

太廟

上親詣行禮遣官祭

永陵

福陵

昭陵

昭西陵

孝陵

孝東陵

景陵

孝敬皇后遣官祭太歲之神旌表八旗節婦滿洲麻哈大妻佟佳氏等一百七十人蒙古古木布扎布妻段氏等十四人漢軍李景秀妻楊氏等三十六人孝婦潘氏一人直隸各省節婦尚毓琇妻吳氏等六百四十四人貞女鄧氏等二十一人孝婦汪氏一人孝義侯治經等三人孝子鄒世麟等二十五人各給銀建坊如例○是歲人丁戶口二千五百四十四萬二千六百六十四丁又永不加賦滋生人丁九十二萬二千一百九十一丁田地山蕩畦地八百八十一萬三千七百八十頃八十六畝有奇徵銀三千八萬九千四兩有奇米豆麥四百七十五萬二千七百四十五石有奇草五百二萬六千二百八十八束茶三十三萬二千二百九十一引行鹽五百

一十六萬二千七百八十三引徵課銀四百一萬五百六十七兩有奇鑄錢九萬一千一百一十七萬一千一百二十有奇

大清世宗敬天昌運建中表正文武英明寬仁信毅大孝至誠憲皇帝實錄卷之一百二十六

大清世宗敬天昌運建中表正文武英明寬仁信毅大孝至誠憲皇帝實錄卷之一百二十七

監修總裁官光祿大夫經筵講官太僕寺卿保和殿大學士兼兵部尚書總理事務署白子玉臣 鄂爾泰

總裁官光祿大夫經筵講官起居注太僕寺卿保和殿大學士兼兵部尚書總理事務署白子玉臣 鄂爾泰

事三官伯加三級臣 張廷玉光祿大夫經筵講官起居注太僕寺卿保和殿大學士兼兵部尚書總理事務署白子玉臣 鄂爾泰

翰林院掌院學士加三級臣 福敏光祿大夫經筵講官太子太傅兼兵部尚書總理事務署白子玉臣 鄂爾泰

經筵講官議政大臣協辦內閣大學士事務禮部尚書內閣學士兼兵部尚書總理事務署白子玉臣 鄂爾泰

敕修

雍正十一年癸丑春正月癸未朔

上於宮中拜

神畢御殿王以下文武各官及外藩使臣等上

表朝賀停止筵宴○朝鮮國王李昞遣陪臣

李正望等表賀冬至元旦

萬壽節及進歲貢禮物宴賚如例○丁亥孟春

享

太廟

上親詣行禮○遣官祭太歲之神○諭內閣川

省爲產米之鄉歷來聽商賈販運從長江至

楚以濟鄰省之用。雍正九年。巡撫憲德以川省米價稍昂。又復碾辦軍糈。奏請暫禁商販。此不過一時權宜之計。至雍正十年。川省收成豐稔。米價平減。憲德即當奏請開禁。乃至今照前禁遏。以致米穀不能流通。楚省不得川米之益。甚非大臣公平辦事之道。況目今江浙有需米之州縣。望濟於楚省。而該撫不令川米赴楚。則鄰省何所資藉。著即傳諭憲德。速弛米禁。毋蹈過程之戒。○辦理軍機大臣

軍機大臣

等議覆署陝西總督劉於義疏言。駐劄陝西省勇健營兵丁。其中多驕悍不可用之人。請令總兵周一德等甄別挑汰。遞回原籍。應如所請。得旨。朕前以各省民人內。必有人材壯健。技勇可觀。願爲國家効力。以圖上進者。是以特降諭旨。令各省督撫。召募揀選。送京訓練。以備軍旅之用。伊等如果能奮勇出力。建績立功。將來俱可爲干城之寄。故疊加恩賚。於應募後。即各給守糧一分。贍養家口。到京

後撥給房屋居住。月餉銀米從優給發。起程赴陝。又各賞衣裝路費銀兩。暫令駐劄近邊地方。以候差用。俾伊等各展効力之心。並圖進身之路。是朕加恩於勇健兵者。至爲優渥。伊等各自揣量實爲過分。乃其中多有放縱驕悍。生事不法者。上年到京。即不安本分。肆行爭鬪。及令赴陝。沿途又復生事。騷擾該督撫。曾具摺奏。而駐劄甘州之後。竟有私自脫逃之人。陳天培又經具奏。此等無賴之徒。

軍機大臣

固由各省督撫。不慎重揀選。濫募充數。總統大員不能嚴行約束。整飭教導。而在伊等受恩而不知感。自甘廢棄。冥頑惡劣。即令調赴大營。亦不可用。著總兵周一德。即行甄別挑汰。遞回原籍。交該地方官嚴加收管。不令出境。生事。若有心懷怨望。捏造浮言。并恃強肆橫。闖毆不法等事。該地方官立即拘拿。稟知督撫提鎮。一面奏聞。一面按法究治。至於挑存可用之人。俱應感激朕恩。遵循法紀。嗣後

益加黽勉努力戎行以圖上進朕必加以恩澤著將此旨曉諭知悉○戊子諭辦理軍機大臣等差往西藏辦事之副都統李桂於途次病故原任都統馬喇前曾在藏辦事熟諳彼處情形著以副都統銜前赴西藏與青保苗壽協同辦事僧格邁祿俱在藏年久俟馬喇到藏之後著僧格邁祿回京○大學士等遵旨議覆浙江總督程元章疏言海寧縣今年夏秋潮勢自東而西侵入仁和縣界石草各塘坍卸無常勢甚危險等語查海寧東塘向有修築石草各工而西首現衝之仁和縣界原係土工離杭城僅二三十里且與長安壩下河向北一帶相距不遠設有疎虞建瓴而下有關杭嘉湖蘇松常六郡利害自應速為修築以備春伏大汛但各處塘工止有石土之分獨寧邑又有草工者蓋緣其地沙活土浮潮頭往來搜挾塘脚即使大石鋪砌而上重下虛最易傾倒不得已修築草塘暫為

堵禦是三項工程因時隨地各不可少但該督祇稱各塘危險未經疏明何項塘工無憑懸揣應令逐一詳勘即乘春間水小時將應行補葺修築之處酌動錢糧相機料理其通盤形勢作何籌畫久遠之法應俟特簡大臣前往查看再行定議得旨著內大臣海望總督李衛馳驛前往浙江會同總督程元章將海塘工程通盤相度形勢籌畫事宜應作何修築以垂久遠之處詳細查勘悉心定議其修築工程著大理寺卿汪隆原任內閣學士張坦麟前往承辦仍照舊令程元章總統辦理張坦麟即於本籍前往直隸總督印務著署刑部尚書唐執玉暫行署理營田觀察使顧琮協辦○己丑

世祖章皇帝忌辰遣官祭孝陵○庚寅諭內閣上年江南沿海被水地方如常熟等二十二州縣並續報之華亭等六縣該督撫等已遵旨軫恤定議大賑三次每

次以一月爲期料寒冬初春以來窮民存養有資不致失所矣朕念二三月間正青黃不接之時尚須籌畫接濟資其力作庶可無悞春耕着再加賑四十日其有從前遺漏貧民並前可糊口而目下力不能支者俱着查明添入補賑之內再被水之鹽場竈戶亦照貧民例加賑一月該督撫鹽政務須督率有司實力奉行使被水之家均沾恩澤以副朕恤災拯困之至意○又諭江南范公堤爲沿海之藩籬鹽場之保障原係商人捐辦工程聞現在殘缺甚多急應修築堅固現據兩江總督魏廷珍委員確勘料估着即一面具題一面乘二三月間作速興工使沿海窮民得以傭工餬口但工程綿遠需大員董理着交與協理河務西柱即行督率各工悉心查辦○辦理軍機大臣等議覆侍郎納延泰奏言臣等公同喀爾喀扎薩克圖汗格勒克顏木聘爾等詳議駐兵地方查紅郭爾鄂隆可駐兵

一千名其東南百餘里外兔白徹克可駐兵二千名西面之西巴爾臺河面一帶至濟爾哈郎圖可駐兵二三千名如此既可照管喀爾喀遊牧亦足堵禦阿濟道路請行文都統哈達哈副都統綽爾多等即帶領兵丁於青草發時起程前往駐劄應如所請從之○辛卯祈穀於

上帝

上親詣行禮○諭宗人府朕幼弟允祹秉心忠

厚賦性和平素爲

皇考之所鍾愛數年以來在宮中讀書學識亦漸增長朕心嘉悅著封親王皇四子弘曆皇五子弘晝年歲俱已二十外亦著封爲親王所有一切典禮著照例舉行○調奉天副都統常昇爲寧古塔副都統寧古塔副都統巴爾岱爲奉天副都統○壬辰諭內閣各省學校之外地方大吏每有設立書院聚集生徒講誦肄業者朕臨御以來時時以教育人材爲念

但稔聞書院之設實有裨益者少。浮慕虛名者多。是以未嘗勅令各省通行。蓋欲徐徐有待。而後頒降諭旨也。近見各省大吏漸知崇尚實政。不事沽名邀譽之爲。而讀書應舉者亦頗能屏去浮囂奔競之習。則建立書院擇一省文行兼優之士讀書其中。使之朝夕講誦整躬勵行。有所成就。俾遠近士子觀感奮發。亦興賢育材之一道也。督撫駐劄之所。爲省會之地。著該督撫商酌舉行。各賜帑金一千兩。將來士子羣聚讀書。須豫爲籌畫。資其膏火。以垂永久。其不足者在於存公銀內支用。封疆大臣等並有化導士子之職。各宜殫心奉行。黜浮崇實。以廣國家菁莪棫樸之化。則書院之設。於士習文風有裨益而無流弊。乃朕之所厚望也。○調署雲貴廣西總督高其倬爲兩江總督。署兩江總督尹繼善爲雲貴廣西總督。陞江南驛鹽道陳弘謀爲雲南布政使。司布政使。予故禮部左侍郎蔡世

遠祭葬如例。○癸巳命原任四川巡撫法敏前往歸化城與都統丹晉等辦理錢糧事務。○正白旗滿洲都統穆森年邁有疾。命以原官休致。○戊戌諭內閣。大定副將楊馥統兵擊賊。奮勇先登。爲暗鎗所傷。其忠義之氣甚屬可嘉。伊子楊恒新現在軍前。技勇頗優。亦甚有志氣。著授爲遊擊。不必在軍前効力。遇有遊擊缺出。即行題補。平越營遊擊羅資袞以帶兵應援。勇往被害。深可憫惻。伊子羅雲標現在隨征。効力著授爲守備。該督等酌量題補。至楊馥羅資袞應得卹典。俟事竣題報到日。仍照例賞給。○庚子命大學士伯鄂爾泰前往北路軍營。經畧軍務。○命山西大同總兵官張朝良陝西涼州總兵官楊琮前往西路軍營行走。以署陝西花馬池副將陳弼署陝西涼州總兵官。○辛丑以福建陸路提督王郡暫署福建水師提督。福建福州將軍阿爾賽署福建陸路提督。○辦理軍機大臣

等議覆靖邊大將軍順承親王叅奏振武將軍傳爾丹在烏孫珠爾地方遇賊並未親身督陣以致兵丁懦怯回營原任副都統阿三推諉退縮一與賊遇即行奔北等語應將傳爾丹阿三交三法司定擬具奏順承親王錫保不能籌畫指示應交宗人府議處得旨烏孫珠爾對壘情形朕曾細問額駙策凌傳爾丹情罪尚有可原從寬免其治罪著留軍營聽大將軍等調遣効力贖罪行走阿三前歲同陳泰貽誤軍機朕曾加恩免其治罪今據大將軍叅奏情由甚屬可惡已在軍前取有確供交三法司定議具奏餘依議○壬寅諭內閣甘涼肅等處兵丁本年應支糧料草束例應折給銀兩自行採買朕因甘省年來辦理軍需食物昂貴兵丁所領銀兩恐不敷用特令加倍增給以示格外之恩提鎮大員自應體朕軫恤兵丁至意悉心料理加意愛養近聞弁員中尚有營私瞻徇凡於過往應酬

及一切雜費俱於各兵攤派即如甘提馬廠每年尚有餘利若盡歸公用於兵丁不無小補前任提督宋可進祇知網利不恤兵艱尅扣餉銀濫用公帑各鎮將弁未必不做做而行著署督劉於義侍郎杭奕祿嚴飭陝甘提鎮將營中所有除各官俸薪及親丁名糧外凡有餘利俱歸公用接濟兵丁不得絲毫乾沒入己亦不得借公費等項名色攤派署提督劉世明受恩深重尤當實力奉行毋得仍蹈故轍自取罪戾嗣後弁員有私派侵蝕等弊該署督等即行叅奏并將該管提鎮一併叅處諭理藩院喀爾喀貝勒策登扎布懇請願往軍前効力著照所請前往伊帶往之兵丁百人馬匹行糧准照內地兵丁之例支給○命鑄靖邊左右副將軍印二顆交大將軍收貯以備額駙策凌等調遣滿洲蒙古兵丁之用○甲辰以江西南贛總兵官劉章署山西太原總兵官安徽安慶副將康華齡署

江西南贛總兵官命署正藍旗蒙古副都統郭多渾藍翎侍衛席喇布賑濟扎賴特貧乏人等喀爾喀固山貝子佛保陷賊未歸以其兄沙克都爾查卜襲爵丙午諭內閣國家以制科取士原以覘士子所學而士子所學關乎世道人心是文體之所繫固甚重也士子讀聖賢書果能講求明體達用之學則以平日蘊蓄發爲文章自然法正理純得聖賢語氣可以傳世而行遠此則有本之學有用之文爲國家所重賴者若不於根柢講求而但以華靡相尚則連篇累牘皆屬浮詞聖賢精義既全無發明聖賢語氣又毫不相肖國家亦安用此浮誇淺薄之士哉至於二三場策論尤足覘經濟實學乃向來士子多不留心而衡文者又每以經義已經入彀遂將策論濫收恕取不復加意閱看殊非設科本意今會試伊通著禮部先期曉諭應試士子於二三場文藝均應努力殫心毋得潦草

完卷試官如以限於時日不能細心校閱後場不妨奏請展限務得真才以收實用若所取試卷中有經義可觀而策論疵繆荒疎者朕惟於主考官是問調鑲藍旗蒙古副都統噶爾錫爲正黃旗滿洲副都統正紅旗滿洲副都統鄂齊緣事革職調正黃旗蒙古副都統瞻岱爲正紅旗滿洲副都統以署正黃旗滿洲副都統色爾登爲正黃旗蒙古副都統署正紅旗蒙古副都統岱林布爲鑲藍旗

蒙古副都統 丁未

上躬謁

陵寢是日啓行駐蹕烟郊授理親王弘晷妹爲郡主壻喀寧阿爲和碩額駙戶部議覆左副都御史二格奏稱自肅州以至哈密計程一千五百餘里其間沙州安西等處向屬肅州道管轄但該道駐劄肅州事務甚繁於口外地方鞭長莫及且現在安西開墾屯種又有吐魯番回民於瓜州安插須有大員就

近彈壓撫綏教導尤屬有益應如所奏添設
安西兵備道一員其原設之安西同知一員
移駐瓜州辦理水利屯田與原設之靖逆通
判以至四衛一所俱令該道統轄從之○三
等公傳爾丹緣事革爵以其子兆得襲替○
戊申

上駐蹕天平莊○己酉

上駐蹕龍門○庚戌

上詣

昭西陵

孝陵

孝東陵行禮奠酒舉哀次謁

景陵入

隆恩門即慟哭至

寶城前行禮奠酒哀慟良久王以下文武大臣

官員等隨行禮舉哀○是日

上回鑾駐蹕馬伸橋○辛亥

上駐蹕小營○賜扈從年老大臣官員緞疋有

差○壬子

上駐蹕新莊諭內閣朕躬謁

陵寢見沿途地方安設水缸甚多或動支錢糧
或派用民力著查明具奏地方官職司民牧
當以休養百姓為務若祇以灑道清塵為迎
合朕心之舉錯謬已甚鑒輿所過即畧有塵
土亦復何礙伊等於此等處過於用心轉被
朕之譴責何不以此用之於民生吏治重受
朕之嘉獎耶一併傳諭知之

大清世宗敬天昌運建中表正文武英明寬仁
信毅大孝至誠憲皇帝實錄卷之一百二十七

大清世宗敬天昌運建中表正文武英明寬仁
信毅大孝至誠憲皇帝實錄卷之一百二十八

監修總裁官光祿大夫經筵講官太僕議政大臣保和殿大學士兼都察院右都御史理兵部事務等伯加十五級臣鄂爾泰

總裁官光祿大夫經筵講官起居注太僕卿太子太保保和殿大學士兼戶部尚書仍兼管吏部尚書翰林院掌院

事三等伯加十三級臣張廷玉光祿大夫經筵講官起居注太僕議政大臣武英殿大學士兼工部尚書仍兼管

翰林院掌院事加三級臣福敏光祿大夫經筵講官太子太保東閣大學士兼禮部尚書加級臣徐本光祿大夫

經筵講官議政大臣協辦內閣大學士事務禮部尚書仍兼管太常寺四庫館事等伯加三級臣奏

敕修

雍正十一年癸丑二月癸丑朔

上回宮○以署鑲藍旗滿洲副都統石圖為正

黃旗蒙古副都統 四川建昌總兵官趙儒

疏報蒙古喇兒斯堡等處賊番狂逞不法殺

害廠商臣率領漢土官兵於九月初六日自

建昌起程分路進剿攻克番寨六十餘處擒

獲首兇於十二月十一日撤兵得旨賊番不

法趙儒領兵擒剿迅速事竣甚屬可嘉著交

部議敘其在事將弁兵丁等亦著分別議敘

賞費○賑濟杜爾伯特災荒戶口并賞給耕

牛籽種○乙卯以吏部右侍郎阿山內閣學

士索柱吏部左侍郎任蘭枝戶部左侍郎俞

兆晟國子監祭酒邵基俱充經筵講官○以

原任雲南布政使葛森為盛京戶部侍郎○

丙辰以鑲黃旗滿洲副都統保明署本旗滿

洲都統調正藍旗滿洲都統查爾泰為正白

旗滿洲都統以散秩大臣伯伊勒慎為正藍

旗滿洲都統○丁巳祭

先師孔子

上親詣行禮○是日春分朝

日於東郊遣員勒弘春行禮○戊午祭

大社

大稷

上親詣行禮○諭內閣江南濱海之州縣上年

遭值水患貧民乏食朕已蠲租散賑加意撫

綏今春又頒諭旨加賑四十日資其耕作務

令得所近聞有司奉行不力吏胥作姦竟有

未霑實惠之窮民現在嗷嗷待哺而松江所

屬爲尤甚。此雖罪在有司而督撫等亦豈無聞見咎實難辭。著該督撫嚴行申飭竭力稽查。竝督率郡縣官速爲料理。僅再有怠忽從事者。定將大小官員嚴加處分。以戶部尚書鄂爾奇爲會試正考官。吏部左侍郎任蘭枝兵部左侍郎楊汝穀爲副考官。以鑲白旗滿洲都統莽鵠立署步軍統領。理藩院疏奏車臣汗冊卜登拜音珠爾人甚不及請以扎薩克多羅郡王垂扎卜署理印信得旨。車臣汗名號即著垂扎卜承襲。○乙未

上御經筵講軍賜大學士九卿詹事及講官等宴。封二十四阿哥允祕爲和碩誠親王。

皇四子弘曆爲和碩寶親王。皇五子弘晝爲和碩和親王。○諭辦理軍機大臣等額駙策凌去時曾奏請將都統哈達哈遣往北路軍營從前派往紅郭爾鄂隆等處駐劄兵丁曾著侯馬蘭泰管轄。今馬蘭泰不必前去著留京在辦理軍機處行走。伊所挑馬場兵一千名

著副都統黑色於四月間由馬場起程至歸化城會同哈達哈等管領前往紅郭爾鄂隆駐劄。今哈達哈既往北路軍營。此兵著派公豐盛額總統酌量哈達哈赴紅郭爾鄂隆之時豐盛額再由京起程。○以領侍衛內大臣承恩公慶復爲工部尚書。○以原任福州將軍黃秉鉞爲正紅旗漢軍副都統。正黃旗漢軍副都統趙德沛緣事革職。陞黑龍江叅領蘇巴里爲正黃旗漢軍副都統。正白旗漢軍叅領祖魯爲鑲白旗漢軍副都統。正白旗漢軍副叅領曹煥爲正藍旗漢軍副都統。○庚申

上詣

恩佑寺行禮畢。幸圓明園。○諭內閣古云兵可百年不用不可一日不備。所謂備者非徒操練技勇演習行陣而已。如馬匹軍裝礮火器械軍行必需之物。一一預備於平時。及有事調撥便可刻期起行。不至拮据延緩。此乃

設兵之本意也我國家承平日久武備漸弛年來朕屢降諭旨諄諄訓飭雖該管大臣等稍知以訓練爲務然馬力不足資裝器具不周每聞派遣之信勉強周章遷延時日所謂預備者但有虛名而無實際此則該大臣所當深知痛改加意整理者又如營中有必需之匠役不得不酌量給與兵糧數名以資養贍而將弁等每多借此名目將水火夫役等多佔名糧又每將精壯兵丁多派爲親隨不令當差及遇頭目把總缺出即於此內拔補以致荷戈持戟者差使繁多而不得上進之路朕向知此弊已屢降諭旨切加申飭近聞此風仍未全改亦著該管大臣嚴行查察毋得姑容又聞各營中間有中公餘利如甘州提標馬廠之類原係存公備用而該管將弁往往據爲己有收入私橐遇有過往應酬及營中雜費仍攤派兵丁而不卹其艱苦此弊尤當禁革今再行曉諭儻敢視爲具文仍

蹈前轍勿謂罰不加衆希冀苟免其情罪輕者照例處分情罪重者必在本地正法○陞左都御史吳士玉爲禮部尚書倉場侍郎余天相爲都察院左都御史仍兼理倉場事務○予故禮部尚書張大有祭葬謚文敬○贈故福建水師提督許良彬太子少保銜予祭葬謚壯毅○辛酉晉封貝勒弘春爲多羅泰郡王○以陝西布政使鄂昌協理陝西西安巡撫事務○陝西寧夏左翼副都統僧保緣事革職仍留軍營効力陞一等侍衛喀拉爲陝西寧夏左翼副都統○以前鋒統領阿思海管領西安滿洲兵丁鑲藍旗蒙古副都統敦巴前往紅郭爾鄂隆効力行走○壬戌諭辦理軍機大臣等原任護軍統領喀爾吉善久歷戎行伊願往軍前効力著賞給原品令往紅郭爾鄂隆軍前協助公豐盛額行走賞銀一千兩○以戶部尚書彭維新協辦內閣事務○癸亥

孝康章皇后忌辰遣官祭

孝陵○甲子遣官祭

歷代帝王○諭理藩院喇嘛扎卜前年一聞賊信即駭然驚潰及戰於克爾森齊老地方棄軍奔往遊牧處所朕恐此中別有情節令其來京訊問伊竟無一語置對甚屬怯懦無恥著革去扎薩克和碩親王令伊弟德親扎布承襲撤回一佐領賞給額駙策凌喇嘛扎卜著交該衙門議處尋議喇嘛扎卜係喀爾喀部落親王盟長不思訓導屬人効力軍事應按律正法得旨喇嘛扎卜理應照議治罪但伊祖親王善巴於喀爾喀等未定之先即輸誠歸順後於軍事甚屬効力是以

聖祖仁皇帝加恩於喇嘛扎卜備極愛養著從寬免死在京永遠監禁○以兩淮鹽政高斌辦理江南副總河事務○乙丑遣官祭關聖帝君○兵部議覆直隸總督李衛疏言易州地方恭建

萬年吉地原設易水營都司一員把總二員馬

守兵二百三十七名不敷差遣請添設中軍千總一員馬兵十名守兵四十名應如所請從之○丁卯以翰林院檢討陸宗楷充日講起居注官○戊辰兵部議奏福建臺灣北路大甲西等社兇番肆逆總督郝玉麟調度有方應加三級提督王郡奮勇進剿尅期寧謐應加左都督銜從之○旌表河南商水縣烈女婁琚女婁氏拒姦不污被勒殞命給銀建坊入祠致祭如例○庚午補行四川湖北二省及河東總河屬員雍正八年分大計卓異官七員貪官四員不謹官四員罷軟官一員年老官十二員有疾官五員才力不及官十二員浮躁官三員分別陞賞處分如例○辛未廣西巡撫金鉷疏報桂林府中右二衛開墾雍正十年分田地六頃有奇下部知之○免江南徐州豐縣等六州縣雍正九年分水災額賦有差○壬申

上詣

恩佑寺行禮（清明節遣官祭

永陵

福陵

昭陵

昭西陵

孝陵

孝東陵○

上命

皇四子寶親王弘曆祭

景陵（遣官祭

孝敬皇后○癸酉戶部議覆江蘇巡撫喬世臣

疏言江蘇等屬地丁項下額徵本色米豆各

屬因漕白二糧考成較嚴先儘起運而其餘

米豆向係彙入地丁內奏報合算並未另有

處分是以每多逋欠應將江省本色米豆停

其彙入地丁折色之內按額核作十分每年

十月初一日開徵至次年三月計算六個月

將已未完解數目另冊題銷其經徵未完各
官均照漕白糧定例處分督催之巡撫司府
仍照地丁錢糧例查議如原欠三四千石以
上為數既多催徵不易應請一年內能將原
欠三千石以上徵完者紀錄三次原欠四千
石以上徵完者紀錄四次如不通完三千石
以及四千石者其未完初叅二叅三叅處分
仍照浙省未完二千石以上之例議處應如
所請從之○裁雲南宣威州屬僮塘可渡驛
丞缺改設可渡巡檢一員仍兼管二驛事務
從署雲貴廣西總督高其倬請也○甲戌諭
內閣從來天時之旱澇由於政治之闕失人
事著於下天道應於上感召之機捷於影響
朕深明此理纖毫不爽而刑獄為民生休戚
所關更為緊要一有枉抑天氣即為之不舒
上年京師無雪今春雨澤又少朕心惶懼深
恐用人行政之間錯誤失當朝夕修省莫釋
於懷朕觀各部院中惟刑部聲名不好司員

作弊胥吏逞姦道路之間人言嘖嘖海壽身
爲尚書乃一部之表率伊先懷挾私心何能
使所屬之人奉公守法乎王國棟受朕深恩
膺封疆之重寄乃伊在湖南浙江等任非水
即旱或遇虫災歷歷可數及回刑部辦事而
天時又有亢旱之象何其前後一轍如此伊
心尚不知儆畏視爲泛常是漢軍污下習氣
全然未改也刑部職任何等重大而海壽王
國棟之居心行事若此一任司官胥吏作姦

犯科舞文弄法豈有不上干

天和之理朕屢次諄切誠諭深望伊等愧悔悛
改儻仍然執迷不悟朕惟有執國法以正其
罪非第革職降罰而已刑部事務朕非不欲
另派大臣清查經理然新派之大臣平時既
未練習科條一到豈能洞悉情弊輾轉思維
不得不仍於經歷之大臣是問著即將大小
事件應完結者完結應改正者改正種種弊
端徹底釐剔務期正本清源毋再因循玩忽

海壽王國棟二人尤須痛改前非力圖後効
否則身試法網亦無可如何也朕前躬謁

陵寢見沿途地方安設水缸甚多此時詢問按
察使竇啟瑛據奏係動支錢糧預備者因即
降旨切責將竇啟瑛交部議處今觀畿輔之
地雨雪亦未均調竇啟瑛爲職掌刑名之大
員而識見庸陋如此則聽斷讞鞫之際必有
不得其當者安得不加儆懼爾等部院大臣
俱有辦事之責刑部固爲刑名總匯而各部
事務與刑名相關涉者亦多如戶部錢糧之
虧欠工部工程之查核吏部兵部員弁之考
成皆有處分及交送刑部之件諸大臣俱應
慎重周詳小心敬謹以凜

天戒朕之用人行政如有錯誤諸大臣科道等
即當切實指陳直言無隱朕之省身思過實
出至誠若少有從事虛文之意是自欺以欺
天矣尚敢冀

天心之感格乎文武大臣科道等官向有輪班

條奏之例近年以來軍務殷繁暫時停止恐耳目未周下情或有壅於上達者著仍照前例輪班條奏○乙亥廣西巡撫金鉅疏報桂林等府開墾雍正十年分田地五百頃有奇下部知之○丙子命分別賞賚厄爾得尼招地方破賊官兵銀九萬九千兩有奇○刑部等衙門遵旨議奏原任副都統阿三於大將軍調遣時託故後期遇賊奔北貽誤軍機應即於軍前正法從之○免江西清江等三縣雍正十年分水災額賦有差○丁丑移湖南澧州嘉山鎮巡檢駐津市仍兼查緝原管地方從湖南巡撫趙弘恩請也○戊寅孝昭仁皇后忌辰遣官祭景陵○江西巡撫謝旻疏報南昌新建等一十七縣開墾雍正十年分田地六十二頃有奇下部知之○己卯以平郡王福彭爲玉牒館總裁官大學士尹泰禮部左侍郎王圖炳禮部右侍郎舒喜爲副總裁官以太僕

寺卿顧琮爲太常寺卿庚辰以翰林院編修王安國于辰錢本誠俱署日講起居注官○予故廣東廣州將軍蔡良祭葬謚勤恪○山東巡撫岳濬疏報東阿德州等五縣衛開墾雍正九年分田地七十二頃有奇下部知之○改直隸永平府司獄司爲巡檢移駐喜峯口從直隸總督李衛請也○辛巳

上詣

恩佑寺行禮畢回宮

大清世宗敬天昌運建中表正文武英明寬仁信毅大孝至誠憲皇帝實錄卷之一百二十八

大清世宗敬天昌運建中表正文武英明寬仁
信毅大孝至誠憲皇帝實錄卷之一百二十九

監修總裁官光祿大夫經筵講官太僕寺卿兼翰林院侍讀學士內閣學士等官

總裁官光祿大夫經筵講官起居注太僕寺卿兼翰林院侍讀學士內閣學士等官

纂修官光祿大夫經筵講官起居注太僕寺卿兼翰林院侍讀學士內閣學士等官

翰林院侍讀學士加一級直學士光祿大夫經筵講官太子太僕寺卿兼翰林院侍讀學士內閣學士等官

經筵講官光祿大夫協辦內閣大學士事務禮部尚書仍兼管太常寺鴻臚寺事務

敕修

雍正十一年癸丑三月壬午朔諭辦理軍機

字錄卷一百二十九

大臣等西藏駐劄弁兵本為保護唐古特人等以防準噶爾賊夷侵犯而設。比來賊夷大敗徒步奔逃力感勢窮不能遠涉藏地則其無力進兵可知。且頗羅鼐輸誠効力唐古特之兵亦較前氣壯。現今藏地無事兵丁多集則米穀錢糧一切費用等項雖給自內地而唐古特人等不免解送之勞。朕意量其足以防守藏地留兵數百名餘者盡行撤回其留藏之兵著總兵官周起鳳帶領駐劄青保馬

喇苗壽著總理藏務。至此項兵應撤若干應否將駐劄又木多之雲南兵丁一併撤回著詳議具奏。尋議西藏居住之四川二千兵內應留兵五百名以為該地守護之用。餘俱撤回原處。所留之兵俟三年後仍於四川官兵內派換。其又木多居住之雲南兵一千名原為救援藏兵而設。今駐藏之兵既已酌減則此項兵亦應撤回五百名。照四川兵丁之例三年更換從之。○兵部等衙門議覆署雲貴廣西總督高其倬疏言雲南臨安元江楚雄景東四處鎮營與晉思新平夷界接壤現存兵丁單弱請暫行招募壯健以實營伍俟有缺出頂補應如所請從之。○乙酉大學士張廷玉條奏。一請酌定分別監禁之例國家設五監獄原以收禁罪重之人是以各省人犯罪重者極梏收禁罪輕者取保看守獨刑部衙門遇八旗部院步軍統領以及五城御史等交送人犯不論曾經奏聞與否亦不論情

實錄卷一百二十九

事之大小罪犯之首從一經鎖送即行收禁候審致獄吏欺陵嚇詐諸弊叢生及至定案重犯少而輕犯多甚有審係無辜應行釋放而一時干累困頓備嘗請勅九卿定議嗣後凡各衙門送部人犯何等應行收禁何等應行取保分別定例遵行一請詳慎引例之條律例之文各有本旨而刑部引用往往刪去前後文詞止摘中間數語即以所斷之罪承之甚有求其彷彿比照定擬者或避輕就重或避重就輕高下其手率由此起夫都察院大理寺與刑部同爲法司衙門若刑部引例不確應令院寺駁查改正駁而不改即令題叅如院寺扶同朦混或草率從事請即將院寺官員一併加以處分得旨九卿確議具奏尋議凡各衙門現獲人犯該徒罪以上者於送部時務將案內干連人犯情罪重輕聲明文內以便分別收禁其杖笞等案各自訊明發落完結毋庸送部儻各衙門將輕罪人犯

混行交送刑部即行駁回或刑部司員混行收禁以致拖累無辜者該堂官查出即行題叅交部議處又凡引用律例務必情罪相符如律內數事共爲一條輕重互見仍聽祇引所犯本罪若一條止斷一事不得任意刪減或律例無可引用援引別條比附者應令於疏內聲明律無正條今比照某例科斷僅承審官仍前玩忽援引失實及律例本有正條而故引別條出入人罪該堂官查出將承審之司員題叅書吏嚴拏究審各照本律治罪至三法司衙門理宜一體詳慎嗣後凡應法司會審事件刑部引例不確院寺即查明律例改正儻院寺駁改猶未允協三法司堂官會同妥議如院寺扶同朦混別經發覺將院寺官員一併交部議處從之○丙戌諭內閣雲南貴州廣東廣西四川福建六省舉人赴京會試郵程遙遠非近省可比朕意欲於落卷中擇其文尚可觀而人材可用者添取數

人候旨錄用以昭朕格外加恩之意著傳諭主考官於六省試卷遵旨取中外其次等可取之卷不拘數目秉公選出俟發榜後朕另派大臣會同主考官驗看人材更加遴選再六省下第舉子內除願與下科會試者不必報名外若有情願小就以圖即行錄用者著在禮部報名一併交與派出之大臣主考官揀選奏聞請旨○理藩院議覆巡查歸化城郎中舒魯克條奏扎薩克蒙古等有違例越界在歸化城地方居住者應交歸化城都統等查明除貿易行走之人不必驅回外其餘俟青草發生時即令回各旗原游牧地方嗣後不得越界居住至民人出口在各扎薩克地方貿易種地娶蒙古婦人生有子嗣者交歸化城都統同知等細查伊等原籍姓名戶口數目造冊具報內有願歸原籍者由該同知給與印結准其帶領妻子入口嗣後仍照舊例嚴禁蒙古婦女不許與民人爲婚如有

違禁私娶私嫁者將所娶婦人離異媒保說合人一併治罪均應如所請從之○丁亥上親耕耤田詣

先農壇致祭畢更服至耕所仍行四推禮畢上御觀耕臺命顯親王衍潢莊親王允祿裕親王廣祿行五推禮吏部右侍郎阿山戶部尚書彭維新禮部尚書三泰協辦兵部侍郎事鄂善刑部尚書海壽工部右侍郎趙殿最都察院左都御史福敏通政使司左通政蔣永祿大理寺卿索柱行九推禮各以次耕如儀上御齋宮順天府官員率耆老農夫行禮畢至耕耤所農夫終畝王以下各官行慶賀禮賜茶停止筵宴○戊子兵部議覆福建總督郝玉麟疏言福清縣依山瀕海地當孔道其駐劄之長福營左軍額兵僅五百一名不敷調遣請於通省各營撥出兵共九十名分派該營統轄應如所請從之○己丑理藩院叅奏土默特輔國公沙津達賴前於和通胡爾哈

地方臨陣遁歸。又於烏孫珠爾地方對敵挫衄。請革去公爵。得旨。沙津達賴著革去輔國公。在軍前効力贖罪。○庚寅

上幸圓明園。○辛卯。諭兵部。雲貴兩廣福建四川。叅將以上人員。除未經引見外。若有引見已過三年。應令赴京者。著該督撫先行請旨。不必即令起程。○三等精奇尼哈番濟納緣。事革職。以其子扎布承襲。○癸巳。吏部議覆。原署兩江總督尹繼善疏奏。改設府縣事宜。

一。江蘇直隸徐州。改為徐州府。設知府一員。附郭增置一縣。設知縣一員。與原轄之豐沛蕭碭四縣及邳州睢寧宿遷三州縣俱歸府轄。改淮安府分駐徐州之河務同知為徐州府河務同知。添設糧鹽捕通判一員。經歷一員。改徐州原設之鹽捕河務州同為新縣糧河縣丞。吏目為典史。南岸州判為南岸主簿。北岸州判為北岸主簿。改州學正為府教授。以徐州原設之訓導改管新縣學。○鳳陽府

屬之壽州。請分置一縣。設知縣一員。典史一員。以壽州原設之訓導分管縣學。並添設定遠縣屬池河驛巡檢一員。均應如所請從之。尋定徐州附郭縣曰銅山。壽州分設縣曰鳳臺。○甲午。吏部議覆。福建巡撫趙國麟疏報。臺灣府淡水同知楊瑞祥辦運軍糧。在洋遭風沈沒。請加贈廕卹。給與祭葬。其同舟淹斃之幕賓家人書役舵工等。均照軍功從役被傷例賞卹。應如所請。從之。○旌表浙江歸安縣烈女高成龍聘妻賈氏。守正拒姦。自縊殞命。給銀建坊。入祠致祭。如例。○丙申。刑部議覆。廣東總督鄂彌達等疏言。舊例。創參人犯。俱發廣東瓊州府屬烟瘴地方。今奉恩旨。改發沿海一帶衛所充軍。查廣東沿海衛所。俱已奉裁。嗣後此等人犯。請改發內地分派沿海之饒平欽州等州縣當差。應如所請。從之。○丁酉。以戶部右侍郎韓光基兼管刑部侍郎事。○戶部議覆。廣東總督鄂彌達疏。奏改

縣駐防事宜一程鄉縣改為直隸州統轄興寧長樂平遠鎮平四縣改教諭為學正典史為吏目州學取進文童二十名一惠州協之興寧都司改歸潮州鎮統轄移潮州鎮左營遊擊一員增撥兵丁一百名駐劄新州右營遊擊一員專防揭陽縣城均應如所請從之尋定程鄉新改直隸州曰嘉應（戊戌諭內閣朕統御中外一視同仁凡番族人等有遵奉法紀抒誠効力者無不厚加恩澤如四川口外之疊爾格土目等奉公趨事上年已頒諭旨從優賞賚其打箭爐之明正裡塘等土司土婦及頭目人等歸誠內附十數年來謹守住牧奉法急公內地兵丁赴藏駐防經行該地番民等遞運糧石供應承辦雖按數給發脚價不使擾累而伊等効力奔走於一切差使並無遲悞勤勞恭順甚屬可嘉應厚加恩賞以示獎勵又聞土民中有生計艱難者亦應加賞卹俾得並沐恩施其如何分別賞

賚之處著查議具奏尋議四川各番部中明正一部最為恭順土司土婦効力尤多請各賞綵緞十疋所屬頭目人等賞銀二千兩其裡塘巴塘乍丫又木多四部宣撫司以下應賞綵緞自十疋至六疋以次酌給所屬頭目人等每部賞銀一千兩黎烏齊羅隆宗說板多冰壩四番部土司大胡土克圖以下應賞綵緞自八疋至四疋以次酌給所屬頭目人等每部賞銀六百兩至各部番民內有生計艱難者行令該督黃廷桂委員會同該土司等查明動帑賞卹從之○調山東按察使唐綏祖來京擢廣東廣州府知府吳騫為山東按察使司按察使○調浙江温州總兵官冉起鳳為山東登州總兵官陞雲南騰越副將張傑為陝西興漢總兵官○己亥

上詣
恩佑寺行禮○壬寅諭內閣

太廟享祀向無上香之儀朕意應確議增添至

奠帛獻爵時朕意應行跪禮著大學士會同禮部酌古準今敬謹定議具奏尋議漢唐以前尚仍三代燭蕭之禮至宋時始有上香之儀竝於每征前跪三上香奠帛獻爵亦如之爵以三獻明洪武定制無上香奠帛之儀爵兩獻亦不跪至嘉靖時始改從宋制本朝會典因洪武所定而酌增之是以有奠帛有三獻爵而無上香之儀臣等敬謹詳議大祀莫重於

郊壇而孝享莫尊於

崇配至

宗廟之禮宜與

社稷壇同查祭

社稷壇時

皇上親詣

大社

大稷前跪上香則

大廟自應一例請嗣後享祀

太廟

皇上詣

太祖高皇帝位前跪三上香

太宗

世祖

聖祖位前亦如之分獻官亦詣兩廡跪上香其

裕祭及

太廟後殿

奉先殿儀亦如之至奠帛獻爵之禮

太廟

社稷俱不親獻是以

皇上於拜位前恭立所以亞於

郊壇也應請仍照舊儀行從之○調鑲黃旗漢

軍副都統德爾芬爲正藍旗滿洲副都統陞

光祿寺少卿高起爲鑲黃旗漢軍副都統○

移直隸張家口千總一員把總一員兵二十

名駐劄口外察哈爾地方從稽查遊牧郎中

文保請也○免直隸薊州蠡縣等七州縣雍

正十年分水災額賦有差○癸卯免江南通泰淮三分司所屬豐利等二十五場雍正十年分水災額課有差○予故禮部尚書吳士玉祭葬諡文恪○甲辰裁安徽鳳陽關稅大使一員從安徽巡撫徐本請也○予故刑部尚書署直隸總督唐執手祭葬如例○乙巳以鑲藍旗護軍叅領常壽署本旗滿洲副都統署正紅旗蒙古副都統伍什圖緣事革職以正白旗叅領元付鑲白旗叅領八十俱署正紅旗蒙古副都統鑲白旗護軍叅領鄂爾璽鑲黃旗叅領赫星俱署正藍旗蒙古副都統○辦理軍機大臣等疏言閱靖邊大將軍順承親王查報陣亡官兵冊結與傅爾丹所奏原冊互異之處甚多應將前報陣亡今開未還緣由傳令該官兵家屬知之其給過卹賞銀兩照數追繳所給世職亦暫停承襲得旨傅爾丹身為將軍草率查奏而該管大臣等官亦任意捏報是錯誤之咎自在傅爾丹等

與該官兵無涉所賞銀兩不必追繳其應給世職著暫停承襲○丙午諭理藩院喀爾喀多羅郡王垂扎卜既承襲車臣汗名號其扎薩克多羅郡王著伊弟恭額薩木丕爾承襲○又諭喀爾喀車臣汗垂扎卜具奏懇請俸祿從前未給喀爾喀汗等俸祿者蓋欲伊等各守舊業不令同眾扎薩克王等一例將屬下人等另編旗分佐領是以未給俸祿今車臣汗垂扎卜既以請給具奏著給與親王之俸每年加賞銀二千五百兩其土謝圖汗扎薩克圖汗亦著行文詢問伊等若不願請俸仍守舊業各聽其便若情願請俸亦著照車臣汗垂扎卜之例賞給○喀爾喀扎薩克貝勒策穆楚克納木扎爾陣亡遣官致祭○丁未以署正白旗滿洲副都統覺羅佛凝裁兼內閣學士裏行○旌表烈婦直隸新安縣王瑜妻管氏涿州趙遜妻熊氏河南固始縣金銘妻周氏江蘇吳江縣宋景義妻沈氏青浦縣

蘇惠妻葉氏。湖北漢陽縣王文綸妻田氏。俱殉夫完節。河南扶溝縣路康途妻溫氏。登封縣焦復亨妻楊氏。焦謙亨妻牛氏。山西左雲縣武鎮湖妻李氏。江蘇震澤縣錢鼎臣妻鈕氏。金山縣魯祥妻張氏。俱拒暴捐軀。各給銀建坊。入祠致祭如例。○戊申。陞內閣侍讀學士巴顏泰爲內閣學士兼禮部侍郎。○己酉。上回宮。○庚戌。策試天下貢士陳倓等於太和殿前。制曰。朕仰荷

上天

列祖眷佑之隆

聖祖仁皇帝付託之重。臨御萬方。十有一年於茲。兢兢業業。宵旰勵精。凡所以致治之道。無不期其備舉。至獎勵忠勤。振興髦士。奮武衛而厚民風。尤未嘗一日少弛於懷也。至治之世。大小臣工。類以純誠自矢。亦以精白望人。蓋惟戴君爲元首。故其視同官也。一如肢體。痛癢之相關。化朋黨比周之習。爲勸善規過

之風。夫是以協恭和衷。共成致主澤民之業也。朕推誠以遇臣工。時以公忠體國。切加勗勉。深冀內外諸臣。共臻斯路。而服官受督者。果克以忘私祛僞。自勵而交勵耶。若猶未也。則圖所以彈厥心者。宜何如。業先四民之謂士。必思所以有異於齊民之實。而後立心制行。始不淪於污下。故孟子曰。尚志。記曰。士先志。即宋陸九淵講喻義喻利。亦謂所喻由其所習。所習由其所志。志之不立。爲士之基已隳。縱記問廣洽。文藻華瞻。正昔人所譏爲雖有文采而不可近者也。然則士可不自植其本歟。而師儒之教。又可弗急其先務歟。夫治世不弛武備。凡以制治保邦於永久也。今直省營制。非不勾稽有冊。簡閱有規。校練有期。侵冒有禁矣。然保無有習爲具文。未能實力舉行者乎。其何以副朕固圉衛民之意。夫士不練。不可以程勇。器不精。不可以言備。然則弧矢戈矛之用。與夫坐作進退疏數之節。司

或政者可勿時時加意歟移風易俗吏治之最也尊民以愛敬則忠順可移馴民以敬恭則詬誶不作誘掖有術不難引中人而納於君子之塗朕治天下恒以正人心厚風俗爲切務故擢孝廉方正崇忠孝節義旌義門獎還金舉凡裨補風化之事靡不激勸嘉與以樹風聲茲遐邇民俗其悉淳歟大小臣工何以贊朕振興民行之政也耶大抵察察矢公誠則有以倡棫樸菁莪之化膠庠敦禮教則有以儲股肱耳目之才軍政修明則生民安堵風俗淳厚則衆志成城所謂清和咸理成萬年有道之長者此也爾多士其悉抒所蘊以對朕將親覽焉○以通政使司左叅議徐杞署陝西甘肅布政使司布政使仍辦理噶斯軍需事務○裁湖北歸州屬南邏巡檢一員牛口巡檢一員興山縣屬高雞寨巡檢一員長陽縣屬寒家園巡檢一員從陞任湖北巡撫王士俊請也○旌表烈女河南鄧州張

崇德聘妻牛氏江蘇鹽城縣趙樹儀聘妻王氏湖北漢陽縣李邦有聘妻俞氏黃陂縣李端聘妻黃氏俱未婚夫殞矢志捐軀各給銀建坊入祠致祭如例

大清世宗敬天昌運建中表正文武英明寬仁信毅大孝至誠憲皇帝實錄卷之一百二十九

大清世宗敬天昌運建中表正文武英明寬仁
信毅大考至誠憲皇帝實錄卷之一百三十

監修總裁官光祿大夫經筵講官太僕寺卿內閣大學士兼兵部尚書理藩院事務等伯加十五級臣鄂爾泰

總裁官光祿大夫經筵講官起居注太僕寺卿內閣大學士兼戶部尚書仍兼管吏部尚書翰林院掌院

事三等伯加十三級臣張廷玉光祿大夫經筵講官起居注太僕寺卿內閣大學士兼禮部尚書加六級臣徐本光祿大夫

翰林院掌院事加二級臣福敏光祿大夫經筵講官太子太保東閣大學士兼禮部尚書加六級臣徐本光祿大夫

經筵講官議政大臣協辦內閣大學士事務禮部尚書仍兼管太常寺鴻臚寺事臣三泰等奉

敕修

雍正十一年癸丑夏四月壬子朔享

太廟

上親詣行禮諭內閣今日諸臣進殿試卷朕
閱至第五本字畫端楷策內公忠體國一條
云僚采之際善則相勸過則相規無詐無虞
必誠必信則同官一體也內外亦一體也廣
而至於百司庶職何莫非臂指手足之相關
數語極為懇摯頗得古大臣之風因拔置一
甲三名及拆號乃大學士張廷玉之子張若
霽朕心深為嘉悅蓋大臣子弟能知忠君愛

國之心異日必能為國家抒誠宣力大學士
張英五朝數十年清忠和厚終始不渝張廷
玉朝夕在朕左右勤勞翊贊時時以堯舜期
朕朕亦以臯夔期之張若霽稟承家教兼之
世德所鍾故能若此因遣人往諭張廷玉使
知朕實出至公非以大臣之子而有意甄拔
乃張廷玉進見再三懇辭以為天下人才衆
多三年大比莫不望為鼎甲臣蒙恩現居政
府而臣子張若霽登一甲三名占寒士之先
於心實有不安儻蒙皇恩名列二甲已為榮
幸朕以伊家忠蓋積德有此佳子弟中一鼎
甲亦人所共服何必遜讓張廷玉跪奏云皇
上至公以臣子一日之長蒙拔鼎甲但臣家
已備沐恩榮臣願讓與天下寒士求皇上憐
臣愚衷若君恩祖德佑庇臣子留其福分以
為將來上進之階更為美事陳奏之時情詞
懇至朕不得不勉從其請著將張若霽改為
二甲一名以表大臣謙謹之誠并昭國家制

科盛事。令普天下士子共知之。○又諭任啟運授爲翰林。在阿哥書房行走。于開泰焦以敬吳超桑調元李光型劉學祖著賜進士補入殿試榜。○奉命查勘浙江海塘。內大臣海望等奏言。查浙省江海情形。其門戶有三。省城東南龕赭兩山之間。名曰南大壘。禪機河莊兩山之間。名曰中小壘。河莊山之北寧邑海塘之南。名曰北大壘。此三壘之形勢也。今南大壘早已淤成平陸。數十年前水由中小壘出入。後漸徙流北大壘。年來北大壘之春田廬舍已成滄海。若欲遏江海之狂瀾。仍歸中道。恐非人力所能爲者。查海寧東南有尖山聳峙。鎮鎖海口。其西有小山。俗名塌山。相去百餘丈。現今江水大溜。緊貼北塘。直趨尖山。塌山之間。而海潮激塘。護沙日刷。若於尖塌兩山之間。俟冬初水落。修建石壩。設法堵塞。使江水海潮仍向外行。則北岸護沙可望復漲。至於仁寧二邑海塘。自華家街以東。尖

山以西一帶塘工。有草塘條石塘塊石塘不等。內有大學士朱軾於巡撫任內。修建石塘五百丈。完固無損。又新建之條石塘。尚屬整齊。其餘草塘。易於朽爛。而石塊舊塘。亦易於坍塌。殊非經久莫安之計。似應改建大石塘。庶可垂諸永遠。再請於海塘之內。添築土備塘一道。比之舊塘再高五六尺。務於今年秋汛以前。上緊趲築完工。萬一風潮泛溢。有此備塘抵禦。似可以衛護民生。咸成樂土。得旨。所議俱屬妥協。著交部照所奏行。朕思尖塌兩山之間。建立石壩。以堵水勢。似類挑水壩之意。所見固是。若再於中小壘開挖引河一道。分江流入海。以減水勢。似更有益。從前雖經開挖。旋復壅塞者。皆因惜費省工之故。今若加工開挖。兩工並舉。更覺妥備。石壩建後。即有漲沙。而石塘亦可漸次改建。以爲永久之利。其開挖引河之處。著程元章會同汪滄張坦麟等。相度地勢。酌量辦理。○癸丑

上御太和殿傳臚賜殿試貢士陳倌等三百二十八人進士及第出身有差予故杭州將軍塔拜祭葬如例

上幸圓明園甲寅諭理藩院鄂爾多斯郡王查木陽身為副將軍並不將伊屬下精兵派出且遲延日期疎脫兵丁甚屬不合著削去郡王授為貝勒發往軍前効力贖罪貝子齊旺班珠爾羅卜臧於伊屬下派兵時並不詳慎以致逃回甚屬怠忽著降二等授為輔國

公旌表浙江桐鄉縣烈婦董大銘妻沈氏守正拒姦投繯殞命給銀建坊入祠致祭如例乙卯命吏部尚書嵇曾筠為文華殿大學士兼吏部尚書仍管理江南河道總督事務調刑部尚書劉於義為吏部尚書仍署陝西總督陞左都御史涂天相為刑部尚書禮部右侍郎吳襄為禮部尚書刑部左侍郎張煦為都察院左都御史仍兼管順天府府尹事左副都御史馮景夏為刑部左侍郎內

閣學士鄧鍾岳為禮部右侍郎擢光祿寺少卿高起為兵部右侍郎陞奉天府府尹楊超曾為總督倉場侍郎調順天府府尹焦祈年為奉天府府尹丙辰擢內務府郎中盛安為太僕寺卿戊午諭辦理軍機大臣等從來造作言語煽惑人心者律有不赦之條若在軍前造言傳播其罪更重應照軍法即正典刑此自古相傳之憲典也數年以來西北兩路用兵征討準噶爾該管大臣官員等居心怠忽辦事粗疎號令不嚴稽察不密間有不肖之人在軍營各處捏造全無影響之談或稱京師近有某事或稱某營近有某事一人倡先眾口附和愚昧之人不能辨別信以為實而該管之大臣官員等雖心知其非往往以為難於根究希圖省事置之不問遂致若輩肆口流傳全無忌憚又有從軍營回來之人造作言語以惑亂在京之聽聞如此等事不但有妨於公務亦且大害於人心不可

不嚴加禁約。著行文各路將軍。令其詳細曉諭該管弁兵及跟役買賣人等。嗣後儻有造作浮言者。必將爲首之人究出姓名。奏聞請旨。卽於本處正法。示衆其失於覺察之該管官弁。一併治罪。若能查出叅奏。免其議處。至在京造言生事之人。交與步軍統領。八旗大臣五城御史順天府先期曉諭。儻怙惡不悛。卽行查拏。從重治罪。○又諭朕從前以侯馬蘭泰於去年賊至推河時。領兵截殺奮勇成功。故將伊調回。留朕左右。令其學習辦事。近聞軍前人等俱喧傳馬蘭泰一聞賊至。甚是畏怯。喀爾喀協里台吉孫都布再四跪請出戰。始行遣往。馬蘭泰出營行未二十里。卽回。朕將此問之馬蘭泰。據奏係人捏造陷害之語。此事日後自有分曉。馬蘭泰軍前事務尚未完結。著仍往紅郭爾鄂隆地方督兵操演。効力行走。公豐盛額不必前去。○添設山西大同府同知一員。駐府城朔平府通判一員。

駐左雲縣應州安東巡檢一員。駐口前村。從山西巡撫覺羅石麟請也。○移廣東遂溪縣湛川司巡檢駐東海地方。白鶴寨把總駐東山汛。從廣東總督鄂彌達請也。○己未。諭內閣。國家聲教覃敷。人文蔚起。加恩科目。樂育羣才。彬彬乎盛矣。朕惟博學鴻詞之科。所以待卓越淹通之士。俾之黼黻皇猷。潤色鴻業。膺著作之任。備顧問之選。

聖祖仁皇帝康熙十七年。特詔內外大臣薦舉博學鴻詞。召試授職。一時名儒碩彥多與其選。得人號爲極盛。迄今數十年來。館閣詞林儲才雖廣。而宏通博雅淹貫古今者。未嘗廣爲搜羅。以示鼓勵。自古文教修明之日。必有瑰奇大雅之才。况蒙

聖祖仁皇帝六十餘年壽考。作人之盛。涵濡教澤。薄海從風。朕延攬維殷。闢門籲俊。敦崇實學。諭旨屢頒。宜有品行端醇。文才優瞻。枕經靡史。彈見洽聞。足稱博學鴻詞之選者。所當

特修曠典嘉興旁求除現任翰詹官員無庸再膺薦舉外其他已仕未仕之人在京著滿漢三品以上各舉所知彙送內閣在外著督撫會同該學政悉心體訪遴選考驗保題送部轉交內閣務期虛公詳慎搜拔真才朕將臨軒親試優加錄用廣示興賢之典茂昭稽古之榮應行事宜著大學士九卿會議具奏

○庚申辦理軍機大臣等議覆靖邊大將軍順承親王錫保等奏言察罕叟爾地當阿爾泰數路通衢極爲緊要建設城垣駐防大兵於今多年因柴草不敷是以移駐阿爾達爾托羅海後因柴草亦不敷用於去年又移至烏里雅蘇泰此外所有厄得爾齊德爾特爾啟塔米爾等處雖地方寬濶俱係杭愛山陽殊近內地又特斯等處僻在迤北僅逆賊由南路來犯邀截抵禦呼應不靈俱不便屯駐大兵現今移駐之烏里雅蘇泰山頭各建礮臺滿洲蒙古大兵駐在左近且特斯台錫里

又各有兵一萬駐劄甚屬鞏固賊兵斷不能逼近城垣應請於烏里雅蘇泰地方內外植木中實土塊建造城垣於城內建設倉庫明歲青草生時調集官駝將察罕叟爾所貯錢糧米石軍裝火藥等項陸續運送均應如所請從之

○辛酉辦理軍機大臣等遵旨議奏據靖邊大將軍順承親王錫保經畧軍務大學士伯鄂爾泰奏稱達爾濟身爲將軍並不將兵丁馬匹沿途加意牧放以致疎忽傷損及至扎克拜達里克聞賊人敗遁之信並不截勦反將馬匹盡行趕至營內復致虧損坐視賊遁又不尾後追勦及賊人去後始博追擊之名又即行歸營回奏時乃借端巧飾情屬可惡請將達爾濟交部嚴加議處應如所請得旨達爾濟著革職令爲護軍交與順承親王凡有苦差効力之處令其前往贖罪行走達爾濟員缺著護軍統領吉當阿前往推河領兵駐劄

○壬戌諭王大臣等朕前聞武

格在巴爾庫爾軍營捏造撤兵之說口稱將吐魯番回民搬至內地安插即將巴爾庫爾之兵全行搬至布隆吉爾一帶駐劄以致軍營弁兵各懷退撤之心不思黽勉効力又武格在營諸事怠忽凡遇操演從未親加查閱朕所聞如此武格身膺領兵之任乃以訛言惑衆重違軍紀若留在軍營恐滋事端是以特降諭旨將武格革職拏解來京嚴加訊問嗣據署大將軍查郎阿奏稱武格向張廣泗云署大將軍曾具奏欲派兵襲擊旨意不允已授倉場侍郎岳爾岱爲大將軍來營料理張廣泗以爲必無之事而武格猶堅稱係參贊大臣顧魯告知親見硃批奏摺等語朕隨即降旨令查郎阿詢問顧魯據查郎阿奏顧魯呈稱顧魯在營最久軍令捏造謠言罪在不赦豈敢以毫無影響之事憑空捏造告知武格等語武格受朕深恩由侍衛叅領之職擢用至侍郎巡撫前因西路領兵滿洲大員

甚少武格平素似尚有勇畧是以召令進京畀以將軍重任乃伊一到京師神氣改常朕即面加訓飭伊又奏稱馬爾泰不勝巡撫之任此乃希冀復爲陝撫之意因朕未遂其願心懷怨望勉強前赴軍營朕猶冀其感恩宣力特陞爲工部尚書乃伊全無人心視軍機重務如同膜外且時存退縮之念奏報俱屬子虛又將賞賚兵丁皮衣皮帽等項止量行散給其餘俱留貯軍營以致恩不下逮今竟敢捏造全無影響之事矢口傳述冀以擾亂軍務煽惑人心從來造言生事者律有不赦之條按以軍法決不待時况假稱朕旨其罪更甚著王大臣等一一嚴訊確供具奏○癸亥添設張家口筆帖式一員駐和爾科地方從巡察遊牧等處兵部員外郎六格請也○申子陞左副都御史阿成阿爲鑲黃旗護軍統領仍留軍營擢監察御史鄂爾賽爲都察院左副都御史○實授高維新爲四川按察

使司按察使○欽四川征勦蒙古喇兒斯堡賊番功給建昌總兵官趙儒拖沙喇哈番其弁兵等分別議敘有差○旌表直隸長垣縣烈女郭禹女郭氏強姦不辱自縊完貞河南固始縣烈婦呂仔妻崔氏夫亡守節拒暴投繯各給銀建坊入祠致祭如例○乙丑諭刑部向來直隸盜案往往多於他省朕以畿輔重地理宜倍加清肅乃宵小肆行如此不得不嚴加懲創以示儆戒是以預先屢次曉諭然後定例於雍正八年為始將盜夥不分首從皆行正法此朕辟以止辟不得已之苦心也近年以來直隸盜案較前減少是小人頗知畏法朕仍可遵奉

皇考法外施仁之意從寬辦理矣著將直隸盜案仿照各省分別法無可貸情有可原定擬具奏儻姦民玩法日後盜案復多朕必仍照不分首從皆斬之例行若各省盜案有加多於平日者亦照不分首從之例行著各該督

撫地方有司通行曉諭務使遠鄉僻壤之民共知之○丙寅理藩院疏奏吳喇忒扎薩克輔國公垂扎木素勒索不法革退公爵應否令其親弟阿穆爾伶貴承襲恭候欽定得旨阿穆爾伶貴著襲封扎薩克輔國公○甘肅巡撫許容奏言甘省軍需効力人員遇有差遣例動用公項錢糧給與往回盤費脚力若無差委之時則係自備食用自雍正七年起至今四載有餘未經委署人員閒住之日資斧拮据嗣後請將効力已過三年者無論差遣閒住各給本身並跟役口糧銀兩遇有差遣再照例加給往回脚力則饗飧有賴勞員愈覺踴躍矣得旨甘省辦差効力人員著照該撫許容所請給與日費銀兩其未過三年者亦著照例給與○戊辰

孝端文皇后忌辰遣官祭

昭陵○工部等衙門議覆內大臣海望等疏奏浙省修建海塘事宜○分管工程人員請酌

量揀選派委辦事工竣之日分別等第保題議欽。一應給工價請銀米兼發於米賤地方委員採買糧石運至工所搭放庶夫匠雲集本地米價不致昂貴。一添設官兵宜專責成請設副使道一員加以海防兵備職銜海塘文武官兵聽其調用並兼轄沿海州縣等官又海防同知原設二員請添設一員俱令分管塘工兼轄兵役再添設守備二員分爲左右二營管轄千總四員把總八員外委十六員兵一千名以備調遣。一官兵宜分派駐劄查海寧爲沿海數縣遠中之地新設道員請駐劄海寧乍浦同知仍照舊駐劄其舊設同知一員請駐劄海寧新設同知一員駐劄仁和左營守備駐劄海寧之東右營守備駐劄海寧之西各分界址派防塘汛均應如所請從之。○庚午諭內閣凡有罪人犯應行發遣黑龍江者前經辦理軍機大臣等議令改發扎克拜達里克等處種地効力贖罪已經允

行朕思滿洲漢軍人等不諳耕種之事發往彼處甚屬無益目今伊等尚未起身著仍遵舊例發往黑龍江等處向後俱照此辦理辦理軍機大臣等遵旨議覆署寧遠大將軍查郎阿叅奏巴爾庫爾軍營駐劄重兵搜濟與無克克兩處卡倫俱係亂山環繞路徑錯雜最易藏姦是以專派副將紀成斌在搜濟駐劄總兵張元佐在無克克駐劄乃紀成斌等漫無查察一任賊人藏住亂山暗行窺伺在搜濟卡倫白楊溝等處劫掠糧車一輛空車四輛及車戶人等由陶賴庫免爾庫逸去所有副將紀成斌等之抗違玩悞及總兵張元佐等任意疎忽理合據實叅奏查紀成斌負恩縱賊漫視軍務相應請旨革職按律究擬張元佐等請一併交部察議得旨依議紀成斌著革職交三法司核擬具奏。旌表廣東茂名縣烈婦梁輝祖妻程氏拒姦不污自縊殞命給銀建坊入祠致祭如例。○辛未諭

吏部庶吉士裘肇煦等教習已久今加考試應分別授職除梁詩正已授編修外其清書庶吉士裘肇煦王宗燦林蒲封沈慰祖嵇璜商盤徐以烜俱著授爲編修阮學浩著授爲檢討漢書庶吉士鍾衡毛之玉沈崇仁吳華孫鄂敏栢謙劉元燮吳士珣陶正靖包祚永任應烈楊廷棟張灝曹一士倪國璉周範蓮程盛修林令旭王文璿陳其凝吳履泰俱著授爲編修高璿韓彥曾敦文孫倪城嚴樹基楊秀盧秉純許希孔周龍官義思錄俱著授爲檢討額爾登額福魁著留館再教習三年

壬申諭吏部部屬官員有告假期滿及丁憂起復緣事開復者定例俱於單月俟有本部缺出補用而本部出缺未必適逢單月之期所以候補各員有待至經年累月者朕思告假期滿及緣事開復人員自應遵照定例等候單月之缺若丁憂起復之員亦拘此例於情理未協嗣後著不論單雙月遇有本部

缺出即行補用將此永著爲例以署河南巡撫孫國璽爲都察院左副都御史以鑲黃旗蒙古都統色爾璧署本旗護軍統領

癸酉諭內閣條奏事件俱應據實敷陳至於頌聖煩詞槩不必用已降訓旨數次矣近見條陳摺內仍有鋪敘稱頌之語不但觀覽煩瑣即伊所奏之事轉不能詳盡著再行傳諭嗣後一應陳奏事件祇敘實事不必載入頌聖虛文

○以河東總督王士俊兼管河南巡撫印務

○四川巡撫憲德題建昌道屬邛部宣撫使嶺安磐前緣事革職伊子嶺天長年幼停襲今嶺天長現年二十歲請照例承襲下部知之

○甲戌陞翰林院侍講學士方苞爲內閣學士兼禮部侍郎

○兵部議覆四川總督黃廷桂疏言三渡河新闢苗疆地方遼闊請於河西之七兒堡添設叅將一員守備二員千總四員把總八員馬步兵一千二百名酌量分駐廟頂磋多等處以資防範河東

之瓦尾虛郎二處各設都司一員千總一員把總二員馬步兵四百名酌量分駐黑磧山白宿四等處以資防範再移寧遠府廠務同知駐劄七兒堡添設冕寧縣縣丞一員駐劄瓦尾專理苗疆事宜應如所請從之○刑部題河南郟縣烈婦劉柱妻吳氏拒姦不從守貞被害應請旌表查劉柱係優人伊妻吳氏節烈可嘉例應給銀建坊停其入祠致祭從之○乙亥署鑲紅旗漢軍副都統馬世佐緣事革職以正黃旗護軍叅領音布署鑲紅旗漢軍副都統○署雲貴廣西總督高其倬題廣西江州土知州黃錫璋病故無嗣請以其庶兄黃錫珪承襲下部知之○予陣亡吏部右侍郎兼正紅旗滿洲副都統舒楞額祭葬如例○丙子諭辦理軍機大臣等聞順承親王賞賚此次効力兵丁將在克爾森齊老地方交戰獲傷及因患病馬疲未至厄爾得尼招地方之兵丁俱不准給賞以已經交戰之

人不沾賞賚殊未均平著行文順承親王查明給賞以示鼓勵○又諭據大學士鄂爾泰等奏請將駐劄呼倫貝爾地方索倫巴爾虎兵三千名內調撥二千名前往察罕叟爾軍營其軍營現在所有殘疾兵丁應行減退等語著照鄂爾泰等所請於呼倫貝爾兵內挑選二千名著黑龍江將軍卓爾海帶領前往軍營卓爾海到軍營後再回任所其料理兵丁起程選派官員管轄應於何日起程之處著卓爾海酌量議奏其餘兵一千名著博第達巴哈統領照管伊等遊牧妻子產業黑龍江將軍印務著奉天將軍那蘇圖馳驛前往署理奉天將軍印務著尚書海壽馳驛前往署理刑部尚書事務著公慶復署理海壽到盛京後那蘇圖再往齊齊哈爾俟卓爾海自軍營回任之日那蘇圖海壽各回任所○丁丑添設兩廣鹽運使司運判一員駐廣東合浦縣石康地方移廣東順德縣縣丞駐容奇

鄉從廣東總督鄂彌達請也 戊寅添設太常寺贊禮郎八員從太常寺少卿雅爾呼達請也 命製帳房五千架皮襖二萬領皮帽二萬頂帶二萬條賞給北路軍營兵丁旌表江蘇興化縣烈婦丁人彥妻唐氏拒姦不從投繯殞命給銀建坊入祠致祭如例 己卯諭內閣朕覽本朝人刊寫書籍凡遇胡虜夷狄等字每作空白又或改易形聲如以夷爲彘以虜爲鹵之類殊不可解揣其意蓋爲本朝忌諱避之以明其敬慎不知此固背理犯義不敬之甚者也夫中外者地所畫之境也上下者天所定之分也我朝肇基東海之濱統一諸國君臨天下所承之統堯舜以來中外一家之統也所用之人大小文武中外一家之人也所行之政禮樂征伐中外一家之政也內而直隸各省臣民外而蒙古極邊諸部落以及海澱山陬梯航納貢異域遐方莫不尊親奉以爲主乃復追溯開創帝業之

地目爲外夷以爲宜諱於文字之間是徒辨地境之中外而竟忘天分之上下不且背謬已極哉孟子曰舜東夷之人也文王西夷之人也舜古之聖帝而孟子以爲夷文王周室受命之祖孟子爲周之臣子亦以文王爲夷然則夷之字樣不過方域之名自古聖賢不以爲諱也至以虜之一字加之本朝尤爲錯謬漢書注曰生得曰虜謂生得其人以索貫而拘之也敵國分隔互相訛詆北人以南爲島夷南人以北爲索虜漢唐宋元明邊烽不息每於不能臣服之國指之爲虜我滿洲居東海之濱若言東夷之人則可今普天之下率土皆臣雖窮邊遠徼我朝猶不忍以虜視之惟準噶爾背天逆命自棄於王化之外或可呼之爲胡虜耳總之帝王之承天御宇中外一家上下一體君父臣子之分定於天尊親忠孝之情根於性未聞臣子之於君父合體同心猶可以絲毫形迹相歧視者也我朝

正位建極百年於茲

列聖相承功德隆盛

世祖章皇帝入撫中夏救斯民於水火而登之
衽席仁心仁政洋溢中國

聖祖仁章帝臨御六十餘年深仁厚澤淪肌浹
髓中國之聖主自堯舜以來能倫比者有幾
朕以涼德繼承統緒勤求治理勉效

祖考雖未能跂及萬一然十載之秉公矢誠朗
如天日滿漢蒙古並無岐視此心久爲臣民
所共曉夫滿漢名色猶直省之各有籍貫豈
非中外之分別也若昧於君臣之義不體

列聖撫育中外廓然大公之盛心猶泥滿漢之
形迹於文藝紀載間刪改夷虜諸字以避忌
諱將以此爲臣子之尊敬君父乎不知即此
一念已犯大不敬之罪矣嗣後臨文作字及
刊刻書籍如仍蹈前轍將此等字樣空白及
更換者照大不敬律治罪各省該督撫學政
有司欽遵張揭告示窮鄉僻壤咸使聞知其

從前書籍若一槩責令填補更換恐卷帙繁
多或有遺漏而不肖官吏遂借不遵功令之
名致滋擾累著一併曉諭有情願填補更換
者聽其自爲之○禮部議覆本部右侍郎今
陞尚書吳襄條奏會試外簾官受卷彌封謄
錄對讀四所共用二十二員設官太多請照
順天鄉試用十六員已足辦理又督門官鄉
試用千把二員會試亦請照例不必派用部
員致妨部務應如所請從之○庚辰諭辦理
軍機大臣等家選兵丁前往軍營之時朕降
恩旨凱旋之日將伊等妻子俱令出本主之
家編爲另戶但各路軍營從征人內亦有分
檔開戶之人充當領催披甲者伊等久在軍
營辛苦効力甚屬可憫著各路軍營將軍大
臣等將効力行走好者以伊等姓名註冊俟
大兵凱旋之日亦照家選兵丁例編爲另戶
○以吏部左侍郎任蘭枝禮部右侍郎鄧鍾
岳爲一統志總裁官○授一甲進士陳倓爲

翰林院修撰田志勤沈文鎬爲翰林院編修
予故福建漳州總兵官初有德祭葬如例

大清世宗敬天昌運建中表正文武英明寬仁
信毅大孝至誠憲皇帝實錄卷之一百三十

大清世宗敬天昌運建中表正文武英明寬仁
信毅大孝至誠憲皇帝實錄卷之一百三十一

敕修

雍正十一年癸丑五月辛巳朔諭內閣部院

衙門銷算錢糧事件俱出書辦之手章京筆
帖式內通曉算法者少即姦吏作弊亦不能
清查算法乃六藝之一各部院筆帖式辦事
之暇有情願學習者令其學習俟三年後候
朕考試再官學生候補筆帖式俱令其學習
有情願考試者亦准其考試優者朕施恩另
用○壬午諭翰林院選拔庶常原以作養人
材今科進士陳倓田志勤沈文鎬已經授職
二甲第一名張若靄著授爲編修張映辰吳

監修總裁官光祿大夫經筵講官太僕議政大臣保和殿大學士兼兵部尚書總理事務三等伯加十五級臣劉世明奏
總裁官光祿大夫經筵日講官起居注太僕兼太子太保保和殿大學士兼戶部尚書仍兼吏部尚書翰林院掌院
事三等伯加十三級臣張廷玉光祿大夫經筵日講官起居注太僕議政大臣武英殿大學士兼工部尚書仍兼管
翰林院掌院事加二級臣福敏光祿大夫經筵講官太子太保東閣大學士兼禮部尚書加六級臣徐本光祿大夫
經筵講官議政大臣滿洲內閣大學士事務禮部尚書仍兼管太常寺及詹事府事三奏等奉

祖修。張湄。趙瓚。鄂容安。雷鎰。朱桓。朱泮。功。鄂倫。周正峯。儲晉觀。陳大受。董邦達。姚孔鋹。張爲儀。阮學濬。范從律。張瑗。陸嘉穎。汪師韓。徐梁棟。夏廷芝。吳學瀚。許集。肇敏。沈景瀾。朱續。暉。張映斗。時鈞。轍。王錫璋。曾豐。楊二酉。陳仁。王檢。梁文山。焦以敬。程鍾彥。雙慶。賴翰。顯。羅源漢。王文充。李修卿。查錫韓。馮元欽。李天秀。劉孔昭。劉學祖。邱玖華。唐進賢。張宗說。介福。沈齊禮。赫成。莪。吳士功。王芥園。杜謚。劉元炳。

胡定。張蘭清。于開泰。楊琨。傳爲訥。饒鳴鑄。辛昌五。聶位中。陳中榮。王以昌。宋楠。六十八員。俱改爲庶吉士。分別清漢書教習。○調刑部左侍郎托時。爲工部右侍郎。陞太僕寺卿盛安。爲刑部左侍郎。○癸未。

孝誠仁皇后忌辰遣官祭

景陵○諭翰林院教習庶吉士。所以造就人材。使之沉潛經籍。涵泳藝林。可以典制誥之文。鳴國家之盛也。從前庶吉士皆就翰林院讀。

書教習大臣。不時策勵。是以身心約束。學殖易增。館閣之間。蔚然稱盛。朕意今科選拔庶常。仍令在衙門讀書。俾教習諸臣。得以朝夕訓課。兼厚給廩餼。資其膏火。庶幾枕經。靡史。文藻可觀。克稱詞臣珥筆之職。其應查照前例。及如何加與廩給之處。著酌議奏聞。○甲申。諭內閣翰林院編修張若靄。庶吉士鄂容安。鄂倫。俱著在辦理軍機處行走。○署雲貴廣西總督高其倬疏報。普思逆賊刀興國等。勾結夷衆。叛逆不法。臣飛檄提臣蔡成貴。總兵官董芳。楊國華等。統領官兵。四面攻剿。賊首刀興國。及附逆之土目楊昌祿。李世藩等。皆經擒斬。梟示。計前後擒獲要犯。并賊眷共五百餘名。斬殺逆賊三千六百餘名。招出投誠男婦四萬二千六百餘名。此外未獲逆賊。據險負固。現飭總兵官董芳。窮搜嚴剿。務盡根株。其各路奮勇殺賊。及陣亡帶傷官兵。俟查明造冊送部。得旨。此次効力之官弁兵丁。

著分別議敘賞賚其陣亡帶傷者著照例加恩○丁亥諭戶部山東通省近報甘雨霑足但從前有得雨稍遲之州縣今年二麥歉收民力未免拮据錢糧輸納承辦維難朕心軫念爾部即行文該督撫得雨稍遲之州縣衛所應徵新舊錢糧緩至秋成之後再行開徵以示朕體恤閭閻之至意○調江南安徽按察使孫詔為江西按察使司按察使以光祿寺少卿劉吳龍為江南安徽按察使司按察使○加山西固關叅將吳正副將銜署直隸天津總兵官○戊子陞鴻臚寺少卿素著為太僕寺卿○己丑諭內閣朕於直省地方偶遇災祲即為之寢食不寧蠲租發粟截漕平糶多方撫恤務使貧民無一不得其所又念各該地方雖或收成歉薄豈無蓋藏豐裕之家伊等誼篤桑梓休戚相關若各人量力樂輸既可以展其睦婣任卹之情亦可以為恤災扶困之助是以曾經降旨通行勸導然亦

聽紳衿士庶自為之不相強也近聞直省地方捐資周急好善樂施頗不乏人此誠鄉鄰風俗之美亦人心古處之一驗也此等良善之人應加恩澤以示褒嘉著各該督撫留心體察秉公確訪其捐助多者著具題議敘少者亦著地方大吏給與匾額並登記檔冊免其差徭以昭朕與人同善之至意○庚寅夏至祭

地於

方澤遣泰郡王弘春行禮○諭戶部各省州縣設立社倉原以便民濟用若遇應行借給之時該州縣一面申詳上司一面即速舉行方可以濟閭閻之緩急儻其中有假捏虛冒等弊自難逃督撫之耳目聞直隸百姓借領社穀必待該督咨請部示而後准行往返動經數月小民懸待孔殷仍不免重利告貸之苦嗣後著該督李衛酌量定例變通辦理咨報存案○辛卯諭戶部上年江蘇等處被水之

州縣朕已降旨多方賑濟今春又復添賑四十日以加惠貧民茲當徵收錢糧之時其被災稍重之處小民輸課未免艱難著該督撫秉公確查將應行緩徵之州縣奏聞緩徵待至秋成再令完納以紓民力○刑部等衙門議奏武格居心狡詐蓄志姦邪捏造毫無影響之事假稱諭旨惑亂士卒之心貽誤軍機重務負恩誤國情殊可惡應擬斬立決得旨武格著改爲應斬監候秋後處決○翁牛特杜楞郡王鄂齊爾故遣官致祭賞銀一千兩○壬辰諭辦理軍機大臣等護軍統領吳禮布著回京將達里剛愛軍營事務交散秩大臣塞楞侍讀學士巴忒瑪辦理○癸巳遣官祭

錫里二處駐劄兵丁原以截剿賊人今賊人大敗之後勢不再來此處似無庸駐兵明歲大兵前進阿爾泰乘機攻剿今歲文秋應緩行至科布多等處選擇水草連營駐劄則人畜不致勞苦其前往科布多時每人各給兩月口糧用官駝載往其餘八月口糧需用八萬石應交范毓麟陸續運往再特斯台錫里地方既無庸駐兵應行停止二處修堡請於扎布韓察罕鄂羅穆地方修築一堡照看臺站運路大兵進剿必須派兵接續應於塔奔托羅海額克阿拉爾默爾根錫納地方各駐兵四千名明歲大兵前進阿爾泰時即令此兵前往科布多以候調遣此次進兵關係緊要請令副將軍額駙策凌塔爾岱常德等前往會同辦理其掌管副將軍印信之人恭候欽定應如所請得旨靖邊左副將軍印務著額駙策凌掌管靖邊右副將軍印務著塔爾岱掌管副將軍常德著與額駙策凌同行議

政大臣永福著授爲內大臣。與塔爾岱同行。餘依議。○丙申。以塔爾馬善爲北路軍營前鋒統領。○予故涼莊道殷邦翰按察使銜。以其隨征宣力也。○丁酉。以正藍旗滿洲都統伯伊勒慎署正黃旗領侍衛內大臣。○

大清會典告成。總裁纂修各官及効力人員。分別議敘有差。○己亥。辦理軍機大臣等議覆。靖邊大將軍順承親王等奏稱。京城各省官兵喀爾喀兵。每月應得羊價。請增定爲一兩。

京城各省併歸化城之土默特官兵。每月所給口糧。增定爲一斗八升。內地扎薩克兵。丁每年增給四箇月羊隻。均應如所請。從之。○庚子。陞廣東惠州副將譚行義爲廣東高州總兵官。○改湖南茶陵州屬之小集地方歸攸縣管轄。復設攸縣鳳嶺巡檢一員。從湖南巡撫趙弘恩請也。○壬寅。辦理軍機大臣等議覆。寧古塔將軍杜賚奏稱。海島特門奇圖山等處。綽敏等六姓仰慕皇仁。傾心歸化。每

年納貢貂皮。請施恩賞。以示獎勸。應如所請。照例賞給。嗣後六姓之人。交該將軍處。每姓各立頭目一人。以爲約束。每年所貢貂皮。分別解送。從之。○癸卯。

上詣

恩佑寺行禮。○

孝恭仁皇后忌辰。遣官祭

景陵。○甲辰。諭吏部按察使王棠。在口北道任。辦理軍需。實心効力。著加光祿寺卿銜。仍辦

理軍需事務。○鑄給黑龍江水師營總管關防。船廠。黑龍江。墨爾根等處。四品官。鈐記。從監察御史查拉請也。○乙巳。諭辦理軍機大臣等。北路所派四省綠旗官兵。有在軍前病故者。其本營於未奉部文之前。家口所領月餉。朕已於上年八月降旨。免其追還。今思西路亦有調撥別省之綠旗兵丁。其中豈無在軍前病故者。若將本營未奉部文之先。伊等家口所領月餉。按日著追實爲可憫。著行文

各該省若有軍前病故兵丁月餉於未奉部文之前已經支領者免其追還。僅有借給庫銀之處著以該省司庫存公銀兩代為補項。○以禮科給事中帥念祖提督浙江學政○辦理軍機大臣等議覆寧古塔將軍杜賚奏稱船廠水手打樺皮人臺站人丁閑散壯丁等共選取一千名請在船廠地方立營將伊等為烏鎗兵百人內設領催五名每月給銀三兩兵丁每月給銀二兩添設協領一名驍騎校八名其火藥等項由部解送應如所請從之○丙午諭禮部賢良祠之王公大臣等著於本家各賜祭一壇○丁未諭內閣西路用兵以來甘肅等處百姓効力為多是以屢年地丁錢糧朕皆降旨蠲免上年並將米穀草豆等項悉令免徵以示朕逾格施恩之至意近聞該省雨澤應時二麥豐稔此即泰民忠義淳良荷天福祐之明驗朕心欣慰著將甘肅所屬本年

應徵地丁銀二十七萬餘兩仍行蠲免以足民用以廣國恩該督撫務飭有司敬謹奉行俾百姓均霑實惠○復設永定河北岸同知一員從直隸河道總督王朝恩請也○戊申輔國公永奇緣事革退以其弟輔國將軍蘇爾禪襲爵○己酉刑部等衙門議奏副將紀成斌從前失機縱賊即應明正典刑蒙恩寬宥仍留軍營効力業經奉委駐劄搜濟卡倫乃毫無愧悔故違將令一任賊人潛匿緊要隘口又不撥兵護送糧運以致車輛被刼核其前後情罪有心僨事玩法負恩紀成斌應斬立決總兵張元佐應降三級調用仍留軍營効力贖罪得旨紀成斌本由行伍蒙聖祖仁皇帝恩擢至叅將之職雍正元年朕因年羹堯保薦用為副將旋即補授總兵官特陞提督實為逾格之恩嗣因西陲用兵關係重大協贊務得其人岳鍾琪薦伊素嫻軍旅可以任用朕亦料其重受國恩自必力圖報

効因委以協贊軍務之重寄。雍正八年。岳鍾琪進京。陛見。將大將軍印務。令伊護理。伊當此大任。應益加敬謹。悉心籌畫。於緊要卡倫。嚴密偵探。思患豫防。庶可上報國恩。下稱職守。詎伊昏庸懦怯。玩愒性成。以軍國大事。視同膜外。致賊人躑躅其疎。忽乘隙侵擾。卡倫損傷將弁。戕害士卒。掠去馬駝羊隻。鎗礮器械。口糧無算。伊身在大營。掌握重兵。恐懼驚惶。一籌莫展。聽賊衆往來。如入無人之境。西路軍威。因此大損。且致逆賊資我馬駝器械。得於次年侵犯北路。是兩路軍營之被賊擾掠者。皆紀成斌之貽害也。彼時在廷大臣。即奏請將紀成斌明正典刑。以肅軍紀。朕猶予以自新之路。特降諭旨。暫緩治罪。俟事竣再定。實望其抒誠勉力。稍贖前愆。乃伊獲罪後。在營一載。仍無愧悔効力之心。朕始降旨。將伊革去提督降為副將。凡有差遣。令其盡力行走。若仍不知改悔。必究前案重處。所諭甚明。

伊若稍有人心。自應感恩畏法。洗滌肺腸。以圖後效。乃於雍正十年正月。賊犯哈密之時。同曹勳領兵堵截。遇賊於二堡之西。仍復退縮不前。致賊免脫。尚敢扶同曹勳。捏報力戰。朦混掩飾。今於伊駐防搜濟卡倫。又敢故違將令。漠視軍務。以致車輛被劫。是紀成斌所至之地。在在疎防。無不失機。養寇既不思從前獲罪之重大。亦不念曲加寬宥之深恩。冥頑不靈。誤公債事。核其前後情罪。實無可貸。著署大將軍等。將紀成斌即於軍營處斬。以為將弁失機縱賊負恩誤國者戒。餘依議。移四川墊江縣新設縣丞。駐高灘場梁山縣新設縣丞。駐沙河鋪。從四川巡撫憲德請也。

大清世宗敬天昌運建中表正文武英明寬仁
信毅大孝至誠憲皇帝實錄卷之一百三十一

大清世宗敬天昌運建中表正文武英明寬仁
信毅大孝至誠憲皇帝實錄卷之一百三十二

敕修

雍正十一年癸丑六月庚戌朔辛亥諭辦

理軍機大臣等。副都統黑色率領馬場兵丁
一千名前往軍營。於途間多方勒捐。弁兵鞭
撲陵虐。及至歸化城。兵丁小有過失。輒罰銀
一兩五兩不等。以官用為名。皆侵蝕入己。似
此狂悖。豈可膺領兵之任。黑色著革職。副都
統那蘇泰。侍衛那爾泰。馳驛速往。那蘇泰暫
領此兵行走。俟會合馬蘭泰時。將兵丁交付
再行回京。侍衛那爾泰。即將黑色提拏。併總
管巴雅思虎朗。及應行質問之人。解京交部

嚴訊○壬子大學士等議覆安徽巡撫徐本條奏徵糧事宜一州縣徵收糧櫃向例由該管道府給發封條粘貼櫃口俟州縣申報拆封然後道府另發封條更換胥吏以州縣不敢擅動致有藏匿補投等弊請仍用該州縣封條俾得覺察吏胥以專責成該管道府不時委員會同教職秉公拆兌稽查短少以杜州縣虧空之弊一花戶完糧從前准科臣顧祖鎮條奏用十截串票宜行停止查民間納糧向用三聯串票徵收無論多寡聽其自便若必限定十截花戶不足一分之數即不能掣票或一截有餘勢必將餘銀扣回花消拖欠況分釐小戶若概分十截則每票僅止毫忽姦猾之吏覺數目零碎改換飛灑百弊叢生請仍用三聯串票以杜抽換之弊一小民零星錢糧概令完銀一經銀匠傾化多有折耗於民不便請嗣後凡一錢以下者每銀一分完大制錢十文每銀一釐完大制錢一文

其毫以下完小制錢一文以免守候折耗如有情願完銀者仍聽其便均應如所請從之○甲寅命大學士一等伯鄂爾泰兼管兵部尚書事務○杭州將軍阿里袞奏言杭州漢軍現在閒散餘丁共一千六百餘人養贍不敷請按漢軍四旗餘丁繁衆之家挑選材技兼長者三百名造冊咨送督撫撥入本城標下食糧操演如四旗內遇有甲兵領催缺出掣回拔補仍於餘丁內挑送標營以足三百名之數如果守法奉公弓馬嫻練千把以上等官聽督撫選拔題陞如不聽標營將弁約束酗酒賭博及一切生事滋擾者即革去名糧交該旗治罪實於旗標兩有裨益從之○四川總督黃廷桂疏報松潘口外鵲個藏浪萬鄧小喀樹等四寨番人抒誠納貢下部知之○鑄給直隸八溝理事同知關防從總督李衛請也○乙卯命發布足二十萬賞給北路軍營兵丁○旌表江南睢寧縣烈女周二

聘妻劉氏拒姦不從被刃殞命給銀建坊入祠致祭如例丙辰予陣亡歸化城左翼副都統馬爾齊祭葬如例丁巳諭兵部武弁中熟習水師之人甚爲難得該管大臣若不於平日留心儲養何以收人地相宜之效每見督撫提臣中有將熟習水師人員題請調用陸路者此皆未習周詳籌算之故著通行傳諭嗣後細加體察若在水師中平常而長於陸路者准其調補若係長於水師之員俱留於水師題補不可因陸路需人輕易改調以致用違其長從前有如此誤用者可查明題請改調向後部中推陞之缺亦著該部聲明請旨轉禮部右侍郎鄧鍾岳爲左侍郎陞詹事府詹事江蘇學政張廷璐爲禮部右侍郎仍留學政任戊午禮部議覆蘇祿國王臣母漢末母拉律林奏稱伊祖東王於明永樂年間來朝歸至山東德州病故所有墳墓及其子孫存留賙卹之處經今三百餘年

廢墜已久懇請修理給復臣部行文山東巡撫飭查今據巡撫岳濬咨報前明永樂中蘇祿國東王巴都葛叭哈刺率眷來朝受封歸國歿於德州地方命有司營葬勒碑賜諡恭定長子都麻舍歸國襲封次子安都祿三子溫哈喇留居德州守塋今墓在州城迤北神道享亭悉已坍塌其子孫以其祖名分爲安溫二姓今德州祀典每歲額設銀八兩爲蘇祿王祭祀之需等語查蘇祿國遠隔重洋感

戴

皇上德化進表謝恩爲伊遠祖墳墓子孫懇請整理給復情詞懇切應如所請令山東巡撫轉飭德州地方官清查蘇祿國王墓址所有神道享亭牌坊等項修葺整理於安溫二族之中遴取稍通文墨者各一人爲奉祀生給與頂帶永以爲例竝知照該國王可也從之○己未諭內閣據署河南巡撫孫國璽奏報豫省歷年耗羨銀兩除本地公事支用外現

存司庫銀七十萬兩有奇。又社倉存貯穀麥等項共計二十八萬石有奇。等語。從前提解耗羨。本是澄清吏治休養民生之意。屢經降旨。此項出自民間。若本地公用充裕之時。朕仍當加恩本地官民使之霑被惠澤。不令歸入公帑也。今豫省存貯耗羨既有七十萬之多。而該省官員等所得養廉又已敷用。正當加惠閭閻。俾令邀恩格外。著將河南本年地丁錢糧蠲免四十萬兩。即以存貯之耗羨照數撥補還項。該督王士俊可督率有司敬謹奉行。大凡耗羨多餘之省。該督撫藩司等往往不甚愛惜。並不爲百姓計而存搏節之心。若伊等留意民生。儲蓄充盈。亦可爲加惠編氓之助矣。○以兵部尚書鄂爾奇吏部右侍郎阿山吏部左侍郎任蘭枝內閣學士方苞教習庶吉士翰林院侍講學士陳萬策協同教習○庚申皇子弘瞻生○吏部議覆安徽巡撫徐本疏稱有司親民之官不可一日乏

員。請以道里之遠近酌定委署之衙門嗣後安徽所屬之府州縣官凡遇引見陞遷等缺寧國鳳陽太平三府並滁和廣德泗毫五州俱附近總督衙門應令布政司徑詳督臣就近批委安慶徽州池州廬州四府並六安潁州二州附近巡撫衙門即令按察司徑詳撫臣就近委署仍彼此咨明以便查考庶地方不致懸缺貽誤至司道大員仍照舊例督撫會商委署應如所請從之○辛酉諭大學士等劉貴人晉封爲嬪其應封字樣著選擬具奏尋擬封號進呈欽定爲謙嬪○壬戌陞江南江寧副將李連爲江西南贛總兵官○癸亥諭辦理軍機大臣等各省挑選之勇健兵丁原冀其黽勉出力各圖上進之路以膺國家厚澤因其中賢愚不等優劣不齊不得不甄別挑汰以示勸懲今挑出赴營各兵既循分守法有奮勇効力之心著給與馬步戰糧俾得內外充裕其自甘起程之時每人借支

銀兩并上年十月借過等項俱著賞給免其在月餉內坐扣以示朕格外加恩之至意著勇健營總統周一德等曉諭各兵知悉○復設福建陸路提標右營前營福寧鎮標右營建寧城守左營漳州鎮標中營水師提標後營閩安協左營臺灣鎮標左營臺灣協左營千總各一員督標右營福寧鎮標左營建寧城守左營連江營漳州鎮標左營海澄營雲霄營詔安營汀州鎮標右營邵武城守右營海壇鎮標右營閩安協右營烽火門臺灣鎮標左營臺灣協左營右營淡水營把總各一員從福建總督郝玉麟請也○甲子諭理藩院策旺扎布係西路喀爾喀汗兼副將軍乃與賊交戰畏懼敗回擾動衆心勿遽移居內地又竝不約束屬下人等肆行偷盜官糧牲畜騷擾貿易人等甚玷國家養育之恩理應即行正法但念伊祖父原係喀爾喀內之汗累代敬順朕不忍正法將策旺扎布從寬免

死監禁○加奉天佐領哲庫察哈爾總管老章敦朱克副都統銜俱仍留軍營○鑄給崇文等八門外新營八旗參領關防各一顆從署正藍旗蒙古副都統鄂爾琿請也○乙丑吏部議覆湖北巡撫德齡奏稱州縣審理刑名案件各有限期如限滿不結該管之知府直隸知州不揭報者請照徇庇例議處其知府直隸知州自行審理案件督催之道員亦照例議處更有竝非難結案件該管府州捏飾難結緣由混詳展限者令臬司查核揭參如臬司不行查揭亦請照徇庇例議處應如所請從之○兵部議覆正藍旗漢軍參領韓垓條奏八旗委署參領有以世職充補者有以副佐領驍騎校等官借補者副佐領以下品級甚微俸銀無多而世職人員內往往有一二品至三四品不等每遇罰俸案件與五六品官俱行罰其本職之俸似同過異罰輕重不倫請將委署參領照副參領例定爲五品

如有緣事罰俸等情五品以上委署者照所定之品罰俸五品以下委署者照本身食俸扣罰應如所請從之（丙寅）諭內閣從前雲貴廣西等處不法土司除首惡懲治外其餘人等則令安插內地給以房屋地畝俾得存養不致失所聞該省督撫等不即留心經理遲至一二年後始撥給房地以爲養贍而地畝又相隔遙遠土司不能親自耕作惟賴該縣知縣代徵糧穀賣銀移交每年非被佃戶侵收即被胥吏中飽有名無實以致各土司饑餓困頓竟有私自逃匿者重負朕體恤生全之至意著通行曉諭有安插土司之地方令該督撫悉心稽查若有從前辦理不善之處即行更改竝飭有司等不時體察務令安全以受國家養之澤儻仍疎忽從事必嚴加議處（命直隸總督李衛前往古北宣化等處查閱新添兵丁以太常寺卿顧琮暫署直隸總督印務 戊辰廣西巡撫金鉷疏奏

鬱林州所屬之富民鄉藤蘆坡忽湧瑞泉二穴味甘色清足灌田三千餘畝允稱上瑞理合奏聞得旨朕從來不言祥瑞今蒙

上天福佑邊氓顯賜大澤朕心不勝感慶著該撫選擇善地建立祠宇奉祀泉源之神以答靈貺（己巳）以鑲黃旗滿洲副都統吳禮署本旗蒙古副都統（庚午）諭內閣祀事修明國家令典

孔子文廟春秋祭儀尤宜備物盡敬聞外省州縣中有因荒裁減公費者朕思公費既減必致祭品簡畧或轉派累民間二者均未可定著各省督撫查明所屬若有因荒減費之州縣即於存公銀內撥補以足原額務令案盛豐潔以展朕肅將禋祀之誠其各凜遵毋忽（又諭京師至江南數千餘里行旅絡繹朕於雍正七年特遣大臣官員前往督率地方官成梁除道不惜帑金功成迅速又令道旁種樹以爲行人憩息之所復降旨交與該

地方官隨時留心保護近聞官吏怠忽日漸廢弛低窪之地每多積水橋梁亦漸圯陷車輛難行道旁所種柳樹殘缺未補且有附近兵民斫伐爲薪者此皆有司漫不經心而大吏不稽查訓誡之故也著傳諭該督撫等轉飭有司仍前整理或遇雨水泥潦隨損隨修不得遲緩其應行補種柳樹之處按時補種竝令文武官弁禁約兵民毋許任意戕害儻有不遵將官弁題參議處兵民從重治罪

辛未刑部議覆翰林院侍講學士張廷璠條奏造賣賭具例應發邊衛永遠充軍其地方保甲及左右緊鄰知情不首報者杖一百但此等中有得財未得財之分若知情而又得財者請照枉法例計贓論罪加重懲儆至同居之父兄伯叔知情不首律無明文其地保緊鄰尚有治罪之條同居之人豈可聽其置身事外宜照竊盜同居父兄伯叔之例問罪若未經發覺之先本犯自首或同居之父兄

伯叔出首請准寬減其罪均應如所請從之

壬申諭刑部獨子留養之條乃國家法外之仁而兇惡之徒往往恃有恩例肆意妄行或衆人共毆而推諉於一人或一人獨承以脫衆人之罪在無識之有司又以姑息爲寬大遷就具獄種種弊端難以悉數是以每年奏請獨子留養之案甚多凡殺人者抵償乃天理人情之正或其中情有可原而曲從寬典此又體古帝王罪疑惟輕之意隨事酌量者若不論情罪輕重而但以獨子概令從寬已非情理之當况其間未必盡係獨子乎有罪之人僥倖漏網恐成長姦之漸但定例已久朕不便遽行改易且不教而殺有所不忍著通行曉諭內外軍民人等已身既爲獨子更當思念父母無依謹身奉法以遠刑辟若好勇鬪狠怙惡不悛數年之後獨子傷人之案仍復不減朕惟有執法抵罪以懲兇頑不能曲爲寬假也此旨著通行宣布務令遠鄉

僻壤之人。咸使聞知。癸酉。諭辦理軍機大臣等帶領察哈爾兵丁前往巴爾庫爾之副都統莫爾渾著來京。軍前內大臣叅贊顧魯著管轄察哈爾兵丁。大學士等議覆。鑲藍旗漢軍都統兼戶部右侍郎韓光基條奏。一。刑名重案三法司應行會勘者。都察院大理寺堂官竝不親身到部止。委員辦理。或止憑送稿畫題。殊非慎重獄獄之意。嗣後會勘案件。刑部知會院寺堂官務至衙門秉公會審。儻飾詞推故不到。請將該院寺堂官交部議處。一。朝審秋審民命攸關。嗣後直隸各省招冊解部。該部速行刊刷。務於會審數日前分送各衙門。以便逐案詳核。屆期齊集班次。平心商酌。歸於至當。儻有推故不到。請派御史二員稽查指叅。一。虧欠錢糧各案人犯。前經戶刑三部奏准開明。已未完分數具奏。儻蒙恩免追。將本犯分別減等發落。但部臣欽遵查卷。必該犯名下未完等項。現在勒追者。方

行查奏。其家產無追。已經奏明。而本犯現在擬罪監禁者。不入查奏之例。揆之情理。似有可矜。請敕部臣逐一秉公分別。情罪一併奏聞。請旨。均應如所請。從之。甲戌。調江南江蘇巡撫喬世臣來京。陞見。以都察院左副都御史孫國璽署理江蘇巡撫印務。丙子。陞右通政顧祖鎮為詹事府詹事。丁丑。諭辦理軍機大臣等。兵部尚書性桂內閣學士雙喜著往北路軍營。與原任工部侍郎巴泰協理軍需事務。大學士等遵旨議覆。

皇上至治覃敷。人文蔚起。特諭內外大臣薦舉博學鴻詞。今臣等議奏。舉行事宜。應令在京三品以上滿漢大臣。在外督撫會同學政悉心採訪。遴選考驗。於在京郎中以下在外同知以下等官。併致仕在籍。因公降調及進士舉貢生監布衣等項人員。擇其品行端醇。文才優贍。足稱博學鴻詞之選者。不拘人數。秉公薦舉。在內移送內閣。在外保送吏部。轉交

內閣彙齊之日恭候御試錄用從之戊寅
貴州提督哈元生疏報九股頑苗悖叛臣奉
命進剿擒獲兇逆首犯一百九名現交撫臣
收審其餘軍前斬戮俘獲約計數千至悔罪
投誠者准其安插軍威大振苗蠻畏服但剿
撫初定應駐重兵彈壓除台拱營制兵一千
外暫留官兵三千分佈防範其所調湖廣廣
西官兵酌量撤回得旨據奏九股頑苗蕩平
其善後事宜著該督撫會同哈元生悉心定
議具奏

大清世宗敬天昌運建中表正文武英明寬仁
信毅大孝至誠憲皇帝實錄卷之一百三十二

大清世宗敬天昌運建中表正文武英明寬仁
信毅大孝至誠憲皇帝實錄卷之一百三十三

監修總裁官光祿大夫經筵講官太僕寺卿大學士兼兵部尚書總理兵部事務加十三級臣鄂爾泰

總裁官光祿大夫經筵講官起居注太僕寺卿大學士兼戶部尚書仍兼管吏部尚書翰林院掌院

事三等伯加十三級臣張廷玉光祿大夫經筵講官起居注太僕寺卿大學士兼兵部尚書仍兼管

翰林院掌院事加二級臣福敏光祿大夫經筵講官太子太僕寺卿大學士兼禮部尚書加六級臣徐本光祿大夫

經筵講官議政大臣協辦內閣大學士事務禮部尚書仍兼管太常寺鴻臚寺事臣三泰等奉

敕修

雍正十一年癸丑秋七月庚辰朔享

太廟遣恒親王弘旺行禮○諭辦理軍機大臣
等據侍衛達哈蘇奏稱科爾沁公喇嘛扎布
旗分並無牲畜其貧苦人等止有六月至八
月米糧今年種穀無多又經亢旱無收等語
朕思此所種之穀即使全收亦不足養贍數
千人口恐至饑饉流散不可不預為籌畫伊
等與何處相近即動支彼處米穀賑濟及如
何養贍俾其過冬之處爾等查議具奏尋議
科爾沁公喇嘛扎布旗分貧苦人等共六千

六百有奇今年十月至來年八月約計口糧
共需米七千八百餘石與白都納相近除將
白都納存米五千石支給外餘請酌給銀兩
資其養贍再來年耕種時籽種不足者並請
給銀令戶部派筆帖式一員將銀運送辦理
從之○吏部等衙門議覆原署兩江總督尹
繼善條奏兩淮鹽政事宜一淮南三江營地
方舊設鹽捕同知不足以資彈壓請改設巡
道一員督緝揚州通州各屬暨鹽城阜寧靖
江等縣鹽務以重職任一儀徵縣之青山頭
請立一專營設守備一員把總一員外委把
總一員兵一百名江都縣之馬家橋甘泉縣
之邵伯鎮北壩僧道橋各添設把總一員兵
三十名分駐巡緝一准所掣鹽重地向屬淮
安分司經管嗣後請令督臣會同鹽政選委
賢能府佐監掣一揚州府之搜鹽廳地方緊
要請於通省佐雜或試用候補人員內揀選
一員會同揚州武弁協力盤查一淮南所屬

之泰壩淮北所屬之場關大伊關永豐壩烏沙河湖口泗州天長兩關俱係私梟出沒隘口請於通省佐雜內揀員管理其淮南各員歸新設道員管轄淮北各員就近歸淮揚淮徐二道管轄均應如所請從之。辛巳諭內閣禮部侍郎杭奕祿係朕特差稽查沿邊營伍之大臣理宜體恤弁兵潔已奉公以副委任乃聞其沿途驕奢放縱擾累兵民甚屬溺職著革職。調齊齊哈爾副都統王常爲山西右衛左翼副都統以副都統職銜布爾沙爲齊齊哈爾副都統俱仍留軍營。禁止直省將軍督撫提鎮於經制外濫給外委千把總牌劄從監察御史黃祐奏也。○黑龍江副都統那爾賽年老乞休允之。○壬午調署鑲藍旗滿洲副都統常壽爲黑龍江副都統。○癸未以工部郎中官保署太僕寺卿。○湖南觀風整俗使李徵緣事革職裁觀風整俗使缺。甲申營田觀察使陳儀奏報六月二十

三四等日大雨如注山漲驟發豐潤薊州一帶新舊圍田被淹秋禾水滂民間房舍亦多倒塌得旨京東地方自開濬河渠以來水勢應有宣洩之路今年六月雖遇大雨並非久陰積滂之時可比何以遂至田禾被淹廬舍傾圮王朝恩身任總河不能先事預防難以辭咎其各縣被水民人著總督李衛轉飭有司查勘確實加意撫恤毋令失所。乙酉陞王府長史托保爲鑲紅旗蒙古副都統正白旗護軍叅領素賚爲正藍旗蒙古副都統辦理軍機大臣等議覆額駙策凌奏稱目今辦理進兵事務所有喀爾喀中路副將軍印請交與貝子阿努里署理應如所請從之。○大學士陳元龍以年老具疏乞休得旨大學士陳元龍老成練達學問優長奉職多年宣勞中外朕念

聖祖仁皇帝簡用舊臣晉秩綸扉俾承恩眷今以年逾八旬乞休情辭懇切朕勉從所請著

加太子太傅銜以原官致仕令伊子翰林院編修陳邦直隨歸侍養起程之日賞給酒膳果品著六部滿漢堂官餞送沿途官弁迎送盡禮 丙戌諭內閣聞上年秋月江南沿海地方海潮泛溢蘇松常州近水居民偶值水患其本地紳衿士庶中有催覓船隻救濟者有捐輸銀米煮賑者今年夏間時疫偶作紳衿等復捐施方藥資助米糧似此拯災扶困之心不愧古人任恤之誼風俗淳厚甚屬可嘉著該督撫宣旨褒獎將捐助多者照例具題議敘少者給與匾額登記檔冊免其差徭竝造冊報部 又諭據署湖廣提督張正興疏報四月初六日常德府城內民居失火延燒兵民房屋二百餘戶朕屢降諭旨令各地方有司預備救火之具遇有不虞即竭力搶救此非不可以人力撲滅者今常德民居偶爾失火遂至延燒房屋如此之多是該地方救火之具平日竝未留心而搶救又不用力

可知矣湖廣如此他省可知著傳旨通行曉諭嗣後僅仍復疎忽因一、二家失火而延燒多戶者定將該地方官從重議處該督撫一併察議 諭理藩院翁牛特郡王鄂齊爾諸子內貝勒羅卜藏_{在軍前甚屬効力著承襲扎薩克多羅杜楞郡王料理伊父喪事畢仍往軍前辦事其原襲之貝子著伊兄額爾得尼承襲暫署理扎薩克印務 浙江總督程元章疏報鎮海等八縣開墾雍正十年分田地八十一頃有奇下部知之 丁亥正紅旗蒙古都統特古忒緣事革職陞鑲紅旗護軍統領阿揚阿爲正紅旗蒙古都統 吏部遵旨議覆河南河員舊例三年俸滿即陞未免太速應照直隸江南山東三省河員之例除勞績懋著熟悉工程者令河督不拘年限題陞外餘俱一體較俸陞轉以昭畫一從之 刑部議覆刑科給事中長柱條奏步軍統領及順天府五城各衙門嗣後遇有拏獲竊賊}

事件請限令捕役人等即日稟報各該管官訊明被竊情由詳報上司不許將事主一同解送俟訊獲贓物時傳令事主認領其竊賊應行發落者發落應行解部者解部儻捕役違限不報任意勒索事主許事主赴都察院呈告將捕役照恐嚇取財例治罪該管官失於覺察及任意徇縱者分別嚴加議處應如所請從之 戊子命多羅平郡王福彭爲定邊大將軍 敕諭定邊大將軍平郡王福彭奉

天伐罪治世之常經鋤暴除兇安邊之遠畧逆賊噶爾丹策零狂悖冥頑父子濟惡妄欲侵陵我屬國窺伺我邊陲包藏逆心狡焉思逞朕以此賊不除終爲衆蒙古之巨患是以命將興師聲罪致討乃數年以來錫保調度無方制防鮮術因循退縮坐失機宜爲將士之所輕致軍心之不振深負任使有忝元戎上年賊兵深入我境副將軍和碩親王額駙策

凌內大臣塔爾岱督率弁兵奮勇追擊大殲賊衆丕振軍聲當此乘機決勝之時必須另簡忠誠任事之親藩始克奏膚功而寧邊塞是用命爾爲定邊大將軍統領滿洲蒙古綠旗大兵一切事宜爾與副將軍和碩親王額駙策凌副將軍塔爾岱常德恭贊內大臣永福護軍統領阿岱內大臣伯欽拜公博爾屯等酌定方畧公同計議而行勿謂己能而不納衆論勿當事會而猶復遲迴勝算期於萬

全神機定於方寸整衆須如山岳之重捷伐以奮雷霆之威鼓勵戎行申明紀律遠偵密探先事預防各路大兵及蒙古兵丁聽爾調遣凡遇有警即遣發官兵應援撲剿賊中有情急來歸者加意撫恤其不抗拒官兵者毋加殺戮凡我將弁官員兵丁等其或有臨戰退避擾亂軍機者爾會同商議文官四品以下武官三品以下即以軍法示衆其所犯過小者亦會同商議即行處治毋泯沒行間之

勞績毋寬縱違法之弁兵軍紀須極嚴明賞罰悉期公當相時度勢務合事機有應知會西路寧遠大將軍者即行知會一同辦理爾其殫乃心力敷厥謀猷蚤建功勲永綏邊徼以副朕蕩寇除殘息事寧人之至意欽哉故敕己丑

孝懿仁皇后忌辰遣官祭

景陵諭辦理軍機大臣等副都統海薩爾圖在軍前行走甚屬効力今聞身故著賞給拖沙喇哈番令伊子承襲再令大將軍酌賞銀兩料理歸櫬其應得卹典照例給與加正黃旗護軍叅領翟三副都統銜分管軍前索倫兵丁戶部議覆協理直隸總督顧琮奏言直屬向無額設獄囚口糧以致瘐斃不少嗣後請一體准設以廣皇仁應如所請得旨依議在獄囚犯舊例俱給口糧祇因各省額設之項有無多寡不同有司奉行不一即間有州縣官自行捐助亦不可以爲常著通行

各省督撫藩臬悉心詳查若府州縣額設之項歲有餘糧則當分給於不足之府州縣若本地原無額設之項或額數不敷應即公同酌量動支存公銀兩核實散給令監犯日食有資不至饑餒僅有刑書禁卒尅扣等弊一經發覺將該管官員一併議處江南副總河西柱疏言江南通州所屬范隄修築告竣各場竈戶感戴國恩情願急公効力請將原發工價銀兩繳還運庫得旨朕發帑修理范隄原係保護鹽場加恩竈丁之意所用工價銀兩何用伊等捐輸著出示曉諭照數給還勿使不肖官吏人等侵蝕中飽庚寅諭辦理軍機大臣等前因大將軍傅爾丹輕進失利順承親王錫保在察罕叟爾調撥兵丁防範科布多俱屬妥協是以朕格外加恩晉封親王授爲大將軍及去年賊兵來犯錫保竟不預備奏稱撥兵一萬令赴烏孫珠爾而所到之兵僅有三千又將領兵之將軍傅爾丹

留於大營致賊直越克爾森齊老始遇額駙策凌將軍塔爾岱等奮勇截殺一面差人呈報令其速發援兵而錫保不即發兵俟丹津多爾濟到後始遣赴援丹津多爾濟行未十里即劄營住歇是時額駙策凌等與賊拒戰二日知援兵不至始各收兵回營坐失機會錫保自爲大將軍以來每聞賊至輒驚惶無措兵丁時撤時撥二年之內馬匹傷損數萬闔營無不怨恨夫身膺大將軍之任賊來不能邀擊及深入之後又令免脫此皆調遣失宜怯懦畏葸之所致也深負朕簡用之恩理宜從重治罪姑念其前歲在科布多尚能籌畫整備著暫革去大將軍親王其順承郡王查應襲之人承襲熙良世子之爵亦著革去現命多羅平郡王爲定邊大將軍俟到軍營時著錫保聽平郡王指示効力贖罪如仍前玩忽經平郡王叅奏定行從重治罪丹津多爾濟乃喀爾喀一微末台吉蒙

聖祖仁皇帝施恩教育承襲伊父扎薩克貝勒朕御極之初封爲郡王嗣因採買馬駝効力晉封親王屢加恩眷去年厄爾得尼招大敗賊人之時伊捏奏冒功朕賞以墨爾根巴圖魯之號賜與黃帶子封其子多爾濟色布騰爲世子乃於克爾森齊老領兵救援時故意遲延行至十里即安營住歇旋撤兵回營及厄爾得尼招接戰之時額駙策凌領右翼官兵奮勇衝擊已將賊兵殲殺殆盡而丹津多爾濟坐擁左翼官兵觀望不前次日衆人皆欲急行追擊伊又支吾逗留至賊由杭愛山後逃遁伊並不尾追轉由杭愛山之南遶道遲延致誤大事且數年以來所辦馬駝甚屬不堪理應將丹津多爾濟從重治罪但念伊從前採買馬匹曾經効力暫行寬免著削去巴圖魯之號將伊子之世子革退撤回黃帶子革去親王授爲郡王仍留喀爾喀副將軍之任辦理未完馬匹之事協助大將軍平郡

王料理蒙古事務儻不實心効力仍蹈前轍定行從重治罪冊卜登原係扎薩克公先因追擒脫逃之吳梁海羅卜藏西拉布等著有勞績格外加恩晉封貝勒嗣因捏奏蘇克阿爾達胡竝厄爾得尼招等處擊賊功績朕賞以巴圖魯之號賜與黃帶子晉封郡王今實情畢露方知伊帶兵一千過百餘賊寇即恐懼不前故張聲勢俾賊遠遁又同塔爾岱領兵追賊誑言迷路縱賊遠颺竝無爲國効力之實心著革去郡王仍授爲貝勒撤回黃帶子其巴圖魯之號亦著革去令往科布多軍前効力贖罪儻仍前退縮瞻顧定行從重治罪○奉天府府尹焦祈年病假回籍陞左僉都御史呂耀曾爲奉天府府尹刑部等衙門議覆署刑部尚書張照條奏更定律例等欸一夫毆妻死審無故殺別情者如家無承祀之人請准留承祀以枷責完結一竊盜至三犯通計贓五十兩以下罪止滿杖者請從

重擬遣五十兩以上罪應擬徒者從重擬絞監候一承審官輒用重刑將笞杖人犯疊夾致斃二命以上徒流人犯疊夾致斃四命以上者請以故勘論擬斬監候一斬絞人犯監禁在獄如有強橫不法及犯賭博等事請照原擬即行正法將提牢官議處禁卒治罪一支領囚糧每石請給腳價銀五分於贓罰銀兩內按次給發移送戶部查核一刑部現審左右二司郎中員外主事缺出請於十四司司員內揀選明白歷練者調補所遺各司員缺歸部銓選俱應如所請從之○旌表山東單縣烈婦謝以典妻劉氏于歸半年夫亡自縊曹縣烈女和網聘妻張氏聞夫病故矢志投繯各給銀建坊入祠致祭如例○辛卯戶部議覆貴州巡撫元展成疏言黔省新闢苗疆安設重鎮亟宜預籌積貯查古州之都江河直達廣西轉運甚便請將廣西潯州沿河等倉撥穀五萬石分運古州都江古州建倉

六十間貯穀三萬石都江建倉四十間貯穀二萬石於青黃不接時減價出糶秋成買補還項應如所請從之○壬辰授理親王弘皙女爲縣君壻敦多布爲固山額駙鑄給左右翼前鋒叅領關防各一顆從署左翼前鋒統領色爾壁請也○癸巳以鑲黃旗叅領宗室色貝署正白旗蒙古副都統○甲午

上詣

恩佑寺行禮○中元節遣官祭

永陵

福陵

昭陵

昭西陵

孝陵

孝東陵

景陵

孝敬皇后○諭辦理軍機大臣等福建送來教習千總等到京將及二年已教成八旗兵丁

藤牌技藝應將伊等遣回其外委千總把總等俱准實授千總賞銀五十兩把總等各賞

銀四十兩兵丁各賞銀二十兩病故兵丁三

名亦各賞銀二十兩交與千總等帶回原籍

賞給伊等妻子○吏部議覆陞任奉天府府

尹楊超曾條奏設官分理事宜一裁復州通

判缺改設復州知州一員學正一員吏目一

員裁義州巡檢缺改設義州知州一員吏目

一員並將土默特耕地民人附入義州民籍

一金州請改爲縣裁原設巡檢缺添設知縣

一員典史一員一奉天府治中請照各府管

糧廳分管糧務理事通判照各府督捕廳專

司督緝如有失察逃盜等案照例議處均應

如所請從之○尋定金州新改縣曰寧海○乙

未諭內閣大學士孫柱八旬衰邁著以原官

致仕○授允禔女爲縣君壻王占爾爲固山

額駙○戊戌諭內閣據倉場總督兆華疏報

六月二十二三等日雨水連綿河流驟漲天

津一帶糧船多有浸濕漂損等語今年伏雨稍多河流驟漲以致損壞漕船尚非運官旗丁疎忽之咎其漂失米石免其賠補損壞船隻亦免賠修運官亦不必議處此朕體恤寬大之恩儻將來運官旗丁等因此番寬典不知加意隄防或有捏報巧飾等弊一經察出按律治罪 己亥諭內閣去冬今春北地雨雪稀少朕即恐夏月有蝗蝻之患曾降諭旨通行直隸山東江南等省督撫大吏飭令所屬官弁先事預防不得苟且塞責嗣於五月間聞江南淮揚所屬之山陽寶應等處蝻子萌動朕又降旨責令加緊捕治毋得稽緩隨據漕運總督魏廷珍兩江總督高其倬等先後奏報俱嚴切批諭朕之爲民先事防維者亦殫竭心力矣今河東總督王士俊奏稱曹縣魚臺濟寧等處蝻子生發現經撲滅隣近之江南豐沛碭山等縣尚有未盡等語朕覽各督撫先後所奏是蝗蝻萌動之處山東江

南二省州縣皆有之祇因彼此接壤不肖官吏遂謂可以卸過於隣封而巧爲推諉捕治不力情事顯然著傳旨速行曉諭僅餘孽未淨將來災及田禾將兩省地方有司官均加嚴處其督撫等一併從重察議 又諭直隸山東地方自去冬以及今春雨雪稀少朕心憂慮爲民虔誠祈禱幸蒙

上天垂鑒疊沛甘霖遠近霑足目前秋禾秀實大有豐稔之象朕心不勝感慶茲據直隸河道總督王朝恩奏報知近水低窪之地因伏雨稍多河流漲發禾稼被淹人口亦有傷損者朕心深爲憫惻著直隸總督山東督撫遴選賢員速行查勘或動倉穀或動帑銀確實賑濟務令被水窮民均霑實惠 庚子轉禮部右侍郎舒喜爲左侍郎陞通政使兼管翰林院掌院詹事府詹事事留保爲禮部右侍郎仍兼理翰林院詹事府事務 四川總督黃廷桂奏言潼川州鹽亭縣鄉民楊士榮家

於本年五月初八日牛產瑞麟衆皆稱慶謹繪圖進呈得旨朕從來不言祥瑞屢降諭旨甚明上年山東巡撫奏產瑞麟朕將朝乾夕惕之心宣諭中外不准臣工奏賀今川省瑞麟再見朕心倍加愧悚惟在吾君臣共修實政士庶共敦實行庶幾感召

天和潛消災沴年穀順成萬民樂業此朕心之所謂祥瑞也○癸卯陞正黃旗滿洲副都統滿泰爲鑲紅旗護軍統領乙巳吏部議覆

署刑部尚書承恩公慶復條奏一向例刑部督捕司設有前後二司督捕一廳請歸併爲一司以專責成除滿漢司官四員仍照舊例外其筆帖式八員內請撤回二員一江南一司員少事多請分爲江蘇安徽二司辦理滿司官除舊撥四員外請再撥二員漢司官除郎中原設二員外請添設員外郎一員主事一員一各司案件繁多請照工部例設督催所派滿漢司官各二員筆帖式二員專管登

記查催俱應如所請從之 丙午禮部議奏多羅平郡王福彭繼祖母瓜爾佳氏守節母家歷三十載請照宗室節孝例頒給救命賜之銀幣以示嘉獎竝准平郡王福彭迎養藩邸從之○丁未以領侍衛內大臣英誠公豐盛額署鑲藍旗滿洲都統○辦理軍機大臣等議覆署陝西總督劉於義奏言口外赤金等處牧放馬駝關係緊要防範宜嚴請於赤金之南蘇喇河口常馬爾河口等處各撥兵駐劄赤金靖逆之北拜帶湖哨防營布魯墩等處各設墩臺撥兵巡查再於布魯墩哨防營拜帶湖適中之地派兵三百名駐劄防守應如所請從之○賑江西大庾等十一縣被水饑民

大清世宗敬天昌運建中表正文武英明寬仁
信毅大孝至誠憲皇帝實錄卷之一百三十三

大清世宗敬天昌運建中表正文武英明寬仁
信毅大孝至誠憲皇帝實錄卷之一百三十四

監修總裁官光祿大夫經筵講官太僕寺卿領侍衛內大臣保和殿大學士兼兵部尚書總理兵部事務三等伯加十五級日那爾泰

總裁官光祿大夫經筵講官起居注太僕寺卿保和殿大學士兼戶部尚書仍兼管吏部尚書翰林院掌院

事三等伯加十三級日那爾泰光祿大夫經筵講官起居注太僕寺卿領侍衛內大臣保和殿大學士兼工部尚書仍兼管

翰林院掌院事務加二級日那爾泰光祿大夫經筵講官太子太僕寺卿領侍衛內大臣保和殿大學士兼禮部尚書加六級日那爾泰光祿大夫

經筵講官起居注太僕寺卿領侍衛內大臣保和殿大學士兼禮部尚書加六級日那爾泰光祿大夫

敕修

雍正十一年癸丑八月己酉朔諭內閣貝子

年表上卷下

允祐著同莊親王學習辦理正黃旗滿洲事務員勒允禧著同果親王學習辦理鑲紅旗滿洲事務○兵部等衙門議覆福建總督郝玉麟條奏臺灣營制事宜○臺灣遠隔重洋民番襟處請於府治增置城守營設叅將一員守備二員千總二員把總四員兵一千名防守府庫倉獄並分駐鎮標南北兩路各汛所有鎮標原設三營之兵撥派各汛者全數撤回府治以資彈壓○南路原設叅將一員

守備一員。千總二員。把總四員。兵一千名。不敷防範。分撥之用。請將駐劄山猪毛口守備。改爲下淡水營都司僉書。再添設千總一員。把總二員。兵五百名。合原設弁兵分駐山猪毛口。阿里港。新園。萬丹鳳山縣治。鳳彈。下埤頭。攀桂橋。觀音山。石井等處。北路延袤千有餘里。原設叅將一員。守備一員。千總二員。把總四員。兵一千一百二十名。亦不足分防彈壓。請改叅將爲副將。再添設都司一員。守備一員。千總四員。把總八員。兵一千二百八十名。分中左右三營。以都司爲中軍。守備爲左右二營。分駐諸羅縣治。及斗六門。竹脚。笨港。鹽水港。彰化縣治。猫霧揀。蓬山。竹塹。中港。後壠。南嵌。淡水等汛。其臺協水師原撥笨港。鹽水二汛兵丁。仍撤回水汛。安平地方外控海洋。內扼臺郡。實係唇齒之區。請設立礮架七座。並酌量起蓋倉廩。貯粟三萬石。以資兵餉。一臺屬田地丁口漸增。請將各處莊

民。編造保甲。其各番社鄉保。暨通事。俱嚴加選擇。勿令姦匪充當。並設立社學。延請行優生員教導。以化愚蒙舊習。一臺屬流寓人等。內有人材出衆。從前隨征効力者。請給外委功加劄付。即委爲社長。約束居民。三年無過。准與內地兵丁。以把總相間補用。一臺灣孤懸海外。總兵一官。有統馭民番之責。請照山陝沿邊之例。改爲掛印總兵官。均應如所請。從之。○庚戌。予卹雲南征勦思普猓夷陣亡死難官弁。試用州同章倫。贈知州。廕一子入監讀書。新平縣典史沈洪揚。武壩巡檢管青龍廠事丁珏。贈主簿。俱賜祭葬。千總王昌。把總張文秀。陳天申。康天錫。洪先。汪自貴等。廕子弟一人。以衛千總用。賜祭葬。丁珏妻吳氏。被擄殉節。給銀建坊。入祠致祭如例。○辛亥。貴州巡撫元展成疏報。永寧平遠等五州縣。開墾雍正十年分田地。十頃有奇。下部知之。○癸丑。以吏部左侍郎任蘭枝。協理禮部侍

郎事務○禮部議覆廣西巡撫金鉷疏言鎮安府業經改土歸流應建置府學添設教授一員取進文武童生各十二名泗城府學取進童生舊無定額請照鎮安之額取進其新改流之東蘭歸順二州請各設學正一員取進文武童生各四名思明土府新改爲土州歸併寧明州管轄請照州學例裁教授訓導缺設學正一員取進文武童生各十五名梧州府北流縣既改隸鬱林直隸州則少撥入府學額數請於舊額八名外增取文武童生各四名以補原撥府學之額均應如所請從之○甲寅諭內閣據山東巡撫岳濬奏報東省歷年耗羨銀兩現存庫銀七十五萬四千兩有零從前豫省奏有存庫銀七十餘萬朕已降旨將豫省本年地丁錢糧蠲免四十萬兩以加惠通省百姓今東省亦應一體加恩著將雍正十一年地丁錢糧照豫省之例蠲免四十萬兩即以存貯之耗羨照數撥補還

項該省督撫務飭有司實力奉行俾閭閻均需實惠○乙卯諭領侍衛內大臣等近御當差之親軍俱係由佐領內挑取之人若將舊人挑爲前鋒恐致誤事嗣後親軍內未滿十年者准挑前鋒其過十年者毋得挑取永著爲例○大學士等議覆直隸總督李衛疏言獨石口邊城外河西請添造逼水堤并東西雁翅二道張家口邊城外舊有土堤一道請增高三尺改砌石壩應如所請從之○予故致仕大學士孫柱祭葬如例○丙辰諭辦理軍機大臣等據署寧遠大將軍查郎阿等奏稱庫爾墨圖山地方有逆賊五十餘人來侵被我官兵奮力攻擊斬殺二十餘人餘俱生擒未脫一騎等語此次經理調撥甚屬可嘉所有効力人員俟查郎阿查明等次具奏到日再降諭旨數年以來因西路將軍等辦理疎忽是以逆賊敢於玩視今賊兵經此番傷損必懷畏懼或於今秋即整兵侵犯西路或

於冬天侵犯北路。俱未可知。著傳諭查郎阿等令其詳悉籌畫辦理。○大學士管翰林院掌院事張廷玉等遵旨議奏。新科庶吉士蒙恩議給廩餼。謹酌每月各給銀四兩五錢。其器用什物。向工部支取。並撥給官房一所。爲教習館。令庶吉士等肄業其中。新刊

上諭。每人各賜一部。內府所刊經史詩文。每種頒發三部。永遠存貯館內。以資課習。從之。

吏部議覆廣東總督鄂彌達疏言。韶州府糧捕通判。請令兼理曲江。樂昌。乳源三縣徭務。改給關防。並酌立徭甲。徭目。以資查察。應如所請。從之。○丁巳。

太宗文皇帝忌辰。遣官祭

昭陵。○吏部議覆廣東總督鄂彌達疏言。連州所屬三江地方。徭民向化。其理徭同知及三江協副將都司守備等缺。請與內地一體較俸陞轉。應如所請。從之。○戊午。祭

大社

大稷。遣誠親王允祕行禮。○甘肅巡撫許容疏

言。本年甘屬應徵地丁銀兩。奉旨全行蠲免。豐年被澤。閩省歡呼。但查雍正十年。甘省先經蠲免。所有民間已完銀十四萬六千餘兩。准抵今年正賦。今年未奉恩旨以前。又有已完銀兩。再甘省有新經入額錢糧一千一百餘兩。尚未報部。相應一併奏聞。得旨。朕因加惠甘肅民人。是以將本年額賦再行蠲免。其上年及今年春夏間已完之項。著該督撫量率有司。詳細確查。記明檔冊。准抵甲寅年應徵正課。至新經入額之一千一百餘兩。一體蠲免。○命鑄給定邊左副將軍定邊右副將軍印。齎送軍營。○己未。

太祖高皇帝忌辰。遣官祭

福陵。○陞浙江杭州協領穆魯納。爲杭州左翼滿洲副都統。○命果親王允禮管理宗人府事。○庚申。諭兵部。各省營伍。必須武職大員。平時親行查察。庶可除怠惰廢弛之弊。提督

一官。節制全省。統轄之地甚遠。難以親身徧歷。至於總兵分轄地方。道里不甚遼濶。巡察尚易周遍。嗣後各鎮臣有應行巡察之處。著先期具摺奏聞。請旨候朕批示遵行。不必拘定期限。以免各營預備供應。儻有絲毫苛累所屬弁兵者。經朕察出。定行從重議處。○兵部遵旨議奏。各省預行保舉註冊人員。除水師營不避本省外。其陸路都司以上等官。請照江浙兩省題補之例。於本籍五百里外缺掣簽推用。守備於隔府別營缺掣簽推用。從之。○辛酉。加賑直隸武強武邑二縣。被水饑民。○壬戌。調四川重慶總兵官馬義為四川松潘總兵官。雲南普洱總兵官邱名揚為四川重慶總兵官。雲南鶴麗總兵官楊國華為雲南普洱總兵官。陞湖廣洞庭副將何勉為雲南鶴麗總兵官。○癸亥。諭理藩院。輪班朝覲之蒙古王貝勒貝子公等。今歲著停其來京。○甲子。秋分夕。

月於西郊。遣寧郡王弘皎行禮。○丁卯。上命

皇四子寶親王弘曆祭

先師孔子。○諭內閣。直隸河渠水利關係國計民生。朕悉心經理。開濬河道。修築堤工。務令宣洩有資。閭閻獲福。又特設正副總河。董率其事。以專責成。因王朝恩久歷外任。且受朕深恩。是以用為總河。果以畿輔河工之重寄。乃聞王朝恩自到任以來。性好安逸。不耐煩勞。僅於運河一路。坐船勘驗工程。其他各處。從未親歷。以致緊要之處。堤岸殘缺。水道壅淤。平時漫無覺察。今夏雨水雖多。旋即晴霽。並非久陰積滂可比。而薊運還鄉等河。及河間天津之運道。并順德廣平大名之百泉。滏陽漳河等處。決口漫溢。傷害田廬。又如滄州磚河。月堤潰決。并不奏聞。希圖隱諱。似此有忝職守。深負朕恩。著革職。仍留該地方。所有今年應賠工程銀兩。悉於王朝恩名下追

出還項其直隸河道總督員缺著太常寺卿
營田觀察使顧琮補授徐湛恩身為副總河
不能協助辦理甚屬怠忽著革去副總河交
與顧琮差遣委用少有懈怠亦著嚴行叅奏
其副總河員缺著永定河道定柱補授戊
辰遣官祭

關聖帝君○諭辦理軍機大臣等據署陝西
總督劉於義等奏稱吐魯番等處回民已移
至安西男婦大小共八千一十三名口朕查
從前回民自吐魯番移至塔爾那沁時共九
千二百七十三名口今其中既有病故例應
扣除口糧但伊等甫到安西寧使之食用寬
裕著仍照原數支給以示朕格外之恩至總
管額敏和卓及伊親丁著照官員例支給糧
米以示優異○諭兵部從前滿洲侍衛補用
綠旗員缺乃朕鼓勵人材之意近觀所用滿
洲人員能整頓營伍者無幾且綠旗應用之
員甚多嗣後滿洲藍翎侍衛著仍在侍衛內

行走揀選都司守備時不必帶來引見○乙
巳添設順天府四路捕盜同知衙門經制外
委把總各一員從直隸總督李衛等請也○
庚午辦理軍機大臣等議覆署陝西總督劉
於義奏言肅鎮兵丁除出征撥防外現在駐
防之兵甚覺單弱查涼州現駐河南滿兵五
百名直隸河南綠旗兵一千名請將河南滿
兵五百名直隸綠旗兵五百名仍留涼州以
備調遣其河南綠旗兵五百名於十月初旬
移駐肅州應如所請從之○辛未議敘恢復
烏蒙功雲貴四川官弁兵丁及陣亡受傷者
分別陞銜賞卹有差○免江南六安舒城等
七州縣宿州一衛雍正十年分水災額賦有
差○癸酉諭內閣朕聞直省督撫藩臬衙門
俱有本房稿房掌案書辦一切官弁陞降刑
名錢穀之事皆伊等查例呈稿繕寫承發督
撫藩臬不過從中斟酌照稿簽行以致伊等
把持操縱弊端種種直省皆然惟湖南更甚

近來督撫藩臬衙門書吏雖經一體關防封鎖。然往往巧通關節。復將子弟戚友招攬傳遞。事未入。則已有照應。事未出。則已有聲聞。屬吏藉以鑽營。伊等飽其谿壑。在督撫藩臬等受國家重寄。未有明知故縱之理。但相沿日久。習焉不知。遂易爲伊等之所朦蔽。所當留心體察。因地制宜。防範周詳。稽查嚴密。務使弊絕風清。始於地方有益。從來任用書吏。不過藉其諳練成例。若果得老成明白之幕客。諸事嫻熟。可資商酌。不使書吏得操其權。自無可作之弊。至於書吏積弊。朕已深知。但念伊等素習科條。兼曉文義。非冥頑愚蠢者可比。若督撫藩臬等動之以情理。惕之以利害。指其既往之愆。予以自新之路。在今日之勤慎小心。固可享安寧之福。即異日之役滿考用。亦可邀上進之階。伊等自知舞文作弊。必累身家。畏法奉公。自收厚報。諒未有不革面革心。改途易轍者。著督撫藩臬等將朕諭

旨。徧行訓飭。嚴切提撕。儻自此以後。仍復怙惡不悛。或過本官庸愚。爲其障蔽。經朕訪聞。定行查拏。於各該處即行正法。決不姑貸。○陞鴻臚寺卿佛保爲通政使司通政使。○旌表河南項城縣烈女申天增女申氏。拒姦不辱。投井完貞。給銀建坊。入祠致祭。如例。○甲戌。吏部議覆湖廣總督邁柱疏言。湖北恩施縣忠建地方。離縣寫遠。請改爲忠建鎮。添設巡檢一員。土司經歷寨一帶地方。應添設經制外委把總各一員。兵九十五名。分汛防守。均應如所請。從之。○以故三等精奇尼哈番巴理米親叔之子阿爾納一等阿思哈尼哈番祖應樞子祖尚賢二等阿思哈尼哈番長保子松凌各襲職。○丙子。以署正白旗蒙古副都統宗室色貝爲正黃旗滿洲副都統。調正紅旗蒙古副都統富達禮爲鑲紅旗滿洲副都統。仍留軍營。以兵部右侍郎通智爲正紅旗蒙古副都統。仍兼兵部侍郎。以鑲白旗

叅領布顏圖署正白旗蒙古副都統 丁丑
諭內閣據巡臺御史覺羅栢修等奏稱臺灣
修造戰船例係匠役糾夥深入番社採取木
植易生事端嗣後請令番民自行採運即在
內地成造朕思番社產木既多若番民赴官
售賣按數給與價值使之獲利又無騷擾伊
自樂從但不預先妥議規條難以期其必得
又恐通事人等從中作姦更滋弊竇目前且
向內地修造其番人自行售賣之處著該督
撫悉心定議妥協辦理○諭理藩院喀喇沁
王伊達木扎卜等旗分田穀歉收著派侍衛
司官各一員前往查勘實在貧人按名賑給
再貝勒僧滾扎卜等旗分地畝雖稱五六分
以上收成不等或其中亦有乏食不能餬口
者著一併查出酌量賞給○以科爾沁和碩
額駙觀音保為理藩院額外侍郎○吏部議
覆廣西巡撫金鉷疏言太平府屬恩城州土
知州趙康祚緣事叅革無人承襲請改土歸

流隸崇善縣管轄裁恩城州吏目缺添設崇
善縣縣丞一員分駐彈壓徵解錢糧應如所
請從之○戊寅以散秩大臣公馬禮善署正
紅旗滿洲都統○調四川重慶總兵官邱名
揚為陝西寧夏總兵官署直隸天津總兵官
吳正為四川重慶總兵官以長蘆巡鹽御史
鄂禮署直隸天津總兵官○旌表烈婦正白
旗滿洲保柱妻塔塔拉氏痛夫陣亡觀回自
縊湖北孝感縣夏體元妻邱氏遇寇不污捐
軀完節廣東海豐縣黃允卿妻陳氏夫亡殉
節絕粒捐軀各給銀建坊入祠致祭如例

大清世宗敬天昌運建中表正文武英明寬仁
信毅大孝至誠憲皇帝實錄卷之一百三十四

大清世宗敬天昌運建中表正文武英明寬仁
信毅大孝至誠憲皇帝實錄卷之一百三十五

品修總裁官光祿大夫經筵講官太僕寺卿和殿大學士兼兵部尚書總理兵部事務三等伯加十五級臣鄂爾泰

總裁官光祿大夫經筵日講官起居注太僕寺卿太子太保保和殿大學士兼戶部尚書仍兼吏部尚書翰林院掌院

事三等伯加十三級臣張廷玉光祿大夫經筵日講官起居注太子太保議政大臣武英殿大學士兼工部尚書仍兼管

翰林院掌院事加二級臣福敏光祿大夫經筵講官太子太保東閣大學士兼禮部尚書加六級臣徐本光祿大夫

經筵講官議政大臣協辦內閣大學士事務禮部尚書仍兼吏部尚書鴻臚寺卿臣三泰等奉

敕修

雍正十一年癸丑九月己卯朔以湖南巡撫

趙弘恩署兩江總督兩江總督高其倬以總
督銜管理江蘇巡撫事務湖北布政使鍾保
署湖南巡撫○庚辰諭內閣朕御極以來時
時訓諭奉差考試諸臣秉公持平杜絕私情
以為國家培養人材之本幸奉差諸臣皆能
仰體朕心恪遵朕訓屏除弊竇遴拔真才十
年來試事肅清士論翕服朕屢向廷臣等嘉
獎再三乃河南學政俞鴻圖原係查嗣庭案
內獲罪之人朕格外寬宥復加任使諒伊必

能感激黽勉。考校公明。以圖報効。今據河東總督王士俊列款糾參。贓私累疊。實出朕意料之外。況當天下學政澄清之會。而俞鴻圖一人首先犯法。納賄營私。甚屬可惡。俞鴻圖著革職。差戶部侍郎陳樹萱前往豫省。會同總督王士俊將本內叅奏情由。及有名人犯一併嚴審。定擬具奏。○辛巳。禮部左侍郎鄧鍾岳緣事降調。轉禮部右侍郎張廷璐爲左侍郎。仍留江蘇學政任。陞都察院左副都御史。史在甲爲禮部右侍郎。○刑部等衙門議覆署寧遠大將軍查郎阿叅奏總兵官曹勦奉派領兵哈密。縱賊失機。飾詞捏報。請在軍前正法。梟示。應如所請。得旨。曹勦著在軍前即行正法。示衆。○壬午。添設福建臺灣府學。及臺灣鳳山。諸羅。彰化。四縣學。訓導各一員。從福建巡撫趙國麟請也。○癸未。諭內閣。向來倉場事務。廢弛已極。乃朕所親見者。經理之初。難於整頓。是以定例。將殫心供職之滿

漢監督三年任滿。即陞以示鼓勵。十年以來。經朕留心整理。又復時時降旨訓飭。屏除弊端。今倉務漸次清釐。無復從前之陋習。嗣後爲監督者。但能謹守成規。便可稱職。亦不似從前之難於辦理矣。若仍三年任滿。即陞似覺太優。著大學士九卿會同倉場總督酌量定議具奏。尋議。各倉監督。嗣後果能實心効力。倉穀無虧。滿監督筆帖式三年差滿。以小京官即用。仍按筆帖式論俸。陞用主事。漢監督候選道府同知知州。及保舉學習人員三年差滿。准以應得之缺即用。如內有貢監生員無職銜可用者。交吏部酌量議敘。其現任小京官歷俸淺者。差滿准其加俸三年。如歷俸已久者。仍按俸推陞。於陞任內加二級。至降革効力人員差滿。著倉場總督出具考語請旨從之。○辦理軍機大臣等議覆。署陝西總督劉於義奏。言回民頭目奉旨賞給職銜。請照伊等從前有功等次。定品級之大小。將

一等頭目給與正千戶職銜二等頭目給與副千戶職銜三等頭目給與正百戶職銜四等頭目給與副百戶職銜照例頒給號紙應如所請從之○甲申遣官祭

歷代帝王○遣官祭城隍之神○甘肅巡撫許容疏報新寶等四縣開墾雍正七年八年九年十年十一年田地九千四百頃有奇下部知之○移廣西泗城府經歷駐天戩四甲添設照磨一員駐府治巡檢一員駐平樂一

甲永福縣縣丞一員駐鹿寨村從廣西巡撫金鉅請也○乙酉辦理軍機大臣等議覆署寧遠大將軍查郎阿條奏禁止逃兵事宜一律例內開官軍從征私逃初犯再犯以及知情窩藏俱各分別治罪誠恐愚蠢兵丁被人哄誘誤罹重典嗣後請著該管大員將此條律例責令將領頭目等明白曉諭俾闔營兵丁咸知遵凜一各營自將領以至什長旗俱有管兵之責嗣後遇有逃兵責令什長旗即

日報明逐層轉報以便行文飛查勒緝有踰限不報及通同徇隱者分別治罪如一營內有一月報逃二名三名至五名十名踰限不獲者將該管官兵等分別議處治罪一逃兵有能悔悟過愆自行投到者無論初犯再犯俱請免其治罪入伍隨征總以文到一月爲期許於隨在地方赴該官司投首轉押到營踰限自首者減二等治罪仍准入伍僅自首後復行脫逃拏獲即行正法一兵丁潛逃必由汛卡經過嗣後汛卡兵丁能查獲逃兵者分別離營遠近賞給銀兩仍紀功一次其官弁等一竝紀功如係逃兵之本營拏獲者准其將功抵罪至拏獲之後訊明沿途經過各汛卡將失察官兵分別議處治罪應如所請從之○吏部遵旨議奏定例滿洲舉人選用小京官漢軍舉人選用知縣從前漢軍舉人有冒入滿洲額內中式者以致內用外用任意趨避嗣後請令各該旗於考試時將應考

人員詳加分別開明咨送順天府如仍有混行冒考中式者查出將咨送之該旗都統佐領等官交部議處舉人革退從之。又議覆直隸總督李衛疏言直隸地方遼闊州縣事務殷繁所有佐雜官員宜酌量增改查故城縣鄭家口景州龍華鎮河間縣景和鎮北魏村獻縣韓村南皮縣舊縣鎮滄州孟村呂家村鹽山縣楊二莊青縣杜林鎮天津縣葛沽西沽等處請各添設巡檢一員東明縣杜勝集請復設巡檢一員吳橋縣連窩驛交河縣新橋驛滄州磚河驛青縣流河驛乾寧驛靜海縣奉新驛天津縣楊青驛武清縣楊村驛通州和合驛等驛亟請兼巡檢職銜磁州州判請移駐彭城鎮其河間縣管河縣丞駐張各莊清河縣管河縣丞駐油房鎮俱兼巡檢事務裁河間府稅課大使缺其稅課歸經歷徵收再青縣之長蘆鎮改歸滄州南皮縣之舊縣鎮改歸鹽山縣各就近管轄易州之黃

土臺等十二村改歸涿水縣黃莊司巡檢兼管其紫荆等八十六村以易州分駐紫荆關之上陳驛驛丞兼巡檢職銜管理均應如所請從之。丙戌湖北巡撫德齡疏報武昌等六府開墾雍正十年分田地一千八百頃有奇下部知之。丁亥雲貴廣西總督尹繼善題雲南南甸宣撫使刀起元故請以其子刀恩賜承襲下部知之。旌表山東鄒縣烈女趙性聘妻孟氏父逼改適自縊完貞給銀建坊入祠致祭如例。戊子加黑龍江署總管和托克副都統銜分管軍營索倫兵丁旌表直隸寧津縣烈婦劉士處妻劉氏強姦不從投繯完節給銀建坊入祠致祭如例。庚寅勇勤公恒泰緣事革退以其兄子色楞額襲爵。辛卯諭內閣朕已降旨諭祭賢良祠大學士張英於本籍大學士張廷玉著給假數月於十月十三日起程回家舉行典禮張若霽著隨去其族中子弟若有在京閒散職

街可以暫假者准其隨回襄事江蘇學政張廷璐亦著給假暫回本縣其學政印務照例交與督臣代管俟事竣仍回本任○壬辰諭八旗漢軍都統等嗣後補授驍騎校如本佐領下不得其人即於合旗通行揀選如一佐領人材果好即多補數缺亦無不可○癸巳以翰林院編修于辰錢本誠俱充日講起居注官翰林院侍讀劉統勳右春坊右贊善鄒升恒俱署日講起居注官○以江西按察使孫詔署湖北布政使司布政使監察御史凌燾署江西按察使司按察使○甲午太常寺遵旨議奏臣等恭查

奉先殿

神牌供奉居中

太廟

神牌供奉居裏伏思如生如存之義居中以御為得其正且祭祀典禮理應畫一嗣後太廟請照

奉先殿制供奉居中又

奉先殿

神牌之下設有泥金托座嗣後

太廟應照式製造又

奉先殿請

神牌例派內務府官員獻帛爵例派侍衛

太廟請

神牌獻爵用侍衛獻帛用太常寺官員似屬參差嗣後請

神牌應俱派太常寺官員獻帛爵俱派侍衛又

奉先殿供奉邊豆案上加紅油爵版

太廟邊豆供設於黃案上嗣後俱請供設黃案上則一切禮儀周詳畫一愈伸仁孝誠敬之忱得旨是依議議敘攻勦廣西鄧橫賊蠻功在事官弁兵丁暨陣亡受傷者分別紀錄賞卹有差○丙申以正黃旗滿洲副都統宗室色貝署正紅旗護軍統領禮部題康親王宗安薨逝請照例遣官致祭二次造墳立

碑令宗人府議加謚號得旨著予祭一次
丁酉陞太常寺少卿滿色爲太常寺卿戊戌以右春坊右贊善鄒升恒提督河南學政吏科給事中王丕烈提督廣東廣韶學政以吏部左侍郎鄂善署步軍統領授故鎮國將軍馬哈納孫瑪商阿爲奉國將軍己亥移廣東高明縣太平司巡檢駐三洲墟從廣東巡撫楊永斌請也庚子諭刑部大臣爾等身爲大臣須務其大者遠者如國家之水旱生民之凍餒最爲緊要一夫不獲其所即係朕與諸大臣之責至犯法論死本由其人自取原不必過爲寬縱或謂刑官開釋罪人可以積陰德於子孫此大不然如果秉公據法使刑皆當罪則慶流子孫此理之可必者如將殘忍兇惡之人屈法姑容欲邀一己之福而令死者含冤於地下不但不能致福且足以遺殃有罪之人法所難貸原不得任意從寬也夫寬且不可任意而況於嚴乎朕

處事惟至公無私據案件而論其事之是非初不先存一毫意見至於平日不能化導使不犯罪朕與諸臣方且抱愧斷無以不殺人爲刑措之理朕見之最真最切特與爾諸大臣言之辛丑諭內閣直隸總督李衛奏奏戶部尚書鄂爾奇著革職交與果親王允禮理藩院侍郎莽鵠立戶部侍郎海望左都御史張照吏部侍郎鄂善會同秉公審理廣西巡撫金鉷題南寧府果化土知州趙常茂故請以其子趙應龍承襲下部知之壬寅上御洞明堂閱秋審湖廣等省情實招冊諭刑部曰爾等所進秋審冊俱經細加酌勘擬定情實但此內有一線可生之機爾等亦當陳奏蓋在秋審定擬時自當執法而在勾到時僅有可寬之處又當原情二者原不相背斷不可因已定情實欲符前奏難於更改遂隱默不復奏也執法原情總歸於大公至當而已閱畢又諭曰朕閱招冊得寬一犯便心意

順適若不能寬便覺不快諸臣自同此心即質之天下之人自亦同此心斷未有以多殺一犯爲快者但犯人情罪必實有可寬之處而後予以矜全此心順適方出於自然若犯人情罪萬無可宥勉強求一時之順適屈法從寬致令惡人無所懾懼恣肆妄行則罹於法網者必多皆此姑息之一念貽之害也辟以止辟欲求斯民之遷善遠罪正不得暫圖一時之順適耳○以工部尚書范時繹爲內務府總管○兵部議覆湖廣荊州將軍袁泰條奏各省駐防協領以下官員向例俱係本旗人員補授承辦事件不無瞻顧掣肘等弊嗣後請照京城例設立副員於本翼內揀選佐領調旗委署副協領揀選防禦驍騎校調旗委署副佐領此委署人員仍照原品食俸俟有協領佐領缺出即將委署之員送部引見補授再於領催前鋒內預行保舉記名調旗委署副驍騎校如記名人員不足即將未

經保舉之人揀選委署均給與八品頂帶仍食本身錢糧遇有驍騎校缺出將已經保舉之領催前鋒奏請補授其未經保舉之領催前鋒送部轉交該旗帶領引見至出兵人員補授之缺仍照例委員署理並委副員協辦應如所請從之○甲辰改四川潘州協左右兩營守備爲都司僉書增設達建寺營千總一員從四川總督黃廷桂請也○乙巳孝慈高皇后忌辰遣官祭福陵○丙午上回宮吏部題原任郎中舒紳坐臺陣亡請照例授拖沙喇哈番准伊子承襲從之○丁未孝敬皇后忌辰遣官致祭廣東左翼總兵官李萬倉緣事革職以廣東香山協副將黃錫申署廣東左翼總兵官戊申喀爾喀澤卜尊丹巴胡土克圖遣使進九白年貢宴賚如例

大清世宗敬天昌運建中表正文武英明寬仁
信毅大孝至誠憲皇帝實錄卷之一百三十五

大清世宗敬天昌運建中表正文武英明寬仁
信毅大孝至誠憲皇帝實錄卷之一百三十六

監修總裁官光祿大夫經筵講官太僕議政官保和殿大學士兼兵部尚書總理事務等伯加五級臣鄂爾泰

總裁官光祿大夫經筵講官起居注大臣保和殿大學士兼戶部尚書仍兼管吏部尚書翰林院掌院

事三年伯加十三級臣張廷玉光祿大夫經筵講官起居注大臣保和殿大學士兼工部尚書仍兼管

翰林院掌院事加級臣福敏光祿大夫經筵講官太子太保吏部尚書加六級臣徐本光祿大夫

經筵講官議政大臣協辦內閣大學士事務禮部尚書仍兼管太常寺鴻臚寺事臣三泰等奉

敕修

雍正十一年癸丑冬十月己酉朔享

太廟

上親詣行禮○遣官祭

永陵

福陵

昭陵

昭西陵

孝陵

孝東陵

景陵

孝敬皇后○頒雍正十二年時憲曆○庚戌上詣

恩佑寺行禮畢幸圓明園○辛亥諭內閣朕賜祭賢良祠大學士張英於本籍著安徽巡撫徐本前往致祭大學士張廷玉請假回里著給與驛遞夫馬所過地方派撥弁兵護送並文武官員迎接之處悉照上年大學士鄂爾泰進京之例至明年回京時亦照此遵行隨賜原任大學士張英祠宇匾額曰忠純貽範對聯曰風度猶存典禮煥千秋俎豆師模如在忠誠垂奕葉箕裘○以內閣學士德新爲武會試正考官詹事府詹事顧祖鎮爲副考官○壬子諭辦理軍機大臣等原任侍郎衆佛保著從寬釋放同原任巡撫布蘭泰前往北路軍營辦理馬匹事務到日聽平郡王指示遵行○諭內閣今年各省秋審人犯有不應緩決之案經九卿改爲情實者甚多甚爲允協督撫通省大條臬司刑名總匯錄囚定

獄何等重大之事豈可一味因循苟且如各省督撫臬司執法科罪而九卿詳情平反或九卿據法定議而朕酌奪從寬如此方合政體豈有執法之官而任意於法外徇縱者乎督撫既如此定議若九卿不行改正則朕亦無如之何將使殺人者不死而國法不伸刑罰不中矣今九卿雖經改正然不將至當不易之理明白曉諭督撫臬司中識見鄙陋者或謂九卿定議務從苛刻稍存迎合之意遂於可矜可緩之案槩以情實奏讞其流弊尤不可言爾等將改正各案逐一查明通行申飭俾各省督撫臬司嗣後悉心定擬庶於政體允合稱朕明刑欽恤之至意○喀爾喀瓦齊賴已圖土謝圖汗敦丹多爾濟遣使進九白年貢宴齊如例○癸丑諭刑部盜犯越獄傷人兇惡已極而撫臬擬以緩決殊爲失當朕前言凡爲大臣須務其大者遠者如善良之民至於凍餒老者不得遂其養幼孤不得

遂其長此何等可憐可憫之事。是朕之責亦即諸大臣之責也。比之活一死殘之人孰重孰輕孰是孰非。乃今人識見蒙蔽每謂寬宥一人可以積德蔭及子孫不知寬縱此等死殘之人以沽仁厚便非公正之道。朕此心只有一公字。十一年以來行事大臣等所共知共見若能以朕之心辦理天下國家之事朕實嘉賴焉。○甲寅諭內閣各省商牙雜稅額設牙帖俱由藩司衙門頒發不許州縣濫給所以防增添之弊不使貽累於商民也。近聞各省牙帖歲有增添即如各集場中有雜貨小販向來無藉牙行者今驟行給帖而市井姦牙遂恃此把持抽分利息是集場多一牙戶商民即多一苦累甚非平價通商之本意著直省督撫飭令各該藩司因地制宜著為定額報部存案不許有司任意增添嗣後止將額內退帖頂補之處查明換給再有新開集場應設牙行者酌定名數給發亦報部存

案庶貿易小民可永除牙行苛索之弊矣。又諭硝磺為軍器火藥之用例禁甚嚴聞河南地方有出產焰硝之處小販經紀往往以雜物零星易換赴隣省售賣現據湖北各屬盤獲甚多朕思河南之硝既私行於楚北則其私行於附近各省更不待言著該督等飭令各屬實力查禁不得仍蹈前轍○命大學士鄂爾泰為

四朝國史八旗志書館總裁官○以署刑部尚書承恩公慶復為戶部尚書忠達公馬禮善署刑部尚書○雲貴廣西總督尹繼善題廣西太平府鎮遠土知州趙長通於康熙五十九年病故子趙昌齡年幼暫停襲職今一十五歲應照例承襲下部知之○復設直隸大名順德廣平兵備道一員兼管河道工程以河間天津二府分巡事務歸天津河道兼管其永平一府通薊遵化三州三河武清寧河寶坻四縣歸通永河道兼管保定正定二府

及直隸五州歸清河道兼管添設保定府糧捕通判一員駐府城天津府糧捕通判一員駐滄州從直隸總督李衛請也乙卯諭刑部凡因姦致死本婦者向來律無正條俱引因姦威逼人致死之例擬斬監候秋後處決但其間情事不同如係強姦既成本婦羞忿自盡者擬以斬候固屬恰當若強姦不遂將本婦立時殺死如此淫兇之犯非立決不足以蔽其辜至於強姦未成或但經調戲本婦即羞忿自盡者非引照擬抵固無以慰貞魂而一槩擬斬監候又覺未爲平允應擬絞監候至秋審時將監候人犯俱以情實請旨如此庶爲輕重得宜改四川重慶府屬之黔江縣隸重慶府分駐黔江同知管轄兼轄附近彭水一縣陞府屬之忠州爲直隸州兼轄墊江豐都及夔州府屬之梁山三縣移順慶府通判駐鄰水縣豐和場寧遠府西昌縣縣丞駐禮州所添設打箭爐同知衙門照磨一

員從四川總督黃廷桂請也丙辰大學士張廷玉給假南回賜帑金一萬兩爲祠宇祭祀之用並賜御用冠帶衣裘及貂皮人參內紵等物又頒給內府書籍五十二種交與江南織造高斌從官艘運至桐城本籍丁巳以大學士鄂爾泰署理吏部事務大學士朱軾署理翰林院掌院事務戊午諭內閣聞山東武城縣地方夏間被水至今未消著該撫速委幹員前往確查即行酌量料理務令小民不致失所其被衝城垣作何修理運河兩岸作何堵築以防河水泛溢之處著該督撫會同總河妥協辦理諭理藩院今年科爾沁等扎薩克旗分所種之穀收成甚薄此等旗分連年歉收其屬下人等或有度日艱難者爾等查明當如何賑濟養贍之處即預行辦理辛酉諭辦理軍機大臣等紅郭爾鄂隆地方兵丁著副都統噶爾錫倭星額管領每人賞銀三

千兩整頓軍裝即馳驛前往噶爾錫著補授
正黃旗護軍統領○正黃旗蒙古都統雅親
緣事革職陞正黃旗護軍統領扣婁爲本旗
蒙古都統仍留軍營以刑部左侍郎盛安爲
正藍旗滿洲副都統○壬戌諭內閣浙江杭
嘉湖三府上年偶被水災兼以飛蝗傷稼朕
特沛恩施將應完漕米分年帶徵發帑賑恤
黎民不致失所惟是本地所產米石不敷食
用現今年歲雖獲豐收而上年借糶倉穀恐
一時未能買補足數明歲青黃不接時尚須
米石酌撥平糶以濟民食不可不預爲籌備
著將杭嘉二府屬本年額徵漕米各截留五
萬石存貯備用再湖州府之歸安烏程二縣
今歲收成稍歉所產米糧尤應留爲本地之
用著將兩縣本年分應徵漕米一十八萬餘
石並帶徵雍正十年分漕米七千餘石一併
照部定折價改徵銀兩解部著該督嚴飭地
方官實力奉行無得縱役需索以仰副朕加

惠黎民至意○命果親王允禮管理戶部事
務○以江蘇巡撫喬世臣爲都察院左副都
御史○以署刑部尚書忠達公馬禮善兼理
鑲紅旗滿洲都統事務○三等精奇尼哈番
關壽緣事革退以其子善福襲職○癸亥諭
內閣定邊大將軍平郡王軍營辦事之大臣
甚少富德著授爲額外內閣學士由鄂爾昆
前往大營令平郡王酌量委用○一等精奇
尼哈番兼一拖沙喇哈番慶德緣事革退以
其姪祥太襲職○丙寅諭內閣原任巡撫伊
都立辦理進剿科布多兵糧甚屬効力著授
額外侍郎○以兵部右侍郎高起署正白旗
漢軍都統署正紅旗護軍統領宗室色貝署
正黃旗蒙古都統○以故一等阿思哈尼哈
番兼一拖沙喇哈番孫承恩子吉福襲職○
丁卯諭刑部從來明刑所以弼教除暴所以
安民何恩何怨何寬何嚴處之無心並非二
事準乎天理善亦不爲慈協乎人情殺亦不

爲忍朕臨御萬方。日夕乾惕。念不能一道同風。俾吾民各安生理。免於刑戮。每以自咎。所望內外諸大臣。務識大體。持正秉公。抱刑期無刑之心。執辟以止辟之法。先使民不敢犯。俾無漏網之姦。克繼則導人不爲。漸化向風之頑懦。如此設施。需之歲月。雖不敢遽望刑措。或庶幾可移習俗。應知刑即是教。怨即是恩。義刑義殺。即所以仁育仁懷。自古至今。莫之能易者。朕十年以來。一切刑獄。莫不虛衷歛息。詳慎推研。凡情有可原者。務從緩減。而意非主寬。凡法無可貸者。便依斬絞。而意非主嚴。本無成見。惟其自取。朕每見諸廷臣。竝督撫大吏。諄切講求。反復開示。諒已悉朕心。喻朕旨矣。今者秋審大典。詳覽直省各冊。往往有法無可貸。情無可原者。而各該督撫。槩擬緩決。竝無勘語。且有上次定擬情實。而今年又自改緩決者。有監候年久之犯。而每年秋審。忽擬情實。忽擬緩決者。有本定緩決。因

部改情實。即照擬情實。本定情實。因部改緩決。即照擬緩決者。業經九卿法司詳核。改定試問。該督撫等。獄錄因何等重大之事。豈竟漫不經心。抑竟毫無定見耶。夫封疆重任。爲民大父母。利濟安全。實有攸賴。一夫失所。當引爲己愆。一政未平。當引爲己恥。水旱災侵。以及盜竊愚頑。皆當引爲己責。朕實存此心。執此行。以望諸臣。工匠佐承宣。俾德意廣敷。萬姓蒙福。至於殺人者死。國有常刑。儻殺人者不死。則冤死者何伸。朕嘗謂疎縱之過。甚於苛刻。姑息之害。等於殘忍。但本公誠之至意。達仁義之通權。此心此理。至公無我。方爲平允。若以爲欲嚴是負朕恩。若以爲欲寬亦辜朕訓。內外諸大臣。務籌遠大。不任法不弛刑。由此類推。庶政皆然。其各身體而勤求之母忽。○戊辰。定邊大將軍多羅平郡王福彭。摺奏本月十九日。臣遵旨將定邊左副將軍印信。交額駙策凌掌管。由烏里雅蘇泰起

程前赴科布多。其定邊右副將軍印信亦交額駙策凌帶往奏入。報聞。○己巳。調工部右侍郎托時爲戶部右侍郎。戶部右侍郎常有爲工部右侍郎。○以一等侍衛葉楚署正黃旗護軍統領。○賑山東德州恩縣等十州縣水災饑民。○庚午。諭理藩院鄂爾多斯扎薩克公齊旺班珠爾羅卜臧深悔上年軍營疎忽之咎。此次効力勤勞。著加恩給還固山月子之職。○改直隸易水營原轄之蠡縣高陽二汛歸保定營管轄。保定營原轄之完縣唐縣二汛歸易水營管轄。從原署直隸總督顧琮請也。○辛未。陞山西平陽副將馮吉品爲浙江溫州總兵官。○賑浙江新城等四縣旱災饑民。○壬申。貴州清江總兵官趙文英緣事革職。陞貴州都勻副將卜萬年爲貴州清江總兵官。○癸酉。諭內閣督撫提鎮爲封疆大吏。總理軍務糧儲刑名錢穀營伍汛防等事。責任甚重。是以簡命之初。頒給坐名敕書。將

所管轄地方所節制官員並應行事宜備細開載。令其詳酌施行。而督撫提鎮等於奉到之日。即謄黃刊刻通行所屬。各爲遵守。此定例也。但國家承平百年。因革損益備極周詳。各省州縣衛所有原隸該省。後經改隸鄰省者。有鄰省所屬原聽本省兼轄。今已無須兼理者。有文武官弁原係本職。後經另改職銜者。有地方改設已久。員缺裁汰多年者。而敕書所載祇照舊式繕謄。並未另行改定。是竟視爲具文矣。其何所遵守。嗣後頒給敕書。該衙門務將督撫提鎮等現在管轄之地方。節制之官弁。與任內一切應行事宜。逐細查明。詳確開載。俾節制經理釐然可據。庶不失慎重封疆以昭職守之至意。○諭兵部嗣後各直省總兵官有巡查營汛之事。俱著商請該省督撫具本請旨。不必摺奏。○以福建福州副將馬召南署福建福寧總兵官。○辦理軍機大臣等議覆署寧遠大將軍查郎阿奏言

目今時屆冬令雪已深積請將大兵分派駐
劄以慎防守臣等公同酌定令副將軍張廣
泗駐劄北山其領兵大員派內大臣顧魯前
鋒統領阿思海護軍統領哈岱一等侍衛特
庫副都統喀拉張正文烏察拉協理台吉羅
布藏總兵張豹張存孝楊琮共領滿洲蒙古
綠旗兵一萬二百五十名副將軍常春駐劄
南山其領兵大員派鎮安將軍卓鼐前鋒統
領宗室哈爾吉副都統達什班第提督樊廷
總兵張元佐共領滿洲蒙古綠旗兵九千名
臣查郎阿與月子袞布魯贊穆克登提督顏
清如都統良敦散秩大臣安楚護原任兵部
尚書馬會伯總兵周一德留駐大營共存營
蒙古綠旗兵三千七百餘名臣仍不時親往
南北兩路巡查此外另派總兵張朝良駐劄
三保副將劉廷琰駐劄沙棗泉副將馮廷雄
駐劄柳樹泉各帶兵馬防守要隘並資聲援
應如所請從之○賑江南宿州靈璧等四州

縣水災饑民○丁丑

萬壽節停止朝賀筵宴○

上詣

恩佑寺行禮○遣官祭

福陵

昭陵

昭西陵

孝陵

孝東陵

景陵

孝敬皇后○遣官祭真武東嶽城隍之神

大清世宗敬天昌運建中表正文武英明寬仁
信毅大孝至誠憲皇帝實錄卷之一百三十六

大清世宗敬天昌運建中表正文武英明寬仁
信毅大孝至誠憲皇帝實錄卷之一百三十七

監修總裁官光祿大夫經筵講官太僕寺卿弘文館學士兼兵部尚書總理事務三寶伯加十五級臣鄂爾泰

總裁官光祿大夫經筵講官起居注太僕寺卿弘文館學士兼戶部尚書吏部尚書翰林院掌院

事三寶伯加十三級臣張廷玉光祿大夫經筵講官起居注太僕寺卿弘文館學士兼工部尚書仍兼管

翰林院掌院事加二級臣福敏光祿大夫經筵講官太子太傅兼閣大學士兼禮部尚書加六級臣徐本光祿大夫

經筵講官議政大臣協辦內閣事務禮部尚書仍兼管太常寺鴻臚寺事臣王泰壽等

敕修

雍正十一年癸丑十一月戊寅朔○庚辰策

試天下中式武舉孫宗夏等一百一人於

太和殿前○甲申。

上詣

恩佑寺行禮畢回宮○丙戌

上御安寧殿閱視中式武舉技勇○兵部題直

省督撫提鎮等遵旨查奏親丁馬步事宜各

因本地情形悉心定議其親丁充裕之營請

仍照馬步各半支食其設馬未設步者以一

馬抵二步馬多步少者或馬八步二或馬七

步三。或馬六步。四至設步守而未設馬糧。與馬糧甚少之營。以二步抵一馬。止設守糧者。或以二守抵一馬。或以三守抵二步。或以三守抵一馬。其有馬步全設者。照其應得親丁銀數。均勻配搭支給。著爲定例。永遠遵行。從之。○丁亥。傳臚賜殿試武舉孫宗夏等一百一人武進士及第。出身有差。○戊子。命戶部尚書彭維新。左都御史福敏。兵部左侍郎喀爾吉善。刑部右侍郎王國棟。工部右侍郎趙殿最。內閣學士德新。稽察京通各倉。○辦理軍機大臣等奏言。紅郭爾鄂隆等處之滿洲蒙古兵丁。請揀撥二三千名。前赴北路軍營。以備調遣。得旨。此所撥兵丁。著副都統綽爾多富達禮。統領前去。伊等起程時。再著科爾沁固山額駙多爾機虎。自京馳驛前往。同綽爾多等帶領兵丁。牧放馬匹。到軍營後。多爾機虎始行回京。其烏爾輝音查漢兵丁。著教漢郡王鄂爾折。衣圖。科爾沁和碩額駙達爾

瑪達都帶領前去。○庚寅。聖祖仁皇帝忌辰。遣官祭

景陵。○辛卯。諭辦理軍機大臣等。據大將軍平郡王叅奏。叅贊公博爾屯。狂妄無知。著前赴科布多。聽候額駙策凌等調遣。効力。如仍恣意妄行。即行叅奏。領侍衛內大臣薩穆哈著調往烏里雅蘇泰軍營。在叅贊處行走。○壬辰。諭內閣大學士嵇曾筠。自簡任河道總督以來。整理有方。調度合宜。朕念伊父之忠義。伊母之節操。雖已贈恤褒旌。尚未膺一品封典。今特沛殊恩。著給與大學士應得誥封。以示優眷。○癸巳。諭內閣。鼓鑄錢文。專爲便民。利用銅重。則滋銷燬。本輕則多私鑄。原宜隨時更定。籌畫變通。斯可平錢價。而杜諸弊。順治元年。每文鑄重一錢二年。改鑄一錢二分。十四年。加至一錢四分。康熙二十三年。因銷燬弊多。仍改重一錢。嗣因私鑄競起。於四十年。仍復一錢四分之制。迨後銅價逐漸加

增以致工本愈重今寶泉寶源二局額鑄錢文歲計虧折工本約銀三十萬兩朕思錢重銅多徒滋銷燬且姦民不須重本便可隨時鎔化跣緝殊難若照順治二年之例每文鑄重一錢二分在銷燬者無利而私鑄者亦難似屬權衡得中可以行之久遠再現今五省採辦洋銅三省採辦滇銅朕思與其令三省辦銅解部莫若即令滇省就近鑄錢運至四川永寧縣由水路運赴漢口搭附漕船解京可省京鑄之半甚爲便益至於戶工兩局需用鉛觔舊係商辦聞貴州鉛廠甚旺如酌給水脚令該撫委員解京較之商辦節省尤多著酌定規條妥協辦理○甲午冬至祀

天於

圓丘

上親詣行禮○遣官祭

永陵

福陵

昭陵

昭西陵

孝陵

孝東陵

景陵

孝敬皇后○停止次日朝賀○乙未四川松潘總兵官邱名揚等奏言口外十二部落番人自上年化導之後竝無爲非等事惟占架擦戎亞二名係有名積賊贓款明確因事在未經化導之前臣等將二犯釋放各將伊子交營爲質俟二犯悛改之日再行給領團聚得旨占架擦戎亞如果係積賊料不能悛改即以子爲質亦不可姑寬以貽番民害既已原情釋放後若有犯再行擒治無難又何必留伊子在營以爲牽制計諭旨到日著將伊子釋放回巢若能悔過即是良民毋得記伊舊惡儻復爲非實乃醜類立即置諸嚴刑竝將朕此旨傳諭各番目人等知之○安南國王

嗣黎維祐遣陪臣范公容等計告故王黎維
禔喪竝請襲封表貢方物○旌表山東文登
縣烈婦王琰妻梁氏聞夫陣亡投繯殉節給
銀建坊入祠致祭如例○丙申諭內閣武場
鄉會兩試原期選俊儲材所以人材壯健技
勇兼優者外場考試另編好字號竝分別雙
單令入內場再考試文藝比較取中以杜冒
濫俾進諸弊本年武會試有頂替進場作弊
者當經查出交部治罪又有人材技勇皆屬
平常而考試大臣濫列好字號入場取中者
現在查叅點革議處俾各知儆戒至於各省
學臣考試聞有弓馬平庸文理粗通之人混
入內場越號換卷傳遞代筆希圖取利以致
好字號之武童自知文理平常賄囑倩代揆
厥所由總因府州縣考試時每以廣收博取
市寬大之名無論騎射優劣悉行錄送遂令
技藝不堪漢仗猥瑣之輩混入內場種種作
弊嗣後府州縣官考試武童儻不悉心校閱

濫行錄送者著該學政題叅議處其該學政
校閱外場尤當加意選擇若將平常懦弱之
人濫列好字號入場取中亦著督撫查叅庶
武場之宿弊可除鄉會之人材日盛矣○丁
酉兵部議覆浙江杭州將軍阿里衮疏言駐
杭漢軍四旗兵丁有另戶開戶戶下等項舊
例准其一體擢用康熙二十八九年間戶下
人等不准擢用雍正五年間三代開戶人等
亦不准擢用但查現今各旗開戶及戶下人
等其祖先俱係歸命隨征以功得官歷歷可
考實非官僕項充食糧可比請將現在查出
之官員後裔有冊可據者准與另戶之人一
體擢用其餘歷年久遠無案可稽者行令該
旗及該將軍核實具結保送註冊至有騎射
優長人品出衆者請不論開戶戶下准該將
軍出結送部轉咨該旗帶領引見候旨擢用
應如所請從之 旌表廣東陽春縣烈女馮
秀生女馮氏拒姦不辱投水完貞給銀建坊

入祠致祭如例○戊戌以多羅貝勒斐蘇爲宗人府左宗正○正藍旗漢軍都統承恩公慶復等遵旨議覆八旗世職絕嗣人員有以近族遠族子孫爲後者有以親戚收養爲後者其從前立功所得世職應分別降等令其承襲至墳墓在盛京及不知墳墓所在者既無人承管祭奠應無庸承襲得旨朕加恩絕嗣人員爲之立後賞給世職令其承襲皆念伊等勲勞不忍聽其血食斷絕也其墳墓在盛京而承襲世職之人在京當差者如情願往盛京居住即令移住盛京隨彼處當差至不知墳墓所在者亦可立墳祭奠著一體加恩賞給世職令其承襲○予故正藍旗滿洲副都統李柱祭葬如例○己亥諭內閣年來江南河工因總河諸臣經畫有方調度得宜是以湖河奠定民慶安瀾但河防關係重大將來河務必得通曉熟練之人遵循分理斯克繼前功而全河形勢非平日講求親身閱

歷必不能冒有成算洞曉機宜即修防堵築以及估工查料等事亦非經練熟諳備悉利弊必不能隨時損益有裨工程是通曉河務之員不可不預爲儲備也著每年在各部院揀選賢能勤慎司官二員帶領引見派往南河學習河務酌量委辦估工查料等事以二年爲期出具考語咨回本任如有操守才具實堪任用者即行保奏留工酌量題補其不堪學習者不必拘定二年於試用數月後即咨回原任另行派員前往學習如此數年後通曉熟練者自不乏員於河工諸務大有裨益矣○鑲黃旗漢軍都統石文煊患病解任調鑲紅旗漢軍都統諾爾渾爲鑲黃旗漢軍都統仍留軍營陞正黃旗漢軍副都統董象緯爲鑲紅旗漢軍都統仍兼管正黃旗漢軍副都統事○兵部議覆福建總督郝玉麟疏言福州府屬之南臺地方居民輻輳設有倉厰銀庫舊設巡檢千總各一員不敷彈壓請

移福州府海防同知及福協左軍都司酌帶千把總一員兵一百名駐劄其地應如所請從之○庚子喀爾喀車臣汗垂扎卜遣使進九白年貢宴賚如例○予故署陝西固原提督潘之善祭葬如例○辛丑諭兵部從來將備之選務須精悍之林雖目不識丁而胆畧豈關文采縱貌非出衆而義勇無礙粗疎蓋整肅部伍委寄干城矢奔走於疆場甘勤勞於行列類非薄具聰明小有才幹者之所能爲而勁健渾樸氣盛力充之裨弁所當畧短取長加意造就以儲將才以重武備者也近見各省督提等保題引見之大小弁員除軍功勞績外大率以明白勤敏才堪辦事註考朕親加簡閱竝逐一詢問奏對便給者有之才具明晰者有之而人材雄偉技勇超軼者曾不數見豈明白勤敏即可爲將材而才堪辦事即所爲武備耶嗣後該督提等凡保題將弁務重弓馬兼選漢仗全材難得實效須

收如仍有以軟弱而謬稱熟練以機巧而謬稱通達濫行保題者是重違朕訓膜視封疆矣定將該督提等嚴加議處○以左副都御史孫國璽兼管吏部侍郎事工部左侍郎陳樹萱兼管戶部侍郎事左副都御史喬世臣兼管工部侍郎事○以陝西西安按察使楊秘署湖北布政使司布政使湖北德安府知府偉璵署陝西西安按察使司按察使○以浙江溫州總兵官馮吉品署山西太原總兵官陞浙江水師叅將施世澤爲浙江溫州總兵官○免江南太倉華亭等二十八州縣大河等六衛雍正十年分水災額賦有差○壬寅上御太和殿視朝文武陞轉各官謝恩○諭理藩院照看達賴喇嘛之都統蘇格在彼居住有年年亦老邁一等侍衛福壽著賞給副都統職銜同理藩院郎中拉布坦前往更換福壽著賞銀一千兩拉布坦著賞銀五百兩製

辦行裝○癸卯以左都御史福敏署刑部尚書○以刑部左侍郎盛安署正紅旗滿洲都統輔國公愛音圖署鑲紅旗滿洲都統正白旗叅領元什署鑲白旗滿洲副都統○甲辰諭內閣直省督撫提鎮司道大員凡有見聞許令隨時摺奏朕皆諄切批示俾有所遵循伊等接到硃批諭旨將摺內事宜遵奉後即於下次奏事之便隨時封繳從前屢降諭旨甚明近來檢閱各省奏摺竟有尚未繳進者或有遲至一二年繳進者若謂摺內硃諭有未經施行之事故未奏繳但既奉有硃批諭時已久如何竟未舉行又未經覆奏更屬何心其中必有遺漏稽遲不即奏繳者著通行嚴飭凡摺奏大員即將從前奉到硃批逐一查明封繳儻再任意稽遲或至遺漏一經查出必加嚴處○命果毅公訥親在辦理軍機處行走○以正白旗滿洲副都統偏圖署鑲白旗蒙古都統○陞直隸保定府屬易州爲

直隸州以保定府之涑水及山西省之廣昌二縣隸之從直隸總督李衛請也○以故喀爾喀扎薩克鎮國公屠巴長子扎木禪襲爵○乙巳改陝西靖遠協原轄之關山營歸西鳳協管轄從署陝西總督劉於義請也

大清世宗敬天昌運建中表正文武英明寬仁信毅大孝至誠憲皇帝實錄卷之一百三十七

大清世宗敬天昌運建中表正文武英明寬仁
信毅大孝至誠憲皇帝實錄卷之一百三十八

監修總裁官光祿大夫禮部尚書太子太傅弘文殿大學士兼兵部尚書總理戶部事務伯弼五級直隸總督

總纂官光祿大夫禮部尚書太子太傅弘文殿大學士兼兵部尚書總理戶部事務伯弼五級直隸總督

纂修官光祿大夫禮部尚書太子太傅弘文殿大學士兼兵部尚書總理戶部事務伯弼五級直隸總督

纂修官光祿大夫禮部尚書太子太傅弘文殿大學士兼兵部尚書總理戶部事務伯弼五級直隸總督

纂修官光祿大夫禮部尚書太子太傅弘文殿大學士兼兵部尚書總理戶部事務伯弼五級直隸總督

敕修

雍正十一年癸丑十二月戊申朔奉天府府

貢奉表一百三十八

一

尹呂耀曾疏報遼陽承德等八州縣開墾雍正
正十年分田地八十三頃有奇下部知之○

庚戌禮部議覆廣東巡撫楊永斌疏言惠州

府海豐縣分設陸豐一邑請將海豐原額

取進文童生二十名二縣均分各取進十名

原額武童十五名陸豐取進八名海豐取進

七名其廩增額數二縣各設二十名應如所

請從之○大學士張廷玉摺奏臣行經直隸

州縣知今年豐稔之處居多惟近河窪地遭

值水患仰蒙

天恩賑濟窮黎得以存養但被水地方輕重不

同其中有偏重之處積潦未消難以種麥恐

明歲二三月間青黃不接民食倍艱仰請敕

令督臣確查於明春加賑一月或四十日再

敕督臣河臣查該地方應修工程酌議舉行

俾窮民得以傭工餬口得旨著直隸總督李

衛安議料理○辛亥諭都察院嗣後奏派巡

城查倉等差著揀選帶領引見其不入揀選

之人除兼部及現有差遣外餘著一併帶來

另為一班引見○壬子宗人府奏請襲封順

承郡王爵得旨熙良著襲封多羅順承郡王

代伊父錫保効力贖罪○江南江蘇按察使

徐士林緣事降調陞福建汀漳道郭朝鼎為

江南江蘇按察使司按察使○授故奉國將

軍阿爾蘇子德祐為奉恩將軍○癸丑

孝惠章皇后忌辰遣官祭

孝東陵○調鑲藍旗滿洲副都統法喀為正黃

旗滿洲副都統。鑲紅旗蒙古副都統富昌爲。鑲藍旗滿洲副都統。仍留軍營。正藍旗漢軍副都統曹煥緣事革職。調鑲白旗漢軍副都統祖魯爲正藍旗漢軍副都統。陞正白旗叅領李月槎爲鑲白旗漢軍副都統。一等侍衛福壽爲鑲紅旗蒙古副都統。○甲寅。諭辦理軍機大臣等。侍郎渣克旦。此次辦理巴爾虎事務。甚屬明晰。目今嚴冬。尚非移駐巴爾虎時。著渣克旦來京。○諭內閣。進士舉人例應

銓補知縣。因其中有賦性迂拙。不諳吏治。而人尚循謹。文理明通者。又定有准其改教之例。所以重民社之任。亦以慎司鐸之選。竝爲伊等保全功名也。乃年來候選各員。有年老材庸。不稱縣令。而苦不自量。謂猶能勝任者。其意以爲得一縣官。始爲榮幸。即到任之後。不能勝任。仍可改補教職。無礙功名。殊不思以必不能勝任之人。一經銓選。到任學習。至一年半年後。再請改教。則地方事務。不且廢

弛乎。況教官責任綦重。本非閒員。嗣後著該部堂官。於銓選時。詳加甄別。凡年老材庸之人。諭令改教。若本人必欲銓選知縣。及到任後。不能勝任者。著該督撫題叅。送部引見。不必題請改補教職。○以鑲紅旗護軍叅領額爾圖署本旗蒙古副都統。○乙卯。命四川巡撫憲德來京。陞見。○免山東高唐鄒平等二十七州縣本年分旱災額賦有差。○予故浙江杭州副都統查爾都祭一次。○丙辰。諭戶

部。本年江南應徵漕米。朕已降旨。密飭該督撫等。以半本半折徵收。爲接濟民食之用。惟是漕糧既一半改折。則漕船亦應一半停運。定例。漕船減歇之年。運丁給與一半月糧。以爲養贍。但上年業已緩截。本年又復減歇。其行裝等項。俱經預備。於將次出運之時。旋復停運。則所領一半月糧。或不敷用。未免艱苦。著將本年應支月糧。悉行賞給。○調署正藍旗蒙古副都統赫星署正白旗滿洲副都統。

署正白旗滿洲副都統覺羅佛凝義署正藍旗蒙古副都統以監察御史宗室章格署鑲藍旗滿洲副都統添設廣東廣州府佛山鎮同知一員移佛山鎮都司駐大灣千總駐彩陽里五斗口司巡檢駐平洲從廣東巡撫楊永斌請也○戊午諭內閣從前廣東巡撫鄂彌達條奏臺灣地方僻處海中向無城池宜建築城垣礮臺以資保障經大學士等議令福建督撫妥議具奏今據郝玉麟等奏稱臺灣建城工費浩繁請於現定城基之外買備茨竹栽植數層根深蟠結可資捍衛再於茨竹園內造建城垣工作亦易興舉等語郝玉麟不過慮其地濱大海土疎沙淤工費浩繁成功非易故有茨竹藩籬之議殊不知城垣之設所以防外患如必當建城雖重費何惜而臺灣變亂率自内生非禦外寇比不但城可以不建且建城實有所不可也臺郡門戶曰鹿耳門與府治近號稱天險港容三舟

傍皆巨石鋒稜如劍戟舟行失尺寸頃刻沉沒內設礮臺可恃以爲固其法最善從前平定鄭克塽朱一貴皆乘風潮舟行入港水高港平衆艘奔赴無所阻礙大兵一入即獲安平港之巨舟賊無去路而撫其府市人民南北路商賈一聞官軍至絡繹綑載而來相依以自保物力既充軍氣自倍賊進不能勝退無可守各鳥獸散終無所逃遁故旬日可以坐定向使賊衆有城可據收府治人民財物以自固大兵雖入攻之不拔坐守安平曠日相持克敵不易蓋重洋形勢與內地異此即明效大驗固未可更議建置也若謂臺灣築城即以禦臺灣外寇是又不然從前兩征臺灣皆先整兵泊舟於澎湖之南風澳以候風潮風潮之便歲不過一時時不過數日若盜賊竊發或外番窺伺泊舟澎湖則夕至而朝捕之矣至南北二路可通之地雖多然如南路之嵵港北路之八掌溪海翁港鹿仔港中

西二林三林中港竹塹蓬山惟小舟可入其巨港大舟可入者不過南路之打狗中港北路之上淡水其次則北路之笨港鹹水港去府治較遠縱有外寇亦不取道於此備設礮臺派撥汛兵朝夕巡視自足以資控禦今郝玉麟等請於現定城基之外栽種茨竹藉爲藩籬實因地制宜甚有裨益其淡水等處礮臺務須建造各屬並應增修不可惜費省工或致潦草應如何舉行之處著該督撫妥協定議具奏予故陝西寧夏總兵官蕭生岱祭葬如例○己未戶部尚書彭維新緣事解任調兵部尚書史貽直爲戶部尚書仍署理陝西西安巡撫事刑部尚書涂天相爲兵部尚書陞左都御史張照爲刑部尚書安徽巡撫徐本爲都察院左都御史戶部左侍郎俞兆晟緣事解任調工部左侍郎陳樹萱爲戶部左侍郎工部右侍郎趙殿最爲戶部右侍郎戶部右侍郎韓光基爲工部左侍郎○陞

浙江布政使王紘爲安徽巡撫調河南布政使刁承祖爲浙江布政使司布政使陞河南按察使盧焯爲河南布政使司布政使江南太通道張鳴鈞爲河南按察使司按察使果親王允禮等奏言直隸總督李衛奏鄂爾奇一案臣等遵旨審理鄂爾奇所犯之罪例止革職但伊受

皇上重恩有負任使應請加倍治罪得旨鄂爾奇受朕深恩有玷職守大負伊兄鄂爾泰之教訓理宜從重治罪朕念鄂爾泰裨益國家政務甚多以之相抵所請將鄂爾奇加倍治罪之處著從寬免○移福建興化府詹大使一員駐福州府管理常豐倉務其興化府詹務改歸經歷管理從福建巡撫趙國麟請也○免江南泰州常熟金山等二十六州縣衛雍正十年分水災額賦有差○下嫁科爾沁達爾漢親王和碩額駙羅卜臧滾布之郡主故遣官致祭○庚申諭八旗都統等從前令

漢軍人等學習清語。原爲年富力強者言。今八旗過年逾六旬之人。不能清語。概不揀選。則伊等効力年久之處。豈不湮沒。嗣後揀選人員。六十歲以上者。能說清話與否。不必拘定。又諭。各旗補授佐領。例俱開列大臣帶領引見。大臣管理事件甚多。無暇復辦。佐領事務。嗣後著仍將章京等揀選補授。於事有益。如章京等內不得其人。再將大臣等帶領引見。○陞四川巡撫憲德爲工部尚書。轉禮部右侍郎。留保爲左侍郎。陞湖北布政使鍾保爲禮部右侍郎。仍署湖南巡撫。江西巡撫謝旻爲工部右侍郎。貴州布政使常安爲江西巡撫。陝西西安布政使碩色爲陝西西安巡撫。陝西甘肅布政使鄂昌爲四川巡撫。陝西甘肅按察使李世倬爲湖北布政使。司布政使。陝西西安按察使楊祕爲西安布政使。司布政使。雲南按察使馮光裕爲貴州布政使。司布政使。陝西西安驛傳道何師儉爲陝

西西安按察使。司按察使。陝西肅州道齊式爲陝西甘肅按察使。司按察使。廣西蒼梧道徐嘉賓爲雲南按察使。司按察使。實授劉章爲浙江按察使。司按察使。署寧遠大將軍查郎阿奏報。巴爾庫爾塔爾沁圖呼魯克等處屯田收穫青稞。共四萬六千一百石有奇。哈密等處屯田收穫青稞。共四千五百石有奇。下部知之。○辛酉。諭八旗都統等。嗣後承襲世職之年幼子弟。著該旗大臣等加意照看。成全造就。遇大臣等陞轉時。亦必轉諭接任之大臣。此朕特恩。務令年幼子弟均沾實惠。如大臣等有不遵行者。經朕查出。必加倍治罪。○壬戌。諭內閣。各省保送優生。內廩增生。俱准作歲貢。附生。准作監生。入監肄業。其武生。於到部時。禮部考試文藝。兵部考試騎射。具奏請旨。○以兩淮鹽政高斌署江南河道總督。○福建觀風整俗使劉師恕患病解任。裁觀風整俗使缺。○議敘進勦四川瞻

對等賊番功。在事漢土官兵暨陣亡受傷者。加級賞卹有差。○癸亥。以禮部尚書吳襄兼管都察院左都御史事。○添設湖南湘陰縣新市鎮巡檢一員。從原任湖南巡撫趙弘恩請也。○甲子。諭辦理軍機大臣等。前曾令調撥紅郭爾鄂隆處滿洲兵五百名。牧場蒙古兵五百名。烏爾輝音查漢蒙古兵一千名。於來年草發時。遣往北路軍營。今據平郡王等奏請停撥烏爾輝音查漢兵丁。將紅郭爾鄂隆處滿洲兵一千名。並揀選牧馬場察哈爾兵一千名。遣赴軍前。朕思紅郭爾鄂隆軍前。不可不留蒙古兵丁。照看牧場。著將駐劄紅郭爾鄂隆馬場蒙古兵一千名內。調撥八百名。並滿洲兵一千名。遣往大營。令副都統綽爾多。富達禮。公博爾屯管領前往。博爾屯到京後。再赴紅郭爾鄂隆地方。其烏爾輝音查漢蒙古兵內。著揀選四百名。令額駙達爾瑪達都帶領前去。○添設江南安徽寧池太廣

道一員。駐劄安慶。其滁和二州分巡事務歸廬鳳道管理。從陞任安徽巡撫徐本請也。○乙丑。鑲藍旗漢軍副都統高煦年老休致。陞正黃旗叅領金繼祖。為鑲藍旗漢軍副都統。○丙寅。以故忠達公馬禮善子馬賢襲爵。以原任河南按察使陳世倬。為順天府府尹。○實授輔國公愛音圖。為鑲紅旗滿洲都統。○改福建督標水師營遊擊。為叅將。從福建總督郝玉麟請也。○丁卯。刑部左侍郎馮景夏。以病解任。陞左副都御史喬世臣。為刑部左侍郎。翰林院侍讀學士凌如煥。為內閣學士。兼禮部侍郎。○以故一等精奇尼哈番多爾吉孫汪渣爾襲職。○雲貴廣西總督尹繼善題南甸宣撫使刀啟元。於雍正四年病故。子刀恩賜年幼。暫停襲職。今年十六歲。請照例承襲。下部知之。○戊辰。陞理藩院額外侍郎兼鑲紅旗蒙古都統僧格。為理藩院尚書。仍兼管都統事務。○正白旗蒙古都統魏臘。

緣事革職。陞左翼前鋒統領邁祿爲正白旗蒙古都統。大學士等議覆直隸總督李衛疏言。直隸新募之兵二千名。請分爲督標前後二營。每營轄兵一千名。各設遊擊一員。中軍守備一員。千總二員。把總四員。外委千總三員。外委把總五員。俱歸中軍副將統轄。應如所請。從之。○免江西新淦等七縣本年分水災額賦有差。○庚午諭內閣。朕因浙省海塘關係緊要。是以特差大臣會同該督程元章相度形勢。定議興修。又恐在工人員或怠緩稽遲。不能及時建築。特令杭州將軍阿里衮副都統隆昇會同該督等督催辦理。近聞堵塞尖山開挑引河已經查勘數次。尚欲再商。但以行文調取閩省善水之人試探爲辭。議論紛紜。終無定見。全不思海水潮汐有時。若遲至潮水長盛之時。如何施工。且採辦石料。又互相推諉。舍近求遠。致稽時日。該督等既不努力辦工。而阿里衮隆昇亦俱袖手旁觀。

不上緊催辦。若各工內實有難以施工。應奏聞請旨之事。亦應及早奏明。何得半年以來尚無頭緒。著傳諭浙江總督程元章等。速將各項工程及時修築。毋得仍前怠忽。○壬申。孝莊文皇后忌辰。遣官祭昭西陵。○定邊大將軍平郡王福彭奏報。鄂爾昆集爾麻泰等處屯田收穫大麥小麥糜子共八千六百石有奇。扎克拜達里克推河等處屯田收穫大麥小麥共二千一百石有奇。下部知之。○癸酉。諭內閣。雲南元江普洱二府邊境上年猺夷蠢動。今雖地方寧帖。年歲豐收。但夫役頻繁之後。小民輸將力有不逮。所有兩府本年額徵銀兩俱著加恩豁免。○甲戌。諭辦理軍機大臣等。軍前內閣學士阿克敦著辦理扎克拜達里克糧餉事務。○諭內閣。直省州縣重囚輕犯例應分別監禁。不許混雜一處。其餘干連人犯即令取保候審。不得濫行監禁。定例昭然。且朕屢降諭旨。嚴

飭奉行。乃近聞州縣中。有將一切斬絞流徒罪犯混雜監禁。全無分別。並將未經審結之笞杖輕罪。與大案干連人犯。一概混行收禁。獄官禁卒。以流徒杖罪之人。不至於死。可無意外之虞。干連人犯。指日省釋。諒無脫逃之事。因而任其親屬餽送探望。又利其出入之賄賂。不爲嚴禁。此牽彼引。借探視輕犯爲由。代重囚傳遞消息。或密送挖牆斷鎖行兇之具。致令重犯越獄脫逃。種種弊端。總由輕重罪犯混雜監禁所致。著各省督撫嚴飭府州縣等官。務將重囚輕犯。分別監禁。不許混雜。致滋弊端。或間有州縣監獄。房屋甚少。不能分別者。酌量另造數間於監獄之外。以收禁流徒等犯。其杖罪以下。及干連人犯。仍遵照定例。取保看守。毋得濫禁。如不肖州縣。仍蹈前轍。即行叅處。○加浙江乍浦副都統覺羅傳森。都統銜。○乙亥。諭內閣。苗疆地方緊要。道廳缺出。委署各員。每以本管地方。有刑名

錢穀之責。不能長駐於署印地方。以致苗疆乏員彈壓。事件耽延。嗣後苗疆道廳缺出。著該督撫於屬員內。揀選才具勝任之員。令其速赴該地駐劄署理。其本任事件。如不能兼理。即著該督撫酌量遞行委員署理。俟新任官到日。再令各回本任。○鑲黃旗滿洲副都統保明。緣事革職。調鑲黃旗漢軍副都統宗室色布肯。爲本旗滿洲副都統。陞鑲紅旗叅領劉英。爲鑲黃旗漢軍副都統。仍留軍營。○丙子。歲暮。祫祭。

太廟。

上親詣行禮。○遣官祭。

永陵。

福陵。

昭陵。

昭西陵。

孝陵。

孝東陵。

景陵。

孝敬皇后○命

皇四子寶親王弘曆祭太歲之神○旌表八旗

節婦滿洲鈕鈕妻舒穆魯氏等一百二十七

人。蒙古黑色妻巴羅忒氏等八人。漢軍王國

瑞妻夏氏等三十七人。貞女金氏一人。孝子

張瑞一人。直隸各省節婦郎應龍妻田氏等

七百四十九人。貞女葉氏等十七人。孝子李

惻傭等二十四人。孝婦楊氏等二人。各給銀

建坊如例○是歲人丁戶口二千五百四十

一萬二千二百八十九。又永不加賦滋生人

丁九十三萬六千四百八十六。田地山蕩畦

地八百八十九萬四百十六頃四十畝有奇。

徵銀二千九百八十七萬二千三百三十二

兩六錢有奇。米豆麥四百七十九萬三百五

十二石有奇。草五百五十六萬三千一百十

三束。茶三十四萬二千三百五十一引。行鹽

五百二十三萬三千八百五十六引。徵課銀

三百九十八萬八千八百五十一兩有奇。鑄
錢六萬八千四百三十六萬二千有奇。

大清世宗敬天昌運建中表正文武英明寬仁
信毅大孝至誠憲皇帝實錄卷之一百三十八

大清世宗敬天昌運建中表正文武英明寬仁
信毅大孝至誠憲皇帝實錄卷之一百三十九

監修總裁官光祿大夫經筵講官太僕議政大臣保和殿大學士兼兵部尚書總理兵部事務等伯加十五級臣鄂爾泰

總裁官光祿大夫經筵講官起居注太僕兼太子太僕保和殿大學士兼戶部尚書仍兼吏部尚書翰林院掌院

事等伯加十五級臣錢廷玉光祿大夫經筵講官起居注太僕議政大臣武英殿大學士兼工部尚書仍兼

翰林院掌院事加二級臣福敏光祿大夫經筵講官太子太僕東閣大學士兼禮部尚書加六級臣徐承允光祿大夫

經筵講官議政大臣協辦內閣大學士事務禮部尚書仍兼管太常寺勳履寺事加三級等奉

敕修

雍正十二年甲寅春正月戊寅朔

上於宮中拜

神以祈穀致齋命於初九日御殿○順天府進
春○己卯諭諸王大臣等爾諸王大臣以元
旦立春恰遇甲寅年丙寅月戊寅日甲寅時
瑞雪繽紛竟日盈尺考之占書最爲吉祥豐
年可慶爲朕稱賀朕素不言祥瑞降諭至再
至三爾諸王大臣聞之熟矣凡祥瑞者特其
兆耳兆爲吉之先見全在人事贊成凡靈芝
卿雲麟鳳嘉禾之屬皆

天心所以示喜豈得不以爲慶但須君臣益加
修省以祗承庥命果能事事上合

天心則祥乃成其爲祥否則其事尚在未成何
得遽爲稱慶洪範恭之對待曰狂如或因有
嘉兆而不加修省遂侈然自肆則咎徵特在
轉移之間耳祥其可恃乎譬如爾諸王大臣
朕以其人可用許以加恩其人一聞朕旨便
自放縱頓改前操朕亦惟有收回成命加之
以罪豈得更不轉移而仍以恩待乎朕於天
人感應之際信之甚篤知之甚明信之篤是
以一刻不敢自懈自逸知之明是以不憚反
覆申明誥誡詩云天維顯思無曰高高在上
蓋面前虛空即是昊天足履撮土即是大地
如人有七尺之軀拔一毫毛則通體皆知痛
癢豈人於天地之中舉一念行一事而天地
有不呼吸相通者乎作善降之百祥作不善
降之百殃如影隨形如響應谷形谷既存而
以影響爲不可必之數豈不愚昧之甚夫善

者公而已矣。心乎天下國家之謂公。心乎一身一家之謂私。爲大臣者。誠心乎天下國家之公。而不計及一身一家之私。天有不降之百祥者。朕信其必無是理。然則其一身一家之計。正復得則兩得也。苟心乎一身一家之私。而不計及天下國家之公。天有不降之百殃者。朕亦信其必無是理。然則其一身一家之計。亦復失則兩失也。朕雖深信此理。朝乾夕惕。不敢刻忘。然天下國家之事。非朕一身所能獨理。書曰。天工人其代之。朕不能不賴爾諸王大臣之克代天工。則朕固不能已於諄諄訓誡。爾諸王大臣也。人惟無志。則不能自立。而推諉他人。如爲大臣者。以天下國家之事。爲己事。身任之而不辭。一人如是。人人如是。則內外大小諸務。有不事事合宜者乎。如使內而八旗部院。每事諉之叅佐司屬。叅佐司屬。又諉之大臣。外而督撫藩臬。每事諉之府廳州縣。府廳州縣。又諉之督撫藩臬。又

或內則諉之於外。外則諉之於內。皆謂主上自有乾斷。如此。則朕雖朝乾夕惕。亦何由使事事合宜。以仰邀

上天之嘉祥福應乎。今歲元旦。時雪既有其兆。當益加奮勵。朝夕修省。以成此瑞慶。我君臣其共勉之。○庚辰。諭辦理軍機大臣等。公博爾屯著同副都統綽爾多等。帶領紅郭爾鄂隆兵丁。前往烏里雅蘇泰軍營。聽大將軍平郡王調遣。○辛巳。祈穀於

上帝。

上親詣行禮。○壬午。孟春享

太廟。

上命

皇四子寶親王弘曆行禮。遣官祭太歲之神。

○移山西雁平道駐朔平府。就近辦理軍需。從辦理軍需事務。光祿寺卿王棠請也。○癸未。諭辦理軍機大臣等。北路軍營辦理糧餉之原任工部侍郎巴泰。年已衰邁。著回京。○

甲申。

世祖章皇帝忌辰遣官祭

孝陵○諭辦理軍機大臣等據查郎阿摺奏由準噶爾來投之厄魯特巴圖濟爾噶爾稟稱噶爾丹策零欲前來請和或遣準噶爾之人爲使或即用內地之人尚在未定又據賊營脫出投赴北路之人亦稱噶爾丹策零現在行查被獲人等意欲遣還請和等語朕思逆賊欲遣使請和者特爲安輯部人紛擾我軍之計耳定非實意若不准其所請則必傳諭所屬曰我爲爾等業經引罪求和無奈所請不准用以固結士心而使我軍聞之亦以賊請和而不允遂至懈於効力如此姦謀詭計不可不加詳察爾等密咨兩路大將軍賊若遣使前來但諭以朝廷欲偃息甲兵使衆生樂業屢經遣使爾台吉竝無欲和之意每藉端推托今果引罪請和須派親信之人如台吉寨桑等將應行事理詳議前來方爲奏達

乃止令爾等微員及內地微末之人前來未便收納如此曉諭方合事理至我兵進剿之計斷不可因此遲回濡滯仍照常整備相機舉行○丙戌

上御太和殿王以下文武各官及外藩使臣等上表朝賀停止筵宴 朝鮮國王李昫遣陪臣李穡等表賀冬至元旦

萬壽節及進歲貢禮物宴賚如例 戊戌工部

議覆直隸總督李衛遵旨議奏豐潤營田觀

察使陳儀條奏整理營田及薊運等河加修隄岸各款一瀕河沮洳之場如玉田豐潤等處圍田悉爲澍雨淹冒請查明殘缺之處動帑修補一薊運河左瞰玉田右俯薊州隄工最爲緊要請加高培厚一小河爲鴻橋蓋泉二河之會流馬營一帶滙受蓋泉之水舊有民埝一道請加修築并疏濬鴻橋無使淤墊一洵河源出塞外東流與薊運會合南北兩岸竝居險要請設歲修銀兩預備椿埽以爲

搶堵之用。一潮河東岸乃玉田民埝闔邑倚爲保障請加培防護。一還鄉河憑高下注性駛流曲豐玉二邑隄埝多被漫決請設歲修銀兩每年加葺保固。一陡河即館水由灤州入豐潤其流始盛至拾家沽以下河窄流紆兩埝卑薄請悉行展挖即以所挖之土增築兩隄以上各項即於通永道庫存貯銀兩內酌量撥給至豐潤等縣民埝向係民自加修今年秋被偏災民力不支除所用物料動帑備辦外請令地方官各酌給米糧以工代賑後不爲例均應如所請從之。一等阿思哈尼哈番阿爾泰緣事革職以其兄馬爾泰襲替。己亥恩賞各臺站窮乏蒙古銀兩以年歉不收從驛站員外郎達色請也。庚子陞鑲白旗護軍統領博第爲左翼前鋒統領。琉球國中山王尚敬遣陪臣溫思明等上表進貢方物宴賚如例。辛丑以正白旗滿洲都統查爾泰署鑲黃旗漢軍都統陞熱河副

都統佛標爲正白旗滿洲都統。正藍旗蒙古副都統素賚緣事革職以署正白旗蒙古副都統布顏圖爲正藍旗蒙古副都統鑲白旗護軍叅領鄂鼎署正白旗蒙古副都統。大學士等議覆四川總督黃廷桂疏言川省添募新兵一萬名除抽撥兒斯潘州新設營汛兵丁外餘兵六千七百名竝無撥用之處前經陸續議准裁汰今裁剩兵三千名爲數猶多請於此內留兵五百名其餘俱行議裁至原設千把總六十員外委千把總七十五員除撥歸督標及新設協營外所餘千總七員把總十五員竝外委未撥各員均請陸續裁汰應如所請從之。定邊大將軍平郡王福彭摺奏軍中駝馬最關緊要現今喀爾喀扎薩克諸藩臣感戴隆恩莫不竭力辦理如喀爾喀貝勒班第等進獻駝馬猶力請停其賞給價值伏念遠臣當此軍興之際不肯私其所有況臣等宗臣如諸王貝勒貝子公等

皆有馬場滋生馬匹當需用之時而置之閒散無用之地豈不內愧於心即臣家稍淡薄現有馬場滋生馬五百匹情願自送軍前備用伏乞

皇上俯鑒微忱恩准所請竝將臣摺交諸王月勒貝子公等一同閱看臣料諸宗臣等必以臣言爲當踴躍爭先彌切急公之義矣得旨著交宗人府與諸王等閱看（壬寅諭辦理軍機大臣等侍郎渣克旦此次前往喀爾喀車臣汗部落諸事辦理妥協甚屬可嘉著給與尚書銜賞銀五千兩其入官房地人口俱著給還○）以署領侍衛內大臣戶部尚書公慶復爲正白旗領侍衛內大臣仍兼戶部尚書正藍旗蒙古都統哈達哈爲正黃旗領侍衛內大臣仍留軍營○癸卯直隸總督李衛條奏運河應行事宜二款一直隸之故城縣與東省之德州衛并武城縣地界毗聯係河流東注轉灣之處向未築有隄埝防禦一遇

水發瀾漫流溢請勸諭民間僱築土埝量給食米以工代賑一直隸山東運河交接各州縣犬牙相錯彼此混淆遇有命盜等案互相推諉請將從前參差之處勘定立牌并將零星交錯之所撥換清理以專責成從之（甲辰諭內閣據大學士嵇曾筠摺奏臣於三月內料理臣母喪事畢即趨赴河工凡一應修守搶護機宜悉心籌畫查察各工僱辦妥協所有總河印務伏祈仍著高斌管理臣協同保固伏秋兩汛平安霜降後籲懇俯准回籍終制等語河工事務嵇曾筠已經辦理妥協今於料理伊母喪事之後赴工指示機宜則一應工程自可保固平穩著照所請行再嵇曾筠原籍常州距淮安不遠明歲工程亦可就近往來協同經理在伊終制之心既已得遂而河防事務亦大有裨益矣○）以兵部尚書涂天相左都御史徐本戶部右侍郎趙殿最國子監祭酒覺羅吳拜俱充經筵講官（

以內閣學士宗室塞爾赫署大理寺卿

大清世宗敬天昌運建中表正文武英明寬仁
信毅大孝至誠憲皇帝實錄卷之一百三十九

大清世宗敬天昌運建中表正文武英明寬仁
信毅大孝至誠憲皇帝實錄卷之一百四十

敕修

雍正十二年甲寅二月丁未朔遣大學士尹

泰祭

先師孔子○戊申以戶部尚書公慶復管理
三庫事務○大學士伯兼管兵部尚書事鄂
爾泰奏言兵部堂司官朦混造冊冒銷驛站
錢糧得旨驛站奏銷各項銀兩弊端百出從
前兵部堂官何以不行查察鄂爾泰實心任
事方不負為朝廷大臣從來大姦大弊皆由
小事積累而成若能不時留心查核遇有一
毫情弊即行革除何至滋蔓為害此內外大

臣應共相勉勵者著將此摺交各部院堂官閱看鄂爾泰著交部議敘范時繹等著交部察議○改福建建寧協副將爲總兵管轄延平一協楓嶺一營從福建總督郝玉麟請也○已酉諭理藩院鄂爾多斯貝勒達西拉卜坦病故爾等因伊怠忽兵事其子喇錫塞楞議降爵鎮國公但喇錫塞楞深知伊父之罪尚能竭力辦事著封爲固山貝子○江西巡撫謝旻疏報南昌新建等一十九縣開墾雍正十年分田地五十五頃有奇下部知之○辛亥改廣西直隸賓州并州屬之上林遷江二縣俱歸思恩府管轄撥賓州原屬之來賓一縣仍歸柳州府管轄從廣西巡撫金鉷請也○添設山東登州鎮成山衛汛派千總把總各一員戰守兵一百名駐防養魚池海口從河東總督王士俊請也○免直隸通州豐潤等六州縣雍正十一年分水災額賦有差○壬子諭內閣直省關稅監督於地方官原

不相統轄一切呼應不靈且大小口岸甚多監督一人勢難分身兼顧地方文武各員以爲無與已事竝不協力稽查則姦商之隱漏地棍之把持俱所不免嗣後凡有監督各關著該督撫兼管所屬口岸飭令該地方官不時巡查如有縱容滋擾情弊聽該督撫參處至監督徵收稅課及一切應行事宜仍照舊例遵行不必聽督撫節制○又諭聞江南通州濱海地方上年秋收稍歉現今米價昂貴鹽場竈戶謀食維艱將來青黃不接之時尤不可不加賑恤著署總河高斌即將通州鹽義倉存貯之穀酌撥數千石委員分運各場設廠煮賑再行酌量撥運平糶至各場竈戶有現在應徵折價錢糧著一概暫緩至秋成之後再行徵收○又諭刑部右侍郎覺和托朕以其在部甚久由郎中歷陞侍郎乃伊竝不感戴朕恩實心辦事今日以爭論旗務竟與署鑲紅旗滿洲副都統穆敦在乾清門任

意喧鬧及朕詢問穆敦又復巧飾覆奏穆敦人甚卑鄙平日並不實心効力動輒支吾以希微倖覺和托穆敦俱著革職發往軍前効力○癸丑

上御經筵講畢賜大學士九卿詹事及講官等宴○辦理軍機大臣等議奏據統領紅郭爾鄂隆等處兵丁領侍衛內大臣侯馬蘭奏奏稱臣處滿洲兵丁前經奏准調撥一千名前往烏里雅蘇泰大營但此項兵丁沿邊居住

日久馬匹倒斃應用不敷請停其前往將馬場挑選兵一千名全行調撥以收實用應如所奏令公博爾屯副都統綽爾多先行帶領前去再於滿洲兵丁內酌量挑選六百名令額駙多爾機虎副都統富達禮隨後帶往如馬匹等項一時採買不及即令停其派撥從之○甲寅免浙江新城分水二縣雍正十一年分旱災額賦有差○乙卯諭辦理軍機大臣等鑲藍旗蒙古副都統敦巴侯採買馬匹

後協同副都統富達禮帶領滿洲兵丁六百名前往烏里雅蘇泰軍營○丙辰移廣東歸善縣縣丞駐惠州府城欣樂司巡檢駐三棟墟內外二司巡檢駐梁化墟連州朱岡司巡檢駐東陂觀惠來縣神泉司巡檢駐靖海從廣東巡撫楊永斌請也○丁巳

孝康章皇后忌辰遣官祭

孝陵○戊午祭

大社

大稷

上親詣行禮○己未晉封貝子允祐為多羅貝勒○陞奉天府府尹呂耀曾為都察院左副都御史仍管奉天府府尹事○以兩江總督管理江蘇巡撫事高其倬為江蘇巡撫○陞正白旗滿洲副都統署寧古塔將軍杜賚為鑲白旗護軍統領仍署寧古塔將軍○加戶部員外郎蔣蔚翰林院檢討銜提督湖北學政○撤河南南陽鎮撥防浙川縣守備一員

仍歸南陽存城移荆子關把總一員駐防浙川協防浙川外委把總一員駐防荆子關從河東總督王士俊請也○旌表湖北隨州烈婦向紹宗妻涂氏嫠居拒聘赴水捐軀給銀建坊入祠致祭如例○庚申禮部議覆廣東巡撫楊永斌疏言興寧縣民幸登運年一百二歲長子幸伯達八十二歲次子幸伯玉八十歲三子幸伯錦七十八歲四子幸伯旺七十四歲五子幸嘉賓六十七歲一門眉壽千載希逢請予旌表以光盛典應如所請得旨依議幸登運著加賞上用緞一疋銀十兩○辛酉移貴州安南營守備一員帶把總一員兵五十名駐礮子窰撤原防礮子窰千總一員回安南營從雲貴廣西總督尹繼善請也○壬戌

領○大學士等議覆營田觀察使陳時夏奏言文安大城兩縣界內修築橫隄一千五百餘丈本年營田四十八頃俱獲豐收但恐水涸即成旱田請於大隄東南尚家村開建石閘隄內挖河引子牙河之水以資灌溉仍於北岸多開涵洞或添建小閘以資宣洩應如所請從之○大計浙江湖廣山東山西河南四川廣東福建各省官員及河東二省河官卓異官二十二員不謹官三十六員浮躁官十七員罷軟官二十三員才力不及官三十一員年老官五十六員有疾官二十四員分別陞賞處分如例○癸亥春分朝日於東郊

上親詣行禮○甲子諭內閣福建南澳總兵官康陵不諳水師營務且行事乖張屢報出洋並不親往著解任來京其南澳總兵官員缺著福建閩安副將張天駿補授○福建水師提督王郡奏言廈門一島地少人多兵民食

米應爲籌畫查提督衙門有營房魚池等項租銀每年可得五百餘兩請買貯穀石於米價昂貴時照依原價借給俟秋成後買補還項得旨著照所奏行王郡身爲提督將任內應得之項籌濟兵食甚屬可嘉著交部議敘○一等伯馬爾遜緣事革退以其兄阿爾遜襲替○乙丑

上詣

恩佑寺行禮畢幸圓明園○遣翰林院侍讀春

山兵科給事中李學裕致祭故安南國王黎維禔兼敕封故國王嗣黎維祐爲安南國王敕諭曰王朝布化萬邦抒藩翰之忱海宇同風六服永河山之祚奉車書於一統舊服增修綿帶礪於千秋新恩特沛爾安南國王嗣黎維祐南徼分符北廷拱極維屏維翰常遵聲教之頒來享來王克篤忠貞之誼茲當嗣服請命於朝既燕翼之克承光昭令德宜龍光之遐賁寵錫榮褒特封爾爲安南國王爾

其恪守先封虔共爾位懷仁慕義時砥礪夫躬修啟後光前永綿延夫世澤欽哉毋替休命○大學士等議奏浙江海塘工程前奉諭旨令該督程元章等先築土備塘一道堵塞尖山水口漸次改建石塘并於中小壘開挖引河分洩江流以減水勢今據該督奏稱尖山水口勢難堵塞引河亦難於開挖查海塘關係重大其如何捍禦潮勢保護塘工之處自應及蚤商辦乃該督漫無成見遷延愈久成功益難應令該督再於中小壘詳加踏勘如何施工疏濬即令妥確定議具奏至尖山水口實係海塘受惠之由若不急爲堵塞則每年徒費錢糧究於塘工無補亦應交該督等將應用物料預購齊備俟冬初水落設法舉行得旨浙省海塘關係重大固須詳慎尤戒遲疑若總理不肯擔承則分任者愈多瞻顧其何以謀真安而垂永久程元章毫無確見著將海塘一應工程交杭州副都統隆昇

總理令御史偏武前往協辦所需文武工員俱聽隆昇揀調其運辦物料給發錢糧等項仍著程元章料理毋得推諉稽遲○添設貴州黃平州州同一員駐舊州獨山州州同一員駐三脚堡清平縣縣丞一員駐凱里銅仁縣縣丞一員駐松桃普安縣罐子窰驛丞一員威寧州得勝坡巡檢一員黎平府照磨一員裁黎平府屬八舟龍里歐陽新化四土司吏目缺移普安縣原駐罐子窰典史回縣城從貴州巡撫元展成請也○免江南宿州靈璧等四州縣雍正十一年分水災額賦有差○丙寅禮部題故奉國將軍鄂明妻民覺羅氏自二十三歲孀居經今六十五歲守節四十二年請照宗室節孝例賞予銀幣給敕獎諭從之○旌表甘肅固原州烈婦提標左營陣亡守備文理妻王氏聞夫死事投繯盡節給銀建坊入祠致祭如例○丁卯遣官祭歷代帝王○以兵部左侍郎高起協辦步軍

統領事務○移湖北京山縣縣丞一員宜都營外委千總一員駐多寶灣並添設多寶灣把總一員從湖北巡撫德齡請也○戊辰遣官祭

闕聖帝君○諭內閣大學士朱軾從前革職等案俱著開復○刑部議覆湖北巡撫德齡疏言向例以財行求無祿人俱照有祿人減一等而說事過錢者或止照有祿人減一等或照本律遞減二等殊不盡一嗣後以財行求說事過錢照例與受財人同科有祿人概不減等無祿人各減一等儻承審官不依例擬斷將說事過錢之無祿人仍照律減二等者照故出人罪議處再行求說事亦有首從之別請將為首者照例科斷為從者再照有祿無祿聽減一等儻所許財物立議封贈官吏雖未收受亦應向許財之人追取入官并將聽許之人議處應如所請從之○己巳實授傅德為內閣學士兼禮部侍郎○陞正黃

旗滿洲副都統宗室色貝爲正藍旗蒙古都統以承恩公那穆圖爲正藍旗漢軍都統○辛未大學士等議覆河東總督王士俊奏言德州臨清二處地臨水次舟楫可通向經奏准截留南漕二十萬石易穀四十萬石存貯備用但東省民情鮮食大米截留之米易穀甚難請於附近臨德二州等處應徵漕米十萬石改徵穀二十萬石既省運費兼益民生應如所請至該督奏稱東省歷年截存倉穀甚爲充裕現存之米請以酌給兵丁將兵丁應支折色扣存買穀等語恐離倉遙遠之兵概行改給未免跋涉艱難應將沿河標營各兵應支折色就近酌給一半米石即以餉銀買穀還倉盈餘銀兩准作運費殊爲便益從之○兵部議覆四川總督黃廷桂疏言四川保寧府屬廣元一汛向撥川北鎮標守備千總把總各一員兵二百三十名每歲輪流駐防甚爲勞費請酌留把總一員馬步兵五十

名永遠駐劄其餘官兵仍行撤回鎮標應如所請從之○壬申孝昭仁皇后忌辰遣官祭景陵○諭辦理軍機大臣等據大將軍平郡王奏稱塔爾馬善等進剿行至額爾齊斯河地方見逆賊人衆牲畜盡行收去遂領兵暫回所有懦怯不行速進情由已經移咨飭行等語朕思我軍進襲之處逆賊既已探知先行移避即令深入於事何益平郡王移咨飭行殊爲過當軍行紀律甚嚴若以大將軍所諭而塔爾馬善等竟不遵行固屬未便儻勉強前進而擄掠竝無所得方今春令馬匹疲瘦口糧無幾甚爲堪虞斷不得以輕忽貽誤今王之大營現駐迤東離行軍之處甚遠一切軍機所關綦重額駙策凌身在彼地我軍情形逆賊虛實知之必悉嗣後凡調撥進退之處係策凌承辦事件俱聽伊總理著密行知照平郡王及額駙策凌○癸酉理藩院議奏

喀爾喀扎薩克貝勒諾爾布班第不能約束屬人以致搶奪糧石牲畜應行議處今已經病故將其貝勒爵降二等令伊孫旺扎爾承襲爲扎薩克鎮國公從之○移江蘇寶山縣主簿駐高橋上海縣縣丞駐黃家灣華亭縣縣丞駐曹涇就近管理塘工從陞任江蘇巡撫喬世臣請也○貴州巡撫元展成疏報銅仁府界坡東坡西苗民一百六十寨向化輸誠願納糧賦下部知之○恩賞阿祿科爾沁貝勒達克丹等十旗貧乏人等銀兩○旌表四川烈婦建武營故兵權世魁妻王氏夫亡殉節託孤自縊給銀建坊入祠致祭如例○甲戌總督倉場侍郎兆華緣事降調陞內閣學士署大理寺卿宗室塞爾赫爲總督倉場侍郎○駐劄西藏鑲黃旗滿洲都統青保大理寺卿苗壽緣事革職以散秩大臣伯阿爾遜鑲白旗蒙古副都統那蘇泰前往西藏辦理事務○辦理軍機大臣等議奏據定邊大

將軍平郡王奏稱署喀爾喀副將軍印務貝子阿努里因患病不能辦事請遣回遊牧處調治額駙策凌之子台吉成滾扎布明白諳練阿努里員缺請令暫行署理應如所奏從之○旌表正黃旗漢軍烈婦江西廣信府故千總祖松林妻尚氏夫亡投繯從容殉節給銀建坊入祠致祭如例○乙亥以鑲白旗護軍叅領盧保署本旗蒙古副都統○授故輔國將軍察爾弼子諾爾博爲奉國將軍○丙子予故禮部左侍郎舒喜祭一次

大清世宗敬天昌運建中表正文武英明寬仁
信毅大孝至誠憲皇帝實錄卷之一百四十

大清世宗敬天昌運建中表正文武英明寬仁
信毅大孝至誠憲皇帝實錄卷之一百四十一

監修總裁官光祿大夫經筵講官大學士兼兵部尚書理兵部事務臣等謹將

總裁官光祿大夫經筵日講官起居注大學士兼兵部尚書理兵部事務臣等謹將

事三等伯加十三級臣張廷玉光祿大夫經筵日講官起居注大學士兼兵部尚書理兵部事務臣等謹將

翰林院掌院事加級臣福敏光祿大夫經筵講官太子太保東閣大學士兼禮部尚書加六級臣徐本光祿大夫

恩道講官議政大臣協辦內閣大學士事務禮部尚書仍兼管太常寺鴻臚寺等臣三泰等奉

教修

雍正十二年甲寅三月丁丑朔諭內閣范時

臣等謹將

繹由旗員歷任內外顯職朕念其為勲臣之
後逾格加恩實冀其追思伊祖為國家竭忠
宣力紹述家聲豈料伊在江南任內居心詐
偽辦事瞻徇吏治官方毫無整飭鹽梟巨盜
縱令遠颺甚至與姦宄不法之徒私相往來
曲為袒護情弊敗露朕猶諒其愚昧而保全
之復用為北河總督予以自新之路乃當伏
汎危險之時袖手旁觀將國計民生視同膜
外朕知其不可外用降旨切責撤回京師仍

念范氏子孫現爲大員者甚少。范時繹屢經獲罪之後。定感朕三宥之恩。痛自奮勵。以圖後效。因仍用爲工部尚書。兼管兵部事務。今復將一切部務。巧於推諉。玩愒性成。全不實心効力。是朕屢加特恩。而不知感。伊屢獲重罪。而不知愧。誠可謂下愚不移。非尋常疎忽之咎可比。范時繹著革退尚書職任。以爲負恩溺職者戒。○以鑲藍旗護軍叅領法保署鑲黃旗漢軍副都統。鑲紅旗叅領伊蘭泰署

本旗蒙古副都統。○戊寅清明節。

上詣

恩佑寺行禮。○遣官祭

永陵。

福陵。

昭陵。

昭西陵。

孝陵。

孝東陵。

景陵。

孝敬皇后。○大學士等議覆杭州副都統隆昇疏奏。浙江海塘工程奉旨命臣總理。查得河莊等山之東首。舊有南港河一道。舟楫可通。今西首沙淤者。僅一十五里。挑挖甚易。所費亦輕。據旗員兵丁等踴躍爭先。情願効力。理合奏聞等語。應如所請。令隆昇酌量募夫。施工開挖。無庸資藉。駐防兵力可也。從之。○己卯。辦理軍機大臣等遵旨議奏。據署寧遠大將軍查郎阿疏。奏江寧副都統阿克山。荊州副都統觀音保。玩愒性成。罔知法紀。所管馬匹陸續倒斃。走失幾及十分之八。業經三令五申。皆置不問。明係有心玩誤等語。查馬匹乃軍行第一急需。該副都統等。於去年出口時。各領贖力壯健之馬。值青草發生之時。而塔爾那沁又水草敷腴之地。乃敢漫不經心。以致虧損如此。衆多。應按律治罪。再觀音保從前領兵赴陝。道經豫省。即縱兵踐踏田禾。

自陝赴肅違例多支料豆出口之後不能約束兵丁一任迷失無踪今又將馬匹倒斃走失所存無幾視軍令爲兒戲尤屬可惡應即行正法以儆將來阿克山亦應擬斬監候秋後處決得旨觀音保著即在軍營正法阿克山依擬應斬著在已爾庫爾城內通衢枷號秋後處決○刑部議覆廣東按察使張渠疏言直省竊盜之案宜分別夥黨之多寡併有無執持器械以定情罪請嗣後三人以下手持兵器行竊者雖不得財即杖六十徒一年得財一兩以下遞加一等至滿貫論絞其中有不持兵器者仍照本律科斷四人以上雖不得財亦無器械爲首者徒一年爲從者各杖一百得財一兩以下以次遞加爲首者發邊衛充軍爲從者流三千里若夥衆至六人以上不論曾否得財首從並徒三年計贓重於徒三年者爲首者流三千里爲從者各減一等贓至滿貫爲首者絞爲從者發邊衛充

軍至十人以上不分首從並發邊遠充軍贓滿貫者仍絞再竊盜至十人以上地方官有疎防諱匿等案俱照強盜例處分應如所請從之○移福建漳州鎮標左營守備一員把總一員兵一百名駐南勝從福建總督郝玉麟請也○辛巳命江西巡撫常安進京陛見○兵部議覆雲貴廣西總督尹繼善疏奏黔省九股新開苗疆善後事宜八款一、台拱舊營地基窄狹請改建於歐家寨地方以收形勢之勝一、九股地方遼濶前議駐兵一千尚覺單弱請再添兵二千將台拱營改爲一鎮移清江鎮總兵官駐劄置中左右三營設遊擊三員守備三員千總六員把總十二員酌量分駐下東稿貢等處以通鎮遠聲勢清江請改爲一協設副將一員統率原設左右兩營官兵一、台拱既議設鎮請將清江同知移駐其地清江既議改協請於鎮遠府添設理苗通判一員駐劄清江撫戢苗夷其天柱縣

縣丞應行裁汰添設施乘縣主簿一員分駐台拱以備同知任使。台拱糧運緊要查歐家寨前有河一道可以直通下秉請委員確估速加疏濬以利輓輸。台拱增駐之兵若新募充補技藝生疎請於各鎮協營兵內擇其精壯熟練者抽撥充補以資緩急。從前焚勦各寨不無逃匿山箐之人請將現在拋荒之田遍行曉諭令其復安故業。一凡股地方雖增設官兵多方化導猝難收效請將苗寨界址清查於舊有頭目內擇其良善老誠者按寨大小酌定鄉約保長甲長令其管約稽查。一古州清江地界相連中多險峻應於適中朗硎地方分設塘汛并令文武官弁巡行化誨均應如所請從之。○禮部右侍郎史在甲以病乞休允之。○調貴州清江總兵官卜萬年爲貴州台拱總兵官。○壬午調盛京戶部侍郎葛森爲刑部右侍郎。陞署太僕寺卿官保爲盛京戶部侍郎。○免直隸滄州興

國等十四州縣鹽場竈地雍正十一年分水災額課有差。○癸未實授黃錫申爲廣東左翼總兵官。○下嫁科爾沁扎薩克達爾漢親王和碩額駙羅卜臧滾布之郡主故遣官致祭。○甲申。

上回宮。○乙酉以翰林院侍讀學士習寯國子監司業王安國俱充日講起居注官。○丁亥上親耕耤田詣

先農壇致祭畢更服至耕所仍行四推禮畢上御觀耕臺命顯親王衍潢莊親王允祿裕親王廣祿行五推禮吏部右侍郎阿山戶部尚書慶復禮部尚書三泰兵部右侍郎高起刑部左侍郎盛安工部左侍郎韓光泰都察院左僉都御史邵基通政使司通政使佛保大理寺少卿何宗韓行九推禮各以次耕如儀上御齋宮順天府官員率耆老農夫行禮畢至耕耤所農夫終畝王以下各官行慶賀禮賜茶停止筵宴。○戊子。

上幸圓明園○辛卯諭吏部今日引見各部郎中。其中多有年老昏憤者。著傳諭各部堂官。將滿漢郎中員外內有年老不能辦事之人。秉公甄別。據實舉出。該堂官帶領引見。以翰林院檢討色通額。充日講起居注官。編修佟保。鄂敏。俱署日講起居注官。壬辰戶部議覆四川總督黃廷桂疏言。建昌府屬兒斯瓦尾等堡番民額徵糧米。從前因無文員。歸於冕山營徵收。今七兒堡已設同知。請將徵收番民米石。即令該同知管理。應如所請。從之。○禮部議覆提督順天學政吳應棻疏言。八旗生員。遇歲科試期。如果駐防隨任。及實係患病。一時不能赴考者。應令各本旗查明。知照學臣。飭發教官造冊。以便稽查。儻有規避。照例除名。該管各官扶同徇隱者。照徇庇例議處。應如所請。從之。○移湖廣恩施縣戎角塘把總一員。駐東鄉。從湖廣總督蕭柱請也。○癸巳。陞鑲白旗護軍叅領官保。為本旗

蒙古副都統。○甲午。

上詣

恩佑寺行禮。○河東總督王士俊題。故明烈婦河南靈寶縣生員李明龍妻陳氏。李明沆妻季氏。李明夔妻張氏。於流寇陷靈寶時。一門妯娌。俱縫衣不辱。赴井全貞。請予旌表。以闡幽光。從之。○丙申。刑部議奏。參革河南學臣俞鴻圖。受賄營私。應擬斬立決。得旨。俞鴻圖著即處斬。學政科場。乃國家興賢育才之要。政關係重大。十餘年來。各省試官。不聞有婪贓敗檢之劣迹。朕心頗喜。以為試事漸次肅清。今觀俞鴻圖。贓私累萬。則各省學政之果否澄清。朕皆不敢深信矣。蓋學政與督撫同在一省。學政之優劣。督撫未有不深知者。祇因督撫有所請託。分潤代為隱瞞。朕復何從而知之。嗣後各省若有考試不公。徇情納賄者。經朕訪聞。除將學臣從重治罪外。該督撫亦必照溺職例。嚴加處分。○禮部議覆提督

貴州學政晏斯盛疏言南籠府屬永豐州久經建治設學請將土籍文童生歲科各取進四名又黎平府之古州雖未設學而苗民繁庶頗知向學請擇其文理明順者量取一二名附入府學苗童之後以示鼓勵均應如所請從之○賑濟江西新淦等五縣水災饑民○丁酉諭內閣據提督順天學政吳應榮奏稱前經摺奏八旗歲考不到生員一事原爲清查規避起見但恐旗人借端苛索高下其手或現在京師亦混稱駐防隨任或已經考過仍不放回原處仰懇敕下八旗轉行申飭秉公稽查等語吳應榮原奏本以杜規避之端而旗人或借此生事亦未可定著各該都統轉飭叅領佐領秉公稽查有徇情朦混及需索苦累等事該都統即行糾叅○移湖南鎮寧鎮屬池河營守備駐新寨竝添設把總一員兵二百名其新寨小汛弁兵移駐池河營從署湖南巡撫鍾保請也○旌表烈婦直

隸涿州范文明妻劉氏矢志殉夫投繯殞命江蘇吳江縣張樹勲妻趙氏夫亡服闋仰藥捐軀浙江海寧縣顧廷芳妻朱氏遇暴不辱赴水全貞安徽桐城縣唐雲仙妻王氏河南濬縣郭太曾妻寇氏俱強姦不從自縊完節河南汝州劉得賢妻蕭氏貴州平遠州劉起沛妻孟氏俱守正拒姦被刃殞命烈女江蘇江陰縣陸繩武聘妻夏氏楊安基聘妻孫氏宿遷縣臧高飛聘妻高氏邳州陳天珪聘妻王氏湖北漢陽縣陳御兆聘妻胡氏河南祥符縣田登路聘妻張氏虞城縣耿曰璞聘妻薛氏滑縣李大小聘妻趙氏俱未婚夫殞聞訃投繯各給銀建坊入祠致祭如例○戊戌陞都察院左都御史徐本爲工部尚書○兵部議覆山西巡撫署理提督印務覺羅石麟疏言大同鎮屬標營向因地當邊隘額設兵數原多嗣於雍正九年復議添兵五千名舊設者或操防有餘新增者或無需調遣自宜

因時隨地酌量議裁。查大同鎮四營應裁兵一千名。殺虎協裁千總二員。把總四員。兵四百名。朔平營裁參將一員。守備一員。千總一員。把總三員。兵七百三十名。改設都司一員。茹越營裁守備一員。兵九十名。改設把總一員。陽方口裁守備一員。兵一百三十名。改設把總一員。其破魯堡把總一員。兵七十九員。賈家堡把總一員。兵四十五名。永興堡把總一員。兵六十七名。車道場把總一員。兵三十九名。寧武營兵一百三十一名。偏關營兵一百五十九名。老營營兵一百三十三名。保德營兵二十四名。均應裁汰。應如所請。從之。刑部議覆。叅革河南學政俞鴻圖婪贓累萬。伊父戶部侍郎俞兆晟平日不能教子。及家人曹楷來往京中會銀。而俞兆晟懵然罔覺。應降二級調用。得旨。俞兆晟向來品行不端。與李維鈞結為姻親。又依附年羹堯門下。皆朕所深知者。因伊痛自悔過。辦事尚有才幹。用

至戶部侍郎。自怡賢親王仙逝。復萌故智。弊端種種。將王數年苦心整理之成規。任意更張。甚屬可惡。今伊子俞鴻圖納賄婪贓。紊亂學政。非尋常私弊可比。伊有此逆子。豈真一無見聞。而欲脫然事外乎。刑部審理時。祇引失察家人子弟之條。希冀從輕完結。大徇情面。著將刑部堂官。交都察院嚴察。俞兆晟著革職。令刑部秉公嚴審。定擬。儻仍瞻顧徇隱。朕必親審。以明此案。將承審官自有另行處治之道。○己亥。定八旗副參領俱為正四品。○陞內閣侍讀學士兼禮科給事中岱奇為內閣學士兼禮部侍郎。○雲貴廣西總督尹繼善奏報官兵進勦普思逆夷大捷情形。得旨。普思一帶土賊猖狂。皆前歲漏網之賊首。自號神仙。迫脅夷民。煽惑滋擾。今總督尹繼善檄飭各路將弁周儀等。剋期進勦。擒斬首惡。神仙喃奔等二百餘名。招出投誠。夷民八千餘名。尚有賊首召補達等三名。及其餘黨

竄匿未獲。攸樂思茅一帶悉已蕩平。尹繼善悉心調度。俱屬妥協。自應乘此軍威。將首惡盡殲。餘黨盡掃。以期一勞永逸。至擒獲賊首。當即行正法。其眷屬即行分賞。投誠之衆。急宜撫綏。脅從之徒。量加懲治。凡事每懈於垂成。忽於既定。尹繼善甫制滇南。雖心力俱強。而威信未立。此舉實關三省籌畫。非僅爲元新普思計也。可傳諭尹繼善知之。河東總督王士俊題原任河道總督陳鵬年清勤任事。於豫省河務著有成績。請入豫省賢良祠。以申報享從之。烏朱穆泰親王色登敦多卜故遣官致祭。庚子。陞鴻臚寺卿德福爲大理寺卿。辦理軍機大臣等議奏喀爾喀公葛木丕爾於上年冬月嚴寒之時率領官兵過阿爾泰山嶺。開通雪路百餘里。深入賊境。直抵察罕胡濟爾等處。賊衆驚潰。拋棄輜重。四路奔逸。當經擒獲賊夷男婦人口及馬匹牲畜等物。因賊既遠遁。振旅還師。甚屬効

力。應行文定邊大將軍平郡王副將軍額駙策凌等將葛木丕爾等功績註冊議敘。從之。○吏部議覆貴州巡撫元辰成疏言貴東貴西二道及安順都勻等府廳州縣係苗疆最要之缺。向經題准俸滿三年即予陞用。其冊亨州同羅斛州判雖係佐雜。均有錢糧命盜專責。實與州縣不殊。又永豐州吏目及南籠府經歷亦係共處烟瘴。事同一體。請將四缺均照苗疆要缺之例。三年俸滿即陞。應如所請。從之。○厄魯特貝子沙畢多爾濟故遣官致祭。○辛丑。以署鑲藍旗滿洲副都統宗室章格爲正黃旗滿洲副都統。○陝西寧夏將軍卓鼎緣事革職。以直隸天津都統阿魯爲陝西寧夏將軍。前往巴爾庫爾軍營統領西安寧夏滿洲兵丁。以傅泰仍署陝西寧夏將軍。正白旗蒙古都統邁祿署直隸天津都統。○癸卯。諭內閣。署正藍旗蒙古副都統兼內閣額外學士覺羅佛凝義人甚平常。不稱內

閣學士之任不必在學士內行走○添設廣東龍川縣老隆司巡檢一員從廣東總督鄂彌達請也○甲辰諭辦理軍機大臣等副都統管承澤本非無能之人乃竝無黽勉之心鑽營怠忽情殊可惡著革職在西寧城內枷號○改直隸晉州及州屬之無極藁城二縣定州屬之新樂縣俱仍隸正定府管轄分保定府屬之深澤縣隸定州管轄添設正定府平山縣洪子店巡檢一員從直隸總督李衛請也○改貴州黎平府屬之天柱縣歸鎮遠府管轄添設鎮遠縣縣丞一員分駐印水司從貴州巡撫元展成請也○乙巳調河南南陽總兵官馬世龍為山東登州總兵官山東登州總兵官冉起鳳為河南南陽總兵官○吏部議覆陞任四川巡撫憲德疏言凡各省直隸州所理案件先經題准令歸該管道員就近審轉今查川省之潼綿眉印資達嘉等州去道治遙遠與就近之例不符至瀘茂忠

三州雖近道治而該道週巡地方審解事件不免守候稽遲請仍照舊例徑行解司審轉應如所請從之

大清世宗敬天昌運建中表正文武英明寬仁信毅大孝至誠憲皇帝實錄卷之一百四十一

大清世宗敬天昌運建中表正文武英明寬仁
信毅大孝至誠憲皇帝實錄卷之一百四十二

監修總裁官光祿大夫經筵講官太僕寺卿兼兵部尚書總理兵部事務三等伯加十五級臣鄂爾泰

總裁官光祿大夫經筵講官起居注太僕寺卿兼兵部尚書總理兵部事務三等伯加十五級臣鄂爾泰

事三等伯加十三級臣張廷玉光祿大夫經筵講官起居注太僕寺卿兼兵部尚書總理兵部事務三等伯加十五級臣徐本元

翰林院掌院事加二級臣福敏光祿大夫經筵講官太子太傅兼兵部尚書總理兵部事務三等伯加十五級臣徐本元

經筵講官議政大臣協辦內閣大學士事務禮部尚書仍兼管太常寺鴻臚寺事務臣三泰等奉

較修

雍正十二年甲寅夏四月丙午朔享

太廟

上命

皇四子寶親王弘曆行禮○山西巡撫覺羅石麟疏報汾州府介休縣上堡村向有水泉三處今於舊泉之外連湧新泉六處又有泉從井口湧出俱各水清味甘共可灌地一千七百六十餘畝上堡村有水神廟一座請加修葺以答靈貺下部知之○丁未兵部等衙門議覆湖廣總督邁柱奏言容美宣慰土司田

旻如行事姦狡賦性狂妄濫給劄付私徵錢糧制度僭越擄掠鄰近土民種種惡蹟罪不容誅經臣臚列糾叅蒙恩旨暫停革職審擬令其來京詢問詎意抗違不出假撫恤荒民之名具摺誑奏寬限兩月藐抗如故且移居平山寨作狂悖負隅之舉闔司土民見其不法恐干天討投出者共有五百七十餘人又有石梁司長官張彤砬先率土民投繳印信令箭其不能投出之土衆又計誘田旻如出洞催令起程旻如自知衆怨親離投繯自縊按其情罪未足蔽辜伊子弟俱非善類難以承襲請將容美司改土歸流俾土衆早登衽席應如所請將田旻如原領敕書印信號紙繳部查銷其一切善後事宜應令該督妥協辦理從之○予福建臺灣南路陣亡受傷弁兵守備張玉等恩廕祭葬賞賚有差○庚戌湖北巡撫德齡疏報漢陽等五縣開墾雍正十年分田地二百頃有奇下部知之○辛亥

諭辦理軍機大臣等。前據署大將軍查郎阿等叅奏。副都統阿克山。觀音保。將江寧荊州滿兵馬匹。任其倒斃走失。應請革職分賠。朕因觀音保前年領兵赴陝。道經豫省。漫無紀律。今又將各項馬騾。有心怠誤。是以特降諭旨。令廷臣議將觀音保。即於軍營正法示衆。因觀音保所犯情罪。非止一端。原不僅爲馬匹。故與阿克山枷號治罪之處。畧有區別。殺一人以儆其餘。則所全實多。今查郎阿等不達朕意。奏稱觀音保。阿克山所屬官兵。久居南方。初來塞外。不知牧馬之法。致令倒傷較之畏葸退縮。偷竊抵換者。微有差別。可否格外施恩。將觀音保。阿克山。暫停正法。俱在軍營通衢枷號。俾將弁觸目儆心。等語。查郎阿既如此陳奏。著照所請。將觀音保。暫停正法。同阿克山一併在軍營枷號。秋後處決。將此諭旨曉諭闔營將弁兵丁知之。○壬子。加直隸獨石口副將任懷德總兵銜。前往北路軍

營。○署寧遠大將軍查郎阿等摺奏。臣等奉旨揀選賢能之員。委署江寧荊州兩營副都統。查有發往軍營効力。原任副都統黑色。軍前文登營副將查爾扈二員。俱實心効力。奮勉向前。可以署理副都統。管領兩營兵丁。得旨。查爾扈。著補授湖廣荊州副都統。黑色。著署江南江寧副都統。○甲寅。實授赫星。爲正白旗滿洲副都統。○正紅旗漢軍副都統黃秉鉞。緣事革職。以一等侯田存德爲正紅旗漢軍副都統。○旌表烈婦直隸固安縣王順宇妻王氏。山東金鄉縣程正善妻孫氏。河南息縣王紹基妻甯氏。廣東順德縣韓罕言妻何氏。俱強姦不污。自縊殞命。各給銀建坊。入祠致祭。如例。○乙卯。諭內閣。朕御極以來。於滿漢人材。廣開登進之路。冀收得人之效。是以雍正元年。定有滿洲亦准考試武場之例。今思滿洲弓馬技勇。遠勝漢人。將來行之日久。必至科場前列。悉爲滿洲所占。而滿洲文

藝不及漢人又恐考試內場時不免有傳遞
代作等弊於作養人材之道未有裨益著行
停止○陞一等侍衛法諸納爲正紅旗漢軍
副都統仍留軍營以正黃旗叅領李禧署正
紅旗漢軍副都統○兵部議覆山西巡撫覺
羅石麟疏言山西新平得勝等路邊外地廣
民稠實屬緊要請於高廟子地方設衛守備
一員衙門口地方設衛千總一員歸大同府
管轄赤不漢契地方設衛守備一員後營子
地方設衛千總一員歸朔平府管轄應如所
請從之尋定高廟子新設衛曰豐川衛衙門
口所曰鎮寧所赤不漢契衛曰寧朔衛後營
子所曰懷遠所○丁巳諭宗人府禮部向來
定例宗室犯枷責罪者俱准折贖覺羅犯枷
責罪照平人例完結朕思覺羅亦係宗室悉
照平人例處分則宗室覺羅迥然各異而與
平人絕無辨別又宗室犯枷責罪者如概令
折贖伊等亦不知儆懼嗣後宗室覺羅若犯

枷責之罪應酌其罪犯輕重即在宗人府或
拘禁或鎖禁分別年限期滿釋放以抵其罪
庶覺羅處分與平人有別而宗室亦知儆戒
矣其如何酌量罪犯輕重分定年限之處著
宗人府會同該部定議具奏尋議有職宗室
覺羅嗣後犯笞杖罪者仍照定例會同各該
部降罰治罪其閒散宗室覺羅嗣後有犯鞭
笞罪者分別鞭笞之數革去每月應領錢糧
以抵其罪笞一十二十者革錢糧一月三十
者兩月四十者三月五十者四月至鞭六十
者六月七十者七月八十者八月九十者十
月一百者一年若犯徒罪者均照八旗人等
折枷號日期分別拘禁枷號二十日者在宗
人府拘禁四十日二十十五日者拘禁五十日
三十日者拘禁六十日三十五日者拘禁七
十日四十日者拘禁八十日其犯軍流等罪
者悉照旗人軍流應折枷號日期在宗人府
鎖禁統俟滿日釋放以抵其罪從之○以陝

西花馬池副將米國正署陝西延綏總兵官
○旌表四川迷易所烈婦沈英妻周氏強姦
不從自刎殞命給銀建坊入祠致祭如例○
戊午諭吏部各省卓異人員俱有現任地方
之責每當大計之年理應先行具本候旨敕
交部院查議其與例相符應准卓異者奏聞
令其進京引見如與例不符不准卓異者候
朕酌量應令引見與否再降諭旨著為定例
○改山東曹東道為管河道專管通省黃運
兩河事務所屬曹州改歸兗莒沂道管轄東
平州改歸濟東道管轄從河東河道總督朱
藻請也○己未諭步軍統領番役錢糧朕已
每月加添恩賞嗣後仍有勒索妄為等事察
出定行正法○直隸河道總督顧琮疏報永
定一河全賴下口深通庶上流得以暢注入
淀乃洶河以南漸積填淤正議挑濬疏通以
資宣洩仰蒙

天賜引河開刷二十餘里有四千餘丈之遠不

勞民力悉出天工顯著嘉祥萬民懽忭得旨
朕因畿輔河渠關係重大時時軫念莫釋於
懷今於河臣籌議挑濬疏通之地仰蒙

天賜引河自然開刷不勞民力順軌通流河神
福佑羣生功用顯著應虔展祀以答靈貺

○壬戌

孝端文皇后忌辰遣官祭

昭陵○癸亥調鑲藍旗蒙古都統查克旦為本
旗滿洲都統仍留軍營以領侍衛內大臣英

誠公豐盛額署鑲藍旗滿洲都統陞正黃旗
滿洲副都統法喀為本旗滿洲都統鑲黃旗
叅領哲爾金為正黃旗蒙古副都統○甲子
諭內閣各省府廳州縣俱有地方民社刑名
錢穀之責不應無故赴省謁見上司擅離職
守是以律例定有處分朕復屢加訓飭通行
禁約聞近年以來此習尚未盡除良由庸陋
屬員以奔競趨承為務往往借稱公事逗留
省會冀博上憲之歡心而無識之督撫亦或

習而不察。不知已蹈曠官之咎矣。地方事務有應調取屬員赴省辦理者。該督撫自有酌

量。若本官任內之事。必應面見督撫。口稟者。

本不常有。其他或用文書稟帖。皆可通達事

情。候批指示。何必遠離職守。僕僕道途。以致

公事廢弛。詞訟淹滯。至於賀節祝壽。尤屬有

損無益之虛文。若該督撫以此相尚。俾屬員

等爭先恐後。則其人之識見可知。又何能勝

督撫之任耶。著再行曉諭。倘有仍蹈前轍者。

經朕訪聞。將屬官上司。一併嚴加議處。○福

建按察使李王鉉年老休致。陞福建糧儲道

張廷枚。為福建按察使。司按察使。○添設江

南通州州同一員。駐河基鎮。改崇明縣大安

司巡檢。為三角等九沙巡檢。隸通州管轄。移

狼山鎮右營千總一員。兵三十名。駐官河。從

陞任江蘇巡撫喬世臣請也。○乙丑。

上御製

歷代帝王。

關聖帝君。都城隍廟碑文。建亭告成。

上命誠親王允祕。祭

歷代帝王。

皇四子寶親王弘曆。祭

關聖帝君。皇五子和親王弘晝。祭都城隍廟。

○命康良親王傑。書子輔國將軍巴爾圖襲

封和碩康親王。封故康親王崇安子永恩。為

多羅貝勒。○丙寅。禮部議覆。順天學政吳應

茶疏言。定例歲科兩試。文武童生。先由本縣

考取。造冊送府。該府再行考試。惟宛平大興

兩縣童生。向例止憑審音。並不衡文。以定去

取。嗣後請照例。由縣審音。再行考試。造冊送

府。庶例歸畫一。而假冒頂替之弊。亦可永除。

應如所請。從之。○丁卯。陞吏部右侍郎孔毓

璣。為都察院左都御史。工部右侍郎常有緣

事降調。陞內閣學士傅德。為工部右侍郎。俱

仍留軍前辦事。以兵部尚書涂天相。兼管都

察院左都御史事。禮部左侍郎留保。兼管工

部右侍郎事○署江西南昌總兵官陳王章緣事革任陞福建興化副將李蔭樾為江西南昌總兵官○予勦平廣西鄧橫賊蠻立功病故之潯州府知府楊正輔太平府江州土知州黃錫璋各廕一子入監讀書○己巳以翰林院侍講學士錢陳羣充日講起居注官○旌表烈婦直隸宣化縣薛宗州妻楊氏河南安陽縣盧祿妻王氏俱守正拒姦被刃殞命各給銀建坊入祠致祭如例○庚午諭大學士等朕於一切器具但取樸素適用不高華麗工巧屢降諭旨甚明從前廣東曾進象牙蓆朕甚不取以為不過偶然之進獻未降諭旨切戒今則獻者日多大非朕意夫以象牙編織為器或如團扇之類其體尚小今製為座蓆則取材甚多倍費人工開奢靡之端矣著傳諭廣東督撫若廣東工匠為此則禁其毋得再製若從海洋而來從此屏棄勿買則製造之風自然止息矣○陞江西布政使

宋筠為奉天府府尹調浙江布政使刁承祖為江西布政使司布政使陞浙江鹽驛道張若震為浙江布政使司布政使○移江西九江協都昌縣汛千總外委千總各一員兵三十名駐建昌歸南康營管轄南康營建昌汛外委把總一員兵三十名駐都昌歸九江協管轄從署兩江總督趙弘恩請也○辛未諭辦理軍機大臣等準噶爾投順之勞章伊特根兒袞楚克等攜帶妻子百餘口抒誠來降殊屬可憫今天氣炎熱即令護送來京路途勞苦著派理藩院筆帖式一員攜帶衣服綬疋等物迎往曉諭賞賜令其退回會同伊等妻子由驛站緩行護送至察哈爾地方該總管等加恩賞賜產業牲畜俟辦理居定後將為首之人調京引見○命呼倫貝爾地方管轄索倫巴爾虎兵丁前鋒統領博第來京調北路軍營內大臣永福統轄呼倫貝爾地方兵丁○予故領侍衛內大臣拉錫祭葬如例

○旌表直隸蒙城縣烈婦孫紹卿妻岳氏拒
姦不辱投井殞命給銀建坊入祠致祭如例
○癸酉諭內閣五城司坊等官各有管轄之
地越界拏人固不免滋擾然路遇鬪毆酗酒
拐騙嚇詐之徒若因地非管轄遂置而不問
以致逃遁無踪亦非稽查整飭之道似應不
論何地皆准其拘執移送該城司坊官聽詳
該御史審訊發落至曖昧隱僻不法等事雖
訪問的確猶非刻不可緩則准其密詳該城
御史查拏竝密詳本城御史存案如此庶無
推諉亦不致攙越應如何定例飭行之處著
九卿議奏○陞廣東布政使甘汝來爲禮部
右侍郎廣東按察使張渠爲廣東布政使司
布政使調廣西按察使耿麟奇爲廣東按察
使司按察使陞雲南迤東道黃士傑爲廣西
按察使司按察使○定邊大將軍平郡王福
彭等摺奏據定邊左副將軍超勇親王額駙
策凌等呈稱雍正十一年續到奉天兵丁二

千名派領侍衛內大臣薩穆哈副都統白爾
赫圖管領今薩穆哈已授爲大將軍參贊往
烏里雅蘇泰軍營止有白爾赫圖一人凡遇
征勦調遣必需督管大臣實屬不敷查有軍
前刑部員外郎紀山爲人老成明白善能約
束仰祈

皇上給副都統職銜令與白爾赫圖分管奉天
兵丁等語理合代奏伏候

聖鑒得旨紀山著給副都統職銜與白爾赫圖
管領奉天兵丁○甲戌歸化城都統丹晉疏
奏吳喇忒鎮國公達爾瑪機里第等屬下遊
牧地方於去冬雪大風寒人畜傷損蒙

皇上遣理藩院郎中文保等按戶賑濟查明小
大共一萬五千三百八十五口賑濟六月共
米七千二百四十石一斗各扎薩克親身分
散貧窮蒙古共沐

皇恩謹造清冊送部查核下部知之

大清世宗敬天昌運建中表正文武英明寬仁
信毅大孝至誠憲皇帝實錄卷之一百四十二

大清世宗敬天昌運建中表正文武英明寬仁
信毅大孝至誠憲皇帝實錄卷之一百四十三

監修總裁官光祿大夫經筵講官太僕議政大臣保和殿大學士兼兵部尚書總理院部事三等伯加十三級臣鄂爾泰

總裁官光祿大夫經筵日講官起居注太僕東太子太保保和殿大學士兼戶部尚書仍兼吏部尚書翰林院掌院

事三等伯加十三級臣張廷玉光祿大夫經筵日講官起居注太僕議政大臣保和殿大學士兼工部尚書仍兼管

翰林院掌院事加二級臣福敏光祿大夫經筵講官太子太保東閣大學士兼禮部尚書加六級臣徐本光祿大夫

經筵講官議政大臣協辦內閣大學士事務禮部尚書仍兼管太常寺鴻臚寺事臣三泰等奉

敕修

雍正十二年甲寅五月丙子朔以原任甘肅

實錄卷一百四十三

布政使諾穆圖協同駐劄哈爾海圖都統覺

羅伊禮布辦理軍務○丁丑以鑲黃旗叅領

覺羅蘇爾泰署鑲紅旗滿洲副都統○增設

口外朝陽溝哈朗灰達巴漢等處巡哨兵丁

八十名領催八名從圍場總管朋蘇克請也

○戊寅

孝誠仁皇后忌辰遣官祭

景陵○己卯調署鑲紅旗蒙古副都統額爾圖

署鑲藍旗滿洲副都統以一等侍衛阿蘭泰

署鑲紅旗蒙古副都統○兵部議覆湖廣總督邁柱疏言湖北施南宣撫司覃禹鼎與容美土司田畋如翁壻濟惡姦貪殘暴在施南銅鼓山私開路徑直抵容美派夫運米私藏礮位今容美土民能明大義將覃禹鼎及施南司印信一併押解到臣理合請旨革職嚴審明正其罪又據施南土民周一昌覃祚德等向化輸誠呈請改土歸流急救倒懸請分設文武官弁以資彈壓應如所請將施南宣撫司地方准其改土歸流一切善後事宜令該督妥協辦理從之○辛巳諭大學士等彭維新受朕深恩不次擢用爲戶部尚書且令辦事內閣數年以來所以委任優待之者至深至厚伊苟有人心必無忍於背負之理況伊歷任辦事庸碌朕誤視爲過於拘謹限於才力種種姑容今在戶部衙門輒敢徇情作弊植黨營私將怡賢親王殫忠竭力多年經畫之良規任意更張甚屬可惡今刑部審訊

此案竟敢懷挾私心公然在朕前巧於舞弊將應行詰問根究之處一概朦混開除而反將那用飯銀輕罪一條擬以大辟似此輕重出入之間顛倒錯亂高下其手朕實不料福敏張照等職司刑官而敢爲此詐僞欺朦之舉也彭維新所犯罪款非貪贓受賄則朋比黨援非立意作福作威則有心顛倒國是今福敏張照等全然置之不究而反擬失入之條誠不知其何心此案著刑部堂官另行確審定擬儻仍敢固結徇隱朕必親自審訊將刑部堂官與彭維新一體治罪○癸未吏部題一等精奇尼哈番佟鎔革退銷去佟鎔拖沙喇哈番原職餘二等精奇尼哈番以原立官佟養性四世孫八十六承襲從之○甲申禮部議覆署正紅旗滿洲都統盛安奏言本旗前鋒溫者渾寡妻係原任輔國將軍庫布蘇渾之女現年二十六歲夫沒無子恐被逼奪引刀斷髮并截去左耳終身願守夫墓雖守節

年歲未合定例。而剛方貞烈。實屬可嘉。應否旌表。伏候欽定。得旨。著加恩旌表。○兵部議覆。署陝西總督劉於義疏奏。寶豐一縣。地處極邊。防範宜密。請將平羅營參將一員。守備千總。把總各一員。共設兵四百五十六名。移駐其地。改爲寶豐營。其平羅地方。亦屬緊要。請將原設寶豐縣守備。改爲都司。把總改爲千總。共設兵二百五十名。移駐平羅。再柔遠堡。爲漢夷交易之處。夷人從石嘴子進口。民間田禾。難免蹂躪。請將漢夷交易。移在石嘴子塘汎。另築一堡。以爲集場。即於寶豐營撥兵四十名。駐防新堡。再調千總一員。兵五十名。駐劄柔遠堡。專司巡察。以實邊防。均應如所請。從之。○丙戌。諭辦理軍機大臣等。副都御史二格。奏請來京省母。著照所請。二格所辦軍需。著左都御史孔毓璞。暫行協同。劉於義辦理。○丁亥。陞都察院左副都御史管奉天府府尹事呂耀曾。爲吏部右侍郎。○旌表

河南河陰縣烈婦王宗聖妻樊氏。強姦不從。自縊殞命。給銀建坊。入祠致祭。如例。○戊子。遣官祭

關聖帝君。○己丑。移四川成都府水利同知駐灌縣。從四川總督黃廷桂請也。○庚寅。補行直隸省官員及直隸總河雍正十一年分大計。卓異官七員。不謹官二員。罷軟官二員。年老官二十二員。有疾官三員。才力不及官八員。浮躁官四員。分別陞賞處分。如例。○辛卯。吏部等衙門議覆。福建總督郝玉麟疏奏。酌核海疆情形。增改府州縣治事宜。一。福寧地當衝要。崇山峻嶺。向設直隸州。不足以資彈壓。請改爲福寧府。設知府一員。通判一員。府司獄兼管經歷事一員。府教授一員。并置附郭一縣。設知縣一員。訓導典史各一員。同原轄之福安寧德。并改建寧府所轄之壽寧縣。統歸福寧府管轄。一。福州府屬之古田縣。地方寥廓。錢糧積欠難清。內有雙溪地方。水

土平行。可以建築城垣衙署。請分古田地增置一縣。設知縣一員。典史一員。訓導一員。仍隸福州府管轄。一泉州漳州二府俗悍民刁。地方太廣。請各設直隸州分理。泉屬之永春縣。改爲直隸永春州。隸以德化大田二縣。漳屬之龍巖縣。改爲直隸龍巖州。隸以漳平寧洋二縣。請設直隸知州。州同吏目各一員。教諭改爲學正。訓導仍舊。均應如所請。從之。尋定福寧府新設附郭縣曰霞浦。古田分設縣

曰屏南。旌表甘肅保安縣烈婦張文彩妻蕭氏。拒姦不辱。被刃完貞。給銀建坊。入祠致祭。如例。○壬辰。諭八旗都統等。向來八旗官員。遇有吉凶之事。競尚繁華。恣意糜費。以致兵民效尤。罔知撙節。大有累於生計。朕屢降訓諭。并令九卿等。按其品級。分別等次。酌定規條。頒行已久。伊等自當體朕教養之苦心。各循分位。謹守章程。以爲仰事俯育之道。乃近聞八旗人等。仍有未改陋習。以誇多鬬靡。

相尚者。不知聖人教人以生養死葬合禮爲孝。又曰。禮與其奢也。寧儉。喪與其易也。寧戚。朕之教人。亦即此意。如父母之祭葬。必以耗財爲孝。獨不思蕩費家產。以致不能顧恤品行。辱及先人。其不孝也。更爲何如。子之婚嫁。必以厚資爲慈。獨不思無所貽謀。以致不能養育子孫。饑寒困苦。其不慈也。更爲何如。況越禮踰分之事。但覺可恥。更有何榮。朕之提撕警覺。已至再三。而庸愚之人。尚未醒悟。

今特再行宣諭。該都統等。務須諄切化導。並不時稽察。俾八旗人等。遵照所頒定例。實力奉行。毋得陽奉陰違。負朕崇儉黜奢維風訓俗之至意。○實授趙弘恩爲兩江總督。○以湖北巡撫德齡。協同署陝西總督劉於義。辦理西路軍需事務。陝西西安布政使楊祕。署湖北巡撫。河東鹽運使程仁圻。署西安布政使司布政使。○癸巳。以署正紅旗漢軍副都統李禧。爲額外都統。署理正紅旗漢軍都統。

事務○乙未諭辦理軍機大臣等。今年進兵之事。兩路將軍大臣等所議互異。強行進兵。賊人預知。將那移駐牧。先爲躲避。則我軍徒勞而無所獲。勢必復回。此事尚無完日。朕意今年停止進兵。遣使前往宣示利害。賊果知懼求和。即行定議完結。賊若游移推諉。則此際預行整備。明年大兵即行進剿。著額駙策凌。署大將軍。查郎阿俱來京。公同詳議確定。於事方爲有濟。今年既暫停進兵。可令大兵在科布多相近處。擇形勢之地。分駐牧馬。一應汎哨卡倫。嚴行防備。丙申夏至祭地於方澤。上命皇四子寶親王弘曆行禮。以署鑲紅旗滿洲副都統覺羅蘇爾泰爲正黃旗滿洲副都統。丁酉諭辦理軍機大臣等。北路副將軍額駙策凌侍郎傅鼐學士阿克敦原任侍郎衆

佛保西路署大將軍查郎阿俱著馳驛作速來京。著大將軍平郡王帶領傅爾丹暫往科布多處。總統弁兵辦事。平郡王未到之先著塔爾岱常德等暫行辦理。其由烏里雅蘇泰軍營接運糧餉。撥送馬匹等事。著交明薩穆哈欽拜等。令薩穆哈總統欽拜。錫保協辦。聽大將軍平郡王指示而行。查郎阿西路軍營一應事務。著交張廣泗辦理。又諭額駙策凌來京。科布多軍營內。無總統喀爾喀兵丁之扎薩克大員。大將軍平郡王現遣喀爾喀副將軍扎薩克圖汗格勒克顏木聘爾前往科布多處。送馬匹牲畜。著格勒克顏木聘爾暫留科布多軍營。管轄喀爾喀蒙古兵丁。戊戌。孝恭仁皇后忌辰。遣官祭景陵。上詣恩佑寺行禮。○己亥諭辦理軍機大臣等。前往

圖爾古特地方使臣內務府總管來保原任侍郎塞楞額現今在恰克圖地方無事可辦著前往喀爾喀車臣汗部落協同尚書渣克丹辦事。鄂羅斯國若來迎接伊等由彼前往亦屬甚近。來保塞楞額前至渣克丹處著侍衛阿敏道來京。○以陝西西寧道楊應琚署陝西甘肅布政使司布政使。○兵部議覆臣部左侍郎楊汝穀條奏。向例軍功紀錄一次軍功加一級。俱作一級抵降。未為平允。嗣後軍功紀錄二次。請准抵降一級。軍功加一級。請准抵降二級。僅遇有降一級之案。則改為紀錄二次。免其降調。再軍功紀錄逾於尋常一倍。請以一次抵銷。罰俸一年。均應如所請。從之。○庚子。諭內閣。

列祖忌辰在京則由禮部等衙門。在外則由督撫提鎮及各府州縣。懸牌出示。曉諭官弁兵民人等一體凜遵。齋戒。定例相沿日久。朕思懸牌出示。將

列祖廟號直書於上。其懸示之地。未必悉能潔淨。而出入往來。行人雜遝。坐卧喧譁。均非敬謹。恪恭之意。嗣後應如何通行曉諭。使衆共知。而又不至於褻慢。該部悉心妥議。定例奏聞。尋議恭逢。

列祖忌辰。嗣後請恭製龍邊粉油木牌。敬謹書寫。做齋戒牌。規例設案。安奉於禮部大門前。派令司員等看護。其九門各安設於潔淨寺院。令九門提督派員看護。次日將牌繳送禮部。敬謹收貯。其直省文武大小衙門。照在京之例。書牌安設。一體遵奉。從之。○命駐劄達里剛愛地方統領蒙古兵丁散秩大臣塞楞來京。○議敘恢復烏蒙四川在事文武官弁土司軍功。各加銜級有差。○辛丑。禮部議覆。江蘇巡撫高其倬疏稱。江都新分甘泉縣。山陽鹽城。新分阜寧縣。所有文武生員。例應派撥取進。江都應取進文生十三名。武生八名。甘泉應取進文生十二名。武生七名。山陽鹽

城各取進文生十九名武生十一名阜寧取進文生十二名武生八名應如所請從之○壬寅雲南開化總兵官仇元正年老休致以廣西新泰副將署左江總兵官崔善元署雲南開化總兵官○刑部議覆福建巡撫趙國麟疏奏武平縣民藍厚正因胞兄藍元正欲佔其田毆打殞命應擬斬立決但其母年老家無次丁藍元正一子年方七歲又有廢疾藍厚正應否准其留養恭候欽定得旨朕因近日刑部法司辦理刑名案件輕重失倫者甚多因將此本發與九卿詳悉閱看令其各抒己見於朕前面奏以觀其識見便於教導今日戶部尚書慶復等十七人奏稱弟毆胞兄至死法無可貸刑部尚書福敏張照侍郎王國棟等十二人奏稱藍厚正之母戴氏年逾七十一孫幼穉厚正之罪可以從寬等語朕思人心風俗之本莫重於倫常夫以田土細事而毆胞兄至死實屬人倫之變若因母

老而曲從寬宥則凡凶惡之人父母年高兄弟單少者皆得肆行無忌竝可置倫常於不問有是理乎此等凶暴之徒枉法容留但足爲人心風俗之害尚望其孝養伊母撫乃兄之幼子俾其成立耶福敏張照王國棟乃專掌刑名之大臣而識見卑庸糊塗姑息至於如此不可不加儆懲著交部嚴察藍厚正照律即行處斬○癸卯吏部議覆都察院左副都御史鄂爾賽奏稱六科給事中員缺從前滿漢俱有以員外郎陞用者今漢給事中缺出例由漢御史轉用其滿給事中請照漢給事中之例亦俱以御史轉補應如所請從之○禮部議覆奉天府尹呂耀曾疏奏設立學校事宜○陞任府尹楊超曾條奏復州應設學正一員業經准行今請照直省小學之例復州文武童生各取進八名設立廩增各五名三年出貢一次○金州新設之寧海縣請添設教諭一員義州既設立州治請添設

學正一員。取進文武童生各四名。設立廩增各二名。五年出貢一次。永吉州長寧縣向俱隸奉天府學。查永吉州去府八百餘里。長寧縣較永吉州更遠。府學教官實爲鞭長不及。永吉州請添設學正一員。長寧縣生員不過數名。毋庸另設教職。請歸永吉州學正帶管。均應如所請。從之。○甲辰。陞福建臺灣北路副將馬驥爲福建建寧總兵官。○辦理軍機大臣等議覆四川總督黃廷桂巡撫鄂昌奏言。酉陽宣慰土司冉元齡年老患病。以庶出第三子冉廣烜捏報嫡長子。請襲以代理司事。冉廣烜加派貪婪。姦惡殘暴。以致族目人等情急疊控。俱願改歸內地。衆口同聲。斷難姑容。查酉陽司屬地方。與楚黔接壤。風俗情形。與內地無異。土民等苦其虐累。久已離心。顯望改歸。如出湯火。請改土歸流。以順民情。而振聲勢。應如所請。將該地方歸入內地。設官經理。令黃廷桂等以冉廣烜貪虐各款。

具本參究。再酉陽司附近東南一隅尚有石耶邑梅地壩平茶四小土司。久欲內嚮。并應乘機改流。以收全局。一切事宜。令黃廷桂鄂昌妥協辦理。從之。

大清世宗敬天昌運建中表正文武英明寬仁信毅大孝至誠憲皇帝實錄卷之一百四十三

大清世宗敬天昌運建中表正文武英明寬仁信毅大孝至誠憲皇帝實錄卷之一百四十四

監修總裁官光祿大夫經筵講官太僕議政大臣內閣大學士兼兵部尚書總理兵部事務加十五級臣鄂爾泰

總裁官光祿大夫經筵講官起居注太僕卿太僕寺卿和碩大學士兼戶部尚書內務府總管加十五級臣劉世明

第三等伯加十五級臣張廷玉光祿大夫經筵講官起居注太僕議政大臣內閣大學士兼吏部尚書仍兼管

翰林院掌院事加二級臣福敏光祿大夫經筵講官太子太僕東閣大學士兼禮部尚書加六級臣徐本光祿大夫

經筵講官議政大臣內閣大學士兼禮部尚書仍兼管太常寺鴻臚寺事務加三級臣李

敦修

雍正十二年甲寅六月乙巳朔○丙午陞左

督辦上二部四十四

十

僉都御史邵基爲都察院左副都御史○丁未湖廣總督邁柱奏言忠崗宣撫司田光祖等十五土司齊集省城呈懇歸流因見永順保靖桑植諸處改土以來土民安輯各得其所今土衆等既不甘土弁之魚肉而土弁又不能仍前彈壓是以激切呈請歸流儻蒙俞允將各土弁分發各營給以外委千把總銜令其食糧以終餘年則土司官民各遂其生矣得旨忠崗等十五土司望風歸嚮願入版

圖朕俯念輿情准其改流。其一切善後事宜著總督邁柱詳籌定議○庚戌辦理軍機大臣等議覆定邊大將軍平郡王福彭摺奏烏里雅蘇泰扎克拜達里克推河等處共應撤京城滿洲漢軍右衛寧夏察哈爾土默特兵共三千六百名臣照例撥給錢糧米石車輛派人管領帶回各本處所有內扎薩克及烏蘭查卜兵丁三百七十餘名調赴推河駐防再現在除撤回兵丁外烏里雅蘇泰餘兵九千不敷調遣請將紅郭爾鄂隆所調滿洲兵六百名再添派四百名交富達禮等帶往軍營均應如所請從之○吏部議覆福建總督郝玉麟疏奏閩省移駐增改佐雜官員及地方分隸事宜○縣丞應移駐者八員改設者一員閩縣縣丞請移駐營前侯官縣丞移駐大湖同安縣丞移駐金門漳浦縣丞移駐雲霄松溪縣丞移駐永和里寧化縣丞移駐泉上里上杭縣丞移駐峯市寧德縣丞移駐周墩

至順昌縣仁壽巡檢應請裁汰改設縣丞一員移駐其地。巡檢應移駐者五員。侯官縣五縣寨巡檢請移駐南嶼。福清縣江口巡檢移駐江陰。松溪縣東關司巡檢移駐遂應場。寧德縣麻嶺巡檢移駐石堂。漳浦縣雲霄巡檢移駐盤陀。一驛丞應改巡檢者三員。南安縣大盈驛仙遊縣楓亭驛寧化縣石牛驛驛丞俱改爲巡檢仍兼管驛務。一巡檢應添設者二員。永春州黃坂古格地方仙遊縣興泰里俱請添設巡檢以便稽查。一漳浦縣南界大嶺後社塘柘林口蒙內蒙等村及銅山續編二堡請分隸詔安縣管轄。沙灣鎮坑姑壠岐嶋荷部石埠仙恬浦西等八堡分隸海澄縣管轄。其寧化縣永春里歸併安遠寨巡檢管理均應如所請從之。辛亥諭吏部兵部近來外省不應題補之缺督撫提臣等悉遞行題補較前過多。在部候缺之人未免銓補壅滯。嗣後若實因地方緊要必需熟諳風土

之員不得不題補者著於本內聲明亦止可將現任簡僻地方之員調補所遺之缺仍歸部選內外銓用方各得其平。○移四川保寧府同知駐南部縣鑄給茶鹽同知關防從陞任四川巡撫憲德請也。○壬子改福建糧儲道爲分巡糧驛道鹽驛道爲鹽法道專管鹽政兼理福廠船工從福建總督郝玉麟請也。○甲寅諭內閣從前拏獲賭具議敘從優者原爲力禁地方賭風起見儻該員等但察究數案爲倖叨議敘之舉其餘仍怠於稽查是徒邀恩一時而於地方賭風終未禁絕嗣後大小官員等所屬地方有賭博失於覺察者除照例議處外將從前拏賭議敘之加級紀錄俱著銷去永著爲例。○工部議覆內閣學士凌如煥奏言臣前奉差湖北學政查楚屬接壤長江地名三峽自湖北彝陵州起至四川夔州府橫亘數百里峯巒插天兩岸對峙中間水道一線灘高石巨羅布江心商民往

來如遇風濤之險每賴江邊小船搶救方得保全。以此知救生船隻所宜廣設。訪聞峽中木值頗賤。造一小船約計銀二三十兩。現在歸州城外設有救生船三隻。但地廣難周。即如歸州而上有洩灘巴峽瞿塘峽灩澦堆等處。歸州而下有新灘獺洞腔峽黃牛灘等處。悉係著名奇險。每年爲商旅之患。

皇上軫念民生實心實政鉅細畢舉。請教諭四川湖廣兩省督撫轉飭地方官將三峽中水道徧加詳勘設立小船守候救生保全民命。亦推廣

皇仁之一端也。應如所請。行令湖廣總督四川巡撫飭查三峽等處應設船隻數目確估具題從之。○免直隸薊州文安等十六州縣雍正十一年分水災額賦有差。○丙辰移廣東新會營守備駐新寧縣城。改增城右營原設把總一員爲千總。外委把總一員爲外委千總。并添設外委千總一員。其肇慶協屬之白

馬等四塘汛。春江協屬之牛軛曲等四汛。改歸羅定協河頭營派防管轄。從廣東總督鄂彌達請也。○丁巳吏部議覆河東總督王士俊疏。奏豫省增駐官員事宜。添設通判一員。衛輝府管河通判。經管河工。又兼鹽糧捕務。勢難兼顧。應將現任通判令其專管河務。添設通判一員。經理鹽糧捕務。請設庫大使一員。河南糧道經收錢糧統計三十餘萬。應照浙江糧道庫大使之例。請歸開封府經歷就近兼管。一添設縣丞二員。南陽府之南陽縣。汝寧府之汝陽縣。俱附郭首邑。地方遼闊。各請添設縣丞以資差遣。一移駐縣丞二員。靈寶縣之號畧鎮。閿鄉縣之文底鎮。距縣遼遠。易於藏姦。請將二縣縣丞移駐其地。俱兼管巡檢職銜。以司緝捕。一添設巡檢四員。滑縣老岸鎮往來要道。汝陽縣廟灣鎮水陸衝衢。浞池縣硤石驛山谷險要。固始縣往流集。吳豫交界。各請設巡檢一員。稽查防守。一

驛丞大使應兼理巡檢事務湯陰縣之宜溝驛信陽州之明港驛向設有驛丞河內縣清化鎮向設有稅課大使俱路當孔道姦匪聚集驛丞大使各有專司於緝捕均非其任俱請兼理巡檢職銜稽查匪類以專責成均應如所請從之○河東河道總督朱藻奏報河南考城縣劉家店地方舊有河身二道每遇汎水長發大溜注射隄工欲其取直順行必須開挖引河今自劉家店西至新莊東天開引河一道人力不勞功成迅速兩岸隄工如同磐石下部知之○戊午復置河南南陽府南召縣設知縣一員典史一員撥南陽縣訓導一員管理學務移現駐南召通判仍回南陽府城從河東總督王士俊請也○庚申諭辦理軍機大臣等達里剛愛地方駐防之西林果爾兵二千名從前派出時連妻子牲畜一併帶往駐劄聞管轄伊等之扎薩克王等惟本身前往又不換班在彼常駐從前烏爾

輝音查漢之兵其王貝勒台吉等俱係一年一換今達里剛愛之王等或令伊等換班行走或帶往妻子永遠駐劄之處著詳議具奏尋議駐防達里剛愛等處兵前派阿霸垓王札木巴爾扎布烏朱穆泰公彭蘇克拉布坦等總統管轄其換班之處向未議及請派蘇尼特王旺青齊斯隆貝勒西禮換班今年令旺青齊斯隆前往更換札木巴爾扎布明年令西禮前往更換彭蘇克拉布坦如此輪班管轄於事有益從之○癸亥吏部議覆河東總督王士俊疏言濟南府爲山左首郡舊定地制疆域井然自分設直隸高唐泰安二州形勢不聯難資控馭應將高唐州所屬之禹城平原陵縣臨邑等四縣及泰安州所屬之長清縣仍歸濟南府管轄其高唐州無庸更設直隸州名目仍歸屬東昌府至肥城一縣應歸泰安州管轄再武定州控制海疆爲全省北門鎖鑰州牧一官實難兼顧請將武定

州陞爲武定府附郭添設一縣同原屬之陽信海豐樂陵三縣管轄外再以濱州蒲臺霑化利津四州縣及濟南府屬之青城商河二縣統歸武定管轄共計一州九縣成一府治設知府一員同知一員經歷司獄各一員教授一員附郭首邑添設知縣一員典史一員武定州原設之訓導一員改管縣學至樂陵縣舊縣鎮巡檢同駐縣城閒冗可裁均應如所請從之尋定武定新設附郭縣曰惠民○旌表河南唐縣烈婦劉宗妻邱氏強姦不從自縊完貞給銀建坊入祠致祭如例○甲子予故署陝西涼州總兵官陳弼祭葬如例○乙丑命散秩大臣四格前往駐劄達里剛愛地方管轄蒙古兵丁○賞卹浙江海洋巡哨遇風淹斃瑞安營都司僉書林逢春及弁兵等銀兩有差○丙寅諭兵部福建海壇總兵官陳勇年老昏憤著休致○陞正黃旗滿洲副都統宗室章格爲本旗滿洲都統○調江

西南昌總兵李蔭樾爲福建建寧總兵官建寧總兵馬驥爲福建海壇總兵官福建福寧總兵官馬召南緣事革職陞澎湖副將章隆爲福建福寧總兵官○己巳定邊大將軍平郡王福彭奏言臣遵旨率傅爾丹等前往科布多軍營令薩穆哈等辦理烏里雅蘇泰軍務凡遇調遣等事須以印文爲憑謹將臣處收貯威遠將軍印一顆交薩穆哈掌管復授以方畧令欽拜錫保同心襄贊謹奏報聞○雲貴廣西總督尹繼善等疏奏黔省遵義府除遵義仁懷兩大稅之外又有遵義縣小板山場綏陽縣永興山場桐梓縣新街山場共小稅銀四百十九兩零到場之物皆係遵義仁懷兩大稅處已經征稅者查黔省原有各山場小稅久經豁免遵義向隸川省是以仍循舊規今既改隸黔省應請一例邀免以除民累得旨遵義等縣山場小稅已經征收大稅若分販小場又復抽取重疊征歛催頭衙

役更得藉端需索侵食中飽甚爲不便著照黔省通例一併加恩豁免○庚午定邊大將軍平郡王福彭奏辦理扎克拜達里克糧餉事務原任巡撫西琳不能整躬飭已抒誠効力恣意卑污向叅將王化貴索取駝馬不遂其欲將王化貴捏報擅革其管兵之任負恩挾私有玷官箴臣已經審訊請由驛站解部定擬得旨西琳不必解京即令在扎克拜達里克地方永遠枷號示衆○雲貴廣西總

督尹繼善等議覆陞任貴州布政使常安條奏苗疆有事多由於兵役之擾累出入苗寨擅動苗夫需索供應該管文武罔識防微杜漸苗人吞聲飲恨遂逞邪謀嗣後如有擾累等情請將該管文武立即叅處等語臣現將積弊極力禁革竝嚴飭文武各官互相稽察如有縱容兵役滋擾者即行嚴叅治罪得旨新定苗地全賴撫綏撫綏之方先除擾累尹繼善等雖已令該管文武稽察兵役之滋擾

但未定嚴例仍恐視爲具文且或係故縱或係徇隱或係失察其滋擾之由不一而啟釁之害則同若不倍治文武官弁之罪何能徧查兵役使之奉公守法著交部詳悉定議遵行○辛未吏部議覆禮部尚書三泰條奏中書科例設滿洲中書舍人一員漢中書舍人八員筆帖式十二員甚屬事簡請照行人司分派禮部辦事之例止留滿漢中書各一員筆帖式二員在本科辦事其餘中書七員筆

帖式十員令其分派內閣行走與內閣中書一體分班辦事如遇覃恩內外誥軸繁多仍回本科辦理應如所請從之○壬申吏部等衙門議覆陞任奉天府府尹呂耀曾奏言奉天地方旗民雜處人命案件州縣俱會同旗員辦理旗員自城守尉而下土著者多每有情面請託州縣號令常不遵奉向設有理事通判一員勢難兼顧請添設理事通判一員一駐奉天府之蓋平縣分管海蓋復金四州

縣一駐錦州府之錦縣分管錦寧廣義四州縣如旗民官員有會審不公等事即稽查揭報應如所請從之○戶部議覆內閣學士凌如煥條奏臣伏查報墾地畝陞科定例水田限六年旱田限十年積以歲月緩其徵輸無非利民爲心而地方有司奉行不實或墾少報多希圖增課以邀議敘及至陞科之年按冊有餘按畝不足報墾之官已經濫邀敘典而接任之官於報部定額既難詳免豈甘賠墊勢必於里甲之中勾派飛洒以求足額殊非勸墾之本意臣請冊報開墾應照委查倉穀之例該督撫另調隔屬賢員履畝加勘實數與所報之數相符取具印結送部然後准其議敘儻稍有捏造情弊督撫將原報官及出結之員一併叅處臣又復查各處地畝有浮鹵淺沙之區即或不宜黍稻尚可耕種雜糧廣植樹木固不宜任其荒蕪以棄地利但又有本來似田而難必其成熟者如山田則

泥面而石骨土氣本薄初種一二年尚可收穫數年之後雖種籽粒難以發生且山形高峻之處驟雨瀑流衝去田中浮土僅存石骨其濱江濱河之田水涸之日一望膏腴及至水漲又復淹爲巨浸此皆似田而難於成熟者也臣請令該督撫按年委員覆核其間有無坍塌更改抑係實在成熟詳確勘報然後分別陞科如互相徇隱一併揭叅均應如所請再從前各省所報開墾陞科田地或墾少報多濫邀議敘及陞科入冊之後田去糧存虛額賠累俱未可定應令各該督撫覆加查核如有濫邀議敘者即行指叅實在衝冊者即予開除造冊報部從之○癸酉河東河道總督朱藻疏報河南開封府祥符縣南北莊等地方河灘適中之處水勢直趨刷成引河一道大溜暢行循流直達南北莊一帶工程俱已化險爲平下部知之

大清世宗敬天昌運建中表正文武英明寬仁
信毅大孝至誠憲皇帝實錄卷之一百四十四

大清世宗敬天昌運建中表正文武英明寬仁
信毅大孝至誠憲皇帝實錄卷之一百四十五

監修總纂官光祿大夫經筵講官太僕議政大臣保和殿大學士兼兵部尚書總理兵部事務三等伯加十五級臣鄂爾泰

總纂官光祿大夫經筵講官起居注太僕議政大臣保和殿大學士兼戶部尚書仍兼管吏部尚書翰林院掌院

事等伯加十三級臣張廷玉光祿大夫經筵講官起居注太僕議政大臣武英殿大學士兼吏部尚書仍兼管

翰林院掌院事加二級臣福敏光祿大夫經筵講官太子太保吏部尚書加六級臣徐元光祿大夫

經筵講官議政大臣翰林院內閣大學士事務禮部尚書仍兼管太常寺鴻臚寺事臣三泰等奉

敕修

雍正十二年甲寅秋七月甲戌朔享

太廟遣莊親王允祿行禮○陞江南江蘇布政

使白鍾山爲江南河道副總河調福建布政

使劉藩長爲江南江蘇布政使司布政使陞

福建按察使張廷枚爲福建布政使司布政

使福建延建邵道莊令翼爲福建按察使司

按察使○授故奉國將軍塞赫禮子熙成爲

奉恩將軍○乙亥以大理寺卿德福署太僕

寺卿○旌表河南武陟縣烈婦原清妻謝氏

拒姦不污自縊殞命給銀建坊入祠致祭如

例○丙子吏部議覆內閣學士德新條奏考試筆帖式請照繙譯鄉試例馬步射藝合式方准入場應如所請從之○丁丑諭辦理軍機大臣等爾等行文平郡王賊人如犯軍營令我兵酌量拒敵若目前無事仍撤回科布多擇形勝處駐劄休養馬匹其哨探兵丁俱著撤回如有應設之處務揀選幹員防守○諭吏部凡命往各省人員多係不應即選之人該督撫等自應先行差委試看果有勞績再令署印署印果優然後題補或該省懸缺需人一到即行委署更當留心訪察必實有政績可考方行題請實授嗣後題請實授者著將實在政績一一敘入本中題奏如果係卓越之才即不滿年限亦可聲明題請○戊寅諭辦理軍機大臣等從前直隸山東山西河南四省派往北路出征之綠旗兵丁在外已經數年應另派兵丁前往更換著四省督撫提督每省選派精兵一千名一切衣裝等

項於存公銀兩內動支應用豫備齊全候諭旨到日起程○戶部議覆監察御史慧中條奏五城地方多與順天州縣交界請飭令五城司坊官會同接壤之州縣公同踏看其舊有界址圯毀者建立石碑其未分界址者清查補建至旗地參錯之處請確查四至里數分歸各管遇有命盜等案責成該管官辦理應如所請從之○改湖南糧驛鹽道缺爲糧道添設驛鹽道一員從署湖南巡撫鍾保請也○己卯禮部議覆國子監司業那爾布條奏學臣取進童生覆試時例有小學論題一道嗣後請改用孝經應如所請直省一體遵行從之○庚辰旌表湖北武昌縣烈婦張性妻陳氏逼嫁不從赴水殞命給銀建坊入祠致祭如例○壬午九卿遵旨議覆五城司坊等官途次遇有鬪毆酗酒騙詐等事應不論何城地方准其當時拘執押送該城司坊官錄供詳解該城御史審訊發落若拘泥疆界

不即執送。以致案犯脫逃者。巡城御史察出題參。至曖昧隱僻不法等事。各司坊官訪聞的確。亦不論何城地方。准其密詳該城御史查拏究治。並密詳本城御史存案。儻該役藉端訛詐。駕詞妄稟。以及司坊等官藉此擅作威福者。該城御史查參。交部分別議處。再大興宛平二縣與五城地方交錯。無論五城併該縣所屬。遇兇徒不法等事。亦准一體緝拏從之。○癸未。

孝懿仁皇后忌辰遣官祭

景陵○吏部議覆翰林院侍讀學士張廷瑑條奏各部院摺奏事件。向無揭送內閣之例。各部院所存檔案。偶有缺失。無可查對。嗣後除密奏事件。無庸開送外。其各部院摺奏事件。奉旨之後。請將原摺并所奉諭旨抄錄移送內閣。與紅本一體收藏。以備稽查。應如所請從之。○兵部議覆署正紅旗蒙古副都統八十條奏城門尉缺嗣後請照協領之例將蒙

古官員同滿洲官員一體揀選帶領引見補授。應如所請從之。○旌表山東萊陽縣烈婦張體隨妻姜氏矢志殉夫投繯殞命。給銀建坊入祠致祭如例。○乙酉以詹事府詹事顧祖鎮署日講起居注官。○丙戌調刑部尚書海壽為工部尚書。工部尚書憲德為刑部尚書。署刑部尚書福敏仍回左都御史任。○廣東廣州將軍栢之蕃緣事降調。陞署湖廣提督張正興為廣東廣州將軍。雲南臨元總兵官董芳為湖廣提督。廣西慶遠副將顧繩祖為雲南臨元總兵官。○吏部議覆河東總督王士俊疏言。東省青州府屬之益都縣附郭繁劇。請於該縣所屬顏神鎮分置一縣。設知縣一員。典史一員。改益都縣訓導為新縣訓導。撥青州營把總一員。帶兵二十八名駐劄新縣。其原駐顏神鎮通判一員。巡檢一員。俱行裁汰。應如所請從之。尋定顏神鎮新分縣曰博山。○丁亥和托輝特扎薩克貝勒班第

故遣官致祭○戊子中元節遣官祭

永陵

福陵

昭陵

昭西陵

孝陵

孝東陵

景陵

孝敬皇后○命福建總督郝玉麟來京陛見以

福建福州將軍阿爾賽署福建總督○己丑吏部等衙門議覆兩江總督趙弘恩疏言江蘇直隸徐州業經陞州爲府所有淮安府原屬之邳睢靈壁河務同知宿虹河務同知宿遷運河通判請俱改歸徐州府管轄原設夏鎮楊莊珠梅三閘閘官應歸沛縣管轄邳州緝捕河務州同改爲管河州同再徐州府學取進童生額數請照府學之例取進文武童生各二十名在所屬各州縣考取撥入廩增

各設四十名俟十二年後挨次一年一貢其新設附郭銅山縣取進文武童生各十五名廩增各設二十名照例二年一貢應如所請從之○以故三等阿思哈尼哈番多奇禪子德保襲職○庚寅添設京城巡捕三營千總七員把總六員移北營遊擊駐安定門外從署步軍統領鄂善請也○辛卯命廣西提督張應宗來京陛見以廣西左江總兵官霍昇署廣西提督○吏部議覆河東總督王士俊疏奏山東省改設府縣事宜○直隸沂州請陞爲沂州府裁知州州同學正吏目缺設知府一員通判一員教授一員經歷一員司獄一員增置附郭一縣設知縣一員縣丞一員典史一員以沂州舊設訓導爲新縣訓導并原屬之郯城費縣暨直隸莒州與所屬沂水蒙陰日照三縣俱歸沂州府管轄○沂州原屬之羅滕鎮巡檢一員李家莊徐公店驛丞二員請改歸新縣管轄應如所請從之尋定

沂州府附郭縣曰蘭山○癸巳諭辦理軍機大臣等西北兩路用兵已經數年將士効力戎行久在邊外朕心深爲不忍再四思維或應乘此兵力盛強直進賊境俾軍務早完以息將士或應遣使往彼諭以利害俾其醒悟二者未能遽定特召北路副將軍額駙策凌西路署大將軍查郎阿來京與辦理軍機之大臣悉心計議伊等意見亦不畫一朕思軍務關係重大應博採衆論詳慎籌畫著王公滿漢文武大臣公同會議各抒己見據實具奏○又諭從前令達賴喇嘛移駐泰寧原因彼時藏中有阿爾布巴等事恐準噶爾逆賊乘間來犯是以令其移至近邊地方以便照看其隨來之弟子人等久離鄉土未免懷歸今貝勒頗羅鼐實心効力將唐古特厄魯特之兵操練精熟各處緊要隘口俱已嚴固防守藏中晏然無事班禪額爾得尼年邁有疾應令達賴喇嘛回藏著果親王允禮前往泰

寧與達賴喇嘛相見張家胡土克圖亦令同去并著都統鼐格前往料理伊等起身副都統福壽等沿途照看○又諭朕命果親王前往泰寧地方沿途經過之直隸山西陝西四川等處駐防滿洲官兵並督撫提鎮標營綠旗官兵俱令順便閱看○又諭爾等傳諭大將軍平郡王令其未撤兵以前酌量於和通胡爾哈處遣人將陣亡官兵遺骸收殮動用軍中錢糧致祭○又諭額駙策凌署大將軍查郎阿回至軍營時令其酌量留兵防守邊界其餘兵丁查無弟兄子姪之孤身及從前久在軍營行走者或此次立有勞績被傷者俱行撤回再將官弁効力行走之處分爲三等造冊咨部其効力超卓者爲一等以應陞之缺即用照常効力者爲二等酌量加恩未經効力者以三等註冊各該管大臣官員等務須從公分別等次若有徇情挾私顛倒失實者後經查出定行加倍治罪○甲午以故

烏朱穆秦扎薩克和碩車臣親王色登敦多卜子阿喇布坦納木扎爾襲爵○丙申吏部議覆詹事府詹事顧祖鎮條奏起居注衙門止滿主事二員請增設漢主事一員於舉人進士出身之現任中書內揀選引見補授應如所請從之○戊戌調正白旗蒙古都統邁祿爲鑲黃旗滿洲都統仍留署直隸天津都統以大學士鄂爾泰署鑲黃旗滿洲都統○和碩康親王巴爾圖等遵旨議奏準噶爾賊夷世濟其惡屢次興戎噶爾丹策零狂悖兇頑較伊父策妄阿喇布坦爲更甚我皇上爲安逸生靈計欲特賜包容遣使前往開陳利害但賊人狡詐性成恐難遽信目今兩路大兵駐劄邊境賊夷之地勢情形俱已深悉且糧糗馬駝軍裝器械無不預備整齊宜乘此時於北路派兵三萬名西路派兵二萬名約會齊進並力殲除如賊果知畏懼悔禍祈恩我

皇上再寬其罪戾議定邊界似屬於事有益又大學士張廷玉等遵旨議奏噶爾丹策零擾害生靈早應遣發大兵立加屠滅惟是我聖祖仁皇帝如天之仁於策妄阿喇布坦狂悖妄行猶復曲賜包容不加誅戮我

皇上以

聖祖之心爲心屢示恩諭俾息紛爭恐伊孟浪輕舉騷擾蒙古是以駐兵邊地以爲防範仍諭兩路大將軍停止進剿仰見

天心仁愛原非必欲毀其巢穴滅其醜類也今賊人自厄爾得尼招大敗之後勢窮力竭本年春間我兵從北路襲擊直越額爾齊斯賊夷驚惶不敢迎戰但罔識

聖心之寬大自以負罪深重不可復逭因此迷而不悟日益冥頑若蒙特遣大臣前往曉以利害寬其已往之愆予以更新之路噶爾丹策零審度勢力實不能支諒必誠心悔過俯首求和若仍執迷不悟則是伊自速危亡再

議征討更覺事易功倍矣得旨準噶爾一部落習尚貪殘世濟其惡策妄阿喇布坦狡獪非常當其跳梁之時我

皇考聖祖仁皇帝審觀形勢洞悉機宜曾密諭曰彼地遼遠我往則我師徒勞彼來則彼師受困是以經理八九年惟令兩路將軍陳師邊境以待之即將軍富寧安傅爾丹之屢次襲擊亦欲誘之使來便於邀擊而賊究不至富寧安等亦未多獲而歸此當日之情形也及朕即位之初籌畫邊事敬佩

皇考之明訓確知策妄阿喇布坦之姦頑持重不肯輕舉且以將弁兵丁等久役於外勤勞可念因將兩路兵馬撤回暫令休息中間緣清畫疆界一事遣人曉諭再三朕則開誠布公彼則支吾巧詐朕仍包容寬宥之未幾策妄阿喇布坦身故伊子噶爾丹策零繼領部落朕慮有侵擾衆蒙古之舉不得不預爲防範又以其人孟浪無知剽輕任性必率賊衆

冒昧前來是以仍於兩路駐劄大兵至於命將一事岳鍾琪久在西陲習於軍旅伊亦踴躍從事因命爲西路大將軍北路大將軍傅爾丹朕恐其才具不勝重任爰允廷臣之推舉竝遣查弼納爲副將軍伊陞辭之時朕諄諄詳諭令部署完密度勢審機務策萬全實冀專閫之大臣戮力同心不負簡用也乃噶爾丹策零輕舉妄動果不出朕之所料於雍正八年冬月發兵侵犯西路此正我師乘時擊賊之機會而岳鍾琪來京陛見請將大將軍印務交與紀成斌署理前此岳鍾琪身在軍營全無佈置將駝馬牲畜十數萬置於賊人來路之旁供其掠取紀成斌庸懦不堪於賊人來犯之時畏縮驚惶一籌莫展致賊人得志而去次年賊以全力向我北路初北路領兵大臣與喀爾喀等皆懷賊人斷不敢來犯之心一切軍需又未預爲完備傅爾丹查弼納等復誤聽俘虜誑言並不奏聞領兵輕

進彼時朕即向廷臣言之賊人恐有說詐我師此進甚不妥協未幾奏至果墮術中雍正十年正月賊人僅以七千之衆來犯西路深入哈密塔爾沁地方此又易於大創之機會而岳鍾琪身處軍營調度乖舛坐令入網之獸復得駭逸此西路軍營人人切齒痛恨者於是賊志愈驕肆無忌憚傾其醜類以向北路越過察罕叟爾軍營直至厄爾得尼招地方副將軍額駙策凌等奮勇擊殺殲其精銳將及萬人餘賊喪膽乘夜遁逃經由扎克拜達里克一帶此地朕預設重兵萬有四千以遏賊歸路似此殘敗之賊誠如釜底遊魂但遣兵數千人遮擊便可使隻騎不返乃馬爾賽坐守空城一旅不發賊至不擊賊去不追俾餘孽猶存邊氛未息馬爾賽之罪誠擢髮難數也總之朕之籌畫於事先者雖未有爽而臣工之失機於臨事者則不一而足矣今賊人自厄爾得尼招大創之後畏我兵威

遷徙遠去看此情形兩路軍務一時難以告竣特召兩路領兵將軍來京與辦理軍機之大臣悉心計議北路副將軍額駙策凌西路署大將軍查郎阿力主進剿朕以軍務關係重大復令在朝王公滿漢文武大臣公同集議茲覽所奏意見亦不盡一據兩路將軍皆言兵力有餘士氣奮勇賊勢窮蹙人心離散似此則遣兵進討未嘗不可但

皇考當年聖意與朕本心俱不欲勞師遠涉而駐兵防守邊界又未免時日耽延將士久勞朕心不忍朕意且遣使臣前往準噶爾面諭噶爾丹策零曉以利害示以寬大之恩旨開其迷誤從此畫清邊界彼此不得逾越著北路大將軍平郡王將進駐科布多之大兵仍撤回察罕叟爾以釋賊人疑懼之心若噶爾丹策零聞朕諭旨果有悔心之萌一一遵行則兩路大兵俱可徐徐議撤儻仍執迷怙惡自取滅亡俟使臣回京之日別作計議○刑

部議覆河東總督王士俊疏言凡親屬因姦致死律內無分別已成未成之例請嗣後如有強姦內外總麻以上親及總麻以上親之妻若妻前夫之女同母異父姊妹未成本婦羞忿自盡者俱擬斬監候其已成本婦羞忿自盡者俱擬斬立決應如所請從之○撤山西東路營駐防廣武城中軍守備一員回本營移橫道鎮千總一員駐廣武城廣武城外委千總一員駐橫道鎮白草口把總一員駐崞縣崞縣外委把總一員駐白草口從山西巡撫署提督覺羅石麟請也○旌表河南沈邱縣烈婦柳小妻閭氏拒姦不污自縊殞命給銀建坊入祠致祭如例○辛丑諭辦理軍機大臣等朕聞青海蒙古生計甚艱著傳諭馬爾泰等加意施恩方於伊等生計有益○又諭爾等傳諭大將軍平郡王現今調兩路將軍來京商議軍營事宜將來進剿科布多之兵或仍撤回察罕奧爾其由烏里雅蘇泰

運往科布多之米糧馬匹等項有應行停止撥回之處著預爲辦理撤兵時平郡王領兵居中塔爾岱常德領兵殿後其前隊之兵酌量派委大臣帶領○吏部等衙門議覆河東總督王士俊疏言河東總督衙門駐劄河南開封府與山東沿海地方相隔遙遠請移駐山東兗州府俟移駐後裁兗州總兵遊擊二缺設督標中軍副將一員城守參將一員改兗沂道爲兗沂曹道駐劄兗州以資承辦事

件應如所請從之

大清世宗敬天昌運建中表正文武英明寬仁
信毅大孝至誠憲皇帝實錄卷之一百四十五

大清世宗敬天昌運建中表正文武英明寬仁
信毅大孝至誠憲皇帝實錄卷之一百四十六

敕修

監修總裁官大學士經筵講官太僕寺卿保和殿大學士兼禮部尚書理藩院事等加十五級日鄂爾泰
總裁官光祿大夫經筵日講官起居注太僕寺卿保和殿大學士兼戶部尚書仍兼吏部尚書翰林院掌院
事三等伯加十三級日張廷玉光祿大夫經筵日講官起居注太僕寺卿保和殿大學士兼工部尚書仍兼管
翰林院掌院事加二級日福敏光祿大夫經筵講官太子太保東閣大學士兼禮部尚書加六級日徐本光祿大夫
經筵講官議政大臣滿洲內閣大學士事務禮部尚書仍兼太常寺鴻臚寺事日三泰等奉

雍正十二年甲寅八月甲辰朔諭辦理軍機
大臣等陝西領運民人急公敬事辦運軍糧
妥協可嘉著巡撫史貽直碩色等查明交米
多寡之數酌量分別賞賚務令均霑實惠○
丙午遣侍郎傅鼐額外內閣學士阿克敦副
都統羅密前往準噶爾諭台吉噶爾丹策零
諭曰從前爾遣使特磊奏聞爾父亡故彼時
朕即召入特磊面降諭旨詳加開導今將羅
卜藏丹津送至越二三載竝無回奏故於兩
路駐兵防守邊界爾乃遣特磊奏稱已將羅

卜藏丹津擊送至途間聞有兵至故暫停解送特遣人懇求指示伏願廣興黃教愛惜生靈等語朕即遣使臣杭奕祿衆佛保同特磊前往巴爾庫爾軍營與爾商議諸事因朕躬違和故未將特磊召見令部臣傳旨遣回即有疑難不便之處亦當彼此遣使議和豈有輕動兵戈之理特磊乃卑賤之人未免捏詞告爾以圖債事爾若果無動兵之心爲生靈黃教起見則當向我國使臣懇切陳奏乃竝未接見使臣猝然發兵侵我已爾庫爾軍營搶去馬匹又發兵阿爾泰地方彼時我國將軍大臣未行請旨忽畧輕動致爾得利未幾爾兵侵我卡倫我兵於蘇克阿爾達胡地方迎戰爾遂收兵退去次歲爾復協力來擾喀爾喀遊牧被我師輕騎掩殺戰於厄爾得尼招地方爾兵大敗今春我哨探兵丁至額爾齊斯地方時爾遊牧處人俱行遁匿烏魯木齊駐劄之人亦行移去我兩路將軍大臣即

欲盡驅雄兵乘勢進剿朕悉諭令停止朕爲天下元后惟以好生爲本竝無將準噶爾必行勦滅之意況得爾土地人民於我大國亦何補之有爾若執迷不息兵戈則我師更換駐防毫無缺乏之慮不過稍費糧餉耳但如此相持日久彼此皆勞非徒士卒苦累而馬匹牲畜亦多損傷是以朕心深爲惻然今特遣使臣侍郎傅鼐學士阿克敦副都統羅密等前來宣諭朕意與爾商議愛惜生靈彼此罷兵之事若我大兵仍在爾遊牧近處駐劄恐爾心生疑貳今已爾庫爾軍兵因使臣由彼處遣往故暫令守候駐劄其北路已抵阿爾泰軍兵俱撤至察罕叟爾爾果欲遵旨罷兵同享安逸即與遣往之大臣明白定議朕已將一切事務面諭大臣爾宜詳思如誠心知過痛改前愆樂遵朕旨則朕將往事盡行寬宥斷不食言至於是非利害爾宜酌定欲構兵欲止戈欲安逸衆庶欲殘害生靈亦惟

爾擇而行之。特諭○丁未遣誠親王允祕祭先師孔子○戊申祭

大社

大稷。遣皇五子和親王弘晝行禮○吏部議覆通政使司參議保柱條奏各省具題本章。向有隨本揭帖。定例於送本次日。通政司令提塘分送各部院衙門。惟是內閣收到本章。尚須繙譯繕寫。方得進呈。而各衙門開視揭帖。轉在進呈之先。易滋情弊。嗣後請令通政司

送本至內閣。仍將揭帖加謹收貯。俟五日後再行分送。應如所請。從之○己酉遣官祭

關聖帝君○諭辦理軍機大臣等。原任尚書特古忒著前往達里剛愛地方。協同散秩大臣四格辦理事務○又諭現在軍前之內扎薩克王等。應查其前往之年分淺深。分別或回或留。著大將軍暨副將軍等商酌定議。辦理。再從前運送馬匹之扎薩克台吉內。有情願進兵留彼効力者。今歲著盡行撤回。將伊

等職名造冊送部。候旨施恩○旌表河南鄆陵縣烈婦路曰成妻張氏拒姦不污。自縊殞命。給銀建坊。入祠致祭。如例○庚戌諭內閣。朕聞湖南五寨司文武生童。向令麻陽縣訓導兼攝。今改流多年。應試生童日衆。應添設訓導一員。專司訓迪。又聞永順生童讀書應試者亦多。即六里亦有就學子弟。應酌設學校教職。以隆作養。著該督撫詳察地方情形。酌量定議○壬子。

太宗文皇帝忌辰遣官祭

昭陵○癸丑以署正紅旗漢軍都統李禧為鑲藍旗漢軍都統。仍署理正紅旗漢軍都統事務○辦理軍機大臣等議奏。北路出征之直隸山東山西河南四省官兵。在外已經數年。奉旨令該省另派兵丁前往更換。查統領綠旗兵丁之河北總兵官胡傑亦應一體更換。請另派一員總統四省兵丁前往得旨。總統四省綠旗兵丁著署山西大同總兵李如柏

前往○吏部議覆國子監祭酒覺羅吳拜條奏國子監漢監丞典簿員缺向例由各省教職論俸推陞每有年力衰邁學問平常者難爲士子表率嗣後請於守部進士并學習期滿舉人內揀選引見補授應如所請從之○甲寅

太祖高皇帝忌辰遣官祭

福陵○諭辦理軍機大臣等滿珠錫禮自朕簡用副都統以來有意敗壞國政伊身係宗室且竝非愚昧無能之人乃明知故爲情殊可惡著革職交與馬蘭泰令其隨披甲隊內在軍前効力贖罪如乖謬之性仍不悛改著馬蘭泰即行叅奏○乙卯諭辦理軍機大臣等朕聞黑龍江兵丁凡遇差委俱係自備資斧及修理倉房運送物料等事皆取給於兵丁呼倫貝爾等處口糧亦分交兵丁碾辦似此甚屬可憫嗣後凡遇官差派遣著計日賞給行糧其修理倉房一切費用著於本地牛馬

雜稅竝官房租銀內支給永著爲例以巡捕中營叅將林祖成署直隸天津總兵官○辦理軍機大臣等議覆尚書渣克旦等奏稱巴爾虎等新移呼倫貝爾之處請照索倫之例挑選二千四百人充兵分爲八旗編爲四十佐領每佐領各設佐領驍騎校一員領催六名每翼各設總管一員每旗各設副總管一員其俸餉亦照索倫之例官員每年各給半俸領催每月各給錢糧二兩兵丁每月給錢糧一兩所需旗幟器械等項交該部製造運送應如所請從之○丙辰辦理軍機大臣等議奏北路軍營現有滿洲蒙古綠旗兵共六萬三百餘名俟本年科布多之兵撤回烏里雅蘇泰時即於防戍兵及傅爾丹帶往兵丁內將著有勞績暨孤身無人照管者京師滿洲兵約撤回五百名奉天船廠黑龍江兵約撤回一千名其寧夏右衛暨翁牛特內扎薩克等處兵丁悉行撤回分別給與車輛馬

西其餘兵丁暫行留駐候旨辦理從之○以故和托輝特扎薩克多羅貝勒班第子成滾扎布襲爵○戊午。

上詣

恩佑寺行禮○諭內閣從來天人感應之理捷如影響朕自臨御以來每遇水旱災祲即恐懼做畏思政事之闕失虔加省改不肯諉其過於臣民惟是

上天之降災往往畫地分疆廣狹不一有隣省俱獲豐登而一省獨遭荒歉者亦有通省皆收而一府一縣或一鄉一里獨罹災沴者此豈

上天有所厚薄於其間哉或由彼地之文武官弁政令乖舛或由本鄉之人庶風俗澆漓其招致之由必非無故不可不敬凜

天威上下各自省畏也即如雍正六年直隸通省地方收成豐稔惟宣化府所屬之宣化懷來保安三州縣交界之處廣約四十里長約

百里獨愆雨澤甚覺亢旱是年冬月他處皆得瑞雪而此地獨少此必地方文武大員不能妥協或無知愚民有干和氣之所致今年六月間又聞宣化地方苦旱七月杪又有被冰雹之處其大有如拳如鷄子者田禾多被損傷朕思冰雹雖北方所時有而宣化鄉村被災獨甚為近來所罕見可見

上天垂象屢屢示儆於宣化者顯然若彼地官民或視為氣數之適然而不知恐懼戰慄思過省愆是不知敬

天畏

天而為無忌憚之小人矣其何以感召

天和享百室盈寧之慶乎著該部將朕此旨通行曉諭宣屬文武官員兵民著人人各自省疚共戴

上天垂象示儆之意以迓將來時和年豐之福

○添設廣東平遠縣壩頭司巡檢一員西寧縣懷鄉司巡檢夜護司巡檢各一員裁都城

司巡檢一員。從廣東總督鄂彌達請也。○扎魯特扎薩克多羅貝勒畢魯瓦故。遣官致祭。○己未。授故輔國將軍善福子珠隆爲奉國將軍。○辛酉。吏部議覆。河東總督王士俊疏。奏。豫省府州縣改設分隸事宜。一。直隸陳州。請陞爲陳州府。直隸許州。請陞爲許州府。裁知州。州判。學正。吏目等缺。各設知府一員。通判一員。教授一員。司獄兼管經歷一員。添置陳州府附郭一縣。設知縣典史各一員。以陳州舊設訓導。爲新縣訓導。並原屬之西華。商水。項城。沈邱四縣。暨開封府屬扶溝。太康二縣。俱隸陳州府管轄。添置許州府附郭一縣。設知縣典史各一員。以許州舊設訓導。爲新縣訓導。並原屬之臨潁。襄城。郛城。長葛四縣。暨直隸禹州。及所屬密縣。新鄭二縣。俱隸許州府管轄。一。直隸鄭州。並所屬滎澤。滎陽。汜水。河陰四縣。請改歸開封府管轄。河南府屬盧氏縣。請改歸直隸陝州管轄。均應如所請。

從之。尋定陳州府附郭縣曰淮寧。許州府附郭縣曰石梁。○壬戌。諭宗人府。貝勒允禩人本庸愚。性復懶惰。朕從前加恩特封貝勒。冀其知恩。悛改奮勉。向上。以副朕期望之意。豈料伊秉性糊塗。毫不知感。上年派往祭陵。伊行至通州。稱病而回。今年派出。又托病不往。甚屬無知。著革去貝勒。降爲公爵。以示儆戒。弘春向來爲人尚屬小心勤謹。所以屢加恩眷。及晉封郡王之後。肆口輕佻。不顧行止。迥異從前。且所辦該旗事件。種種舛錯。著革去郡王。仍爲貝子。照舊管理鑾儀衛衙門事務。○諭辦理軍機大臣等。衆佛保著仍回北路軍營。辦理事務。○旌表河南太康縣烈婦張雷妻高氏。拒姦不辱。自縊完貞。給銀建坊。入祠致祭。如例。○癸亥。以禮部侍郎留保總理太平峪萬年吉地工程。○乙丑。雲貴廣西總督尹繼善疏報雲貴等處漢土官兵進剿元江。臨安普

思一帶逆夷悉經蕩平軍務告竣酌於普思留兵二千一百名元江留兵一千三百名新平留兵三百名臨安留兵三百名暫行貼防其餘概行撤回下部知之○丙寅諭辦理軍機大臣等朕聞侍郎馬爾泰之母年已七十有餘馬爾泰著回京供職俾得就近侍養其所管西寧事務著原任湖北巡撫德齡前往辦理其肅州協辦軍需仍著副都御史二格前去○擢監察御史覺羅栢修爲內閣學士兼禮部侍郎○署鑲黃旗漢軍副都統法保緣事革職以鑲黃旗叅領噶柱署本旗漢軍副都統○戊辰諭理藩院輪班朝覲之蒙古王貝勒貝子公等今歲著停其來京○調正黃旗蒙古副都統哲爾金爲本旗滿洲副都統以署鑲紅旗蒙古副都統阿蘭泰爲正黃旗蒙古副都統○己巳秋分夕

月於西郊遣淳郡王弘暉行禮○陞左翼前鋒統領博第爲正白旗蒙古都統仍留軍前以

正白旗滿洲副都統偏圖署本旗蒙古都統陞正黃旗叅領金通保爲鑲紅旗漢軍副都統兼署正紅旗漢軍副都統○雲貴廣西總督尹繼善題雲南普洱府車里宣慰使刀金保於雍正七年故子刀紹文年幼暫停襲職今年十五歲請照例承襲下部知之○辛未調湖北按察使王柔來京直隸按察使竇啟璘爲湖北按察使司按察使陞工部郎中多綸爲直隸按察使司按察使○添設直隸薊州糧河通判清河道屬潞龍河管河通判天津道屬三角淀管河通判各一員祁州管河州同一員蠡縣管河縣丞魏縣管河縣丞武清縣管河縣丞各一員東鹿縣管河主簿東安縣管河主簿各一員潮河外委把總白河外委把總永定河外委把總各一員改鎮標安陵汛千總一員兵五十三名歸河標管轄河標左營崔黃口汛右營西儀集汛把總二員兵七十六名歸鎮標管轄從直隸河道總

督顧琮請也。旌表山東臨淄縣烈婦胡仁妻霍氏。拒姦不污。自縊殞命。給銀建坊。入祠致祭如例。○壬申。諭內閣。謝旻本一司官之職。朕因其有辦事諳練之名。不次擢用。至湖南河南藩臬兩司。歷任上官。皆言其優。因簡用江西巡撫。乃伊到任以來。一切辦理及奏請事件。瞻徇摸稜。虛偽不實。是以降旨內用侍郎。再加試看。今據接任巡撫常安奏稱。伊在江西任內。吏治懈弛。官糧逋欠。營伍曠廢。竊賊衆多。種種玩愒之狀。不可枚舉。著革職。○諭辦理軍機大臣等。朕前降旨。凡軍前發回之官兵。兵丁內有曾著勞績及受傷殘廢之人。官員賞給半俸。兵丁賞食半餉。所降諭旨甚明。近聞該督撫等。將從前發回之兵丁。一概給與半餉。似此懶惰。不肯出力之人。稱病退縮。希冀還家。不過差勝於潛逃者。若與出力受傷之人。一體加恩。則賞罰不明。何以分勤惰而昭懲勸。著曉諭派兵省分之督撫。

等知之。○陞詹事府詹事顧祖鎮爲內閣學士兼禮部侍郎。○裁太常寺犧牲所滿所副一員。增設漢所牧一員。從太常寺少卿唐綏祖請也。○旌表廣東海豐縣烈女謝錫川聘妻張氏。矢志殉夫。投繯殞命。給銀建坊。入祠致祭如例。

大清世宗敬天昌運建中表正文武英明寬仁信毅大孝至誠憲皇帝實錄卷之一百四十六

大清世宗敬天昌運建中表正文武英明寬仁
信毅大考至誠憲皇帝實錄卷之一百四十七

監修總裁官光祿大夫經筵講官太保議政大臣保和殿大學士兼兵部尚書總理兵部事三等伯加十五級臣鄂爾泰

總裁官光祿大夫惲筵日講官起居注太保兼太子太保保和殿大學士兼戶部尚書仍兼管吏部尚書翰林院掌院

事三等伯加十三級臣張廷玉光祿大夫經筵日講官起居注太保議政大臣武英殿大學士兼工部尚書仍兼管

翰林院掌院事加二級臣福敏光祿大夫經筵講官太子太保東閣大學士兼禮部尚書加六級臣徐本光祿大夫

經廷講官議政大臣協辦內閣大學士事務禮部尚書仍兼管太常寺鴻臚寺事臣三恭等奉

較修

雍正十二年甲寅九月癸酉朔擢監察御史

۱۰۰

→

納爾泰爲光祿寺卿○乙亥諭刑部國家刑
名最關緊要而九卿秋審定擬尤爲讞獄大
典各省撫臣所奏若輕重不同九卿當悉心
斟酌務期畫一以成協中之治假使寬縱者
仍其寬縱嚴刻者仍其嚴刻則各省刑名委
之督撫更無餘事又何用廷臣之集議乎嗣
後秋審案件若其中有應改而不改及不應
改而妄改者經朕察出定將九卿從重議處
若九卿及與議之官員等意見或有不同准

兩議陳奏請旨定奪。即衆人皆同。而一人獨異者。亦准陳奏。○丁丑諭內閣。各省所定府州縣衝繁疲難等缺。多未確當。著各該督撫再行詳細查明。據實具題。如具題之後。將來接任督撫。仍有題請更改者。將原題草率之督撫。交部議處。其苗疆煙瘴邊遠等缺。亦著一體分晰確當具奏。如有疎忽。亦照此議處。○禮部議覆。江西布政使李蘭條奏。故唐御史中丞張巡見危授命。保障江淮。江西居民廟祀最盛。捍禦鄱陽一湖。屢昭顯應。請加封賜祭。應如所請。從之。尋封爲鄱陽湖顯佑安瀾之神。○議敘進勦四川紫古別兒斯堡賊番功。遊擊傅宏禮等。及陣亡受傷兵丁陞銜賞卹有差。○戊寅兵部議覆直隸總督李衛疏奏。裁改官弁兵丁事宜。○張家口協標請裁左營遊擊一員。左右營守備二員。千總五員。把總九員。改右營都司。爲左營中軍守備。○改張家口路標叅將爲遊擊。添設千總二

員。把總三員。裁柴溝營叅將一員。改柴溝營守備爲都司。改龍門路遊擊爲都司。所轄趙川堡守備爲千總。添撥龍門路屬長安嶺把總一員。改長安嶺都司歸宣化鎮管轄。改石匣營副將爲提標前營遊擊。裁守備一員。千總一員。把總三員。一裁順義營遊擊一員。撤原撥居庸路把總一員。歸本營。改懷來路叅將爲都司。懷來路中軍守備爲懷來城守備。添設岔道汛守備一員。永寧路千總一員。東馬營外委把總一員。移石匣營守備一員。駐天津鎮。添撥寧河縣把總一員。韓村外委把總一員。改順德廣平兩營都司俱爲遊擊。各添撥千總一員。外委把總一員。杜勝營添撥千總一員。外委把總一員。移開州千總一員。駐臨洺關。添撥開州城守備一員。把總一員。高家鋪等集外委把總。磁州彭城鎮外委把總各一員。移易州馬水口外委把總一員。駐黃莊司。紫荆關外委把總

一員。駐奇峯口。原設官莊嶺汛兵駐孔哥莊。添設馬水口把總一員。涑水縣把總一員。改河協城操營守備爲景州營守備。移城操營外委把總一員。駐大龍灣。南皮縣外委把總一員。駐馮家口。馮家口把總一員。駐南皮縣。一添撥馬水口營固城店把總一員。撤原撥高陽新安二縣之河協外委把總二員。回本營。添撥高陽新安外委把總各一員。添設張家口外太平莊把總一員。黑河川千總一員。一宣化府屬之沙城。延慶州屬之永寧城。竝古北口城內。各添設巡檢一員。古北宣化沿邊等處新募兵五千四百名。應分別裁汰者二千三百零六名。此內人材不堪。准令歸農者三百三十六名。撥補舊額老弱兵二百二十五名。再於蔚州。獨石。龍門等營。添派四百七十名。於拱極。通州。畿南各府等營。添派五百七十八名。餘六百九十七名。俱歸督標。以補新營召募之數。均應如所議從之。

○己卯陞署直隸宣化總兵官補熙爲江南提督以原任江南提督南天祥署直隸宣化總兵官○庚辰遣官祭

歷代帝王○遣官祭城隍之神○辛巳吏部議覆宗人府府丞張國棟條奏賢良方正出身人員原因行止端方才品素著始膺保薦得官之後除因公註誤仍照定例議處外如犯貪酷不法等案應分別加倍治罪至原保舉之州縣道府及不能查出之督撫等亦請分別加等議處應如所請從之○戶部議覆正藍旗漢軍副都統祖魯條奏旗員在河工効力年久者往往潛住在外不復歸旗請飭令河道總督詳加考核其不熟悉河務者照外任旗員例勒令歸旗至諳練河務應行留工人員其家口悉照外省駐防例分別旗分註明丁冊移咨該旗儻有逗遛隱漏等弊查出照歸旗違限例治罪應如所請從之○壬午以翰林院侍讀王安國提督廣東肇高學

政○甲申遣吏部侍郎呂耀曾大理寺卿德福往貴州宣諭古州等處苗蠻人等諭曰朕爲天下生民主撫御萬方凡有血氣皆吾赤子莫不望其遂生復性以同受朝廷之德化是以各省苗犛獠獠種類雖殊皆漸次經理化其頑梗期其善良况爾古州等處苗人尤非僻處窮邊者可比地界在黔粵兩省之中與內地人民土壤交錯乃從前惡習相沿罔知法度恃其險阻出沒無常擾害居民邀截行旅且即同類之中自相讎殺報復相尋以強陵弱以衆欺寡視劫奪爲固然等人命如草芥此等殘忍之風朕實深爲憫惻故於數年前命封疆大臣等經理化導其怙惡抗拒者不得不懲以兵威而革面革心者悉加意撫綏俾遊樂土今苗疆諸事就緒凡爾苗衆皆爲服教向化之良民矣不但朕民胞物與一視同仁之懷於焉大慰即爾苗衆亦當知去危苦而就安全離湯火而登衽席豈非爾

古州等處從來未有之美俗乎。如果自茲以往。戕賊之念不萌。頑梗之心不作。安居樂業。守法奉公。樸者優游於耕鑿。秀者沐浴於詩書。爾等苗衆與土著之民。一同上進。且使爾子子孫孫。服膺食德。永受國家教養之福。豈不善歟。今因苗疆奠定。特遣大臣會同該省文武大員。親歷古州等處。宣朕諭旨。竝加賞賚。爾等苗衆其仰體朕心。祇遵朕訓。父教其子。兄勉其弟。族黨親朋。互相勸勵。共敦善俗。永息刁風。以副朕育正羣生之至意。○乙酉。以翰林院侍讀劉統勳編修梁詩正俱充日講起居注官。○改順天府北城黃土司巡檢爲清河巡檢。駐清河從順天府府尹陳世倌請也。○丙戌。工部議覆山東巡撫岳濬疏言。德州係衛河迴溜頂衝之處。每遇雨水驟發。直潰東隄。查城北有哨馬營地方。在衛河東岸。應於此地開挑新河。建滾水壩一座。兩岸各築遙隄。酌開涵洞四座。以資宣洩。應如所

請。從之。○丁亥。吏部等衙門議覆。陞任雲南臨元總兵官董芳疏言。雲貴川廣等省苗疆地方。請照臺灣例。令文武官弁互相稽察。文職同知以下等官。武職遊擊守備以下等官。如有將苗夷科派擾累等情。除該員弁叅處治罪外。其同城文武代爲容隱不行揭報者。查出一併分別議處。至邊地山箐深密。道路崎嶇。該管官弁如不親身前往。致生事端。亦令文武官弁互相稽察。違者查叅議處。均應如所請。從之。○戊子。諭內閣。各省生童往往因與地方有司爭競齟齬。相率罷考。此風最爲惡劣。士爲四民之首。讀書明理。尤當祇遵法度。恪守憲章。化氣質之偏。祛囂凌之習。況國家之設考試。原以優待士子。與以上進之階。凡此生童。不知感戴國恩。鼓舞奮勉。而乃以私忿罷考。爲脅制官長之計。有是理乎。嗣後如果該地方官有不公不法陵辱士子等情。許令生童等赴該上司衙門控告。秉公剖

斷儻不行控告而邀約罷考。即將罷考之人。停其考試。若合邑合學俱罷考。即全停考試。該部妥議通行。○以署鑲紅旗滿洲副都統伊蘭泰爲正紅旗蒙古副都統。○浙江提督萬際瑞因病乞休。允之。陞江南蘇松水師總兵官李燦爲浙江提督。福建臺灣水師副將陳倫炯爲江南蘇松水師總兵官。○改湖北黃岡縣下庶鄉等地方歸黃州府同知管理。團風等地方歸通判管理。從湖廣總督邁柱請也。○辛卯諭內閣。嗣後凡繕寫諭旨進呈時。將硃筆更改者。遵照謄寫。與硃筆所改之旨一併呈覽。再從前各部院衙門八旗繕寫諭旨進呈。經朕硃筆更改者甚多。併著各處查出謄寫與硃筆所改之旨一併呈覽。○工部尚書海壽緣事解任。以刑部尚書憲德兼理工部尚書事。陞翰林院侍讀學士張廷琰爲詹事府詹事。○陞步軍統領鄂善爲正藍旗滿洲都統。仍兼步軍統領事務。以刑部尚書

憲德署正紅旗滿洲都統。○刑部議覆四川巡撫鄂昌疏言。凡因姦致死人命。分別已未成姦定例。惟傷人未死者。例內未經議及。請嗣後除強姦婦女。止以手足行強者。已成未成。仍照凡姦本律。如因強姦執持金刃凶器。戳傷本婦。及拒捕致傷旁人。已成姦者。擬斬監候。未成姦者。擬絞監候。應如所請。從之。○壬辰陞正紅旗護軍統領阿岱爲左翼前鋒統領。仍留軍營。西路副將軍張廣泗等奏報。本年九月初四日。吳爾圖水有賊數百人。夥聚藏匿。臣即飛飭副都統班第達付。原任總兵張元佐。遊擊郎建業。於初五日五鼓。齊赴喀桃以南蘆草溝一帶。復飛飭固原提督樊廷帶兵赴鰲泉子地方。分路搜勦。果於喀桃遇見賊夷潛伏。我兵奪據山梁。衝入賊隊。連敗賊衆。遂越過噶順。直抵鄂龍吉大坂。計斬賊四百餘人。生擒三十六人。身負重傷者甚衆。所獲馬匹器械口糧等物無算。追殺

一百七十八里。餘賊遠遁。得旨。張廣泗調度分遣。悉協機宜。在事將弁兵丁等。俱各奮勇直前。得獲全勝。甚屬可嘉。著從優議敘賞賚。署大將軍查郎阿。雖奉調來京。然自統兵以來。與張廣泗同心協力。整飭戎行。鼓勵士氣。此番克捷。亦由查郎阿平日訓練整頓所致。著一併交部從優議敘。○癸巳諭刑部。爾等職司邦禁。弼教明刑。惟一秉至公。庶幾大小獄訟。歸於平允。夫胸中不存一物。但存一片公心。猶恐人之情偽難窮。未必事事協於至是。何況先存一從寬從嚴之見。橫據胸中。以待事至。是則纖塵著眼。泰山在前。而不能覩。豈能得其實情。又況挾私徇情。顛倒是非乎。至於用刑。不可視為習慣。人情乍見。則心怵目驚。相習則安之若素。朕在藩邸時。奉聖祖仁皇帝諭旨。審理事件。初見夾訊。竟至戰慄悲涕。迨經數次辦理之後。便視為尋常。人情熟習。薰染之為害如此。爾等日日習見。未

免臨事輕率。務須保守此心。常如初見之怵惕。更須將面前聽訊之人之心。詳細體量。委曲推求。則不特不敢輕易用刑。且心誠求之。何患情實之不得。夫事之情形不一。如人之面目不同。雖極相似之案件。若細心推求。必有不同之處。非律例之所能該。縱使加倍增添律例。亦斷不能全該未來之案件。若非實心辦理。秉公衡量。其輕重之間。豈能無失。爾等如肯以至公之心。求其平允。則刑貪戮暴。正所以為集福之基。如其寬嚴任意。輕重失衡。或且以婦寺之仁。曲貸姦宄之命。以為求福之道。斯則自求其禍。有何福之可得。朕於此理見之甚明。爾等深信力行。自有效驗。勉之。慎之。○又諭。朕每閱獄讞。至罪重惡極人犯。雖情理可惡。必平心靜氣。將伊致罪情由。詳加審度。苟有一線可生之路。必為之細細推求。求其生而不得。方置之於法。不敢因一時之見而失於嚴。至情似可原者。朕推情度

理必其實有可原。然後加以矜恤。亦不敢任一時之見。而失於寬。爾等刑憲大臣。尤須詳體此意。於讞獄時。必設身處地。詳慎推求。以期允當。一案有一案之委曲。一犯有一犯之情罪。不可有意於寬。亦不可有意於嚴。大凡人之處事。始而矜持。久則漸熟。未必不輕忽任意。若於用刑之時。能常存初任刑憲之心。庶刑獄得其平。而天下無冤民矣。○調倉場侍郎楊超曾為刑部額外侍郎。吏部右侍郎呂耀曾為倉場侍郎。○二等阿思哈尼哈番達什色楞緣事革職。以其子納木扎布承襲。○甲午。以兵部右侍郎通智協理歸化城都統事務。○福建總督郝玉麟疏報臺灣府彰化縣沙里興社生番一百九十餘名口。傾心歸化。願隸版圖。輸誠納賦。下部知之。○乙未。諭內閣。四川敘永廳與永寧縣同處一城。從前廳隸四川。縣隸貴州。各設稅口。徵收鹽雜等課。嗣經兩省會勘。將永寧改隸蜀省。所有田

地丁糧已俱改照川省條例徵收。惟稅課一項。仍係廳縣兼收。實屬重複。著將縣稅裁除。止留廳稅。一切俱照川省之例行。○定邊大將軍平郡王福彭奏言北路軍營。遵旨裁撤兵丁。臣將漢軍官兵交與都統祖秉衡統領。防戍官兵寧夏右衛官兵交與本營營總等統領。已於八月十九等日。由軍營起程。其攜帶家口之察哈爾土默特兵丁一千名。交與副都統職銜色爾古楞統領。送往歸化城。俟安插完畢。令色爾古楞回京。奏入。報聞。○命雲南廣西府開爐鼓鑄。從雲南巡撫張允隨請也。○丙申。改廣西貴縣辛安寨巡檢為五山汛巡檢。駐陸村。移平南縣大同鄉巡檢駐大烏墟。裁武宣縣安永巡檢一員。移原駐武宣縣城之縣廓鎮巡檢。駐縣廓。從廣西巡撫金鉷請也。○旌表福建福清縣烈女施魁聘妻周氏。矢志殉夫。投繯殞命。給銀建坊。入祠致祭。如例。○丁酉。諭內閣。陝省今歲秋禾受

旱。水田雖可有收。而旱田收成大減。明年青黃不接之時。米糧或至騰貴。不可不預爲籌備。查陝省與河南接壤。雍正十一年春間。撥運豫米十萬石。自水次裝載。直抵西安。已有成效。上年曾令河東總督王士俊。於沿河州縣水次。貯穀三十萬石。並將上年豫省漕米截留易穀。以備陝省之用。是豫省備運陝省之米。甚爲充裕。儻明年陝省有需用之處。著巡撫史貽直等。一面具奏。一面即將需用米數。行文王士俊料理。照上年之例。由水道運赴西安應用。將此并諭王士俊知之。○又諭倉場侍郎宗室塞爾赫。奉差口外。呂耀曾奉差貴州。刑部額外侍郎楊超曾。著仍辦倉場事務。○定邊大將軍平郡王福彭奏言。北路進勦官兵。臣等遵旨撤回。於九月初六日。臣帶領奉天兵二千名。船廠兵一千名。黑龍江兵一千名。從科布多軍營起程。令副都統王常領右衛兵一千名前行。其餘兵丁。令副將

軍塔爾岱常德等。率領殿後。俱各遠設卡倫。瞭望防範。行至察罕鄂羅穆地方。分爲三隊。臣領兵由空各衣中路行。仍令塔爾岱等居後。又令公葛木丕爾。哨兵在後爲殿。派叅贊阿岱。率領一隊行。扎布韓路。以公敏珠爾。哨兵殿後。派副都統哲庫訥。率領一隊行。空各衣北路。以貝勒成滾扎卜。哨兵殿後。分道撤回。俟大軍齊集過冬地方。酌將察哈爾厄魯特兵。索倫兵。並內大臣哈達哈等。所領黑龍江兵。副都統富昌等。所領船廠兵。副都統額爾勤等。所領奉天兵。分駐魯約蘇圖蒙郭爾烏拉克沁等處。京城八旗兵。寧夏兵。察哈爾土默特兵。並叅贊阿岱等。所領奉天兵。副都統布爾沙等。所領黑龍江兵。分駐布爾噶雅。鏗格爾克等處。家選兵駐劄濟斯布隆地方。集魯穆會盟兵。四子部落兵。駐劄扎布韓河地方。都統諾爾渾等。所領漢軍兵五百名。并駐劄烏里雅蘇泰兵一千五百名。合爲一營。

駐防察罕叟爾城內。歸化城土默特兵。綠旗兵。烏蘭查卜會盟兵。並副都統白爾赫圖所領奉天兵。俱在烏里雅蘇泰城外。附近水草處駐劄。再喀爾喀遊牧地方遼遠。酌令喀爾喀兵丁。在大軍迤東駐劄。其哨探兵。分爲三路。每路派滿洲及內扎薩克兵二百五十名。喀爾喀兵二百五十名。所有各處卡倫。減撤一半。自卡倫以至大營。仍照舊分爲三路。設立臺站。以資聲援。俟大軍駐定後。再爲商酌辦理。奏入。報聞。○予故一等忠達公馬禮善祭葬如例。○己亥。

孝慈高皇后忌辰。遣官祭福陵○

上回宮○賑濟安徽宣城鳳陽等十五州縣衛被水災民。○辛丑。

孝敬皇后忌辰。遣官致祭。○諭內閣。各省鹽政。關係國計民生。所當加意整理。而兩淮鹽務之積弊。更在他省之上。此中外所共知者。大

約鹽法之行。必以緝私爲首務。兩淮行鹽地方。江西河南有浙私蘆私之侵越。而湖廣之川私粵私。爲害更甚。現今雖於各處隘口。設立巡官巡役。而地方文武官弁。不肯實力奉行。一任兵役人等。避難趨易。罔利營私。以致立法雖嚴。而鄰私之肆行如故。即在江南督臣。亦不過責成所屬地方。至咨會鄰省。即未必有呼輒應。此私販之所以難禁也。年來朕留心訪聞甚確。用是特頒此旨。曉諭湖廣等省督撫等。務矢公心。視鄰省之事爲己事。嚴飭文武官弁。同心協力。家喻戶曉。使川粵浙蘆之私鹽。不敢越界橫行。則兩淮積引易銷。於國計民生。均有裨益。○壬寅。兵部議覆正藍旗漢軍副都統祖魯條奏。八旗事務。現派侍衛參領等稽查。請照都察院統轄科道例。派領侍衛內大臣二員。散秩大臣二員。總司統轄。如有藉詞脫卸。不肯列名。或玩忽遲延。任意不到者。即照推諉遲延例議處。遇有查

旗掌印官員缺出。令該總統大臣秉公揀選。帶領引見補授。至五年軍政時。令該總統大臣。將侍衛叅領等。出具考語。分別等第。以示勸懲。應如所請。從之。

大清世宗敬天昌運建中表正文武英明寬仁信毅大孝至誠憲皇帝實錄卷之一百四十七

大清世宗敬天昌運建中表正文武英明寬仁信毅大孝至誠憲皇帝實錄卷之一百四十八

敕修

雍正十二年甲寅冬十月癸卯朔享

太廟

上親詣行禮○遣官祭

永陵

福陵

昭陵

昭西陵

孝陵

孝東陵

景陵

孝敬皇后○頒雍正十三年時憲曆○工部議覆河東河道總督朱藻疏言東省河工雜項錢糧向交運河廳東昌府兩庫存貯凡經收支解係該府廳爲政至黃河泉河以及浦沔上下等六河兵夫工食銀兩亦係各該廳支收俟有盈餘始令解歸河庫其中不無侵那扣剋等弊今山東曹東道既經改爲通省管河道請照豫省之例將兩庫六河該府廳銀兩俱歸管河道庫存貯遇有需用照例支給其有應解別處錢糧令河道查明具詳總河給咨批解應如所請從之○是日

上幸圓明園○乙巳旌表河南信陽州烈婦呂國林妻鄒氏拒姦不污投繯殞命給銀建坊入祠致祭如例○丙午果親王允禮奏言凡臣工條奏理宜據實敷陳不當相爲授受及撫拾已行之事希圖塞責嗣後係細微之事本部院大臣即酌定辦理如該員不行呈明酌定而率爲條奏者交部分別察議儻已經

呈明而該大臣不行酌定仍准其聲明條奏若事果應行將該大臣議處至羣相叅酌撫拾舊事混行瀆奏者從重治罪得旨果親王所奏是著交該部照所奏行並通行曉諭輪班條奏之大臣官員知之○丁未諭內閣數年以來甘肅等處地方辦理軍需民人等輓輸効力朕心深爲軫念已屢加恩澤以示嘉獎前據督撫等奏報今年禾麥收成俱好朕心甚慰今聞秋間有雨少之州縣如階州靖遠環縣數處收成不足民食稍艱或他處有似此者亦未可定著劉於義許容確加訪查所有歉收之處或應蠲免或應停徵其乏食之民如何撫恤一面定議奏聞一面即行辦理若西安所屬有秋田歉薄之州縣著史貽直碩色亦即確查奏聞照此辦理○以理藩院左侍郎納延泰署工部左侍郎內閣學士覺羅栢修署工部右侍郎工部左侍郎韓光基緣事革職陞內閣學士顧祖鎮爲工部左

侍郎（命鑲黃旗滿洲都統署直隸天津都統邁祿回京。以山東青州將軍鄂彌達署直隸天津都統。調浙江杭州將軍阿里衮爲山東青州將軍。陞浙江乍浦副都統覺羅傳森爲浙江杭州將軍。浙江乍浦協領薩爾哈岱爲浙江乍浦副都統。）吏部議覆直隸總督李衛條奏。熱河及八溝地方各該管官事宜。一。熱河地方既設承德州知州一員。應令原設同知通判專管旗人之事。該知州專管民人之事。一。口外幅員甚廣。凡遇盜案。請令該汛武職會同文員協力緝捕。一。熱河監獄。請專歸承德州管理。並添設吏目一員。以資督捕。一。八溝同知原爲專管三處喀喇沁民人事務。而設若仍令承德州兼理。恐有彼此推諉情弊。應將該地方民人命盜案件。令該同知自行驗審。如有關涉蒙古之事。令會同值年章京驗審。一。八溝既駐有專官。應將熱河東河通判所管之八溝東街等處。歸於該同

知章京管轄。一。八溝同知所司會審案件。應與章京並列官銜。用同知關防。徑行詳解達部。無庸向喀喇沁各王子處用印。一。命盜等案。民人事件。關涉蒙古者。該章京行令扎薩克等。交與所轄地方查緝解送。一。八溝東街向有與熱河通判協辦之守備千總各一員。應撥與八溝同知就近協辦巡查。並請照通判衙門之例。添設巡檢一員。一。八溝同知承德州知州。請仍隸霸昌道兼轄。並照邊缺之例。三年無過。即行陞用。一。熱河理事同知通判等所管巨細案件。向例俱應先報內部定擬。人犯由古北口提督轉解。與內地州縣不同。今既設立知州同知等官。請嗣後除在外法司難以定案者。仍會審徑行解部外。一切旗民命盜。照例申解該上司審擬具題。一。八溝地方遼濶。該同知駐劄之處。請酌量添設遞馬五匹。捕役八名。以供差遣。均應如所請。從之。○禮部議覆。署湖南巡撫鍾保疏言。永

順地方自設府分縣以來人文日盛請於永順府城內建立考棚設教授一員所屬永順龍山保靖桑植等四縣各設訓導一員府學取進文武童生各十二名縣學各取進八名再永順縣向有永定衛歸併戶口桑植縣向有慈利縣歸併戶口俱附澧州考試今永順既設考棚自應各歸本籍並請於永順桑植二縣額設八名內分取永定慈利歸併者各二名均應如所請從之○旌表山西交城縣烈婦翟永寬妻段氏拒姦不污投崖殞命給銀建坊入祠致祭如例○己酉諭大學士等朕思欲小民各得其所亦非必不可得之事如內外大小各官果皆知爲臣不易之道實心實力教養斯民雖不能風移俗易亦可使之安居樂業若以小民犯法謂伊自作自受與己毫無干涉是視斯民之痛癢漠不關心矣夫州縣不特民之父母亦民之師長也須刻刻提撕教誨不啻訓課蒙童與之講解自

然漸漸明曉常見有諄諄與一人言而旁聽者竟能領會故知教導之法貴優游漸漬非偶然宣講上諭便可謂教民也即如招冊內案件俱係爲上者不能教養所致而不肖有司尚敢營私壞法納賄徇情朕不知伊等實具何等肺腸天下上智之人不教而善者不可多得下愚不移者亦少惟中材之人最多全賴有司善爲訓迪見良善者扶持之兇暴者懲治之使百姓曉然於良善之必獲福而兇暴之必取禍則誰不勉爲良善之徒乎○又諭鬼神之道實是體物不遺古聖賢云無愧衾影蓋實見得隨處有神明所以如此戒謹耳惟信以爲有而時時誠敬厥後必然受福若以爲無而事事欺慢厥後必然受禍理有一定毫髮不爽也○命禮部尚書三泰工部尚書徐本俱協辦內閣大學士事○庚戌刑部右侍郎王國棟緣事革職以額外刑部侍郎辦理倉場事務楊超曾爲刑部右侍郎

○以福建建寧總兵官李蔭樾署福建陸路提督○辛亥諭內閣據御史張耆奏稱各省同知通判知州知縣等要缺例應該督撫題補者從雍正九年十年十一年至今尚有未經題補之缺未免懸缺太久署理之人未必實心効力事務廢弛如果不得其人亦應奏請簡補等語朕將該御史所奏交與吏部詳查據奏數年以來各省同知通判知州知縣等官未經題明委署亦未咨部者共十六缺又各省有曾經咨明委署未曾題補者共十五缺朕思各省要缺交與該督撫題補者蓋以緊要地方必得才能熟練人地相宜之員而就近揀選不致曠延時日也今此數省之缺有一二年未經題補者有三四年未經題補者雖各省皆有委署之員然署理日久未分優劣亦不定以期限驗其考成彼將視地方之事如同膜外殊非鼓舞激勸之道是加意於要缺而轉至事務廢弛矣如果該省不

得其人則當奏請簡補不應任意遲緩況其間有題署咨署者亦有不題不咨自行委署者辦理亦不畫一著行文此數省督撫其有出缺至二三年未曾題補者著伊等將緣由明白具奏○以散秩大臣忠達公馬賢署鑲黃旗漢軍都統○吏部議覆安徽巡撫王紘疏言安徽新設道員所轄徽寧池太四府俱在大江南岸若議駐安慶府城則中隔一江難於兼顧且府城現有巡撫臬司駐劄已為嚴密請將添設道員移駐太平府之蕪湖縣兼管蕪湖關稅務以便統轄巡查應如所請從之○壬子議敘西路庫爾墨圖地方官兵擒勦準噶爾逆賊功陝西涼州鎮標中營遊擊郎建業等加銜有差兵丁等賞賚如例○賑濟直隸霸州固安等十七州縣被水饑民○癸丑諭內閣今年六月間江蘇地方雨水稍多州縣低窪之地有被水淹浸收成歉薄者朕心軫念且恐將來米價漸昂不可不預

爲籌畫。著將乙卯年江南起運漕糧截留二十萬石。於被水成災之州縣。各就近留一萬石。或五六十石。於被水不成災之州縣。量留三四千石。俟開春市價增長之時。將此平糶。其成災田地。應徵新舊條銀。若仍行徵輸。小民不無竭蹶。著緩至來年麥熟開徵。再本年應納南漕等米。亦准緩至明秋折納。所有被災地方無力乏食之窮民。據該督等奏稱。已動公項酌賞。但冬春之際。此等民人覓食艱難。應動支倉穀。分別賑濟。毋令失所。著該督撫悉心辦理。並督率有司實力奉行。務令均霑恩澤。○又諭。原任大學士田從典。品行端直。老成謹厚。居官廉潔。奉國公忠。應入賢良祠。以風有位。著九卿會議具奏。尋議照例入祠立傳。再於其家賜祭一壇。從之。○以太常寺卿滿色署大理寺卿。○刑部議覆翰林院侍讀學士習寓條奏。向例免死減等遣犯。在逃與平常遣犯。逃走後行兇爲非被獲者。俱

仍於發遣處正法。但此等逃犯。既被拏獲。自知決無生理。若必解遣所正法。既恐中途復脫。兼虞兵役疲勞。請即令拏獲之地方官審明該犯情罪。開會確查。如與前案相符。令該督撫核題。將該犯即在拏獲地方正法。仍行文發遣處曉示。應如所請。從之。○授故鎮國將軍伊克塔哈子雙麟。爲輔國將軍。○甲寅。奉國將軍馬勇。年老休致。授其子常山。保爲奉恩將軍。○丙辰。陞正紅旗蒙古副都統署鑲紅旗滿洲副都統伊蘭泰。爲正紅旗護軍統領。○戊午。諭內閣。向以浙江吏治營伍。俱須整理。而浙閩總督駐劄閩省。未免隔越。是以特授李衛。爲浙江總督。兼管巡撫事務。此係因時制宜。隨才任使。一時變通之政。並未永著爲例也。今浙江事務。經李衛辦理以來。已漸整頓。而程元章。又以伊之才力。難兼總督巡撫鹽政三重任。恐致曠誤。爲辭。近郝玉麟來京。陛見。朕看其才具精神。足以貫注兩

省著仍照舊制授郝玉麟爲浙閩總督程元章以總督銜專管浙江巡撫並兩浙鹽政事務又從前降旨將廣西一省暫隸雲貴總督管轄者因廣西與貴州接壤俱有苗疆應辦事務若非該總督總統節制恐文武官弁呼應不靈今苗疆用兵事竣諸事就緒年來內外臣工多奏稱廣西距雲南路遠廣東路近不若就近爲妥便等語滇黔兩粵情形本是如此即朕初意亦不過俟苗疆事竣仍行照舊非謂尹繼善不能兼管三省而前後互異也其應否仍隸廣東之處著九卿會議具奏○己未諭內閣向因倉場米石關係緊要在京十倉每倉或都統或副都統各派一員御史各派一員專任稽察之責於倉場不無裨益但從前未定更換之期現在各員中有歷至三四五年者朕思日久因循易生懈怠且或偶有疎虞該員慮干失察因而掩飾彌縫亦未可定著定爲三年更換之例屆期各倉

一同更換若有接任之員未滿三年即屆更換之期者亦一體更換庶稽查嚴密而瞻顧之弊可免該部即遵諭行○又諭原任大學士高其位端方廉潔忠厚和平簡任綸扉壽登大耋應入賢良祠以旌耆舊著九卿會議具奏尋議照例入祠立傳再於其家賜祭一壇從之○以原任工部右侍郎巴泰爲工部尚書調刑部左侍郎喬世臣爲工部右侍郎陞安徽巡撫王紘爲刑部左侍郎○調福建巡撫趙國麟爲安徽巡撫陞河南布政使盧焯爲福建巡撫○定邊大將軍平郡王福彭奏言臣遵旨從科布多撤兵將兵丁分爲三路陸續起程行至空各衣河擇附近水草之處將臣所領奉天船廠黑龍江兵各一千名令其駐劄過冬所有察罕鄂羅穆地方存貯米石酌量給與探哨官兵餘俱運至空各衣河之機達渾地方留綠旗兵三千名看守又令前鋒統領塔爾馬善將所統前鋒兵八百

名即于機達渾地方附近彈壓其王羅卜藏等所統內扎薩克兵及貝勒成滾扎卜等所統喀喇沁土默特兵俱接連駐劄臣領右衛兵一千名奉天兵一千名於十月初一日抵烏里雅蘇泰軍營奏入報聞○辛酉諭內閣鑲黃旗滿洲都統邁祿現有查問之事不便令其辦理旗務著大學士鄂爾泰照常署理邁祿著解任候旨○癸亥正藍旗漢軍副都統祖魯奏言文職旗員內有才具平庸難勝部屬州縣之任者准以旗缺對品補用但此等人員弓馬既屬生疎旗務又不諳練若非指定銜缺補用恐有任情愛憎高下其手之弊請敕下該部就其品級擬定銜缺如科道郎中道府等官以副參領公中佐領補用員外郎同知知州等官以步軍校副佐領補用主事通判知縣等官以驍騎校補用其司府衛之首領州縣之佐貳以及筆帖式等官俱以副驍騎校補用該旗大臣留心試看其技

藝生疎行走怠惰者即行叅奏治罪若果奮志黽勉著有勞績一年之後遇有應補缺出據實出具考語與該旗應陞之員擬定正陪引見恭候簡補從之○甲子諭內閣

壇

廟乃祭典攸關俱當潔淨嚴肅

太廟

社稷更宜恭敬故派太監等專責以掃除之事又派旗員輪班看守若非祭祀之日一應官員不許擅入原係定例近聞在內住宿之太監等將伊等親友縱令出入行走看守之旗員亦將親友引入廊院乘涼此皆平日懈弛之所致也著交禮部太常寺嚴查禁止割草之人令太常寺酌量選擇數名令其敬謹除治並交與內務府御史等不時稽查如有容留閒散人等混入者即行指名題叅嚴加治罪如仍前懈弛經朕聞知定將禮部太常寺堂官及御史等一併交部議處○陞鴻臚寺

卿勵宗萬為內閣學士兼禮部侍郎○正藍旗護軍統領蘇爾鼐緣事革退。陞正黃旗滿洲副都統哲爾金為正藍旗護軍統領○以湖廣彝陵總兵官冶大雄署山西大同總兵官。陞雲南永順副將王進昌為湖廣彝陵總兵官○丙寅諭內閣四川夔關稅務向因未定章程。從京師特派官員前往監督。數年以來章程漸定。不須特遣官員。著照舊例。仍交地方大臣委員管理○兵部議覆本部左侍郎楊汝穀條奏。各省題補武職。其中有越銜越缺。及本省籍貫。并停陞住俸與例不符之員。請令於題本內聲明。俟奉旨准其送部之日。令該員領咨赴部。至於遞行題補各員。並令先將首題之員送部引見。俟奉旨准補後。再將接次補缺之員陸續送部。應如所請。從之○刑科給事中黃祐條奏。請將國朝臣工詩文賦頌。派員遴選刊布直省。得旨。著內閣禮部翰林院等衙門議奏。尋議我國家文運

昌隆超越前代

聖祖仁皇帝御製文集精微廣大燦若日星。我皇上聖學高深。文明光被。

宸章奎藻炳蔚古今。凡在珥筆諸臣。賡賜盛烈。歌咏昇平。或朝章國典。譜以聲詩。或上瑞嘉符。形於雅頌。以及應制紀恩。詞林館課。誠宜搜輯薈萃。刊刻頒行。俾海內士子有所程式。應如該給事中所奏。行再查康熙四十八年大學士陳廷敬等編集

皇清文穎一部。業經進呈。因其選擇尚未精當。是以未行頒發。今請將原本交出翰林院派員遴選。謹將

聖祖文集選錄冠於卷首。並懇

皇上頒發御製詩文。敬謹編入。垂示萬世。至諸臣所作。除將文穎所選者。詳慎刪錄外。其嗣後廷臣進呈詩頌等冊。一併發出彙選。務取音律和平。詞義正大者。陸續編次進呈。俟書成之日。刊刻頒行。從之○戊辰諭內閣。朕從

來不言祥瑞屢頒諭旨曉示天下臣民是以數年來凡以嘉祥入告者朕皆屏拒弗納而各省之瑞穀嘉禾誕降者甚多悉令停其進獻蓋欲天下臣民共敦實行不尚虛文以爲敬

天勤民之本也今據湖廣鎮筵總兵官楊凱奏報鎮筵紅苗甫經向化今年苗民所種之山田水地黍稷稻粱盈疇遍野及至秋成則皆雙穗三穗四五六穗不等萬畝皆然苗民額手歡呼以爲從來未有之奇瑞等語又據侍郎蔣洞奏報高臺縣屬雙樹墩地方在鎮夷堡口外自開墾以來人煙日盛今歲秋成粟穀挺秀有一本之內枝抽十餘穗者有一穗之上叢生五六穗者屯農共慶爲奇觀司墾咸稱爲盛事等語朕思苗疆播種乃夷民務本之先資遠徼屯田關邊塞軍儲之重計今值經營伊始欣逢瑞穀呈祥且地廣穗多超越於見聞紀載之外仰見

天心眷佑錫福方來苗民之樂利可期軍旅之糗糧有賴此非空言祥瑞而無濟於實用者可比朕心不勝感慶在廷臣工莫不有撫綏苗衆籌邊足食之同心聞之定爲色喜是以將楊凱蔣洞奏摺及穀本圖樣發出共觀之

○己巳諸王大臣等奏言

景陵寶城山產瑞芝九本蒙

皇上宣示臣等端肅敬觀歡忻忭舞此皆

皇上純孝所感恭請宣付史館昭示中外以承

聖祖貽庥之慶以彰

上天錫福之心

上召入諭曰今歲元旦立春喜遇四寅仰蒙

上天特賜盈尺之瑞雪朕心感慶期與臣民共

加儆勉自春及秋直省地方雨暘時若除直

隸江南近水數縣河流有漲溢之處陝西數

縣得雨稍遲外其餘則甘霖應候禾稼豐登

雖不敢遽稱大有之年而各省年穀順成大

率相類誠爲罕觀此皆

上天

聖祖賜佑國家顯然昭著者今當萬寶告成之

候西師報捷之時欣覩瑞芝九本產於

景陵寶城最近之山上屈指數年以來三秀之

瑞已經四見實乃

上天恩賜以表彰我

皇考之聖德神功欲使中外臣民咸知樂利養

恬共享昇平之福者皆我

皇考之所留貽非偶然也據此則諸王大臣等

奏請宣付史館昭示中外於理應行至謂朕

純孝所感朕實愧不克當并曉諭天下臣民

共知之○以正紅旗護軍統領伊蘭泰仍兼

理鑲紅旗滿洲副都統事務○辛未

萬壽節停止朝賀筵宴○

上詣

恩佑寺行禮○遣官祭

福陵

昭陵

昭西陵

孝陵

孝東陵

景陵

孝敬皇后○遣官祭真武東嶽城隍之神

大清世宗敬天昌運建中表正文武英明寬仁
信毅大孝至誠憲皇帝實錄卷之一百四十八

大清世宗敬天昌運建中表正文武英明寬仁信毅大孝至誠憲皇帝實錄卷之一百四十九

監修總裁官光祿大夫經筵講官太傅議政大臣保和殿大學士兼兵部尚書理兵部事一等伯加十五級臣鄂爾泰

總裁官光祿大夫經筵講官起居注太保兼太子太傅和碩大學士兼戶部尚書仍兼管吏部尚書翰林院掌院

事三等伯加十三級臣張廷玉光祿大夫經筵講官起居注太傅議政大臣武英殿大學士兼工部尚書仍兼管

翰林院掌院事加二級臣福齡光祿大夫經筵講官太子太保東閣大學士兼禮部尚書加六級臣徐本光祿大夫

經筵講官議政大臣協辦內閣大學士事務禮部尚書仍兼管太常寺鴻臚寺事臣王泰等奉

敕修

雍正十二年甲寅十一月壬申朔諭內務府

大阿哥允禔薨逝著照貝子之例辦理○癸

酉諭宗人府大阿哥允禔之子弘昉著封為

鎮國公○諭辦理軍機大臣等歸化城右翼

副都統伊什泰年邁耳聾將應辦事務推諉

不肯出力著革退副都統發往軍臺効力行

走○加原任工部右侍郎年希堯都察院左

都御史銜○廣西提督張應宗患病解任陞

廣西左江總兵官霍昇為廣西提督廣西梧

州副將王無黨為廣西左江總兵官福建汀

州總兵官朱杰年老休致以原任福建建寧副將王朝璘為福建汀州總兵官○甲戌陞浙江按察使劉章為河南布政使司布政使福建鹽驛道楊弘緒為浙江按察使司按察使○福建金門總兵官呂瑞麟緣事革職陞廣東澄海副將許國騰為福建金門總兵官

乙亥

上詣

恩佑寺行禮畢回宮○撥給巡捕三營遊擊守

備等官房從步軍統領鄂善請也○丙子諭

內閣四川布政使劉應鼎朕原不知其人因

伊在四川建昌道任內稱譽者甚多是以就

近歷陞至布政使亦駕輕就熟之意數年以

來朕觀其屢次奏摺並無實心實政有裨地

方之處心亦疑之今據總督黃廷桂奏顯

有貪利營私種種劣蹟劉應鼎深負任用著

解任交與該督審擬四川布政使員缺著湖

北按察使竇啟瑛補授湖北按察使員缺著

河南管河道白映棠補授○陞都察院左副都御史邵基爲吏部右侍郎○喀爾喀車臣汗垂扎卜故遣官致祭○丁丑諭辦理軍機大臣等駐劄烏爾輝音查漢之管領蒙古兵丁都統巴爾米忒現在患病著來京其員缺著原任工部尚書海壽前往與費雅斯哈管理○加浙閩總督郝玉麟兵部尚書銜○陞廣東廣州副將李君賢爲江西南昌總兵官河南南陽總兵官冉起鳳緣事革職陞直隸督標中軍副將薛鳳翼爲河南南陽總兵官○戊寅諭兵部辦理阿爾泰軍臺事務祇有總管五十四一人著總管覺和托協同辦理○禮部議覆提督四川學政隋人鵬疏言夔州府原屬之達州既改爲直隸州梁山縣又撥入直隸忠州管轄請於夔州府學取進童生原額內酌撥六名以四名歸梁山縣二名歸直隸達州應如所請從之○己卯吏部議覆吏科給事中嚴瑞龍條奏六科向無蒙古

漢軍之缺請於轉科時將蒙古漢軍御史一例引見補授應如所請再查蒙古漢軍御史係部員陞補而六部蒙古漢軍人員甚少是以額設蒙古御史二缺漢軍御史五缺今若再加科員之缺則缺多人少陞轉太速請嗣後蒙古御史轉科將遺缺歸滿洲陞補俟蒙古科員缺出如係滿洲御史轉補將御史之缺仍歸蒙古漢軍御史轉科將遺缺歸漢人陞補俟漢軍科員缺出如係漢人御史轉補將御史之缺仍歸漢軍統計蒙古科道二缺漢軍科道五缺庶人缺均平選法允協從之○庚辰以翰林院侍講學士楊椿編修朱良表俱署日講起居注官○工部議覆江南副總河白鍾山疏言宿遷桃源安東三縣之夏家馬路陳家樓王家馬頭等處請下埽加鑲以資捍禦其阜寧縣之辛家蕩係黃溜頂衝兼有海潮上湧請建築越堤一道及時保固均應如所請從之○增設兵部稽俸廳酌派

本部事簡司員兼辦廳務從兵部尚書冷天相請也。辛巳鑲藍旗漢軍副都統金繼祖緣事革職以兵部侍郎覺羅栢修爲鑲藍旗漢軍副都統仍兼理工部右侍郎事。壬午諭內閣各省將軍所屬協領內有堪膺外省副都統之任者著行文各該將軍出具履歷考語保舉送部如不得其人亦出具緣由報部毋得草率徇庇如所保之人不能稱職定將原保之將軍大臣一併議處。○又諭朕聞閩省漳泉地方民俗强悍好勇鬪狠而族大丁繁之家往往恃其人力強盛欺壓單寒偶因小故動輒糾黨械鬪釀成大案及至官司捕治又復逃匿抗拒日無國憲兩郡之劣習相同而所屬之平和南勝一帶爲尤甚朕思上天陰隲下民與以至善之性故云民之秉彝好是懿德雖五方風氣不齊而本然之性則有善而無惡漳泉之民亦未有一天秉獨異者其所以不善之故則因俗尚囂陵漸成積

習耳聞目見皆剽悍桀驁之風而無禮讓遜順之氣遂令本然至善之性陷溺而不自知也其中即有善良之人亦不過自潔其身實難以數人之力挽風俗之澆漓朕自臨御以來屢頒諭旨訓迪內外黎庶詳明諄切至再至三自通都大邑至僻壤遐陬咸使之家喻戶曉而各省民風漸能奉法循理不敢蕩檢踰閑且如最難化者莫過苗蠻犛獠之人近亦頗知革面革心有欣欣向化之意豈漳泉內地之民轉不如苗衆等之悔過遷善革薄從忠而甘於自暴自棄陷身法網乎朕心深爲不忍特降諭旨切加訓導易曰積善之家必有余慶積不善之家必有余殃書曰作善降之百祥作不善降之百殃此言善惡感召之機捷於影響作姦犯科之人既爲王法所不宥必爲天理所難容禍福利害之間判然兩途則爾等亦何所憚而不爲善何所利而爲不善乎大抵居鄉之道親睦爲要保身之

道循分爲先。毋以強陵弱。毋以富欺貧。毋以智侮愚。毋以衆逼寡。毋爲行險僥倖之事。毋爲干名犯義之行。父老子弟。聯爲一體。隣里鄉黨。視若一家。相友相助。息訟息爭。使朝廷旌爲義鄉。有司表爲仁里。身名俱泰。刑罰不加。天下樂利之事。安遠之境。無過於此。況閩省文風頗優。武途更盛。而漳泉二府人材。又在他郡之上。歷來爲國家宣猷効力者。實不乏人。獨有風俗強悍一節。爲天下所共知。亦

爲天下所共鄙。何不翻然醒悟。共相勉勵。而成禮義仁讓之鄉乎。著該督撫仰體朕心。時加訓誡。更立勸懲之法。實力奉行。務俾俗易風移。以副朕一道同風之至意。○禮部議覆提督順天學政吳應棻疏言。保定正定二府屬業經改設直隸各州。請於保定府學取進文武童生原額內減取三名。以二名歸易州一名歸定州。正定府學原額內減取九名。以三名歸冀州。三名歸趙州。二名歸深州。一名

歸定州。應如所請。惟正定府學額內再應酌

量准其減取七名。冀趙二州各撥歸二名。以均多寡。得旨。改設直隸各州。應增入學額數著照該學政所請行。其府學文武童生。仍照原額取進。不必裁減。○理藩院奏。阿祿科爾沁扎薩克多羅貝勒達克丹旗分。今年歉收。請查明戶口。賞給糧價。以資養贍。得旨。著副都統阿蘭泰前往辦理。○癸未調江南京口右翼副都統陳世璠爲福建福州左翼副都統。陞福建福州協領彭珠爲浙江杭州右翼漢軍副都統。○陞察哈爾總管納蘭寶爲歸化城右翼副都統。○甲申。

聖祖仁皇帝忌辰遣官祭

景陵。○乙酉。調署工部右侍郎覺羅栢修署兵部左侍郎。○丙戌。戶部議覆署正白旗漢軍都統高起條奏。八旗另戶壯丁人等有任意潛往關東居住者。該管官員亦不詳加查察。以致丁冊虛懸。殊屬違例。請行令各該旗逐

一查明將丁冊內有名無人者俱移咨奉天將軍等衙門確查如有在彼多年情願永遠居住之人令其自行呈首即於該處入冊當差有仍行潛匿及嗣後不呈明該撫私往別處者一經發覺照逃人例治罪其該管之叅佐領並不行查出之地方官照例議處應如所請從之○兵部議覆署黑龍江將軍那蘇圖疏言黑龍江所屬一切命盜等案俱交齊齊哈爾城內將軍衙門監禁請專設獄官二員於記名領催內揀用三年無過以驍騎校等缺題補應如所請從之○丁亥諭內閣據果親王摺奏自京師前至西安一路直隸陝西二省地方墩臺齊備且完固高峻一望可觀而山西一路山徑向來竟未設立其平坦之處則僅存舊址墩臺傾圮已成土阜等語地方墩臺之設原以緝盜衛民所關甚為緊要朕屢降諭旨該督撫自應敬謹遵奉稽查辦理石麟受朕委任親在地方何以疎忽怠

玩至此著明白回奏王班身為山西巡察此等甚有關係而顯然廢弛之事並無一語奏聞其所奏者皆不應陳奏之件若非年老糊塗即係苟且塞責不肯實心任事王班不宜巡察之任著調取來京○兵部議覆河東總督王士俊疏奏東省裁衛設縣事宜○大嵩成山二衛請改為二縣裁衛守備教授各一員設知縣典史教諭各一員○靖海威海二衛請裁衛守備教授各一員添設巡檢各一員靖海衛即以寧海州議裁之乳山寨巡檢移駐威海衛即以文登縣原屬之溫泉寨巡檢移駐均歸併文登縣管轄○萊陽縣行村鄉巡檢請改隸大嵩新縣文登縣赤山寨巡檢改隸成山新縣○大嵩成山既改衛為縣其考試生童額數應行酌定請將靖海衛附大嵩威海衛附成山各取進生童十六名增設廩生二十名均應如所請從之○尋定大嵩改設縣曰海陽成山改設縣曰榮成○旌表

山東章邱縣烈婦劉起妻王氏調姦不辱赴井全貞給銀建坊入祠致祭如例○戊子諭辦理軍機大臣等額駙興德著給予十年俸銀前往達里剛愛軍營協同散秩大臣四格等操演蒙古兵丁効力行走○封理密親王允初子弘眺爲輔國公○陞順天府府尹陳世倬爲都察院左副都御史仍兼理順天府府尹事○命原任湖北按察使王柔前往江南與太僕寺卿俞兆岳協辦海塘事務○宗人府遵旨議奏凡八旗獲罪革職之覺羅及獲罪應行拘禁之間散覺羅等照宗室例俱不准給錢糧其實係貧乏不能自贍者並請照例令族長人等具結呈明准一子不俟歲滿給與錢糧從之○封廣西鬱林州富民鄉泉源之神曰昭德沛澤泉源之神○署湖北巡撫楊昶疏報武昌歸州等七府州開墾雍正十一年分田地四千一百頃有奇下部知之○己丑尊藏

聖祖仁皇帝

實錄

聖訓於

皇史宬副本敬貯內閣○庚寅戶部議覆河東總督王士俊疏言東省向有寄莊地畝一項以彼邑民人置買此邑地畝因而不派差徭祇於正供之外每畝徵銀一二分至四五分不等名曰外徵以代徭役但地畝之授受不常官吏得以上下其手今東省丁糧俱經攤入地畝何必留此外徵之名請將歷城等六十一州縣寄莊地畝併歷城益都二縣照寄莊徵銀之廢藩基地二項所有外徵銀兩各按州縣地畝一併均攤以杜偏累之源絕加派之弊均應如所請從之○議叙勦撫貴州丹江等處生苗功陞任湖廣長沙副將王惟一等加銜有差兵丁等賞卹如例○辛卯吏部題二等阿思哈尼哈番圖拉故應銷去恩詔所得拖沙喇哈番餘三等阿思哈尼哈

番請以圖拉之伯班第子明忠承襲從之○
壬辰諭辦理軍機大臣等北路軍營目今無
事副將軍常德著來京○調浙江杭州右翼
漢軍副都統彭珠爲江南京口右翼副都統
○陝西西安左翼漢軍副都統朱國極緣事
革職陞江南京口協領王景佩爲陝西西安
左翼漢軍副都統○兵部議覆河東總督王
士俊疏奏東省裁改衛所事宜一鰲山一衛
雄崖浮山二所請改歸即墨縣管轄靈山一
衛歸膠州管轄所有守備千總教授各缺俱
行裁汰一鰲山衛原設把總請改爲千總添
兵三十八名靈山衛把總亦改爲千總添兵
二十六名雄崖浮山二所各添設把總一員
兵三十名一衛二所既經裁改應各添設
巡檢一員駐劄除掖縣原屬之柴葫寨膠州
原屬之蓬猛司及益都縣顏神鎮議裁之巡
檢三員請分撥移駐外再添設巡檢一員以
資查緝一衛所童生學額請照舊籍原設名

數各於所歸州縣取進均應如所請從之○
刑部議覆陞任翰林院侍讀學士許王猷條
奏捕役緝盜未獲遂將素行不端之人或曾
經犯案踪跡可疑者盤詰拏獲及到官訊非
正盜均照誣良爲盜例擬以充軍似屬情輕
法重請照充軍例減一等擬徒若其人本係
良民捏稱踪跡可疑指爲素行不端任意妄
拏及雖犯竊有案業已改過爲善仍復妄拏
私拷逼認誣扳者仍照誣良爲盜例治罪應
如所請從之○癸巳以刑部左侍郎盛安正
白旗滿洲都統佛標俱兼理內務府總管事
○吏部議覆四川巡撫鄂昌疏奏道府州縣
分轄改設事宜一川東道屬之順慶府請改
隸川北道川北道屬之綿州改隸松茂道松
茂道屬之資州改隸永寧道夔州府屬之新
寧縣改隸達州一川東道原管之渝關稅務
請就近歸重慶府管理一直隸嘉定潼川二
州請俱陞爲府治設知府通判經歷各一員

二府附郭各增置一縣。設知縣典史各一員。并原屬各縣俱歸府轄。改州學正爲新縣教諭。州訓導爲新縣訓導。均應如所請。從之。尋定嘉定新陞府曰嘉定。附郭縣曰樂山。潼川新陞府曰潼川。附郭縣曰三臺。甲午。諭內閣。今歲春夏之間。陝西地方禾麥頗好。及至仲秋。聞有雨少之州縣。如甘肅所屬。則有階州。靖遠。環縣等處。西安所屬。則有臨潼。渭南。高陵。涇陽。三原。醴泉。富平。同州。郃陽。澄城。韓城。朝邑。華州。華陰。蒲城。潼關。以及榆葭二府州所屬等處。朕心深爲軫念。特諭該督撫。速籌蠲免賑恤。並轉運接濟之策。務使貧民不致失所。茲據劉於義許容奏稱。階州。靖遠。環縣。新舊錢糧已槩行停徵。至乏食之民。已照例借給口糧。統俟夏收徵還。其他州縣有一村一堡被旱薄收者。亦照階州等處之例辦理等語。據史貽直。碩色奏稱。西安所屬州縣。秋間雨澤愆期。嗣於九月內。大沛甘霖。所種

之麥滋潤暢茂。明歲夏收可望。現在糧價有減無增。約計本地存貯穀石。足以接濟。明春之用。至本地錢糧。百姓感戴皇仁。且值連年豐稔。已經完納十之八九。亦無庸加恩蠲免。惟從前借糴之穀糧。應於秋後還倉者。今西安。同華。榆葭等府州。既有薄收之屬。請暫緩徵買。統俟明秋還項。則民力可紓等語。劉於義。史貽直等所奏地方情形已悉。階州等三州縣乏食。民人所借之口糧。俱著賞給。明年夏收時。不必徵還。所有本年未完之錢糧。亦著蠲免。明年不必補徵。其應徵舊欠。著槩行停止。仍令劉於義。許容督率有司。加意撫綏。務令小民得所。至西安。同華。榆葭等府州屬百姓所借之倉糧。亦著賞給。明年不必交還。其糴出之穀。著史貽直等酌量於明年買補還項。○又諭。朕聞涼州府鎮番縣屬柳林湖地方。屯種地畝。經加銜侍郎蔣河估計開墾。修築渠壩。置備農具等項。共銀七萬八千餘

兩而辦理此事。率多營私作弊。蔣河委用原任知縣潘治州判石廷棟二人。所修渠工岸壩。在在草率。俱經冬水衝塌。而蔣河視同膜外。不問不究。又今春下種之時。種少報多。隱匿籽種一千餘石。又平地工價一項。共該銀七千八百兩。委官領去分發屯民。而潘治石廷棟等朋比分肥。短發工價銀四千餘兩。又蔣河將屯田下剩應存銀八千二百餘兩。虧空無存。朕所訪聞如此。蔣河受朕深恩。何以負恩溺職。至於此極。非派員確查。難定虛實。著副都御史孫國璽前往涼州。將以上情節。詳確查勘。無得絲毫瞻徇。○陞江西南贛總兵官李連為鑲白旗漢軍副都統。署四川泰寧副將苗國琮為江西南贛總兵官。○甘肅巡撫許容疏報。寧夏大清渠開工告成。下部知之。○奉恩將軍卓善年老休致。授其子寶越為奉恩將軍。○乙未陞浙江杭州協領金璜為浙江杭州左翼漢軍副都統。○丙申。以

翰林院侍講昌齡編修嵩壽俱充日講起居注官。檢討世臣常保俱署日講起居注官。○己亥。冬至。祀天於圜丘。上親詣行禮。○遣官祭永陵。福陵。昭陵。昭西陵。孝陵。孝東陵。景陵。孝敬皇后。○停止次日朝賀。○庚子。諭辦理軍機大臣等。據哈密貝子額敏奏稱所屬回民等有可種四百石穀之地。現在軍營屯田界內。願將此作為官地等語。哈密地方悉皆朕土。無俟伊等獻納。且大兵既撤之後。此地皆

可留與哈密亦斷無因其獻地另行安置民人之理但此地現與官地交錯若不允其所請照舊令回民耕種難免互相爭角僅收爲官地又係回民生計所資朕意或另賞伊等地畝及牛具籽種或每歲將應得穀石折給銀兩之處著署大將軍查即阿等就近查議

○大學士鄂爾泰等奏言

三朝實錄內人名地名字句與

聖祖仁皇帝實錄未曾畫一請派滿漢大臣率

同簡選翰林官員重加校對敬謹繕錄用垂萬世得旨大學士鄂爾泰張廷玉協辦大學士工部尚書徐本著爲總裁官理藩院右侍郎班第內閣學士索柱岱奇勵宗萬著爲副總裁官○禮部議覆廣東布政使張渠條奏向來教官之缺例於本省舉貢內隔府選用其寄籍之舉貢人等若不清釐改正或以本邑之人得本邑之缺不無瞻徇袒護諸弊請定限三月內行令呈明改歸本籍其現任教

職人員有籍係同府者並令呈明改調違者照冒籍例治罪應如所請從之○辛丑諭內閣朕賞各省兵丁生息銀兩原交與該管大員善爲營運以濟緩急之用從前有草率從事者即將此銀借給兵丁收取利息以爲賞卹似此辦理甚不妥協朕已降旨訓飭嚴行禁止近聞仍有無識無能之總兵官希圖省事暗中借給兵丁者又有兵丁假商人借領之名而其實自用官銀繳利者朕思兵丁切要用度莫大於吉凶二事朕既已賞給官銀則二事可以粗備至於尋常衣食之類無銀則可節省有銀易至輕費此乃人情之常今見有官銀可借到手甚易一時用去將來補償無資其拮据之苦仍兵丁身受之豈朕愛養加惠之本意乎至於兵丁假借商名領銀繳利更爲不可兵丁既非殷實之家又非久慣貿易之人虧折之後從何賠補不但領銀之兵受累於目前且致將來之兵不能沾國

家之恩澤此顯然可見者著各該管大員一
一清查若有似此情弊速行更改儻官銀不
敷營運不妨據實奏聞或地僻難於招商不
妨輕減利息若取兵丁之息銀以爲賞卹是
以朕惠兵之心而成將來累兵之舉則該管
大員經理不善之罪無可寬貸除從重議處
外仍將虧欠之項責令賠補○諭兵部陝西
西大通總兵官杜森年老患病難以勝任著
休致○雲貴廣西總督尹繼善題鎮安府都
康土知州馮御綬故其子馮錫年幼承襲請
令故土州妻農氏暫行協理下部知之

大清世宗敬天昌運建中表正文武英明寬仁
信毅大孝至誠憲皇帝實錄卷之一百四十九

大清世宗敬天昌運建中表正文武英明寬仁
信毅大孝至誠憲皇帝實錄卷之一百五十

監修總裁官光祿大夫經筵講官太僕寺卿和碩大學士兼兵部尚書總理兵部事務三等伯加十五級臣鄂爾泰

總纂官光祿大夫經筵日講官起居注太僕寺卿和碩大學士兼戶部尚書仍兼吏部尚書翰林院掌院

事等伯加十三級臣張廷玉光祿大夫經筵日講官起居注太僕寺卿和碩大學士兼工部尚書仍兼管

翰林院掌院事加二級臣福敏光祿大夫經筵講官太子太保東閣大學士兼禮部尚書加六級臣徐本光祿大夫

經筵講官議政大臣協辦內閣大學士事務禮部尚書仍兼官太常寺鴻臚寺事臣三泰等奉

敕修

雍正十二年甲寅十二月壬寅朔兵部議覆

雲貴廣西總督尹繼善疏言貴州台拱地方
既經改鎮添兵請將該鎮右營遊擊帶兵五
百名分駐下秉即於下秉官兵內撥把總一
員兵八十名分防施秉縣再撥外委把總一
員兵二十名分防新城撤黃施營原防施秉
官兵分防黃平州將黃施營改爲黃平營仍
聽台拱鎮管轄撤平越營原防嚴門官兵回
本營於黃平營就近撥外委把總一員兵三
十名分防嚴門汛其稿貢汛請撥該鎮左營

守備把總各一員兵二百名駐防均應如所

請從之○議敘西路搜剿喀桃等處賊夷軍

功署寧遠大將軍查郎阿等加級陞銜有差○

癸卯諭內閣據程元章奏稱臣以巡撫兼司

鹽政所有緝私一事必賴弁兵協力同心始

克整頓請嗣後有關鹽政事宜仍令各鎮協

營照舊分辨督緝儻有歧視怠忽臣即據實

題叅等語大凡經理鹽政必以緝私爲第一

要務從前惟總督李衛管理兩浙鹽務時恤

商裕課事事妥協程元章接任之後朕諭令

做照舊規毋得紛更成法乃伊管理以來兩

浙鹽務雖不至於敝壞聞已漸不如前程元

章此奏蓋恐將來鹽政漸弛而預留地步以

武弁不歸統轄爲卸過之計獨不思程元章

爲總督已數年而鹽政漸不整理又豈武弁

呼應不靈之咎耶著照程元章所請凡揀選

將弁及一切兵馬營制自聽督臣郝玉麟辦

理外其有關於鹽務事宜著各鎮協營聽程

元章派辦督緝如有岐視怠忽者即據實指參似此文武合爲一體弁兵聽其督派鹽務稍有不整則責有攸歸矣○兵部議覆廣東總督鄂彌達疏言欽州屬之東興街思勒崗二處逼近安南民夷雜沓私販甚多請於龍門協酌撥千把總一員兵五十名防守東興街並移欽州州判駐劄其地再於該協抽撥隊目一員兵十七名防守思勒崗並令廉州府同知就近彈壓應如所請從之○添設廣東陽春縣黃泥灣巡檢一員移欽州屬管界司巡檢駐龍門瓊州屬臨高縣博舖司巡檢駐和舍市從廣東巡撫楊永斌請也○免安徽滁州宣城等十二州縣衛本年分水災額賦有差○甲辰辦理軍機大臣等議覆署黑龍江將軍卓爾海奏言湖蘭河地方前經議設卡倫八處但因秋寒暫撤所有偷採人參之弊難於查察請於白都納打牲瓜爾察挑兵一百八十名齊齊哈爾城舊兵內挑選三

百二十名駐劄其地編設佐領八箇每佐領設佐領駙騎校各一員領催各六名並補放城守尉一員副總管二員令其統理執掌關防並添設筆帖式二員應如所請從之○乙巳辦理軍機大臣等議覆歸化城都統丹晉奏言歸化城添設同知等官之處經臣等奏請覆准在案查歸化城地廣事繁俱係原設同知辦理兼有協同察哈爾鄂爾多斯扎薩克等辦理之事誠不可無分理之人但添設同知一員恐轉致互相推諉應請停其添設同知於歸化城南之和林格爾東之坤都倫西之托克托城西北隅之薩爾齊等四處各添設筆帖式一員駐劄今與原設同知協辦事務三年限滿更換應如所請從之○丙午上御太和殿視朝文武陞轉各官謝恩○吏部議覆陝西巡撫史貽直疏言西安糧驛二道同駐省城辦理事件繁簡不均請將通省鹽法事宜改歸驛傳道管理將糧鹽道改爲督

糧道驛傳道改爲驛鹽道應如所請從之

丁未

孝惠章皇后忌辰遣官祭

孝東陵免直隸霸州永清等十四州縣本年

分水災額賦有差戊申兵部議覆工部尚

書徐本等奏言臣等奉命浙江審事查浙江

衢州爲福建及兩江門戶請將衢協副將一

缺改爲衢州總兵官置中左右三營以資彈

壓衢協原設都司二員一改爲中營遊擊一

改爲城守都司竝添設右營遊擊一員駐江

山左營遊擊一員駐常山原設守備三員一

改爲中營守備一改爲城守都司守備其原

駐江山守備改爲右營守備外請另添左營

守備一員防守華埠再應添千把各員除原

設千總五員把總十一員并將平陽一營嚴

州金華二協各裁千總一員撥補外請另添

把總五員竝於通省簡僻各營內抽撥兵丁

三百名以補衢鎮之不足其提屬之嚴州一

協楓嶺一營處州鎮屬之蘭谿一汛俱就近

歸衢鎮管轄至金衢嚴三府幅幘甚廣查察

須有專官請復設分巡金衢嚴道一員駐劄

衢州府城再添設同知一員駐劄峽口以資

巡查均應如所請從之○己酉旌表湖廣黃

岡縣烈婦孫時霖妻皮氏拒姦不污投繯殞

命給銀建坊入祠致祭如例○庚戌移奉天

府原駐蓋平縣之理事通判駐熊岳地方從

奉天將軍那蘇圖請也○辛亥擢工科給事

中興德慎爲內閣學士兼禮部侍郎○壬子

科爾沁貝勒阿臘布坦故遣官致祭○癸丑

諭內閣署正白旗滿洲副都統赫星內閣學

士岱奇著馳驛前往寧夏有查辦事件○調

鑲藍旗蒙古副都統岱林布爲正黃旗滿洲

副都統鑲藍旗漢軍副都統覺羅栢修爲本

旗滿洲副都統擢理藩院郎中多爾濟爲鑲

藍旗蒙古副都統正白旗叅領都伊納爲鑲

藍旗漢軍副都統一等侍衛濟昌爲正紅旗蒙

蒙古副都統○吏部等衙門。遵旨覆奏廣西一省。向與黔省均有辦理苗疆事務。是以暫令雲貴總督統轄。今黔粵兩處苗蠻輸誠向化。用兵事竣。請循舊制。將廣西省就近仍歸廣東總督統轄從之○甲寅。諭內閣。在京滿漢小京堂內。若有平時粗諳河務。情願前往河工。協助河道總督辦事者。著自行舉報。爾等奏聞請旨○改陝西靖邊營遊擊原轄之龍州堡把總。歸鎮靖堡都司管轄。從署陝西總督劉於義請也○乙卯。諭內閣。從前臺灣北路大甲西等社頑番。不法官兵已經剿滅。餘黨亦已就擒。叛犯之律。所有眷屬。一并緣坐。無可寬貸。朕念此等愚番冥頑無知。究非漢民可比。從前妄行不法。罪在正犯。其眷屬散處各社。未必知情。今當平定之時。若一一搜查。不無牽累驚擾。用是格外加恩。免其根究。該督撫提鎮。可仰體朕心。妥協辦理。以安番衆。並將朕諭明白宣示。咸使聞知。儻朕如此開恩。而

愚番等仍不知感激。再有干犯法紀者。則是蠢頑不靈之輩。不可以恩惠化導。朕必加以重懲○改直隸正定鎮標左營原轄之井陘汛。歸固關營管轄。添設鎮標右營千總一員。撤原防深州把總一員。回鎮標。從直隸總督李衛請也○丙辰。刑部尚書憲德奏。言臣部事件繁多。現今封印在即。辦事之堂官甚少。應請派員協辦。得旨。著協辦大學士事務工部尚書徐本。左都御史福敏。協辦刑部尚書事務○一等褒績公博爾屯。緣事革爵。以其兄子護軍舒靈阿襲替○以故三等伯阿爾遜子六十一襲爵○丁巳。陞漕運總督魏廷珍為兵部尚書。調直隸河道總督顧琮為漕運總督。河東河道總督朱藻為直隸河道總督。陞江南副總河白鍾山為河東河道總督。以兩淮鹽政高斌仍署理江南河道總督印務○署正藍旗蒙古副都統覺羅佛凝。緣事革職。以正黃旗前鋒參領桑格署正藍旗

蒙古副都統○補行江南江西雲南貴州廣西五省雍正十年分軍政卓異官三員貪官四員不謹官三員罷軟官一員年老官八員有疾官四員才力不及官十七員浮躁官三員分別陞賞處分如例○署寧遠大將軍查郎阿奏報哈密塔爾沁等處屯田收穫青稞共四千五百石有奇圖呼魯克屯田收穫小麥一千四百石有奇下部知之○己未諭內閣朕聞得甘州地方於上年正月內有提標兵丁張宏印等六人行劫張掖縣民陳進孝家傷害事主陳訓一案現在審擬又本年九月內張掖縣民李福家一連兩夜被劫十月內有張掖縣民王建文家被盜二案及掣獲盜犯張雷等九人俱係甘提標兵現在食糧者從來甘肅一帶民風醇樸素無大盜劫奪之事況今歲河西各屬俱獲有秋糧價亦較往年平減其涼肅二鎮兵丁亦各安靜守法而甘提標兵輒敢數十成羣公然盜劫該

管弁員平日所司何事如何訓練約束竟至如此肆行無忌署提督劉世明由侍衛微員朕加恩用至提督總督伊在總督任內毫無善績可稱其弟劉錫瑗竟牽連於山西叛案之內朕猶格外開恩赦宥嗣因西路領兵需人念伊熟悉邊地情形特召來京授以副將軍之重任豈料伊一到軍營諸事委靡退縮全無奮勇宣力之意西陲弁兵無不耻笑之其罪與武格等朕猶念其久歷戎行不忍遽令廢棄仍令署理甘州提督印務以爲贖罪自新之路豈料伊在任二年一味苟且因循視國家之事如同膜外朕屢次訓飭毫不悛改今伊所轄兵丁目無國法劫奪橫行擾害良善聞之令人髮指不識劉世明具何心胸而負恩溺職至此也劉世明著革職等交署總督劉於義會同巡撫許容將兵丁行劫各案及縱兵爲盜負恩溺職情由一一嚴審定擬具奏甘州提督印務著副都御史二格前

往署理內閣學士岱奇現差寧夏有辦理事件俟辦理後前往肅州協助劉於義辦理軍需事務○吏部遵旨將情愿河工効力人員帶領行見得旨內閣侍讀學士劉永澄授爲南河副總河鴻臚寺卿劉勳授爲河東副總河俱著加僉都御史銜其河東副總河阿蘭泰著回京○刑部議奏原任直隸天津都統邁祿狗庇屬員薩爾泰指官驅騙任意營私請革職治罪得旨邁祿著革職以副都統銜効力贖罪○庚申諭禮部前據太常寺奏請於雍正十三年正月初十日恭祭祈穀壇今據順天府府尹奏稱於雍正十三年正月十二日進春朕思祈穀乃新春典禮似不應在立春以前著該部會同太常寺悉心定議具奏尋議謹按禮經月令所載祈穀典禮原在立春之後所以順時令召農祥也查康熙五十五年正月初十日應祭祈穀壇其時尚未立春

聖祖仁皇帝命大學士等定議於正月三十日下辛行禮臣等會同酌議應請於雍正十三年正月二十日辛卯致祭

祈穀壇並請嗣後每年祈穀俱在立春後辛日舉行永著爲例從之○陞鑲藍旗協領戚神保爲江南江寧右翼副都統○雲貴總督尹繼善奏報本年十月二十九日恭逢

萬壽之辰雲南楚雄大理等處日麗重華卿雲獻瑞五色絢爛萬里繽紛歷辰巳午未四時

之久官民公同瞻仰下部知之○添設廣西太平府崇善縣學廩生增生各四名從廣西巡撫金鉷請也○辛酉調刑部右侍郎葛森爲盛京刑部侍郎盛京刑部侍郎申珠渾爲刑部右侍郎○刑部議奏廣西南寧府屬之遷隆崗差目修建營房越占安南地界土目王元光土練廖廣土官黃震中等應分別治罪得旨依議從前渠那設隘既由姦民廖廣圖利唆令遷隆土官黃震中妄稟而勘界

員弁。惟聽土官之言。遂爾立隘設防。今經該督撫等查明渠那地方。實非遷隆所屬之內地。已將淦梯隘移置於剝馬村。板蒙隘移置於栢心村。中外之界。以十萬山下小河爲限。並將土官等分別治罪。著總督尹繼善巡撫金鉷將勘明地界。改設隘口。及渠那地方。給還安南遵守各緣由。行文該國王知悉。並飭令守隘員弁。不時巡查。毋得縱放內地姦民出境騷擾。以副朕懷柔遠人之至意。○設山西蒲州澤州二府學取

進文武童生各十五名。裁平陽府學原額取進童生三名。歸蒲州府學額。太原府學原額取進童生三名。以一名歸直隸忻州。二名歸直隸代州。從提督山西學政范咸請也。○免陝西固原屬之平原所下馬關。及靈州屬之花馬池中衛縣屬之香山。禮縣屬之大潭一里。本年分秋禾歉收額賦。并乏食貧民所借口糧。一體賞給。從陝西總督劉於義甘肅巡撫許容請也。○定邊大將軍平郡王福彭奏報。鄂爾昆集爾麻泰等

處屯田收穫大麥小麥糜子共一萬九千七百石有奇。下部知之。壬戌諭內閣。正白旗漢軍都統祖秉衡前自京城領兵至歸化城。傷損馬匹牲口甚多。且至軍營一味逢迎。馬爾賽毫無効力之處。今領裁撤漢軍兵回京。又不加謹照看兵丁愛惜馬匹。擗節行糧。留心經理。以致多傷牲畜兵丁苦累。深負朕思祖秉衡到京之日。著革職。拏交該部嚴審。○兵部以進剿桌子山碁子山青海及南北西三川等處軍功。奏請議敘。得旨。軍功議敘。乃國家賞功之大典。必至公至確。始足以表彰勞績。鼓勵軍心。從前桌子山碁子山征剿一案。乃年羹堯岳鍾琪張大其事。有意捏成者。即在事効力官弁。亦不過以伊等私心任意開入冊內。冀邀議敘。並無功績可紀。應不准議敘。從前有已經議敘者。著該部查明註銷。其南北西三川青海効力人員。仍准其議敘。○刑部議奏。湖廣容美土司田吳如朋謀抗

拒官兵該犯雖懼罪自縊仍應戮屍妻子給功臣之家爲奴財產入官同謀之向日芳等俱應分別治罪得旨田昊如畏罪潛逃投繯自盡尚與抗拒官兵者有間著從寬免其戮屍田昊如孽由自作其眷屬及脅從之人俱係聽伊指使情有可原所擬斬絞各犯俱從寬免死交與總督邁柱分別安插別省居住田昊如之衣飾等物仍賞給伊之妻子田產不必入官著查明變價竝給伊妻子以爲度日之費所有牽連各犯著邁柱酌其情罪減等發落其首先繳印之石梁司長官張彤硃著賞給千總職銜文食俸薪以示獎勵○撥廣西梧州府學原額取進文童五名武童三名歸直隸鬱林州學從提督廣西學政徐以升請也○免直隸宣化萬全二縣及二縣代徵之通州民地本年分電災額賦有差○以故扎魯特扎薩克多羅貝勒畢魯瓦子索諾木襲爵○癸亥諭內閣畿輔爲天下首善之

地是以各府州縣童生入學之數昔年曾加恩增添以示鼓勵惟宣化府屬之蔚州從前原隸山西廣平府屬之磁州從前原隸河南及改歸直隸之後其入學仍照晉豫原額未與直隸一體邀恩又新從山西改歸易州管轄之廣昌縣入學之數尚不及直隸小縣此兩州一縣均當酌議加增每遇鄉試之年宣化府屬另立旦字號與奉天府屬夾字號額數相同各取中三名今宣郡人材較前漸盛又添蔚州一屬應舉人數加多查夾字號前已廣額二名則旦字號亦應加增中式之數著禮部定議具奏○又諭鄉會兩闈乃國家抡才大典必須防範周密令肅風清始足遴拔真才屏除弊竇朕聞各省鄉試之年官字號舉子入闈者監臨提調等官有差人餽送飲食果品之事雖無關於科場作弊然當關防嚴密之時有人往來號房難保日久無僮倩傳遞之弊且恐民巷中之有力者亦可借

此作姦犯科不可不防其漸嗣後著通行禁止僅有仍蹈前轍者一經發覺即照科場作弊例將與受之人一同治罪○調湖南按察使胡瀛為湖北按察使司按察使湖北按察使白映棠為湖南按察使司按察使○丙寅孝莊文皇后忌辰遣官祭

昭西陵○丁卯調署直隸天津都統鄂彌達來京○以原任直隸天津都統邁祿署正藍旗滿洲副都統○己巳辦理軍機大臣等議覆

署黑龍江將軍卓爾海奏言呼倫貝爾地方與喀爾喀蒙古等處接連駐劄一切文移往來甚為緊要再本爾得地方已經添駐兵丁一千名登記檔案亦需人掌管請於此二處各添設筆帖二員以資辦理應如所請從之○庚午歲暮禋祭

太廟
上親詣行禮○遣官祭
永陵

福陵

昭陵

昭西陵

孝陵

孝東陵

景陵

孝敬皇后○遣官祭太歲之神○以雲南鶴麗總兵官何勉署雲南永北總兵官○旌表八旗節婦滿洲保格妻傅察氏等一百二人蒙古布達里妻五齊雅爾氏等二十人漢軍郎應畢妻宜氏等二十六人直隸各省節婦胡行謙妻劉氏等七百二十三人貞女徐氏等十一人孝女方氏一人孝婦李氏一人孝子馬爾毅等二十三人各給銀建坊如例○是歲人丁戶口二千六百四十一萬七千九百三十二又永不加賦滋生人丁九十三萬七千五百三十田地山蕩畦地八百九十萬一千三百八十七頃二十四畝有奇徵銀二千

九百九十萬一千六百三十一兩有奇。米。豆。麥。四百七十九萬三千八百二十八石有奇。草。五百五十七萬四千六十九束。茶。三十四萬三千七百一十一引。行鹽。四百九十三萬六百二引。徵課銀。三百九十九萬二千五百五十七兩有奇。鑄錢六萬八千五百三十九萬有奇。

大清世宗敬天昌運建中表正文武英明寬仁信毅大孝至誠憲皇帝實錄卷之一百五十

大清世宗敬天昌運建中表正文武英明寬仁信毅大孝至誠憲皇帝實錄卷之一百五十一

監修總裁官光祿大夫經筵講官大學士兼翰林院掌院學士等因欽此

總纂官光祿大夫經筵講官大學士兼翰林院掌院學士等因欽此

第三等伯加十三級世襲建王光祿大夫經筵講官大學士兼翰林院掌院學士等因欽此

翰林院掌院學士加二級世襲福祿公光祿大夫經筵講官大學士兼翰林院掌院學士等因欽此

經筵講官大學士加二級世襲內閣大學士事務禮部尚書仍兼管太常寺鴻臚寺事務等因欽此

敕修

雍正十三年乙卯春正月壬申朔

上於宮中拜

神畢御殿王以下文武各官及外藩使臣等上

表朝賀停止筵宴○朝鮮國王李昉遣陪臣

尹游等表賀冬至元旦

萬壽節及進歲貢禮物宴賚如例○癸酉諭內

閣朕聞浙江海塘工程現在修理尖山已堵

築三分之一人心甚是踴躍但夫役每日給

工銀三分六釐稍覺不足今當初春之月水

淺潮平正趨築工程之候著照引河挑夫例

每日加足五分之數又聞從前採運石塊每方給銀八錢九分有零今運送多資人力著每方增銀六分俾夫役等工食寬裕努力修築早告成功以慰朕念○乙亥孟春享

太廟

上親詣行禮○

上命

皇四子寶親王弘曆祭太歲之神○戊寅

世祖章皇帝忌辰遣官祭

孝陵○己卯諭內閣今日諸王大臣等以雍正

十二年十月二十九日慶雲見於雲南之大

理等府又見於廣東之高州府又山東寧陽

縣產毓麒麟嘉瑞駢臻仰見

上天慈恩福佑具摺稱賀朕向來不言祥瑞非

爲謙讓之虛文歷年以來各省多有慶雲之

瑞茲又值朕生辰雲南廣東兩省同見

上天昭示嘉祥但兩省慶雲何如處處雨暘時

若俾歲歲五穀豐登萬民樂利斯真可謂

上天慈佑爾等爲朕思之何由使宗室天潢之

中人人品行端方何由使八旗根本之地事

事奉公守法何由使六卿喉舌之司紀綱整

飭萬事咸宜何由使封疆守土之吏大法小

廉萬民安業朕之願望常多未滿則斯產麟

何足深慶若以產麟爲朕德所感益屬朕所

不居傳言誠能格天朕十二年來懇切至誠

時時訓誡爾諸王大臣所頒諭旨不下數千

萬言而諸王大臣尚未盡能激發天良公正

無私實心辦理國家政事則是朕於人心未

盡感格而謂能感格

天心實不敢自信也朕惟益加勉勵爾諸王大

臣亦當各思所以答朕諄諄期望之至意至

於朝廷一絲一粟皆天下之民脂民膏如朕

今者解衣以賜此衣雖被於朕躬實未嘗成

之朕手揆厥由來仍是萬民脂膏豈朕所得

而自有哉凡一絲一粟用得其當則是以民

力所成者令教養民生之人食其美報朕與

斯人兩居其是用不得其當則是以民力所成者供剝削民生之人恣其暴殄朕與斯人兩居其非如其是也朕亦何可言功如其非也朕豈得不引爲己咎爾諸臣自思之必如何而後可使君臣之施受常居其是又何忍受君之恩而轉使君爲爾等受過乎夫大小臣工各有職業孜孜矻矻尚恐隳廢安得有寸晷餘閒優游逸樂如果無可辦之事有此一刻清閒此即

上天所賜之福當及時思其職業何事當爲思其過愆何事當改主敬二字實不可以須臾離者主敬則昏惰自去精明自生有事無事心常惺惺斷不肯別尋無益之消遣以致縱欲敗度爾諸王大臣亟須猛省奮勉厚自期待果能實心實力辦理國家政事俱成朝廷公正之大臣則澤被生民感召

天貺將使四海九州之大盡致五風十雨之徵此時再感

上天慈佑賀朕瑞祥豈不更勝於慶雲屢見麒麟疊生乎是乃朕所切望者諸臣尚各勉旃○調江南江蘇布政使劉藩長來京廣東布政使張渠爲江蘇布政使司布政使擢戶科給事中薩哈亮爲廣東布政使司布政使○癸未順天府進春○乙酉諭內閣據貴州台拱總兵卜萬年奏稱台拱苗民抒誠嚮化台拱城外瓦廠內居人兩次失牛俱經排畧寨苗民收得送還等語台拱苗人嚮化之初即知廉讓之理較之內地拾金不昧者更爲可嘉著欽差侍郎呂耀曾等宣旨獎諭加倍犒賞並諭衆苗等咸使聞知俾其踴躍向善同受國家恩澤○己丑調黑龍江副都統常壽來京以黑龍江將軍卓爾海辦理黑龍江副都統事務奉天將軍那蘇圖署黑龍江將軍鑲藍旗滿洲副都統覺羅柏修署奉天將軍○辛卯祈穀於

上帝

上親詣行禮○諭內閣傳泰由叅領之職加恩擢用數年之間至於巡撫伊在任內竝無一長可稱朕猶謂其才具不宜封疆之寄旋命署理寧夏將軍事務其所職掌不過坐鎮地方約束兵弁整飭營伍數事竝非伊力所不能料理者乃玩忽性成將國家公事視同膜外以致所管弁兵恣肆放縱目無法紀毆斃人命擾累地方溺職負恩莫此爲甚傳泰著革職拏問其寧夏將軍印務著副都統赫星署理其署副都統佟山身在地方見傳泰如此廢弛不行規勸又不奏聞深負委任著革職仍留署副都統任効力贖罪○壬辰諭內閣朕每見天下督撫有司等於人命盜案查審定擬時曲爲開脫以行其婦寺之仁意謂寬宥一人可以種陰德於冥冥之中不知君與臣皆任教養斯民之責平時不能殫教養之道使之不陷於重辟在吾君臣已有不得辭之過然尚屬伊等干犯法紀自取其罪國

家設立科條原以禁暴除姦使人共守非可枉法市恩是故刑罰之設乃不得已而然至於水旱災荒天時有不齊之數鰥寡孤獨人生有所遇之窮彼寧填溝壑而不肯爲匪者率皆良民似此無辜之赤子不幸而遭值困阨朕以牧養斯民之任寄之天下督撫有司而不能保護撫綏登之衽席乃視同秦越聽其饑餓流離此孟子所謂受牧牛羊立而視其死者

天高聽卑必加重譴而顧欲於命盜案中曲活一二有罪之人以冀倖邀福報何識見顛倒一至此乎朕望天下督撫董率有司屏棄虛文敦尚實政平時則勸農教稼闢地墾荒崇儉黜奢儲糧積粟以立其根本偶遇旱潦即據實奏聞殫心區畫俾澤中鴻雁共慶樂郊有此濟人利物之功方不負父母斯民之職較之曲活一二罪人者相去奚啻霄壤耶至於樂善好施史稱義舉扶危濟困人有同心

周禮以六行教萬民孝友睦婣而繼以任恤可見任恤之道與孝友並重也鄰里鄉黨之間原有休戚相關之誼以己之有餘濟人之不足在我本爲不多之費而在人已爲當厄之施況民有秉彝自然觀感興起衆擎易舉利益孔多從來積善之家必有餘慶一人行善則慶在一家衆人行善則慶在衆姓果然風俗淳良號稱仁里則和氣致祥天道之感應捷於影響凡水旱災祲之戾氣悉變爲五風十雨之休徵矣然興仁樂善者乃鄉鄰長厚之風而鼓舞旌揚者則大吏有司之責如所屬內有紳衿士庶惠愛鄉閭力行善事該督撫等當優禮褒嘉加意培植以表揚之應題請者即行題請將朕此旨刊刻頒布務使遠鄉僻壤人人知悉解四川巡撫鄂昌任調署湖北巡撫楊馥爲四川巡撫以左僉都御史吳應棻署湖北巡撫實授程仁圻爲陝西西安布政使司布政使以翰林院侍講學

士錢陳羣提督順天學政○癸巳以左都御史福敏協理兵部尚書事務工部侍郎馬爾泰兼理刑部侍郎事務○陝西西安左翼滿洲副都統拉薩立陞見留京陞叅領署河南城守尉杭州爲陝西西安左翼滿洲副都統○甲午命大學士鄂爾泰張廷玉協理大學士工部尚書徐本爲文穎館總裁官兵部尚書魏廷珍刑部尚書張照吏部侍郎邵基刑部侍郎楊超曾內閣學士方苞勵宗萬爲副總裁官○丁酉奉天府府尹宋筠疏報遼陽等八州縣開墾雍正十一年分田地一百一十項有奇江西巡撫常安疏報豐城等二十二縣開墾雍正十一年分田地三百三項有奇俱下部知之○乙亥諭兵部凡年滿千總發回原任者因其漢仗中平又未知其効力如何故令該督提再行試看如其効力果好遇有守備缺出仍可於各標千總內比較酌量題補不得因其回任即難於保題可行文

各該督提知之。庚子諭內閣朕於二月十二日恭往謁

陵著大學士鄂爾泰張廷玉公慶復尚書憲德在京總理一切事務協辦內閣事務尚書三泰領侍衛內大臣哈達常明都統色爾壁隨往總理一切事務○陞大理寺卿德福爲盛京禮部侍郎○吏部議覆工科給事中陳履平條奏直省督撫咨部陞補之佐雜要缺向不具題嗣後請照部選佐雜之例按月彙題候旨補授應如所請從之○辛丑授宗室倫布女爲郡君壻多爾濟爲多羅額駙允祿女爲縣君壻拉理大爲固山額駙都隆額女爲縣君壻策旺拉錫爲固山額駙色布肯女爲縣君壻古穆爲固山額駙公弘昉妹爲縣君壻多爾濟喇錫爲固山額駙

大清世宗敬天昌運建中表正文武英明寬仁信毅大孝至誠憲皇帝實錄卷之一百五十一

大清世宗敬天昌運建中表正文武英明寬仁
信毅大孝至誠憲皇帝實錄卷之一百五十二

監修總裁官光祿大夫經筵講官大學士領侍衛內大臣等處總理事務處掌印給事中加五品頂戴
總纂官光祿大夫經筵講官大學士領侍衛內大臣等處總理事務處掌印給事中加五品頂戴

纂修官光祿大夫經筵講官大學士領侍衛內大臣等處總理事務處掌印給事中加五品頂戴

纂修官光祿大夫經筵講官大學士領侍衛內大臣等處總理事務處掌印給事中加五品頂戴

纂修官光祿大夫經筵講官大學士領侍衛內大臣等處總理事務處掌印給事中加五品頂戴

敕修

雍正十三年乙卯二月壬寅朔諭內閣聞各

有敕本一百五十二

省武弁中有於該管上司前文稟應對用天
恩天喜天顏聖明謝恩等類字樣者且於上
司批示稱為接奉硃批此等謬妄處皆由該
弁不諳文義信口稱呼無人指教其文稟多
憑幕客胥吏書寫該弁目不識丁以致草野
無禮至於如此嗣後著該管上司隨時教導
俾各知禮節傳諭直省督撫提鎮等知之○
癸卯諭內閣定例文武生員不准入伍食糧
聞陝甘兵丁內有文武生員現充營伍而延

綏一鎮竟至六十餘名之多在文武生員名
列膠庠各應專心舉業嫻習技藝以圖上進
豈可又掛名營伍其已經入伍之兵粗知文
義願應考試者原有准入武場一體鄉試之
例不必又附名學校若以一身而兼顧兩途
必且互相牽制轉致兩誤著通行陝甘各提
鎮將各兵內之文武生員查明革糧令其歸
學如有情願革去生員當兵食糧者即行知
該學政除名准留營差操並飭行各營將弁
嗣後文武生員一概不許濫收入伍將此通
行各省知之○禮部議覆湖南學政吳大受
疏言岳州府原屬之澧州衡州府原屬之桂
陽州俱改為直隸州請撥岳州府學原額取
進文武童生各五名歸澧州屬撥衡州府學
原額取進文武童生各三名歸桂陽州屬應
如所請從之○添設山東運河廳千總把總
各一員河捕廳泃河廳把總各一員從調任
河東河道總督朱藻請也○乙巳諭辦理軍

機大臣等管轄呼倫貝爾兵丁之都統博第著赴喀爾喀地方會同查克旦查辦丹津多爾濟多收駝隻事件竣即著回京北路軍營裁撤索倫兵丁起程時著領侍衛內大臣哈達哈帶領前往呼倫貝爾協同永福管轄（理藩院奏多爾濟喇錫原係和碩額駙今因娶固山格格禮部請改授固山額駙多爾濟喇錫請仍賞給和碩額駙職銜恭候欽定得旨多爾濟喇錫仍授為和碩額駙）以戶

部右侍郎托時管理三庫事務革辦理口外屯田事務左都御史孔毓璞職以其侵帑營私故也（丁未遣大學士張廷玉祭

先師孔子（以戶部右侍郎托時內務府郎中白衣保內閣中書徐元夢為滿洲繙譯鄉試主考官鑲藍旗蒙古副都統多爾濟為蒙古繙譯鄉試主考官（兵部議覆署陝西總督劉於義疏言西寧一郡僻處邊隅接壤番夷防範宜密請於南山後迤東之什扎巴地

方建立土城撥西寧鎮遊擊一員兵二百名駐劄其皂思觀林地方應駐劄把總一員兵四十名下郭密之亦襟石莊駐劄守備一員兵一百名千戶莊駐劄把總一員兵四十名並移徐家堡守備一員駐申中河州協千總一員兵六十名駐康家寨應如所請從之（戊申祭

大社

大稷

上親詣行禮（己酉

上御經筵講畢賜大學士九卿詹事及講官等宴（庚戌遣官祭

關聖帝君（諭內閣聞江南淮安府板閘地方有土棍人等開立寫船保載等行由該縣濫請司帖合夥朋充准關上下凡有貨船至關口催覓小船起剝者土棍等輒恃強代催任意勒索不饜不休客商苦累觀望不前著該督撫確查此等情弊嚴懲禁止毋得視為

具文嗣後布政司衙門亦不得濫給牙帖若他處關口有似此作弊者著該管督撫一體查禁○調兵部尚書魏廷珍爲禮部尚書陞兵部右侍郎高起爲兵部尚書光祿寺卿王鈞爲工部右侍郎科爾沁和碩額駙觀音保故遣官致祭辛亥諭內閣朕聞河工官員每於襄運工料差役封捉船隻而所差胥役即藉端生事騷擾及至三汛搶工則稱襄運緊急物料百般需索甚至將重載之客船勒令中途起貨以致商船聞風藏匿裹足不前查河工襄運物料原有額設浚船即使搶築之時浚船或不敷用祇應催募本地民船協濟運送原不必封捉客船阻遏商旅著河道總督飭行所屬河員嚴行查禁○兵部議覆署陝西總督劉於義疏言西大通鎮舊設兵三千六百名弁兵過多應加裁汰請裁大通鎮總兵一員遊擊守備千總各二員把總四員兵一千二百名改設副將一員都司一

員留千總二員把總四員兵八百名鎮南之白塔營裁參將守備千總各一員把總二員兵四百名改設都司一員留千總一員把總二員兵四百名鎮西之永安營裁千總把總各一員兵二百名留遊擊一員守備一員千總一員把總三員兵六百名至河州地近極邊原設副將一員都司一員千總二員把總四員兵一千一百八名不足以資彈壓請改副將爲總兵官添設遊擊二員分爲左右營改都司爲守備添設守備一員把總四員兵八百九十二名以資分撥防汛應如所請從之○壬子
孝康章皇后忌辰遣官祭
孝陵○陞刑部郎中覺羅倫達禮爲廣東按察使司按察使○以正紅旗蒙古都統阿揚阿署直隸天津都統福建福州將軍阿爾賽署福建陸路提督廣東海關監督準泰署福建福州將軍調四川重慶總兵官吳正爲直隸

馬蘭口總兵官陞浙江象山副將張士俊爲
四川重慶總兵官○癸丑

上謁

陵是日啓行駐蹕煙郊○甲寅

上駐蹕潘家莊○乙卯

上駐蹕淋河○丙辰

上謁

昭西陵

孝陵

孝東陵行禮舉哀旋謁

景陵遙望慟哭步至

寶城前行禮悲慟良久感動左右○是日

上回鑾駐蹕馬伸橋○丁巳

上駐蹕二百戶○戊午

上駐蹕長營○己未

上回宮○調正紅旗蒙古都統阿揚阿爲本旗

滿洲都統仍署天津都統事務陞正白旗漢

軍副都統佟時茂爲本旗漢軍都統一等侍

衛署正黃旗護軍統領葉楚爲右翼前鋒統
領以一等侍衛武勒德署正黃旗護軍統領

陞廣東廣州協領于永世爲正白旗漢軍副

都統○庚申福建按察使莊令翼休致調廣

東按察使覺羅倫達禮爲福建按察使司按

察使湖南按察使白映棠爲廣東按察使司

按察使陞直隸清河道彭人瑛爲湖南按察

使司按察使○辛酉諭內閣從來文武兩途

國家竝重未嘗軒輊於其間而習其業者必

專心致志不惑於他岐然後有所成就可以

備國家之用每見無識之武臣沽名邀譽輒

稱營伍中設立義學興文育材又或請令駐

防兵丁子弟就近應該省鄉試此皆舍本逐

末糊塗顛倒之見夫國家設立營伍原爲折

衝捍禦之計營伍中提鎮大員乃弁兵之表

率也意之所嚮衆共趨之今乃浮慕讀書嚮

學之虛名而於持戟荷戈之地以文章翰墨

相矜尚是本業在武而注意於文必致弁兵

等相習成風。人材漸至軟弱。武備亦至廢弛。豈整飭戎行之道乎。彼弁兵之子弟。其資性聰慧。可以讀書者。聽其延師自課。循例考試。以圖上進。此乃兩全之道。爲提鎮大員者。何必以虛名倡率。使之輕視本業。且與其設義學。以課文。何如設義學。以課武。尤爲輕車熟路。易於有成也。至於各省駐防。乃專爲武備。而設其子弟通曉文藝者。原聽其來京應試。以爲進身之路。若准其在外就近鄉試。則伊等各從其便。競尚習文之名。而漸忘用武之實。將來更有何人。可充駐防之選乎。在京師則文武並用。是以文武兼收。在駐防則武備是資。應以武途爲重。即如農工商賈。各專其業。然後可以收其效。此古今不易之理。奈何介在兩岐。其流弊必至兩誤。向後如仍有妄行奏請者。朕必加以重處。○壬戌。陞蘇松常鎮道劉栢爲安徽按察使。司按察使。○辦理軍機大臣等遵旨議奏。現今準噶爾逆賊敗

遁。又經使臣前往宣諭。諒賊夷輸款。非逞我軍班師在即。應預行酌定邊境駐防事宜。除漢中一府地居腹裏。不必添駐外。查涼州爲甘肅咽喉。通省關鍵。請駐兵二千名。西寧地處邊隅。逼近青海。請駐兵一千名。此添駐兵丁。俱於西安駐防滿洲蒙古兵內挑選。西安兵缺俟現駐涼州西寧兵丁撤回時。於養育兵暨餘丁內挑補。其新駐兵丁。請設將軍一員統領。駐劄涼州。所有應設協領佐領防禦驍騎校筆帖式等官。令將軍秦布酌議具奏。理事同知通判等官。暨一切修理城垣營署軍裝等項。令總督劉於義等詳議具奏。預行辦理。俟撤兵後再行派撥駐劄從之。○癸亥。諭內閣。據山東巡撫岳濬奏。稱雍正十三年元旦。山東省城祥雲捧日。歷辰巳二時不散。又正月初五六日。各府瑞雪普降。遠近均霑。河東總督王士俊奏。稱河南地方。於元旦得瑞雪一尺五六寸。至二三尺不等。朕聞之不

勝喜慰從來天道人事之感應捷於影響督撫之優劣關係雨暘之休咎年穀之豐歉歷歷不爽朕非以地方水旱災祲委其責於督撫也督撫皆朕簡用之人其是非得失朕實與共之至於感應之道亦必君與臣上下交修均殫其職然後可以上格

天心不可以地方遠近而起分別之見近而京師畿輔既有部院督撫之分理不得專指爲朕一人之事遠而雲貴川廣雖有督撫有司之代理亦不得推卸以爲非朕之事也朕論感召之理如此亦必該督撫實有善蹟之可稱又有休徵之足驗朕方從而褒美之若無其實而有其驗朕又必留心徐徐體察不肯濫加恩獎也假使將來不肖之督撫有因朕此旨而隱匿災荒者亦必不能欺朕之耳目又或捏稱祥瑞以冀倖邀嘉獎使天下人謂天道之感應不足憑則其獲譴於神明者更大尚何所逃罪乎朕因河東兩省元

日之慶雲瑞雪再將朕平日敬信

天道勤求民隱之誠意宣諭告誡期與內外臣工共勉之○以工部尚書協辦大學士徐本兼管都察院左都御史事陞左僉都御史吳應榮爲兵部右侍郎仍署湖北巡撫○以歸化城副都統五十六署歸化城右翼都統○旌表山東朝城縣烈婦王贊妻陳氏拒姦不污自縊完貞給銀建坊入祠致祭如例○甲子命工部尚書巴泰協辦內閣大學士事陞江南安徽按察使劉吳龍爲光祿寺卿○乙丑

上詣

恩佑寺行禮畢幸圓明園○擢署陝西西安糧道偉璚爲大理寺卿○丁卯

孝昭仁皇后忌辰遣官祭

景陵○以兵部尚書鑲黃旗漢軍副都統高起協辦本旗都統事○辦理軍機大臣等議覆署陝西總督劉於義奏言沙州協標出征兵

丁。現經撤回沙州。足資防範。所有原撥沙州之涼鎮兵五百名。安西兵六百名。請俱撤回本鎮。每年於夏秋二季。派沙州兵四十名。前往巴顏布拉克。看守墩臺。冬春二季。派安西兵三百名。前往推莫爾圖等處駐防。應如所請。從之。兵部議覆四川總督黃廷桂條奏更定營制事宜。永定營遊擊請改為都司。裁守備一員。千總一員。把總二員。兵二百名。冕山營遊擊。亦改為都司。裁守備一員。千總一員。把總二員。兵三百名。所有原管龍潭等地方。歸靖遠營管轄。一栢香營都司。千總把總各一員。兵三百名。請悉行裁汰。所有原管夷民。撥歸越嵩營管轄。一越嵩營路當孔道。舊設官兵。不敷防範。請將遊擊改為參將。添設千總一員。把總二員。兵一百名。移守備把總各一員。兵一百二十名。分防栢香地方。均應如所請。從之。戊辰春分朝。

日於東郊。遣顯親王衍潢行禮。己巳。諭兵部。

官兵駐劄外邊。原為防衛蒙古。而設若盜取蒙古馬匹。是不能防衛。而轉行擾害。應加重懲。以儆將來。嗣後官兵及跟役等有偷盜蒙古馬匹者。一經審訊確實。即在本地正法。著該管大臣官員將此旨通行曉諭。務令人人知悉。文到三月之後。照此例遵行。至蒙古偷盜官兵馬匹。或官兵等自相偷盜者。仍照舊例行。吏部等衙門議覆直隸總督李衛條奏經理邊界事宜。張家口所轄地方。請於新平路平遠頭分界。迤西歸於山西。迤東歸於直隸。著各該督撫飭令地方官查明地畝。錢糧。豎立界牌。分劃管理。一山西分有旗地。應添設口外蒙古理事通判一員。承辦旗民交涉事件。一口外鑲藍旗和爾圖地方。分歸晉省所有。駐劄和爾圖千總一員。請撤回直隸。與現駐章稿爾把總分汛管轄。均應如所請。從之。旌表直隸獲鹿縣烈婦喬維章妻崔氏拒姦不污。投環殞命。給銀建坊。入祠致

祭如例 庚午山西巡撫覺羅石麟奏報渾源浮山等二十八州縣開墾雍正十一年分田地五百九十頃有奇下部知之○以故三等精奇尼哈番阿爾納子百成三等阿思哈尼哈番李景唐弟李景虞各襲職

大清世宗敬天昌運建中表正文武英明寬仁信毅大孝至誠憲皇帝實錄卷之一百五十二

大清世宗敬天昌運建中表正文武英明寬仁信毅大孝至誠憲皇帝實錄卷之一百五十三

敕修

雍正十三年乙卯三月辛未朔以二等待衛

馬尼署正紅旗滿洲副都統○壬申諭內閣

各省自軍前回來官弁等因補行引見即令來京殊覺勞苦可傳諭各省除已經起程外其現在未曾起身及嗣後續到人員著於到家之日計算休息一年再令來京如有保題陞轉者仍照常咨送引見○癸酉兵部議覆浙江布政使張若震奏言衛所守備千總分管屯田屯丁有刑名錢穀之責向隸都司管轄近來都司俱經裁汰請改歸知府管轄并

令各省一體遵行應如所請從之○喀爾喀
貝子班第達故遣官致祭○甲戌諭內閣南
河春夏之間防汛最爲緊要副總河劉永澄
到任未久諸事尚未諳練總河印務仍著高
斌署理俟大學士嵇曾筠葬親後赴工任事
高斌再回鹽政任○乙亥禮部議覆安徽學
政姚三辰疏言廬州府原轄之六安州鳳陽
府原轄之泗州潁州亳州俱經改爲直隸州
請撥廬州府學原額取進文童三名武童二
名歸六安州屬撥鳳陽府學原額取進文童
五名以二名歸泗州屬二名歸潁州屬一名
歸亳州屬應如所請從之○又議覆河南學
政鄒升恒疏言河南府原轄之陝州汝寧府
原轄之光州俱經改爲直隸州請撥河南府
學原額取進文童三名武童六名歸陝州屬
撥汝寧府學原額取進文童四名歸光州屬
應如所請從之○丙子諭辦理軍機大臣等
據遣往準噶爾使臣傅鼎等奏稱噶爾丹策

零請將哲爾格西拉胡魯蘇地方爲我喀爾
喀遊牧地界等語朕意伊既如此懇求若堅
執不允恐使臣徒勞往返終無完結之日但
朕無由懸定此係喀爾喀等遊牧處額駙策
凌素所深知著將傅鼎等奏摺并地圖密寄
額駙策凌令其細閱噶爾丹策零所請應否
准行如不可行或於我原定地方之內伊原
定地方之外另有何處可定邊界暨定界之
後其中空閒地方應否禁止彼此打牲之處
俱著詳悉定議事關重大務期永遠有益著
於噶爾丹策零使臣垂納木喀等未到之前
具奏○禮部遵旨議奏直隸宣化府屬之蔚
州廣昌縣向隸山西廣平府屬之磁州向隸
河南今既改歸直隸請將蔚州磁州入學額
數照直隸大州縣例於原額十五名外加取
三名廣昌縣入學額數照直隸小縣例於原
額八名外加取二名再宣化府屬士子鄉試
舊例列爲旦字號額中舉人三名今添蔚州

一屬人數較多。請將旦字號中額加增一名。從之。○丁丑遣官祭

歷代帝王。○戊寅兵部議覆福建總督郝玉麟疏言臺灣府城東南大東門內春牛埔請添設一營撥鎮標守備一員帶兵三百名駐防小南門添設一營撥水師千總一員帶兵一百五十名駐防各植茨竹以爲聯絡至南水門小北門二處各建大礮臺一座竝添設敵臺城門城樓礮架望樓等項南路之茄藤港北路之蚊港等處各設礮臺一座府城西南一帶礮臺空隙處各設木柵以資捍禦應如所請從之。○己卯吏部等衙門議覆湖廣總督邁柱條奏苗疆建置事宜。一彝陵州請改置一府裁知州州判學正吏目缺設知府通判教授訓導經歷司獄各一員附郭一縣設知縣教諭典史各一員俱駐府城分防同知一員駐灣潭一容美土司請改一州設知州吏目各一員駐州城州同一員駐五里坪

州判一員駐北佳坪改慈利縣屬之大崖關歸新州管轄添設巡檢一員駐劄其地其大崖關外原設土百戶一員請行裁汰。五峯司請改置一縣設知縣典史各一員駐縣城改長陽縣屬之漁洋關歸新縣管轄添設縣丞一員駐劄其地所有新改州縣及歸州長陽興山巴東等州縣俱隸彝陵新設之府管轄。府屬地方請設遊擊一員守備一員千總二員把總四員外委千把總四員兵七百名分防駐劄其各緊要隘口酌添塘汛三十九處武弁俱於彝陵鎮右營內抽撥均應如所請從之。尋定彝陵新設府曰宜昌附郭縣曰東湖容美新設州曰鶴峯五峯新設縣曰長樂。○辛巳諭辦理軍機大臣等定邊右副將軍塔爾岱在北路軍營歷有多年且身被傷痕現今軍營無事著回黑龍江將軍任所給假一年調理病症其將軍事務仍著那蘇圖署理。○壬午陞浙江杭州副將雷逢春爲

浙江衢州總兵官調陝西延綏總兵官張豹
爲陝西河州總兵官實授米國正爲陝西延
綏總兵官○下嫁喀爾喀固倫額駙敦多卜
多爾濟之恪靖固倫公主卒遣官致祭○癸
未清明節遣官祭

永陵

福陵

昭陵

昭西陵

孝陵

孝東陵○

上命

皇四子寶親王弘曆祭

景陵○遣官祭

孝敬皇后○諭內閣據刑部議覆江西民人徐
節孫因救母情急致死黃起鵬一案本內有
徐節孫若不奪打聽其下手則其罪與殺母
無異等語殊爲錯謬凡父母與人爭鬪而救

護情急致傷人命者止當原其救父母之情
若救護不力而即加以殺父母之罪自古及
今無此科條也此等過當之語即見之談論
尚且不可今乃載入奏章通行天下是迫人
子以不得不殺人之勢又添殺人救親之條
例矣況果如部議設有兇惡之徒謀欲殺人
先令伊父母尋釁鬪毆故作跌撲傷損之狀
而伊子繼至迫切救護斃人性命且得引此
案以自辯則貽害長茲豈可勝言乎數年以
來屢降諭旨凡救親情急致成命案者當察
其情罪之重輕以定減等與否假若一槩從
寬則其中詐僞百出弊端叢生刑罰多不得
其平矣徐節孫之罪實有可原但部議與殺
母無異一語大有疵病不得不指出曉諭內
外之秉持法憲者○乙酉
上回宮○阿霸哈納扎薩克貝勒納木扎故遣
官致祭○丙戌陞山西右衛左翼副都統王
常爲正紅旗蒙古都統仍留軍營○禮部議

覆陝西學政王蘭生疏言西安府原轄之耀州同州華州乾州延安府原轄之鄜州鞏昌府原轄之秦州俱經改爲直隸州請於西安府學原進文童額內酌減五名以三名分歸耀州同州華州屬二名歸乾州屬武童額內酌減一名撥歸乾州屬之武功縣延安府學原進文武童生額內各酌減三名撥歸鄜州屬鞏昌府學原進文武童生額內各酌減三名撥歸秦州屬應如所請從之○丁亥

上親耕耤田詔

先農壇致祭畢更服至耕所仍行四推禮畢上御觀耕臺命莊親王允祿裕親王廣祿貝勒斐蘇行五推禮吏部左侍郎邵基戶部尚書公慶復禮部尚書三泰兵部尚書高起刑部尚書憲德工部尚書徐本署都察院左副都御史索柱通政使司左通政福柱署大理寺卿滿色行九推禮各以次耕如儀

上御齋宮順天府官員率耆老農夫行禮畢至

耕耤所農夫終畝王以下各官行慶賀禮賜茶停止筵宴○是日

上幸圓明園○諭兵部大學士鄂爾泰現今交辦事件甚多所管鑲黃旗滿洲都統事務著副都統偏圖暫行署理○戊子

上詣

恩佑寺行禮○江南總督趙弘恩摺奏江寧省城舉行保甲事宜奉

上諭編立保甲先應審度地方之可行與否有司才力之能行與否毋得一味嚴急勉強從事儻地方或不相宜才力或有不逮反滋紛擾毫無裨益前代論治術者動稱社倉保甲二事然必須俯順輿情徐徐勸導相機酌宜而爲之方能奏效非如賭博宰牛私鑄盜匪等項但當繩之以法者之可比也且立法之初嚴似勝寬而不知過嚴之弊害亦隨之蓋寬徐則姦宄暫時潛跡而善良却不致株連嚴急則姦宄固無所容身而善良亦不免擾

累矣總之爲政以得人爲要用得其人自能因地制宜順時敷教若不得人縱奇策神術徒美聽聞耳於事何濟○庚寅諭內閣朕聞南方濱江兩岸多係蘆洲民間俱將蘆葦堆貯洲上賣以度日而江楚及上江各幫漕船由江往回竟有不法水手每遇蘆柴堆積之處輒糾集多人蜂擁上岸恃強奪取洲民攔阻動輒毆詈民多怨言夫領運弁員即坐本幫糧船之內水手肆行如此安得推爲不知至督運之糧道押運之廳員雖云統轄衆幫亦當留心查察何得任其多事著漕運總督通行曉諭儻有仍蹈前轍者經朕訪聞必將文武大小運官分別嚴加議處○旌表烈婦直隸滑縣呂大有妻陳氏拒姦不染自縊完貞山東館陶縣國士魁妻李氏守正拒姦投河殞命各給銀建坊入祠致祭如例○辛卯裁直隸張家口協標左營守備一員改張家口路叅將所轄萬全營膳房堡新河口堡洗

馬林堡柴溝營懷安城左衛城西陽河堡等營汛歸張家口副將管轄從直隸總督李衛請也○旌表江蘇鹽城縣烈女蘇公煥女蘇氏拒姦不從投水殞命給銀建坊入祠致祭如例○壬辰調署白都納副都統伊特倫來京以白都納協領昂薩理署白都納副都統○喀爾喀和碩額駙多爾濟色布騰故遣官致祭○癸巳山西右衛右翼副都統巴爾賽緣事降調陞長史色爾德爲山西右衛右翼副都統○甲午諭內閣國家設立兵丁原以充緝盜安民之寄廣東爲濱海巖疆武備尤宜勤練不應少有廢弛查通省兵丁共計七萬餘名不爲不多歲費俸餉將及二百萬兩國家養之者不爲不厚乃近年以來朕留心訪察粵省兵丁怯懦退縮者多奮往用力者少曾有客船被劫盜止八人汛弁兵丁一任事主喊救閉門不出又巡哨私鹽不能擒捕屢被打傷搶去器械此朕訪聞甚確者同一

廣東之人而爲盜賊私梟者則强悍無比其食糧入伍者轉怯弱不堪皆由將備選募時多憑兵家子弟親戚賞緣充當但取其應對熟嫻趨蹌便捷不但民間強壯勇敢之人無由入選即餘丁中之勇健而質樸者亦棄而不錄以致營伍之中習尚虛文全無實濟此乃戎政之最有關者著廣東督撫提鎮等嚴飭所屬將弁痛改從前陋習嗣後募補務取強健勇敢之人時加訓練申明賞罰如再有遇賊退怯等情必重懲以示儆其現在老弱之輩濫充營伍者作何沙汰募補之法著該督撫提鎮等秉公妥議辦理儻仍蹈前轍經朕訪聞必將督撫提鎮及大小將弁分別嚴加議處不少寬貸○貴州古州總兵官韓勲奏報上年七月苗人老包等捏造出有苗王之語當被拏獲交審嗣經釋放今年二月內古州屬之八妹高表等寨聽信妖言糾集苗衆滋事妄行臣差撥兵役躡探確實即派

遣官兵彈壓二十五日各寨頑苗同聲響應圍攻汛城將沿途安設之塘房燬壞而藏弩等寨遂與八妹同謀糾結遠近附和官兵奮力勦禦殺死頑苗多人並將六寨搗燬臣等差遣鄉導通事人傳諭各寨令將倡首糾結之人獻出現據樂鄉等六寨各將首犯拏解懇求招安得旨八妹高表等寨地處險僻離鎮協較遠巡歷難周此番蠢動雖係姦苗煽誘糾衆妄行然揆厥情事或因騷擾或因恐嚇遂致激成事端俱未可定不然以二萬苗衆若早蓄異謀何以旋聚旋散官兵一出即悔罪來歸竝無自固之詭計即除捏造謠言及倡首糾結之人著督撫提鎮嚴緝勒獻審明按律治罪外其起事根由務期確實查出不得絲毫粉飾寬縱以致長姦貽害且上年七月即有苗人老包等捏造苗王之語嗣經釋放是上年造言之人未曾根究殊屬疎忽今八妹等寨雖經懲創然既已爲匪終懷疑

懼況造言倡首之姦苗尚未盡除餘衆驟難寧貼著該督撫提鎮剴切曉諭苗人勿蹈前轍致干勒除竝飭文武官弁留心訪察嚴禁兵役騷擾恐嚇等弊以安苗衆○青海扎薩克親王戴青和碩齊察罕丹津故遣官致祭旌表河南鎮平縣烈婦張從鳳妻李氏遇暴不從自縊殞命福建沙縣烈女王仲仁女王氏拒姦不染投水完貞各給銀建坊入祠致祭如例○戊戌陞鑲白旗前鋒叅領六格爲正藍旗滿洲副都統○予故禮部尚書吳襄祭葬謚文簡○己亥定邊左副將軍額駙策凌遵旨議奏噶爾丹策零請以哲爾格西拉胡魯蘇爲我喀爾喀遊牧地界查從前喀爾喀遊牧尚未至哲爾格西拉胡魯蘇地方應即照伊所請行但我卡倫原在阿爾泰迤東額貝和邵和通鄂博布延土科布多托羅和烏闌等處安設此係哲爾格西拉胡魯蘇界外應議定將我卡倫照舊安設至厄魯特

遊牧應以額爾齊斯爲止如伊不遵或以阿爾泰嶺爲界不得越過哈巴博爾濟阿里克泰清吉爾等處至中間交壤之處彼此俱毋得打牲嗣後阿爾泰迤東令我處巡邏迤西令彼處巡邏如此庶爭端可以永息再準噶爾策妄阿喇布坦在時其遊牧原在河泊克薩里察罕胡濟爾迤西數年以來漸越額爾齊斯賊夷素性狡詐反覆無常使伊遊牧相逼太近則防守實難斷勿令過阿爾泰嶺方爲善策奏入報聞

大清世宗敬天昌運建中表正文武英明寬仁
信毅大孝至誠憲皇帝實錄卷之一百五十三

大清世宗敬天昌運建中表正文武英明寬仁
信毅大孝至誠憲皇帝實錄卷之一百五十四

監修總裁官光祿大夫經筵講官太僕議政銓保和殿大學士兼兵部尚書總理事務等因加十五級臣鄂爾泰
總裁官光祿大夫經筵日講官起居注太僕兼太子太僕保和殿大學士兼戶部尚書仍兼吏部尚書翰林院

事三等伯加十五級臣張廷玉光祿大夫經筵日講官起居注太僕議政大臣武英殿大學士兼工部尚書仍兼管

翰林院院事加二級臣湯敏光祿大夫經筵講官太子太僕東閣大學士兼禮部尚書加六級臣徐本光祿大夫

經筵講官議政大臣協辦內閣大學士事務禮部尚書仍兼管太常寺鴻臚寺事等因加十五級臣

教修

雍正十三年乙卯夏四月辛丑朔享

實錄卷一百五十四

十

太廟

上命

皇四子寶親王弘曆行禮○癸卯諭內閣教習
舉人貢生多係不應即選之人考取補用即
三年期滿不過勤於訓課其職易稱只宜量
加議敘以示鼓勵從前議以知縣教職即用
未免太優且中式進士之人尚須分部學習
挨班銓選知縣若科分甚淺之舉人教習三
年遽行即用遲速轉覺相懸殊屬太驟至舉

人銓選教職亦須照依科分歷久方能挨補今以近科舉貢教習期滿俱准即用以致年久應選之人轉多壅滯於銓法亦未均平其應如何酌定班次分別選用之處著吏部詳議○調正白旗漢軍副都統于永世爲鑲紅旗漢軍副都統陞江南京口協領王景佩爲陝西西安左翼漢軍副都統○浙江巡撫程元章疏言向因杭州漢軍四旗壯丁生齒蕃衍於雍正十一年間倣照閩省之例挑選餘丁三百名撥歸督撫標下頂補綠旗名糧查浙省向無督標祇有撫標兩營共額兵七百萬餘名內除隨糧公糧外實止兵丁六百餘名非若閩省督撫兩標數千名可比杭城省會重地額兵原少凡巡緝私鹽查拏盜賊在在需兵差遣而新補旗兵例不派撥則標兵應付差使實屬不敷况每年出缺有限約畧餘丁三百名非歷十年之久不能補足且綠旗亦有餘丁無缺頂補未免向隅應請酌加更

定得旨雍正七年朕曾降旨當日各省設立漢軍駐防因人數不敷是以添設綠旗兵丁今該將軍管轄今漢軍餘丁蕃衍足供差操之用嗣後將軍標下綠旗兵丁缺出即將漢軍餘丁頂補如綠旗兵丁之子弟內有父祖食糧年久者著於本省督撫等標營名糧准其充補此朕再三籌畫辦理者蓋以當年漢軍人數不足是以添設綠旗兵丁今漢軍餘丁日多止應令補本將軍標下綠旗之缺於情理實爲允當若照閩省之例以將軍所轄漢軍餘丁充補非將軍所轄之綠旗兵丁缺辦理實屬未協况浙江撫標額兵本少豈可又分三百名令漢軍充補若果漢軍餘丁繁多當另思所以安頓之法著將閩省頂補綠旗之漢軍撤回俟本標缺出頂補其缺仍給還綠旗浙省頂補甲兵亦著撤回○旌表烈婦直隸交河縣盧成妻馬氏拒姦不從被毆殞命新樂縣郝進寶妻邵氏遇強不染自縊

完貞廣東鶴山縣趙成潤妻李氏逼嫁不從投繯全節各給銀建坊入祠致祭如例○甲辰諭內閣縣令爲親民之官關係民生休戚最爲切近是以自古帝王慎重司牧之選以端化民成俗之原朕亦屢降諭旨若果縣令皆能得人各治其邑各子其民竟可使閭閻之中無一夫之失所此非誇大之論也凡選用知縣類多舉人進士出身之人其中才具可觀克稱厥職者固多而年老迂疎不諳吏治者亦復不少朕念其攻苦寒牕幸登科目不忍遽令放廢於是定以改教之例俾得邀一命之榮且居師儒秉鐸之席此朕隨材器使委曲成全之至意也況改補教職之後若果課士有方通曉吏治仍可膺卓異薦舉以爲上進之路此又在本人之自勉茲未限以教職終其身也每見候選各員有年老才庸不稱縣令之任而苦不自量仍欲勉強謁選其意蓋以縣令爲榮希圖僥倖且以到任之

後不能辦事仍可改補教職無礙於功名故爲苟且姑試之計殊不思邑宰之職民社攸關以不能勝任之人冒昧銓選及到任之後試看一年半載再請改教其間輾轉更換時日已多事務廢弛之患有必不能免者豈非庸碌貪位之人貽之咎耶嗣後科目出身之員若係揀選命往者到任後不勝縣令之任准該督撫以教職題請改補如係月選之員或年力衰邁或才識庸愚即當於未選之先或臨選之際呈請改教若不自度量仍欲銓選知縣該員到任後著該督撫留心察看或以才力不及或以溺職分別題叅不得奏請改教以遂其自便之私如果有爲人謹慎學問優通者著該督撫將應否改教之處具本聲明送部引見請旨○乙巳頒聖祖仁皇帝御製全集賜諸王大臣翰詹官員等隨具摺恭謝得旨俱著往恩佑寺謝恩○禮部議覆四川學政隋人鵬條

奏。川省苗民久經向化嗣後各屬土司苗童有讀書向上者請准與漢民文武童生一體考試於各該學定額內憑文去取卷面不必分別漢苗應如所請從之。○丙午諭大學士等前據理藩院奏稱鄂爾多斯上年收成歉薄貝子羅卜臧請借倉糧議令辦理夷情事務郎中七十五會同該扎薩克查明乏食蒙古先借支一月口糧其在秋成之前應再行借支定議呈報等語朕已允行又據貝勒查木陽貝子齊旺班珠爾納木扎爾色冷等請借倉糧亦經理藩院議令七十五達色照議辦理今朕聞陝西神木榆林等處上年收成歉薄糧價昂貴而鄂爾多斯蒙古之乏食者多向神木榆林城內就食甚為可憫該郎中七十五等從前未曾呈報及奉旨查辦之後又復怠忽遲延竟不上緊辦理甚屬不合著七十五等即行會同該道將乏食蒙古查明一面具報該督撫一面酌動倉糧發給毋使

乏食蒙古至於失所至於神木榆林等處乏食民人亦著該地方官查明酌量辦理○諭辦理軍機大臣等辦理青海事務達鼐病故著散秩大臣色楞前往西寧辦理青海事務○山西布政使溫而遜緣事革職調直隸布政使王蔭為山西布政使司布政使陞河南按察使張鳴鈞為直隸布政使司布政使河南南管河道繆孔昭為河南按察使司按察使○庚戌旌表烈女湖北麻城縣葉汝熾聘妻阮氏江陵縣帥定遠聘妻李氏俱聞夫身故矢志捐軀福建晉江縣胡仁女胡氏強姦不從投繯殞命各給銀建坊入祠致祭如例○辛亥吏部遵旨議奏北路軍營官兵於克爾森齊老地方擊賊大捷所有陣亡官員應加恩議敘奉天正紅旗拜他喇布勒哈番又一拖沙喇哈番北京從優授二等阿達哈哈番鑲白旗領催珠里黑龍江正黃旗副驍騎校費雅思哈授拜他喇布勒哈番船廠驍騎校

奇弩鑲藍旗領催奔博里黑龍江鑲紅旗領催馬爾圖授拖沙喇哈番各給與應得祭葬并查明應襲之人引見承襲從之○壬子調墨爾根副都統多起納回京以署鑲藍旗滿洲副都統額爾圖署墨爾根副都統○癸丑禮部議覆奉天府府尹宋筠疏言奉天永吉州學舊設廩生增生各一名近將長寧縣學撥歸永吉州學管轄請添設廩生增生各一名五年出貢一次應如所請從之○甲寅諭辦理軍機大臣等現今內地估撥軍糧有已經出口運送在途者著即於哈密橋灣布隆吉爾等處就近收貯不必再運巴爾庫爾其未經出口糧石亦著暫停運送可傳諭署陝西總督劉於義知之○辦理軍機大臣等遵旨議奏北路軍營官兵臣等會同副將軍常德詳加籌畫應於新近派往之滿洲蒙古綠旗兵丁內選留二萬名分駐各形勝地方其餘盡行撤回原處鄂爾昆等處去年更換綠

旗兵八百名仍留種地得旨北路軍營駐兵二萬之處可密行文商之大將軍平郡王今噶爾丹策零雖遣使求和而疆界尚未定議不可深信俟準噶爾傾心歸順始可酌量撤兵若駐兵不敷禦敵之用則不如不駐兵矣但兵數太多未免耗費國帑務須詳悉籌畫此二萬兵能否禦敵之處著大將軍副將軍等公同妥議密奏○乙卯雲貴廣西總督尹繼善題廣西太平府羅陽土知縣黃世瑾故請以其子黃思憲襲職下部知之○丁巳孝端文皇后忌辰遣官祭昭陵○諭內閣廣東開採一事十數年來內外臣工奏請者甚多朕悉未准行上年總督鄂彌達巡撫楊永斌奏稱開採以資鼓鑄於粵民生計大有裨益言之再三朕發九卿確議旋經議覆准行後復有數人條陳極言其不應行今朕再四思維廣東近年以來年穀順成米價平減盜賊漸少地方寧謐與從前風

景迫異今若舉行開採之事聚集多人其中良頑不一難以稽察管束恐爲閭閻之擾累況本地有司現在勸民開墾彼謀生務本之良民正可用力於南畝何必爲此僥倖貪得之計以長喧囂爭競之風此時正在計議之初停止甚易著該部即行文該省督撫令其遵諭停止○戊午吏部議覆署西安巡撫史貽直疏言陝西直隸同州請陞爲同州府裁知州州同吏目缺設知府通判經歷各一員改西安府撫民同知爲同州府撫民同知增置附郭一縣設知縣典史各一員並同州原轄之朝邑郃陽韓城澄城四縣暨直隸華州與所屬之華陰蒲城潼關三縣及現屬直隸耀州之白水一縣俱歸同州府管轄其直隸耀州與所屬同官一縣改歸西安府管轄應如所請從之尋定新設同州府附郭縣曰大荔○己未陝西延綏總兵官米國正奏言榆林邊城之外即係河套夷民雜處交易爲生

鄂爾多斯一部落風氣素稱渾樸近日多有內地民人指引進口夷人偷盜牲畜窩藏分利而神木口開店民人熟悉夷情多端欺誘或不肖弁兵通同容隱或該管衙門模糊了事致夷人無從申訴應請飭行沿邊文員一體稽查以安夷衆再榆林居民鮮知禮義鬻賣妻子相習成風甚至回明地方官彼此交易並請嚴飭地方有司立法禁止以端風化得旨著交與該地方文武官員實力奉行仍令督撫提鎮等不時稽查○庚申實授侯朱震爲正白旗漢軍副都統○癸亥諭八旗都統等軍前遣回之官員兵丁內著有勞績得傷殘疾者若俱行革退殊覺可憫著該管大臣等詳查具奏官員賞給半俸兵丁賞給一半錢糧以資養贍如有病愈復欲請用者亦著具奏請旨○乙丑擢直隸通永道德希壽爲都察院左副都御史○丁卯禮部議覆貴州學政晏斯盛疏言貴州威寧州屬宣化里

可渡河之田地戶口現經改歸雲南宣威州
管轄請將可渡河以南之文武生員撥歸雲
南宣威州學應如所請從之○旌表烈婦河
南沁水縣禹汝德妻張氏新安縣呂循曾妻
蕭氏俱痛夫身殞絕粒捐軀河南夏邑縣張
秀妻戴氏山東黃縣趙居寬妻鄒氏俱矢志
殉夫投繯畢命各給銀建坊入祠致祭如例

大清世宗敬天昌運建中表正文武英明寬仁
信毅大孝至誠憲皇帝實錄卷之一百五十四

大清世宗敬天昌運建中表正文武英明寬仁
信毅大孝至誠憲皇帝實錄卷之一百五十五

敕修

雍正十三年乙卯閏四月庚午朔果親王允

禮奉差泰寧回京摺奏臣於去年十二月二

十三日行至泰寧達賴喇嘛居住惠遠廟親

至山門迎接諭旨恭請

聖安隨宣讀諭旨頒給賞賜達賴喇嘛奏稱自

幼荷蒙

聖祖皇帝洪慈差遣將軍統兵送至藏內安坐

達賴喇嘛之牀復蒙

皇上施恩浩蕩無際後聞有令瞻仰

天顏之諭旨即欲星馳前來因尚未出痘不能

監修總裁官光祿大夫經筵講官太子太保領侍衛內大臣內閣學士兼禮部尚書總理事務三寶通判加五級臣等謹將
初纂官光祿大夫經筵講官太子太保領侍衛內大臣內閣學士兼禮部尚書總理事務三寶通判加五級臣等謹將
事三等伯加三級臣等謹將光祿大夫經筵講官太子太保領侍衛內大臣內閣學士兼禮部尚書總理事務三寶通判加五級臣等謹將
翰林院掌院事加二級臣等謹將光祿大夫經筵講官太子太保領侍衛內大臣內閣學士兼禮部尚書總理事務三寶通判加五級臣等謹將
經筵講官經筵講官太子太保領侍衛內大臣內閣學士兼禮部尚書總理事務三寶通判加五級臣等謹將

親叩金闕今恭聞訓旨復受隆恩惟有竭力
行教敬祝

聖躬萬年遐福等語為此謹奏報聞辛未兵
部議覆雲貴總督尹繼善疏言貴州安籠一
鎮爲苗疆要區設有三營請添兵三百名以
備調遣其定廣協界連粵省猺狝雜處應添
兵一百四十名將附近之新添營歸併管轄
思南營環接川省所有守備請改爲中軍守
備竝添設遊擊一員兵一百五十名就近歸

銅仁協管轄仍聽台拱鎮統轄石阡營請添
兵一百名遵義黔西二協請各裁去都司一
員守備一員即將左營改爲中軍都司右營
改爲守備梓潼縣請留遵義協右營千總一
員兵一百名駐劄防守其原防之把總一員
兵五十名撤回本營均應如所請從之壬
申以額外內閣學士阿克敦署鑲藍旗滿洲
副都統以翰林院編修沈文鎬提督山西
學政癸酉改湖廣原隸督標之武昌水師

營提標之常德水師營歸城守營管轄從湖
廣總督邁柱請也甲戌以

永陵副總管伊奇祿爲

永陵總管盛京工部侍郎對琳緣事革職以

稽察盛京御史七克新署盛京工部侍郎

兵部議覆四川總督黃廷桂疏言四川泰寧

寧安德靖三營原爲防護達賴喇嘛而設今

已奉旨回藏請將三營弁兵俱行裁撤令泰

寧副將帶兵七百名與化林協原設之兵三

百名一同駐劄化林分爲左右二營酌設都

司二員千總二員把總四員除化林原設都

司千把外即以三營議撤之弁員撥補其黎

雅我邊二營仍歸化林管轄再於議撤弁兵

內撥千總一員兵一百名增隸阜和營并於

該營內輪派把總一員兵三十名駐防惠遠

廟均應如所請從之乙亥以福建臺灣總

兵官蘇明良署福建陸路提督調福建海壇

總兵官馬驥爲臺灣總兵官丙子陞直隸

保定城守尉楊泰爲山西右衛左翼副都統
（丁丑）諭辦理軍機大臣等聞鄂爾多斯貧
乏蒙古有就食口內典賣妻子人口者著交
該地方官查明照原價賞給贖出加意安插
請旨如有隱匿遺漏者後經查出定行從重

治罪 戊寅以翰林院侍講學士楊椿充日
講起居注官 禮部議覆陞任提督順天學

政吳應棻疏奏博野縣生員鄭景淶妻吳氏
滿城縣民康玉相妻田氏平山縣民王永歷

妻商氏宣化縣民李智妻楊氏成安縣儒童

陳洞聘妻馮氏江蘇巡撫高其倬疏奏鹽城

縣儒童劉閻士妻許氏甘泉縣民項起鵠妻

程氏李正榮聘妻霍氏安東縣儒童孫兆鳳

聘妻趙氏俱痛夫身故慷慨捐軀請予旌表

以維風化查婦女激烈輕生向經禁止今應

否旌表請旨遵行得旨吳氏等著予旌表凡

烈婦輕生從死昔年

聖祖仁皇帝曾降旨禁止朕於雍正六年又降

旨曉諭至明且悉數年以來因各省奏請旌
表烈婦者尚少朕是以格外加恩准其旌表
今數日之內題奏殉夫盡節之烈婦烈女如
此之多可見地方官未將從前諭旨剴切曉
諭鄉曲愚民尚未深悉

聖祖仁皇帝與朕重惜民命之至意以致民間
婦女激烈捐軀者更多於前嗣後若概予旌
表恐轉相則效易致戕生深可憫惻著地方
有司將朕前旨廣爲宣布俾遐陬僻壤家諭

戶曉儻宣諭之後仍有不顧軀命輕生從死
者不必概予旌表以長閭閻憤激之風○已

卯雲貴總督尹繼善奏言台拱古州兩鎮現

今會勦姦苗其事起於姦苗圖騙銀錢造言

誑惑古州文武不能善爲彈壓一聞聚集之

信不即迅速擒拏漸至附和勾結鎮臣韓勲

撥兵王嶺擊散衆苗不即行追捕致令蔓延

均難辭咎俟事竣詳查具奏報聞○予故正

黃旗滿洲都統法喀祭葬謚勤恪○庚辰改

廣東提標原轄之三江協歸右翼總兵官統轄羅定協歸高雷廉總兵官統轄春江協歸左翼總兵官統轄從廣東總督鄂彌達請也○予故前鋒統領西路軍營叅贊穆克登祭葬如例○辛巳兵部議覆原署福建總督福州將軍阿爾賽疏言建寧以協改鎮額兵三千名內撥別營駐防者七百名似覺兵單力薄請於中左右三營添設守兵四百名其分水岑陽二關均屬要地請將崇安營遊擊駐防分水添設外委一員駐防岑陽再從前撥駐浦城縣之鎮標中營遊擊撥駐建陽政和二縣之左營守備右營守備等員俱請調回府治以中營守備移駐浦城另撥千總二員分駐建陽政和至壽寧縣既經改隸福寧府請將撥駐壽寧汛之右哨千總原帶兵一百二十二名俱行撤回另於福寧鎮三營內撥兵一百二十二名酌派千總外委各一員帶領分防壽寧汛又浦汛所轄二渡盆亭木城

三關鴈塘忠信二塘請俱歸楓嶺營守備管轄所有原防兵丁一併撤回府城均應如所請從之○山西巡撫覺羅石麟疏報陽高縣開墾雍正十二年分田地一十八頃有奇下部知之○下嫁土默特達爾漢貝勒和碩額駙阿喇布坦之郡主卒遣官致祭○壬午授恒溫親王允祺子弘昀弘腫康親王巴爾圖子謨本順承忠郡王諾羅布子封訥赫輔國將軍薩穆當子登忠輔國將軍對青格子愛隆阿奉國將軍恒德子穆璽奉國將軍斐新子多隆額奉國將軍塞爾赫子鄂洛順奉恩將軍達里珠子成岱奉恩將軍申穆德子嵩年輔國公蘇爾禪子廣齡奉恩將軍務爾圖子凌臯奉恩將軍琳康子武興均為奉恩將軍○改山西蔚縣原屬之廣昌營歸直隸紫荊關叅將管轄從直隸總督李衛請也○癸未署鑲白旗蒙古副都統盧保緣事革職以鑲白旗護軍叅領塞都署本旗蒙古副都統

黑龍江副都統卓爾海緣事革職陞奉天協領覺羅馬希納爲黑龍江副都統○戶部議覆直隸總督李衛疏言廣昌縣浮圖峪等村業經改隸易州其屯地額徵米豆交納州城必由紫荆關經過徑路崎嶇載維艱請照宣化輓運之例改折徵收應如所請從之○

甲申諭內閣從前賞給各省駐防兵丁生息銀兩因兵丁數少之處無大員管領難於經理是以未嘗議及今查保定太原德州三處各駐防兵五百四名熱河駐防兵八百名爲數雖少亦應一體加恩以資吉凶之用保定太原德州三處各賞銀二千兩熱河賞銀三千兩保定熱河二處銀兩交與總督李衛派員管理太原銀兩交與巡撫石麟德州銀兩交與巡撫岳濬務令辦理妥協俾兵丁等得沾實惠○署山西大同總兵官冶大雄緣事革職以直隸正定總兵官蔡永文署山西大同總兵官○青海輔國公阿拉布濟故遣官

致祭○乙酉予福建銅山營巡哨出洋被淹兵丁傳福等卹賞如例○戊子吏部議覆廣東總督鄂彌達疏言新寧縣屬廣海寨地方濱臨大海距縣遼遠請移該縣之望高司巡檢駐劄其地所有附近之上川島矧崗一都應令管轄再上川之大崩灣下川之大坦二處與縣寨俱隔大洋竝請添設陸路二汛以資防守均應如所請從之○理藩院以喀爾喀車臣汗垂扎卜病故將應行承襲之人帶領引見得旨車臣汗之號著原爵車臣汗滾臣之子達嘛林承襲原爵車臣汗垂扎卜之子德木楚克著承襲伊父扎薩克多羅郡王伊叔恭額薩木丕爾著仍在郡王上行走○乙丑以翰林院侍講蔣溥右春坊右庶子戴瀚俱署日講起居注官○庚寅諭辦理軍機大臣等尚書渣克丹著來京車臣汗部落事務著交與內務府總管來保原任侍郎塞楞額辦理○又諭據大將軍平郡王等奏稱軍

前黑龍江兵丁內有將發遣之太監充作從役帶往者除將此內應行治罪之人拏解刑部外其餘俱交帶領撤回兵丁之大臣等帶回等語此等治罪發遣之太監從前如何往隨出征兵丁充爲從役是何將軍大臣辦理著行文該將軍等查明嗣後派兵時不准將發遣之太監充作從役帶往○辛卯以散秩大臣伯馬哈達署領侍衛內大臣果毅公訥親署鑲白旗滿洲都統以山西道御史倪國璉爲雲南鄉試正考官翰林院檢討張鵬翀爲副考官編修周範蓮爲貴州鄉試正考官兵部主事熊學鵬爲副考官○兵部議覆署湖南巡撫鍾保疏言湖南辰永靖道巡查苗境向例帶乾州鳳凰二營兵丁以肅觀瞻但兵丁各有汛守未便輕易隨帶而文武不相統攝亦難以約束稽查請加該道以兵備銜於出巡時令就近各營撥兵護送應如所請從之○癸巳署鑲黃旗漢軍副都統鳴柱

緣事革職以鑲黃旗參領馬元熙署本旗漢軍副都統○旌表烈婦直隸深州許三月妻張氏江南吳江縣莊應龍妻張氏太和縣莊三妻黃氏甘泉縣孫大成妻喬氏河南寶豐縣溫保兒妻韓氏鹿邑縣左召吉妻夏氏俱拒姦不污投環殞命各給銀建坊入祠致祭如例○乙未諭內閣據河東總督王士俊奏稱山東安山湖地勢低於運河其湖旁涸出之地請分別開墾以濟民食等語山東運河之水全賴諸湖停蓄以資灌注所以前人有水櫃之名後因諸湖淤墊附近居民侵佔爲田以致水少不能濟運大有關於漕務經朕屢降諭旨令河道總督等悉心經理近年始無水淺停舟之慮今王士俊所奏乃爲開墾起見朕思湖水專資濟運儻或經理之初但貪田畝之有餘而不計湖水之不足將來田多水少漕運稽遲則顧此失彼未免輕重倒置不可不慎之於始也著交部詳確速議具

奏尋議運道深通全賴諸湖蓄洩即竭力疏濬尚恐淤墊未便改淤爲田有妨濟運應令該督會同總河確勘具題再議得旨湖潕蓄洩專爲濟運王士俊奏請開墾爲田祇據委員張體仁等一面之詞並未親身歷勘遂欲舉行甚屬草率此乃必不可行之事毫無疑義亦無庸再行確勘王士俊所奏不准行○調署鑲藍旗蒙古副都統金梓署正白旗滿洲副都統以鑲藍旗護軍叅領厄倫忒署本旗蒙古副都統○丙申兵部議覆雲貴總督尹繼善疏言貴州黔西協所屬之安平汛離協寫遠原防弁兵應請撤回另撥千總一員兵一百二十名改駐沙土地方其安順營分防之灞陽汛改歸長寨營設防即將安順營原防灞陽汛之千總一員兵八十名駐防安平安順營石頭寨一汛應令歸化營撥千總一員兵五十名防守平遠協所屬之白老虎汛應就近歸安順營管轄即將該營原防石

頭寨之把總一員兵五十名移駐其地至安順營所屬之黎兒哨應於提標城守後營內派撥弁兵防守均應如所請從之○丁酉諭準噶爾台吉噶爾丹策零朕軫念衆庶止息兵戈振興黃教安逸生靈用是特遣使臣降旨宣諭爾極悅服遣垂納木喀等進貢齋表內稱若使後世言某皇帝與某台吉失好以致衆生勞苦殊非美名若互相和好振興黃教安逸生靈則可垂休聲於永久等語朕披覽之際不勝嘉許欣悅果能知此天必錫之以福若不知此惟以貪暴爲事則天亦必加之以禍此常理也至於搆兵之由爾意若自朕始者昔我聖祖皇考時衆云準噶爾之人秉性貪暴好尚兵戈侵擾鄰封不崇釋氏仁慈之道彼時朕猶未深信後爾父策妄阿喇布坦無端侵我哈密又遣兵赴藏擾亂佛教殘毀寺廟傷害喇嘛朕始知前言不妄似此則兩路之駐兵

防範謂始自我

皇考可乎我

皇考聖心仁愛惟欲安撫衆生故遣使往來數次乃爾父推託遷延始終無定朕繼承大統爾父又遣根頓來京朕仰體

皇考仁愛之心仍欲和好俾黃教振興生靈安逸今根頓至朕前親執其手諭云爾回時可告知爾台吉朕執爾之手即如見爾台吉之面朕與爾台吉應俱教訓子孫輩令其永遠和好於是遣使議和定界詎意爾父並無和好之意屢次託故遷延且藏匿我朝之逃亡羅卜藏丹津並未告知使臣以致諸事未成和議中止自此朕亦未遣使前去爾亦不遣使來京後爾父物故爾遣特磊奏云爾父已成佛矣不思佛爲天下人之所尊禮者爾云成佛其誰尊禮乎且特磊舉動驕慢不知禮法是以朕諭特磊云爾台吉若果誠心遵旨和好可將羅卜藏丹津解送前來並將邊疆

定界朕豈有遣發大兵之理乃爾之和好未定則爾意實未可測不得不爲防範故兩路有駐兵之舉及爾又遣特磊前來奏稱羅卜藏丹津已解至中途聞大兵發遣是以中止爾若果將羅卜藏丹津解送自應直到軍營何以中道而返耶朕因解送羅卜藏丹津之言涉於虛妄故於特磊回時令部內加以拂意之言責以難行之事然並未勒令遵行也若果勒令遵行自應寫入敕諭之內乃不寫入敕諭祇於部內行文者特令爾知非朕意也爾縱有難行之處亦應聲明陳奏何以並未回覆而於使臣在巴爾庫爾軍營等候之際潛兵盜我馬匹此非構兵自爾乎我兵果欲進剿則於特磊去後乘爾兵無備之時不行襲擊轉俟爾兵有備有是理乎此俱已往之事朕既軫念衆生將爾從前過愆悉已寬宥無庸置議今爾既遵循禮義敬奉朕旨歡悅順從欲修和好遣使來京朕心甚嘉之再

爾使垂納木喀等口奏從前冒言將羅卜藏丹津解送侯大事定後不難辦理至定界一事阿爾泰原係厄魯特遊牧之地杭愛原係喀爾喀遊牧之地請由哲爾格西拉胡魯蘇等處至巴爾庫爾地方定爲邊界等語羅卜藏丹津爾從前既屢奏解送即與解送無異但所云阿爾泰係厄魯特遊牧之地此噶爾丹從前之事噶爾丹爲我兵勦滅取其土地竝其骨殖子孫俱經爾父獻納此衆人所共知者現今噶爾丹之屬人及丹濟拉之子孫俱在內地爾準噶爾曾未越阿爾泰遊牧居住乃謂爲厄魯特遊牧之地可乎且喀爾喀等尚不令近阿爾泰遊牧者原欲使兩界相隔稍遠可息爭端而可令準噶爾之人居此乎夫永遠和好之事定界實爲要議朕特命大臣等與垂納木喀等公同酌議務期兩有裨益指定邊界具奏而垂納木喀等云我台吉所交口奏言詞之外竝無別語不便擅定

等語此事在京既不能定議用是再頒敕諭遣來使垂納木喀等齎回若果誠心修好疆界不可不明設日後無知之人越界妄行稍有爭競則又生事端矣况定界之說原起於爾父策妄阿喇布坦奏請以安衆生者彼時朕曾降旨嘉許後又請將阿爾泰山梁外哈道里哈達清吉爾布喇清吉爾兩處不必置爲閒地朕未准行今特欲安逸衆生永遠和好將此兩處空閒之地俱屬於爾祇自克木齊克汗騰格果上阿爾泰山梁由索爾畢嶺下哈布塔克拜塔克之中過烏闌烏蘇直抵噶斯口爲界竝將爾父所請自胡遜托輝至哈喇巴爾魯克悉作空閒之地似此分界在爾竝無難行不便之處爾其仰體朕加恩眷注之意遵諭定界方可永遠修好朕爲天下主惟思扶持黃教利濟衆生敦崇和睦執中循禮斷不強汝以難行者至於不便大國之處亦不能俯允爾請也儻爾遵奉諭旨議定

疆界之後猶以喀爾喀之遊牧逼近爾屬不免疑懼奏請稍展空閒之地亦屬可行俟爾遣使再來陳奏時朕當另降諭旨台吉其熟思詳審酌定具奏○命賞給準噶爾台吉噶爾丹策零各色緞十疋○戊戌諭內閣各省秋審定例該督撫會同司道等官審錄分晰情實緩決矜疑具題關係最爲重大向聞外省會審之時不論案件多寡務於一日之內悉行定議一切俱聽督撫主張不特守令不敢置喙即司道亦無一辭輕重定於俄頃之間是非決於一人之口究其實際督撫亦未必了然不過令幕客創一畧節貼於冊上徒飾觀瞻而已況有席遑懸彩鼓吹喧闐日甫踰中即退而肆筵行酒竟有似於宴會之禮者甚至召令優人演劇爲樂近來曉明義理者多各檢點而此風猶未盡革夫刑罰者國家不得已而用之者也天以父母斯民之責畀之吾君臣凡茲犯法獲罪之民皆吾赤子

也平時不能撫綏化導使之遵守法度免於罪愆已有忝於教養之職矣及陷於刑辟之後又復視爲泛常不察情罪之輕重率定爰書之出入寬所不當寬而嚴所不當嚴以致讞獄不得其平冤情抑而莫訴勸懲兩失兇暴肆行所謂明刑弼教者安在清夜捫心能無愧赧乎朕自臨御以來於一切刑名案件莫不虛衷斂息詳慎推研每於法司所進立決本章悉令內廷管本官員三次覆奏然後批發每年秋審朝審時朕先將招冊細細披覽及至勾到之日復面與大學士刑部堂官等往復講論至再至三然後降旨蓋哀矜惻怛之意動於不能已而發於不自知竝非欲博欽恤好生之名於天下臣民也聖祖當年於勾到日皆著素服朕亦效法行之凡爲督撫大臣者受朕封疆之寄應與朕同此哀矜惻怛之心乃各省秋審大約皆於一日之間草率定局竝未博採羣議詳察實情

不過視秋審爲具文。於會審之日。雖不便穿著素服。豈有結彩設席。徵歌演劇之理。此則殘忍性成。不學無術者之所爲。嗣後各省秋審時。該督撫務率司道等官。敬慎周詳。殫心辦理。必使權衡不爽。情罪相符。向來竝無限期。何妨多寬時日。安得視爲虛文故套。輕忽民命。以供其自便之私。至於會集既久。除日食常餐外。儻有肆筵設席。仍蹈從前陋習者。經朕訪聞。必嚴加議處。○調奉天副都統巴爾岱來京。白都納副都統哲庫訥爲奉天副都統。仍留軍營三姓副都統覺羅七十五爲白都納副都統。陞三姓協領崇提爲三姓副都統。○辦理軍機大臣等遵旨議奏。西路軍營兵丁。經臣等議准。將打牲烏喇兵一千名。赴北路駐劄。綠旗兵丁內挑留一萬名。在巴爾庫爾駐防。再留一千名。在哈密添防。所有應派總統協辦之大臣。及領兵之提督總兵等。應請旨遵行。其餘官兵。俟準噶爾使臣回

後。俱行撤回。再巴爾庫爾既令留駐兵丁。一切文移。俱須鈐印。查軍營現有鎮安將軍揚武將軍。振威將軍三印。請將鎮安將軍印信給派出之總統大臣掌管。其揚武將軍。振威將軍。應令查郎阿同寧遠大將軍印信一并帶回恭繳。得旨。留駐巴爾庫爾兵丁。著內大臣常賚總統提督顏清如原任尚書馬會伯協同辦事。總兵張朝良。楊琮管領兵丁。其留駐哈密兵丁。著查郎阿酌派大員管領。餘依

議。○又議覆定邊大將軍平郡王福彭遵旨議奏。北路軍營撤兵駐兵事宜。一軍營應留滿洲蒙古兵二萬名。酌派紅郭爾鄂隆調來之京城滿洲兵二千名。烏里雅蘇泰駐劄滿洲兵一千名。令侯馬蘭泰護軍統領職銜吉當阿副都統富達禮管轄。家選兵二千名。令護軍統領阿成阿副都統敦巴管轄。漢軍兵一千名。令都統諾爾渾。石禮哈管轄。奉天兵四千名。令護軍統領胡琳。噶爾錫副都統席

爾璘哲庫管轄船廠兵二千名令副都統富昌阿思哈管轄索倫兵二千名令副都統職銜巴里孟古翟三管轄打牲烏喇兵一千名令護軍統領職銜哈岱管轄牧廠察哈爾兵一千名令副都統綽爾多學士吳金管轄四子部落兵一千名令王阿喇布坦多爾濟管轄鄂爾多斯兵一千名令貝勒查木陽管轄內扎薩克兵一千名令喀喇沁公羅布臧策布登協理台吉羅卜藏達錫管轄察哈爾厄魯特兵四百名牧廠兵三百名喀喇沁兵三百名令散秩大臣巴匝爾管轄此次留駐之京城滿洲漢軍內扎薩克等兵俟明年派兵前往更換奉天船廠呼倫貝爾牧廠察哈爾等兵於丁巳年派兵前往更換俟議定界址後再將應行減撤之兵具奏至防守臺站之鄂爾多斯兵一千名應撤去一半其存留之五百名令副都統圖爾賽席爾塔照舊管轄其都統佟時茂副都統劉英協理台吉滾濟

扎布俱行撤回。烏里雅蘇泰地方緊要請挑選前鋒六百名並撥滿洲蒙古兵三千名在烏里雅蘇泰附近地方駐劄再撥綠旗兵一千名看守城池令前鋒統領塔爾馬善哈岱管轄其車臣汗兵五百名西三部落兵一千名令在烏里雅蘇泰附近之鄂衣哀特里默爾地方駐劄一派守卡倫侍衛護軍三十人駐防年久請於京城另派更換。四省綠旗兵丁除烏里雅蘇泰調撥一千名外其扎克拜達里克推河塔米爾三處請各撥綠旗兵五百名各派副將等一員帶領駐劄。駐劄大兵之地最關緊要查鄂爾昆地方遼闊水草俱佳請於此處酌量建城駐兵將糧餉官物移運收貯一留駐兵丁與撤回兵丁所需糧餉馬匹等項應照例給發其馬蘭泰隊內餘剩應撤兵丁一千名請令護軍統領職銜喀爾吉善帶領回京俟李如栢所領換班綠旗官兵到時再令軍營綠旗官兵起程。

各回原處。均應如所請。至大兵在鄂爾昆駐劄。或暫令大將軍平郡王福彭留駐總統。或另派大臣前往之處。候旨遵行。得旨。大將軍平郡王著暫留統轄。叅贊領侍衛內大臣薩穆哈等著仍協同大將軍平郡王辦理事務。前鋒統領阿岱著回京。餘依議。○三等伯李林緣罪革爵。以其姪孫黑格襲替。○旌表烈婦江南丹徒縣姜廷貴妻趙氏。遭寇不辱。赴水捐軀。河南寧陵縣孔四妻王氏。強姦不從。被刃殞命。烈女江南甘泉縣吳廷望聘妻池氏。夫亡守志。逼嫁投繯。河南上蔡縣李浩女李氏。禦暴不污。自縊完節。各給銀建坊。入祠致祭。如例。○己亥。以直隸督標中軍副將宋愛署直隸正定總兵官。○禮部議覆河東總督王士俊奏請奉祠先蠶。臣等謹按蠶神名號。周禮鄭註。上引房星。以馬祖爲蠶神。然蠶固與馬同出於天駟。而天駟可謂馬祖。實非先蠶。成如李釋之論。淮南子引蠶經。黃帝元

妃西陵氏始蠶。蓋黃帝制作衣裳。自此始也。漢祀苑窰婦人。寓氏公主。事屬無稽。查禮記享祀先蠶。不著名號。隋建先蠶壇於宮北三里。爲壇高四尺。唐會要。遣有司享先蠶。如先農。宋景德三年。詔祀先蠶。依先農例。遣官攝事。本於周禮。有宗伯攝祭之文也。前明釐正祀典。山川百神。各依本號。如農始炎帝。止稱先農之神。則蠶始黃帝。亦應止稱先蠶之神。再周制蠶於北郊。其壇應設於北郊。祭日用季春吉巳。一切壇制祭品。俱視先農典禮。京師爲首善之地。應於北郊建壇奉祀。屆期派禮部堂官一員承祭。通行直省各府州縣一體遵行。從之。

大清世宗敬天昌運建中表正文武英明寬仁
信毅大孝至誠憲皇帝實錄卷之一百五十五

大清世宗敬天昌運建中表正文武英明寬仁
信毅大孝至誠憲皇帝實錄卷之一百五十六

監修總裁官光祿大夫經筵講官太僕議政大臣保和殿大學士兼兵部尚書總理兵部事務三等伯加十五級臣鄂爾泰

總裁官光祿大夫經筵日講官起居注太僕兼太子太僕保和殿大學士兼戶部尚書仍兼官吏部尚書翰林院掌院

事三等伯加十三級臣張廷玉光祿大夫經筵日講官起居注太僕議政大臣武英殿大學士兼工部尚書仍兼官

翰林院掌院事加二級臣福敏光祿大夫經筵講官太子太僕兼閣大學士兼禮部尚書加六級臣徐承允祿大夫

經筵講官議政大臣協辦內閣大學士事務禮部尚書仍兼官太常寺鴻臚寺事日三奏等奉

敕修

雍正十三年乙卯五月庚子朔調署山西大

卷一百五十六

同總兵官蔡永文署直隸宣化總兵官署直

隸宣化總兵官南天祥署山西大同總兵官

○辛丑夏至祭

地於

方澤

上命

皇四子寶親王弘曆行禮○戶部議覆甘肅巡

撫許容疏言階州屬之成縣所轄上店汪川

等里向經督臣岳鍾琪題准改隸秦州查上

店汪川一帶地方離秦州一百餘里未為近便請仍改隸成縣管轄應如所請從之○壬寅

孝誠仁皇后忌辰遣官祭

景陵○禮部議覆提督江蘇學政張廷璐疏言

蘇州淮安揚州三府既經分設太倉通海等

三直隸州請於蘇州府學原額內酌撥文章

五名武童三名歸太倉州屬揚州府學原額

內酌撥文章五名武童三名歸通州屬淮安

府學原額內酌撥文章二名武童二名歸海

州屬應如所請從之○癸卯諭大學士等據

湖廣總督邁柱等陸續奏報台拱逆苗不法

情形黃平施秉一帶俱遭其擾害似此則黃

平以西之重安江驛凱里汛及大風洞地方

施秉偏東之青溪所屬及焦溪地方周圍二

三百里恐皆不免踐踏朕心深為廕念其鎮

遠府城雖稱賊攻甚急但既有楚兵三千星

往援剿賊衆自然解散黃平州之西即緊接

清平縣有哈元生在彼料理自可無慮惟是

此番苗變既勾結熟苗漢姦料難即速平靖

寧可多備楚兵以資調遣著總督邁柱提督

董芳等再撥兵二千名陸續前進協力嚴剿

以除兇逆至賊苗敗遁之後必仍歸還巢穴

其助惡熟苗漢姦知無所逃勢必唆令攻打

古州等處亦不可不預為籌畫著廣西巡撫

金鉷提督霍昇即派精銳三千名選才能大

員統領以二千名由洪江一路徑到黎平進

古州背後應援彈壓以一千名由河路至平

宇一帶防範下江以備相機調遣爾等可密

寄信前去其有應行就近辦理事宜著湖廣

廣西督撫提鎮等一面探聽信息相度機宜

辦理一面奏聞務期妥協○諭兵部理藩院

尚書兼理鑲紅旗蒙古都統事務僧格年已

老邁不必兼辦旗務著副都統羅密補授鑲

紅旗蒙古都統○鑲藍旗漢軍副都統李楠

緣事降調陞二等侍衛馬尼為鑲藍旗漢軍

副都統仍兼署正紅旗滿洲副都統事○甲辰諭內閣西陲用兵以來一應軍需皆取資於公帑絲毫不以累民惟是甘肅等處運送糧餉不能不藉民力之輓輸朕心軫念屢沛恩膏即當豐稔之年亦下蠲租之詔所以賞百姓之急公示朕心之體恤也茲聞甘省所屬地方入夏以來有雨澤愆期之州縣或恐收成稍薄納課艱難著將雍正十三年甘肅通省所屬應徵地丁錢糧全行蠲免俾催科不擾民力寬舒該督撫可董率有司實力奉行以副朕加惠秦民之至意○旌表山東萊陽縣烈婦梁恪妻丁氏調姦不從投繯殞命給銀建坊入祠致祭如例○乙巳以額外內閣學士阿克敦署工部左侍郎○辦理軍機大臣等議覆西安將軍秦布奏言前經辦理軍機大臣議准挑選西安八旗滿洲蒙古兵三千名以二千名分駐涼州一千名分駐西寧查西安漢軍兵丁向與滿洲蒙古一同効

力行走比來生齒日繁此項挑選兵丁請將漢軍一併派入涼州添設城守步兵六百名兩旗合設防禦一員西寧添設步兵四百名每翼各設防禦一員管轄均應如所請至該將軍所奏分駐西寧兵丁改駐莊浪涼州兵丁改駐涼州城外大七巴地方應行令查郎阿馬爾泰詳加定議具奏從之○戶部議覆兩江總督趙弘恩河東總督王士俊山東巡撫岳濬等會奏米糧出洋例禁甚重惟東省青白二豆素資江省民食向由海運不在禁例但船隻出口進口須加查閱請令兩省地方官互給印票照驗以杜偷賣夾帶等弊應如所請從之○丙午諭內閣朕覽刑部侍郎申珠渾等查審鄂昌一案其中多有避重就輕瞻徇隱漏之處鄂昌以戶部司官簡用監司之職因其歷任上司皆極口稱之朕見其年力精壯尚屬明白曉事又係大學士鄂爾泰之姪自然恪遵伊叔之教努力向上以報

國恩是以不次超擢用爲四川巡撫乃伊蒞任以來所辦事件種種乖張顛倒國法大抵性情狂妄而又沉湎於酒以致糊塗昏惰至於如此鄂昌既負朕擢用之深恩又玷伊叔鄂爾泰之顏面論情論理均屬可惡不可不加重懲著革職拏解來京交與刑部將摺內查審不到之處另行嚴審定擬具奏按察使高維新以科員用至藩臬大員之職且屢次寬其處分仍留在任乃不知感戴朕恩抒誠報効竟以專掌之刑名視同膜外聽從鄂昌粘簽發司草率結案永寧道劉嵩齡以新進小臣擢用御史復用道員在川數年因循塞責不思殫心職守祇以逢迎上司爲務今私將銀瓶盛酒巧於餽送大玷官箴高維新劉嵩齡俱著革職拏解來京交部審訊定擬具奏○署鑲藍旗蒙古副都統厄倫忒緣事革職以鑲藍旗護軍叅領西忒庫署本旗蒙古副都統○予福建澎湖水師右營巡哨出洋

被淹兵丁卹賞如例○丁未諭戶部三姓八姓渾春地方兵丁著照寧古塔船廠等處兵丁之例給與餉銀○旌表河南唐縣烈婦吳自聘妻王氏拒姦不污被刃殞命給銀建坊入祠致祭如例○戊申實授阿揚阿爲直隸天津都統○予江南外河營搶護隄工被淹兵丁卹賞如例○辛亥禮部議覆福建巡撫盧焯疏言臺灣鄉試士子向係另編字號額中舉人一名今臺屬五學人文日盛請於閩省解額外將臺字號再加中一名以示鼓勵應如所請從之○壬子遣官祭關聖帝君○兵部議覆山西巡撫覺羅石麟疏言赴甘出征兵丁奉文撤回一時不能得缺請每月支給養贍銀二兩米三斗俟缺出陸續頂補應如所請得旨出征兵丁既回營汛自應仍補原缺若係步兵自當拔補馬糧以示獎勵豈有令其待缺頂補之理至招募頂補之兵原係一時權宜之計應令出缺另

議養贍候補之法方為允協。今巡撫石麟議令出征兵丁候缺兵部即照此議覆。俱屬不合。著另行定議。並行令派兵之省分一體遵行。○癸丑。內閣學士王蘭生緣事降調。陞翰林院侍講學士吳家驥為內閣學士兼禮部侍郎。○甲寅。兵部議覆直隸總督李衛疏言。提標前營新改遊擊駐劄石匣。管轄左右二軍都司。兼轄密雲石塘曹家等各營路都司。必得中軍總理營務以專責成。請令左軍都司兼管中軍事。將協標裁存之千把總二員為左哨。原存石匣城守之千把總二員為右哨。其平谷汛把總應改屬左軍。再順義營屬楊各莊汛為繁庶之區。應將石塘路把總撥出分防。聽順義營守備兼轄。均應如所請。從之。○青海扎薩克郡王盆蘇克汪扎爾故遣官致祭。○丙辰。諭八旗都統等。署理佐領事務原非實授。嗣後若遇世管佐領應行署理者。伊族中如無可以署理之人。即於旗下揀

選才堪辦事之員。與伊族人一同引見。○兵部議覆河東總督王士俊疏言。東省兗州一鎮為數省門戶。地衝差繁。運河綿亘千里。在需兵。該鎮右營沂州德州泰安臺莊高唐曹州梁山沙溝等九營共須增馬步兵五百名以資防守。應如所請。從之。○丁巳。諭大學士等。前據湖廣督撫提鎮奏報台拱逆苗不法情形。比即降旨與湖廣督提於調發官兵三千名外再撥官兵二千名陸續前進。以備征勦之用。又諭廣西撫提派撥精兵三千名分為兩路前往。以資應援彈壓。今覽尹繼善奏摺。其所檄調鄰省官兵之處。與朕諭旨相符。計此時進勦之兵合四省計之已二萬有餘。哈元生親在軍前統領調度。諒自有平定之策。爾等可傳諭哈元生乘此兵威須將清江台拱上下九股兇苗及內地倡首附逆惡寨痛加勦除。務盡根株。不貽後患。其遠寨逼脅附從各苗有悔罪求撫者。皆令盡繳器械。

然後准撫。儻敢抗違不繇。亦相機勦除。如此辦理。方能一勞永逸。若其中有勢不可行之處。可據實奏聞。但毋稍存姑息之念。陽奉陰違。令異日更啓事端。哈元生統領四省官兵。著授爲將軍。凡赴援將弁。俱聽伊節制。調遣其將軍名號。敕印爾等議奏請旨。速行頒發。尋命哈元生爲揚威將軍。仍管貴州提督事務。○予故衍聖公孔傳鐸祭葬如例。○戊午以翰林院編修楊廷棟爲四川鄉試正考官。編修周學健爲副考官。廣東道御史鍾衡爲廣東鄉試正考官。刑部主事王應綏爲副考官。編修沈昌宇爲廣西鄉試正考官。檢討王宗燦爲副考官。工部主事章有大爲福建鄉試正考官。編修金相爲副考官。編修趙大鯨爲湖南鄉試正考官。禮部郎中周祖榮爲副考官。○辦理軍機大臣等議覆署寧遠大將軍查郎阿等摺奏。調赴巴爾庫爾之江寧荆州滿洲兵丁倒斃走失馬騾一案。應將兩營

牧馬之協領阿山泰常在等五十四員革職留任。馬匹著追其餘各員管轄不嚴者應均著分賠。至革職副都統阿克山。觀音保應賠馬匹亦一併追出。應如所請。得旨。此次調往巴爾庫爾之江寧荆州滿洲官兵全然不知行兵之道。馬匹牲畜損傷過多。不耐寒冷。勞苦復有迷失兵丁種種罪愆。此皆官弁向日耽於安逸。廢弛滿洲舊規。甚爲無恥。此次官兵不准以出兵記檔。俟兵丁撤回時。將領兵前往之協領以下。驍騎校以上等官俱著同家屬搬移回京。交該旗帶領引見。其如何令其學習補用之處。候朕另降諭旨。伊等員缺令該將軍另行揀選題補。若該處不能得人著奏聞。由京城揀選前往。○兵部議奏。原任青州將軍鄂彌達借給兵米出少入多。又將無禮不法之前鋒關音保不奏請懲治。遽行枷號。應請旨治罪。得旨。鄂彌達著革職。○己未。工部議覆。署陝西總督劉於義等疏言。寧

夏鎮屬之平羅橫城花馬池三處市口每月
蒙古人等入口貨買零星鐵器理應設法稽
查請嗣後令該扎薩克預先報明夷情衙門
給以印票填明件數斤兩每逢開市之期監
視營員驗明印票方許置買其民人貨賣鐵
器不得私入集場俱令監管營員驗明印票
當官交易仍將原票彙繳夷情衙門查核應
如所請從之○添設河南分巡河陝汝道一
員駐劄陝州撥原隸開歸道轄之河南一府
陝州一州並隸南汝道轄之汝州一州俱歸
新設道員管轄改分守開歸道為分守糧驛
鹽道撥原轄之開歸陳許四府俱歸管河兵
備道兼轄從河東總督王士俊請也○庚申
諭辦理軍機大臣等北路軍營陸續撤回官
兵內有在厄爾得尼招地方打仗効力及奮
勇出羣者俟到京時俱行查出并開明該將
軍所出考語令各該旗具奏請旨○陞雲南
糧道李如蘭為四川按察使司按察使○辦

理軍機大臣等議覆廣東總督鄂彌達奏稱
臣照古州鎮咨文派撥廣東督提標兵二千
名令左江總兵官王無黨統領赴古州援剿
又調廣西撫標兵五百名於黔粵交界要隘
汛地彈壓等語調度俱屬妥協其廣西撫提
兩標兵原係援剿之師應再派五百名以足
前旨三千名之數則兩標亦不至兵單力薄
矣從之○定邊大將軍平郡王福彭奏鑲
黃旗漢軍都統諾爾渾懦弱昏憤不能管轄
員弁約束家人又私用官馬擅扣兵糧殊屬
溺職得旨諾爾渾著革職仍留軍前當苦差
効力行走○辛酉諭辦理軍機大臣等鑲黃
旗漢軍副都統劉瑛著留在軍前與鑲白旗
漢軍都統石禮哈管領漢軍兵丁○壬戌
孝恭仁皇后忌辰遣官祭
景陵
上詣
恩佑寺行禮○癸亥諭內閣據山西巡撫覺羅

石麟奏稱陽曲汾陽兩縣紳衿士民李杭卞時盛等情願各捐銀兩存貯公所。以爲周恤比閭之資。臣現在與各該地方官公同酌議。或置田地。或爲營運。因地制宜。以垂永久等語。夫所謂樂善好施。扶危濟困者。大抵於水旱饑饉之歲。散財發粟。賑救窮黎。又或於平常無事之時。造義倉。以儲米穀。修橋路。以便行人。或置敦宗。贍族之田。或立養老育嬰之所。凡此善事多端。必須出自本人之誠心。而

又親身經理。誼同休戚。始可以惠鄉閭而收實效。今石麟奏稱陽曲汾陽兩縣紳衿士民願捐銀兩存貯公所。其作何措置之道。俟與地方官公同酌議。是該處並無現在應辦之事。此乃另開捐納之條也。若遇無才之有司。經理不善。必致爲胥吏之所中飽。土棍之所侵蝕。而不能裨益於貧乏之鄉人。此人能料及者。而石麟如此辦理。是何意見。陽曲汾陽紳衿士民等既已捐助。其樂善好施之念。

可嘉著將石麟奏摺及開報名單交部分別議敘。並令石麟將各姓所捐之銀。妥商位置。務令地方得受實益。勿致虛糜。向後若有無故捐銀交官者。與朕原旨不符。俱著停止。○陞湖廣洞庭副將魏國泰爲福建金門總兵官。○甲子

上命果親王允禮

皇四子寶親王弘曆皇五子和親王弘晝及大學士鄂爾泰張廷玉戶部尚書公慶復禮部尚書魏廷珍刑部尚書憲德張照工部尚書徐本正紅旗漢軍都統李禧正黃旗漢軍都統甘國璧倉場侍郎呂耀曾俱辦理苗疆事務。○諭辦理苗疆事務王大臣等貴州台拱逆苗不法。擾害黃平地方居民。四散躲避。朕心恐其流離甚爲軫念。應令鄰省官員凡有來至該地方界內者。務須加意撫綏。悉心賑卹。或應派在京大臣前往。或應即交與該督撫料理之處。爾等速議具奏。再赴黔會勘。官

兵雲集糧餉最爲緊要應作何運送協濟之法爾等一併建議具奏尋議逆苗不法被擾之居民順苗有逃避他所者該州縣務須安插得宜計口受食俱動用倉穀庫銀賑卹仍請欽差大臣一員前往撫綏稽查務令得所至會勦官兵糧餉請令湖廣督撫酌撥務須充裕接濟竝令兩廣總督鄂彌達悉心妥辦得旨依議著刑部尚書張照副都御史德希壽馳驛前往○諭內閣工部尚書巴泰向在

聖祖仁皇帝時歷官有年因其居心巧詐諸事模稜毫無建白之處已經棄置數十年不復起用朕即位以來因部中乏老成之臣念伊居官年久經歷有素尚非新進之人可比特加遷擢用爲大員乃伊在任巧詐性成全無理糧務伊在彼數年竝無勞心辦理之事此衆所共知者朕以其年已七旬奉差在外特令回京俾得休息又值滿洲九卿內現在敘

俸年深者甚少因用爲工部尚書伊若具有天良自應感戴重恩及其餘年努力奮勉以稱要職乃伊於工部事件仍一味因循推諉視爲局外於己無涉且將舊定章程任意更改經果親王差回屢事叅奏料其意以爲但能潔己沽名即可自全殊不知竊位苟容致令諸務闕冗廢弛乃臣子之大戒巴泰身爲正卿且受朕格外恩遇而忍如此居心行事必有其故前伊自軍前回時朕曾詢問軍營之事伊除收發軍糧外一切皆云不知似此則其蒼滑之習全未悛改真可謂下愚不移者矣巴泰著革職凡內外臣工身膺職掌務須殫心竭力圖報國恩大小諸事悉心整頓此乃人臣之常分若但知潔己而不知奉公國家亦安用此木偶爲也如果實心爲國之人便有錯誤朕必原諒而保全之如彼馬齊高其倬魏廷珍甘國壁等非不能辦事之人乃習成巧術自謂保身遠害藉爲推卸之計

此風有妨於政治無益於國家況將來後進效尤其弊有不可勝言者朕每加恩於諸大臣其子孫亦多擢用所以嘉其爲國之心也若遇祇圖自全罔顧國事者彼既視國家爲陌路朕豈肯委曲成全以遂其私心向後若必不肯改悔朕不但不成全伊等之生前即伊之子孫若非有卓越之才朕必不加恩錄用所以儆戒臣工俾各猛省以除陋習內外諸臣其咸知朕意○乙丑裁山西凌井關泥

沙澗平刑等四驛驛丞欽從山西巡撫覺羅石麟請也○丙寅諭辦理軍機大臣等準噶爾使臣垂納木喀等到巴爾庫爾軍營起身後著副將軍張廣泗回至西安候旨另有用處○授故月子福存子德沛爲鎮國將軍○署寧遠大將軍查郎阿等摺奏噶爾丹策零現今遣使齎表求和軍營滿洲蒙古官兵應行撤回者俟準噶爾使臣回後請按程挨次分隊行走第一隊貝勒特古斯管領科爾沁

兵一千名由喀爾喀河索納爾濟山前赴原駐牧處其索倫兵一百名應令夸蘭大翼奉參領薩都拜等帶領同科爾沁兵行走至喀爾喀河分路前赴齊齊哈爾第二隊內大臣顧魯帶領原管察哈爾兵一千名由柰曼等路赴駐牧處所其巴爾虎兵一百名應令侍衛噶扎爾圖管領一同前往第三隊副都統達什帶領東四旗察哈爾兵一千名從翁機河前赴駐牧處所其奉天船廠兵一百名應

令原管副都統烏察拉帶領同行行至八溝分路各回伊等本處第四隊副都統班第管領西四旗察哈爾兵一千名行至歸化城前赴本遊牧處第五隊副都統喀拉帶領巴圖魯兵一百五十名應令前往肅州酌量派員分領第六隊散秩大臣安楚護管領土默特兵四百名由塔爾那沁進嘉峪關會同都統民敦沿邊前赴歸化城第七隊一等台吉定西拉錫帶領鄂爾多斯兵五百名行至肅州

會同副都統班第等由寧夏出口回至原遊牧處第八隊協理台吉羅布藏帶領和托輝特兵一百名由奈曼明安一帶前往駐牧處所第九隊貝子衮布管領厄魯特兵五百名由鎮番前赴駐牧處所其內地行走之滿洲官兵內江寧滿兵一千名為第一隊荊州滿兵一千名為第二隊西安兵三千名分作三隊與寧夏滿兵並依次起行俱令原管之將軍副都統等管領進嘉峪關抵肅州各回該處至綠旗兵丁現在軍營共二萬四千七十七餘名內有勇健兵丁到營日淺應行留駐再於西安督標及固原寧夏延綏興漢等處兵丁共挑留一萬一千名內將一萬名駐劄巴爾庫爾一千名添防哈密外其餘俟滿洲蒙古兵丁起行之後亦挨次撤回令各營原管之大員帶領進口以備訓練奏入報聞○丁卯諭辦理苗疆事務王大臣等貴州等處撫定苗疆事宜朕遣刑部尚書張照副都御史

德希壽前往總理與哈元生元展成等會同商酌妥議查辦再現今古州兇苗肆逆他處新撫之生苗恐其中良莠不一防範理宜預籌著各該督撫悉心密議將新設苗疆附近地方確查舊設援勦兵若干防汛兵若干何處已經足用何處尚須添補即於本地召募民壯充應事定之後何處當永遠增添何處當仍舊撤退一一細心速議密辦無或侈張致滋驚擾仍將所辦之處具摺奏聞○又諭據哈元生元展成奏報古州逆苗不法臣哈元生於四月二十日馳赴軍前調度閏四月三十五月初一等日副將紀龍周儀署叅將哈尚德崔傑等各領官兵分路擊殺逆苗奔逃斬獲無算驛路開通黃平一帶地方居民復業及時耕種等語前聞黃平一帶居民被逆苗擾害朕心深為軫念已經降旨諭令督撫動撥正項錢糧確查賑恤今民人復業之初或仍有遷徙未回及資生無力者著元展

成遴選賢員招徠安插加意撫綏勿令一人失所此次哈元生進勦已降旨授爲揚威將軍所有在事有功將弁兵丁俟事竣查明分別議敘其附賊之逆寨餘黨應勦應撫之處著哈元生酌量辦理據元展成奏摺內稱黃平地方爲倉廩監獄重地元展成既知黃平爲倉廩監獄重地逼近苗疆從前何意止設官兵三十名被賊侵擾而伊平時全不留意心籌及亦不具奏請旨以致倉卒無備甚屬溺

職今官兵到彼賊苗迴避乃自然之情勢而元展成奏報之時不自知從前辦理之非大言不慚似有以地方復舊爲幸之意甚屬不合事畢論其功過著交部嚴察議奏○諭內閣刑部尚書張照現今奉差其刑部尚書事務著工部尚書徐本署理工部尚書事務著禮部尚書魏廷珍兼理○撥福建鎮標右營白沙汛把總一員帶兵二十八名駐防龍巖縣溪口從浙閩總督郝玉麟請也○戊辰調

正紅旗蒙古都統王常爲本旗滿洲都統辦理軍機大臣等議覆西安將軍秦布奏稱涼州西寧議准設兵駐防以彈壓蒙古番人今涼州駐兵二千名內請選漢仗好者二百名爲前鋒滿洲八旗兩翼各設協領一員蒙古八旗兩翼合設協領一員滿洲每旗設佐領二員蒙古每旗設佐領一員每佐領各設防禦一員驍騎校一員領催五名其行文事件設筆帖式三員西寧駐兵一千名內請選

漢仗好者一百名爲前鋒滿洲八旗兩翼各設協領一員蒙古八旗兩翼合設協領一員滿洲每旗各設佐領一員防禦一員驍騎校一員領催五名蒙古兩旗合設佐領一員防禦各一員驍騎校各一員每旗設領催二名其行文事件設筆帖式二員西寧止議設副都統一員恐事務繁多應於協領內揀選一員令其協辦涼州將軍衙門照依西安之例設立二司其將軍副都統印信二司關防協

領條記請交部鑄給至官兵俸餉口糧草豆等項照西安之例支領俱應如所請從之

大清世宗敬天昌運建中表正文武英明寬仁信毅大孝至誠憲皇帝實錄卷之一百五十六

大清世宗敬天昌運建中表正文武英明寬仁信毅大孝至誠憲皇帝實錄卷之一百五十七

監修總裁官光祿大夫經筵講官太僕議政大臣保和殿大學士兼兵部尚書總理事務正人等伯加十五級臣鄂爾泰

總裁官光祿大夫經筵日講官起居注太僕議政大臣保和殿大學士兼戶部尚書仍兼管吏部尚書翰林院掌院

事三等伯加十三級臣張廷玉光祿大夫經筵日講官起居注太僕議政大臣武英殿大學士兼工部尚書仍兼管

翰林院掌院事加二級臣福敏光祿大夫經筵講官太子太僕東閣大學士兼禮部尚書加六級臣徐本光祿大夫

經筵講官議政大臣協辦內閣大學士事務禮部尚書仍兼管太常寺鴻臚寺事臣三泰等奉

敕修

雍正十三年乙卯六月己巳朔禮部議覆廣

實錄卷一百五十六

東廣韶學政王丕烈疏言粵省各衛所屯軍籍童生額多人少且軍民兩籍混冒訐控不已請照順天學政楊超曾題准河間等衛裁併歸縣之例將粵省各屬衛所屯童歸入現住辦糧之州縣民籍應試一體憑文撥入府學再雷瓊等府向有附籍入學捐納貢監者請定限兩月准其呈首改歸原籍以杜頂冒均應如所請從之○庚午兵部議覆浙閩總督郝玉麟等奏言閩粵南澳洋面島嶼歧雜

風信靡常。若歸海壇金門兩鎮分巡。則鞭長莫及。請以南澳左營銅山洋汛俱改歸南澳鎮巡查。呼應甚捷。并請將金門鎮巡船兩隻撥歸南澳巡哨調度。應如所請。從之。○壬申。授故奉國將軍薩克新子漢章阿爲奉國將軍。○以右春坊右庶子戴瀚充日講起居注官。○戶部議覆直隸總督李衛遵旨議奏稽查張家口兵科給事中尚德條陳門稅事宜。一宣化府爲南北通衢。凡有貨物已經張家口。居庸關上稅。過府之時。張家口監督復委家人書吏照數重收。以致小民肩挑背負手持日用筭筭鍋刷瑣碎之物進城無不邀攔收稅。民情甚爲不便。且家人書吏徵多報少。究非實裕國課。嗣後南北商貨若已在張家口居庸關上稅者。請敕部定例。宣府不許重徵。刊刻木榜。豎立各門。如有違禁橫徵者。嚴加叅處。一居庸關收稅之所。離張家口三百餘里。監督勢難躬親。每差親信家人協同吏

役。攜帶印單收稅。而家人識見卑鄙。輒爲關役利誘。私用小票。隱漏偷肥。嗣後請委附近州縣不時查考。但昌平延慶二州離關稍遠。難於查考。請設立稅課大使一員。給以鈐記。令收商稅銀兩。按月轉解監督。仍令霸昌道就近稽查。照宣府之例。民間零星日用之物。免其抽稅。如有苛勒商民侵漁滋事者。亦嚴加叅處。均應如所請。從之。○癸酉。辦理軍機大臣等議覆署寧遠大將軍查郎阿等摺奏西路軍營撤兵事宜。一奏稱巴圖魯官兵進口之後。定例止給口糧。索倫奉天船廠官兵路途遙遠。俱恐盤費不敷。請每官一員借一季俸銀。每兵一名。借半年餉銀。均於軍需銀內動給。造冊送部。於伊等俸餉內照數扣還等語。應如所請。一奏稱江寧等處滿兵在內地行走。盤費誠恐不敷。到肅之日。請將江寧。荆州。每官一員。酌借一季俸銀。每兵一名。酌借四月餉銀。西安。寧夏。每官一員。酌借一季

俸銀每兵一名。酌借兩月餉銀。所借銀兩。在該官兵俸餉內扣還等語。查江寧荊州領兵各員。內有協領阿山。泰常在等五十四員。前於倒斃馬匹案內。已議革職留任。定例不支俸銀。現無俸項可抵。應毋庸議。至江寧荊州兵丁。及西安寧夏官員兵丁。查即阿等請借銀兩。亦屬過多。臣等酌議江寧荊州兵丁。借給兩月餉銀。西安寧夏官員。借給三月俸銀。兵丁借給一月餉銀。所借銀兩。咨部扣還。得旨。索倫奉天船廠官兵。効力行走。頗著勤勞。且路途遙遠。伊等所借俸餉銀兩。俱著賞給。不必扣還。江寧荊州之滿洲官兵。在軍前諸凡不及。廢弛滿洲舊規。甚為無耻。爾等所議不准借給官員俸銀之處。甚是。餘依議。○甲戌。禮部議覆四川學政隋人鵬疏言。黔省畢節縣之河北地方。田糧戶口。既經改歸川省永寧縣。請將該處文武生員。悉歸永寧縣學就近考試。應如所請。從之。○乙亥。諭戶部。各

省從前辦公。無項可動。上下共相捐應。官民並受其累。即各官薪米之需。皆取給於該地方之耗羨。而地方大小不一。多寡亦不均平。往往不能固其所守。此人人洞悉其弊者。山西巡撫諾敏。始請提解耗羨之法。後各省督撫。次第效法。將經年費用之款項。衙門事務之繁簡。議定公費。派給養廉。俾公事私用。咸足取資。自行此法以來。吏治稍得澄清。閭閻咸免擾累。此中利益。乃內外之所共知共見者。各省布政司職掌錢糧之總匯。自應加意慎重。其應批解者。隨時查催。不使拖欠。其應支給者。嚴加稽核。不致冒濫。庶財用常充。而官民永受其益。乃數年以來。朕留心體察。外省布政使中。竟有庸劣無識之人。將此項銀兩。視為無足重輕之物。而不念其為民脂民膏。或那補借支。或任意費用。前任含糊交代。後任不便深求。竟將有關國計民生之項。漸成紙上空談。而督撫亦不查察。似此日久愈

難清楚矣。在當日舉行之初。朕原降旨。此事若善於奉行。則地方可受其益。儻奉行之不善。則地方轉受其累。各省之能行與否。總聽該督撫自爲酌量。並未強其一例通行也。今覽近日情形。恐漸有不妥之處。將來貽人口實。則非朕准行之本意也。著戶部先行查明各省公費養廉銀兩。其有按年造冊咨送查核無差者。無庸清查。外其並未造冊咨送。及雖有冊籍。而籠統開造者。其中必有不清之處。即著勒定限期。令造清冊。送部查核。至於清查之法。應自該省議定公費養廉之年分起。至前任卸事之日止。將額徵公費完欠雜支。同餘剩未給各數目。按年歸款。各官養廉。照依正署起止月日。應得分數。并扣除空缺。逐一徹底清查。其收數內有拖欠未完者。分別可否著追。其支數內有透動加增者。分別是否應給。現在各年應存銀兩。有無那移虧缺。分晰接受。催追著落完補。嗣後按年分

晰造冊。隨同奏銷錢糧各冊。咨送戶部核銷。如此。則各省存公銀兩。可以漸次清理。而接任各官收支。亦必慎重。於國計民生。均有裨益矣。○丙子。辦理軍機大臣等議覆。署寧遠大將軍查郎阿等摺奏。西路駐兵事宜。一。邊地定界之後。廷議酌定巴爾庫爾留兵二千名。哈密留兵二千名。輪班駐防在案。查巴爾庫爾隘口。一至下雪之後。處處可行。若留兵二千。即全數派防。實不敷用。至哈密留兵二千名。屯田既屬不敷。巡防更難分辦。且巴爾庫爾之與哈密。中隔南山大坂。聲息不能驟通。若秋冬下雪之後。更難通信。臣等酌議與其分駐於兩處。不若合駐於山南。應將留駐巴爾庫爾之二千兵。俱駐哈密。其哈密原議二千名。應再添一千。共計五千名。則兵力不分。巡查易徧。即屯田經牧。均可辦理。此五千兵。丁應駐哈密三千名。其西之三堡沙棗泉東北之塔爾那沁。俱現有城堡。應各駐一千

名。三處分駐。聲勢聯絡。呼吸相通。方得嚴密。一軍營馬駝。附近哈密一帶。夏天炎熱。可牧之處甚少。應於播種之後。山北草肥。撥哈密兵一千。塔爾那沁。沙棗泉兵各五百。合共二千名。令統領大員。帶領至山北。招莫多。胡吉爾太。沙山子。鹿心山等處。經牧。至深秋。仍回山南過冬。其過夏牧馬之時。須添設斥堠。應於吳爾圖。哈達。伊克思度爾。敦什希三處地方。各設斥堠。周圍望遠。防守牧廠。俟交冬過山。將斥堠全行撤回。哈密等處。既分駐兵丁。則西北一帶。俱應安設斥堠。瞭望四遠。乃有備無患。查南山大坂。爲哈密北面屏障。應於駐兵內。撥二百名。分駐於南山大坂盤道上。小堡。於鹿心山。松樹塘。烏關。特爾木斯。畢留大坂等四處。各設斥堠。派兵瞭望。至於無克克嶺。爲三堡。沙棗泉要隘。應於駐兵內。派撥二百名。安設無克克嶺上小堡。於搜大坂。白楊溝。羊卜納錫喇腦兒等三處。各設斥堠。

派兵瞭望。其塔爾那沁河源。爲塔爾那沁要口。應於駐兵內。撥二百名。安設河源小堡。於莫艾舒。魯孫大坂等二處。各設斥堠。派兵瞭望。一。大兵撤後。哈密存貯之糧。甚屬充裕。又有蔡巴什湖屯種地畝。可以供支三處兵丁口糧。無庸輓運。一。留駐巴爾庫爾兵丁。塞外勤勞。已歷七載。邊界定議之後。應令全數撤回。查安西鎮標及瓜州兵。共七千餘名。除現在哈密駐防一千名外。存營尚有六千餘名。應即於安西兵內。挑派四千名預備。俟巴爾庫爾官兵應撤之時。即令大員統領。前赴哈密駐防。以均勞逸。俱應如所請。從之。○丁丑。設福建臺灣府屬彰化縣學。廩生增生各十名。從福建巡撫盧焯請也。○己卯。旌表山東德州烈婦。劉彬妻劉氏。夫亡守節。自縊捐軀。給銀建坊。入祠致祭。如例。○辛巳。刑部議奏。諾爾渾。參奏福祿軍前鑽營各款。並無實蹟。但福祿係允祇心腹用人。行止不端。應擬斬。

監候得旨。前據諾爾渾密奏。福祿乃允祇心腹用人。心術行止。俱不可問。於北路出兵時。營求派往。伊到軍前。毫無効力之處。又復鑽營該管諸大臣。由護軍校。委放閒散章京。復委副叅領。又署理掌管緊要軍機兵部員外郎。似此匪人。竟充要職。恐撓亂與洩漏。皆於軍機未便等語。朕因覽諾爾渾所奏。福祿秉性姦邪。存心叵測。種種夤緣鑽刺之處。大干法紀。是以降旨拏解回京。交與刑部嚴審定議。今覽刑部審訊情由。福祿出兵數年。並無過犯。且在和通胡爾哈。殺賊受傷。得受恩賞。又曾派往科布多。隨征効力。凡諾爾渾所奏。盡惑擾亂。洩漏軍機。皆全無影響之事。且諾爾渾狡猾乖張。近日諸事敗露。此即伊造言誑奏之一端也。福祿著釋放。其諾爾渾原摺著發出與福祿。並衆目閱看。并令在廷臣工共知之。朕待天下臣民。無不予以改過自新之路。即如阿其那。塞思黑。隆科多。年羹堯之

黨與屬下。朕加恩錄用者。不可勝數。並無成心。豈以福祿爲允祇舊屬。而存刻待之意。該部既審無實蹟。且有行間効力之勞。便當據實奏聞。請旨。豈有不審實情。誤引律條。擬以大辟之理。著嚴飭行。○癸未。諭辦理軍機大臣等。栢之蕃著以副都統銜。前往北路軍營。統領漢軍兵丁。効力贖罪。○以額外尚書渣克旦。爲工部尚書。○以太常寺卿滿色。署太僕寺卿。○甲申。禮部議覆貴州學政晏斯盛疏奏。黎平府屬亮寨正長官龍紹儉呈稱。由生員出身。請應科舉。查龍紹儉。既已承襲土官。不便准其鄉試。得旨。土司龍紹儉。原由生員出身。既有志觀光。陳請科舉。准其一體應試。若得中式。其土司世職。著伊將應襲之人。舉出承襲。○丙戌。諭理藩院。據扎魯特貝勒阿諦沙報稱。今歲春時亢旱。將伊旗分人等移於近河潮濕之地居住。五月初七日大雨。竟日夜間水發。淹没人畜甚多等語。扎魯特

等旗分。年來連值旱澇。收成歉薄。今又遭此水患。深可憫惻。從古天人感召之理。一定不易。果能各修人事。安分循理。自必獲福。若不善而行惡。即可以致災患。此被災旗分之扎薩克台吉等。身圖安逸。怠玩公事。苦累屬下。不加愛惜。其所屬人等。不知親上之義。法紀罔遵。貪營小利。互相竊盜。因而干犯天和。災害疊至。儻不知悔改。猶以被災怨望。安能消禍致福。嗣後扎薩克台吉等。居心忠正。各盡職業。勤於公事。愛養屬下。令其從善。其部屬民人等。各守分遵法。承應官差。黽勉効力。上下鼓勵。交勉於善。自能雨暘時若。災患不生。人畜滋息。米糧豐稔。共享安寧之福。其理固不爽也。即今蒙古等。於遊牧處謀生。豈不知地方形勢。而夏令正雨水之時。率衆環居近河之地。並不防護。以致被災。此皆怠惰成習。昧於謀生。後此可不加謹慎耶。著將此旨。行文衆扎薩克等。令其徧行傳諭。各加勉旃。○

丁亥。諭內閣。現今道府出缺甚多。一時不得勝任之員。著在京三品以上滿漢官員。於現任科道部屬及知府同知知州通判知縣內。各舉一人。或勝道員之任。或勝知府之任。填註明白。於三日內。交送內閣。彙齊奏聞。候朕簡用。若所舉有相同者。亦准彙奏。伊等身爲大臣。歷官年久。豈無深知確見之一人。可膺保薦者。況奉朕特旨。尤當矢公矢慎。以副朕諮詢之意。儻懷挾私心。瞻徇情面。將來所舉之人。或有不端劣蹟。或不能勝任。定將原保舉之大員。嚴加議處。○戊子。以翰林院侍讀學士陳憲華爲浙江鄉試正考官。山西道御史劉元燮爲副考官。左春坊左中允彭啟豐爲江西鄉試正考官。廣西道御史張仕遇爲副考官。雲南道御史盧秉純爲湖北鄉試正考官。刑部主事蘇霖渤爲副考官。○己丑。調鑲藍旗漢軍副都統馬尼爲正紅旗滿洲副都統。陞鑲黃旗副參領慶泰爲鑲藍旗漢軍

副都統○辦理軍機大臣等議覆。署寧遠大將軍查郎阿等摺奏西路駐防事宜。一。巴爾庫爾兵丁全撤之時。廷議於安西等處添設一提一鎮。兵一萬名。各令搬移家口。前往駐劄。以彈壓邊陲。聲援哈密在案。查添兵萬名。需糧料十萬餘石。安西屯地不過三千餘石。甚屬不敷。況兵丁搬移家口。更多糜費。即城堡營房等事。俱費周章。不若更番迭戍。既可省費。亦可以經久遠。請將駐防哈密兵五千名。就近於肅鎮甘提。涼鎮。西寧鎮。安西鎮。各派撥一千。合足五千名。令在哈密駐防。其安西地方。不必添設提鎮兵丁。一。於陝西督標派撥一千名。固原提標。并各協屬派撥一千五百名。延綏。派撥一千名。寧夏。派撥一千名。河州。派撥五百名。共五千名。在赤金。靖逆。柳溝。布隆吉爾。橋灣。五處駐防。彼地附近俱有牧場。可以牧放馬駝。一。赤靖五處之兵。二年期滿。應全行更換。其哈密兵丁。應每年更換

一半。則一半熟手。即可教習一半新兵。一。哈密赤靖等處。各有五千兵丁駐防。其統領將弁。須派總兵二員。副將二員。帶領遊守千把。分管駐防赤靖等處之總兵。副將。於兵丁換班。亦俱更替。駐防哈密之總兵。副將。須一年更替換班。庶屯田斥堠諸事。有新舊大員。相間管領。諸事熟練。一。軍營應支口糧。查駐防哈密之兵。屯種收穫。儘足供支。至駐防安西之兵五千名。連領兵將弁。歲需口糧一萬五千餘石。其各衛所官屯地畝。應全交興安西鎮標營兵丁承領屯種。為伊等恒產。即以收穫籽粒。供兵丁口糧。如尚不敷。照例折給銀兩。一。肅鎮為臨邊重地。請添城守一營。設都司一員。千總一員。把總二員。於標營兵內。派步兵二百名。專司城守汛防之事。查肅鎮標合計新舊兵。共二千九百餘名。應添足三千之數。將新募之守兵。即撥入城守營。俱應如所請。但哈密及赤靖等處駐防兵丁。雖各派

總兵統領大兵甫撤。兩總兵分駐兩處。必得一總統大臣彈壓。請再派提督一員。駐劄哈密。節制兩處駐防之總兵。居中調度。更爲有益。從之。庚寅。吏部議覆貴州巡撫元展成疏。奏平越府知府朱東啟患病。請回籍調理。俟病痊起用。應如所請。得旨。向來外任官員告病者。即行休致。無病痊復用之例。朕從愛惜人材起見。特准各省督撫酌量。若屬員內居官素優。而患病是實者。於告病本中聲明將來病痊。仍行引見補用。此朕體恤成全之大恩也。近於引見之時。見起用各員。本無大恙。調治未久。即赴部銓補者甚多。則患病之不實顯然矣。又有借名告病。而巧爲規避者。或因繼起有人。囊橐豐厚。冀娛晚景。或因民俗刁悍。地方繁劇。慮及考成。其該管上司。但見屬員不戀官職。遂爾代題。而不覺受巧官之欺朦也。今且言一二人。如原任福建漳州府知府王之琦。同知王時翔等。皆因地繁劇。

而託詞告休者。本皆精神強健。並非實病。得請之後。讌樂歡遊。朕知之最確。似此者。各省不可枚舉。今元展成題請平越府知府朱東啟告假回籍調理。俟病痊起用。明係該員畏懼苗疆。而爲此規避之計。朱東啟著解任。仍留黔省調理。俟病痊之日。自黔送部引見。將來凡有似此告病。該督撫題請病痊起用者。俱著留於該省調理。不准回籍。俟病痊之日。該督撫送部引見。若永遠告休。不請起用者。該督撫司道。必察其患病果實。一時難痊。或年老力衰。不能辦事。然後照例申詳題達。儻受屬員之欺朦。或徇平日之情面。仍蹈故轍。經朕訪聞。必將該上司從重議處。辛卯。諭內閣。自古地方官員。有進獻方物之禮。蓋以地土所產。貢之於君。所以將其誠意。而爲君者鑒其意而酌納。所以篤堂廉之誼。聯上下之情也。朕即位以來。亦循照舊例。間有進獻珍寶古玩者。朕概降旨停止。向來鎮臣中。亦

有隨督撫進獻者。朕皆諭止之。至於所獻之物。備隨時賞賜。內外臣工。以示家人一體之意。豈非朕所需用。而收貯內府也。雖臣之効忠於上。君之加恩於下。不在乎此。然亦儀文禮節之一端。所以歷來未廢。凡爲督撫者。既以此將其誠敬之悃。則當於採辦之時。厚其價值。俾所屬官民。歡欣從事。方爲事君盡禮之實心。乃朕向聞各省大員。採備貢物。有恃上司體勢。發價減少者。以致民間受累。視爲

畏途。如榆次不敢種好瓜。肅寧畏植好桃。外間傳爲話柄。近朕訪聞福建採買柑果。有短價累地方官民之處。則與君臣聯接之本懷。大相違背。朕豈肯爲此無益之儀文。而令承辦之微員。貿易之百姓。或受擾累哉。以貢物而累及閭閻。萬萬不可。即或交與屬員代辦。而價值不敷。令其暗中賄補。是又假公濟私。收受賄賂之巧術也。似此食用微物。朕發價市買。何所不得。豈肯絲毫累及地方。可通行

曉諭督撫等。自接奉此旨爲始。著將從前貢物之數。再減一半。儻仍蹈舊轍。朕必將各省貢獻之例。全行禁止。○貴州巡撫元展成。奏都勻府屬之清平知縣邱仲坦。當逆苗圍攻凱里之時。嚴諭民人不得預行逃避。及見賊勢兇橫。該縣即回清平。凱里被焚。逆苗圍城。又不能巡查防守。致姦苗入城放火。監犯悉行免脫。再有平越府之平越知縣楊興道。提臣統兵駐劄楊老驛隘口。一切軍裝糧運

飾詞推諉。阻滯不前。邱仲坦畏縮無能。楊興道推諉玩延。均難姑容。特疏題參。請旨革職。得旨。邱仲坦身爲縣令。見賊勢兇橫。驚惶潛避。全無防守稽查。以致姦苗入城放火。疎縱獄囚。大干法紀。楊興道將糧餉軍裝。推諉阻滯。甚屬可惡。著革職。拏交總督尹繼善嚴審定擬。似此犯法劣員。元展成止請革職。並無審擬字樣。顯係巧於徇庇。俟軍務竣後。將元展成交部嚴察議奏。○壬辰。辦理軍機大臣

等議覆。署陝西總督劉於義奏稱。肅州軍興以來。運糧車夫。採割草束夫役。俱係陝甘無業貧民。流寓傭作。以爲度日之計。不下萬人。目今大兵凱旋。此輩窮民。一無事事。難以自給。日則散在市廛。夜則寄宿古廟。日復一日。恐至流入匪類。應否令沿途地方官。給與口糧。派佐雜千把外委。解送回籍安插。應如所請。從之。○福建提督王郡摺奏。呂宋國以麥收歉薄。今附洋船。載穀二千石。銀二千兩。海參七百觔。來厦賣銀糴麥。多則三千石。少則二千石。臣查五穀不許出洋。律有明禁。今呂宋以穀易麥。臣與督臣撫臣。現在商酌。請旨欽定。得旨。朕統御寰區。內外皆爲一體。呂宋雖隔重洋。朕心竝無岐視。國家之所以嚴禁五穀。不許出洋者。乃杜姦商匪類。私販私載。暗生事端之弊。若該國偶然缺少米糧。以實情奏聞於朕。朕尚酌量豐餘以濟之。今呂宋以麥收歉薄。載穀易麥。更爲情理之當從者。

著該督撫等轉飭有司。按照穀麥時價。均平糴糴。不許內地之人。抑勒欺詐。俾番船載麥回國。以濟其用。竝將朕旨。傳諭來商知之。○癸巳。以翰林院編修張若靄署日講起居注官。○調黑龍江副都統常壽。署鑲紅旗滿洲副都統。○甲午。兵部議覆。署陝西總督劉於義疏言。寧夏鎮城。地處極邊。鎮標原設有中左右前後五營官兵。以資彈壓。緣雍正五年新設大通一鎮。將後營官兵。裁撥大通。止留中左右前四營。今請仍設五營。以成營制。再寧夏府城。原設有城守營都司一員。把總二員。專司門禁。於康熙四十七年。設寧夏審事官二員。裁去都司一員。止留把總二員。統歸中軍遊擊兼轄。但城守乃金湯重任。亦需大員專司。請將大壩堡都司。改爲寧夏城守營都司。統轄把總二員。其大壩堡添設千總一員。歸玉泉營遊擊管轄。均應如所請。從之。○乙未。以河南城守尉副都統銜白清格署鑲

白旗滿洲副都統○丙申諭辦理苗疆事務
王大臣等黔省逆苗不法擾害黃平一帶村
莊哈元生等領兵進剿逆苗雖聞風逃遁仍
復盤踞山梁爲負隅之技前已降旨授哈元
生爲揚威將軍專司征討惟是苗黨衆多地
方遼濶現調四省官兵甚多滇黔之兵從上
游前進湖廣之兵從下游前進其中相隔路
遠哈元生調遣難周湖廣提督董芳熟悉苗
地情形著授爲副將軍一切剿撫機宜著與
哈元生和衷協力公同辦理目前或應分領
夾擊將來如何彈壓安置俱著哈元生董芳
悉心籌畫務期妥協以副朕委任之至意董
芳著馳驛前往○以鑲紅旗漢軍副都統于
永世署本旗漢軍都統一等侍衛索拜署鑲
白旗滿洲副都統○辦理苗疆事務王大臣
等遵旨議奏黔省逆苗不法黨類衆多地方
遼濶現調四省官兵會剿衆至三萬前已授
哈元生爲揚威將軍統領官兵聽其調遣查

滇黔進剿之兵須從上游前進湖廣之兵須
從下游前進兩粵之兵須從黎平一路前進
古州兵分三路機勢各有不同哈元生一人
調度指示或恐鞭長不及轉致稽遲今湖廣
提督董芳熟悉苗疆情形已授爲副將軍與
哈元生協同料理查楚兵五千原係董芳所
轄應聽董芳調遣而粵東粵西官兵八千名
前進古州若古州等處無庸八千全數所餘
之兵應併令董芳統率調度至哈元生現駐
楊老地方其上游調來之滇黔漢土官兵共
一萬數千餘名應聽哈元生統率調度與董
芳分領夾攻毋致耽誤僅兩路有會合進擊
及彼此互調之處務令和衷商酌知會照應
不得參差重複有誤機宜至內地清理之後
哈元生即應酌帶各省鎮弁前進苗疆統率
剿撫而內地各寨應彈壓安置並於附近苗
疆要隘駐兵應援之處應令董芳辦理其哈
元生董芳所辦事件兩人互行知會並令知

會撫定苗疆大臣張照等及該省督撫再查各省官兵已陸續到黔理應速清內地急援清江乃內地逆苗仍然猖獗而清江勝秉猶未開通且文移往來猶從僻路遞送此中情由或係兵力未齊或係逆苗阻截應令張照哈元生等據實具奏又查調撥楚省官兵赴黔原爲保護城汛剿禦逆苗之用今青溪被攻既急鎮遠相去甚近何以鎮遠文武坐擁楚兵一千八百名之多竟不分撥救援以致縣城失守文武官員是何意見應令張照等一併秉公查奏從之○直隸總督李衛奏請來京陛見允之○丁酉諭內閣朕聞奉天地方凡事關旗民者俱送盛京刑部會審雖司員會同有司承審實皆司員主稿乃奉天司員積成陋習惟事威嚴一切人犯到案先將鎖鍊盤於地上令其膝跪謂之跪鎖繼以荆條互擊其背任意敲打謂之背花鞭又案無定限如上年八月間遼陽州民郭金美毆死

旗人裴玉亨一案旗員及知州會驗任聽屍親串同伴作混報多傷刑夾供認草率定擬本年閏四月內葛森到任始駁令另行驗審相距已十餘月尚未定案又筆帖式皆本處生長之人所司者不過繙譯之事乃當審訊之時輒亦列坐詰問此皆朕訪聞甚確者國家定例訊鞫人犯必須審問實情其應用刑訊者自有一定規條今奉天司員承審人犯於定例之外創爲跪鎖等項似此嚴刑重罰其中豈無冤濫至於筆帖式微員公然列坐審詰命案有乖體制以上二事著嚴行禁止儻再蹈陋習經朕察出定將該堂官及司員等一併嚴加議處至人命等案若無定限則拖累牽連之弊不可勝數嗣後應如何定限永遠遵行著盛京刑部侍郎會同該將軍悉心定議○陞直隸三屯副將高文涵爲廣東廣州左翼副都統○辦理苗疆事務王大臣等議奏黔省台拱屬九股逆苗不法竄入內

地侵犯城池肆行燒擄不法已極今將軍哈元生副將軍董芳等統兵會剿務將逆寨兇苗並造意勾引惡類痛加剿除不得姑息竣事庶使生熟諸苗有所懲戒至附近台拱諸苗有實係脅從者應令哈元生董芳按其情罪酌量辦理應行文撫定苗疆大臣張照等知之又查哈元生統領滇黔漢土官兵一萬有餘由楊老自西而東董芳帶楚兵五千由青溪自東而西地僅四百餘里兩路夾攻兵力自足敷用惟台拱等苗由清江出清平黃平等州縣外尚可由丹江而出都勻查八寨丹江之苗現在並未蠢動該協營額兵共有三千二百名足資防禦且都勻至清平路止兩站既有本營防守而董芳所統之兵亦易聯絡似可無庸增兵其黎平一路爲古州門戶官兵既進之後或匿遁諸苗以錦屏天柱等處防兵無多乘間竊發亦未可定應令董芳於兩粵八千兵內酌撥一千名駐劄黎平

府要隘之地以備應援剿捕之用又荔波縣係貴州廣西兩省交界之地雖新疆內有都江一協駐兵二千二百名而廣西又有慶遠一協貼近防範但進剿之後官兵調遣不時或苗衆逸出滋擾亦不可不預籌應行令廣西巡撫提督就近撥兵防禦又湖廣提督董芳統兵赴黔湖南皆係苗地且逼近黔苗亦須聲威彈壓應令荊州將軍袁泰挑派滿洲官兵一千二百名令副都統一員統領前往常德駐劄其官兵起程一應事宜應令總督邁柱照例料理從之辦理軍機大臣等議覆總理青海番子事務德齡等奏稱哈爾垓圖駐劄西寧大通綠旗兵二千名現遵旨議令撤回但噶斯一路設卡探信防護青海蒙古遊牧地方甚屬緊要應於青海扎薩克兵派二千名預備策應在內挑精兵二百名並選綠旗兵一百名派員統領在得布特里伊克柴旦木等緊要地方安設臺站卡倫按年

換班以資防護。應如所請。從之。○定邊大將軍平郡王福彭摺奏北路軍營撤兵事宜。京城滿洲大營兵。令叅贊前鋒統領阿岱。都統扣婁。副都統阿那布。副都統職銜紀山。帶領滿洲防戍兵。令內大臣都統查克旦帶領奉天兵。令副都統額爾勤。副都統白爾赫。曷帶領船廠兵。令副都統哲庫訥帶領齊齊哈爾兵。令副都統職銜和托克。副都統布爾沙。副都統職銜班圖帶領右衛兵。令都統王常帶領。內扎薩克蒙古兵。令科爾沁王羅卜藏喇錫。喀喇沁貝勒僧滾扎卜。教漢貝子羅卜藏等帶領歸化城土默特兵。令營總烏巴什等帶領。各給馬匹口糧。分爲隊伍。於六月初三日。至二十日。陸續起程。科爾沁額駙達爾瑪達都台吉滾濟扎布。亦令其起程。四省綠旗兵。俟總兵李如栢帶領新兵到營更換後。令總兵胡傑等帶領各回營汛奏入。報聞。

大清世宗敬天昌運建中表正文武英明寬仁
信毅大孝至誠憲皇帝實錄卷之一百五十七

大清世宗敬天昌運建中表正文武英明寬仁
信毅大孝至誠憲皇帝實錄卷之一百五十八

監修總裁官光祿大夫經筵講官太僕議政大臣保和殿大學士兼兵部尚書總理兵部事務第三等伯加十五級臣鄂爾泰

總裁官光祿大夫經筵日講官起居注太僕兼太子太僕保和殿大學士兼工部尚書仍兼管

第三等伯加十三級臣張廷玉光祿大夫經筵日講官起居注太僕議政大臣武英殿大學士兼工部尚書仍兼管

翰林院掌院事加二級臣福敏光祿大夫經筵講官太子太僕吏部尚書兼禮部尚書加六級臣陸永光祿大夫

經筵講官議政大臣協辦內閣大學士事務禮部尚書仍兼管太常寺鴻臚寺事臣三泰等奉

敕修

雍正十三年乙卯秋七月戊戌朔享

太廟遣誠親王允祕行禮○調鑲藍旗滿洲都
統查克旦為正紅旗蒙古都統○吏部等衙
門議覆四川總督黃廷桂條奏酉陽安設官
弁事宜一酉陽土司舊治請設知縣一員典
史一員分管西北二路所屬之龍潭鎮設縣
丞一員龔灘鎮設巡檢一員以資稽察酉陽
三合場地方請設知縣一員典史一員分管
東南二路所屬之石堤設巡檢一員專司查
緝一請設遊擊千總各一員把總三員馬步

兵五百名在三合場駐劄撥把總二員分防
邑梅洪安外委二員分防石堤濫泥灣設守
備千總把總各一員馬步兵三百名在酉陽
司治駐劄撥千總一員分防龍潭外委二員
分防龔灘大溪口俱隸重慶鎮統轄一重慶
鎮屬黔彭營另設都司一員管轄千總一員
把總二員兵三百名一石耶邑梅正長官司
請各給土千總職銜地壩副長官司給土把
總職銜均應如所請從之○己亥以翰林院
編修于辰為陝西鄉試正考官禮部郎中郭
石渠為副考官吏部右侍郎邵基為江南鄉
試正考官修撰周霽為副考官○庚子以故
喀爾喀固山貝子班第達子阿喇布坦襲爵
○辛丑湖南巡撫鍾保疏報益陽沅江二縣
開墾雍正十二年分田地三百五頃有奇下
部知之○旌表山東烈婦魚臺縣張倫妻關
氏強姦不污被刃殞命鉅野縣陳小變妻高
氏守正拒姦忿激自縊各給銀建坊入祠致

祭如例○壬寅浙江按察使楊弘緒緣事革職調湖北按察使胡瀛爲浙江按察使司按察使陞湖北糧道袁承寵爲湖北按察使司按察使○辦理軍機大臣等議覆署陝西總督劉於義等奏言沙州歷年採買糧石本年正屆收穫之期臣查截留哈密橋灣布隆吉爾軍糧雖多但沙州現無收貯糧石應仍採買各色糧一萬石多貯備用應如所請從之○癸卯諭辦理軍機大臣等據軍前副都統宗室諾穆柱倭星額奏侯馬蘭泰著傳諭大將軍平郡王令馬蘭泰回京朕有訊問之處○命署領侍衛內大臣伯伊勒慎正黃旗滿洲副都統覺羅蘇爾泰俱往北路軍營管轄兵丁○甲辰吏部等衙門議覆河東總督王士俊疏言山東曹州濮州泰安東平四直隸州零星錯處查曹州爲三省要區請陞爲曹州府裁知州州同學正吏目各缺設知府一員教授一員管糧通判一員經歷司獄各

一員附郭增置一縣設知縣縣丞典史各一員改州訓導爲新縣訓導將濮州裁去直隸州名目與所屬之范縣觀城朝城三縣及兗州府屬之單縣城武鄆城三縣并曹州原屬之曹縣鉅野定陶三縣俱隸曹州府管轄再泰安州古號神州控扼南北請陞爲泰安府裁知州州同學正吏目各缺設知府一員教授一員糧捕通判一員經歷司獄各一員附郭增置一縣設知縣縣丞典史各一員改州訓導爲新縣訓導將東平州裁去直隸州名目與所屬之東阿平陰二縣并泰安州原屬之萊蕪新泰肥城三縣俱隸泰安府管轄其東平州舊屬之陽穀壽張并曹州舊屬之嘉祥等三縣俱歸兗州府管轄又兗州府軍捕同知現駐桃源集地方兗州府黃河同知現駐曹縣望魯集地方俱應改屬曹州府另添兗州府總捕同知一員至泰安州樓德莊原有巡檢一員應請裁汰將新設糧捕通判駐

劉以資彈壓均應如所請從之○免江南沛
縣雍正十二年分水災額賦有差○乙巳諭
內閣前聞浙省海塘於本年六月初二日風
潮偶作衝決之處甚多朕心深爲軫念已降
旨詢問情由並令速行搶修以防秋汛今朕
訪聞今歲風潮不過風大水湧並非昔年海
嘯可比且爲時不久未有連日震撼衝汕情
形若平日隨時補苴防護謹密自不致潰決
如此之多總因數年來經理官員將舊日工
程視同膜外並不隨時修補且將原題准在
歲修業內報銷之工不許修築以致根脚空
虛處處危險不能捍禦風浪隆昇與程元章
等意見不合汪澤張坦麟但知隨聲附和
顧國家公事前因虐使民夫尅減石料經朕
降旨申飭畧知收斂然每石萬觔尚減價六
七折不等欲符原估六萬兩之數責令宕匠
包賠以致逃亡誤工平時廢弛若此何以抵
禦狂瀾朕不惜數百萬帑金冀以保全一方

民生而各官懷挾私意不知爲國爲民宜乎
上天垂象以示儆也目今秋汛正大搶修保護
最爲急務一切事宜俱交與隆昇程元章汪
澤張坦麟等悉心料理儻仍蹈前轍再有疎
虞致傷田廬民命必將伊等從重治罪不稍
寬貸郝玉麟既不據實奏聞亦不能置身事
外至於催募人夫採辦物料務須公平給值
聽從民便俾閭閻踴躍從事不得涉於勉強
或繩以官法刑驅勢迫擾累地方致負朕愛
養民生至意○諭九卿各省拏獲賭具查其
製造年月在半年之內者大小官員有議敘
之例所以獎勵臣工使之實心禁約賭博也
今朕訪聞各省拏獲賭具均稱造賣在半年
以內迨細心根究率多不實蓋地方官希冀
議敘未免支飾邀功所恃上司稽核精詳庶
幾功過不爽然上司又例得並敘苟非公正
不欺者勢必苟且雷同此朕訪聞最確者夫
賭博之害最關風俗人心澄源端本則賭具

在所必嚴計效責功則勸懲誠難偏廢然州縣身任查拏而上司則不過嚴爲督率本屬分內之事今因竝敘之例轉滋徇捏之端而不能收勸懲之實效應作何分別定例著九卿悉心妥議具奏○丙午調正藍旗漢軍都統承恩公納穆圖爲鑲黃旗漢軍都統陞正白旗漢軍副都統侯朱震爲正藍旗漢軍都統○總理青海番子事務湖北巡撫德齡等摺奏駐防哈爾琿圖之西寧大通綠旗官兵前經廷議令伊禮布等帶領撤回今兩處官兵已各回本汛併據伊禮布等咨繳原領欽差大臣關防一顆謹奏報聞○丁未

孝懿仁皇后忌辰遣官祭

景陵○諭辦理苗疆事務王大臣等前因黔省逆苗不法特令廣東廣西等省發兵會剿今聞兩粵之兵陸續到黔古州總兵韓勲將如何撥派安頓之處咨請提督哈元生指示而哈元生咨覆應聽督撫定奪朕思督臣遠在

滇省撫臣亦不在軍前哈元生身爲提督專領軍務自當即行辦理不應稍有遲疑或伊彼時未接到命爲將軍之旨故有聽候督撫定奪之咨覆今既命伊爲將軍董芳爲副將軍一應軍務均當就近相度機宜酌量情形速爲辦理勿似從前之猶疑遲滯以副委任爾等可傳諭哈元生等知之○又諭據廣西提督霍昇奏稱總兵王無黨等率領兩粵官兵七千餘名陸續已到古州分兵前往八寨剿殺逆苗七次斬獲甚多現與古州總兵韓勲酌議分撥進剿等語朕思古州地方爲新疆要地關係甚重韓勲等雖分兵攻擊八寨等處而古州尤不可忽若因古州地方現在無事而銳意剿賊將赴黔粵兵及該鎮兵丁俱派往八寨等處則古州地方兵力未免單弱不可不籌畫萬全且接連粵省彈壓尤爲緊要爾等速議具奏尋議古州鎮原設兵三千名應令總兵韓勲統領鎮守不使擅離汛

地或三千名之外再將兩粵官兵酌留若干以備彈壓應令王無黨韓勲相機定奪並行文知照哈元生董芳等則古州既可萬全而進剿之兵亦無顧此失彼之虞從之○戊申諭內閣浙閩江西等省有棚民之州縣朕皆留心揀發收令前往俾司化導董率之任蓋此等無業民人聚散無常往來莫定其間良頑不一易於藏姦若稽察稍疎必至漸為閭閻之擾向聞棚民留住之地方皆責成本處地主山主出具保結並非來歷不明之輩始許容留而牧令官員於每年歲底親往查點一次儻有作姦犯科而地主山主不行舉首者一體治罪此向例也今聞法久廢弛有司等視查點爲具文而地主山主亦以保結爲虛應故事大非朕除暴安良教民成俗之本意著該督撫等轉飭有司實力奉行毋或怠惰儻有不遵即行嚴叅從重議處若督撫失於覺察經朕訪聞亦必加以嚴譴○諭兵部

軍營撤回之兵丁今已漸次進口朕訪聞伊等進口之後見有酒肆往往入而沽飲雖目前尚無酗酒生事實蹟然將來撤回之兵甚多不能保其無麴蘖迷心而罹於法網者伊等俱係出征回家之人若因此獲罪朕自應執法若欲從寬而國法又豈可廢著該督撫轉飭州縣官嚴禁酒肆不得沽與軍營撤回之兵丁違者責懲并令該管之將弁等曉諭所轄兵丁各遵朕諭思患預防以副朕眷養之意○辦理苗疆事務王大臣等遵旨議奏台拱等處逆苗竄入內地黃平一帶俱遭擄掠

皇上念切民依令撫臣等加意撫綏又屢降諭旨有應留漕米賑恤之處即行截留臣等伏思湖南與黔省隣近賑恤應用米石俱在湖南運送爲便查湖南一省應運實米十三萬餘石請頒諭旨俱存留湖南爲黔省賑恤之用於就食之民深爲有益從之○旌表江南

嘉定縣烈婦黃狀妻唐氏守正拒姦。忿激投繯。給銀建坊。入祠致祭如例。○己酉。諭辦理苗疆事務王大臣等。黔苗肆逆。擾害地方。現今哈元生董芳等統領滇黔楚粵官兵。分路進剿。惟是苗衆負隅。一時或未即竣事。楚省官兵調往黔省者。已六千餘名。而湖南亦係苗疆。且緊接黔省之思恩鎮安等府。朕意欲令直隸浙江湖廣精練之兵五千名。前往常德辰沅等處分駐。以備彈壓調遣之用。著都統甘國璧前往常德。統率料理。其調派各官兵事宜。爾等詳議具奏。尋議。保定督標有新募前後兩營兵丁。應挑選二千名。熱河有練習火器營兵丁。浙江撫標城守等營有練習勇兵。湖廣有西路回營兵。善於山徑行走。應各挑選一千名。俱派大員管領。前往湖南。從之。○陞詹事府少詹事姚三辰爲內閣學士兼禮部侍郎。○吏部等衙門議覆陞任安徽巡撫王紘疏言。上江潁州亳州向俱爲直隸

州。查潁州界接豫省。地方遼濶。請陞爲潁州府。設知府一員。糧捕通判一員。經歷兼管司獄事一員。附郭增置一縣。設知縣縣丞。典史各一員。將亳州裁去直隸州名目。與所屬之蒙城太和并舊屬潁州之潁上霍邱共一州五縣。俱隸潁州府管轄。應如所請。從之。○刑部議覆革職署甘州提督劉世明縱兵爲盜冒餉侵帑各案。據署陝督劉於義等將劉世明請擬斬立決。盜犯陳金馮得朝孫賢佐吳珍周紹唐孫賢祿均依律不分首從皆斬立決。查劉世明由侍衛微員不次超擢。毫無感激圖報之心。在軍營則委靡退縮。署提督則苟且因循。以致兵丁剗奪橫行。將弁侵那任意。又私行索借。擅用公銀。核其情罪。無可寬貸。爲盜之兵丁陳金等亦應照例正法。得旨。劉世明陳金馮得朝孫賢佐吳珍周紹唐孫賢祿俱著即處斬。○浙江巡撫程元章疏報安吉餘姚等七州縣開墾雍正十二年分田

地一百五十三頃有奇。下部知之。庚戌以鑲藍旗漢軍都統李禧兼管正黃旗漢軍都統。調鑲紅旗漢軍副都統尚崇璧為正黃旗漢軍副都統。陞正紅旗叅領耿韜為鑲紅旗漢軍副都統。兼管正紅旗漢軍副都統。○辛亥。辦理軍機大臣等議覆。定邊大將軍平郡王福彭奏言。烏里雅蘇泰糧餉事務。請令侍郎雙喜留駐辦理。鄂爾昆糧餉事務。請令尚書性桂辦理。學士富德協辦。兼隨大將軍印務。應如所請。從之。○壬子。中元節。

上詣

恩佑寺行禮。遣官祭

永陵

福陵

昭陵

昭西陵

孝陵

孝東陵

景陵

孝敬皇后。○諭內閣。朕為浙省海塘宵旰焦勞。無時或釋。且不惜多費帑金。冀登斯民於衽席。年來所降諭旨。不下數十百次。隆昇程元章。汪澤張坦麟。皆朕特簡之大員。委以防川之鉅任。且訓諭諄諄。望其實力奉行。勉以和衷共濟。豈料伊等私心蔽錮。意見參差。但分彼此之形。全無公忠之念。安有身在地方。目覩堤岸空虛。而不督率屬員。先事預防。急為修補者。隆昇程元章。汪澤張坦麟。俱著交部嚴察議奏。○命故大學士浙閩總督謚文襄李之芳。入浙江省賢良祠致祭。從浙江巡撫程元章請也。○癸丑。以翰林院編修李文鏡為河南鄉試正考官。兵部郎中高顯貴為副考官。左春坊左贊善鄭江為山東鄉試正考官。編修于枋為副考官。左春坊左諭德嵇璜為山西鄉試正考官。工部主事吳煒為副考官。○甲寅。正白旗蒙古副都統郭多渾緣事。

革職。陞正白旗護軍叅領馬世塔為本旗蒙古副都統。署寧遠大將軍查郎阿摺奏。革職。荊州副都統觀音保。江寧副都統阿克山。久經枷號軍營。今大兵已撤。應否解京。送刑部監候。革職。寧夏將軍卓鼐。寧夏副都統僧保。西安布政使諾穆渾。俱在軍營當苦差効力贖罪。今大兵撤回。卓鼐等應令回旗。無庸仍留軍營。恭候欽定。得旨。觀音保。阿克山。從寬釋放。與卓鼐。僧保。諾穆渾。俱著自備鞍馬。前赴北路軍營。交大將軍平郡王。令其効力贖罪。○乙卯。大學士一等伯鄂爾泰疏奏。臣荷蒙

聖恩。由內務府員外郎。洊拔總督。簡授大學士。復賜以一等伯爵。殊恩異數。莫可名言。惟期竭愛奮勉。誓盡畢生之力。勤慎自効。此臣之素志也。不意邇年以來。舊疾時作。日益尪羸。雖仰賴

聖慈。賜醫賜藥。備極矜憐。而機務重任。恐致舛

錯。每念及此。眠食靡寧。再黔首苗疆一案。係臣奏請料理。今台拱九股諸苗。肆行反覆。擾累腹地。皆臣佈置未妥。籌慮未周之所致。罪無可辭。深切愧憤。本欲懇請指授親赴苗疆。協同該提鎮等商謀勦撫。而疾病糾纏。不能効力。苗疆以贖罪愆。若復不知慚懼。忝居爵位。臣何以自處。亦何以對人。懇乞

睿鑒。罷斥大學士職任。並削去伯爵。俾暫假調理。臣受恩深重。年未衰老。俟血氣少充。即當奏請差使。不論何職事。竭力効命。以至終年。斷不敢繫念身家。苟圖安逸。以負

皇上浩蕩之恩。得旨。卿才品優長。忠誠任事。歷任簡用。未負朕恩。今以抱病虛羸。不能辦事。懇請罷斥。情詞皆實。著解大學士之任。削去伯爵。俾得專心調攝。至於古州苗疆一案。從前石禮哈等數人。皆曾奏請用兵。征勦朕悉未允行。及鄂爾泰為滇黔總督。以為此事必應舉行。剴切陳奏。朕以鄂爾泰居心誠直。識

見明達。況親在地方。悉心籌畫。必有成算。始允所請。命其慎重辦理。彼時苗民相率向化。功成迅速。朕心嘉悅。特錫伯爵。以獎勲庸。國家賞功之典。自應如是。乃平定未久。苗即數次蠢動。近則直入內地。煽惑熟苗。焚劫黃平一帶。郡邑居民。受其擾害。朕詢問情由。鄂爾泰亦以出於意外為詞。是從前經理之時。本無定見。佈置未協。所致則朕一時之輕率誤信。亦無以自解。國家錫命之恩。有功則受。無功則辭。乃古今之通義。今鄂爾泰請削伯爵。於情理相合。朕鑒其忱悃。而俞允之。竝將前後情事。宣諭中外。以示吾君臣公而無私。過而不飾之意。○丙辰。諭內閣。浙江海塘工程。關係民生。最為緊要。朕宵旰焦勞。不惜多費帑金。為億萬生靈謀久遠久安之計。所以告誠在事臣工者。已至再至三矣。不料經理諸臣。各懷私意。彼此參差。以致乖戾之氣。上干天和。有今年六月風浪潰堤之事。今雖勉力搶

修。尚不知能捍禦秋潮否。至於建築石塘工程。浩大若諸臣陋習不改。仍似從前。則大工何所倚賴。朕再四思維。大學士朱軾。廉慎持躬。昔曾巡撫浙江。諳練塘工。今雖年逾七旬。精神不逮。而董率指示。似尚能為。朕以此詢問朱軾。自稱情願効力。著由水路乘船前往。令該部給與水程勘合。竝令沿途撥兵護送。伊子朱必塔著隨伊父去。朱軾到浙之日。稽察指受。總理大綱。至一切工程事務。仍著隆昇。程元章。汪滌。張坦麟等。照前辦理。俱聽朱軾節制。若大臣中有懷私齟齬者。著朱軾據實參奏。朕必嚴加處分。若文武官員等有營私作弊。或怠玩因循者。朱軾即行糾參。從重治罪。朱軾未到之先。所有應辦工程物料。著隆昇。程元章等。上緊辦理。毋得藉口等候。欽差徘徊觀望。以致稽遲。○福建巡撫盧焯疏報。福州興化等府。開墾雍正十二年分田地。四百六十四頃有奇。下部知之。○丁巳。諭內

聞大學士鄂爾泰乃暫時給假養病其俸銀俸米仍照舊支領○諭辦理軍機大臣等朕軫念鄂爾多斯貧乏蒙古有就食口內典賣妻子人口者前已降旨令該地方官查明賞給原價贖出照看安插今據史貽直等奏稱查出雍正十二三年邊民并延綏鎮及各將弁共買蒙古子女二千四百餘口其雍正十一年以前尚有邊民娶買乞養者今亦查出先將上年今年凡有典買蒙古人口細查贖回應否俱發夷漢衙門查明親屬轉交完聚之處相應請旨再米國正身為鎮臣首先倡買五名以致該將弁軍民人等效尤共買二十七口臣等不敢隱徇等語蒙古乏食貧民典賣子女其已經查贖人口朕另降旨詢問該扎薩克等情願領回者令其領回完聚儻有不願領回者再行商酌安插之法其未經查報人口務須清查辦理至米國正及將弁等因蒙古乏食用價收買俾得存養與尋常

典買蒙古人口有聞著將所買人口交出不必參處其雍正十一年以前邊民娶買乞養人口亦降旨詢問該扎薩克等有情願領回者賞給原價贖回其中若有歷年既久居處相安不願領回者即聽其存留免其查究嗣後該地方官務須嚴禁邊民不得娶買乞養蒙古人口儻有故違定例私自典買者一經查出從重治罪並將該地方官一併嚴加議處○署寧遠大將軍查郎阿等摺奏準噶爾使臣垂納木喀等於六月二十日到營臣等給以馬駝米麵茶羊等項派委副都統班第帶領官兵三百名自軍營護送起身已於六月二十七日出濶舍圖卡倫西去謹奏報聞○戊午移直隸副總河衙門駐劄固安縣從直隸總督李衛請也○旌表廣西平安縣烈婦韋金德妻賓氏拒姦不污被刃殞命給銀建坊入祠致祭如例○己未諭辦理軍機大臣等南稱族番民谷祿汪素克等來納貢馬

被郭羅克賊番劫奪現在嚴拏究擬至谷祿汪素克等據德齡等奏稱已給路費送回番民復願將馬價另行補交等語朕念該番補交馬價未免勞費著將今年貢馬免其交納調湖北布政使李世倬來京陞戶部郎中安圖為湖北布政使司布政使庚申諭辦理軍機大臣等西陲用兵以來甘肅等處民人急公効力甚屬可嘉是以朕屢沛恩膏免其正賦今年又將地丁錢糧全行蠲免所以優恤民力令其寬裕也今據巡撫許容奏稱五月接奉諭旨之時已據各屬詳報完納銀一十二萬餘兩查定例已完者充餉未完者免徵此項應照例充餉等語朕因嘉獎秦民奉公趨事是以特加格外之恩而其中爭先完課者尤為良善之民著將已完若干准其作來年正賦許容可傳旨速諭俾閭閻咸知朕意並督率有司實力奉行毋使胥吏土棍作弊中飽○又諭朕軫念行間將士從前曾

降諭旨令將陝西等省現出各缺於十缺之中分出三缺以陞補出征弁員數年以內隨征將弁各按出力等次俱得遞行擢用現今西路官兵次第撤回凡弁員之陞補他省者俱應各赴新任今據署大將軍查郎阿等奏稱將弁中有陝甘人員陞補直隸山西山東河南四川五省之千把伊等隨征年久俱從兵丁拔補今甫回本籍又遠赴新任或有無力攜帶家屬者若隻身遠去則家中又恐無人養贍可否將現在西路軍營之陝甘人員內陞補直隸等五省之千把仍留在陝甘各營食俸辦事遇缺挨補等語查郎阿等奏請之處甚是但伊等効力有年撤回之後留於本省候缺未免多需時日尚未允協著陝甘督撫提鎮將現任各千把之未經出征者分別查明如內有食俸年淺及未曾出力之人令其出缺候補其所出之缺即將軍營撤回之留陝千把悉行補用至該千把等既留陝

甘補用。則所遺直隸等五省原缺。應行拔補。查直隸等五省。亦有自軍前撤回。應補千把之人。著該督撫等。即將伊等補授此缺。儻撤回各弁。人多缺少。亦照陝省將俸淺未經出征之千把內。暫行出缺。補用伊等。以示朕體恤。從征弁員之至意。○兵部等衙門議覆。湖廣總督邁柱奏言。湖南添平。麻寮二所。向有世襲千百戶土官六十員。分任石門。慈利二縣。近年楚省土司。俱經改歸為流。今添平等所。正千戶覃慶永等。俱呈繳印信。劄付懇請辭職。查此等千百戶。既無防禦之責。亦無管束軍人之任。請將土官六十員。盡行裁汰。應如所請。得旨。土官覃慶永等。准其辭職。裁汰。但朕念伊等祖父。曾經隨征効力。不忍令其廢置。著賞給千把總職銜。准伊等子孫永遠承襲。若有年力精壯。情願隨營差操者。准其食俸効力。才具優長者。著該管大臣保題。照武職例陞轉。○河東總督王士俊疏報。山東

德州歷城縣成山衛浮山所等一百十五州縣衛所。開墾雍正十二年分田地二千頃有奇。下部知之。○辛酉。諭內閣。邁柱簡任封疆。宣力有年。著補授內閣大學士。來京辦事。湖廣總督員缺。著張廣泗補授。邁柱俟張廣泗到任。將總督事件。交代清楚。起程來京。查郎阿自領兵以來。所辦軍務。俱屬妥協。今大兵已撤。查郎阿著補授大學士。仍管理陝西總督印務。查郎阿回任後。著史貽直來京。劉於義經手事務甚多。著仍留肅州。給與欽差大臣關防。查郎阿回到肅州之日。將陝西地方事宜。及軍需案件。與劉於義悉心計議。分別辦理。奏聞請旨。劉於義俟軍需諸項告竣。請旨回京。○旌表河南長葛縣烈婦史文奇妻杜氏。守正拒姦。被勒殞命。給銀建坊。入祠致祭。如例。○壬戌。以故科爾沁多羅貝勒阿臘布坦子薩木丕爾扎木素襲爵。○癸亥。貴州台拱總兵官卜萬年。緣事革職。以貴州大定

副將紀龍署貴州台拱總兵官○甲子。雲貴總督尹繼善摺奏。黔省生熟頑苗勾結悖逆。焚劫重安凱里。攻陷黃平新州。圍困丹江鷄講。阻塞驛路。蔓延內地。臣咨會提臣哈元生親往清平。就近調度。并咨調湖廣廣西及雲南官兵策應。據陸續報捷。清平之賊屢經大定副將紀龍奮力勦殺。焚洗逆巢。叅將哈尚德連復新舊黃平二城。與副將紀龍合兵直至重安。渡江殺賊。副將周儀叅將崔傑都司陳思儀等俱率兵沿途勦散逆苗。乘勢恢復餘慶縣。隨搜洗山箐。拏獲賊首羅萬象等。廣西總兵王無黨率領粵兵二千五百名到黔。與古州總兵韓勲援勦八寨。廣東總兵譚行義率領廣東兵四千九百名。前赴古州協勦鎮遠一路。其湖南兵三千名。前已調往。因賊勢猖狂。分應不暇。臣隨委總兵王無黨統率粵兵。前至鎮遠。又湖北兵二千名。襄陽鎮總兵焦應林已經統率起程。大兵雲集。分路會

勦。焚洗逆巢數十。勦殺逆苗千餘。擒獲大賊首阿九。嚴加究訊。知大賊首枉汪等聚於空拜等寨。築室負固。隨嚴飭諸將併力擒勦。現在清平黃平餘慶平越等處俱已平定。鎮遠施秉偏橋都勻黎平俱無疎失。得旨據尹繼善奏報苗疆進勦情形。哈元生等所辦已有頭緒。其各省會勦兵丁業已敷用。前議前往常德駐劄之熱河保定浙江湖廣兵丁俱著停止。不必派調○乙丑。諭辦理軍機大臣等。西路官兵前因岳鍾琪調度失宜。諸事廢弛。遂致軍氣不揚。士心不振。自雍正十年查郎阿統兵以來。與張廣泗同心協力。事事整頓。時時訓練。凡行間將士俱知奮勇効力。營伍為之改觀。所以十一年及十二年賊人兩次侵犯卡倫。俱為我兵擒勦。未令免脫。賊人因我軍嚴整。畏憚懾伏。從前狡獪伎倆不敢復逞。此皆由查郎阿等辦理妥協之所致。今大兵撤回。查郎阿張廣泗俱著交部從優議敘。

再自雍正十年以後。調往西路之奉天船廠。索倫及蒙古官兵皆為奮勉。其中之勞績懋著。上等出力者。亦宜加恩獎勵。著查郎阿查明據實具奏。一併交部議敘。其未經著有勞績及岳鍾琪任內行走之人。不必開入。○工部議覆直隸河道總督朱藻疏奏滄州及交河縣官弁紳民捐輸土方物料。分別記功請照江南山東河南裁種柳葦之例。分別議敘等語。應令該督等造具捐輸數目。到日再議得旨。向來沿河文武官弁。有種柳葦議敘之例。遵行已久。不便停止。今若又添土方物料議敘之例。恐奉行不善。將來必滋弊累。凡本地方現任官弁。捐輸土方物料者。尤為不可。概不准行。若紳衿民人等情願捐輸者。著分別定例議敘。○丙寅。陞翰林院侍講學士春山為內閣學士兼禮部侍郎。○以倉場侍郎呂耀曾管理順天府府尹印務。○定邊大將軍平郡王福彭摺奏。臣等於六月二十二

日率領官兵自烏里雅蘇泰起程。七月十二日。至鄂爾昆。全軍陸續到齊。於鄂爾昆河厄爾得尼招遙北地方。擇二十日興工建城。謹奏。報聞。

大清世宗敬天昌運建中表正文武英明寬仁信毅大考至誠憲皇帝實錄卷之一百五十八

大清世宗敬天昌運建中表正文武英明寬仁
信毅大孝至誠憲皇帝實錄卷之一百五十九

監修總裁官光祿大夫經筵講官太僕寺卿弘文館大學士兼兵部尚書總理兵部事務等伯和十五級日鄂爾

總裁官光祿大夫經筵講官起居注太僕寺卿弘文館大學士兼兵部尚書總理兵部事務等伯和十五級日鄂爾

事三等伯和十五級日張廷玉光祿大夫經筵講官起居注太僕寺卿弘文館大學士兼兵部尚書總理兵部事務等伯和十五級日鄂爾

翰林院掌院書寫二級日福祿光祿大夫經筵講官太子太僕寺卿弘文館大學士兼兵部尚書總理兵部事務等伯和十五級日鄂爾

經筵講官議政大臣協辦內閣大學士事務禮部尚書仍署官太常寺鴻臚寺等事日三泰等奉

敕修

雍正十三年乙卯八月丁卯朔遣和親王弘

晝祭

先師孔子○戊辰祭

大社

大稷

上命

皇四子寶親王弘曆行禮○辦理軍機大臣等

議覆署寧遠大將軍查郎阿等摺奏巴爾庫

爾官兵撤回之後西北兩路軍營無庸兩相

傳報柰曼等處臺站俱可不設俟官兵起程

時應將柰曼等處及西路口外臺站全撤但
哈密橋灣等處尚有兵駐防往來遞送文報

請於馬蓮井子以東星星峽以西各派兵安

設馬塘每塘撥給馬六匹以供馳送應如所

請從之○已已諭辦理苗疆事務王大臣等

從來經理苗疆之意原因苗性兇頑久為地

方居民之害是以計議勦撫為久安百姓之

計若云利其民人則其人不遇如鳥獸之屬

若云貪其土地則其地本在吾版圖之中縱

使日久之後苗衆抒誠向化輸納錢糧計算

尚不及設汛養兵萬分之一然則國家果何

所利而為此哉乃逼近苗疆之緊要州縣設

兵不過三四十名全不足以資捍禦而逆苗

萌動之時文武官弁又皆在睡夢之鄉茫然

一無知覺今逆苗突入內地勾引熟苗肆行

搶掠良民遭其荼毒以安民之心而成害民

之舉朕與經理之大臣安能辭其過耶每當

讞獄之時遇身獲重罪之犯應加刑辟者朕

與執法之臣皆再四推研求其生而不可然後寘之於法此心尚應惻然其見小卑劣者尚欲賣法以爲陰德今黔省被害之民皆無罪之良民也我君臣目視其遭兇苗之慘禍如蹈湯火其幸得保全之民人此時當竭力撫綏勿憚煩勞勿惜公帑期登災黎於衽席若再稽查不力董率無方以救災恤困之資或飽汚吏貪官之腹不令窮民得霑實惠經朕訪聞必將大小官員在該省即時正法以示衆或有但知潔已而不能安插貧民者著該督撫即以溺職題叅不必論其向日之官聲稍爲寬貸其災黎避往之地方亦照此旨一體料理若視爲鄰省之事稍存怠忽之心朕亦必治以溺職之罪若將賑恤之項借名侵蝕者亦必即行正法貴州既有被害之州縣則運餉募夫俱須鄰郡接濟著將今年黔省錢糧通行蠲免其被賊殘害之州縣蠲免三年錢糧若有已徵在官者准抵下次應徵

之額賦著將此旨通行曉諭各省官弁兵民等咸使聞知○諭內閣從來滿洲風俗於尊卑上下之分秩然有禮即冠履亦從不濫置一處此風實應永爲典則當年聖祖皇帝惟恐古風漸遠時頒諭旨諄諄告誡朕即位以來敬謹奉行凡於本章奏摺中遇有

壇

廟等字者必敬謹捧持不敢置於牀座近見滿洲薰染漢習諸凡輕忽禮意漸弛竟有將稿案任意安放鞞鞞間者此風不可不嚴爲整飭以儆玩褻嗣後部院及八旗官員人等於一切稿案或置懷中或貯囊內皆可攜行不得夾帶鞞鞞之間該管上司務須嚴行查禁違者即行叅處如不實力遵奉經朕查出將該管上司必加嚴處○免江蘇泰州上元等二十州縣雍正十二年分水災額賦有差○庚午諭辦理苗疆事務王大臣等設兵所以

衛民乃爲政之要務是在封疆大臣相其形勢審其機宜籌畫布置於平時則偶遇宵小竊發而有先事預防之計民人自不至於大受其擾貴州地方苗衆雜處野性難馴況新疆初定之時尤爲巨測宜加意防範者乃黃平清溪等處緊要州縣僅有兵丁三四十名不但不能擊賊即看守城池亦甚不足以致賊苗猝然蠢動全無捍禦遭其戕害元展成職司巡撫身在地方平時竟在睡夢之鄉全無一念籌及亦無一語奏聞而逆苗萌動之時又復茫無覺察且上年哈元生奏請於安籠定廣思南等處添兵彈壓廷議交與該督撫查議而元展成又以減少議覆似此苟且因循今見醜類肆虐民人老幼困苦流離至此不知伊意中亦自悔從前經理之疎忽否耶尹繼善遠隔滇南且自到任以來即有元江普洱之事專心料理始得就緒安能慮及黔省此皆元展成貽誤地方之咎縱使痛懲

逆苗撫綏百姓俾得安插亦難解於從前溺職之罪若再不悉心籌畫多方經理或致被難貧民尚有不得其所者經朕訪聞必將元展成在黔省正法以爲負恩溺職者之戒○內大臣戶部侍郎海望摺奏臣前遵旨拏問傅爾丹今審事已畢臣自鄂爾昆起程派弁兵管押傅爾丹攜帶回京奏入報聞○裁江蘇彭城驛驛丞缺從江蘇巡撫高其倬請也○署湖南巡撫鍾保疏報巴陵等四縣雍正十二年分開墾蘆洲田地四十二頃有奇下部知之○辛未諭辦理苗疆事務王大臣等據直隸總督李衛奏稱保定訓練之兵聞挑選赴楚之旨無不感戴國恩爭先願往其中有偶患疾病畧覺軟弱及年力稍次存留在營者無不再三告懇叩頭垂涕驅之不去衆目共見竟有蔣廷貴者回寓自縊臣見兵氣勇銳如此不敢墮於上聞等語朕聞蔣廷貴之事深爲奇異此實向來綠旗兵丁中所未

聞者惟我滿洲舊俗見義必赴臨陣必先若徵兵選將之時已不得與則深以爲恥或以疾病衰頹而卒於牀第間妻子之手者則以不得致命疆場爲有生之大恨此等剛勁之概勇敢之氣與生俱來千萬人如出一心實能超越乎往古者也乃數十年以來承平日久人習安閒遂將急公趨事之古風漸漸改易每當出兵遠差之時雖求去者紛紛皆不過飾爲外貌而其實則胸懷退避並無勇往之誠心竟至派出統領之大臣不以爲朕榮任選用之恩而以爲上意不喜特令遠離服勞受苦者又或疑人讒譖而有此差者種種卑鄙私見不可悉數如發軍前効力字樣乃指獲罪之人賜以自新之路令其圖功贖罪豈衝鋒破敵之兵弁皆罪人之役乎若然則黑龍江寧古塔等處簡用之官員皆謂獲罪發遣可乎即如前年署副都統盧保具奏朕前恐伊該管大臣有意苛求派伊送馬苦差

似此偷安懶惰之人豈尚知有我滿洲夙昔之美俗乎蔣廷貴以一綠旗兵丁而迫欲効力戎行不獲如願遂捐軀命而不恤不知滿漢蒙古在內在外之弁兵等受國家多年爵祿養育之恩而存畏難退縮之念者聞蔣廷貴貴之事其亦負愧於心否耶著將此旨交與內外領兵大臣刊刻宣諭咸使聞知蔣廷貴著照陣亡兵丁例賞卹以示恩獎○諭八旗都統等軍前借支餉銀並非虧空可比乃該旗不行奏請濫行著落伊兄弟等名下坐扣錢糧還項甚屬錯謬著通行八旗查明具奏○兵部左侍郎喀爾吉善緣事革職轉兵部右侍郎通智爲左侍郎陞內閣學士希德慎爲兵部右侍郎○辦理軍機大臣等遵旨議奏伊都立原係重犯蒙聖恩寬其罪戾遣往軍前辦理糧餉事務復授爲額外侍郎乃心懷狡詐收受范毓麟等買米銀兩託言撤兵時投米於河誑報數目與

屬員分肥。又將軍需銀兩浮冒開銷侵蝕數萬情屬可惡。據大將軍平郡王內大臣侍郎海望等審明虧空款項。從重擬罪。應行正法。請交三法司速行定擬。以爲負恩貪婪之戒。得旨。三法司速行詳擬具奏。○壬申諭辦理苗疆事務王大臣等。黔省逆苗跳梁地方大受擾害。元展成身爲巡撫。平時經理粗疎。不能先事預防。今見百姓蹈於湯火。苟有人心。當痛自愧恨。籌畫撫綏。百姓之善策。以贖從前愆過。於萬一。乃伊具奏摺前來。竝無愧恥之意。且將賑恤視爲具文。據伊奏稱難民回籍之後。家私盡廢。不能謀食。酌給十日口糧。資其養贍等語。似此乏食窮民。豈十日之後便有餬口之計。是元展成意中。不過存賑恤之名。以塞巡撫之責。竝不計及百姓之果能賑恤也。又奏摺內敘述官兵擊賊情形。顯有不足。哈元生之意。則平日文武之不和可知。元展成身爲大臣。不能敦和衷之誼。其咎安

辭。且哈元生批將弁文書。有聽候督撫酌定之語。看此情形。非哈元生退縮不前。即係平日督撫掣肘矣。又如朕因軍務未定。暫緩元展成之處分。俟事畢論其功過。而伊奏稱皇上訓示督責之中。無非造就生成之意。臣何幸而得邀覆載鴻恩。至於此極等語。朕降旨事畢論其功過。是賞罰正在未定也。今伊公然爲此謝恩之奏。朕安能廢棄國家之大法。而獨私一元展成。別有生成之道耶。又如奏摺內。將前後用兵情形。糊塗開寫。竝未分晰明白。而但作頌聖之語。如恩同覆造。澤普窮簷之屬。頻見疊出。讀奏不休。不識元展成具何肺腸。而爲此奏。伊雖靦顏書寫。朕實無顏觀覽也。元展成著革職。暫留原任。戴罪効力。若賑恤窮黎一切事宜。有絲毫料理未善。必將元展成在黔省正法。以工部左侍郎顧祖鎮爲順天鄉試正考官。翰林院侍講學士戴瀚爲副考官。旌表湖南綏寧縣烈婦蘇

知選妻李氏守正拒姦被刃殞命給銀建坊入祠致祭如例○癸酉遣官祭

關聖帝君○甲戌秋分夕

月於西郊遣貝勒允禧行禮○吏部題湖廣總督邁柱陝西總督查郎阿已奉諭旨補授大學士其應加殿閣及兼尚書職銜恭候欽定得旨邁柱著爲武英殿大學士兼吏部尚書查郎阿著爲文華殿大學士兼兵部尚書○乙亥

太宗文皇帝忌辰遣官祭

昭陵○撥天津鎮左營羊兒莊嚴鎮汛等處弁兵歸靜海縣四黨口守備管轄從直隸總督李衛請也○丙子諭內閣傳臚著給都統銜并給俸祿○戶部議覆倉場總督宗室塞爾赫查丈熱河以東八旗地畝事宜○寬城驛等處驛站弁兵三項地畝共丈出三百九十八項有奇請照數按則輸糧歸於熱河兵糧內交納○義院口桃林口等處地畝共丈出

一百六十項有奇歸於承德撫寧等州縣按數陞科○南至長城北至喀喇沁東至科爾沁西至熱河地畝向照熱河莊頭以六畝爲一晌今共丈出十萬六千晌有奇請照上中下三則之例按晌納糧俱應如所請從之○命故戶部尚書原任浙江巡撫謚恭毅趙申喬入浙江賢良祠致祭從浙江巡撫程元章請也○丁丑

太祖高皇帝忌辰遣官祭

福陵○諭辦理苗疆事務王大臣等黔省逆苗不法擾害地方以致居民逃避於鄰省湖南接壤黔疆朕聞該督撫有司經理有方俾轉徙之災黎不至失所甚屬可嘉著該督撫將實心辦事之員記名俟事竣之後奏請議敘沅州切近黔省聞難民聚集者竟至萬人且雇募夫役赴黔運餉者又多係沅州之民除已降旨加增價值用示恩恤外朕念沅民急公趨事倍於他處著將沅州今年地丁錢糧

全行蠲免。若有已徵在官者。准抵明年應徵之額賦。著該地方官敬謹奉行。毋使胥吏侵蝕中飽。其雲南廣西近黔之郡縣。若有似此多養難民。努力趨事者。著該督撫查明具奏。朕必將該處官民亦加恩澤。其怠忽從事之官員。即著嚴叅。照前旨從重治罪。○添設浙江布政司衙門。廣豐等四倉大使一員。裁嘉興府稅課大使一員。從浙閩總督郝玉麟請也。○戊寅。予故散秩大臣副都統達羅。祭葬。

如例。○旌表山東魚臺縣烈婦周雲山妻呂氏。拒姦不污。被勒殞命。給銀建坊。入祠致祭。如例。○己卯。諭辦理苗疆事務王大臣等。數年以來。雲南地方屢有用兵籌餉之事。民力輓輸未免勞頓。朕心深為軫念。今聞元江普思等處軍務告竣。用是特沛恩膏。將本年通省地丁錢糧全行蠲免。俾滇民均霑實惠。若諭旨到日。有已徵在官者。准抵明年應納之正賦。著該督撫藩司。董率州縣官員敬謹奉

行。毋使胥吏土棍人等侵蝕中飽。以副朕加

惠滇民之至意。○命北路軍前內閣學士吳

金。護軍統領阿成。阿管轄家選兵丁。副都統

敦巴。副都統綽爾多。管轄牧場察哈爾兵丁

○實授徐杞為甘肅布政使。司布政使。○定

山東新設武定。沂州府學廩生增生各四十

名。取進文武童生各二十名。一年一貢。惠民

蘭山縣學廩生增生各二十名。取進文武童

生各十五名。二年一貢。從河東總督王士俊

請也。○旌表江蘇贛榆縣烈婦張世美妻劉

氏。守正拒姦。忿激投繯。給銀建坊。入祠致祭

如例。○辛巳。諭內閣。據直隸總督李衛奏進

遵化州

陵寢垣外地畝。及保定縣藉田。所產瑞穀多種。

並有一本九穗者。朕覽之不勝欣慶。朕常言

地方年穀之豐歉。在於督撫居官之感召。十

餘年來。留心體察。歷歷不爽。至於京師畿輔

之地。則內觀刑部讞獄之公私。外觀督撫政

令之得失。以爲雨暘休咎之本。總之感召之責。固在督撫。而用人之責。則在於朕。此中是非得失。朕實與督撫共之。所望內外大臣官員等。時時儆戒。刻刻提撕。信天道之昭垂。凜鑒觀之不遠。則豐亨有慶。災沴潛消。萬民共受其澤矣。朕素不言祥瑞。久已降旨。不令各省進獻嘉禾。今因瑞穀產於

陵寢地方。感

天

祖

皇考之昭示福應。信而有徵。特賜廷臣共觀。竝將朕敬慎乾惕之意。重加宣諭。期與諸臣共勉之。○壬午。諭八旗都統等。從前降旨。令八旗於朔望日。宣講

聖諭廣訓。以教誨兵民。俾知忠孝立身之大義。乃數年以來。各旗視爲具文。奉行不力。即或宣講。亦不過在各旗公衙門。及佐領家中。聽講之人。往往不能齊集。查八旗例。於每月逢

三逢八之日。齊集教場。操練兵丁。若於射箭之後。宣講

聖諭一二條。則地廣人多。於家喻戶曉之道。似有裨益。聞正藍旗漢軍。現在教場宣諭。著八旗照此通行。又聞皇城內。鑲黃旗。正黃旗。正白旗。侍衛教場。三處係挑選侍衛。操練弓馬之所。從前地動之後。牆垣傾圮。屋宇亦不堅固。著該管大臣。詳加驗勘。及時修葺。竝派人嚴加看守。毋得疎忽。○革鑲紅旗漢軍都統董象緯職。給都統銜。前往北路軍營。管領漢軍兵丁。効力贖罪。命石禮哈回京。○癸未。諭兵部。朕軫念出征弁員。已降旨。將軍營撤回千把人。員。即得缺補用。以獎勤勞。今思軍營兵丁中。有奮勇戎行。出衆効力。或臨陣對敵。得受恩賞。大將軍曾給以外委。委牌者。此等人回營之後。亦應即爲補用。著該管大臣。將伊等効力之處。查核明確。竝考驗其技勇。若現有外委之缺。即令頂補。如缺少人多。即將

現在外委人員內未曾出力而技藝生疎者令其出缺以軍前之外委頂補可傳諭直隸山陝等數省一體遵行○授先賢丹耕六十五代孫丹士樸五經博士世職○甲申辦理苗疆事務王大臣等遵旨議奏據哈元生奏報自五月初六日以後遣發滇黔楚粵各省官兵將難講丹江稿貢台拱柳羅清江各處俱已開通內地熟苗漸已勦洗軍聲大振頑苗喪膽現在令各鎮速靖新疆飭將弁察其逆寨兇苗造意勾引惡類痛加勦除其有實係被脅附從者如悔罪投誠繳械擒兇則姑予招安仍令其保護運糧等語查哈元生等料理雖有頭緒但新疆兇寨尚未盡勦除內地頑苗尚未盡搜洗乘此兵威若不痛加懲創恐頑惡者仍不知警戒將來又復蠢動貽害良民請敕令哈元生等毋得姑息完事凡造意勾引各寨以及附逆抗拒諸苗暨內地熟苗倡逆殺掠者斷難姑予招安哈元生董

芳等身在軍前自所深悉但無畏難就易邀功省事之心自能無枉無縱辦理允當至於上下兩江協營據哈元生奏內稱其始終安靜又古州諸處俱未經附逆此等順苗應令哈元生等宣諭曉示毋得收留逆苗致干國法其實係被脅不得已附從者果能悔罪投誠應察其誠偽分別料理得旨此番逆苗蠢動不比往時今大兵齊集務為地方久遠之計無罪者固不可株連而有罪者豈可容其漏網儻此時存姑息之見或希圖省事草率完結以致貽患於將來朕惟於張照哈元生是問○乙酉轉兵部尚書性桂為吏部尚書仍留軍營陞兵部左侍郎通智為兵部尚書以宗室鎮國將軍德沛為兵部左侍郎○丙戌諭辦理軍機大臣等北路軍營駝馬牲畜交與蒙古牧放聞未定倒斃數目以數萬牲畜經年牧放即倍加謹慎難保無一倒斃乃悉令蒙古賠補殊為可憫自軍興以來喀爾

喀蒙古等甚屬効力。今特沛恩施嗣後交與伊等之牲畜。一年於一百匹內。倒斃六匹以下者。免其賠補。如倒斃不至定數酌量賞賜。以示鼓勵。著行文大將軍平郡王等曉諭衆

蒙古知之。○正藍旗滿洲都統帶領寧古塔將軍杜賚。咨送補授協領佐領等人員引見得旨。保送佐領之同海當差日淺。且並無出征効力之處。若即行補授。反致年久勞績之人不得進用。甚不合理。著駁回。爾等行文杜賚。將年久効力人內。揀選保送。○雲南巡撫張允隨疏報蒙化府開墾雍正十二年分田地二十六頃有奇。下部知之。○丁亥。

上不豫。仍照常辦事。○戊子。

皇四子寶親王弘曆皇五子和親王弘晝。朝夕侍側。戊刻。

上疾大漸。召莊親王允祿。果親王允禮。大學士鄂爾泰。張廷玉。領侍衛內大臣公豐盛。額訥。

親。內大臣戶部侍郎海望。至寢宮前。大學士鄂爾泰。張廷玉。恭捧上御筆親書密旨。

命

皇四子寶親王弘曆爲皇太子。即皇帝位。少頃皇太子傳

旨。著莊親王允祿。果親王允禮。大學士鄂爾泰。張廷玉。輔政。○己丑。子刻。

上崩。○遺詔曰。自古帝王統御天下。必以敬

天法

祖爲首務。而敬

天法

祖皆本於至誠。至誠之心。不容一息有間。是以宵旰焦勞。無日不兢兢業業也。朕蒙

皇考聖祖仁皇帝爲

宗社臣民計。慎選於諸子之中。命朕繼承統緒。

紹登大寶。夙夜憂勤。深恐不克負荷。惟仰體

聖祖之心。以爲心仰法

聖祖之政以爲政勤求治理撫育蒸黎無一事不竭其周詳無一時不深其祇敬期使宗室天潢之內人人品行端方八旗根本之地各奉公守法六卿喉舌之司綱紀整飭百度維貞封疆守土之臣大法小廉萬民樂業十三年以來竭慮殫心朝乾夕惕勵精政治不憚辛勤訓誡臣工不辭諄復雖未能全如期望而庶政漸已肅清人心漸臻良善臣民徧德遐邇恬熙大有頻書嘉祥疊見朕秉此至誠之心孜孜罔釋雖至勞至苦不敢以一息自怠方冀圖安保泰久道化成今朕躬不豫奄棄臣民在朕身生本無生去來一如但我皇考聖祖仁皇帝付託之重至今日雖可自信無負而志願未竟不無微憾實親王皇四子弘曆秉性仁慈居心孝友

聖祖皇考於諸孫之中最爲鍾愛撫養宮中恩逾常格雍正元年八月間朕於乾清宮召諸王滿漢大臣入見面諭以建儲一事親書諭

旨加以密封收藏於乾清宮最高之處即立弘曆爲皇太子之旨也其後仍封親王者蓋今備位藩封諳習政事以增廣識見今既遭大事著繼朕登基即皇帝位仰賴上天垂佑

列祖貽謀當茲寰宇乂安太平無事必能與億兆臣民共享安寧之福至於國家刑罰禁令之設所以詰姦除暴懲貪黜邪以端風俗以肅官方者也然寬嚴之用又必因乎其時從前朕見人情澆薄官吏營私相習成風罔知省改勢不得不懲治整理以戒將來今人心共知儆惕矣凡各衙門條例有從前本嚴而朕改易從寬者此乃從前部臣定議未協朕與廷臣悉心斟酌而後更定以垂永久者應照更定之例行若從前之例本寬而朕改易從嚴者此乃整飭人心風俗之計原欲暫行於一時俟諸弊革除之後仍可酌復舊章此朕本意也向後遇此等事則再加斟酌若有

應照舊例者仍照舊例行自今以後實願內外親賢股肱大臣念朕朝乾夕惕之苦衷仰答

皇考聖祖仁皇帝利益

社稷蒼生之誠念各秉忠良屏除恩怨一心一德仍如朕在位之時共相輔弼俾皇太子弘曆成一代之令主則朕付託得人追隨

列祖

皇考在天之靈亦可不愧不忤矣弘曆仰承

祖宗積累之厚受朕訓誨之深與和親王弘晝同氣至親實爲一體尤當誠心友愛休戚相關親正人行正事聞正言勿爲小人所誘勿爲邪說所惑

祖宗所遺之宗室宜親國家所用之賢良宜保自然和氣致祥綿

祖宗

社稷萬年之慶矣莊親王心地醇良和平謹慎但遇事少有擔當然必不至於錯誤果親王

至性忠直才識俱優實國家有用之材但平日氣體清弱不耐勞瘁儻遇大事諸王大臣當體之勿使傷損其身若因此而損賢王之精神不能爲國家辦理政務則甚爲可惜大學士張廷玉器量純全抒誠供職其纂修聖祖仁皇帝實錄宣力獨多每年遵旨繕寫上諭悉能詳達朕意訓示臣民其功甚鉅大學士鄂爾泰志秉忠貞才優經濟安民察吏綏靖邊疆洵爲不世出之名臣此二人者朕可保其始終不渝將來二臣著配享太廟以昭恩禮其應行儀制悉遵成典持服二十七日釋服布告天下咸使聞知○是歲十一月丁未恭上

尊謚曰

敬天昌運建中表正文武英明寬仁信毅大孝至誠憲皇帝

廟號

世宗 乾隆二年三月庚寅辰時葬

泰陵（一）

上在位十有三年。壽五十有八。

上以聖神文武之資。際累洽重熙之盛。膏澤決於八埏。聲教孚於萬國。紀綱整飭而實本乎寬仁。法度嚴明而悉原於慈愛。運一心之經畫。垂百世之規型。施之有序而出之有原。蓋聖人之德。無以加於孝。孝者仁之本也。

上在藩封四十餘年。奉侍

聖祖仁皇帝深蒙眷愛。曲盡孝思。視膳問安。婉愉靡間。守身秉禮。誠一不移。友愛弟兄。多方調護。而大公至正。無黨無偏。

聖祖知可以爲

宗社臣民主。故授之天下。迨續承丕緒。善繼善述。行一政。必體

聖祖之遺意也。出一令。必承

聖祖之遺訓也。乃至素服三年。永懷孺慕。瞻御容而愴懷霜露。詣

山陵而灑泣松楸。纏綿懇摯。一出於至性之不

容已孝之至。仁之至也。由是而

郊壇禋祀對越加虔。夙夜冰兢。明威時凜。此天心佑而雨暘順應也。上稽成憲。紹述不忘。考核史書。編摩盡一。此

祖德彰而燕翼貽休也。

經筵時御。睿論精深。

宸藻頻頒。天章炳煥。致隆禮於

先師。崇王封於五代。官制增於闕里。祭器頒自內廷。詣學談經。園橋門而觀聽者數千人。

此天德王道之大本。而政治以時而出也。夫行政以愛民爲要。而安民以用人爲先。內而卿尹庶僚。外而封疆大吏。以及守令百職。崇卑必見。詢問必周。黨援袒護之必懲。狡詐貪污之必斥。公忠者倚任之。雖有小過而卒保始終。廉能者獎拔之。雖至累誤而卒仍錄用。守土之將弁。亦勗以和衷。勵之廉節。莫不丁寧訓誡。令其大法小廉。以行其懷。保元元之至意。用是蒸黎疾苦。休戚相關。四方水旱。每


勞宵旰營水利於京畿免浮糧於南國倉庾屢發數輒逾乎萬千。災沴偶萌膏不屯於旬日。蠲賦之詔疊下。弭盜之條屢申。何其周以溥也。刊律例以曉愚蒙。慎桁楊以敬庶獄。奏當之案。裁決必親。勾到之時。哀矜倍切。省淹繫而釋囹圄之苦。憫瘡癘而定流竄之方。何其愷以惻也。下及從征之士。許以更番。退老之弁。加之半俸。借餉未償。則俯恤軍興而免之。吉凶有急。則分貯帑金以賙之。何其澤沛戎行。膏流洋溢也。又念庶官之備。由於得士。是以鑠闡廣額。書院賜金。開繙譯之科。舉鴻博之典。下第之士。給以歸資。又詢其所就。而隨才器使之。俾俊乂畢登。而庶績咸理也。風化之原。由於表率。是以祈年耕藉。訓儉興仁。進八旗而示誠。專節使以觀風。戒澆漓之舊習。敦謹樸之淳風。而四方丕變。從欲以治也。上之保綏兆庶。既合遐邇而同仁。而撫輯遠人。亦徧要荒而一視。準噶爾侵擾邊域。則命將

興師苗疆諸寨頑梗行殘。則遣兵進剿。武功赫濯威讐數千里之外。及其輸誠向化。納土歸心。則宥其前愆。俾之寧宇。又若允安南之請地。減朝鮮之貢粟。徂維求定。遠至則安。要亦擴其胞與之懷。使之共享昇平之福而已。他若篤本支而置宗室覺羅之學。禮前代而錫明裔侯爵之封。秩風雷先蠶等祀。以答神庥。立賢良昭忠等祠。以褒臣節。增祿糈於百官。厚養與於藩服。養耆老。恤孤幼。德洋恩溢。天下皆感興於覆冒之內。夫凱以強教。弟以悅安。二者恒相爲用。故大聖人仁育義正。無非教也。上臨御十有三年。勵精圖治。惟日孜孜。凡所爲。官方吏治。立紀陳常。一本乎精明強固之才。以行其震動恪恭之意。即因時制宜於聖祖之法。稍有變通。而實皆體聖祖之心。以爲心。所謂孝思維則。永錫爾類也。是以

天庥協應符貺游臻珠聯璧合之祥甘露慶雲
之瑞黃河清醴泉出麟鳳芝草嘉禾之屬屢
年疊見而

聖不自聖益加懋勉弗懈以勤中外又安人心
康樂風俗日以敦龐民物日以暢遂迨乎
龍馭上賓敷天雪涕如喪考妣至矣哉自唐虞
三代之盛未有過於此日者洵足光
列聖之貽謀而永裕萬年之福祚者矣

大清世宗敬天昌運建中表正文武英明寬仁
信毅大孝至誠憲皇帝實錄卷之一百五十九



統一書號: 11018·1355—8

定價: 45.00 元